

# পবিত্র বাইবেল

নয়া নিয়ম | রংপুরী ভাষা

The New Testament in Rangpuri

# মথি

১ বাছাই করা রাজা যীশুর গুপ্তির তালিকা; রাজা যীশু দায়ূদের গুপ্তির, আর দায়ূদ অব্রাহামের গুপ্তির মানষি।

২ অব্রাহামের বেটা ইসহাক, ইসহাকের বেটা যাকব, যাকবের বেটা যিহূদা আর যিহূদার ভাইলা,

৩ যিহূদার বেটালা পেরস আর সেরহা, (এই দুই জনের মাও হইলেক তামরা) পেরসের বেটা হিষ্রোণ, হিষ্রোণের বেটা রাম,

৪ রামের বেটা অমীনাদব, অমীনাদবের বেটা নহশোন, নহশোনের বেটা সল্লোন,

৫ সল্লোনের বেটা বোয়স, (বোয়সের মাও হইলেক রাহবা) বোয়সের বেটা ওবেদ, (ওবেদের মাও হইলেক রুত) ওবেদের বেটা যিশয়,

৬ যিশয়ের বেটা রাজা দায়ূদ। দায়ূদের বেটা শলোমন, (শলোমনের মাও উরিয়ের বিধুয়া বউ)

৭ শলোমনের বেটা রহবিয়াম, রহবিয়ামের বেটা অবিয়, অবিয়র বেটা আসা,

৮ আসার বেটা যিহোশাফট, যিহোশাফটের বেটা যোরাম, যোরামের বেটা উষিয়া,

৯ উষিয়ার বেটা যোথমা, যোথমার বেটা আহস, আহসের বেটা হিঙ্কিয়া,

১০ হিঙ্কিয়ার বেটা মনঃশি, মনঃশির বেটা আমোন, আমোনের বেটা যোশিয়,

১১ যোশিয়ার বেটা যিকনিয় আর যিকনিয়ের ভাইলা, (ইমারলার জন্ম হয় যেলা ইজ্রায়েল জাতিক বন্দী করি বাবিল নামের দেশত নিয়া গেইলেক)।

১২ বাবিল দেশত নিয়া যাবার পাছত যিকনিয়ের বেটা শল্টিয়েলের জন্ম হয়, শল্টিয়েলের বেটা সরুবাবিল,

১৩ সরুবাবিলের বেটা অবীহুদ, অবীহুদের বেটা ইলিয়াকীম, ইলিয়াকীমের বেটা আসোর,

১৪ আসোরের বেটা সাদোক, সাদোকের বেটা আখীম, আখীমের বেটা ইলীহুদা,

১৫ ইলীহুদার বেটা ইলিয়াসর, ইলিয়াসরের বেটা মত্তন, মত্তনের বেটা যাকব,

১৬ যাকবের বেটা যোষেফ, এই যোষেফ হইলেক মরিয়মের সোয়ামি, আর মরিয়মের গর্ভত যীশুর জন্ম হয়। উয়াক বাছাই করা রাজা কওয়া হয়।

১৭ এই জনের হাইলচার নাকান অব্রাহাম থাকি দায়ূদ পর্যন্ত চৌদ গুষ্টি, দায়ূদের পর থাকি বাবিলত নিয়া যাওয়া পর্যন্ত চৌদ গুষ্টি,

আর বাবিলত নিয়া যাওয়ার পাছত থাকি রাজা যীশুর আইসা পর্যন্ত চৌদ্দ গুটি।

১৮ রাজা যীশু খ্রীষ্টের জন্ম এই নাকান করি হইলেক। যোষেফের সোদে যীশুর মাও মরিয়মের বিয়ার নিরক্ষণ হইচে। কিন্তুক উমরা দুইজনে সোয়ামি-ভার্জা হিসাবে একটে থাকির আগতে পবিত্র আত্মার শক্তিতে মরিয়ম গাওভারী হয়।

১৯ এই বাদে নিরক্ষণ করা মরিয়মক যোষেফ গোপনে ছাড়ি দিবার চাইলেক। কেনেনা উয়ায় ধার্মিক মানষি আছিলেক আর মানষিলারটে মরিয়মক নিন্দাত ফেলের চাইলেক না।

২০ যোষেফ যেলা এই নাকান চিন্তা ভাবনা করির ধরচে, সেলা পরম প্রভুর এক জন স্বর্গদূত স্বপনে দেখা দিয়া কইলেক, “দায়ুদ বংশের যোষেফ, মরিয়মক বিয়াও করির ভয় না খাইস। কেনেনা উয়ার গর্ভত যে ছাওয়া আছে, ঐটা পবিত্র আত্মার শক্তির মইন্ধো দিয়া সিড্জন হবার ধরচে।

২১ দেখ, মরিয়ম একটা চ্যেংড়া ছাওয়ার জন্ম দিবে, ছাওয়াটার নাম থুবু যীশু। কেনেনা এই যীশুই উয়ার নিজের মানষিলাক পাপ থাকি মুক্তি দিবে।”

২২ এইলা ঘটিলেক যে, মেলা বছর আগত ভাববাদীর মইন্ধো দিয়া যেইলা কতা ভগবান কইচে সেইলা পূরণ হয়:

২৩ এক জন কুমারী চ্যেংড়ি গাওভারী হবে, আর উয়ার একটা চ্যেংড়া ছাওয়া হবে। উয়াক ইম্মানুয়েল কয়া ড্যেকাবে। (এই

নামের মানে হইলেক, “হামার সাথত ভগবান।”)

২৪ আর যোষেফ নিন থাকি উঠিয়া প্রভুর স্বর্গদূত যে নাকানে করির কইলেক, ঐ নাকানে করিলেক। উয়ায় মরিয়মক বিয়াও করিয়া বাড়ি নিয়া গেইলেক।

২৫ কিন্তুক মরিয়মের গর্ভের ছাওয়াটার জন্ম না হওয়া পর্যন্ত যোষেফ মরিয়মের সাথত সহবাস করিলেক না। আর ছাওয়াটার জন্ম হবার পাছত যোষেফ নাম খুইলেক যীশু।

২ য়েলা হেরোদ যিহুদীয়া প্রদেশের রাজা আছিলেক, সেই সমায় বৈৎলেহেম গেরামত যীশুর জন্ম হয়। আর পূবপাকের দেশ থাকি কয়েক জন পন্ডিত যীশুর খোজ করির আসিলেক। উমরা যিরুশালেম গঞ্জত আসিয়া পুছিলেক,

২ “যিহুদী মানষিলার যে রাজা জন্ম হইচে, উয়ায় কোটে? কেনেনা পূব পাকে দ্যাওয়াত উয়ার চিন হিসাবে হামরা একটা তারা দেখিচি। উয়াক ভক্তি করির আসচি।”

৩ এই কতা শুনিয়া রাজা হেরোদ আর যিরুশালেমের সউগ মানষিলার মন অস্থির হইলেক।

৪ হেরোদ সউগ প্রধান বামনলাক আর যিহুদী আইন কানুনের পন্ডিত মানষিলাক ডেকেয়া পুছিলেক, “বাছাই করা রাজাটা কোটে জন্ম হবার পারে?”

৫ উমরা উয়াক কইলেক, “যিহুদীয়া প্রদেশের বৈৎলেহেম গেরামত জন্ম নিবে, কেনেনা ভগবানের আগের কালের ভাববাদী এই নাকানে নেখি গেইচে,

৬ হে বৈৎলেহেমের গেরাম, যিহুদা প্রদেশের গেরামলার মইদ্বোত তুই কোন মতেই ছোট না হইস, কেনেনা তোর মইদ্বো থাকিই এমন এক জন শাসনকর্তা আসিবে যায় মোর ইজ্রায়েল জাতিক লালন-পালন করিবে।”

৭ হেরোদ সেয়লা পন্ডিতলাক একখান গোপন জাগাত ডেকেয়া জানি নিলেক যে, ঠিক কোন সমায় তারাটা দেখা গেইছিলেক।

৮ এইটা জানিয়া উমারলাক কইলেক, “তোমরা যায়া ভাল করি ছাওয়াটাক খোজেন। উয়াক খুজি পাইলে মোক জানাবেন, যাতে মুইও ছাওয়াটারটে যায়া ভক্তি দিবার পাং।”

৯ রাজার কতা শুনিয়া পন্ডিতলা চলিয়া গেইলেক। উমরা পূব দেশ থাকি দ্যাওয়ার যেই তারাটা দেখছিলেক, ঐ তারাটা উমার আগে আগে যাবার নাগিলেক। ছাওয়াটা যেটে আছিলেক, ঐ ঘরের উপরাত আসিয়া তারাটা থামিলেক।

১০-১১ তারাটা দেখিয়া পন্ডিতলা আল্লাদে আত্মহারা হয়। ঐ ঘরটাত সোন্দেরা ছাওয়াটাক আর ছাওয়াটার মাও মরিয়মক বগলত দেখির পাইলেক। উমরা সেয়লা হাংকুড়া পাড়িয়া ছাওয়াটাক ভক্তি দিলেক। আর উমার বাক্স খুলিয়া সোনা, গন্ধরস, আতর উপহার দিলেক।

১২ ইয়ার পাছত ভগবান পন্ডিতলাক স্বপন দেখেয়া সাবধান করি দিলেক, যাতে উমরা হেরোদেরটে আর ফিরি না আইসে। আর উমরা অইন্য ঘাটা দিয়া নিজের দেশত ফিরি গেইলেক।

১৩ পন্ডিতলা যাবার পাছত পরম প্রভুর এক জন স্বর্গদূত স্বপনে যোষেফক দেখা দিয়া কইলেক, “ওঠেক! ছাওয়াটা আর ছাওয়াটার মাক নিয়া মিশর দেশ পালেয়া যা। আর যত দিন মুই না কং, ততদিন পর্যন্ত ওটেকোনা থাকেক। কেনেনা ছাওয়াটা মারি ফ্যেলের বাদে রাজা হেরোদ ছাওয়াটাক চান্দাবে।”

১৪-১৫ সেলো যোষেফ উঠিয়া ছাওয়াটা আর ছাওয়াটার মাক নিয়া রাতি বেলা মিশর দেশ চলি গেইলেক। আর হেরোদ না মরা পর্যন্ত ওটে রইলেক। এই ঘটনাটা ঘটিলেক যাতে যে কতা ভগবানের আগের কালের ভাববাদীটার মইন্দো দিয়া কওয়া হইচে, সেইলা পূরণ হয়। প্রভু কইলেক, “মুই মিশর থাকি মোর বেটাক ডেকেয়া আনলুং।”

১৬ হেরোদ জানির পাইলেক যে, পন্ডিতলা উয়াক ঠকাইচে। এই বাদে উয়ায় খুব রাগ হইলেক। পন্ডিতলারটে থাকি যে সমায়ের কতা জানির পাইচে, সেই সমায়ের হিসাব মতন দুই বছর আরো উয়ার কম বয়স থাকি শুরু করি যত চেংড়া ছাওয়া বৈংলেহেমের বগলা-বগলি জাগাত আছিলেক, সৌগলাকে মারি ফ্যেলের হুকুম দিলেক।

১৭ সেলো ভগবানের ভাববাদী যিরমিয়র এই কতা পূরণ হইলেক,

১৮ রামায় গঞ্জত দারুন কান্দন শোনা গেইলেক, রাহেল উয়ার ছাওয়ালাৰ বাদে কান্দির ধরচে, কিছুতেই ঝিত হবার ধরচে না, কেনেনা উমরা আর কাণ্ডো বত্তি নাই।

১৯ হেরোদ মরি যাবার পাছত পরম প্রভুর এক জন স্বর্গদূত মিশর দেশত যোষেফক স্বপনে দেখা দিয়া কইলেক,

২০ “ওঠেক, এই ছাওয়াটাক আর উয়ার মাক সাথত নিয়া ইজ্রায়েল দেশত ফিরি যা, কেনেনা উমরা যায় যায় এই ছাওয়াটাক মারি ফ্যেলের চেষ্টা করচে উমরা সগায় মরি গেইচে।”

২১ যোষেফ সেয়া উঠিয়া ছাওয়াটা আর ছাওয়াটার মাক ইজ্রায়েল দেশ নিয়া গেইলেক।

২২ কিন্তু যোষেফ সেয়া শুনিলেক যে যিহুদীয়া প্রদেশের হেরোদের বেটা আর্থিলা রাজা হইচে, সেয়া উয়ায় ওটে ফিরি যাবার ভয় খাইলেক। পাছত স্বপনে সাবধান হওয়ার বাণী পয়া গালীল প্রদেশত গেইলেক।

২৩ আর নাসারত নামে একটা গেরামত যায়া বসবাস করির নাগিলেক। মেয়া দিন আগত ভগবানের ভাববাদী কইচে যে, “উয়াক নাসারতীয় কয়া ডেকা হবো।” এই কতা পূরণ হবার বাদে ঘটনাটা ঘটিলেক।

৩ সেই সমায় দীক্ষাদাতা যোহন যিহুদীয়া প্রদেশত আসিয়া নিধুয়া পাথারত যায়া প্রচার করির নাগিলেক;



২ সেলো উয়ায় কইলেক, “স্বর্গের শাসন ব্যবস্থা বগলত আসচে! পাপের ঘাটা থাকি মন ফিরান!”

৩ যোহনের সমন্ধে ভগবানের আগের কালের ভাববাদী যিশাইয় কইচিলেক, নিধুয়া পাথারত এক জন চিকিরিয়া কবার ধরচে, পরম প্রভু আসির নাগচে, এই বাদে ভ্যেকরা ঘাটা ঠিক কর, উয়ার ঘাটা সোজা কর!

৪ যোহন উটের লোমের কাপড় পিন্দির ছিলেক, আর উয়ার কমড়ত আছিলেক চামড়ার পেটি। উয়ায় খাবার খাইচে বড় বড় কুকতি আর জঙলের মধু।

৫ সেলো গোটায় যিহুদীয়া, যিরুশালেম আর যর্দন নদীর চাইরো পাক থাকি মানষিলা উয়ার বগল যাবার নাগিলেক।

৬ যেলো মানষিলা নিজ নিজ পাপ স্বীকার করিলেক, সেলো যোহন উমারলাক যর্দন নদীত দীক্ষা দিলেক।

৭ কিন্তু দীক্ষা দেওয়া কালে মেয়ো ফরীশী আর সদূকী দলের ধর্মগুরুও আসিচে। এই দেখিয়া যোহন উমারলাক কইলেক, “কিরে কাল সাপের গুটির ঘর! ভগবানের শাস্তি নামি আসির ধরচে, এই থাকি পালেবার বুদ্ধি কায় তোমারলাক দিলেক?”

৮ তোমরালা যে পাপের ঘাটা থাকি মন ফিরাইচেন, তার সঠিক ফল দেখাও।

৯ মনে করেন যে, ভগবান এই শিললা থাকি অব্রাহামের বাদে বংশ সিদ্ধন করির পায়। এই বাদে তোমরা না কন যে, ‘হামরা

মহাপুরুষ অব্রাহামের বংশ বুলিয়া কিছু দোষ হবার না হয়।’

১০ ভগবান এলাও বিচারের বাদে গছের শিপাত কুড়াল নাগে দিয়ায় আছে, আর যে গছত ভাল ফল ধরে না, ঐলা গছক কাটিয়া অগুনত ছোবা দেওয়া হবে।

১১ তোমরালা পাপের ঘাটা থাকি মন ফিরাইচেন বুলিয়া মুই তোমারলাক জল দিয়া দীক্ষা দিবার ধরচুং। মোর পাছত যায় আসির ধরচে উয়ায় মোর থাকি শক্তিবান, উয়ার ঠ্যংএর জুতা উবিবার যোগ্যতা মোর নাই। উয়ায় তো তোমারলাক পবিত্র আত্মা আর অগুন দিয়া দীক্ষা দিবে।

১২ উয়ায় খোলান থাকি ফসলের পাতান পরিস্কার করির বাদে তৈরি হয়্যা আছে। বাতাসত বাও দিয়া একপাকে পাতান অইন্য পাকে ফসল যুদা করি গোলাত তুলিবে। কিন্তু যেই অগুন কোন দিন নিভে না সেই অগুনত পাতান ছোবা দিবে।”

১৩ সেই সমায় যীশু দীক্ষা নিবার বাদে গালীল থাকি যর্দন নদীত যোহনেরটে আসিলেক।

১৪ যোহন উয়াক দীক্ষা দিবার চাইলেক না। যোহন কইলেক, “এইটা ঠিক না হয়। বরং মোর তোমারটে দীক্ষা নেওয়া উচিত, আর তোমরা আসচেন মোরটে!”

১৫ যীশু কইলেক, “এলা এই নাকানে হবার দেও! কেনেনা প্রভুর ইচ্ছা এই নাকান করি হামারলার পূরণ করা উচিত।” সেয়া যোহন দীক্ষা দিবার রাজি হইলেক।

১৬ দীক্ষা নিয়া যেয়ো যীশু জল থাকি উঠিয়া আসিলেক,  
সেয়োয় সেয়োয় স্বর্গের দুয়ার খুলি গেইলেক। উয়ায় ভগবানের  
আত্মাক কইতরের রূপ ধরিয়া উয়ার উপরাত নামি আসির  
দেখিলেক।

১৭ সেয়ো স্বর্গ থাকি ভগবানের আওয়াজ শোনা গেইলেক,  
“তুইয়ে মোর বেটা, মোর মনের এক জন। তোর উপরাত মুই খুশি  
আছং।”

৪ ইয়ার পাছত পবিত্র আত্মা যীশুক নিধুয়া পাথারত নিয়া  
গেইলেক, যাতে শয়তান অসুর পাপত ফেলের পরীক্ষা করির  
পায়।

২ ওটে যীশুক চল্লিশ দিন চল্লিশ রাতি উপাস থাকির পাছত ভোগ  
নাগিলেক।

৩ সেয়ো শয়তান অসুর আসিয়া কইলেক, “তুই যদি পরমপ্রভুর  
বেটা হইস, তাইলে এই শিললাক রুটি হবার কঃ।”

৪ যীশু কইলেক, “শাস্ত্রত নেখা আছে, মানষি খালি রুটিতেই  
বত্তি রয় না, কিন্তু ভগবানের মুখের পতিটা বাইক্যতেই বত্তি রয়।”

৫ সেয়ো শয়তান অসুর যীশুক পবিত্র গঞ্জ যিরুশালেম মন্দিরের  
চুড়াত নিয়া যায়া কইলেক,

৬ “তুই যদি পরমপ্রভুর বেটা হইস তাইলে নিচাত ঝাপাও, কেনেনা শাস্ত্রত নেখা আছে যে, তোর কোন ক্ষতি যাতে না হয়, উয়ায় স্বর্গদূতলাক আদেশ দিবে, উমরা তোক হাতের তালাত ধরিবে, যাতে তোর ঠেংয়ত শিলের চোট না নাগে।”

৭ যীশু শয়তান অসুরক কইলেক, “শাস্ত্রত নেখা আছে, তোমার পরমপ্রভুর পরীক্ষা করেন না।”

৮ শয়তান অসুর সেলো উয়াক খুব উচা একটা পাহাড়ত নিয়া গেইলেক আর সউগ রাজ্যের ধন সম্পদ দেখাইলেক।

৯ শয়তান কইলেক, “তুই যদি মাটিত উবুরি হয় মোক ভক্তি করিস, তাইলে এইলা সউগে মুই তোক দিম।”

১০ সেলো যীশু উয়াক কইলেক, “দূর হঃ শয়তান! কেনেনা শাস্ত্রত নেখা আছে, পরমপ্রভুই তোর ভগবান। তুই খালি উয়াকে ভক্তি করিবু, আর উয়ারে সেবা করিবু।”

১১ সেলো শয়তান অসুর উয়াক ছাড়িয়া চলি গেইলেক, আর স্বর্গের দূতলা আসিয়া যীশুর সেবা করির নাগিলেক।

১২ যীশু শুনিলেক যে যোহনক জেলত বন্দী করি থোয়া হইচে। এই বাদে উয়ায় যিহুদীয়া প্রদেশ ছাড়িয়া গালীল প্রদেশত চলি গেইলেক।

১৩ পইলাতে নাসারত গেরাম গেইলেক। তার পাছত কফরনাহুম গঞ্জত যায়া রইলেক। এই গঞ্জটা হইলেক গালীল সাগরের বগলত, সবুলুন আর নপ্তালি এলাকার একটা গঞ্জ।

১৪ এইটা হইলেক যাতে আগের কালের ভাববাদী যিশাইয়ের কতা পূরণ হয়:

১৫ যর্দন নদীর পশ্চিম পাকে, সবুলুন আর নপ্তালি দেশ! গালীল দেশের সাগরের পারত, যেটেকোনা অযিহুদীলার বসবাস।

১৬ ওটেকার যেই মানষিলা আন্ধারত বসবাস করে, উমরা ভইভইয়া আলো দেখির পাইচে। যায় মরণের আন্ধারের দেশত রয়, উমারটে বেলা উঠিচে।

১৭ ঐ সমায় যীশু প্রচার করা শুরু করিলেক, “তোমরা মন ফিরান, কেনেনা স্বর্গের শাসন ব্যবস্থা বগলত আইসচে।”

১৮ এক দিন যীশু গালীল সাগরের বগল দিয়া যাবার ধরছিলেক। উয়ায় দুই জন জালুয়াক দেখির পাইলেক। উমারলার নাম শিমোন (যাক পিতর কওয়া হয়) আর উয়ার ভাই আন্দ্রিয়। উমরা সাগরত জাল ফ্যেলেয়া মাছ ধরির ছিলেক।

১৯ যীশু উমাক কইলেক, “মোর সাথত চল, মুই তোমাক শিখাইম, ক্যেমন করি ভগবানের ঘাটাত মানষিক আনিবেন।”

২০ আর সেলোয় সেলোয় উমরা জাল ফ্যেলে খুইয়া যীশুর পাছত গেইলেক।

২১ ওটে থাকি আগে যায় যীশু আরো দুই জন মানষিক দেখির পাইলেক। উমরা হইলেক সিবিদয়ের বেটালা যাকব আর যোহন। যীশু দেখিলেক একখান নৌকাত বসিয়া উমরা বাপের সাথত জাল সিলাই করির ধরচে। যীশু উমাকও ডেকাইলেক,

২২ আর সেলোয় সেলোয় উমরা নাও আর বাপক ছাড়িয়া যীশুর  
নগত গেইলেক।

২৩ তার পাছত যীশু গালীলের সউগ জাগাত ঘুরিয়া ঘুরিয়া  
যিহুদীলার উপাসনা ঘরলাত য়ায়া শিক্ষা দিবার নাগিলেক, আর  
স্বর্গের শাসন ব্যবস্থার ভাল খবর প্রচার করিলেক। আর উয়ায়  
মানষিলার সউগ নাকানের অসুখ ভাল করির নাগিলেক।

২৪ সুরিয়া দেশের সউগ জাগাত উয়ার কতা ছড়াছড়ি হয়  
পড়িলেক। এই বাদে নানা নাকানের মেলা অসুকিয়া মানষিলাক  
ভাল করির বাদে উয়ারটে নিয়া আসিলেক। উমরা হইলেক বাত  
বিষে জরাজির্ণ, অপদেবতা ধরা, মৃগী রুগী, নুলা রুগী। আর  
যীশু উমারলাক সগাকে ভাল করিলেক।

২৫ মেলা মানষি গালীল থাকি, ডিকাপলি থাকি, যিরুশালেম  
থাকি, যিহুদীয়া থাকি আরো যর্দনের ঐপার থাকি আইসা  
মানষিলাও যীশুর পাছে পাছে যাবার নাগিলেক।

৫ মানষির ভিড় দেখিয়া যীশু পাহাড়ের উপরা চড়িলেক। আর  
উয়ায় পাহাড়ত বসিতে কালে শিষ্যলো উয়ার বগলত আসিলেক।

২ সেলো উয়ায় শিষ্যলোক এই শিক্ষা দিবার নাগিলেক,

৩ “যায় যায় নিজ অন্তরত গরীবের মতন নত-নম্র, ভগবান  
উমাকে এই আশুর্বাদ করে যে, স্বর্গের শাসন ব্যবস্থা উমারলারে।

৪ যায় যায় শোক করে, উমাকে ভগবান এই আশুর্বাদ করে যে, উমরালায় সান্তনা পাবে।

৫ যার যার স্বভাব নম্র, ভগবান উমাকে এই আশুর্বাদ করে যে, দুনিয়া উমারলারে হবে।

৬ যায় যায় মনে-পরানে ভগবানের ইচ্ছা পালন করি চলির চায়, উমাকে ভগবান এই আশুর্বাদ করে যে, উমারলার ইচ্ছা পূরণ হবে।

৭ যায় যায় দয়ালু, ভগবান উমাকে এই আশুর্বাদ করে যে, উমরলা দয়া পাবে।

৮ যার যার অন্তর খাটি, ভগবান উমাকে এই আশুর্বাদ করে যে, উমরলা ভগবানক দেখির পাবে।

৯ যায় যায় মানষির জীবনত শান্তি আনিবার বাদে পরিশ্রম করে, ভগবান উমাকে এই আশুর্বাদ করে যে, উমারলাক ভগবানের ছাওয়া কয়া ডেকা হবে।

১০ ভগবানের ইচ্ছা পালন করির যায়া যায় যায় অইত্যাচার সহ্য করে, ভগবান উমাকে এই আশুর্বাদ করে যে, স্বর্গের শাসন ব্যবস্থা উমারলার।

১১-১২ “মোর শিষ্য হবার বাদে, মানষিলা যেয়ো তোমারলাক মিথ্যাবাদী কয়া নানা গেলানি আর অইত্যাচার করে, সেয়ো ভগবান তোমাকে এই আশুর্বাদ করে যে, স্বর্গত তোমার মেয়ো পুরুষ্কার আছে। এই বাদে খুশি হয়্যা আমোদ করো। আর আগের

কালের যে ভাববাদীলা আছিলেক, মানষিলা এই নাকান করি উমারলাকও অইত্যাচার করির ছিলেক।”

১৩ “তোমরা দুনিয়ার নুন। নুনের নোস্তা স্বাদ যদি হারে যায়, তাইলে কেংকরি ঐ স্বাদ ফিরি আনিবেন? বিনা স্বাদের নুন কোনো কামত নাগে না। ঐলা বায়রাত ফ্যেলে দেওয়া হয়, আর মানষি ঠ্যেং দিয়া খচে।

১৪ “তোমরা দুনিয়ার আলো। পাহাড়ের উপরাত কোনো গঞ্জ থাকিলে নুকি রবার পায় না।

১৫ কাণ্ডোয় গচা জ্বলে ডেলি দিয়া ঢাকি থোয় না, কিন্তু গচা জ্বলেয়া ঠগার উপরাত থোয়। ঠগার উপরাত খুইলে ঘরের সউগ মানষি আলো পায়।

১৬ একে নাকান করি তোমারলার আলো মানষিলার আগত জ্বলুক, যাতে তোমারলার ভাল কাম দেখিয়া তোমারলার স্বর্গের বাপের গুণকিত্তন করে।”

১৭ স্যেলা যীশু কইলেক, “মুই যে মোশির বিধান আর আগের কালের ভাববাদীলার নেখা বাতিল করির আসচুং, এই নাকানে চিন্তা করেন না! মুই এইলা পূরণ করির আসিচুং, বাতিল করির আইসং নাই।

১৮ মুই তোমারলাক সচাং করি কবার ধরচুং, দ্যাওয়া-দুনিয়া যত দিন থির থাকে, বিধানের সউগ কতা পূরণ না হওয়া পর্যন্ত, ঐ বিধানের এক তিল কি কোনো কিছু মুছি যাবে না।



১৯ এই বাদে কাণ্ডেয় যদি আদেশলার মইন্ধো থাকি কোনো একটা ছোট্ট আদেশ পালন না করে, বা কোনো আদেশ মানি না নিবার শিক্ষা দেয়, তাইলে উয়াক স্বর্গের শাসন ব্যবস্থাত সউগ চায়া ছোট্ট কওয়া হবে। কিন্তু কাণ্ডেয় যদি আদেশলা পালন করে আরো শিক্ষা দেয়, উয়াক স্বর্গের শাসন ব্যবস্থাত বড় কওয়া হবে।

২০ মুই তোমারলাক শিখাং যে, পন্ডিত আর ফরীশীলা যেমন করি বিধির বিধান পালন করে, উমারলার চায়া আরো ভাল করি পালন না করলে, তোমরালা স্বর্গের শাসন ব্যবস্থাত কোনো দিন সোন্দের পাবেন না।”

২১ “তোমরা এই কতা শুনিচেন, হামার বাপ ঠাকুরদাক কওয়া হইচে যে, ‘মানষিক খুন করেন না’, আর ‘কাণ্ডেয় যদি খুন করে উয়ায় বিচারত দন্ড পাবে।’

২২ কিন্তু মুই তোমারলাক শিখাং যে, কাণ্ডেয় যদি উয়ার ভাই-বইনির উপরা গোসা করে উয়ায় বিচারের দন্ডত পড়িবে। কাণ্ডেয় যদি উয়ার ভাই-বইনিক গালি পাড়ে উয়ায় দশের সভাত দন্ড পাবে। আর কাণ্ডেয় যদি উয়ার ভাই-বইনিক কয় তুই গেয়ান-বুদ্ধিহীন, উয়ায় নরকের অগুনত পড়িয়া ছোবা যাবে।

২৩ “যেহা তুই যজ্ঞের থানত নিজের দান সঁপে দিবু, সেহা যদি ঐ জাগাত তোর ফম পরে যে তোর বিরুদ্ধে তোর ভাই-বইনির কোনো কতা আছে,

২৪ সেলোয় সেলোয় তুই দান যজ্ঞ থানের বগলত খুইয়া চলিয়া যা, আর ভাই-বইনির নগত বিষয়টা মিটিয়া নিয়া ফিরিয়া আসিয়া তোর দান সাঁপে দে।

২৫ “তোর বিরুদ্ধে কাণ্ডেয় যদি মামলা করে, তুই ঘাটাত পচ-পচে কাচারি যাবার আগত মিমাংসা করেক। আর ঐ কাম না করিলে তোক বিচারকের হাতত দিবার পারে। আর বিচারক কি করিবে? উয়ায় তোক পুলিশের হাতত দিবার পারে। সেলো পুলিশ তোক জেলত ভরে খুবে।

২৬ মুই তোমারলাক সচাং করি কবার ধরচুং, পুরা টাকা-পাইসা বুঝি না দেওয়া পর্যন্ত ওটে থাকি তুই কোন মতে রেহাই পাবু না।”

২৭ যীশু কইলেক, “তোমরা শুনিচেন আর এই কতা কওয়া হইচে, ‘ব্যভিচার করেন না,’

২৮ কিন্তু মুই তোমারলাক শিখাং যে, কাণ্ডে যদি বেটিছাওয়ার ভিতি কাম ভাব নিয়া দেখে, উয়ায় সেলোয় সেলোয় মনে মনে উয়ার সোদে ব্যভিচার করিলেক।

২৯ “একে নাকান তোমারলার ডাইন চোখু যদি পাপের ঘাটাত টানি নিয়া যায়, তাইলে ঐ চোখুটাক তুলিয়া ফ্যেলে দেও, কেনেনা গোটায় দেহা নরকত যাবার থাকি একটা অঙ্গ ক্ষতি করা ভাল।

৩০ যদি তোমার ডাইন হাতও পাপের ঘাটাত নিয়া যায় তাইলে একে নাকান করিয়া, হাত কাটিয়া ফ্যেলে দেও। তোমার গোটায়

দেহা নরকত যাবার থাকি একটা অঙ্গ ক্ষতি করা ভাল।”

৩১ যীশু কইলেক, “এইটাও কওয়া হইচে যে ‘আপন মাইয়াক কাণ্ডো যদি ছাড়ি দেয়, উয়ায় একখান চিঠিত নেখি ছাড়িয়া দেউক।’

৩২ কিন্তু মুই তোমারলাক শিখাং যে, কাণ্ডো যদি আপন মাইয়াক ব্যভিচারের দোষ ছাড়া অইন্য কোন কারনে ছাড়িয়া দেয়, তাইলে উয়ায় ব্যভিচারিণী হবার ঘাটাত নামে দেয়। আর যে কাণ্ডো ঐ মাইয়াক বিয়াও করে, উয়ায়ও ব্যভিচার করে।”

৩৩ “তোমরা এই কতা শুনিচেন, হামার বাপ ঠাকুর দাদালাক কওয়া হইচে যে, ‘কিরা কাটিয়া ভাঙেন না, ভগবানের আগত যেইলা কিরা কাটেন, সেইলা সউগ পূরণ করেন।’

৩৪ কিন্তু মুই তোমারলাক শিখাং যে, কোনো কিরা কাটেন না। স্বর্গের নামে কিরা কাটেন না, কেনেনা এইটা হইলেক ভগবানের সিংহাসন।

৩৫ দুনিয়ার নামেও কিরা কাটেন না, কেনেনা এই দুনিয়া উয়ার ঠ্যেং থুবার জাগা। আর যিরুশালেমের নামেও কিরা কাটেন না, কেনেনা এই গঞ্জটা মহারাজার।

৩৬ এমন কি তোমার মাথার নামেও কিরা কাটেন না, কেনেনা তোমার মাথার একটা চুলি তোমারলার সাদা কি কালা করির হিন্দুদ নাই।

৩৭ তোমরা ‘হ্যে’ কইলে ‘হ্যে’ হউক, আর ‘না’ কইলে ‘না’ হউক, ইয়ার বেশী যেইটা, সেইটা শয়তানেরটে থাকি আইসে।”

৩৮ “তোমরা শুনিচেন আর এই কতা কওয়া হইচে যে, ‘দাতের বদলে দাঁত, চোখুর বদলে চোখু,’

৩৯ কিন্তু মুই তোমারলাক শিখাং, কাণ্ডোয় যদি তোমারলার নগত বেয়া আচরন করে উয়ার বিরুদ্ধে কোনো প্রতিশোধ নেন না। যে কাণ্ডোয় তোমারলার ডাইন গালত চর মারে, উয়াক দোসরা গাল পাতিয়া দেও।

৪০ আর যে কাণ্ডো তোমারলার জামার বাদে মামলা করে, উয়াক তোমার দেহার গিলাপখানও দিয়া দেও।

৪১ কাণ্ডো যদি উয়ার বোঝা ধরিয়া তোমারলাক এক মাইল যাবার বাধ্য করে, উয়ার সাথত দুই মাইল যাও।

৪২ তোমারলারটে কাণ্ডো কোনো কিছু চাইলে দিয়া দেও, আর যে কাণ্ডো তোমারলারটে ধার চায়, ‘উয়াক না দিম’ কয়া অস্বীকার করেন না।”

৪৩ “তোমরা শুনিচেন আর এই কতা কওয়া হইচে যে, ‘তোমরা পাড়া-পড়শিক পিরিত’ করো ‘আর শত্রুক ঘিন খান,’

৪৪ কিন্তু মুই তোমাক শিখাং, শত্রুলাক তোমরা পিরিত করো। যায় যায় তোমারলাক অইত্যাচার করে উমার বাদে প্রার্থনা কর।

৪৫ মানষিলা যেন দেখির পায়, তোমরালা সচাং করি স্বর্গের বাপের ছাওয়া। উয়ায় তো ভাল বেয়া সগারে উপরাত বেলার আলো দেয়। যায় ধার্মিক আর যায় অধার্মিক, সগাকে ঝরি দেয়।

৪৬ যায় যায় তোমারলাক পিরিত করে তোমরা খালি উমাকে পিরিত করেন, তাইলে তোমরা কেংকরিয়া পুরস্কার পাবেন? মিথ্যাবাদী মাসুল আদায়কারীলাও তো একে নাকান করে!

৪৭ আর তোমরা খালি তোমার নিজের ভাই-বইনির মঙ্গল কামনা করিলে, তোমরা অইন্য মানষির থাকি এমন কি বেশী ভাল করিলেন? অবিশ্বাসীলাও তো এই নাকান করে।

৪৮ এই বাদে কবার ধরচুং, তোমারলার স্বর্গের বাপ যেমন খাটি, তোমরালাও একে নাকান খাটি হন।”

৬ “সাবধান হন! মানষিক দেখা ভগবানের ধর্ম-কর্ম করেন না, যদি করেন, স্বর্গের বাপেরটে থাকি কোন পুরস্কার পাবেন না।

২ “এই বাদে তুই যেলা গরীব মানষিক দান করিবু, সেলা ঢাক ঢোল বাজেয়া দান করিস না। ভন্ড মানষিলা তো মানষির প্রশংসা পাবার বাদে উপাসনা ঘরলাত আর ঘাটায় ঘাটায় ঢাক-ঢোল বাজেয়া দান করে। মুই তোমারলাক সচাং করি কবার ধরচুং, উমরালা তো উমারলার পুরস্কার পায়া গেইচে।

৩ কিন্তু যেলা তুই গরীব মানষিক দান করিবু, সেলা তোর ডাইন হাত কি করির ধরচে, সেটা বাও হাতক জানির দিস না।

৪ এই বাদে তোমরা যা কিছু দান করিবেন সেটা যেন গোপনে হয়। তাইলে তোমার স্বর্গের বাপ, যায় গোপনে সউগ দেখে, উয়ায় তোক পুরুস্কার দিবে।”

৫ “তোমরালা যেলা প্রার্থনা করেন, সেলা ভন্ডলার নাকান করি প্রার্থনা করেন না। কেনেনা উমরা মানষিক দেখেবার বাদে উপাসনা ঘরলাত, ঘাটার মোড়ে মোড়ে খাড়া হয় প্রার্থনা করির ভাল পায়। মুই তোমারলাক সচাং করি কবার ধরচুং, উমরা আপন আপন পুরুস্কার পয়া গেইচে।

৬ কিন্তু তুই যেলা প্রার্থনা করিস, সেলা তোর ঘর সোন্দেয়া দুয়ার ঝাপেয়া তোর স্বর্গের বাপ যাক দেখা যায় না উয়ারটে প্রার্থনা করেক। তাইলে তোমার স্বর্গের বাপ, যায় গোপনে সউগ দেখে, উয়ায় তোক পুরুস্কার দিবে।

৭ “আর তোমরা প্রার্থনা করির সমায় অবিশ্বাসীলার নাকান ফাউকসালি কতা বার বার মুখত আনেন না। অবিশ্বাসীলা মনে করে বেশী বেশী কতা কইলে ভগবান উমারলার প্রার্থনা শোনে।

৮ এই বাদে তোমরা উমারলার মতন হন না। কেনেনা তোমারলার যা যা দরকার, সেইলা চাওয়ার আগত তোমারলার স্বর্গের বাপ জানে।

৯ এই বাদে তোমরা এই নাকান করি প্রার্থনা কর: হে হামারলার স্বর্গের বাপ, তোর নাম পবিত্র বুলিয়া মানা হোক।

১০ তোর শাসন ব্যবস্থা আসুক, তোর ইচ্ছা যেই নাকান স্বর্গত ঐ নাকান দুনিয়াত হোক।

১১ হামারলার দরকার মতন খোরাক হামারলাক আজি দে।

১২ যায় যায় হামারলার উপরত অন্যায় করে, হামরা যেই নাকান উমারলার অন্যায় ক্ষমা করচি, তুইও হামারলার সউগ অন্যায় ক্ষমা করেক।

১৩ তুই হামারলাক কোন লোভত পরির না দিস, কিন্তু শয়তানের হাত থাকি রক্ষা করেক।

১৪ “তোমরা যদি অইন্য জনের দোষ ক্ষমা করেন, তাইলে তোমার স্বর্গের বাপ তোমারলার দোষ ক্ষমা করিবে।

১৫ কিন্তু তোমরা যদি অইন্য জনের দোষ ক্ষমা না করেন, তাইলে তোমার স্বর্গের বাপ তোমারলার দোষ ক্ষমা করিবে না।”

১৬ “আর তোমরা যেয়ো উপাসে থাকিবেন, সেয়ো ভন্ডলার নাকান মুখ কালা করিয়া রন না। উমরা তো মানষিক দেখেবার বাদে মুখ কালা করে। মুই তোমারলাক সচাং কবার ধরচুং, উমার পুরস্কার উমরা পাইচে।

১৭ কিন্তু তোমরা যেয়ো উপাসে থাকিবেন, সেয়ো মুখ ধুইয়া মাথাত তেল দিয়া উপাস রন।

১৮ তোমরা উপাস করির ধরচেন, এইটা যেন অইন্য মানষি জানির না পায়। ইয়াতে তোমার স্বর্গের বাপ যাক দেখা যায় না,

উয়ায় তো গোপনে দেখিবে। আর তোমার স্বর্গের বাপ যায় গোপনে সউগ দেখে, উয়ায় তোমাক পুরস্কার দিবে।”

১৯ “তোমরালা নিজের বাদে এই দুনিয়াত ধন-দৌলত জমা করেন না। ঐলাত পোকা ধরে আর জং ধরিয়া নষ্ট হয়, আর চোরেও সিধ খুড়িয়া ঐ ধন-দৌলত চুরি করে।

২০ কিন্তুক তোমরা স্বর্গত ধন-দৌলত জমা করো। ওটে পোকাও খাবে না, জংও ধরিবে না, চোরও চুরি করিবে না।

২১ কেনেনা তোমারলার ধন যেটে থাকিবে, মনও ওটে থাকিবে।

২২ “চোখু হইলেক দেহার বাতি, চোখু যদি ভাল হয় তাইলে তোমার গোটায় দেহা আলোত পরিপূর্ণ হইবে।

২৩ কিন্তু তোমার চোখু যদি বেয়া হয় তাইলে তোমার গোটায় দেহা আন্ধারে পরিপূর্ণ হইবে। এই বাদে, তোমার মইন্ধোত যেইটা আলো আছে, সেইটা যদি ঘুট ঘুটা আন্ধার হয় তাইলে সেই আন্ধার কি মারাত্মক!

২৪ “কাণ্ডোয় দুই জন মালিকের সেবা করির পায় না। কেনেনা এক জনক ঘিন খাবে অইন্য জনক পিরিত করিবে। উয়ায় এক জনার প্রতি ধ্যান দিবে, অইন্য জনাক তুচ্ছ মনে করিবে। তোমরা ভগবান আর ধন-দৌলতের সেবা এক সাথে করির পারেন না।

২৫ “এই বাদে মুই তোমারলাক কবার ধরচুং, বত্তি রবার বাদে কি খাবেন, আর কি পিন্দিবেন, এই নিয়া চিন্তা না করেন। কেনেনা



খাবার জিনিসের চায়া পরানটা দামী, কাপড় চোপড়ের চায়া দেহাটার দাম বেশী কি না?

২৬ তোমরালা পখিলার ভিতি দেখ, উমরা বিচন ফ্যেলায় না, ফসলো কাটে না। আর গোলা ঘরত জমাও করে না। তাঙো তোমারলার স্বর্গের বাপ উমাক খাবার দেয়। এই পখিলার চায়া তোমরা কি অনেক বেশী দামী না হন?

২৭ তোমারলার মইদ্ধোত কাঙো চিন্তা-ভাবনা করিয়া নিজের আয়ু এক ঘণ্টা বাড়ের পায়?

২৮ “কাপড়-চোপড়ের বাদে কেনে চিন্তা করেন? ভুইয়ের ফুললার কতা চিন্তা কর কেংকরিয়া ফুটিয়া বড় হবার ধরচে। উমরা পরিশ্রম করে না, পোশাকও বানায় না।

২৯ কিন্তু মুই তোমারলাক কবার ধরচুং, রাজা শলোমন খুব জাকজমকে থাকিয়াও, ঐ ফুললার নাকান করি নিজক সাজের পায় নাই।

৩০ ভুইয়োত যেইলা ঘাস আজি আছে, কালি ঐলাক অগুনের ভিড়াত ছোবা দেওয়া হবে। ভগবান ঐলাক সুন্দর করি সাজায়, তাইলে হে অল্প বিশ্বাসীর ঘর! তোমারলাক কি ভগবান আরো সুন্দর করি সাজাবে না?

৩১ এই বাদে ‘কি খামু, কি পিন্দিমু’ বুলিয়া চিন্তা না করেন।

৩২ অবিশ্বাসীলা এইলা চিন্তা-ভাবনা করির চেষ্টা করে। কিন্তু তোমার স্বর্গের বাপ তো সউগ জানে, তোমারলার কি কি দরকার

আছে।

৩৩ তোমরালা আগত ভগবানের শাসন ব্যবস্থা আর উয়ার ইচ্ছা পালন করিবার চেষ্টা করো। তাইলে তোমারলার যা দরকার, দেওয়া হবে।

৩৪ কালিকার চিন্তা না করেন, কালিকার চিন্তা কালি দেখা যাবে। দিনের কষ্ট দিনের বাদে যথেষ্ট।”

৭ “তোমরা অইন্যের দোষ খোজেন না, তাইলে তোমারও দোষ খোজা হবে না।

২ কেনেনা যেই নাকান করি তোমরা অইন্যের দোষ খোজেন ঐ নাকান করি তোমারলারও দোষ খোজা হবে। আর যে নাকান করি তোমরা মাপি দেন ঐ নাকান করি তোমারলাকও মাপি দেওয়া হবে।

৩ “তোর ভাইয়ের চোখুত খোচা আছে, এইটায় দেখিবার ধরচিস। কিন্তু তোর নিজের চোখুত তো একটা গছের ডুম আছে, আর ঐটা দেখির পাইস না কেনে?

৪ যেহেতু তোর নিজের চোখুত একটা গছের ডুম আছে, তাইলে ক্যেমন করি তোর ভাইয়ক কবার ধরচিস, ‘ভাই আইসেক, তোর চোখু থাকি খোচা খান নিকিলিয়া দেং।’

৫ ভন্ড কোটেকার! পইলা তোর নিজের চোখু থাকি গছের ডুমটা নিকলাও! পাছত ভাল করি দেখিয়া ভাইয়ের চোখু থাকি

খোচাখান নিকিলির পাবু।

৬ “কোনো পবিত্র জিনিস কুকুরক না দেন। আর শুয়োরের আগত মুক্তা ছিটান না, ছিটাইলে ঠেং দিয়া খচিয়া নষ্ট করিবে। আরো তোমার পাকে দৌড়ি আসিয়া কামড়েয়া ছিড়ি ফেলাবে।”

৭ “তোমরালা চাও, দেওয়া হবে। চান্দান, পাবেন। দুয়ার খট-খটান, দুয়ার খোলে দেওয়া হবে।

৮ কেনেনা যায় চায় উয়ায় পায়। যায় চান্দায় উয়ায় পায়, আর যায় দুয়ার খট খটায় উয়ার বাদে দুয়ার খোলে দেওয়া হবে।

৯ তোমারলার মইন্ধোত এমন কাণ্ডো আছে যে উয়ার বেটাক রুটি চাইলে শিল দিবে?

১০ যদি ছাওয়াটা মাছ চায় তাইলে কি উয়ার হাতত একটা সাপ তুলি দিবে? না কোন দিনও না হয়।

১১ তোমরা বেয়া হয়োও তোমারলার ছাওয়ালাক যেইলা ভাল, সেইলা দিবার জানেন। একে নাকান তোমার স্বর্গের বাপেরটে চাইলে যেইলা ভাল, সেইলা নিশ্চয় দিবে।

১২ এই বাদে তোমরা অইন্য মানষিরটে যেই নাকান ভাল ব্যবহার আশা করেন, তোমরাও উমার নগত ঐ নাকান ব্যবহার করেন। এইটায় হইলেক মোশির বিধান আর ভাববাদীলার শিক্ষার মূল কথা।”

১৩ “সরু দুয়ার দিয়া সোন্দান কেনেনা যেই ঘাটা ধবংসের পাকে নিয়া যায়, উয়ার দুয়ার বড় আর ঘাটাটা ওসার। আর

ম্যেলা মানষি ঐ দুয়ার দিয়া সোন্দায়।

১৪ কিন্তু যেই ঘাটা অমৃত জীবনের পাকে নিয়া যায় ঐ দুয়ার ছোট, ঘাটাও সরু। আর কম মানষি ঐটা খুজিয়া পায়।”

১৫ “ভন্ড ভাববাদীলা হাতে সাবধান হন। উমরা তোমারটে অবলা নিরীহ জীব ভেড়ার রূপ নিয়া আইসে, কিন্তু ভিতরত হিংস্র নেকড়ে বাঘের নাকান।

১৬ উমারলার জীবনের ফল দেখিয়া তোমরা চিনির পাবেন। কাটাঝোপত কি আংগুরের ফল আর খুড়িয়া কাটাত কি ডুমুরের ফল ধরির পারে?

১৭ একে নাকান ভাল গছত ভাল ফল ধরে, আর বেয়া গছত বেয়া ফল ধরে।

১৮ ভাল গছত বেয়া ফল আর বেয়া গছত ভাল ফল ধরির পারে না।

১৯ যেইলা গছত ভাল ফল না ধরে, সেইলা কাটিয়া অগুনত ফ্যেলে দেওয়া হয়।

২০ এই বাদে মুই তোমাক কবার ধরচুং, ভন্ড ভাববাদীলার জীবনের ফল দেখিয়া তোমরা উমাক চিনির পাবেন।

২১ “যায় যায় মোক ‘হে দয়াল গুরু, হে দয়াল গুরু’ কয়, উমরা যে সগায় স্বর্গের শাসন ব্যবস্থাত সোন্দাবে এমন না হয়। কিন্তু যায় মোর স্বর্গের বাপের ইচ্ছা পালন করিবে, উয়ায় সোন্দের পাবে।

২২ সেই দিন মেয়ো মানষি কবে, ‘হে দয়াল গুরু! হে দয়াল প্রভু! তোমার নামে হামরা কি ভাববাণী কই নাই? তোমার নামে হামরা কি ভূতলাক খেদাই নাই? তোমার নামে কি অচানক কাম করি নাই?’

২৩ সেয়ো মুই উমারলাক খোলাখুলি কইম, ‘মুই তোমাক চেনং না। বদমাইসের দল! মোর এটে হাতে দূর হন।’”

২৪ “যদি কাণ্ডেয় মোর শিক্ষা শুনিয়া পালন করে, উয়ায় এই নাকান এক জন বুদ্ধিমান ঘর বানা মিস্ত্রি, যায় একটা ঘর বানের বাদে মাটির নিচাত খাল খুড়িয়া শক্ত করি ভিটি বানাইলেক।

২৫ সেয়ো ঝরি পড়িয়া বাতাস বয়া নদীর বানা আসিয়া ঘরত ধাক্কা মারিলেও ঘরটাক ভাঙির পাইলেক না। কেনেনা ঘরটা ভাল করি গড়া হইচে।

২৬ কিন্তু যায় মোর কতা শুনিয়া পালন না করে, উয়ায় এই ধরনের বুদ্ধিহীন ঘর বানা মিস্ত্রির নাকান, যায় বালার উপরত ভিটি ছাড়া ঘর বানাইলেক।

২৭ সেয়ো ঝরি পড়িয়া, বাতাস বয়া, নদীর বানা আসিয়া ঐ ঘরটাক সেয়োয় সেয়োয় ভাঙিয়া সর্বনাশ করিলেক।”

২৮ যেয়ো যীশুর শিক্ষা দেওয়া শেষ হইলেক, সেয়ো উয়ার শিক্ষাত মানষিলা অচানক হইলেক।

২৯ কেনেনা যীশু যিহুদী আইন কানুনের পন্ডিত মানষিলা নাকান শিক্ষা দেয় নাই। উয়ায় শিক্ষা দিহিলেক এক জন অধিকার

পাওয়া মানষির নাকান।

৮ যীশু যেহা পাহাড় থাকি নামি আসিলেক সেহা মেহা মানষি উয়ার পাছে পাছে যাবার নাগিলেক।

৯ সেই সময় এক জন কুষ্ঠ রুগী যীশুর বগলত আসিয়া হাংকুড়া পাড়ি ভক্তি দিয়া কইলেক, “গুরু, তোমার যদি ইচ্ছা হয়, মোক ভাল করি দিবার পান।”

১০ সেহা যীশু কুষ্ঠ রুগীটাক হাত বাড়েয়া নারিয়া কইলেক, “হে, মুই এই নাকানে চাং, তুই শুদ্ধি হয়। ভাল হয়।” আর সেহায়ে সেহায়ে উয়ার কুষ্ঠ রোগ ভাল হয়। গেইলেক।

১১ যীশু উয়াক কইলেক, “এই ঘটনাটা কাণ্ডোকে কবু না। তুই খালি বামনোক যায়া দেহাখান দেখাও, যে তোর রোগ ভাল হয়। গেইচে। আর মহাপুরুষ মোশির বিধান মতে কুষ্ঠ রোগ ভাল হইলে যেইলা পূজা করার দরকার, সেইলা করেক। ইয়াতে সমাজের মানষি জানির পাইবে তুই শুদ্ধি হয়। গেইচিস।”

১২ ইয়ার পাছত যীশু কফরনাম গঞ্জত সোন্দাইলেক। সেহা এক জন রোমের সেনাপতি উয়াক কাউলা কাউলি করি কইলেক,

১৩ “গুরু, মোর চাকরটা অবশ রোগে কাহিল হয়। বিছনাত পরি আছে। উয়ায় খুব কষ্ট পাবার ধরচে।”

১৪ যীশু উয়াক কইলেক, “মুই যায়া উয়াক ভাল করিম।”

৮ সেনাপতিটা কইলেক, “গুরু মুই অধম! তোমরা মোর বাড়িত সোন্দান এমন যোগ্যতা মোর নাই। তোমরা খালি মুখ দিয়া কন তাতে মোর চাকর ভাল হয়। যাবে।

৯ কেনেনা মুইও তো কাণ্ডোরো অধীনে কাম করং, আর সেনালাও মোর অধীনে কাম করে। আর মুই কাণ্ডোকো যদি কং, ‘তুই যা’, সেলোয় উয়ায় যায়। যদি কং ‘তুই আয়’, সেলোয় উয়ায় আইসে। আর মোর চাকরক যদি মুই কং, ‘তুই এই কামটা করেক’, সেলোয় উয়ায় কামটা করে।”

১০ যীশু এই কতা শুনিয়া অচানক হইলেক, আর যেইলা ভিড়ের মানষি উয়ার পাছে পাছে আসিবার ধরচে, উমারলার ভিতি ঘুরিয়া যীশু কইলেক, “মুই তোমারলাক সচাং করি কবার ধরচুং, ইজ্রায়েলী মানষিলার মইন্ধোত কাণ্ডোরো এত বড় বিশ্বাস মুই কোন দিনও দেখির পাং নাই।

১১ মুই তোমারলাক কবার ধরচুং, পূব-পশ্চিম পাক থাকি মেয়ো মানষি আসিবে, আর স্বর্গের শাসন ব্যবস্থাত ঐ মানষিলা অব্রাহাম, ইসহাক, আর যাকবের সোদে এক সাথে খাবার বসিবে।

১২ কিন্তু যে মানষিলা স্বর্গের শাসন ব্যবস্থাত থাকির কতা, উমারলাক বাইরা আন্ধারত ফ্যেলে দেওয়া হবে। ওটেকোনা মানষিলা কান্দিবে আর যন্তনাত দাঁতে দাঁত কিড়মিড়াবে।”

১৩ পাছত যীশু ওই সেনাপতিটাক কইলেক, “তুই যা। যেই নাকান বিশ্বাস করিচিস ঐ নাকানে হবে।” আর সেলোয় সেলোয়

উয়ার চাকরটা ভাল হয়। গেইলেক।

১৪ ইয়ার পাছত যীশু পিতরের বাড়ি যায়। দেখিলেক, পিতরের শশুড়ি জ্বরতে বিছনাত শুতিয়া আছে।

১৫ সেলো যীশু উয়ার হাত নাড়িলেক আর ইয়াতে উয়ার জ্বর ছাড়িয়া গেইলেক। সেলো উয়ায় বিছনা থাকি উঠিয়া যীশুর বাদে খাবার জোগার করির নাগিলেক।

১৬ আর সইন্কা বেলা মানষিলা মেলা অপদেবতা আত্মা ধরা মানষিক যীশুর বগলত আনিলেক। আর উয়ায় মুখের কতা দিয়ায় ওই অপদেবতা আত্মালোক খেদাইলেক। যায় যায় অসুকিয়া আছিলেক উমারলাকও ভাল করিলেক।

১৭ এইলা ঘটনা ঘটিলেক আর ইয়াতে ভাববাদী যিশাইয়ের কতালা পূরণ হইলেক, উয়ায় হামারলার সউগ দুর্বল অবস্থা তুলি নিলেক, আর হামারলার অসুখ ভাল করিলেক।

১৮ যীশুর চাইরো পাকে মেলা মানষির ভিড় দেখিয়া শিষ্যলোক সাগরের অইন্য পারত যাবার আদেশ দিলেক।

১৯ সেই সময় এক জন পন্ডিত মানষি আসিয়া কইলেক, “গুরু, তোমরা যেটেকোনা যাবেন, ওটেকোনা মুইও তোমার নগত যাইম।”

২০ যীশু মানষিটাক কইলেক, “শিয়ালের খাল আছে, পখিরও ভাসা আছে, কিন্তু বাছাই করা মানষিটার মাথা খুবার জাগা নাই।”



২১ শিষ্যলার মইন্ধো থাকি আর এক জন আসিয়া কইলেক,  
“গুরু, আগত মোর বাপক সমাধিত থুইয়া আসির দেও।”

২২ যীশু সেলো কইলেক, “যায় অমৃত জীবন পায় নাই, উমরায়  
মরা মানষিলাক সমাধিত থুক। কিন্তু তুই মোর সাথত আইসেক।”

২৩ ইয়ার পাছত যীশু একখান নাওয়োট উঠিলেক, আর উয়ার  
সোদে শিষ্যলোও গেইলেক।

২৪ অচমকায় সাগরত দারুন হুড়কা উঠিলেক, আর নাও জলের  
চেউওত ডোবং ডোবং হইলেক। সেলো কিন্তু যীশু নিন গেইচে।

২৫ সেলো শিষ্যলো যীশুক জাগনা করি কইলেক, “হে গুরু!  
হামরা যে মরি যাবার নাগচি, হামাক রক্ষা করেক!”

২৬ যীশু শিষ্যলোক কইলেক, “অল্প বিশ্বাসীর ঘর, কেনে তোমরা  
ভয় খাবার ধরচেন?” ইয়ার পাছত উয়ায় উঠিয়া বাতাস আর  
সাগরক ধমক দিলেক। আর সউগ ঝিত হইলেক।

২৭ ইয়াতে শিষ্যলো অচানক হয়া কইলেক, “ইয়ায় কায়! যে  
বাতাস আর সাগরও ইয়ার কতা শুনে।”

২৮ ইয়ার পাছত যীশু সাগরের অইন্য পারত গেরাসেনী এলাকাত  
গেইলেক। সেলো অপদেবতা ধরা দুই জন মানষি সমাধি বাড়ি  
থাকি বাইর হয়া যীশুর বগলত আসিলেক। উমরা এত ভয়ংকর  
আছিলেক যে, ঐ ঘাটা দিয়া কাণ্ডোয় যাবার পায় না।

২৯ উমরা চিকিরিয়া কইলেক, “হে বাহে, মহান ভগবানের বেটা যীশু, হামাক নিয়া কি করির চাইস? তুই কি ঠিক করা সমায়ের আগত হামাক যন্তনা দিবার আসচিস?”

৩০ ওটে থাকি অল্প খানিক দূরত একপাল শুয়োর চরে ব্যেড়ের ধরছিলেক।

৩১ সেলো অপদেবতালা যীশুক কাউলা কাউলি করি কইলেক, “তোমরা যদি হামাক খেদেয়া দিবার চান, তাইলে ঐ শুয়োরের পালত হামারলাক সোন্দের অনুমতি দেও।”

৩২ যীশু কইলেক, “ঐ নাকানে করা।” অপদেবতালা মানষিটার ভিতিরা হাতে বিরি যায়া শুয়োরলার ভিতিরাত সোন্দাইলেক। এই বাদে শুয়োরের পাল পাহাড়ের বগল থাকি জোরে দৌড়ি যায়া সাগরের জলত পড়িয়া ডুবি মরিলেক।

৩৩ এই ঘটনা দেখিয়া যায় যায় শুয়োর চরের ধরচে, উমরা ভয়ে দৌড়ি পালেয়া বগলা বগলি গঞ্জের মানষিলাক অপদেবতা ধরা মানষিলাক বিষয় কইলেক।

৩৪ সেলো গঞ্জের সউগ মানষিলা যীশুক দেখির বাদে আসিলেক। উমরা উয়ার দেখা পায়া কাউলা-কাটি করি কবার নাগিলেক, যাতে যীশু উমার এলাকা ছাড়ি চলি যায়।

৯ ইয়ার পাছত যীশু নাওয়োট চড়িয়া সাগর পার হয় নিজে গঞ্জত ফিরি আসিলেক।

২ আর কয়েক জন মানষি দাগিলা কেতাত করিয়া একটা নুলা রুগী যীশুর ওটে ধরি আসিলেক। উমারলার এই নাকান বিশ্বাস দেখিয়া যীশু নুলা রুগীটাক কইলেক, “বাউ, সাহস করেক, তোর সউগ পাপ ক্ষমা করা হইলেক।”

৩ এই কতা শুনিয়া কয়েক জন পন্ডিত মনে মনে কবার নাগিলেক, “আরে! মানষিটা কেনে এই নাকান কতা কবার ধরচে? উয়ায় তো ভগবানের নিন্দা করির ধরচে। ভগবান ছাড়া কায় পাপ ক্ষমা করিবার পায়?”

৪ যীশু উমারলার মনের কতা বুঝির পায় কইলেক, “কেনে তোমরা মনে মনে বেয়া চিন্তা-ভাবনা করির ধরচেন?

৫-৬ মুই যদি কং ‘তোর পাপ ক্ষমা করা হইলেক’, এই কামটা হয় কি না হয়, দেখির পাবেন না। কিন্তুক নুলা রুগীটা হাটিবার পায় না। মুই যদি উয়াক হাটিবার কং, আর উয়ায় সেলোয় সেলোয় হাটে, তাইলে ইয়াতে বুঝির পাইবেন মুইয়ে বাছাই করা মানষিটা আর মোর দুনিয়াত পাপ ক্ষমা করিবার অধিকার আছে।” এই কতা কয়া নুলা রুগীটার পাকে ফিরিয়া কইলেক, “ওঠেক, তোর দাগিলা কেতা নিয়া বাড়ি চলি যা।”

৭ সেলো রুগীটা উঠিয়া বাড়ি চলি গেইলেক।

৮ মানষিলা এই ঘটনা দেখিয়া ভয় খাইলেক। আর ভগবান মানষিক এমন ক্ষমতা দিচে দেখিয়া ভগবানের গুণগান করিবার নাগিলেক।

৯ যীশু ওটে থাকি চলি যাবার সমায় এক জন মানষিক দেখিলেক, মাসুল আদায় করার ঘরত বসিয়া আছে। উয়ার নাম মথি, যীশু উয়াক কইলেক, “মোর সোদে আইসেক, মোর শিষ্য হঃ।” আর সেলোয় সেলোয় উঠিয়া উয়ার সাথত গেইলেক।

১০ তার পাছত যীশু মথির বাড়িত খাবার বসিলেক, ওটেকোনা মেলা মাসুল আদায়কারী আর পাপী মানষিলার নগত যীশু শিষ্যলার সাথত একটে খাবার বসিলেক।

১১ এই দেখিয়া ফরীশী দলের মানষিলা যীশুর শিষ্যলোক কইলেক, “তোমারলার গুরু মাসুল আদায়কারী আর পাপী মানষিলার নগত কেনে খাওয়া-দাওয়া করে?”

১২ এই কতা শুনিয়া যীশু কইলেক, “যার অসুখ নাই, উমার ডাক্তারের দরকার নাই, কিন্তুক যার অসুখ আছে, উমারে ডাক্তারের দরকার আছে।

১৩ ‘মুই তোমারলার দয়া দেখির চাং, পশু সঁপে না হয়।’ এইলা খুজিয়া বাইর কর। কেনেনা মুই ধার্মিক মানষিক ডেকেই আইসং নাই, মুই পাপী মানষিক ডেকেই আসচুং।”

১৪ ইয়ার পাছত দীক্ষাদাতা যোহনের শিষ্যলা যীশুরটে আসিয়া পুছিলেক, “হামরা আর ফরীশীলা উপাস করি, কিন্তুক কেনে তোমার শিষ্যলা উপাস করে না?”

১৫ সেলা যীশু উমারলাক কইলেক, “বর নগত থাকিতে, বরযাত্রী উপাস করির পায় কি? বর নগত থাকিতে উমরা উপাস

করির পায় না। উমরা আনন্দ করিবে। কিন্তুক এমন এক দিন আসিবে, যেলা বরক নিয়া যাওয়া হইবে, সেলা বরযাত্রীলা উপাস করিবে।

১৬ “কাণ্ডায় বুড়া জামাত নয়া কাপড়ের তালি দেয় না, যদি দেয় ধুবর সময় নয়া তালিটা টান ধরিয়া ছিড়িয়া যাবে। আর ইয়াতে ছেড়া জাগাখান আরো ওসার হইবে।

১৭ সেই নাকান, বুড়া চামড়ার ঝোলাত কাণ্ডায় টাটকা আংগুরের রস থোয় না। থুইলে টাটকা রস পচিয়া রস বাড়ি যায়। ঝোলা ছিড়ি যায়। ইয়াতে ঝোলা আর রস দুইটায় নষ্ট হয়। সেই বাদে টাটকা রস নয়া ঝোলাত থোয়া খায়, তাতে দুইটায় রক্ষা হয়।”

১৮ যেলা যীশু মানষিলাক এইলা কতা কবার ধরচে, সেলা এক জন যিহুদী দলের সমাজপতি যীশুরটে আসিয়া হাংকুড়া পাড়ি ভক্তি দিয়া কইলেক, “মোর বেটিটা এলায় মরি গেইলেক, তোমরা আসিয়া, উয়ার দেহাত হাত দিয়া নাড়িয়া যাও, ইয়াতে উয়ায় বত্তি উঠবে।”

১৯ সেলা যীশু উঠিয়া শিষ্যলার নগত সমাজপতির বাড়ি গেইলেক।

২০ ঘাটা দিয়া যাবার সময় এক জন বেটিছাওয়া পাছ পাক থাকি যীশুর গিলাপের কিনারটা নাড়িলেক। কেনেনা উয়ায় বারো বছর হাতে অক্লান্তাবের অসুখে ভুগিবার ধরছিলেক।

২১ বেটিছাওয়াটা মনে মনে ভাবির ধরছিলেন, “যদি মুই যীশুর গিলাপের কিনার নাড়ির পাং, তাইলে মুই ভাল হয়।”

২২ যীশু ঘুরিয়া উয়াক দেখির পায়া কইলেক, “মাই তুই সাহস করেক, তুই বিশ্বাস করিচিস বুলিয়া ভাল হয়।” সেলা বেটিছাওয়াটা একেবারে ভাল হয়।

২৩ যীশু সমাজপতির বাড়ি যায় দেখিলেক, যেই মানষিলা বাঁশী বাজায় উমরা ঐটে আছে, আর অইন্য মানষিলা হৈচৈ করির ধরচে।

২৪ এই বাদে যীশু কইলেক, “তোমরা বায়রাত যাও। চেংড়িটা মরে নাই, উয়ায় নিন পাড়ির ধরচে।” এই কতা শুনিয়া মানষিলা হাসা-হাসি করির নাগিলেক।

২৫ মানষিলাক ঘর থাকি বাইর করি দিয়া যীশু চেংড়িটার হাত ধরিলেক। ইয়াতে চেংড়িটা উঠিয়া বসিলেক।

২৬ এই ঘটনার কতা ঐ অঞ্চলের সউগ জাগাত রটিয়া গেইলেক।

২৭ আর যেলা যীশু ঐ জাগা ছাড়িয়া চলি যাবার ধরচে, সেলা দুই জন কানা মানষি যীশুর পাছে পাছে যাবার নাগিলেক। উমরা চিকরিয়া কবার নাগিলেক, “হে বাহে দায়ূদের বেটা, হামাক দয়া করেক।”

২৮ যীশু একটা বাড়িত সোন্দাইলেক আর ঐ কানা মানষি দুই জন যীশুর বগলত আসিলেক। সেলা যীশু উমাক কইলেক,

“তোমরা কি বিশ্বাস করেন যে মুই তোমারলার দৃষ্টিশক্তি ফিরি দিবার পাইম?” কানা মানষি দুইটা কইলেক, “হ্যে গুরু, হামরা বিশ্বাস করি।”

২৯ সেলো উয়ায় উমারলার চোখু নাড়িয়া কইলেক, “তোমরালা যে নাকান বিশ্বাস করিচেন, তোমারলার ঐ নাকানে হউক।”

৩০ আর সেলোয় সেলোয় উমরা দেখির পাইলেক। যীশু উমাক সাবধান করি কইলেক, “দেখেন, এই কতা যাতে কাণ্ডোয় জানির না পায়।”

৩১ কিন্তু উমরা ওটে চলি যায়া সউগ জাগার মানষিলাক যীশুর সমন্ধে কবার নাগিলেক।

৩২ সেলো ঐ কানা মানষি দুই জন চলি যাবার পাছত এক জন অপদেবতা ধরা মানষিক যীশুরটে আনিলেক। উয়ায় কতা কবার পায় নাই।

৩৩ যীশু বোবা মানষিটার ভিত্তিরা থাকি অপদেবতাটাক খেদেবার পাছত মানষিটা কতা কবার নাগিলেক। এই দেখিয়া সউগ মানষিলা অচানক হইলেক, “ইজ্রায়েল দেশত কোন দিন এই নাকান দেখা যায় নাই।”

৩৪ কিন্তুক ফরীশীলা কবার নাগিলেক, “উয়ায় অপদেবতালার রাজার শক্তি দিয়া অপদেবতাক খেদায়।”

৩৫ যীশু ঐ অঞ্চলের সউগ গেরাম-গঞ্জ ঘুরিয়া যিহুদীলার উপাসনা ঘরত শিক্ষা দিবার আর স্বর্গের শাসন ব্যবস্থার ভাল খবর

প্রচার করির নাগিলেক। আর উয়ায় সউগ নাকানের অসুকিয়া মানষিলাক ভাল করির নাগিলেক।

৩৬ মানষিলাক ভিড় দেখিয়া যীশুর খুব মায়া হইলেক, কেনেনা উমরা রাখোয়াল ছাড়া ভেড়ার নাকান হাপসিয়া আরো অসহায় হয় আছিলেক।

৩৭ সেয়া যীশু শিষ্যলাক কইলেক, “ফসল মেয়া কিন্তু কাম করির মানষি কম।

৩৮ এই বাদে তোমরা ফসলের মালিকেরটে প্রার্থনা কর যাতে ফসল কাটির কামলা পেয়েয়া দেয়।”

১০ যীশু উয়ার বারো জন শিষ্যক বগলত ডেকেয়া উমারলাক অপদেবতা খেদেবার আরো সউগ নাকানের অসুখ ভাল করির ক্ষমতা দিলেক।

২ এই বারো জন খবরিয়া হইলেক, পইলা হইলেক শিমোন যাক পিতর কওয়া হয়। তার পাছত উয়ার ভাই আন্দ্রিয়, সিবদিয়ের বেটা যাকব, উয়ার ভাই যোহন,

৩ ফিলিপ আর বর্থলময়, থোমাস, মাসুল আদায়কারী মথি, আলফেয়ের বেটা যাকব, আর থদেয়,

৪ মৌলবাদী শিমোন, আর যীশুক যায় শত্রুলার হাতত ধরে দিছিলেক, উয়ায় হইলেক ইষ্কোরিয়োটের যুদাস।



৫ যীশু এই বারো জন খবরিয়াক এই আদেশ দিয়া পেঠাইলেক,  
“তোমরালা অযিহুদীলার অঞ্চলত আর শমরীয়লার কোন গঞ্জত  
যান না,

৬ বরং তোমরালা ইজ্রায়েল জাতির হারে যাওয়া ভেড়ালার ঐটে  
যান।

৭ উমারটে যায়া প্রচার করেন যে, স্বর্গের শাসন ব্যবস্থা বগলত  
আসিচে।

৮ অসুকিয়া মানষিলাক ভাল করো, মরা মানষিক বত্তে তোল,  
কুষ্ঠ রুগীলাক ভাল করো, মানষিলাক ভিত্তি থাকি  
অপদেবতালাক খেদাও। তোমরা এইলা কাম বিনা পাইসায়  
করেন। কেনেনা এই ক্ষমতা তোমরা বিনা পাইসায় পাইচেন।

৯ যাবার সময় তোমরালা টাকা-পাইসা, সোনা-রুপা কমড়ত  
বান্দিয়া নিয়া যান না।

১০ ঘাটা দিয়া যাত্রার সময় তোমরা বাড়তি জামা কাপড় ঝোলা  
এমন কি জুতা, নাটি নেন না। কেনেনা যায় কাম করে উয়ায়  
মজুরি পাবার যোগ্য।

১১ “যেহা তোমরা কোন গেরাম-গঞ্জে যাবেন, ওটেকোনা এমন  
এক জন উপযুক্ত মানষি খুজি বাইর করো যাক বিশ্বাস করির  
পান। অইন্য কোনটে না যাওয়া পর্যন্ত উয়ারে বাড়িত থাকেন।

১২ তোমরা যেহায়ে কোন বাড়িত সোন্দাবেন উমার মঙ্গল কামনা  
করি কন, তোমার শান্তি হউক।

১৩ সেই বাড়ির মানষিলা যদি উপযুক্ত হয় তাইলে তোমারলার শান্তি ঐ মানষিলার উপরত নামি আসুক। কিন্তুক ঐ বাড়ি যদি উপযুক্ত নোয়ায়, তাইলে তোমারলার শান্তি তোমারটে ফিরি আসুক।

১৪ কোনো জাগার মানষি যদি তোমারলাক গ্রহন না করে, কিবা তোমারলার কতা না শুনে, তাইলে ঐ বাড়ি থাকি চলি আসির সমায় ঠেংএর ধূলা ঝাড়িয়া ফেলাইবেন ইয়াতে উমরা জানির পাবে ভগবানের গোসা উমার উপরাত আছে।

১৫ মুই তোমারলাক সচাং করি কবার ধরচুং, বিচারের দিনত ঐ গেরামের চায়া সদোম আর ঘমোরা গঞ্জের অবস্থা অনেকটা সহ্য করার নাকান হবে।”

১৬ “শুন! মুই তোমারলাক নেকড়ে বাঘের মইন্ধোত ভেড়ার নাকান করি পেয়েঠেবার ধরচুং। এই বাদে তোমরা সাপের নাকান চালাক আর কইতরের নাকান সরল হও।

১৭ কিন্তু তোমরা মানষিলা থাকি সাবধান থাকেন, কেনেনা উমরা তোমাক ধরিয়া সভাত তুলিবে। আর উপাসনা ঘরত নিয়া যায়া চাবুক দিয়া ডাঙাইবে।

১৮ কেনেনা তোমরা মোর শিষ্য হবার বাদে রাজ্যপাল আর রাজার দরবারের আগত হাজির করা হবে। তোমরা এই নাকান করি উমারলারটে আর অইন্য জাতির মানষিলারটে মোর বিষয় কবার সুযোগ পাবেন।

১৯ উমরা যেহেতু তোমারলাক শত্রুর হাতত ধরেয়া দিবে, সেহেতু কেমন করি কি কবার নাগিবে এই নিয়া কোনো চিন্তা করেন না। কি কবার নাগিবে তোমারলাক কয়া দেওয়া হবে।

২০ তোমরা ফর্ম খোন, তোমরা নিজেই কতা কবেন না। কিন্তুক ভগবানের আত্মা তোমারলার মইদ্বো দিয়া কতা কবে।

২১ “ভাই ভাইয়োক আর বাপ বেটাক মারি ফেলের বাদে ধরে দিবে। বেটা-বেটিলা বাপ মাওয়ের বিরুদ্ধে খারা হয় মারি ফেলের চাবে।

২২ মোর নামের বাদে সগায় তোমাক ঘিন খাবে, কিন্তু যায় শেষ পর্যন্ত থির থাকিবে উয়ায়ে রক্ষা পাবে।

২৩ কোন গেরামের মানষি যেহেতু তোমাক অইত্যাচার করিবে, সেহেতু অইন্য গেরামত পালেয়া যান। মুই তোমারলাক সচাং করি কবার ধরচুং, বাছাই করা মানষিটা ফিরি না আইসা পর্যন্ত ইজ্রায়েলের তামান গঞ্জত তোমার কাম শেষ করির পাবেন না।

২৪ “শিষ্য উয়ার গুরুর থাকি বড় না হয়, আর চাকর উয়ার মালিকের থাকি বড় না হয়।

২৫ শিষ্য যদি গুরুর মত হবার পায় আর চাকর যদি মালিকের নাকান হয় উঠির পায়, তাইলে যথেষ্ট। বাড়ির কর্তাক উমরা যদি ‘অসুর বেলসবুল’ কয়, তাইলে বাড়ির অইন্য মানষিলাক আরো কত কি কবে?”

২৬ “এই বাদে উমারলাক ভয় না খান, কেনেনা নুকি থোয়া সউগ কিছু নিকলি আনা হবে, গোপনে থাকা সউগে জানে দেওয়া হবে।

২৭ মুই যেইলা আন্ধারত কবার ধরচুং, সেইলা তোমরা দিনের আলোত কন। তোমরা যেইলা কানে কানে শুনিচেন, সেইলা ছাদের উপর থাকি চিকরি কন।

২৮ যায় তোমারলার দেহাটাক মারি ফ্যেলের পায়, কিন্তু আত্মাটাক মারি ফ্যেলের পায় না, উমাক ভয় না খান। যায় দেহা আত্মা দুইটায় নরকত ধবংস করির পারে উয়াকে ভয় কর।

২৯ দুইটা চোচ পখি কি খুব কম দামে বেচা হয় না? তাণ্ডো তোমারলার স্বর্গের বাপের অনুমতি ছাড়া একটাও মাটিত পড়ে না।

৩০ এমন কি তোমারলার মাথার চুলিলাও গনা আছে।

৩১ এই বাদে তোমরা ভয় না খান। অনেকলা চোচ পখির তুলনায় তোমারলার দাম ম্যেলা।

৩২ “যে কাণ্ডো মানষির আগত মোক স্বীকার করে, মুইও মোর স্বর্গের বাপেরটে উয়াক স্বীকার করিম।

৩৩ যে কাণ্ডো মোক মানষির আগত মানি না নেয়, মুইও মোর স্বর্গের বাপের আগত মানি নিম না।”

৩৪ “তোমরা কি ভাবিবার নাগচেন, এই দুনিয়াত মুই শান্তি দিবার আসচুং? এইটা মনে করেন না। মুই শান্তি দিবার আইসং নাই কেনেনা মুই তোমারলাক এক জন আরের জনার বিরুদ্ধে খাড়া করির আসচুং।

৩৫ মুই এই ঘটনা ঘটেবার আসচুং: ‘বাপ বেটার বিরুদ্ধে, বেটা বাপের বিরুদ্ধে, বেটি মাওয়ের বিরুদ্ধে, মাও বেটির বিরুদ্ধে, বউ শাশুড়ির বিরুদ্ধে, শাশুড়ি বউ-এর বিরুদ্ধে খাড়া করির আসচুং।

৩৬ এক জন মানষির উয়ার নিজের পরিবারের মানষিলায় শত্রু হইবে।’

৩৭ “যদি কোন মানষি মোর পাছত আসির চায়, আর উয়ায় উয়ার মাও-বাপ, বেটা-বেটি, এমন কি উমার চায়া মোক বেশী পিরিত না করে, তাইলে উয়ায় মোর শিষ্য হবার যোগ্য না হয়।

৩৮ যায় নিজের ক্রুশের কষ্টের বোঝা ঘাড়ত নিয়া মোর পাছে পাছে না আইসে, উয়ায় মোর শিষ্য হবার যোগ্য না হয়।

৩৯ যে কাণ্ডো নিজের জীবন লাভ করির চায়, উয়ায় জীবন হারাবে, কিন্তু যায় মোর বাদে জীবন সঁপে দেয় উয়ায় রক্ষা পাবে।”

৪০ “যে কাণ্ডো তোমারলাক মানি নেয়, উয়ায় মোকে মানি নেয়, আর যায় যায় মোক মানি নেয়, উয়ায় যায় মোক পেষ্ঠাইচে সেই স্বর্গের বাপকও মানি নেয়।

৪১ কাণ্ডো যদি কোন ভগবানের ভাববাদীক এক জন ভাববাদী হিসাবে মানি নেয়, তাইলে সেই ভাববাদী যে পুরস্কার পাবে, উয়াও সেই পুরস্কার পাবে। এক ভগবান ভক্ত মানষিক কাণ্ডো যদি ভগবান ভক্ত মানষি কয়া মানি নেয়, তাইলে ভগবান ভক্ত মানষিটা যে পুরস্কার পাবে, ঐ মানষিটাও একে পুরস্কার পাবে।

৪২ যে কাণ্ডো এই সাধারন মানষিলার মইন্ধে কাণ্ডোকো মোর শিষ্য মনে করি এক গিলাস ঠাণ্ডা জল দেয়, মুই সচাং করি কবার ধরচুং উয়াও পুরস্কার পাবে।”

১১ যীশু উয়ার বারো জন শিষ্যক আদেশ দেওয়া শেষে করিলেক। তার পাছত যীশু গেরামে গেরামে শিক্ষা আর প্রচার করির বাদে ওটে থাকি চলি গেইলেক।

২ দীক্ষাদাতা যোহন জেলখানার ভিত্তিরা থাকি ভগবানের বাছাই করা রাজাটার কামের কতা শুনির পাইলেক। সেয়া উয়ার শিষ্যলোক যীশুরটে প্রশ্ন পুছিবার পেঠাইলেক।

৩ শিষ্যলো যীশুক পুছিলেক, “যায় আসির কতা, তোমরায় কি সেই মানষিটা, না হামরা অইন্য কাণ্ডোরো বাদে বাচ্ছে রমু?”

৪ যীশু কইলেক, “তোমরা যেইলা দেখিচেন আর শুনিচেন সেইলায় যোহনক যায়া কন।

৫ কানা মানষি দেখির পাবার নাগচে, খোড়া মানষি হাটির ধরচে, কুষ্ঠ রুগী শুদ্ধি হয়্যা ভাল হবার নাগচে, টসা শুনির ধরচে, মরা

মানষি বত্তি উঠির ধরচে, আর গরীব মানষিলারটে ভাল খবর প্রচার করা হবার ধরচে।

৬ মোক মানি নিবার বাদে যায় বাধা মনে না করে, ভগবান উয়াক আশুবাদ করিবে।”

৭ যোহনের শিষ্যলো চলি যাবার ধরচে, সেলো যীশু মানষিলারটে যোহনের বিষয় কওয়া শুরু করিলেক, “তোমরা নিধুয়া পাথারত কি দেখির গেইচেন? নেলফ্যেলা একটা বেত গছ হাওয়াতে তুলিবার ধরচে, এইটা কি?

৮ নাঃ! তা না হইলে কি দেখির গেইচেন? খুব ভাল দামী জামা-কাপড় পেন্দা একটা বেটাছাওয়াক? যায় যায় ভাল জামা-কাপড় পেন্দে, উমরা তো রাজবাড়িত থাকে।

৯ তা না হইলে কি দেখির গেইচেন? এক জন ভগবানের ভাববাদীক? হ্যে, তোমরা যাক দেখিচেন উয়ায় এক জন ভাববাদীর চায়াও মহান!

১০ যোহনে সেই মানষিটা যার সমন্ধে শাস্ত্রত নেখা আছে, দেখ, তোর আইসার আগত মোর খবরিয়াক পেঠাইচুং। উয়ায় তোর আগত যায়া তোর বাদে ঘাটা বানাবে।

১১ “মুই তোমারলাক সচাং করি কবার নাগচুং, কোন বেটিছাওয়ার গর্ভত জন্ম নেওয়া, সউগ মানষির মইন্ধে দীক্ষাদাতা যোহনের চায়া বড় আর কাণ্ডো নাই। তাণ্ডো কোন মানষি যদি

স্বর্গের শাসন ব্যবস্থাত সউগ চায়া ছোট, উয়ায় তো যোহনের চায়া মহান।

১২ দীক্ষাদাতা যোহনের সমায় থাকি আজি পর্যন্ত স্বর্গের শাসন ব্যবস্থা দারুন বাধা পাবার ধরচে। যায় যায় শক্তিশালী উমরা জোর করি আকড়ে ধরির চেষ্টা করির ধরচে।

১৩ যোহন আইসার আগত পর্যন্ত সউগ ভাববাদী আর মহাপুরুষ মোশির বিধানও কইচে ভবিষ্যতে যেইলা ঘটবে।

১৪ তোমরা যদি এই কতা বিশ্বাস করির রাজি আছেন তাইলে শুনেন। যায় আসির কতা আছিলেক, এই যোহনেই সেই ভাববাদী এলিয়।

১৫ যার শুনির কান আছে তায় শুনুক।

১৬ “মুই এই যুগের মানষিলাক কিসের সাথত তুলনা করিম? উমরা এমন চেংড়া চেংড়ির নাকান, যে খেলার সঙ্গী সাথীক ডেকেয়া কয়,

১৭ হামরা তোমার বাদে বাঁশী বাজাইলোং, তোমরা তো নাচিলেন না, শোকের গান গাইলোং, তোমরা তো কপাল চাপড়াইলেন না।

১৮ “যোহন অইন্য মানষির নাকান খাওয়া-দাওয়া করিলেক না, এই বাদে মানষিলা কইলেক, ‘উয়াক অপদেবতা ধরচে।’

১৯ আর বাছাই করা মানষিটা আসিয়া খাওয়া-দাওয়া করিলেক, এই বুলিয়া মানষিলা কবার ধরচে, ‘ঐ দেখ, এক জন পেটুক আর মদখোর। মাসুল আদায়কারী আর পাপী মানষির সখা।’ কিন্তু



কাণ্ডো যে সচাং জ্ঞানী সেইটা উয়ার কামের মইন্ধো দিয়া প্রমাণ করিবে।”

২০ যীশু যেইলা গেরাম-গঞ্জ বেনী করি অচানক কাম করিচিলেক, ওটেকার মানষিলা ভাল ঘাটাত মন ফিরায়ে নাই। এই বাদে ঐ জাগালাক যীশু ধিক্কার দিয়া কইলেক,

২১ “ধিক্কার কোরাসীন বাসী, ধিক্কার বৈৎসৈদা বাসী! তোমারলার ভয়ংকর দুর্দশা হবে! তোমারলার ওটে যে অচানক কাম মুই করিচুং, এইলা যদি সোর আর সীদোনত করা হইলেক হয়, তাইলে ওটেকার মানষিলা অনেক দিন আগতে পাপের বাদে পস্তেয়া চিন হিসাবে চটের কাপড় পিন্দিয়া কপালত ছাই মাখিয়া মন ফিরাইলেক হয়।

২২ মুই সচাং করি কবার ধরচুং! বিচারের দিনত সোর আর সীদোন গঞ্জের বিধর্মী মানষিলার চায়া তোমারলার বেনী সাজা হইবে!

২৩ ও বাহে! কফরনাহুম বাসী, তোমারলাক কি কইম? তোমরা স্বর্গের মহান হবার চান, কোন দিনও হবার পাবেন না। তোমারলাক নরকত ফ্যেলে দেওয়া হইবে। যেইলা অচানক কাম তোমারলার মইন্ধোত করা হইচে, সেইলা যদি সদোমত করা হইলেক হয়, তাইলে আজিও টিকি রইলেক হয়।

২৪ মুই তোমাক কবার ধরচুং, বিচারের দিনত সদোমের অবস্থা তোমারলার চায়া ভাল হবে।”

২৫ ইয়ার পাছত যীশু কইলেক, “স্বৰ্গ আৰু দুনিয়াৰ পৰম প্ৰভু মোৰ স্বৰ্গেৰ বাপ, মুই তোৰ গুণকিত্তন কৰং, কেয়েনা জগত্ৰেৰ জ্ঞানী আৰু পণ্ডিতল্যৰটে এইলা তত্ত্ব নুকি খুচিস, আৰু ছাওয়াৰ নাকান সাদা-সিদা মানষিল্যৰটে তুই বাইৰ কৰিচিস।

২৬ হ্যে মোৰ স্বৰ্গেৰ বাপ! তোৰ ইচ্ছা মতন এইটা হইচে।

২৭ “মোৰ বাপ সউগ কিছুই মোৰ হাতত সঁপে দিচে। বাপ ছাড়া কাণ্ডোয় জানে না, বেটা কায়। আৰু বেটা ছাড়া কাণ্ডো জানে না, বাপ কায়। খালি বেটাটাৰ ইচ্ছাতে অইন্য কাণ্ডোকে এইটা জানে দেওয়া যায়, বাপ কায়।

২৮ “তোমরা যায় যায় হাপসিয়া বোঝা উবিয়া বেড়েবার ধরচেন, তোমরা সগায় মোৰটে আইসো মুই তোমাক জিরান দিম।

২৯-৩০ মোৰ জোঙাল তোমার ঘাড়ত তুলি নেও। মোৰটে শেখো, কেয়েনা মোৰ স্বভাব শান্ত নহ্ম। ইয়াতে তোমারল্যৰ অন্তৰত শান্তিৰ জিরান পাবেন, কেয়েনা মোৰ জোঙাল উৰি বেড়া সহজ আৰু বোঝা হালকা।”

১২ যীশু এক দিন যিহুদী নিয়মে জিরানেৰ দিন, আবাদ বাড়িৰ আল্লি দিয়া হাটি যাবাৰ ধরছিলেক। শিষ্যলোক ভোগ নাগিচে, এই বাদে ফসলেৰ শিষ ছিড়িয়া খাবাৰ নাগিলেক।

২ এই দেখিয়া ফরীশীলা যীশুক পুছিলেক, “দেখ! ধৰ্মেৰ নিয়মে জিরানেৰ দিন যা কৰা উচিত না হয়, তোমার শিষ্যলা সেইলায়

করির ধরচে।”

৩-৪ যীশু সেলো উমারলাক কইলেক যে, “এইটা কি তোমরা শাস্ত্রত পড়েন নাই? মহারাজা দায়ূদ আর উয়ার সঙ্গী-সাথীলাক সেলো ভোগ নাগছিলেক, সেলো ভগবানের ঘরত যে পবিত্র রুটি আছিলেক, কিন্তু দায়ূদ ঐ রুটি নিয়া নিজে খাইলেক, উয়ার সঙ্গী-সাথীলাকও খাবার দিলেক। সেই রুটি বামন ছাড়া কারো খাবার নিয়ম আছিলেক না।

৫ এইলা ছাড়া তোমরা কি মোশির বিধানত পড়েন নাই যে, মন্দিরের বামনলা জিরানের দিনের বিধান ভাঙিলে উমারলার কোন দোষ না হয়।

৬ মুই তোমারলাক কবার ধরচুং, যিহুদীলার দশংগতি মন্দিরের থাকিও মহান এক জন এটেকোনা আছে।

৭ ‘মুই তোমারলার দয়া দেখির চাং, পশু বলি না হয়।’ এইলা খুজিয়া বাইর কর। সনাতন শাস্ত্রের মানে যদি তোমরা বুঝিলেন হয়, তাইলে নির্দোষীলাক দোষী করিলেন না হয়।

৮ ফম থোন! বাছাই করা মানষিটায় জিরানের দিনের মালিক।”

৯ ইয়ার পাছত যীশু ঐ জাগাখান ছাড়িয়া যিহুদীলার উপাসনা ঘর গেইলেক।

১০ ওটে একটা মানষি আছিলেক, যার একটা হাত শুকি গেইছিলেক। ফরীশীলা যীশুক দোষ দিবার বাদে পুছিলেক,

“যিহুদী ধর্মের নিয়মে জিরানের দিনত কাণ্ডোকে কি ভাল করা উচিত?”

১১ যীশু উমারলাক কইলেক, “মনে কর, তোমারলার মইন্ধে কারো একটা ভেড়া আছে, সেই ভেড়াটা যদি জিরানের দিনত খালত পড়ি যায়, তাইলে কি তোমরা খাল থাকি তুলিবেন না?

১২ আর ভেড়ার চায়া মানষির দাম তো অনেক বেশী। তাইলে দেখা যায়, মোশির বিধান মতে জিরানের দিনে ভাল কাম করা কোন দোষ না হয়।”

১৩ ইয়ার পাছত যীশু মানষিটাক কইলেক, “তোর হাত বাড়েয়া দে।” উয়ায় হাতটা বাড়ে দিলেক, আর সেই হাতটা ভাল হয়। অইন্য হাতের নাকান হইলেক।

১৪ সেলো ফরীশীলা বায়রাত যায়া যীশুক মারি ফেলের বাদে চক্রান্ত করির নাগিলেক।

১৫ এই ঘটনার কতা জানির পায়া যীশু ওটে থাকি চলি গেইলেক। সেলো মেলা মানষি ওটে থাকি যীশুর পাছে পাছে যাবার নাগিলেক। আর উমার মইন্ধে যার যার অসুখ আছিলেক, উমাক সগাকে ভাল করিলেক।

১৬ আর উমারলাক সাবধান করি দিয়া কইলেক উয়ায় কায় আছিলেক অইন্য মানষিক না কন।

১৭ আর এই নাকান করি ভগবানের ভাববাদী যিশাইয়ের মইন্ধো দিয়া কওয়া ভগবানের বাণী পূরণ হইলেক,

১৮ “ইয়ায় মোর চাকর, ইয়াক মুই বাছাই করিচুং। মোর মনের এক জন, ইয়ার উপরাত মুই খুশি আছং। মুই উয়ার উপরাত মোর আত্মা দিম, আর উয়ায় অইন্য জাতির মানষিলারটে ন্যায়নীতির বাণী প্রচার করিবে।

১৯ উয়ায় ঝগড়া বা চেকরা চিকরি করিবে না। মানষিলা পথে ঘাটে উয়ার গালার স্বর শুনির পাবে না।

২০ যত দিন ন্যায় নীতি জয় না হয়, ততদিন খেতলে যাওয়া নল খাগড়া ভাঙিবে না, আর মিট মিট করি জ্বলিতে থাকা সলতা নিভবে না।

২১ সউগ জাতির মানষি উয়ার উপরাত আশা করিবে।”

২২ সেই সমায় মানষিলা অপদেবতা ধরা এক জন মানষিক যীশুরটে নিয়া আসিলেক। মানষিটা কানা আর বোবা আছিলেক। যীশু উয়াক ভাল করিলেক। ইয়াতে মানষিটা দেখির আর কতা কবার নাগিলেক।

২৩ এই দেখিয়া মানষিলা অচানক হয় কইলেক, “ইয়ায় কি দায়ুদ বংশের ছাওয়া?”

২৪ ফরীশীলা এই কতা শুনিয়া কইলেক, “ইয়ায় তো অপদেবতালার রাজা বেলসবুলের শক্তিতে অপদেবতালাক খেদায়।”

২৫ যীশু ফরীশীলার মনের কতা বুঝির পায়া উমারলাক কইলেক, “যেই রাজ্য ঝগড়া করি খন্ড খন্ড হয় যায়, সেই রাজ্য

ধ্বংস হয়। কোন গঞ্জ বা পরিবার যদি নিজের মইন্ধোত ঝগড়া করে তাইলে উমরা আর টিকি থাকির পায় না।

২৬ শয়তান অসুর যদি নিজের শক্তি দিয়া নিজের মইন্ধোত নড়াই করে তাইলে, উমরা যুদা হয়। আর উয়ার রাজ্য কেমন করি টিকিবে?

২৭ মুই যদি শয়তান অসুরের শক্তি নিয়া অপদেবতালোক খ্যেদাং, তাইলে তোমার সাথীলা কোটে থাকি শক্তি পায়া অপদেবতালোক খ্যেদায়? তোমরা ঠিক কতা কইচেন কি না, তোমার সাথীলায় সেইটা বিচার করিবে।

২৮ কিন্তু মুই যদি ভগবানের আত্মা দিয়া অপদেবতালোক খ্যেদাং, তাইলে ভগবানের শাসন ব্যবস্থা তো তোমার মইন্ধোত আসিচে।

২৯ “এক জন শক্তিশালী মানষিক না বান্দিয়া কাণ্ডো কি উয়ার বাড়িত ঢুকি সউগ কিছু লুটপাট করির পারে? উয়াক বান্দি থুবার পাছত সউগ কিছু লুটপাট করির পারিবে।

৩০ “যে মানষি মোর পক্ষে না হয়, উয়ায় মোর বিরুদ্ধে। আর যায় মোর কামত ঢোকা না দেয়, উয়ায় মোর কামের বাধা দেয়।

৩১ এই বাদে মুই তোমারলোক কবার ধরচুং, মানষির সউগ পাপ আর ভগবানের বিরুদ্ধে নিন্দা ক্ষমা করা হবে। কিন্তু পবিত্র আত্মার বিরুদ্ধে অপমানের কতা ক্ষমা করা হবে না।

৩২ বাছাই করা মানষির বিরুদ্ধে কাণ্ডো কোনো কতা কইলে ক্ষমা করা হবে, কিন্তু পবিত্র আত্মার বিরুদ্ধে কতা কইলে ইহকাল আর

পরকাল কোন কালেও ক্ষমা করা হবে না।”

৩৩ “ভাল ফল পাবার বাদে ভাল গছ থাকা দরকার, কিন্তু খারাপ গছ থাকলে তোমরা খারাপ ফল পাবেন। কেনেনা ফল দেখিয়া গছ চিনা যায়।

৩৪ তোমরা কালসাপ! তোমরালা বেয়া মানষি হয়। কেনেনা করি ভাল কতা কবার পান? মানষির অন্তরত যেইলা দিয়া ভরতি আছে মুখ দিয়া সেইলায় বাইর হয়।

৩৫ ভাল মানষির অন্তর থাকি ভাল কতা বিরিয়া আইসে। আর বেয়া মানষির অন্তর থাকি বেয়া কতা বিরায়।

৩৬ মুই তোমারলাক কবার ধরচুং, মানষি যেইলা বাজে কতা কয়, বিচারের দিনত উয়াক পতিটা কতার হিসাব দিবার নাগিবে।

৩৭ তোমারলার কতার মইন্ধো দিয়ায় তোমাক নির্দোষ কওয়া হবে, আরো তোমারলার কতার মইন্ধো দিয়ায় দোষী করা হবে।”

৩৮ ইয়ার পাছত কয়জন পন্ডিত মানষি আর কয়জন ফরীশী যীশুক কইলেক, “হ্যে গুরু, তোমারটে হাতে হামরা একটা অচানক কামের চিন দেখির চাই।”

৩৯ যীশু উমারলাক কইলেক, “এই কালের অবিশ্বস্ত আর পাজি মানষিলা খালি কামের চিন চান্দায়। কিন্তু ভগবানের ভাববাদী যোনার চিন ছাড়া আর কোন চিন উমারলাক দেখা হবে না।

৪০ যোনা যেই নাকান করি একটা বড়মাছের পেটত তিন দিন তিন রাতি আছিলেক, বাছাই করা মানষিটাও একে নাকান করি

তিন দিন তিন রাত্তি মাটির তলাত থাকিবে।

৪১ বিচারের দিনত নীনবী গঞ্জের মানষিলা উঠি আসিয়া এই কালের মানষিলাৰ বিরুদ্ধে দোষ দেখেয়া দিবে। কেনেনা নীনবী গঞ্জের মানষিলা যোনার প্রচারের ফলে পাপ থাকি মন ফিরাইচে। আর দেখ, যোনার চায়া আরো মহান এক জন এটেকোনা আছে।

৪২ বিচারের দিনত দক্ষিণ দেশের রাণী উঠি আসিয়া এই কালের মানষিলাক দোষী সাব্যস্ত করিবে। কেনেনা শলোমন রাজার জ্ঞানের কতা শূনির বাদে উয়ায় দুনিয়ার শেষ সীমনা থাকি আসছিলেক। আর দেখ, এটেকোনা শলোমনের চায়া এক জন মহান আছে।

৪৩ “যেহা কোন মানষির ভিত্তি থাকি অপদেবতা বিরিয়া যায়, সেহা সেই অপদেবতাটা জিরিবার বাদে কোন এক শূনশান জাগা চান্দায়। কিন্তুক জিরিবার জাগা না পায় কয়,

৪৪ ‘মুই যেই মানষিরটে থাকি বিরিয়া গেইচোং, উয়ার ভিত্তিাত আরো সোন্দাইম।’ আর ফিরি আসিয়া দেখে যে, ঐ মানষির জীবন খুব ঝকঝকা আরো সাজা গোছা ঘরের নাকান আছে।

৪৫ সেহা উয়ায় যায়, উয়ার চায়া বেয়া আরো সাতটা অপদেবতাটাক ডেকে নিয়া আসিয়া ঐ ঘরত সোন্দেয়া রয়। এই বাদে মানষিটার পইলা দশার চায়া শেষ দশা আরো বেশী বেয়া হয়। এই কালের বেয়া মানষিলাৰ অবস্থাও একে নাকান হবে।”



৪৬ যীশু যেলা মানষিলার নগত কতা কবার ধরছিলেক সেলা উয়ার মাও আরো ভাইলা উয়ার সাথত কতা কবার বাদে বায়রাত বাচে আছিলেক।

৪৭ সেই সময় এক জন মানষি যীশুক কইলেক, “দেখ, তোমার মাও আর ভাইলা তোমার সোদে কতা কবার বাদে বায়রাত খাড়া হয় আছে।”

৪৮ সেলা যীশু উয়াক কইলেক, “কায় মোর মাও? আর কায় বা মোর ভাইলা?”

৪৯ তার পাছত যীশু উয়ার শিষ্যলোক দেখেয়া কইলেক, “দেখ! ইমরায় মোর মাও আর ভাই।

৫০ হে, যে কাণ্ডো মোর স্বর্গের বাপের ইচ্ছা পালন করে, উমরায় মোর মাও, ভাই, আর বইনি।”

১৩ ঐ দিনে যীশু ঘর থাকি বিরিয়া সাগরের পারত যায় বসিলেক।

২ আর উয়ার চাইরো পাকে মেলা মানষি আসিয়া জোটো হইলেক। এই বাদে যীশু একখান নাওত উঠিয়া বসিলেক। আর জোটো হওয়া মানষিলা সাগরের পারত খাড়া হয় রইলেক।

৩ যীশু উমারলাক ডেকেয়া গল্পের নাকান করি কইলেক, “শোন! এক জন চাষা ভুইয়ত বিচন ছিটিবার গেইলেক।

৪ বিচন ছিটাইতে ছিটাইতে কতলা বিচন ঘাটার বগলোত পড়িলেক, আর সেইলা পখি খায়া নিলেক।

৫ কতলা বিচন পড়িলেক শিলবাড়ির ভুইয়ত, আর মাটি বেশী নিচাত না থাকায় পচ-পচে গাজেয়া উঠিলেক।

৬ শিপা ভাল করি না হবার বাদে, বেলা উঠিলে বিচন গছলা বেলার রৌদের ঝালাত ঝেমড়ি যায়া মরি গেইলেক

৭ আর কতলা বিচন পড়িলেক কাটা ঝোপের মাঝত, আর কাটা ঝোপ বাড়িয়া বিচনলাক চিপি ধরিলেক।

৮ কতলা বিচন পড়িলেক ভাল ভুইয়ত। ভাল ভুইয়ত যেইলা পড়িচে, সেইলা তো বড় হয় ফসল ফলিলেক। ফসল কাটি আনিয়া দেখিলেক যে, কোনো ভুইয়ত হইচে দশ মন, আর কোনো ভুইয়ত হইচে বিশ মন, আর সগারে থাকি যেইলা ভাল ভুই, সেইলাত হইচে তিরিশ মন, যার তুলনা করা যায় না।”

৯ গল্পের শেষত যীশু কইলেক, “কাণ্ডোরো শুনিবার মন আছে, তাইলে উয়ায় শুনুক!”

১০ ভিড় কমি যাবার পাছত শিষ্যলো যীশুক আসিয়া কইলেক, “তোমরা গল্পের মইদ্রো দিয়া মানষিলাক শিক্ষা দিবার ধরচেন কেনে?”

১১ যীশু কইলেক, “স্বর্গের শাসন ব্যবস্থাত নুকি থাকা বিষয়লা তোমাক জানির দেওয়া হইচে। কিন্তু উমাক জানির দেওয়া হয় নাই।

১২ কেনেনা স্বর্গের শাসন ব্যবস্থার বিষয়োত যার বুঝিবার মন আছে, উয়াক আরো বুঝি দেওয়া হবে। কিন্তু যার বুঝিবার মন নাই, উয়ার মন থাকি ভগবানের বাইকের সউগ কিছু কাড়ি-কুড়ি নেওয়া হবে।

১৩ এই বাদে মুই গল্পের উপমা দিয়া উমাক কং, উমরা দেখিয়াও দেখে না, শুনিয়াও শুনে না, আর বুঝিয়াও বোঝে না।

১৪ এই নাকান ঘটনার মইন্ধো দিয়া ভাববাদী যিশাইয়ের কতা পূরণ হইলেক, তোমরা শুনিবেন কিন্তু বুঝিবেন না, চায়া দেখিবেন কিন্তু দেখির পাবেন না।

১৫ এই মানষিলার অন্তর পাষান হয় গেইচে, কান আছে কিন্তু শুনির পায় না, উমরা চোখু মুজিয়া আছে, যাতে দেখির না পায়, আর কান দিয়া শুনির না পায়, অন্তর দিয়া বুঝির না পায়, আর ভাল হবার বাদে মোরটে ফিরিয়া না আইসে।

১৬ “কিন্তু তোমরা ভগবানের আশুর্বাদ পাইচেন, কেনেনা তোমারালা চোখু দিয়া দেখির পান, কান দিয়াও শুনির পান।

১৭ মুই তোমারলাক সচাং করি কবার ধরচুং, তোমরা যেইলা দেখিচেন, শুনিচেন, সেইলা মেয়ো ভাববাদী আর ভগবান ভক্ত মানষিলা দেখির চায়াও দেখির পায় নাই। তোমরা যেইলা শুনিচেন, সেইলা শুনির চায়াও উমরা শুনির পায় নাই।”

১৮-১৯ “এলা তোমরা চাষার গল্প শুন, বিচন ছিটা, ইয়ার মানে এই নাকান যে, বিচন হইলেক স্বর্গের শাসন ব্যবস্থার কতা।

বিচনলা যে ঘাটার বগলত পড়িচে, ইয়ার মানে যেইলা মানষি স্বর্গের শাসন ব্যবস্থার কতা, শুনিয়াও বোঝে না, সেলো শয়তান-অসুর উমার অন্তর থাকি সেই বাইক্য কাড়ি নেয়।

২০ “আর যেইলা বিচন শিলবাড়ির ভুইয়োত পড়িচে, ইয়ার মানে এই নাকান মানষিক বুঝায়, যায় যায় ভগবানের বাইক্য শুনতে কালে আনন্দে মানি নেয়।

২১ কিন্তু উয়ার শিপা মাটির বেশী তলত না যাবার বাদে অল্প দিন বিশ্বাসী হয়। রয়, কেনেনা ভগবানের বাইক্য মানি নিবার বাদে দুঃখ-কষ্ট তাড়না আসিলে পাছত পচপচে পড়ি যায়।

২২ “কাটাঝোপত যে বিচন পড়িচে, ইয়ার মানে যে মানষিটা বাইক্য শোনে, কিন্তু সংসারের চিন্তা ভাবনায়, আরো ধন সম্পত্তির মায়াত ঐলাক চিপি ধরে। এই বাদে উমারলার জীবনত কোন ফল দেখা যায় না।

২৩ “ভাল ভুইয়োত বিচন পড়া মানে হইলেক, যায় যায় ভগবানের বাইক্য শুনিয়া মন-পরান দিয়া পালন করিয়া শক্ত করি ধরি রয়। উমার জীবনত ভগবানের বাইক্যের ভাল ফল দেখা দেয়। কোন ভুইয়োত হইচে দশ মন, কোন ভুইয়োত বিশ মন আর সগারে থাকি যেইলা ভাল ভুই সেইলাত তিরিশ মন, যার তুলনা করা যায় না।”

২৪ এলা যীশু মানষিলাক শিক্ষা দিবার বাদে আরেকটা গল্প কইলেক, “স্বর্গের শাসন ব্যবস্থা এই নাকানের এক জন মানষির

মতো, যায় নিজের ভুইয়োট ভাল বিচন ছিটাইলেক।

২৫ কিন্তু মানষিলা ফ্যেলা সগায় নিন গেইলেক, সেফো সেই মালিকের শত্রু আসিয়া গমের ভুইয়োট অগাছার বিচন ছিটিয়া চলি গেইলেক।

২৬ আর গমের চারা বড় হয় ফল ধরিলেক সেফো অগাছাও দেখা গেইলেক।

২৭ এই দেখিয়া বাড়ির চাকরলা ভুইয়ের মালিকোক আসিয়া কইলেক, ‘মালিক, তোমরা কি ভুইয়ত ভাল বিচন ফ্যেলান নাই? তাইলে গম বারিত অগাছা কোটে থাকি আসিলেক?’

২৮ “উয়ায় উমাক কইলেক, ‘নিশ্চয় এইটা কোন শত্রুর কাম।’ চাকরলা কইলেক, ‘তোমরা কি চান হামরা যায়া অগাছালা উকরি ফ্যেলাই?’

২৯ “উয়ায় কইলেক, ‘না, কেনেনা তোমরা অগাছা উকরির যায়া অগাছার নগত গমও উকরি ফ্যেলাবেন।

৩০ ফসল কাটার সমায় না হওয়া পর্যন্ত ঐলাক বড় হবার দেও। পাছত ফসললা কাটার সমায় মুই কামলাক কইম, পইলা তোমরা ঘাসলাক অগুনত পুড়িবার বাদে একটে জোটো করি আটি বান্দো, আর তার পাছত গম গোলাত তোল।”

৩১ যীশু উমারলাক আর একটা গল্প কইলেক, “স্বর্গের শাসন ব্যবস্থা হইলেক একটা সহীষ্যা দানার নাকান। এক জন মানষি এই দানাটা জমিত ফ্যেলাইলেক।

৩২ যতলা শাকের বিচি আছে, সগারে চায়া এইটা ছোট। কিন্তুক এইটা বুনিয়া যেলা বড় হয়, সেলা অইন্য শাকের চাইতে বড় গছ হয়। আর দেখা যায় কি, ইয়ার ঠাইলত পখিও ভাসা বান্দিয়া রবার পায়।”

৩৩ যীশু উমাক আরেকটা গল্প কইলেক, “স্বর্গের শাসন ব্যবস্থা হইলেক সোডার নাকান, কোন এক জন বেটিছাওয়া আঠারো কেজি ময়দাত যদি অল্প সোডা মিশায় তাইলে সউগ ময়দায় ফাপিয়া ফুলি ওঠে।”

৩৪ মানষিলাক উপদেশ দিবার সমায় যীশু পেরায় গল্প দিয়া শিক্ষা দিবার ধরছিলেক। গল্পের উপমা ছাড়া অইন্য কোন শিক্ষা দেয় নাই।

৩৫ আর এইটা হইলেক ভগবান যে উয়ার ভাববাদীর মইন্ধো দিয়া কতা কইচে সেইটা পূরণ হইলেক, মুই গল্পের উপমা দিয়া কতা কইম, দুনিয়া সিজ্জন থাকি এলা পর্যন্ত যেইলা বিষয় গোপন আছে সেইলা বাইর করিম।

৩৬ পাছত যীশু মানষিলাক বিদায় দিয়া ঘরত সোন্দাইলেক। সেলা উয়ার শিষ্যলা আসিয়া যীশুক কইলেক, “সেই অগাছার গল্পটা হামারলাক বুঝি দেও।”

৩৭ ইয়ার উত্তরে যীশু উমারলাক কইলেক, “যায় ভাল বিচন ফেলায়, উয়ায় বাছাই করা মানষিটা।

৩৮ ভুই হইলেক এই দুনিয়া, স্বর্গের শাসন ব্যবস্থার মানষিলা হইলেক ভাল বিচন। আর যেইলা শয়তান মানষি, সেইলা হইলেক অগাছা।

৩৯ বিচনের মইদ্বোত যে শত্রু অগাছার বিচন ছিটি দিয়া গেইচে, উয়ায় হইলেক শয়তান অসুর। আর ফসল কাটার সমায় হইলেক, এই কালের শেষ সমায়। যেইলা কামলা ফসল কাটিবে উমরা হইলেক স্বর্গদূত।

৪০ অগাছা জোটো করিয়া অগুনত ছোবা দেওয়া হয়। এই দুনিয়ার শেষ সমায়ও ঠিক একে নাকান হবে।

৪১ বাছাই করা মানষি উয়ার স্বর্গদূতলাক পেঠেয়া দিবে। যায় যায় অইন্য মানষিলাক পাপ করায়, আর নিজেও পাপ করে, উমার সগাকে পরমপ্রভুর দূতলা বাছাই করা মানষিটার শাসন ব্যবস্থার মইদ্বো থাকি একে সাথে জোটো করিয়া,

৪২ জ্বলন্ত অগুনত ফেলেয়া দিবে। ওটে মানষিলা যাতনা ভোগ করিবে আর দাঁতে দাঁত কিড়মিড়াবে।

৪৩ ইয়ার পাছত যায় যায় ধার্মিক বুলিয়া গন্য হইচে, উমরা স্বর্গের বাপের শাসন ব্যবস্থাত বেলার নাকান চকচকা দেখা যাবে। যার শুনবার মন আছে, উয়ায় শুনুক।”

৪৪ “স্বর্গের শাসন ব্যবস্থা হইলেক ভুইয়োত নুকি থোয়া ধনের নাকান। এক জন মানষি সেইটা খুজিয়া পায় আরো ভুইয়োত

নুকিয়া খুইলেক। ইয়াতে এত খুশি হইলেক যে ওটে থাকি যায়া উয়ার সউগ কিছু বেচেয়া ওই ভুইখান কিনিলেক।

৪৫ “আর স্বর্গের শাসন ব্যবস্থা হইলেক এক জন ব্যবসায়ীর নাকান, যায় ভাল মুক্তা চান্দাইছিলেক।

৪৬ যেলা উয়ায় একটা দামী মুক্তা চান্দে পাইলেক, সেলা উয়ায় যায়া উয়ার সউগ কিছু বেচেয়া সেই মুক্তাটা কিনিলেক।

৪৭ “আর স্বর্গের শাসন ব্যবস্থা হইলেক একখান বড় জালের নাকান। যেলা সাগরত ফেলা হইলেক, সেলা সউগ নাকানের মাছ জালত ফান্দিলেক।

৪৮ জাল ভত্তি হয় মানষিলা ডাঙাত টানিয়া তুলিলেক। আর ভাল মাছলা বাছাই করিয়া বড় খলাইয়ত খুইলেক, বেয়ালা ফ্যেলেয়া দিলেক।

৪৯ দুনিয়ার শেষ কালত এই নাকানে হবে। স্বর্গদূতলা আসিয়া ধার্মিক মানষিলা মইদ্বো থাকি পাপী মানষিলাক যুদা করিয়া জ্বলন্ত অগুনত ফ্যেলেয়া দিবে।

৫০ ওটেকোনা মানষিলা কান্দিবে আর দাঁতে দাঁত কিড়মিড়াবে।”

৫১ যীশু উয়ার শিষ্যলোক পুছিলেক, “তোমরা কি এইলা গল্পের মানে বুঝিলেন?” উমরা উয়াক কইলেক, “হে, হামরা বুঝিচি।”

৫২ সেলা যীশু উমারলাক কইলেক, “স্বর্গের শাসন ব্যবস্থা সমন্ধে পন্ডিতলা শিক্ষা পাইচে, উমরা সগায় এই গারোস্তের



নাকান, যায় উয়ার ভান্ডার থাকি নয়া আর পুরান সউগ জিনিসে বাইর করিলেক।”

৫৩ যীশু গল্প কবার পাছত ওটে থাকি চলি গেইলেক।

৫৪ নিজের গেরাম নাসারত আসিয়া উপাসনা ঘরত য়ায়া মানষিলাক শিক্ষা দিবার নাগিলেক। উয়ার কতা শুনিয়া মানষিলা অচানক হয়়া কবার নাগিলেক, “এই গেয়ান উয়ায় কোটে থাকি পাইলেক, আর মহাশক্তির কাম কোটে থাকি করির ধরচে?”

৫৫ ইয়ায় তো খুটার মিস্তির বেটা! মরিয়মের বেটা! য়াকব, য়োষেফ, য়ুদাস আর শিমোনের ভাই, না হয় কি?

৫৬ উয়ার বইনিলাও হামারলার এটেকোনা আছে, কি না? তাইলে কোটে থাকি উয়ায় এইলা পাইলেক?”

৫৭ এই নাকান করি যীশুক নিয়া মানষিলাক মনত বড় সমস্যা আসিবার নাগিলেক। আর উয়াক বিশ্বাস করির পারিলেক না। সেয়া যীশু মানষিলাক কইলেক, “নিজের বাড়ি আর নিজের গেরাম ছাড়া ভগবানের ভাববাদীলা সউগ জাগাতে সন্মান পায়।”

৫৮ উয়ার প্রতি মানষিলাক অবিশ্বাস দেখিয়া উয়ায় ওটেকোনা বেশী অচানক কাম করিলেক না।

১৪ সেই সমায় গালীল প্রদেশের রাজ্যপাল আছিলেক হেরোদ, যীশুর বিষয় শুনিয়া উয়ায় উয়ার কর্মচারীলাক কইলেক, “ইয়ায়

দীক্ষাদাতা যোহন, ইয়ায় মরিয়া বত্তি উঠিচে। এই বাদে উয়ায় অচানক কাম করির ধরচে।”

৩ এই হেরোদ নিজের ভাই ফিলিপের মাইয়াক খুশি করির বাদে যোহনক শিকল দিয়া বান্দিয়া জেলখানাত থুইলেক। কেনেনা হেরোদ উয়ার ভাইয়ের মাইয়াক হেরোদিয়াক বিয়াও করিচিলেক।

৪ এই বাদে যোহন হেরোদক বার বার কবার ধরছিলেক, “তোর ভাইয়ের মাইয়াক বিয়াও করা ঠিক হয় নাই।”

৫ এই বাদে যোহনক মারি ফ্যেলের চাইছিলেক, কিন্তু উয়ায় মানষিলার ভয় খাইছিলেক। কেনেনা মানষিলা যোহনক ভগবানের ভাববাদী বুলি মানির ধরছিলেক।

৬ হেরোদের জন্মদিনত হেরোদিয়ার বেটি মানষিলার আগত নাচিয়া হেরোদক খুব খুশি করিলেক।

৭ এই বাদে হেরোদ কিরা-কাটি কইলেক, ছাওয়াটা যা চাবে, উয়ায় সেইটায় দিবে।

৮ ছাওয়াটা উয়ার মাওয়ার পরামর্শ মতন কইলেক, “খালাত করি দীক্ষাদাতা যোহনের মাথাটা মোক আনিয়া দেও।”

৯ যদিও রাজা হেরোদ দুঃখ পাইলেক, কিন্তু যে মানষির সোদে খাবার বসিছিলেক উমারলার আগত কিরা কাটিচে, এই বাদে সন্মানের কতা ভাবিয়া উয়ায় ঐ নাকানে হুকুম দিলেক।

১০ উয়ায় মানষিক প্যেঠেয়া জেলখানার ভিতরাত যোহনের মাথা কাটিলেক।

১১ তার পাছত খালাত করি আনিয়া চেংড়িটাক দেওয়া হইলেক,  
আর ধরি যায়া চেংড়িটা উয়ার মাক দিলেক।

১২ ইয়ার পাছত যোহনের শিষ্যলো আসিয়া যোহনের মরা দেহাটা  
নিয়া যায়া সমাধি দিলেক। সেলো উমরা যায়া খবরটা যীশুক  
দিলেক।

১৩ যীশু যোহনের মরণের কতা শুনিয়া একলায় একখান  
নাওয়োত চড়িয়া নির্জন জাগাত চলিয়া গেইলেক। মানষিলা এই  
কতা শুনিয়া নানান গেরাম থাকি হাটিয়া উয়ার পাছ ধরিলেক।

১৪ যীশু নাও থাকিয়া নামিয়া দেখিলেক যে, মেয়ো মানষি  
জোটো হইচে, সেলো উয়ার মায়া হইলেক। উমারলার মইন্ধে যায়  
যায় অসুস্থ আছিলেক উমারলাক ভাল করিলেক।

১৫ যেয়ো বেলা ডোবোং ডোবোং সেলো শিষ্যলো উয়ার বগল  
আসিয়া কইলেক, “জাগাখান হইলেক নিধুয়া পাথার, বেলা  
ডোবোং ডোবোং হইচে। মানষিলাক বিদায় করি দেও, উমরা  
যাতে নিজের বাদে গেরামত যায়া খাবার কিনির পায়।”

১৬ যীশু উমারলাক কইলেক, “উমারলাক যাবার দরকার নাই,  
তোমরা উমারলাক খাবার দেও।”

১৭ সেলো শিষ্যলো উয়াক কইলেক, “হামারটে খালি পাঁচখান  
রুটি আর দুইটা মাছ ছাড়া কিছুই নাই।”

১৮-১৯ যীশু কইলেক, “ঐলা মোর এইটে ধরি আইসো।” ইয়ার  
পাছত মানষিলাক ঘাসের উপরাত বসিবার কইলেক। যীশু সেলো

ঐ পাঁচখান রুটি আর দুইটা মাছ হাতত ধরিয়া, স্বর্গের ভিত্তি দেখিয়া ভগবানক ধন্যবাদ দিলেক। তার পর মানষিলাক খাবার দিবার বাদে, রুটি ছিড়িয়া শিষ্যলার হাতত দিলেক। শিষ্যলো ভাগ করিয়া সগাকে দিলেক।

২০ উমরা সগায় পেট ভরেয়া খাইলেক। আর যেই খাবারলা বাঁচিলেক, সেই খাবারলা শিষ্যলো বারোটা ডেলি ভরতি করি থুইলেক।

২১ যায় যায় খাইচে, উমরলার মইন্ধে বেটিছাওয়া আর ছোট ছাওয়া ছাড়া সংখ্যায় পাঁচ হাজার আছিলেক।

২২ যীশু শিষ্যলোক তাগদা দিবার নাগিলেক, যাতে উমরা উয়ার আগত নাওত করিয়া অইন্য পারত যায়। ইয়ার পাছত যীশু মানষিলাক বিদায় দিবার নাগিলেক।

২৩ মানষিলাক বিদায় করিয়া পাহাড়ের উপরাত প্রার্থনা করির গেইলেক। সইন্ধা হয় আসিলেও উয়ায় তাণ্ডো একলায় ওটেকোনা রইলেক।

২৪ শিষ্যলার নাওখান ঘাট থাকি অনেক দূরত গেইচে। উল্টা পাকের বাতাসের ধাক্কাতে নাওখান দুলির নাগিলেক।

২৫ ভোর রাতি যীশু সাগরের উপর দিয়া হাটিয়া শিষ্যলার বগলত আসির নাগিলেক।

২৬ শিষ্যলো যীশুক সাগরের উপর দিয়া হাটিয়া আসির দেখিয়া দারুন ভয় খাইলেক। ভয়ে চিকিরিয়া কবার নাগিলেক, “ভূত!

ভূত!”

২৭ সেলোয় সেলোয় যীশু কইলেক, “এই মুই! ভয় না খান, তোমরা সাহস কর।”

২৮ পিতর কইলেক, “গুরু যদি তোমরায় হন, তাইলে জলের উপর দিয়া তোমারটে হাটি যাবার অনুমতি মোক দেও।”

২৯ যীশু কইলেক, “আইসেক।” সেলো পিতর নাও থাকি নামিয়া জলের উপর দিয়া হাটিয়া যীশুরটে আসির ধরিলেক।

৩০ কিন্তু দারুন বাতাস দেখিয়া ভয় খায়া ডুবি যাবার নাগিলেক, আর চিকরিয়া কইলেক, “গুরু মোক বাঁচান!”

৩১ যীশু সেলোয় হাত বাড়েয়া পিতরক ধরিয়া কবার নাগিলেক, “কিরে অল্প বিশ্বাসী! তুই কেনে এত সন্দেহ করিলু?”

৩২-৩৩ যীশু আর পিতর নাওত উঠিতে কালে বাতাস থামি গেইলেক। যায় যায় নাওত আছিলেক, উমরা যীশুক ভক্তি দিয়া কইলেক, “সচাং করি তোমরায় ভগবানের বেটা।”

৩৪ ইয়ার পাছত উমরা সাগর পার হয়া গিনেষরৎ এলাকাত আসিলেক।

৩৫ সেই এলাকার মানষিলা যীশুক চিনির পায়া সউগ এলাকাত যীশুরটে আসিবার খবর রটেয়া দিলেক। সেলো মানষিলা উমার মইন্ধোত যায় যায় অসুকিয়া আছিলেক উমারলাক যীশুরটে নিয়া আসিলেক।

৩৬ উমরা যীশুক কাউলা কাউলি করি কবার নাগিলেক, যাতে অসুকিয়া মানষিলা যীশুর গিলাপের কিনারটা নারির পায়। আর যত জন নারিলেক সগায় ভাল হইলেক।

১৫ যিরুশালেম থাকি কয়েক জন ফরীশী আর পন্ডিত যীশুর নগত দেখা করির আসিলেক। উমরা যীশুক পুছিলেক,

২ “হামার বাপ ঠাকুরদা থাকি যে নিয়ম মানি আসির ধরচি, কেনে তোমার শিষ্যলো সেইলা মানিয়া চলে না? খাবার আগত উমরা হাত ধোয় না।”

৩ যীশু কইলেক, “তোমরা ভগবানের আদেশ ছাড়িয়া মানষির বানা নিয়ম-নীতি মানিবার ধরচেন।

৪ পরম প্রভু কইচে, ‘তোমরা বাপ-মাওক সন্মান দেও, কাণ্ডো নিজের বাপ-মাওয়ের অপমান করিলে উয়াক মারি ফ্যেলা হবে।’

৫ কিন্তু তোমরা মানষিক কয়া থাকেন, কাণ্ডো যদি মাও-বাপক কয় যে, ‘মুই তোমাক কোনো কিছুই সাহায্য করির পাইম না, যা কিছু তোমারলার সাহায্য করির বাদে আছিলেক, সেইলা মুই ভগবানক গতে দিচুং।’

৬ তাইলে মাও-বাপের প্রতি কোনো কর্তব্য রইলেক না এইটা তো তোমারে শিক্ষা। এই বাদে তোমরা নিজের নিয়ম চালু করির যায়া ভগবানের বাইক্য বাতিল করিচেন।

৭ তোমরা হইলেন ভন্ড! ভগবানের ভাববাদী যিশাইয় তোমারলার সমন্ধে ঠিকেই নেখিচে,

৮ এই মানষিলা মুখতে খালি মোর সন্মান করির নাগচে, কিন্তুক উমারলার অন্তরের টান মোর এদি নাই।

৯ উমরা ফাকোতে মোর গুণগান গায়, উমরা খালি মানষির বানা নিয়ম-কানুন ভগবানের নিয়ম কয়া শিক্ষা দেয়।”

১০ ইয়ার পাছত যীশু মানষিলাক ডেকেয়া কইলেক, “মুই যেইলা কং, সেইলা শুনিয়া বুঝেন।

১১ মানষি যেইলা খায় সেইলা মানষিক অশুদ্ধি করির পায় না। কিন্তু মুখের ভিত্তি থাকি যেইলা বিরি আইসে, সেইলায় মানষিক অশুদ্ধি করে।”

১২ সেলো শিষ্যলো যীশুক আসিয়া কইলেক, “তোমার এই কতা শুনিয়া ফরীশীলা অপমান বোধ করির ধরচে, সেটা তোমরা কি জানেন?”

১৩ ইয়ার উত্তরে যীশু কইলেক, “যেই চারালা মোর স্বর্গের বাপ গাড়ে নাই, সেইলা উকুরি ফেলো হবে।

১৪ এই বাদে উমারলার কতা ছাড়ি দেও। উমরা নিজে কানা! উমরা আরো অইন্য কানাক ঘাটা দেখের ধরচে, কানা হয় কানাক ঘাটা দেখের গেইলে দুইজনে খালত পড়িবে।”

১৫ সেলো পিতর যীশুক কইলেক, “তোমরা যেইলা গল্প কইলেন, তার মানে হামারলাক বুঝিয়া দেও।”

১৬ যীশু কইলেক, “তোমরা কি এলাও অবুঝ আছেন?

১৭ তোমরা কি বুঝেন না, যেইলা মুখ দিয়া পেটত সোন্দায় সেইলা শেষত মল হিসাবে বাইর হয় যায়।

১৮ কিন্তুক যেইলা মুখ দিয়া বাইর হয় আইসে, সেইলা অন্তর থাকি বাইর হয় আইসে, আর সেইলা মানষিক অশুদ্ধি করে।

১৯ অন্তর থাকি বেয়া চিন্তা, খুন, সউগ নাকানের ব্যভিচার, বেশ্যাগিরি, চুরি, মিছা সাক্ষী, গেলানি বাইর হয় আইসে।

২০ এইলায় মানষিক অশুদ্ধি করে, কিন্তু হাত না ধুইয়া খাইলে মানষি ছুয়া হয় না।”

২১ ইয়ার পাছত যীশু ঐ জাগা ছাড়িয়া সোর আর সীদোন এলাকাত চলি গেইলেক।

২২ ওটেকার এক জন কনান দেশের বেটিছাওয়া আসিয়া চিকিরিয়া কবার নাগিলেক, “হে দয়াল গুরু, দায়ূদের বেটা, তুই মোক দয়া করেক। মোর বেটিটাক অপদেবতা ধরচে, এই বাদে উয়ায় খুব কষ্ট পাবার ধরচে।”

২৩ কিন্তু যীশু উয়াক একটাও কতা কইলেক না, সেলো শিষ্যলো আসিয়া কাউলিয়া কইলেক, “উয়াক বিদায় করো, কেনেনা উয়ায় হামার পাছে পাছে চিকরির ধরচে।”



২৪ যীশু কইলেক, “মোক খালি ইজ্রায়েল বংশের হারে যাওয়া ভেড়ালারটে পেঠা হইচে।”

২৫ সেলো বেটিছাওয়াটা যীশুরটে আসিয়া হাংকুড়া পাড়ি ভক্তি দিয়া কইলেক, “গুরু, দয়া করি মোক উপকার কর।”

২৬ যীশু কইলেক, “ছাওয়া-ছোটর খাবার নিয়া কুকুরের আগত ফেলা ভাল না হয়।”

২৭ বেটিছাওয়াটা কইলেক, “হে গুরু, তোমরা ঠিকেই কইচেন, মালিকের টেবিল থাকি যেইলা আইটা গুড়া গাড়া খাবার পড়ে সেইলা কুকুরে খায়।”

২৮ সেলো যীশু উয়াক কইলেক, “বাঃ তোর তো ভাল বিশ্বাস! তুই যেই নাকান চাইছিস, ঐ নাকানে হউক।” আর সেলোয় সেলোয় চেংড়ি ছাওয়াটা ভাল হয় গেইলেক।

২৯ তার পাছত যীশু গালীল সাগরের বগল দিয়া যায় একখান পাহাড়ত চড়িয়া বসিলেক।

৩০ আর সেলো মানষি আসিয়া একটে জোটো হইলেক। ঐ মানষিলার সোদে কানা, খোড়া, বোবা, নুলা আরো সেলো মানষিক সাথত আনিলেক। উমরা ঐ মানষিলাক যীশুর ঠ্যংএর বগলত থুইলেক। আর যীশু উমাক সগাকে ভাল করিলেক।

৩১ মানষিলা সেলো দেখিলেক, বোবা কতা কবার ধরচে, নুলা শক্তি পায় হাটিবার ধরচে, খোড়োলা হাটাচলা করির ধরচে, কানা মানষি দেখির পাবার ধরচে, এই দেখিয়া উমরালা অচানক

হইলেক। আর ইজ্রায়েলীলার ভগবানের গুণকিত্তন করির নাগিলেক।

৩২ ইয়ার পাছত যীশু শিষ্যলোক ডেকেয়া কইলেক, “এই মানষিলার বাদে মোর খুব মায়া নাগির ধরচে, কেনেনা আজি থাকি তিন দিন হইলেক, এই মানষিলা মোর নগত আছে। ইমারলারটে কোন খাবার নাই। এই নাকান অবস্থায় মুই বিদায় দিবার পাং না। উমরলা ঘাটাত অজ্ঞান হয়্য পরিবে।”

৩৩ শিষ্যলোক কইলেক, “এই নিধুয়া পাথারত এত মানষির খাবার হামরা কোটে পামো?”

৩৪ যীশু উমরলাক কইলেক, “তোমারলারটে কয়খান রুটি আছে?” উমরা কইলেক, “সাতখান রুটি আর কয়েকটা ছোট ছোট মাছ আছে।”

৩৫-৩৬ মানষিলাক বসির কয়া যীশু সেই সাতখান রুটি আর মাছলা নিলেক। আর ভগবানক ধন্যবাদ দিয়া সেই রুটিলা টুকরা করি শিষ্যলোর হাতত দিলেক। আর শিষ্যলোক মানষিলাক দিলেক।

৩৭ মানষিলা সগায় পেট ভরেয়া খাইলেক। আর গুড়া-গাড়া যেইলা পড়ি রইল সেইলা আরো সাত ডেলি হইলেক।

৩৮ যেই মানষিলা খাইলেক উমরলার মইন্ধে ছাওয়া আর বেটিছাওয়া বাদ দিয়া বেটাছাওয়ার সংখ্যা আছিলেক চার হাজার।

৩৯ ইয়ার পাছত যীশু মানষিলাক বিদায় দিয়া নাওত চড়ি মগদন এলাকাত ফিরি গেইলেক।

১৬ ইয়ার পাছত কয়েক জন ফরীশী আর সদূকী আসিয়া যীশুক যাচাই করির চাইলেক। এই বাদে দ্যাওয়া থাকি ঐশ্বরিক শক্তির অচানক চিনের কাম করির কইলেক।

২ যীশু কইলেক, “সইস্কা হইলে তোমরা কন ‘দিনটা পরিস্কার থাকিবে, কেনেনা দ্যাওয়াটা নাল হইচে।’

৩ আর সাকাল হইলে কন যে, ‘আজি হুরকা হবে কেনেনা দ্যাওয়াটা নাল আর আন্ধার হইচে।’ তোমরা দ্যাওয়ার অবস্থা ভাল করির বুঝির পান, অথচ এই কালের চিন বুঝির পান না।

৪ এই কালের অবিশ্বাসী আর পাজি মানষিলা চিন চান্দায়, কিন্তু যোনার চিন ছাড়া আর অইন্য কোন চিন দেখা হবার না হয়।” পরে যীশু উমারলাক ছাড়িয়া চলি গেইলেক।

৫ সাগরের অইন্য পারত যাবার সমায় শিষ্যলো রুটি নিবার ভুলি গেইলেক।

৬ যীশু উমারলাক কইলেক, “তোমরা ফরীশী আর সদূকীলার সোডা থাকি সাবধান হন।”

৭ ইয়াতে শিষ্যলো নিজের মইন্ধোত কওয়াকুয়ি করিবার নাগিলেক, “হামরা রুটি আনি নাই বুলিয়া গুরু এই নাকানের

কতা কবার ধরচে?”

৮ উমার কতা বুঝির পায়া যীশু কইলেক, “অল্প বিশ্বাসী কোটেকার, তোমরা কেনে কওয়াকুয়ি করির নাগচেন যে রুটি আনেন নাই?

৯ তোমরা কি এলাও বুঝেন না বা তোমার কি ফম নাই, সেই পাঁচ হাজার মানষির বাদে পাঁচ খান রুটির কতা আর তার পাছত কত ডেলি কুড়াইলেন?

১০ আর চার হাজার মানষির বাদে সাতখান রুটির কতা, কত ডেলি তোমরা কুড়াইচেন?

১১ তোমরা কেনে বুঝির পান না যে, মুই রুটির বিষয় কং নাই? মুই তোমারলাক কইচুং, ফরীশী আর সদ্বুকীলার সোডা থাকি সাবধান হন।”

১২ সেলো উমরা বুঝির পাইলেক যে, সোডা দেওয়া রুটি হাতে সতর্ক হবার কয় নাই। কইচে উমরা যাতে ফরীশী আর সদ্বুকীলার শিক্ষা থাকি সাবধান থাকে।

১৩ ইয়ার পাছত যীশু কৈসরিয়া ফিলিপী অঞ্চলত গেইলেক, আর শিষ্যলোক পুছিলেক, “বাছাই করা মানষিটা কায় এই বিষয়ে মানষি কি কয়?”

১৪ উমরা কইলেক, “কাণ্ডো কাণ্ডো কয় তোমরা দীক্ষাদাতা যোহন, কাণ্ডো কাণ্ডো কয় ভগবানের ভাববাদী এলিয়, আরো

কাণ্ডো কাণ্ডো কয় ঘিরমিয় বা অইন্য ভগবানের ভাববাদীলার মইন্ধোত এক জন।”

১৫ সেলো উয়ায় কইলেক, “তোমরা কি কন, মুই কায়?”

১৬ শিমোন-পিতর কইলেক, “তোমরা হইলেন বাছাই করা রাজা, জীবন্ত ভগবানের বেটা।”

১৭ যীশু কইলেক, “যোনার বেটা শিমোন। তুই আশুবাদ পাওয়া কোন মানষিরটে এই কতা জানিস নাই, কিন্তুক মোর স্বর্গের বাপ তোক এই কতাটা জানাইচে।

১৮ মুই তোক কবার ধরচুং, তুই পিতর আর এই শিলের উপরাত মুই মোর সমিতি বানাইম। নরকের কোন শক্তি উয়ার উপরাত জয় লাভ করির পায় না।

১৯ মুই তোক স্বর্গের শাসন ব্যবস্থার চাবিলা দিম, আর এই দুনিয়াত যেইলা বান্দিবু স্বর্গত সেইলা বান্দি থোয়া হবে। দুনিয়াত যেইলা খুলি দিবু সেইলা স্বর্গত খুলি দেওয়া হবে।”

২০ ইয়ার পাছত উয়ায় শিষ্যলোক সাবধান করি কইলেক, “এই কতাটা তোমরা কাণ্ডোকে না কন, মুই যে বাছাই করা রাজা।”

২১ সেই সময় থাকি যীশু শিষ্যলোক জানেবার নাগিলেক যে উয়াক যিরুশালেম যাবার নাগিবে, আর যিহুদী নেতালা, প্রধান বামনলা আর পন্ডিত মানষিলার হাতত উয়াক ধরে দিবে। সেলো খুব দুঃখ-কষ্ট ভোগ করির নাগিবে। তার পাছত উয়াক মারি

ফেলা হবে আর তিন দিনের দিন মরণক জয় করি ফির বত্তি  
উঠির নাগিবে।

২২ সেলা পিতর অল্প দূরত ডেকেয়া অবজ্ঞা করি কইলেক,  
“গুরু, এইলা থাকি ভগবান তোমাক বাঁচাউক। এই নাকান  
তোমার উপরাত না হউক।”

২৩ যীশু পিতরের ভিত্তি ঘুরিয়া কইলেক, “মোর এইটে থাকি দূর  
হঃ শয়তান! তুই মোর ঘাটার কাটা! তুই মানষির দৃষ্টিভঙ্গি নিয়া এই  
চিন্তা ভাবনা করির ধরচিস, যেইলা ভগবানের না হয়, সেইলায় তুই  
ভাবিস।”

২৪ ইয়ার পাছত যীশু উয়ার শিষ্যলোক কইলেক, “যদি কাণ্ডো  
মোর ঘাটাত চলির চায়, তাইলে উয়ার নিজের ইচ্ছা মতন ঘাটা  
চলা বন্ধ করুক। আর নিজের ক্রুশের বোঝা ঘাড়ত নিয়া মোর  
পাছত আসুক।

২৫ যে কাণ্ডো নিজের বাদে বত্তি থাকির চায়, উয়ায় মরিবে।  
কিন্তু মোর বাদে যায় জীবন হারায়, উয়ার জীবন রক্ষা পাবে।

২৬ কাণ্ডো যদি গোটায় দুনিয়া লাভ করিয়া উয়ার জীবন হারায়,  
তাইলে উয়ার কি লাভ? জীবন ফিরি পাবার বাদে উয়ার দিবার  
মতন কি আছে?

২৭ বাছাই করা মানষিটা উয়ার স্বর্গদূতলাক সাথত নিয়া স্বর্গের  
বাপ জাকজমকত আসিবে। সেলা উয়ায় প্রতিটা মানষিক উয়ার  
কামাই অনুসারে ফল দিবে।

২৮ মুই তোমারলাক সচাং কবার ধরচুং, এটে এমন কয়জন মানষি আছে, উমারলাক বাছাই করা মানষিটা রাজা হিসাবে দেখা না দেওয়া পর্যন্ত উমরা কোন মতে মরিবে না।”

১৭ ইয়ার ছয় দিন পাছত যীশু, পিতর, যাকব আর উয়ার ভাই যোহনক সাথত নিয়া একখান উচা পাহাড়ের উপরা যায়। উঠিলেক।

২-৩ আর শিষ্যলার আগত যীশুর চেহারা বদলি গেইলেক। উয়ার মুখ বেলার নাকান ঝকমক, উয়ার পোশাকলা আলোর মত সাদা। অচমকায় শিষ্যলা দেখির পাইলেক ভগবানের ভাববাদী এলিয় আর মহাপুরুষ মোশি যীশুর সোদে কতা কবার ধরচে।

৪ স্যেলা পিতর যীশুক কইলেক যে, “গুরু! হামরালার এইটে থাকা ভাল, তোমরা যদি চান, তাইলে মুই তোমার বাদে এইটে তিনটা তাম্বু বানাং, একটা তোমার, একটা মহাপুরুষ মোশির, আর একটা ভগবানের ভাববাদী এলিয়র বাদে।”

৫ এই কতা কইতে নাই কইতে, একখান ধপ-ধপা সাদা মেঘ আসিয়া ঐ জাগাখান ঢাকি নিলেক। আর ঐ মেঘ থাকি একটা আওয়াজ শোনা গেইলেক, “ইয়ায় মোর বেটা, মোর মনের এক জন। ইয়ার উপরত মুই খুব সন্তুষ্ট, তোমরা ইয়ার কতা শোন।”

৬ এই কতা শুনিয়া শিষ্যলা ভয়ে মাটিত উবুড়ি হয়। পড়িলেক।

৭ স্যেলা যীশু আসিয়া উমারলাক নাড়িয়া কইলেক, “ওঠো, ভয় না খান।”

৮ স্যেলা উমরা মুখ তুলি দেখিলেক, আর ওটে যীশুক ছাড়া কাণ্ডোকে দেখির পাইলেক না।

৯ স্যেলা উমরা পাহাড় থাকি নামি আসিলেক, স্যেলা যীশু উমাক আদেশ দিলেক, “তোমরা যেইলা দেখিলেন, সেইলা বাছাই করা মানষিটা মরণ থাকি বত্তি না ওঠা পর্যন্ত কাণ্ডোকে কন না।”

১০ শিষ্যলা উয়াক পুছিলেক, “তাইলে কেনে পন্ডিতলা কবার ধরচে যে, বাছাই করা রাজাটার আগত এলিয় আইসা দরকার?”

১১ যীশু কইলেক, “এ কতা সচাং, ভগবানের ভাববাদী এলিয় আসিয়া সউগ কিছু ঠিক ঠাক করিবে, বাছাই করা রাজাটার বাদে।

১২ কিন্তু মুই তোমাক কবার ধরচুং, এলিয়র মত এক জন আসিচে আর মানষি উয়াক চিনির পায় নাই। মানষিলা উয়ার উপরা যা ইচ্ছা তাই করিচে। এই নাকান করি বাছাই করা মানষিটাকও দুঃখ ভোগ করির নাগিবে।”

১৩ স্যেলা শিষ্যলা বুঝির পাইলেক যে, উয়ায় হামাক দীক্ষাদাতা যোহনের বিষয় কবার ধরচে।

১৪ যীশু আর উয়ার শিষ্যলা স্যেলা মানষিলাৰটে ফিরি আসিলেক, স্যেলা একটা মানষি হাংকুড়া পাড়ি কইলেক,



১৫ “গুরু, মোর বেটাটাক তোমরা দয়া কর। উয়ার মৃগী অসুখ হইচে আর উয়ায় খুব কষ্ট পাবার ধরচে। পেয়ায় পেয়ায় উয়ায় অগুনত আর জলত পড়ি যায়।

১৬ মুই উয়াক তোমার শিষ্যলারটে আনিছিলুং, কিন্তু উমরা উয়াক ভাল করির পায় নাই।”

১৭ যীশু কইলেক, “অবিশ্বাসীর গুষ্টি! দুষ্ট মানষিলা! মুই কত কাল তোমার সোদে থাকিম? কত দিন মুই তোমারলাক উবিয়া নিয়া বেরাইম? চেংড়াটাক মোর এটে আনো।”

১৮ যীশু সেয়া অপদেবতাটাক ধমক দিলেক, আর চেংড়াটার ভিত্তিরা থাকি অপদেবতাটা বাইর হয়্যা গেইলেক, সেয়ায় সেয়ায় চেংড়াটা ভাল হয়্যা গেইলেক।

১৯ তার পাছত শিষ্যলা গোপনে যীশুরটে আসিয়া পুছিলেক, “হামরা কেনে অপদেবতাক খেদেবার পাইলুং না?”

২০-২১ যীশু উমারলাক কইলেক, “তোমারলার বিশ্বাস কম এই বাদে পান নাই। মুই তোমারলাক সচাং কবার ধরচুং যদি তোমারলার একটা ছোট সরিষা দানার নাকান বিশ্বাস থাকে আর তোমরা এই পাহাড়টাক কন, ‘এটে থাকি সারি যা’ তাইলে ওটে থাকি সারি যাবে। তোমারলারটে কোনটাও অসম্ভব হবার না হয়।”

২২ তার পাছত যীশু গালীল সাগরের পারত শিষ্যলার নগত একটে হয়্যা কইলেক, “বাছাই করা মানষিটাক শত্রুর হাতত ধরে

দেওয়া হবে।

২৩ মানষিলা উয়াক মারি ফ্যেলাবে আর তিন দিনের দিন উয়ায় মরণক জয় করি বত্তি উঠিবো।” ইয়াতে শিষ্যলো খুব দুঃখ পাইলেক।

২৪ তার পাছত যীশু আর উয়ার শিষ্যলো য্যেলা কফরনাহুম গেইলেক, সেলো মন্দিরের মাসুল আদায়কারীলা আসিয়া পিতরক কইলেক, “তোমার গুরু কি মন্দিরের মাসুল দেয় না?”

২৫ পিতর কইলেক, “হ্যে, দেয়।” ইয়ার পাছত পিতর ঘরত আসিয়া কিছু কবার আগতেই যীশু কইলেক, “শিমোন, তোর কি মনে হয়? এই দুনিয়ার রাজালা কারটে থাকি মাসুল আদায় করে? উমরা কি উমার নিজের ছাওয়া ছোটলার থাকি মাসুল আদায় করে, না বায়রার মানষিলারটে থাকি মাসুল আদায় করে?”

২৬ পিতর কইলেক, “উমরা অইন্য মানষিলারটে থাকি মাসুল আদায় করে।” সেলো যীশু কইলেক, “তাইলে নিজের ছাওয়া ছোটলা রেহাই পাইচে।

২৭ কিন্তু হামরা যাতে ঐ মাসুল আদায়কারিলার অপমানের বাধা হয় খাড়া না হই। এই বাদে তুই সাগরত যায়া বড়শি ফ্যেলাও, আর যে মাছটা পইলাতে উঠিবো উয়ার মুখ মেলাইলে একটা রুপার টাকা পাবু। ঐটা দিয়া তোর আর মোর মাসুল মিটি দেক।”

১৮ সেই সমায় শিষ্যলো যীশুর বগল আসিয়া কইলেক, “গুরু, স্বর্গের শাসন ব্যবস্থাত কায় বড়?”

২ সেলো যীশু একটা ছাওয়াক ডেকে আনিয়া উমার আগপাকে খাড়া করিয়া কইলেক,

৩ “মুই তোমারলাক সচাং করি কবার ধরচুং, যত দিন তোমরা মন বদলেয়া এই ছাওয়ার নাকান না হন, ততদিন তোমরা স্বর্গের শাসন ব্যবস্থাত সোন্দের পাবেন না।

৪ যে কাণ্ডো নিজের মন নত-নম্র করিয়া ছাওয়ার নাকান সাদাসিদা হয়, উয়ায় স্বর্গের শাসন ব্যবস্থাত সউগ চায়া বড়।

৫ আর যে কাণ্ডো মোর নামে এই ছাওয়াটাক গ্রহন করে, উয়ায় মোকে গ্রহন করে।”

৬ “এই ছাওয়ালা যে মোর উপরা বিশ্বাস করে, উমারলার সমন্ধে মনে করেন। কাণ্ডো যদি উমারলার একজনের বিশ্বাসের বাধা হয়। পাপের ঘাটাত নিয়া যায়, ঐ নাকানের মানষি বড় দন্ড পাইবে। ঐ দন্ডর তুলনায় উয়ার গালাত একটা বড় শিল বান্দিয়া সাগরের জলত ডুবি মরা খুব ভাল।

৭ অবশ্য দুনিয়াত লোভ-নালসা আসিতেই থাকিবে। কিন্তুক যার মইন্ধো দিয়া ঐ লোভ-নালসা আইসে, মুই উয়াকে ধিক্কার জানাং।

৮ “আর তোমারলার হাত বা ঠেং যদি তোমাক পাপের ঘাটাত নিয়া যায়, তাইলে ঐটাক কাটি ফেলান। কেনেনা দুই হাত-ঠেং

নিয়া চিরকাল নরকের অগুনত যাওয়ার চায়া, নেংড়া হয় অমৃত জীবন পাওয়া খুব ভাল।

৯ তোমার চোখু যদি তোমাক পাপের ঘাটাত নিয়া যায়, ঐ চোখুটা উকরিয়া ফেলে দেও। কেনেনা দুই চোখু নিয়া নরকত যাওয়ার চায়া, কানা হয় অমৃত জীবন পাওয়া খুব ভাল।”

১০ “দেখেন, তোমরা মোর এই নত-নম্র মানষিলার মইন্ধোত একজনকও তুচ্ছ মনে করেন না। কেনেনা মুই তোমাক কবার ধরচুং যে, স্বর্গত উমারলার দূতলা সউগ সমায় মোর স্বর্গের বাপের মুখের ভিতি চায়া আছে।

১১ “যেইলা হারেয়া গেইচে, সেইলা খুজির বাদে বাছাই করা মানষিটা আসচে।

১২ মনে কর, তোমারলার কাণোরো একশটা ভেড়া আছে, যদি ঐ ভেড়ার দলের মইন্ধো থাকি একটা হারেয়া যায়, তাইলে কি করিবেন? ঐ নিরানব্বইটা ভেড়া মাঠত থুইয়া হারে যাওয়া ভেড়াটাক চান্দেবার যাবেন কি না?

১৩ মুই তোমারলাক সচাং করি কবার ধরচুং, যেলা হারে যাওয়া ভেড়াটা খুজিয়া পাবেন, যেই নিরানব্বইটা ভেড়া ভুল ঘাটাত যায় নাই, ঐলার চায়া হারে যাওয়া ভেড়াটা চান্দে পায়া বেশী আনন্দ করিবেন।

১৪ একে নাকান করি, স্বর্গের ভগবানও চায় না, এই নত-নম্র মানষিলা এক জনও ধবংস হউক।”

১৫ “তোমার ভাই যদি তোমার বিরুদ্ধে দোষ করে, যেলা উয়ার বগলত কাণ্ডো থাকিবে না, সেলা যায়া উয়ার দোষ দেখে দেও। যদি উয়ায় তোর কতা শোনে, তাইলে তোর ভাইয়ক তুই ফিরি পালু।

১৬ কিন্তু যদি তোর কতা না শোনে, তাইলে দুই এক জনক সাথত নিয়া যাও, যাতে দুই তিন জন সাক্ষীর কতাত এইলা বিষয় সচাং কয়া প্রমাণ হয়।

১৭ উয়ায় যদি উমার কতা না শোনে তাইলে খ্রীষ্টিয় সমিতির মানষিলাক জানাও। আর উয়ায় যদি খ্রীষ্টিয় সমিতির কতা না শোনে, তাইলে তোরটে অবিশ্বাসী বা মাসুল আদায়কারীলার মত হউক।

১৮ “মুই তোমারলাক সচাং করি কবার ধরচুং, এই দুনিয়াত যা বান্দি থুবেন সেইলা স্বর্গতও বান্দি থোয়া হবে। আর দুনিয়াত যেইলা খোলাবেন সেইলা স্বর্গতও খোলা হবে।

১৯ “মুই তোমারলাক আরো কবার ধরচুং, এই দুনিয়াত দুই জন যদি একমত হয় কোন বিষয় নিয়া প্রার্থনা করেন, তাইলে হামার স্বর্গের বাপ উমারলার বাদে সেইলা পূরণ করিবে।

২০ কেনেনা যেটে দুই বা তিন জন মোর নামে একটে হয়, ওটেকোনা মুই উমার মইন্ধোত আছং।”

২১ সেলা পিতর যীশুরটে আসিয়া কইলেক, “গুরু, মোর ভাই মোর বিরুদ্ধে দোষ করিলে মুই কতবার ক্ষমা করিম? সাত বার

কি?”

২২ যীশু উয়াক কইলেক, “খালি সাত বার না হয়, কিন্তু সত্তরক সাত দিয়া গুন করিলে যত হয় ততবার।”

২৩ “স্বর্গের শাসন ব্যবস্থা এই নাকান করি তুলনা করা যায়, যেই নাকান এক জন রাজা উয়ার কর্মচারীলারটে হিসাব চাইলেক।

২৪ যেয়ো উয়ায় হিসাব নেওয়া শুরু করিলেক, সেয়ো এমন এক জন কর্মচারী আনা হইলেক, যায় রাজারটে দুই লাখ হাজার বছরের হাজিরার কোটি কোটি টাকা ধার নিচে।

২৫ কিন্তু উয়ার ধার শোধ করিবার ক্ষমতা আছিলেক না। রাজা সেয়ো হুকুম দিলেক, সেই মানষিক আর উয়ার বউ, বেটা-বেটিক আরো যা কিছু আছে সউগ বেচেয়া পাওনা আদায় করা হউক।

২৬ ইয়াতে কর্মচারীটা হাংকুড়া পাড়ি ঠেং ধরিয়া কইলেক, ‘রাজা মশায় দয়া করি আর কয়েকটা দিন ধৈর্য ধর, মুই তোমার সউগ পাওনা শোধ করি দিম।’

২৭ সেয়ো এই কতা শুনি রাজার মায়া হইলেক, আর সেই কর্মচারীটাক ছাড়ি দিয়া উয়ার দেনা মুকুব করি দিলেক।

২৮ “কিন্তু সেই কর্মচারীটা ছাড়া পায়া বাইর হয় গেলৈ এক সঙ্গীর দেখা পাইলেক। উয়ারটে একশ দিনের হাজিরার টাকা ধার আছিলেক। উয়ায় সঙ্গীটার গালা চিপিয়া ধরি কইলেক, ‘তুই যে টাকা দেনা করিচিস সেই টাকা শোধ করেক।’

২৯ “সঙ্গীটা সেলো ঠেংয়ত পড়িয়া কাউলিয়া কইলেক, ‘দয়া করি মোক আর কয়েকটা দিন সমায় দেও সউগ দেনা শোধ করি দিম।’

৩০ কিন্তু উয়ায় রাজি হইলেক না, আর দেনা শোধ না করা পর্যন্ত সঙ্গীটাক জেলখানাত আটকে থুইলেক।

৩১ “এই ঘটনা দেখিয়া উয়ার অইন্য কর্মচারীলা খুব দুঃখ পাইলেক। উমরা যায়া সউগ ঘটনালা রাজাটাক কইলেক।

৩২ সেলো রাজাটা কর্মচারীটাক ডেকেয়া কইলেক, ‘পাজি কোটেকার! তুই মোক কাউলা-কাউলি করিলু বুলিয়া মুই তোর সউগ দেনা মুকুব করিয়া দিলুং।

৩৩ মুই যে নাকান তোর প্রতি দয়া করিলুং সেই নাকান তোরও তোর সঙ্গীর প্রতি করা উচিত ছিল কি না?’

৩৪ সেলো রাজাটা রাগ হয়্যা উয়ার সউগ দেনা পরিশোধ না করা পর্যন্ত উয়াক শাস্তি দিবার বাদে জেলখানাত থুইলেক।

৩৫ “তোমরালা সগায় যদি তোমারলার ভাইলাক অন্তর দিয়া ক্ষমা না করেন, তাইলে মোর স্বর্গের বাপও তোমারলার প্রতি একে নাকান ব্যবহার করিবে।”

১৯ এইলা কতা কওয়া শেষ করি যীশু গালীল প্রদেশ ছাড়িয়া যর্দন নদীর অইন্য পারত যিহুদীয়া প্রদেশত গেইলেক।

২ মেলা মানষি উয়ার পাছে পাছে যাবার নাগিলেক, আর উয়ায় ওটেকোনা মানষিলার অসুখ ভাল করিলেক।

৩ সেলা কয়েক জন ফরীশী আসিয়া যীশুক ফান্দোত ফ্যেলের বাদে পুছিলেক, “মহাপুরুষ মোশির আইন-কানুন মতে, কোন কারনে বিয়ার মাইয়াক ছাড়ি দেওয়া কি উচিত?”

৪ যীশু কইলেক, “তোমরা কি শাস্ত্রত পড়েন নাই যে, সিঙ্গনকর্তা পইলাতে তোমারলাক বেটাছাওয়া-বেটিছাওয়া করি সিঙ্গন করিচে আর কইচে,

৫ এই বাদে মানষি বাপ-মাওক ছাড়িয়া মাইয়ার সোদে এক হবে, আর উমার দুই জনের এক দেহা হবে।

৬ এই বাদে উমরা দুই জন আলাদা না হয়, এক দেহা। ভগবান যাক মিলন করিচে, মানষি উমাক যুদা না করুক।”

৭ সেলা ফরীশীলা উয়াক কইলেক, “তাইলে মহাপুরুষ মোশি কেনে চিঠি নেখি মাইয়াক ছাড়ি দিবার আদেশ দিচে।”

৮ সেলা যীশু উমারলাক কইলেক, “তোমারলার মন করুর এই বাদে মোশি মাইয়াক ছাড়ি দিবার বিধান দিচে, কিন্তুক পইলাতে এই নাকান আছিলেক না।

৯ মুই তোমারলাক কবার ধরচুং যে, যদি কাণ্ডো ব্যভিচারের দোষ ছাড়া অইন্য কোন কারনে মাইয়াক ছাড়ি দিয়া অইন্যক বিয়াও করে, তাইলে উয়ায় ব্যভিচার করে।”



১০ সেলো উয়ার শিষ্যলো যীশুক কইলেক, “সোয়ামি আর মাইয়ার সমন্ধ যদি এই নাকানের হয়, তাইলে বিয়াও না করা ভাল।”

১১ যীশু কইলেক, “সগায় এই কতা মানি নিবার পায় না, খালি যাক এই ক্ষমতা দেওয়া হইচে উমরায় এইটা মানি নিবার পায়।

১২ কোন কোন মানষি মাওয়ের গর্ভ থাকি জন্মিয়া বিয়াও করির অক্ষম হয়। আর এমন কিছু মানষি আছে যাক মানষি বিয়াও করির অক্ষম বানাইচে। আরো এমন কিছু মানষি আছে যে, উমরা স্বর্গের শাসন ব্যবস্থার সেবা করির বাদে বিয়াও করে না। যায় এই শিক্ষা মানি নিবার পায়, উয়ায় মানি নেউক।”

১৩ ইয়ার পাছত মানষিলা ছোট ছোট ছাওয়ালাক যীশুর বগলত আনিলেক, যাতে উয়ায় ছাওয়ালার মাথাত হাত থুইয়া প্রার্থনা করে। কিন্তু শিষ্যলো মানষিলাক ধমকাইলেক।

১৪ যীশু সেলো শিষ্যলোক কইলেক, “ছাওয়ালাক মোরটে আসির দেও, উমারলাক মানা করেন না কেনেনা স্বর্গের শাসন ব্যবস্থা এই নাকান মানষির বাদে।”

১৫ তার পর যীশু সউগ ছাওয়ালার মাথাত হাত থুইয়া প্রার্থনা করিয়া ওটে থাকি চলি গেইলেক।

১৬ এক দিন একটা মানষি আসিয়া যীশুক কইলেক, “গুরু, অমৃত জীবন পাবার বাদে মোক কোন ভাল কাম করির নাগিবে?”

১৭ যীশু উয়াক কইলেক, “কোনটা ভাল এই কতা কেনে তুই মোক পুছির ধরচিস? ভাল খালি এক জনে আছে, উয়ায় ভগবান। তুই যদি অমৃত জীবন পাবার চাইস, তাইলে উয়ার সউগ আদেশ পালন কর।”

১৮ মানষিটা কইলেক, “কোন কোন আদেশ?” যীশু কইলেক, “খুন করিস না, ব্যভিচার করিস না, চুরি করিস না, আর মিছাং সাক্ষ্য দিস না,

১৯ তোর বাপ-মাওক সন্মান করেক, আর পাড়া-পড়শিক নিজের নাকান পিরিত করেক।”

২০ সেলো গাবুর চেংড়াটা কইলেক, “মুই তো এইলা সউগ পালন করি আসির ধরচুং, মোক আর কি করির নাগিবে?”

২১ যীশু উয়াক কইলেক, “যদি তুই নিখুঁত খাটি হবার চাইস, তাইলে তোর সম্পত্তি বেচেয়া গরীবলাক দান করি দেক। তাতে তুই স্বর্গত ধন পাবু। আর মোর পাছে পাছে আইসেক।”

২২ এই কতা শুনিয়া গাবুর চেংড়াটা মুখ কালা করি চলি গেইলেক, কেনেনা উয়ার মেলা ধন-সম্পত্তি আছিলেক।

২৩ যীশু সেলো উয়ার শিষ্যলাক কইলেক, “মুই তোমারলাক সচাং করি কবার ধরচুং, এক জন ধনী মানষির পক্ষে স্বর্গের শাসন ব্যবস্থাত সোন্দা খুব কঠিন।

২৪ মুই তোমারলাক আরো কবার ধরচুং একটা উটের সুইয়ের ফোড়ং দিয়া সোন্দা খুব সহজ কিন্তুক এক জন ধনী মানষির

ভগবানের শাসন ব্যবস্থাত সোন্দা খুব কঠিন।”

২৫ এই কতা শুনিয়া শিষ্যলো অচানক হয় কইলেক, “তাইলে পাপ থাকি কায় অমৃত জীবন পাবার পায়।”

২৬ যীশু শিষ্যলোর ভিত্তি দেখিয়া কইলেক, “যেইটা মানষিরটে অসাইধ্য, কিন্তুক ভগবানের সউগলায় করির সাইধ্য আছে।”

২৭ পিতর সেলো কইলেক, “হামরা সউগ কিছু ছাড়ি দিয়া তোমার পাছ ধরচি, তাইলে হামরা কি পামু?”

২৮ যীশু উমারলাক কইলেক, “মুই তোমারলাক সচাং করি কবার ধরচুং, তোমরা যায় যায় মোর পাছ ধরিচেন, যেলো এই দুনিয়ার সউগ কিছু নয়া হবে, বাছাই করা মানষিটা জাকজমকের সাথত সিংহাসনত বসিবে, সেলো তোমরাও বারোটা সিংহাসনত বসিবেন। আর ইজ্রায়েলের বারোটা গোষ্ঠির বিচার করিবেন।”

২৯ যীশু উয়ার শিষ্যলোক কইলেক, “মুই তোমারলাক সচাং করি কবার ধরচুং, যে কাণ্ডো মোক মানি নিয়া বাড়ি-ঘর, নিজের মাও-বাপ, ভাই-বইনি, ছাওয়া-ছোট, জাগাজমি, ছাড়ি দেয় উয়ায় একশগুন বেশী পাবে, আর অমৃত জীবন পাইবে।

৩০ কিন্তু যায় যায় এলা উচা পদত আছে, পরে উমরা নিচা পদ পাবে, আর যায় নিচা পদত আছে উমরা উচা পদ পাবে।”

২০ আরেকটা গল্প কইলেক, “স্বর্গের শাসন ব্যবস্থা হইলেক এক জন জমিদারের নাকান। এই জমিদার এক দিন খুব ভোর বেলা

আবাদ বাড়িত কাম করেবার বাদে কামলা খুজির গেইলেক।

২ উয়ায় কামলালাক এক দিনের হাজিরার টাকা দিবে বুলিয়া ঠিক করিয়া আংগুর বাড়িত উমারলাক পেঠেয়া দিলেক।

৩ পেয়ায় নয়টার সমায় উয়ায় বাড়ির বায়রাত গেইলেক আর বাজারত যায়া দেখিলেক কয়েক জন মানষি কাম না করিয়া খাড়া হয় আছে।

৪ উয়ায় উমারলাক কইলেক, ‘তোমরাও মোর আংগুর বাড়িত কাম করির যাও, মুই তোমারলাক তোমার পাওনা হাজিরা দিম।’

৫ সেয়া উমরাও আংগুর বাড়িত কাম করির গেইলেক। এই জমিদারটা পেয়ায় বারোট্টা আর তিনটার সমায় বাড়ির বাইরা যায়া ঐ একে নাকান করি কামলালাক কামত পেঠাইলেক।

৬ “পেয়ায় পাঁচটার সমায় উয়ায় আরো বাইরা যায়া দেখিলেক, আরো অইন্য কয়জন মানষি খাড়া হয় আছে। উয়ায় উমারলাক কইলেক, ‘ক্যেনে তোমরা সারা দিন কোন কাম না করিয়া খাড়া হয় আছেন?’

৭ “উমরা উয়াক কইলেক, ‘কাণ্ডো হামাক কামত নাগায় নাই।’ “উয়ায় ওই মানষিলাক কইলেক, ‘তোমরাও যায়া মোর আংগুর বাড়িত কাম করো।’

৮ “দিনের শেষত ক্ষেতের মালিক উয়ার কর্মচারীক ডেকেয়া কইলেক, ‘কামলালাক ডেকেয়া উমারলাক সগাকে উমার হাজিরা মিটি দেও। কিন্তুক যে কামলা পাঁচটার সমায় কামত

ধরচে উয়ার হাজিরা পইলাতে মিটি দেও, আর যে কামলা দিনের শুরুতে কামত ধরচে উয়ার হাজিরা শেষত মিটি দেও।’

৯ “বিকাল পাঁচটার সময় যেই কামলালা কামত ধরচে, উমরলা সগায় এক দিনের হাজিরার টাকা নিয়া গেইলেক।

১০ পইলাতে যাক যাক কামত নাগা হইচে, উমরা বেশী পাবে বুলিয়া আশা করচে। কিন্তুক উমরলাও সগায় এক দিনের হাজিরার টাকা পাইলেক।

১১ এই বাদে উমরা মালিকের বিরুদ্ধে গোসা হয় কবার নাগিলেক,

১২ ‘হামরা সারা দিন রৌদত ছোবা যায়া কাম করচি। কিন্তু যাক যাক শেষত কামত নাগা হইচে, উমরা মাত্র এক ঘণ্টা কাম করিচে, আর উমরলাক তোমরা হামার সমান হাজিরা দিলেন।’

১৩ “সেয়লা মালিকটা উমরলার মইন্ধে এক জনক কইলেক, ‘সখা, মুই তোমার উপরাত কোন অন্যায় করং নাই। তুই কি এক দিনের হাজিরার টাকায় কাম করির রাজি হইস নাই?

১৪ তোমার পাওনা নিয়া চলি যাও। তোমাক যেমন দিচুং, পাছত যায় আসচে উয়াকও একে নাকান দিবার মোর ইচ্ছা।

১৫ যেইলা মোর নিজের, সেইলা মোর খুশি মতন ব্যবহার করিবার অধিকার কি নাই? নাকি মুই দয়ালু বুলিয়া তোমার চোখু টাটের ধরচে?’”

১৬ গল্পের শেষত যীশু কইলেক, “একে নাকান করি যায় যায় শেষত আছে উমরালা পইলাত হবে, আর যায় যায় পইলাত উমরালা শেষত পড়িবে।”

১৭ ইয়ার পাছত যীশু বারো জন শিষ্যক নিয়া যিরুশালেমত যাত্রা করিলেক। ঘাটাত উয়ায় এক নিরিবিলি জাগাত উমারলাক ডেকেয়া কইলেক,

১৮ “দেখ, হামরালা এলা যিরুশালেম যাবার ধরচি। ওটেকোনা বাছাই করা মানষিটাক প্রধান বামন আর পন্ডিতলার হাতত ধরে দেওয়া হবে, উমরালা উয়ার বিচার করিয়া মরণ দন্ডের রায় দিবে।

১৯ উয়াক তামশা করির বাদে চাবুক মারির আর ক্রুশত দিবার বাদে অইন্য জাতির মানষিলার হাতত তুলি দিবে। তার পাছত তিন দিনের দিন উয়ায় মরণক জয় করি বত্তি উঠিবে।”

২০ পাছত সিবদিয়ের দুই বেটাক সাথত নিয়া উমারলার মাও যীশুরটে আসিলেক। আর উমারলার মাও হাংকুড়া পাড়ি ভক্তি দিয়া কইলেক, “মোর বাদে কিছু কর।”

২১ যীশু কইলেক, “তুই কি চাইস?” উয়ায় কইলেক, “তোমরা মোক কতা দেও যাতে তোমার শাসন ব্যবস্থাত মোর এই দুই বেটা এক জন তোমার ডান পাকে আর এক জন বাও পাকে বসির জাগা পায়।”

২২ যীশু ইয়ার উত্তরে কইলেক, “তোমরা কি চাবার নাগচেন, সেইটা জানেন না। মুই দুঃখ-কষ্টের নোটাত খাবার যাবার ধরচুং ঐটাতে কি তোমরা খাবার পাবেন?” উমরা কইলেক, “হে, হামরা পামো।”

২৩ সেলো যীশু উমারলাক কইলেক, “সচাংয়ে তোমরা খাবার পাবেন কিন্তুক ডাইন পাকে আর বাঁও পাকে বসির দিবার অধিকার মোর নাই। মোর স্বর্গের বাপ, যার যার বাদে সেই জাগা ঠিক করি থুইচে উমরায় পাবে।”

২৪ এই কতা শুনিয়া বাকি দশ জন শিষ্য দুই ভাইয়ের উপরাত রাগ হয় গেলেক।

২৫ যীশু সেলো উমারলাক নিজের বগলত ডেকেয়া কইলেক, “তোমরা জানেন যে, জগতের অইন্য জাতির মানষিলা যায় যায় দেওয়ানী হয় শাসন করে, উমরালা ক্ষমতা দিয়া মানষিক ডাবে থুইয়া অইত্যাচার করে।

২৬ কিন্তুক তোমারলার মাঝত এই নাকান হওয়া ঠিক না হয়। তোমারলার মাঝত যায় বড় হবার চায়, উয়াক সেবাকারী হবার নাগিবে।

২৭ যায় আগত থাকির চায় উয়াক সগারে চাকর হবার নাগিবে।

২৮ মনত থোন, মুই যে বাছাই করা মানষিটা, সেবা পাবার বাদে আইসোং নাই, মুই সেবা করির বাদে আসচুং। আর অইন্য

পরানের বদলে নিজের পরান দিয়া মেয়ো মানষির মুক্তির দাম চুকাইম।”

২৯ যীশু আর উয়ার শিষ্যলো ঘিরীহো গঞ্জ ছাড়ি যাবার সমায় মেয়ো মানষি পাছে পাছে যাবার ধরচে।

৩০ ঐ ঘাটার বগলত দুই জন কানা মানষি বসিয়া আছিলেক। যীশু ঐ ঘাটা দিয়া যাবার ধরচে শুনিয়া উমরা চিকরিয়া কবার নাগিলেক, “ও বাহে দায়ূদের বংশধর যীশু, হামাক দয়া কর।”

৩১ উমরা যাতে চুপ করি রয় এই বাদে মানষিলা ধমক দিলেক। কিন্তু উমরা আরো জোরে চিকরিয়া কইলেক, “হে প্রভু, দায়ূদের বংশধর হামাক দয়া করেক।”

৩২ সেয়ো যীশু থামিলেক আর উমারলাক ডেকেয়া কইলেক, “তোমরা কি চান? মুই তোমার বাদে কি করিম?”

৩৩ উমরা যীশুক কইলেক, “গুরু, হামরা যেনে দেখির পাই।”

৩৪ যীশুর সেয়ো উমার প্রতি মায়া হইলেক। উয়ায় উমার চোখু নারিলেক, আর সেলায় সেলায় উমরা দেখির পাইলেক আর উয়ার পাছে পাছে যাবার নাগিলেক।

২১ যীশু আর উয়ার শিষ্যলো ঘিরুশালেমের বগলা বগলি জলপই পাহাড়ের বগলত বৈৎফগী গেরামত আসিয়া পৌছিলেক। সেয়ো দুই জন শিষ্যক এই কয়া পেঠাইলেক,



২ “তোমরা বগলের ঐ গেরামটাত যাও। ঐটে যাইতে কালে দেখির পাবেন যে, একটা গাধা বান্দা আছে, আর উয়ার একটা বাচ্চাও উয়ার সোদে আছে। ওই দুইটাক হোসকেয়া মোরটে নিয়া আইসো।

৩ কাণ্ডেয় যদি তোমারলাক কোনো কিছু পুছে, সেলো কন, ‘প্রভু চাইচে, পাছত উয়ায় দুইটাকে ফিরিয়া দিবে।’”

৪ এই নাকান হইলেক যাতে, ভগবানের ভাববাদীর মইন্ধো দিয়া যে কতালা কওয়া হইচে, সেইলা পুরণ হয়,

৫ তোমরা সিয়োন কইন্যাক কন, দেখ, তোর রাজা তোরটে আসির ধরচে। উয়ায় নম্র, উয়ায় একটা গাধার বাচ্চার পিটিত চড়িয়া আসির ধরচে।

৬ যীশু শিষ্যলোক যেই নাকান করি কইচে উয়ার শিষ্যলা যায়া ঐ নাকানে করিলেক।

৭ গাধা আর গাধার বাচ্চাটাক আনিয়া উমরা ঐটার পিটির উপরাত উমারলার নিজের দেহার গিলাপ পাড়িয়া দিলেক, তার পাছত যীশু বসিলেক।

৮ মেয়লা মানষি সন্মান জানের বাদে উমার দেহার গিলাপ ঘাটাত পাতিয়া দিলেক। আর অইন্য মানষিলাও গছের ডাল কাটিয়া ঘাটাত বিছিয়া দিলেক।

৯ যায় যায় যীশুর আগে পাছে যাবার ধরচে, উমরালা চিকরিয়া কবার নাগিলেক, “দায়ূদের বংশের জয় হউক! ধন্য! ভগবানের

নামে যায় আসির ধরচে, উয়ায় ধন্য! স্বর্গের মহান ভগবানের জয় হউক।”

১০ যেহেতু যীশু যিরুশালেম সোন্দাইলেক, সেহেতু গোটায় গঞ্জটাত হুলস্থূল পড়ি গেইলেক। সগায় পুছির নাগিলেক, “ইনায় কায়?”

১১ মানষিলা কবার নাগিলেক, “উয়ায় হইলেক, গালীল প্রদেশের নাসারত গেরামের ভগবানের ভাববাদী যীশু।”

১২ ইয়ার পাছত যীশু দশংগতি মন্দিরত সোন্দেয়া ওটেকোনা যায় যায় কেনা বেচা করির ধরছিলেক, উমারলাক সগাকে খেদেয়া দিলেক। যায় যায় টাকা বদলি করির বাদে টেবিল সাজেয়া বসিয়া আছিলেক, আর যায় যায় কইতোর বেচেবার আইসচে, উমারলার টেবিল আর বসিবার জাগা উল্টিয়া ফেলেয়া দিলেক।

১৩ যীশু উমারলাক কইলেক, “শাস্ত্রত নেখা আছে, ‘মোর ঘর হবে প্রার্থনার ঘর।’ কিন্তুক তোমরা এইটাক বানাইচেন ‘চোর ডাকুর আড্ডাখানা।’”

১৪ ইয়ার পাছত মেহেলা কানা আর নেংড়া মানষি মন্দিরের ওটেকোনা আসিলেক আর যীশু উমাক ভাল করিলেক।

১৫ প্রধান বামনলা আর পন্ডিত মানষিলা যীশুক মেহেলা অচানক কাম করির দেখিলেক। আর দেখিলেক যে দশংগতি মন্দিরত চেংড়া চেংড়িলা চিকিরিয়া কবার নাগচে, “দায়ুদের বংশধর

যীশুর জয় জয়কার হউক।” এইলা দেখিয়া শুনিয়া উমরানা গোসা হয়। যীশুক কইলেক, “উমরানা কি কবার ধরচে,

১৬ তুই কি শুনির পাবার ধরচিস?” যীশু কইলেক, “হ্যে, পাবার ধরচুং, শাস্ত্রত তোমরা কি কোনো দিন পড়েন নাই? ওটেকেনা নেখা আছে, চ্যেংড়া চ্যেংড়িলাক আর দুধ খাওয়া ছাওয়া-ছোটলাক গুণকিত্তন করির শিখাইচিস।”

১৭ ইয়ার পাছত যীশু উমারলাক ছাড়িয়া গঞ্জের বায়রাত বৈথনিয়া গেরামত চলি গেইলেক। আর ওটেকোনায় রাতি কাটাইলেক।

১৮ পরের দিন সাকালে যীশু যেলা যিরুশালেম ফিরি আসিলেক সেলা যীশুক ভোগ নাগিলেক।

১৯ উয়ায় ঘাটার বগলত একটা ডুমুর গছ দেখির পায়া গছটার ওটেকোনা গেইলেক, কিন্তুক গছটাত পাত ছাড়া কোন কিছুই দেখির পাইলেক না। সেলা উয়ায় গছটাক কইলেক, “আর কোনো দিনও তোর ফল না ধরুক।” আর সেলায় ডুমুর গছটা শুকি গেইলেক।

২০ এই ঘটনাটা দেখিয়া শিষ্যলা অচানক হয়। কইলেক, “কেমন করি এত তাড়াতাড়ি ডুমুর গছটা শুকি গেইলেক?”

২১ ইয়ার উত্তরে যীশু কইলেক, “মুই তোমারলাক সচাং করি কবার ধরচুং, তোমরা সন্দেহ না করিয়া যদি বিশ্বাস করেন তাইলে মুই ডুমুর গছটাক যেই নাকান করচুং তোমরাও তা করির পাবেন।

খালি এই নাকানে না হয়, তোমরা যদি ঐ পাহাড়টাক কন উঠি যায় সাগরত পড়েক, আর তাইলে এই নাকানে হবে।

২২ তোমরা যদি বিশ্বাস করিয়া প্রার্থনা করেন তাইলে যা চাবেন তাই পাবেন।”

২৩ যীশু যেয়ো মন্দিরত যায়া মানষিলাক শিক্ষা দিবার ধরছিলেক, সেই সমায় প্রধান বামনলা আর যিহুদী নেতালা আসিয়া কইলেক, “তোমরা এইলা কোন অধিকারে করির ধরচেন? এইলা অধিকার তোমাক কায় দিচে?”

২৪ যীশু উমারলাক কইলেক, “মুইও তোমারলাক একটা কতা পুছিম। তোমরা যদি তার উত্তর দেন তাইলে মুইও তোমারলাক কইম যে, কোন অধিকারে মুই এইলা করির ধরচুং।

২৫ কন দেখি, দীক্ষা দিবার অধিকার যোহন কোটে থাকি পাইচে? ভগবানেরটে থাকি না মানষিরটে থাকি?” সেয়ো উমরা একে অইন্যের নগত কওয়াকুয়ি করির নাগিলেক, “হামরা যদি কই ভগবানেরটে থাকি, তাইলে উয়ায় হামারলাক কবে, তাইলে কেনে তোমরা যোহনক বিশ্বাস করেন নাই?

২৬ কিন্তু হামরা যদি কই, মানষিরটে থাকি, তাইলেও মানষিলারটে হামার ভয় আছে। কেনেনা মানষিলা যোহনক ভগবানের ভাববাদী বুলিয়া মানো।”

২৭ এই বাদে উমরা কইলেক, “হামরা জানিনা।” সেয়ো যীশু উমারলাক কইলেক, “তাইলে মুইও তোমারলাক কইম না, এইলা

কোন অধিকারে করির ধরচুং।”

২৮ তার পাছত যীশু কইলেক, “আচ্ছা, এই বিষয়ে তোমরালা কি মনে করেন? ধরি নেও, এক জন মানষির দুইটা বেটা আছিলেক। উয়ায় উয়ার বড় বেটারটে যায়া কইলেক, ‘বাউ, আজি তুই আংগুর বাড়িত যায়া কাম করেক।’

২৯ বেটাটা কইলেক, ‘মুই যাইম না।’ কিন্তু পাছত উয়ায় মন বদলেয়া কামত গেইলেক।

৩০ ইয়ার পাছত মানষিটা উয়ার অইন্য বেটাটারটে যায়া একে কতা কইলেক। এই বেটাটা কইলেক, ‘ঠিক আছে বাবা, মুই অল্প পাছত যাবার ধরচুং,’ কিন্তুক গেইলেক না।

৩১ উমার দুই জনের মইদ্বোত কায় বাপের ইচ্ছা পালন করিলেক?” সেয়া ধর্মীয় নেতালা কইলেক, “পইলা জন।” যীশু উমারলাক কইলেক, “মুই তোমারলাক সচাং করি কবার ধরচুং, মাসুল আদায়কারীলা আর বেশ্যালা তোমারলার আগতে ভগবানের শাসন ব্যবস্থাত সোন্দাবে।

৩২ কেনেনা যোহন জীবনের সঠিক ঘাটা দেখেবার বাদে তোমালারটে আসছিলেক। আর তোমরালা উয়াক বিশ্বাস করেন নাই। কিন্তু মাসুল আদায়কারী আর বেশ্যালা উয়াক বিশ্বাস করিচে। এইলা দেখিয়াও তোমরালা মন ফিরান নাই আর উয়াক বিশ্বাসও করেন নাই।”

৩৩ “আর একটা গল্প কং, শোন। এক জন জোতদার আংগুর খেত নাগেয়া উয়ার চাইরো পাকে বেড়া দিলেক। পাছত ঐ খেতত আংগুর রস করিবার বাদে একটা খাল খুড়িলেক। আর পাহারা দিবার বাদে একটা উচা টং বানাইলেক। ইয়ার পাছত জোতদারটা কয়জন চাষারটে ঐ খেতখান আধি দিয়া বিদেশ চলি গেইলেক।

৩৪ যেলা আংগুর পাকির সমায় হইলেক, সেলা উয়ায় সেই ফলনার ভাগ নিবার বাদে উয়ার চাকরলাক ঐ আধিয়ারলারটে পেঠাইলেক।

৩৫ আধিয়ারলা উয়ার চাকরলার এক জনক ধরি ডাঙাইলেক, এক জনক খুন করিলেক, অইন্য আর এক জনক শিল দিয়া ঢেলেয়া মারি ফেলাইলেক।

৩৬ ইয়ার পাছত উয়ায় পইলা বারের চায়া আরো মেলা চাকরক দিয়া পেঠাইলেক। কিন্তুক ঐ আধিয়ারলা চাকরলার নগত একে নাকান ব্যবহার করিলেক।

৩৭ আংগুর খেতের মালিক শেষত নিজের বেটাক পেঠাইলেক। উয়ায় চিন্তা করিলেক, উমরা অন্ততঃ উয়ার বেটাক সন্মান দিবে।

৩৮ কিন্তুক আধিয়ারলা যেলা মালিকের বেটাক আইসা দেখিল, সেলা উমরা নিজের মইন্ধোত কওয়াকুয়ি করির নাগিলেক,

‘আরেঃ ইয়ায় হবে আইন মতন সম্পত্তির মালিক। চল হামরা উয়াক মারি ফ্যেলাই। ইয়াতে হামরায় সম্পত্তির মালিক হমু।’

৩৯ এই কয়া উমরা বেটাটাক ধরিয়া আংগুর খ্যেতের বায়রাত নিয়া যায় মারি ফ্যেলাইলেক।

৪০ তাইলে কন দেখি, আংগুর খ্যেতের মালিক য্যেলা ফিরি আসিবে, স্যেলা ঐ আধিয়ারলাক নিয়া কি করিবে?”

৪১ ঐ যিহুদী ধর্মীয় নেতালা যীশুক কইলেক, “উয়ায় ঐ পাজি মানষিলাক একে বারে নাশ করিবে। আর যেই চাষালা উয়াক সমায় মত ফলের ভাগ দিবে উমারলাকে ঐ আংগুর খ্যেতখান আধি দিবে।”

৪২ যীশু স্যেলা উমারলাক কইলেক, “তোমরালা কি শাস্ত্রের এই অংশটা পড়েন নাই? রাজ মিস্ত্রিলা যেই খুটিটা বাতিল করি দিচে, ঐটায় হইলেক ঘরের মূল খুটি। এই কামটা প্রভুই করিলেক। এই বাদে এইটা হামার চোখুত অচানক নাগে।

৪৩ “এই বাদে ভগবানের শাসন ব্যবস্থা তোমারলারটে থাকি নিয়া নেওয়া হবে। আর এই নাকান মানষিলাক দেওয়া হবে, যার জীবনত সেই শাসনের উপযুক্ত ফল দেখা যাবে।

৪৪ “কাণ্ডো যদি এই খুটির উপরাত পড়ে তাইলে উয়ায় টুকরা টুকরা হয় যাবে, আর যার উপরাত ঐ খুটি পড়িবে উয়ায় গুড়া হয় যাবে।”

৪৫ প্রধান বামনলা আর ফরীশীলা যীশুর দেওয়া এই গল্পলা শুনিয়া বুঝির পাইলেক যে, যীশু উমারে বিষয়ে কতালা কইচে।

৪৬ এই বাদে উমরা যীশুক ধরির চাইলেক, কিন্তুক ভিড়ের মানষিলার ভয়ে ধরিলেক না। কেনেনা মানষিলা উয়াক ভাববাদী বুলি মনে করির ধরছিলেক।

২২ যীশু শিক্ষা দিবার বাদে ধর্ম গুরুলাক আর একটা গল্প কইলেক,

২ “স্বর্গের শাসন ব্যবস্থা এক জন রাজার নাকান, উয়ায় উয়ার বেটার বিয়াও বাড়ির খাবার জোগার করিয়া থুইলেক।

৩ ঐ ব্যাপারের বাড়িত নিমন্তন পাওয়া মানষিলাক ডেকেবার চাকরলাক পেঠাইলেক, কিন্তু উমরা আসির চাইলেক না।

৪ সেয়া রাজা আরো দোসরা চাকরলাক পেঠেয়া কইলেক, নিমন্তন পাওয়া মানষিলাকটে যায়া উমারলাক কন যে, হামার খাবার জোগার আছে, খাবারের বাদে ভাল ভাল পশুলা মারা হইচে, আর সউগলায় জোগার আছে। তোমরালা খাবার আইসো।

৫ “কিন্তু নিমন্তন পাওয়া মানষিলা চাকরলার কতা না শুনিয়া কাণ্ডো নিজের ক্ষেতত আর কাণ্ডো নিজের কামত চলি গেইলেক।

৬ আর দোসরা মানষিলা রাজার চাকরলাক ধরিয়া অপমান করিয়া ডাঙেয়া মারি ফেলাইলেক।



৭ স্যেলা এই কতা শুনিয়া রাজা খুব রাগ হয়। গেইলেক, উয়ায় সৈন্য-সামন্ত পেঠে দিয়া খুনীলাক মারি ফেলাইলেক, আর সৈন্যলা উমার গঞ্জটাও ছোবা দিলেক।

৮ পাছত রাজা চাকরলাক কইলেক, ‘বিয়াও বাড়ির খাবার রান্দা হইচে কিন্তু যে সাগাই-সোদরলাক নিমন্তন করা হইচে, উমরা ইয়ার যোগ্য না হয়।

৯ এই বাদে তোমরালা ঘাটার মোড়ে মোড়ে যাও, আর যত মানষির দেখা পাবেন সগাকে বিয়াও বাড়িত খাবার বাদে আন্দার করি ডাকে আনো।’

১০ স্যেলা চাকরলা ঘাটার মোড়ে মোড়ে ভাল-বেয়া যাক যাক পাইলেক, উমারলাক সগাকে ডাকে আনিলেক। আর এই বাদে বিয়াও বাড়ির খাবার ঘর নিমন্তনিয়া দিয়া ভরি গেইলেক।

১১ “আর রাজা সাগাই-সোদরলাক দেখির বাদে ভিতিরা গেইলেক, কিন্তু ভিতিরা যায়া দেখির পাইলেক যে, এক জন মানষি বিয়াও বাড়ির পোশাক না পিন্দিয়া খাবার আইসচে।

১২ স্যেলা রাজা উয়াক পুছিলেক, ‘তুই ক্যেমন করি বিয়াও বাড়ির পোশাক না পিন্দিয়া এটেকোনা সোন্দালু?’ কিন্তু উয়ায় উত্তর না দিয়া ঝিত করি রইলেক।

১৩ স্যেলা রাজা চাকরলাক কইলেক, ‘ইয়াক হাত ঠেং বান্দিয়া বাইরা আন্ধারত ফ্যেলেয়া দেও, আর ঐটে মানষি কান্দিবে আর যন্তনাত দাঁতে দাঁত কিড়মিড়াবে।’”

১৪ গল্পের শেষত যীশু কইলেক, “ম্যেলা মানষিক ড্যেকা হইচে, কিন্তু অল্প মানষিক বাছাই করা হইচে।”

১৫ স্যেলা ঐটে থাকি ফরীশীলা চলি গেইলেক, যীশুর কতা দিয়া উয়াক কেংকরি ফ্যেসাদত ফ্যেলা যায়, ফন্দি করির নাগিলেক।

১৬ আর ফরীশীলা নিজের দলের কয়জন মানষির নগত হেরোদের দলের কয়জন মানষিক নিয়া যীশুর ঐটে প্যেঠাইলেক। “গুরু, হামরা জানি তোমরা এক জন সৎ মানষি, ভগবানের ঘাটা সমন্ধে ভাল শিক্ষা দেন। মানষি কায় কি কবে সেটার ধার ধারেন না আর মানষি কি ভাবিবে সেইটাও কিছুই মনে করেন না।

১৭ এই বাদে তোমরায় কন, মোশির আইন-কানুন মতে রোমের মহারাজাক কি মাসুল দেওয়া ঠিক? তোমরা কি মনে করেন?”

১৮ যীশু উমার বেয়া চিন্তা-ভাবনা বুঝির পায়া কইলেক, “ভন্ডের দল! কেনে মোক ফ্যেসাদত ফ্যেলের ফন্দি করির ধরচেন?

১৯ যে টাকা মাসুল দিবার বাদে ব্যবহার করা হয়, সেটা মোক দেখান।” উমরলা একটা টাকা যীশুক দেখাইলেক।

২০ স্যেলা যীশু উমারলাক কইলেক, “এই টাকার উপরা ফটক আর নামটা কার?”

২১ উমরা কইলেক, “রোমের মহারাজার।” স্যেলা যীশু উমারলাক কইলেক, “যেটা রোমের মহারাজার সেইটা মহারাজাক দেও। আর যেটা ভগবানের সেটা ভগবানক দেও।”

২২ উমরা এই কতা শুনিয়া অচানক হইলেক। সেলো উয়াক থুইয়া ওটে থাকি চলি গেইলেক।

২৩ যায় যায় কয় মরা মানষি ফির বত্তি ওঠে না, সেই সদ্দুকী দলের কিছু মানষি ঐ দিন যীশুর বগলত আসিয়া উয়াক একটা কতা পুছিলেক।

২৪ আর উমরা কইলেক, “গুরু, মহাপুরুষ মোশি কইচে যদি কোনো মানষি আটকুড়া হয় মরি যায়, তাইলে উয়ার ভাই ঐ বিধুয়াক বিয়াও করিবে আর উয়ার ভাইয়ের বংশ বাড়াবে।

২৫ একটা পরিবারের সাত ভাই আছিলেক। পইলা জন বিয়াও করিলেক, পাছত উয়ায় মরি গেইলেক। আর উয়ায় আটকুড়া হওয়াতে, উয়ার ভাই ঐ বিধুয়াক বিয়াও করিলেক।

২৬ এই নাকান করি পইলা থাকি সাত জন পর্যন্ত ঐ মাইয়াক বিয়াও করিলেক আর সগায় মরি গেইলেক।

২৭ শেষত ঐ মাইয়াটাও মরি গেইলেক।

২৮ এলা হামারলার প্রশ্ন হইলেক, ফির সেই সাত ভাই বত্তি ওঠার পাছত ঐ মাইয়া কার হবে, কেনেনা সগায় উয়াক বিয়াও করিচিলেক?”

২৯ সেলো যীশু উমারলাক উত্তর দিয়া কইলেক, “তোমরালা ভুল করির ধরচেন, কেনেনা তোমরালা শাস্ত্র জানেন না, জানেন না ভগবানের আত্মিক শক্তির কতা।

৩০ ফম থোন, মরা মানষি ফির বত্তি ওঠার পাছত বিয়াও করে না আর উমাক বিয়াও দেওয়া হবে না। এই বাদে উমরা স্বর্গদূতের নাকান হবে।

৩১ মরা মানষির বত্তি ওঠার সমন্ধে ভগবান তোমারলাক যে কতা কইচে, সেই কতা তোমরা কি পবিত্র শাস্ত্রত পড়েন নাই?

৩২ শাস্ত্রত নেখা আছে, ‘মুই মহাপুরুষ অব্রাহামের ভগবান, ইসহাকের ভগবান, আর যাকবের ভগবান।’ ভগবান মরা মানষির ভগবান না হয়, ভগবান হইলেক বত্তা মানষির ভগবান।”

৩৩ সেলো জোটো হওয়া মানষিলা এই শিক্ষা শুনিয়া অচানক হইলেক।

৩৪ যেলো ফরীশীলা শুনির পাইলেক যে, যীশু সদূকীলার মুখ বন্ধ করি দিচে, সেলো উমরা দল বান্দিয়া যীশুর বগল আসিলেক।

৩৫ উমার মইন্ধো থাকি এক জন শাস্ত্র জানা পন্ডিত যীশুক ফান্দোত ফ্যেলের বাদে পুছিলেক,

৩৬ “গুরু, মোশির আইন-কানুনের মইন্ধে সউগ থাকি বড় আদেশ কোনটা?”

৩৭ সেলো যীশু উয়াক কইলেক, “ ‘তোর সউগ অন্তর, সউগ মন, সউগ পরান দিয়া তোর দয়াল ভগবানক পিরিত করেক।’

৩৮ এইটায় হইলেক পইলা সউগ চায়া মহান আদেশ।

৩৯ আর দ্বিতীয় আদেশটা পইলা আদেশের নাকান, ‘তোর নিজের দেহার নাকান করি তোর পাড়া-পড়শীকও পিরিত করেক।’

৪০ মোশির সউগ আইন-কানুন আর ভগবানের ভাববাদীলা সউগ শিক্ষা এই দুইটা আদেশের উপরত নির্ভর করে।”

৪১ সেলোও ফরীশীলা ঐটে হাজির ছিলেক, এমন সমায় যীশু উমারলাক পুছিলেক,

৪২ “বাছাই করা রাজার সমন্ধে তোমরা কি মনে করেন? উয়ায় কার বংশের?” উমরা কইলেক, “উয়ায় দায়ূদের বেটা।”

৪৩ সেলো যীশু কইলেক, “তায় দায়ূদ কেংকরি পবিত্র আত্মার চালনায় বাছাই করা রাজাক ‘মালিক’ বুলিয়া ডেকাইচে? দায়ূদ কইচিলেক,

৪৪ ‘পরম প্রভু মোর মালিকোক কইলেক, যতক্ষণ মুই তোর শত্রুলাক তোর ঠ্যংএর তলাত না থোং, অতক্ষণ মোর ডাইন পাকে বইসেক।’

৪৫ দায়ূদ যদি বাছাই করা রাজাক ‘মালিক’ বুলি ডেকাইচে, তাইলে কেংকরি উয়ায় দায়ূদের ছাওয়া হবার পায়?”

৪৬ কিন্তু কাণ্ডেয় কোনো উত্তর দিবার পাইলেক না, আর সেই দিন থাকি উয়াক কাণ্ডেয় কোনো কিছু পুছিবার সাহস পাইলেক না।

২৩ ইয়ার পাছত যীশু মানষিলাক আর উয়ার শিষ্যলোক কইলেক,

২ “মহাপুরুষ মোশির বিধানত শিক্ষা দেওয়ার ব্যাপারে পন্ডিতলাক আর ফরীশীলাক অধিকার দেওয়া হইচে।

৩ তারে বাদে উমরাদা যেইলা আদেশ দেয়, তোমরাও সেইলা মানি চল। কিন্তু উমরাদা যেইলা করে, তোমরা সেইলা না করেন। মুই এই কতা কবার ধরচুং, কেনেনা উমরাদা খালি মুখ দিয়া কয়, কিন্তুক সেইলা করে না।

৪ উমরাদা বড় বড় বোঝা বান্দিয়া মানষির ঘাড়ত চাপে দেয়, কিন্তু উমরাদা উবি নিয়া যাওয়ার বাদে হাত না নাগায়।

৫ উমরাদা যেইলায় করে সউগলায় মানষিক দেখেবার বাদে, পবিত্র শাস্ত্রের নেখা পদলাক বড় করিয়া কবজ বানায় আর গিলাপত লম্বা লম্বা বুল নাগেয়া পিন্দে।

৬ উমরাদা খাবারের সমায় ভাল জাগাত আর উপাসনা ঘরত মানিগুনী মানষিলাক বাদে যে আসন থাকে, ঐ আসনত বসির ভাল পায়।

৭ উমরাদা হাট-বাজারত মানষিলাক সন্মান খুজি বেড়ায় আর চায় মানষিলা যাতে উমাক গুরু কয়া ডেকায়।

৮ “কাণ্ডো তোমারলাক গুরু কয়া ডেকাউক এইটা তোমরা না চান, কেনেনা তোমারলার গুরু এক জনেই আছে, আর

তোমরালা সগায় হইলেন ভাই বইনি।

৯ এই দুনিয়াত কাণ্ডোকে বাপ কয়া না ডেকান কেনেনা তোমারলার বাপ এক জনেই আছে, উয়ায় স্বর্গত আছে।

১০ কাণ্ডো তোমারলাক গুরু কয়া ডেকাউক এইটা তোমরা না চান, কেনেনা তোমারলার এক জনেই গুরু আছে। উয়ায় ‘বাছাই করা রাজা।’

১১ তোমারলার মইন্ধোত সগার থাকি বড় যায়, তায় তোমারলার চাকর হউক।

১২ যে কাণ্ডো নিজক বড় মনে করে, উয়াক ছোট করা হবে। যায় নিজক ছোট মনে করে উয়াক বড় করা হবে।

১৩ “ছিঃ! পন্ডিত আর ফরীশীর দল তোমরালা ভন্ড, তোমরালা মানষিলার বাদে স্বর্গের শাসন ব্যবস্থার দুয়োর বন্ধ করি থুইচেন। তোমরা নিজেও সোন্দাবেন না আর যায় যায় সোন্দের চেষ্টা করির ধরচে উমাকও সোন্দের দিবার ধরচেন না।”

১৪ “ছিঃ! পন্ডিত আর ফরীশীর দল তোমরালা ভন্ড, তোমরালা মানষিক দেখের বাদে লম্বা লম্বা প্রার্থনা করেন। অইন্য পাকে বিধুয়ার সম্পত্তি দখল করেন। এই বাদে তোমারলার শাস্তি আরো বেশী হবে।

১৫ “ছিঃ পন্ডিত আর ফরীশীর দল তোমরালা ভন্ড, তোমরা এক জন মানষিক নিজের ধর্মত আনির বাদে তোমরা দুনিয়ার নানান জাগাত ঘুরি বেড়ান। আর যেয়ো কাণ্ডোয় তোমার ধর্মত আইসে

সেইলা তোমরা নিজেরলার চায়া উয়াক বেশী নরকের উপযুক্ত করেন।

১৬ “ছিঃ তোমারলাক! তোমরালা ঘাটা দেখাইয়ালা কানা। তোমরালা কয়া থাকেন মন্দিরের নামে কিরা কাটিলে উয়াতে কোন কিছু না হয়, কিন্তু কাণ্ডো যদি দশংগতি মন্দির ঘরের সোনার নামে কিরা কাটে তাইলে ঐটা পূরণ করির নাগিবে।

১৭ কানা মূখের দল, কোনটা বড়? সোনা, না সেই দশংগতি মন্দির, যেই সোনাক ভগবানের বাদে আলদা করি থোয়া হয়।

১৮ তোমরা আরো এই কতাও কন, যজ্ঞ বেদীর নামে কিরা কাটিলে কোন কিছুই হয় না। কিন্তু কাণ্ডো যদি বেদীর উপরাত যে দান আছে তার নামে কিরা কাটে সেইটা পূরণ করির নাগিবে।

১৯ কানার দল কোনটা বড়? দান, না বেদী যেইলা ভগবানের বাদে আলদা করি থোয়া হয়।

২০ কাণ্ডো যদি যজ্ঞ বেদীর নামে শপথ করে আর তাইলে এই যজ্ঞ বেদীর উপরাত যেইলা আছে সউগ কিছুর নামে কিরা কাটে।

২১ কাণ্ডো যদি যিহুদীলার দশংগতি মন্দিরের নামে কিরা কাটে তাইলে সেই মন্দিরের ভিতরাত যায় থাকে তারও নামে কিরা কাটে।

২২ কাণ্ডো যদি স্বর্গের নামে কিরা কাটে যেইটা ভগবানের সিংহাসন তাইলে যায় এই সিংহাসনত বসিয়া আছে তারও নামে কিরা কাটে।



২৩ “ছিঃ! ভন্ড পন্ডিত আর ফরীশীলাক! তোমরালা পুদিনা, মৌরি আর জিরার দশ ভাগের এক ভাগ দেন। কিন্তু ন্যায় দয়া আরো বিশ্বস্ততা যেইলা মোশির বিধানের দরকারি বিষয়লা সেইলা বাদ দিচেন। আগেরলা পালন করির সাথে সাথে পরেরলাও পালন করা উচিত।

২৪ তোমরা ঘাটা দেখাইয়ালা কানা। তোমরালা একটা ছোট পোকা ছাকনি করেন কিন্তু উট গিলি খান।

২৫ “ভন্ড পন্ডিতলা আর ফরীশীলা, ছিঃ ধিক্কার দেং তোমারলাক! তোমরালা থালি খুরির বায়রাখান মাঞ্জি থোন, তোমারলার অন্তর জোর জুলুম আর লোভের ফল দিয়া ভরতি।

২৬ ফরীশীলা তোমরালা আগত থালি খুরির ভিতরখান মাঞ্জো, তাইলে বায়রাখান আপনে মাঞ্জা হবে।

২৭ “ছিঃ পন্ডিত আর ফরীশীর দল তোমরালা ভন্ড! তোমরালা চুন দিয়া রং করা সমাধির নাকান, যার বায়রাখান সুন্দর কিন্তু ভিতরটা মরা মানষির হাড়ি আর পচা জিনিসে ভরা আছে।

২৮ ঠিক একে নাকান তোমরালা মানষির চোখুত ধার্মিক কিন্তুক ভিতরখান ভন্ডামি আর পাপে ভরতি।

২৯ “ছিঃ পন্ডিত আর ফরীশীর দল তোমরালা ভন্ড! এক পাকে তোমরালা ভগবানের ভাববাদীলার সমাধি বানান আরো ভগবান ভক্ত মানষিলার সমাধি সাজান।

৩০ তোমরা ক'য়া থাকেন যদি হামরা পূর্বপুরুষের সমায় বত্তি  
রইলং হয়, তাইলে আগের কালের ভাববাদীলাক খুন করির দিলং  
না হয়।

৩১ এই ভাববাদীলাক খুন করিয়া তোমরালা তোমরা নিজের  
বিরুদ্ধে এইটা প্রমাণ করির ধরচেন যে, তোমরালা উমার  
বংশধর।

৩২ তোমরালা এলায় যাও! তোমার পূর্বপুরুষলা যেইলা বেয়া  
কাম শুরু করি গেইচে বাকি কামলা তোমরালা শেষ কর।

৩৩ “কি রে সাপের দল, কাল সাপের গুষ্টি! তোমরা কেংকরি  
নরকের শাস্তি থাকি রেহাই পাবেন?

৩৪ এই বাদে মুই তোমারলারটে ভাববাদী, পন্ডিত মানষি আর  
ধর্মগুরুলাক পেয়েবার ধরচুং। তোমরা উমারলার মইদ্বো থাকি  
কয়জনক খুন করিবেন, আর কয়জানক ক্রুশত খুটাত টাঙেয়া  
মারিবেন, কয়জনক উপাসনা ঘরত নিয়া যায়া চাবুক দিয়া  
ডাঙাবেন। তোমরালা উমারলাক এক গেরাম থাকি আরেক  
গেরাম পিড়িয়া নিয়া বেরাবেন।

৩৫ ইয়ার ফল হইলেক, এই দুনিয়াত যতলা ধার্মিক মানষির খুন  
করা হইচে, উমার খুনের বাদে দোষী তোমরালা। হে মুই তোমাক  
কবার ধরচুং, হেবেলের খুন থাকি আরম্ভ করিয়া বরখিয়ার বেটা  
ভাববাদী সখরিয়ক খুন করা পর্যন্ত (উয়াক ভগবানের বেদী আর

মন্দিরের পবিত্র জাগার মইন্ধোত মারি ফ্যেলাইচেন), এইলা তামান ধার্মিক মানষিলার অন্তের দায়ী তোমরালা।

৩৬ মুই তোমারলাক সচাং করি কবার ধরচুং এই কালের মানষিলা এই তামান অন্তের দায়ী হবে।”

৩৭ “ঐ যিরুশালেম! যিরুশালেম! তোমরা ভগবানের আগের কালের ভাববাদীলাক খুন করেন, তোমারটে যাক পেঠা হয়, উমারলাক শিল দিয়া ঢেলান। আর মুরগী যেই নাকান করি উয়ার বাচ্চাক পাখার তলত একটে করি থোয় ঐ নাকান করি মুইও তোমারলাক কতবার একটে করির চেষ্টা করিচুং, কিন্তুক তোমরালা রাজি নাই হন।

৩৮ হ্যে যিরুশালেমত থাকা মানষিলা, তোমারলার বাড়ি খালি পড়ি রবে।

৩৯ মুই তোমারলাক কবার ধরচুং, যত দিন পর্যন্ত তোমরা না কন, ধন্য যায় ভগবানের নামে আসির ধরচে, ততদিন তোমরা আর মোক দেখির পাবেন না।”

২৪ যীশু য়েলা দশংগতি মন্দির থাকি বাইরা যাবার ধরছিলেক, সেই সমায় শিষ্যলা আসিয়া মন্দির ঘরের দালান ঘরলা দেখেবার বাদে উয়ারটে আসিলেক।

২ স্যেলা যীশু উমারলাক কইলেক, “তোমরা এইলা দেখির ধরচেন, কিন্তু মুই তোমারলাক সচাং করি কবার ধরচুং, এইটে

একটা শিল আরেকটা শিলের উপরাত থাকিবে না, এইলা সউগ ভাঙি ফেলো হবে।”

৩ যেয়ো যীশু জলপই পাহাড়ের উপরাত বসিয়া ছিলেক, সেই সময় শিষ্যলা গোপনে আসিয়া কইলেক, “হামারলাক কন, কোন সময় এইলা ঘটবে, আর কি নাকানের চিন দেখিয়া জানির পামো তোমার আসির সময় আর যুগের শেষকাল হইচে।”

৪ যীশু উমারলাক কইলেক, “সাবধান থাকেন! তোমারলাক যাতে কাণ্ডো না ঠকায়।

৫ মুই তোমারলাক কবার ধরচুং মেয়ো মানষি ভন্ডামির বেশ ধরিয়া মোর নাম নিয়া কবে ‘মুইয়ে বাছাই করা রাজা।’ উমরালা মেয়ো মানষিক ঠকাবে।

৬ তোমারলার কানত যুদ্ধের আওয়াজ আসিবে, আর যুদ্ধের খবরা-খবর শুনির পাবেন। কিন্তু এইলা শুনিয়া ভয় না খান। কেনেনা ঐলা ঘটনা ঘটবে, কিন্তু বিনাশের সময় নাই হয়।

৭ এক জাতি অইন্য জাতির বিরুদ্ধে, এক রাজ্য অইন্য রাজ্যের বিরুদ্ধে নড়াই করিবে। মেয়ো জাগাত মংগা আর ভৈচাল দেখা দিবে।

৮ এইলা দেখিয়া তোমরা জানির পাবেন যে, যন্তনা শুরু হইচে।

৯ “সেই সময় মানষিলা তোমাক কষ্ট দিবার বাদে ধরিয়া দিবে আর খুন করিবে। মোর শিষ্য হইচেন এই বাদে সউগ মানষিলা তোমারলাক ঘিন খাবে।

১০ সেই সমায় মেয়ো মানষি বিশ্বাস থাকি সারি যাবে। উমরা এক জন আরেক জনক ঘিন খায়া শাসনকর্তার হাতত ধরে দিবে।

১১ মেয়ো ভন্ড ভাববাদী আসিয়া মানষিলাক ঠকাবে।

১২ অধর্ম বাড়িয়া যাবার বাদে মানষিলাক মইদ্বো থাকি প্রেম পিরিতি কমি যাবে।

১৩ কিন্তু শেষ পর্যন্ত যায় বিশ্বাসে থির থাকিবে, উয়ায় রক্ষা পাবে।

১৪ দুনিয়ার সউগ জাতিরটে সাক্ষী হিসাবে সউগ জাগাতে শাসন ব্যবস্থার ভাল খবর প্রচার করা হবে। তার পাছত শেষকাল আসিবে।”

১৫ “তোমরা দেখেন যে, ভগবানের ভাববাদী দানিয়েলের মইদ্বো দিয়া মন্দিরের পবিত্র জাগাত একটা সর্বনাশা ছুয়া জিনিস দেখিবেন। (যে কাণ্ডো এই কতাটা পড়ে উয়ায় ভাল করি বুঝুক।)

১৬ সেই সমায় যায় যায় যিহুদীয়া প্রদেশত আছে, উমরা পাহাড়ের এলাকাত পালে যাউক।

১৭ যায় ঘরের ছাদের উপরাত আছে, উয়ায় উয়ার জিনিস নিবার বাদে নিচা না নামুক,

১৮ আর যায় আবাদ বাড়িত কাম করির ধরচে, উয়ায় উয়ার গিলাপ নিবার বাদে ফিরি না আসুক।

১৯ হয় ঐ দিনলাত যায় যায় গাওভারী বেটিছাওয়া আছে, আর যেই যেই বেটিছাওয়া ছাওয়াক দুধ খোয়া পোয়াতি, উমারলার অবস্থা খুবে বেয়া হবে।

২০ এই বাদে প্রার্থনা কর, জারের দিন বা জিরানের দিনত যাতে তোমারলাক পালেবার না নাগে।

২১ ঐ দিনলাত দারুন কষ্ট হবে, দুনিয়া সিদ্ধনের সমায় থাকি এলা পর্যন্ত এই নাকান কষ্ট হয় নাই আর হবারো না হয়।

২২ ভগবান যদি এই কষ্টের দিনলা কমে না দিলেক হয়, তাইলে কাণ্ডো বত্তিলেক না হয়। কিন্তু উয়ার বাছাই করা মানষিলার বাদে ঐ দিনলা কমে দিচে।

২৩ “সেই সমায় কাণ্ডোয় যদি তোমারলাক কয়, ‘দেখ বাছাই করা রাজাটা এটেকোনা!’ বা ‘ওটেকোনা’ তাইলেও তোমরা বিশ্বাস না করেন।

২৪ সেই সমায় মেলা ভন্ড বাছাই করা রাজা আর ভন্ড ভাববাদীলা মেলা অচানক অচানক কামের চিন দেখাবে। পাইলে ভগবানের বাছাই করা মানষিলাক ভুল ঘাটাত নিয়া যাবে।

২৫ মুই আগত থাকি তোমারলাক কয়া খুলুং।

২৬ এই বাদে তোমারলাক যদি কয়, ‘দেখ বাছাই করা রাজাটা নিধুয়া পাথারত আছে!’ তোমরা না যান। যদি কয় ‘ঘরের ভিতরাত আছে,’ তোমরা বিশ্বাস না করেন।

২৭ দ্যাওয়ার ঝিলিক যেই নাকান পূব পাক থাকি দেখা দিয়া পশ্চিম পাক পর্যন্ত ঢিলকি ওটে, এই নাকান করি বাছাই করা মানষিটাক আসির দেখিবেন।

২৮ যেটে কোনা মরা পরি রয়, ওটে শকুন আসিয়া জোটো হবে।”

২৯ “সেই সময় কষ্টের ঠিক পাছত ‘বেলা আন্ধার হয় যাবে, চান আলো দিবে না। তারানা দ্যাওয়া হাতে খসি খসি পরিবে। চান-বেলা, তারা আর থির থাকিবে না।’

৩০ সেই সময় দ্যাওয়াত বাছাই করা মানষিটার চিন দেখা যাবে। সেলো দুনিয়ার সউগ মানষি দুঃখে কপাল চাপড়াবে। সেই সময় মেঘের উপরাত মহাশক্তি নিয়া জাকজমকের সাথত বাছাই করা মানষিটাক আসির দেখিবেন।

৩১ খুব জোরে জোরে শিংগা বাজিবে সেলোয় সেলোয় বাছাই করা মানষিটা উয়ার স্বর্গদূতলাক পেঠেয়া দিবে। এই দূতলা দুনিয়ার এক সীমনা থাকি আরেক সীমনা পর্যন্ত বাছাই করা মানষিলাক জোটো করিবে।

৩২ “ডুমুর গছ দেখিয়া শিক্ষা নেও, যেলা গছটার ঠাইল দিয়া কুশি বিরায়, সেলো বুঝা যায় গরম কাল আসিচে।

৩৩ একে নাকান করি এইলা ঘটনা দেখিলে বুঝির পাবেন, বাছাই করা মানষিটা বগলত আসিচে, এমন কি, দুয়ারত আসিচে।

৩৪ মুই তোমারলাক সচাং করি কবার ধরচুং, যেয়ো এই ঘটনালা ঘটিবে, সেয়োও এই কালের কিছু মানষি বত্তি রবে।

৩৫ দ্যাওয়া দুনিয়া শেষ হবে, কিন্তু মোর কতা চিরদিন রবে।”

৩৬ “সেই দিন আর সেই সমায়ের কতা কাণ্ডো না জানে, স্বর্গের দূতলাও না জানে, ভগবানের বেটাও না জানে খালি স্বর্গের বাপেই জানে।

৩৭ নোহের সমায় যেই নাকান অবস্থা হইচে, বাছাই করা মানষিটা আসিবার সমায় ঠিক একে নাকান অবস্থা হবে।

৩৮ বানা আইসার আগত নোহ জাহাজত না সোন্দা পর্যন্ত মানষিলা খাওয়া-দাওয়া করিচে। বেটা বেটিক বিয়াও দিচে, বিয়াও করিচে।

৩৯ যতক্ষণ না বানা আসিয়া উমারলাক ভাসেয়া নিয়া যায়, ততক্ষণ পর্যন্ত উমরা কি ঘটিবার ধরচে, কিছুই জানির পাইলেক না। বাছাই করা মানষিটার আইসার সমায় একে নাকান হবে।

৪০ সেই সমায় দুই জন মানষি ভুই বাড়িত কাম করিবে, এক জনক নিয়া যাওয়া হবে, আরেক জন ওটে রবে।

৪১ দুই জন বেটিছাওয়া একখান জাতা ঘুরাবে, এক জনক নিয়া যাওয়া হবে, আরেক জন ওটে রবে।

৪২ “এই বাদে তোমরা সজাগ থাকেন, কেনেনা প্রভু কোন দিন আসিবে, তোমরা জানেন না।



৪৩ তাণ্ডো এই কতা ফম থোন যে, ঘরের মালিক যদি জানির পাইলেক হয়, চোর কোন সমায় আসিবে, তাইলে জাগনা থাকিয়া চোরক সোন্দের দিলেক না হয়।

৪৪ এই বাদে তোমরা তৈরি থাকো, কেনেনা যেই সমায়ের কতা ভাবিবেন না, সেই সমায়ে বাছাই করা মানষিটা আসিবে।”

৪৫ “বিশ্বস্ত আর বুদ্ধিমান চাকর কায়, যার উপর মালিক বাড়ির অইন্য অইন্য চাকরলার ঠিক সমায় খাবার দিবার ভাড়া দিচে?

৪৬ সেই চাকর ভাগ্যবান, যার মালিক ফিরি আসিয়া বিশ্বস্ত মত চাকরক কাম করির দেখিবে।

৪৭ মুই তোমারলাক সচাং করি কবার ধরচুং, উয়ায় সেই চাকরক উয়ার সউগ সম্পত্তির দেখাশুনার ভার দিবে।

৪৮ কিন্তু ধরি নেও, কোন চাকর যদি পাজি হয় আর মনে মনে ভাবিলেক, ‘মোর মালিক আসির দেড়ি আছে।’

৪৯ এই সুযোগে অইন্য সঙ্গী চাকরলাক ডাঙামারি করিয়া মাতাললার নগত খাওয়া-দাওয়া করিয়া মদ খাবার নাগিলেক।

৫০ কিন্তু যেদিন আর যে সমায়ের কতা চাকর চিন্তা করে না, জানেও না, সেই দিন আর সেই সমায় উয়ার মালিক আসিয়া হাজির হবে।

৫১ সেলো উয়ার মালিক কঠুর শাস্তি দিবে, সেই ভন্ডলার মইন্ধোত উয়ার জাগা হবে। যেটে মানষিলা দাঁতে দাঁত

কিড়মিড়িয়া কান্দে।”

২৫ “স্বর্গের শাসন ব্যবস্থা কেমন হবে, দশ জন কইন্যার সোদে তুলনা করা যায়। উমরা সখীর বরক বরণ করি আনির বাদে বাতি নিয়া গেইলেক।

২ উমার মইন্ধে পাঁচজন বুদ্ধিমতী, পাঁচজন বুদ্ধিহীন।

৩ বুদ্ধিহীন কইন্যালা বাতি নিলেক, কিন্তু নগত তেল নিলেক না।

৪ বুদ্ধিমতী কইন্যালা বাতির নগত তেলও নিলেক।

৫ বর আসির দেরি হওয়াতে সগায় নিন্দোতে টুপির নাগিলেক।

৬ “পরে মইন্ধো রাতিত সোরগোল শোনা গেইলেক। ‘ঐ দেখ বর আসির ধরচে, বরণ করির বাদে আগেয়া যাও।’

৭ সেয়া কইন্যালা উঠিয়া বাতি নাগাইলেক।

৮ বুদ্ধিহীন কইন্যালা কইলেক, ‘তোমারলার থাকি হামারলাক তেল দেও, কেনেনা হামার বাতি নিভি যাবার নাগচে।’

৯ “বুদ্ধিমতী কইন্যালা কইলেক, ‘না! হামার যে তেল আছে, তোমারলাক দিলে কুলাবে না। তোমরালা বরং দোকান যায়া তেল কিনি আনো।’

১০ যেয়া বুদ্ধিহীন কইন্যালা তেল কিনির গেইলেক, সেয়ায় সেয়ায় বর আসি গেইলেক। সেয়া যেই কইন্যালা সাজিয়া

আছিলেক, উমরা বরের সোদে বিয়াও বাড়িত সোন্দাইলেক। আর  
দুয়ার বন্ধ করা হইলেক।

১১ “তার পাছত বুদ্ধিহীন কইন্যালা আসিয়া কইলেক, ‘মালিক,  
ও মালিক! হামার বাদে দুয়ার খুলি দেও।’

১২ বর কইলেক, ‘সচাং কবার ধরচুং, মুই তোমারলাক চেনং  
না।’”

১৩ গল্পের পাছত যীশু কইলেক, “এই বাদে তোমরা সজাগ  
থাকেন, কেনেনা সেই দিন সেই সমায়ের কতা তোমরা জানেন  
না, কোন দিন বাছাই করা মানষিটা ফিরি আসিবে।”

১৪ “স্বর্গের শাসন ব্যবস্থা এমন এক জন মানষির নাকান, যায়  
ভিন দেশ যাবার আগত উয়ার চাকরলাক ডেকেয়া সউগ সয়-  
সম্পত্তির ভার দিয়া গেইলেক।

১৫ এই চাকরলার ক্ষমতা অনুসারে এক জনক পাঁচ ঝোলা টাকা  
এক জনক দুই ঝোলা আরো এক জনক এক ঝোলা টাকা দিয়া  
বিদেশ চলি গেইলেক।

১৬ যায় পাঁচ ঝোলা টাকা পাইলেক, উয়ায় ঐ টাকা দিয়া ব্যবসা  
করিয়া আরো পাঁচ ঝোলা টাকা লাভ করিলেক।

১৭ যায় দুই ঝোলা টাকা পাইলেক, উয়ায় একে নাকান ব্যবসা  
করিয়া আরো দুই ঝোলা টাকা লাভ করিলেক।

১৮ কিন্তু যায় এক ঝোলা টাকা পাইলেক, উয়ায় যায়া মাটিত  
খাল খুড়িয়া উয়ার মালিকের টাকা ঐ খালত পোতেয়া থুইলেক।”

১৯ “মেয়ো দিন পাছত মালিক আসিয়া ঐ চাকরলারটে হিসাব চাইলেক।

২০ যায় পাঁচ ঝোলা টাকা পাইচে, উয়ায় আরো পাঁচ ঝোলা টাকা নিয়া আসিয়া কইলেক, ‘তোমরা মোক বিশ্বাস করিয়া পাঁচ ঝোলা টাকা দিচেন। দেখ, মুই আরো পাঁচ ঝোলা টাকা লাভ করিচুং।’

২১ “সেয়ো মালিক উয়াক কইলেক, ‘বাঃ বেশ ভাল করিচিস, তুই ভাল বিশ্বস্ত চাকর। তুই অল্প বিষয়ে বিশ্বস্ত বুলিয়া মুই তোক মেয়ো বিষয়ের ভার দিম। আইসেক মোর নগত আনন্দ করেক।’

২২ “ইয়ার পাছত যায় দুই ঝোলা টাকা পাইচে উয়ায় আসিয়া কইলেক, ‘তোমরা মোক দুই ঝোলা টাকা দিচেন, দেখ মুই আরো দুই ঝোলা টাকা লাভ করিচুং।’

২৩ সেয়ো মালিক কইলেক, ‘বাঃ বেশ ভাল করিচিস। তুই ভাল বিশ্বস্ত চাকর। তুই অল্প বিষয় বিশ্বস্ত বুলিয়া মুই তোক অনেক বিষয়ের ভার দিম। আইসেক মোর নগত আনন্দ করেক।’

২৪ “কিন্তু এক ঝোলা টাকা যায় পাইচে উয়ায় আসিয়া মালিকেরটে কইলেক, ‘মালিক মুই জানং তোমরা কঠুর মানষি। যেইলা খোন নাই ঐলা ফিরিয়া চান, যেইলা আবাদ নাই করেন ঐলা আবাদ কাটেন।

২৫ এই বাদে মুই ভয়ে তোমার টাকা মাটিত খাল খুড়িয়া নুকিয়া খুইচোং। এই দেখ, তোমার টাকা তোমারে আছে।’

২৬ “মালিক কইলেক, ‘পাজি আলসিয়া কোটেকার! তুই তো জানিস মুই যেইলা নাই থোং সেইলা ফিরিয়া চাং যেইলা আবাদ নাই করং ঐলা চাং।

২৭ তাইলে মোর টাকা তুই মহাজনেরটে জমা থুইস নাই কেনে? থুইলে সেই টাকা মুই কড়ায় গন্ডায় সুদে আসলে বুঝিয়া পালুং হয়।’

২৮ তার পাছত উয়ায় অইন্য মানষিলাক কইলেক, ‘উয়ারটে হাতে টাকালো নিয়া যার দশ ঝোলা টাকা আছে তাক দেও।

২৯ যার আছে উয়াক আরো দেওয়া হবে, তাতে উয়ার মেয়ো হবে। কিন্তু যার নাই উয়ার যেকিনা আছে ওকিনাও নিয়া নেওয়া হবে।

৩০ তোমরালো ঐ অকর্মণ্য চাকরক বায়রাত আন্ধারত ফ্যেলে দেও, ওটেকোনা মানষি দাঁতে দাঁত কিড়মিড়াবে আর যন্তনাতে কান্দিতে থাকিবে।”

৩১ “বাছাই করা মানষিটা তামান স্বর্গদূতলাক নিয়া নিজের জাকজমকে আসিবে। সেয়ো উয়ায় রাজা হিসাবে উয়ার সিংহাসনত মহিমার সাথত বসিবে।

৩২ তামান জাতির মানষিলা উয়ার আগত জড়ো হবে। রাখোয়াল যেই নাকান করি ভেড়া ছাগল যুদা করে ঐ নাকান করি উয়ায় মানষিলাক দুই ভাগে যুদা করিবে।

৩৩ উয়ায় নিজের ডাইন পাকে ভেড়া আর বাওপাকে ছাগললাক থুবে।

৩৪ “ইয়ার পাছত রাজা ডাইন পাকের মানষিলাক কবে, ‘তোমরা যায় যায় মোর স্বর্গের বাপের আশুর্বাদ পাইচেন, আইসো! দুনিয়া সিজ্জনের শুরুতে যে রাজ্য শাসন ব্যবস্থা তোমারলার বাদে গড়ে থোয়া হইচে উয়ার অধিকারী হও।

৩৫ যেলা মোক ভোগ নাগিচে সেলা তোমরা মোক খাবার দিচেন, যেলা টিস্সা নাগিচে সেলা জল দিচেন, যেলা মুই বিদেশী হয় তোমারটে গেইচোং সেলা মোক জাগা দিচেন।

৩৬ যেলা মোর পিন্দিবার কাপড় আছিলেক না, সেলা তোমরা মোক কাপড় পেন্দাইচেন। মুই অসুখত আছিঁনু তোমরা মোর দেখাশুনা করিচেন। আর মুই যেলা জেলখানাত আছিঁনু সেলা তোমরা মোক দেখির গেইচেন।’

৩৭ “আর যায় যায় ধার্মিক উমরা কবে, ‘প্রভু হামরা কোন সমায় তোমাক ভোগ নাগচে দেখিয়া খাবার দিচি। তোমার টিস্সা দেখিয়া জল দিচি?

৩৮ কোন দিনেই বা তোমাক বিদেশী হিসাবে জাগা দিচি। আর উদাং দেহা দেখিয়া কাপড় পেন্দাইচি?

৩৯ কোন দিনেই বা তোমার অসুখ আর জেলখানাত আছেন জানির পায়া হামরা তোমাক দেখির গেইচি?’

৪০ “ইয়ার উত্তরত রাজাটা কবে, ‘মুই তোমারলাক সচাং কবার ধরচুং, মোর সউগ চায়া ছোট ভাইলার মইন্ধোত কাঙোরো বাদে তোমরা যেয়ো এই নাকান করিচেন, সেয়ো মোর বাদে তোমরা করিচেন।’

৪১ “তার পাছত রাজা বাঁও পাকের মানষিলাক কবে, ‘কিরে অভিশাপ পাওয়া মানষিলা মোর এটে থাকি দূর হও। শয়তান আর উয়ার দূতলার বাদে যে চিরকালের নরকের অগুন জ্বলা হইচে উয়ার মইন্ধোত যাও।

৪২ যেয়ো মোক ভোগ নাগিচে সেয়ো তোমরা মোক খাবার দেন নাই, যেয়ো মোক টিস্সা নাগিচে তোমরা জল দেন নাই।

৪৩ বিদেশী হয় গেইচোং মোক জাগা দেন নাই। যেয়ো খালি দেহায় আছিনু মোক কাপড় দেন নাই। যেয়ো অসুখে আর জেলখানাত আছিনু মোক দেখির যান নাই।’

৪৪ “উমরা কবে, ‘প্রভু কোন দিন তোমাক ভুখা আর টিস্সা আরো বিদেশী হয় আইসা দেখিয়া যতন নাই করি? যেয়ো অসুখে আরো জেলখানাত বন্দী আছিলেন জানির পায়া সাহায্য নাই করি?’

৪৫ “ইয়ার উত্তরে রাজা কবে, ‘মুই তোমারলাক সচাং কবার ধরচুং, তোমরা যেয়ো এই সামান্য মানষিলাক এক জনারও এইলা করেন নাই সেয়ো মোর বাদে করেন নাই।’”

৪৬ তার পাছত যীশু কইলেক, “এই মানষিলা চিরদিনের শাস্তি পাবার বাদে যাবে। কিন্তু ধার্মিক মানষিলা অমৃত জীবন ভোগ করির যাবে।”

২৬ এইলা কতা শেষে করিয়া যীশু উয়ার শিষ্যলোক কইলেক,

২ “তোমরা জানেন, আর দুই দিন পাছত মুক্তি ভোজ পার্বন, আর সেলো বাছাই করা মানষিটাক ক্রুশ খুটাত টাঙের বাদে শত্রুলার হাতত ধরে দেওয়া হবে।”

৩ সেই সমায় মহাবামন কাইফার বাড়িত প্রধান বামনলা আর যিহুদী নেতালা একটে হইলেক,

৪ উমরা গোপনে যীশুক ধরি আনিয়া মারি ফ্যেলেবার চক্রান্ত করিলেক।

৫ উমরা কইলেক, “মুক্তি ভোজ পার্বনের সমায় এই কাম করা যাবে না, করলে তো মানষিলা মইন্ধোত গন্ডগোল হবার পারে।”

৬-৭ যীশু য়েলা বৈথনিয়ার কুষ্ঠ অসুকিয়া শিমোনের বাড়িত ছিলেক। সেই সমায় এক জন বেটিছাওয়া যীশুরটে আসিলেক। ঐ বেটিছাওয়াটা একটা সাদা শিলের বোতলত করি খুব দামী আতর আনিচে। আর যীশু য়েলা খাবার বসিচে সেই সমায় উয়ায় ঐ আতর যীশুর মাখাত ঢালি দিলেক।



৮ এই দেখিয়া শিষ্যলা গোসা হয় কইলেক, “এই দামী জিনিসটা নষ্ট করা হইলেক কেনে?

৯ এইটা বেচাইলে তো মেয়ো টাকা হইলেক হয়। আর এই টাকা গরীব মানষিলাক দান করা গেইলেক হয়।”

১০ যীশু এই কতা বুঝির পায়া শিষ্যলাক কইলেক, “তোমরা এই বেটিছাওয়াটাক দুঃখ দিবার নাগচেন কেনে? উয়ায় তো মোর বাদে ভাল কাম করিচে।

১১ কেনেনা গরীব মানষিলা সউগ সমায় তোমার নগত থাকিবে কিন্তুক মুই তো তোমার নগত সউগ সমায় থাকিম না।

১২ মরি যাওয়ার পাছত মোর দেহা সমাধিত থোয়া হবে এই বাদে উয়ায় মোক আতর ঢালি দিয়া আগতে সাজাইচে।

১৩ মুই তোমারলাক সচাং করি কবার ধরচুং, দুনিয়ার যেটেকোনায় ভগবানের দেওয়া ভাল খবর প্রচার করা হবে ওটেকোনায় এই বেটিছাওয়াটার কতা মনে করি দিবার বাদে উয়ার এই কামের কতাও কওয়া হবে।”

১৪ সেয়ো বারো জন শিষ্যের মইন্ধোত এক জন ইষ্কোরিয়োটের যুদাস নামে শিষ্য উয়ায় প্রধান বামনলারটে যায়া কইলেক,

১৫ “মুই যদি যীশুক তোমারলার হাতত ধরে দেং, তাইলে তোমরালা মোক কি দিবেন কন?” সেয়ো প্রধান বামনলা ত্রিশটা রুপার টাকা গনেয়া যুদাসক দিলেক।

১৬ সেলো থাকি যুদাস যীশুক ধরে দিবার বাদে সুযোগ খুজির নাগিলেক।

১৭ বিশেষ রুটি পার্বনের পইলা দিনে শিষ্যলো যীশুরটে আসিয়া কইলেক, “তোমার বাদে মুক্তি ভোজ পার্বনের ব্যবস্থা হামরা কোটে করিমু?”

১৮ যীশু কইলেক, “তোমরা ঐ গঞ্জত যায়া মোর জানাশুনা মানষিটাক কও, ‘গুরু কইচে, মোর ঠিক করা সমায় হয়। আইসচে। মোর শিষ্যলার সাথত তোমার বাড়িত মুক্তি ভোজ পার্বন পালন করিম।”

১৯ যীশু যেই নাকান করি আদেশ দিয়া কইলেক, শিষ্যলো ঐ নাকান করি মুক্তি ভোজ পার্বন বানাইলেক।

২০ সইন্ধার সমায় যীশু বারো জন শিষ্য নিয়া খাবার বসিলেক,

২১ খাবার সমায় যীশু কইলেক “মুই তোমারলাক সচাং করি কবার ধরচুং, তোমারলার মইন্ধো থাকি এক জন মোক শত্রুর হাতত ধরেয়া দিবো।”

২২ ইয়াতে শিষ্যলো মনের দুঃখে এক জন এক জন করি আসিয়া পুছিলেক, “প্রভু মুই কি?”

২৩ যীশু কইলেক, “যায় মোর নগত একে থালত হাত দিবার ধরচে, উয়ায় মোক শত্রুর হাতত ধরেয়া দিবো।

২৪ বাছাই করা মানষিটার সমন্ধে শাস্ত্রত যেমন নেখা আছে, ঐ নাকান করি উয়াক মরির নাগিবে। কিন্তুক ছিঃ যেই মানষিটা, বাছাই করা মানষিটাক শত্রুর হাতত ধরেয়া দিবে! ঐ মানষিটার উবজন না হইলে উয়ার বাদে ভাল হইলেক হয়।”

২৫ যায় যীশুক শত্রুক হাতত ধরে দিবার যাবার ধরছিলেক, ঐ যুদাস কইলেক, “গুরু নিশ্চয় মুই না হং?” যীশু কইলেক, “তুই ঠিকেই কইচিস।”

২৬ খাওয়া-দাওয়া চলছে, এমন সমায় যীশু রুটি নিয়া ভগবানক ধন্যবাদ দিলেক। আর ঐ রুটি টুকরা টুকরা করি শিষ্যলোক দিয়া কইলেক, “এই নেও খাও, এইখান মোর দেহা।”

২৭ ইয়ার পাছত নোটা নিয়া ভগবানক ধন্যবাদ দিয়া ঐ নোটাটা শিষ্যলোক দিয়া কইলেক, “নোটার এই আংগুরের রস তোমরা সগায় খাও,

২৮ কেনেনা এই মোর নয়া নিয়মের অত্ত এইলা থাকি মেয়ো মানষির পাপের ক্ষমার বাদে দেওয়া হবে। ইয়াতে মানষির মুক্তির নয়া চুক্তির দিন শুরু হইলেক।

২৯ মুই তোমাক কবার ধরচুং এলা থাকি মুই এই আংগুর রস আর খাইম না। কিন্তুক মোর স্বর্গের বাপের শাসন ব্যবস্থাত নয়া করি খাইম।”

৩০ ইয়ার পাছত উমরা একটা গান করিতে করিতে জলপই পাহাড়ত চলি গেইলেক।

৩১ তার পর যীশু শিষ্যলোক কইলেক, “আজি রাতিত মোক নিয়া তোমারলার মনত বিশ্বাস হারেয়া ফেলাবেন। শাস্ত্রত নেখা আছে, ‘মুই রাখোয়াল মারি ফেলাইম। উয়ার মরণ হইলে পালের ভেড়ালা চাইরো পাকে ছড়াছড়ি হয় পড়িবে।’

৩২ “কিন্তুক মোক মরণ থাকি বত্তে তোনার পাছত মুই তোমারলার আগত গালীল যাইম।”

৩৩ পিতর উয়াক কইলেক, “তোমাক নিয়া সগায় বিশ্বাস হারে ফেলালেও কিন্তুক মুই বিশ্বাস হারের না হং।”

৩৪ যীশু উয়াক কইলেক, “মুই তোক সচাংয়ে কবার ধরচুং, আজি ভোর বেলা মুরগা ডেকার আগত তুই মোক চিনিস না কয়া তিন বার অস্বীকার করবু।”

৩৫ কিন্তু পিতর উয়াক কইলেক, “মুই তোমাক চেনং না এই কতা মুই কোন দিনও কইম না, মুই তোমার নগত মরিরও রাজি আছং।” অইন্য শিষ্যলো একে নাকান কতা কইলেক।

৩৬ ইয়ার পাছত যীশু গেৎশিমানী নামে একখান জাগাত যায়া উয়ার শিষ্যলোক কইলেক, “মুই ওটে কোনা যতক্ষণ প্রার্থনা করং তোমরা এটেকোনা ততক্ষণ বসি রন।”

৩৭ এই কয়া উয়ায় পিতর আর সিবদিয়ের দুই বেটাক সাথত নিয়া গেইলেক। যাইতে যাইতে উয়ার মন দুঃখ-কষ্টে ভরি উঠির নাগিলেক।

৩৮ স্যেলা যীশু কইলেক, “দুঃখে মোর পরান বিরি যাবার নাগচে। তোমরা এটে কোনা রন আর মোর সাথত জাগনা থাকেন।”

৩৯ ইয়ার পাছত যীশু খানেক দুরত যায়া মাটিত উবুর হয়। প্রার্থনা করির নাগিলেক, “মোর স্বর্গের বাবা, বাপধন মোর, তোরটে সউগে সম্ভব, এই দুঃখের বোঝ মোরটে হাতে তুই নিয়া যা। তাঙো মোর ইচ্ছায় না হউক, তোরে ইচ্ছাতে হউক।”

৪০ প্রার্থনা শেষে করি যীশু শিষ্যলরটে আসিয়া দেখিলেক, উমরা নিন যাবার ধরচে। উয়ায় পিতরক কইলেক, “এইটা কি ব্যাপার! মোর নগত এক ঘণ্টাও জাগনা থাকির পারলেন না?

৪১ জাগিয়া থাক প্রার্থনা কর যাতে তোমরালা পাপের ফান্দোত না পড়েন। তোমারলার অন্তরত ইচ্ছা আছে কিন্তুক দেহা দুর্বল।”

৪২ উয়ায় যায়া আর-একবার প্রার্থনা করিলেক, “হে মোর বাপধন এই দুঃখের বোঝ মুই না উঠাইলে যদি দুঃখ দূর না হয়, তাইলে তোর ইচ্ছা মতন হউক।”

৪৩ ইয়ার পাছত ফিরি আসিয়া দেখিলেক শিষ্যলো চোখু নিন্দে ঢুলির আরো নিন যাবার ধরচে।

৪৪ উয়ায় আরো উমারলাক ছাড়ি যায়া তিন বারের বার একে নাকান প্রার্থনা করিলেক।

৪৫ তার পাছত শিষ্যলরটে আসিয়া কইলেক, “তোমরা এলাও নিন্দোতে আছেন, জিরির ধরচেন? সমায় হয় আসির ধরচে,

বাছাই করা মানষিটাক পাপী মানষিলার হাতত তুলি দেওয়া হইচে।

৪৬ ওঠো, চল হামরা যাই! যায় মোক শত্রুর হাতত ধরেয়া দিবে উয়ায় আসিচে।”

৪৭ যীশু সেলোও কতা কবার ধরচে, এমন সমায় যুদাস ওটেকোনা আসিলেক। উয়ায় বারো জন শিষ্যলার মইন্ধে এক জন। উয়ার নগত মেলা মানষি ছোরা নাটি নিয়া আসিলেক। প্রধান বামন আর যিহুদী নেতালা ইমারলাক পেঠাইচে।

৪৮ যীশুক শত্রুলার হাতত ধরে দিবার বাদে যুদাস একটা চিন ঠিক করি দিছিলেক। “মুই যার চুমা খাইম, উয়ায় সেই মানষিটা, তোমরা যায়া উয়াক ধরিবেন।”

৪৯ ইয়ার পাছত যুদাস যীশুরটে যায়া কইলেক, “গুরু, দন্ডবোদ,” এই কয়া চুমা দিলেক।

৫০ যীশু উয়াক কইলেক, “সখা যা করির আসচেন কর।” সেলোয় সেলোয় মানষিলা আসিয়া যীশুক জাপটে ধরিলেক।

৫১ ঐ সমায় যীশুর সঙ্গীলার মইন্ধো থাকি এক জন ছোরা বাইর করিলেক আর মহাবামনের চাকরের একটা কান কাটি ফেলাইলেক।

৫২ যীশু সেলো উয়াক কইলেক, “তোর ছোরা খাপত থো। যায় যায় ছোরা চালায় উমরা ছোরার গুতাতে মরিবে।

৫৩ তোমরা কি মনে করেন যে মুই মোর স্বর্গের বাপক ডেকাইলে এলায় হাজারে হাজারে স্বর্গদূত পেঠেয়া কি দিবে না?

৫৪ কিন্তুক তাইলে পবিত্র শাস্ত্রের কতা কেমন করি পূরণ হবে? কিন্তুক শাস্ত্রত যেমন নেখা তেমন ঘটবে। এইলা সউগ এই নাকানে হওয়া দরকার।”

৫৫ সেলো যীশু ভিরের মানষিলাক কইলেক, “মুই কি ডাকু যে তোমরা মোক নাটি ছোরা নিয়া ধরির আসচেন? মুই প্রত্যেক দিন মন্দিরত বসিয়া শিক্ষা দিবার ধরচিলুং, সেলো তোমরা মোক ধরেন নাই কেনে?

৫৬ কিন্তু এইলা ঘটির ধরচে যাতে ভগবানের ভাববাদীলার নেখা পূরণ হয়।” সেলো উয়ার শিষ্যলো সগায় যীশুক থুইয়া পালেয়া গেইলেক।

৫৭ যায় যায় যীশুক ধরচে উমরা মহাবামন কাইফার বাড়িত যীশুক নিয়া আসিলেক। ওটেকোনা পন্ডিতলা আর নেতালা এক সাথে জোটো হইচে।

৫৮ পিতর দূর থাকি যীশুর পাছে পাছে মহাবামনের আগিনা পর্যন্ত গেইলেক। পাছত কি হয় এইটা দেখির বাদে ভিতরাত সোন্দেয়া পাহারাদারলার মইন্ধোত বসিলেক।

৫৯ যীশুক মারি ফেলের বাদে প্রধান বামনলা আর যিহুদী মহাসভার সউগ মানষিলা মিথ্যা সাক্ষী খুজির নাগিলেক।

৬০ মেলা মানষি মিছাং সাক্ষী দিবার আসছিলেক, তাণ্ডো উমরা ঠিক নাকানের সাক্ষী পাইলেক না। শেষত দুই জন মানষি আগেয়া আসিয়া কইলেক,

৬১ “এই মানষিটা কইলেক ‘ভগবানের মন্দিরটা ভাঙিয়া তিন দিনের দিন আরো বানেয়া দিবার পারং।’”

৬২ সেলা মহাবামন উঠিয়া যীশুক কইলেক, “তুই কি কোন জবাব দিবু না? ইমরা তোর বিরুদ্ধে এইলা কি সাক্ষী দিবার ধরচে?”

৬৩ যীশু কিন্তু চুপ করি রইলেক। সেলা মহাবামন আরো কইলেক, “তুই জীবন্ত ভগবানের কিরা দিয়া হামারলাক কঃ যে, তুইয়ে কি সেই বাছাই করা রাজা, ভগবানের বেটা?”

৬৪ যীশু সেলা কইলেক, “হে, তোমরা ঠিক কতা কইচেন। তাণ্ডো মুই একটা কতা কং ইয়ার পাছত তোমরালা বাছাই করা মানষিটাক মেঘের মইন্ধো দিয়া আসির আর ভগবানের ডাইন পাকে বসির দেখিবেন।”

৬৫ সেলা মহাবামন উয়ার কাপড় ছিড়ি ফেলেয়া বিরক্ত হয়। কইলেক, “ইয়ায় ভগবানক নিন্দা করিলেক! আর হামার সাক্ষী কি দরকার? এলায় তো তোমরা শুনিলেন যে উয়ায় ভগবানক নিন্দা করিলেক।

৬৬ তোমরালা কি মনে করেন?” উমরা কইলেক, “ইয়ায় মরণ দন্ড পাওয়ার যোগ্য।”



৬৭ উমরা সেলো যীশুর মুখত ছ্যেপ দিলেক উয়াক চড় আরো ঘুসি মারিলেক।

৬৮ উমরা কইলেক, “কিরে বাছাই করা রাজা কঃ দেখি তোক কায় ডাঙাইলেক।”

৬৯ সেই সমায় পিতর আগিনাত বসিয়া আছিলেক, সেলো এক জন চাকরানী আসিয়া পিতরক কইলেক, “তুইও তো গালীলের যীশুর নগত আছিলু।”

৭০ কিন্তু পিতর সগার আগত অস্বীকার করিয়া কইলেক, “তুই কি কবার ধরছিস মুই কিছুই জানং না।”

৭১ তার পাছত পিতর বায়রার দুয়ারত গেইলেক, সেলো আরেক জন চাকরানী ওটেকার মানষিলাক কইলেক, “এই মানষিটাও নাসারতীয় যীশুর সাথত আছিলেক।”

৭২ পিতর আরো কিরা কাটিয়া অস্বীকার করিলেক, “মুই ঐ মানষিটাক একেবারে চেনং না।”

৭৩ ইয়ার খানেক পাছত ওটেকার খাড়া হওয়া মানষিলা পিতরক আসিয়া কইলেক, “নিশ্চয় তুই উমারলার এক জন, কেনেনা তোর কতার ধরন শুনিয়া তোক বুঝা যাবার ধরচে।”

৭৪ সেলো পিতর নিজক অভিশাপ দিলেক, আর কিরা কাটিয়া কবার নাগিলেক, “মুই ঐ মানষিটাক একেবারে চেনং না।” আর সেলোয় মুরগা ডাকিলেক।

৭৫ স্যেলা পিতরের মনে পড়িলেক যীশু কইচিলেক, “মুরগা ডাকির আগত তুই তিন বার কবু যে, তুই মোক চিনিস না।” আর পিতর বায়রাত যায়া খুব কান্দির নাগিলেক।

২৭ ভোর বেলা প্রধান বামনলা আর নেতালা সগায় মিলিয়া যীশুক মারি ফ্যেলের চক্রান্ত করিলেক।

২ উমরা উয়াক বান্দিয়া রোমের রাজ্যপাল পীলাতেরটে নিয়া গেইলেক।

৩ যীশুক শত্রুর হাতত ধরেয়া দিছিলেক, সেই যুদাস য়েলা দেখিলেক যে যীশুক দোষী সাব্যস্ত করা হইচে, স্যেলা উয়ার মনত খুব দুঃখ হইলেক। উয়ায় প্রধান বামনলারটে আর নেতালার ওটে যায়া সেই ত্রিশটা রূপার টাকা ফিরিয়া দিয়া কইলেক,

৪ “মুই এক জন নির্দোষীক মারি ফ্যেলের বাদে ধরে দিয়া পাপ করিচুং।” উমরালা কইলেক, “তাতে হামার কি? তোর সমস্যা তুই সমাধান করেক।”

৫ স্যেলা যুদাস সেই রূপার টাকালো নিয়া মন্দিরত ঢেলেয়া ফ্যেলে দিলেক আর তার পাছত বায়রাত যায়া নিজে ফাঁসি নাগেয়া মরিলেক।

৬ প্রধান বামনলা ঐ রূপার টাকালো কুড়ি নিয়া কইলেক, “মন্দিরের তহবিলত এই টাকালো থোয়া ঠিক হবার না হয়, কেনেনা এইটা খুনের টাকা।”

৭ এই বাদে উমরা আলোচনা করিয়া ঐ টাকা দিয়া কুমোরলারটে থাকি জমিন কিনি নিলেক, যাতে যিরুশালেমত যেইলা বিদেশী মরিবে উমাক ওটেকোনা সমাধি দেওয়া যায়।

৮ এই বাদে ঐ জমিক আজিও কয় “অক্তের জমি।”

৯ ইয়াতে ভগবানের ভাববাদী যিরমিয়ের কওয়া কতা পূরণ হইলেক। “উমরানা ত্রিশটা রূপার টাকার দাম নিলেক, ইজ্রায়েলী মানষিলা উয়ার এই দাম ঠিক করিচিলেক।

১০ আর ভগবানের আদেশ মতন উমরানা ঐ টাকা দিয়া কুমোরের জমি কিনছিলেক।”

১১ এই পাকে যীশুক রাজ্যপাল পীলাতের আগত হাজির করিলেক। পীলাত উয়াক পুছিলেক, “তুই কি যিহুদীলার রাজা?” যীশু কইলেক, “তোমরা ঠিকেই কইচেন।”

১২ প্রধান বামনলা আরো যিহুদী নেতালা যীশুক মেলা দোষ দিলেক কিন্তু যীশু কোন উত্তর দিলেক না।

১৩ রাজ্যপাল পীলাত সেলা উয়াক কইলেক, “উমরা তোক কত দোষ দিবার ধরচে তুই কি শুনির পাচিস না?”

১৪ কিন্তু যীশু একটা কতারও জবাব দিলেক না। ইয়াতে পীলাত অচানক হইলেক।

১৫ রাজ্যপালের নিয়ম মতন প্রত্যেক বছর মুক্তি ভোজ পার্বনের সমায় মানষিলা পছন্দ করা এক জন করি কয়েদীক ছাড়ি দিবার

ধরছিলেন।

১৬ সেই সময় বারাব্বা নামে কুখ্যাত কয়েদী জেলখানাত  
আছিলেন।

১৭ মানষিলা যেলা একটে জড়ো হইলেক, পীলাত মানষিলাক  
পুছিলেক, “তোমরালা কি চান? তোমারলার বাদে মুই কাক ছাড়ি  
দিম? বারাব্বাক, না যাক বাছাই করা রাজা কয়, সেই যীশুক?”

১৮ পীলাত জানির পাইচে যে মানষিলা হিংসা করি যীশুক ধরেয়া  
দিচে।

১৯ পীলাত যেলা বিচার করির জাগাত বসিয়া আছিলেন, সেই  
সময় উয়ার বউ কয়া পেঠাইলেক, “ঐ নির্দোষী মানষিটাক  
তোমরা কোন করেন না, কেনেনা আজি রাতিত স্বপনে উয়ার  
বিষয় যেইলা দেখিচুং এই বাদে আজি মুই কষ্ট পাবার ধরচুং।”

২০ কিন্তু প্রধান বামন আর বুড়া নেতালা মানষিলাক উসকি  
দিলেক উমরা যাতে বারাব্বাক চায়া নেয় আরো যীশুক মারি  
ফেলের দাবি করে।

২১ সেলা প্রধান রাজ্যপাল উমাক পুছিলেক, “এই দুই জনের  
মইন্ধে তোমারলার বাদে কাক ছাড়ি দিবার চান?” উমরা  
কইলেক, “বারাব্বাক!”

২২ পীলাত সেলা উমারলাক কইলেক, “যাক বাছাই করা রাজা  
কওয়া হয় সেই যীশুক নিয়া মুই কি করিম?” উমরা সগায়  
কইলেক, “উয়াক ত্রুশ খুটাত টাঙা হউক।”

২৩ পীলাত কইলেক, “কেনে? উয়ায় কি দোষ করিচে?”  
কিন্তুক উমরানা সেলা আরো জোরে জোরে চিকরিয়া কবার  
নাগিলেক, “উয়াক ক্রুশ খুটাত টাঙান, ক্রুশ খুটাত টাঙান!”

২৪ পীলাত যেলা দেখিলেক যে উয়ায় কোন কিছুই করির পাবার  
ধরচে না, আরো বেশী করি গন্ডগোল হবার ধরচে, সেলা দোষ  
এরের বাদে উয়ায় জল নিয়া মানষিলার সামনাত হাত ধুইয়া  
কইলেক, “এই মানষিটার অক্তের দায়ী মুই নোয়াং, এইটা  
তোমরানায় বুঝিবেন।”

২৫ এই কতার উত্তরে মানষিলা সগায় কইলেক, “হামরানা আর  
হামারলার ছাওয়া-ছোটলা উয়ার অক্তের দায়ী হমু।”

২৬ সেলা পীলাত বারাবাক মানষিলারটে ছাড়ি দিলেক, কিন্তু  
যীশুক খুব চাবুক মারিয়া ক্রুশত টাঙের বাদে সঁপে দিলেক।

২৭ ইয়ার পাছত রাজ্যপাল পীলাতের সৈন্যলা যীশুক উয়ার  
রাজবাড়িত সেনালা যেটে রয় ওটে নিয়া গেইলেক আর সউগ  
সৈন্যলাক যীশুর চাইরো পাকে জোটো করিলেক।

২৮ উমরানা যীশুর কাপড়লা খুলি নিয়া উয়াক একখান নাল  
রংগের কাপড় পেন্দাইলেক।

২৯ পাছত কাটার-লতা দিয়া একটা মটুক বানেয়া উয়ার মাখাত  
পেন্দে দিলেক, আর উয়ার ডাইন হাতত একটা নাটি দিলেক।  
আরো উয়ার আগত হাংকুড়া পাড়ি ঠাট্টা করি উয়াক কবার  
নাগিলেক, “যিহুদী রাজার জয় হউক!”

৩০ উমরালা যীশুর মুখত ছ্যেপ দিলেক আর উয়ার নাটিটা নিয়া উয়ার মাখাত ডাঙের নাগিলেক।

৩১ এই নাকান করি তামশা করিবার পাছত ঐ কাপড়লা খুলি নিয়া উয়ার নিজের কাপড়লা আরো পেন্দে দিলেক, ইয়ার পাছত উয়াক ক্রুশত টাঙের বাদে নিয়া যাবার নাগিলেক।

৩২ সৈন্যলা যেলা যীশুক গঞ্জের বায়রাত নিয়া যাবার ধরচে। সেলা ঘাটাত কুরীণী গঞ্জের শিমোন নামে এক জন মানষির দেখা পাইলেক। সৈন্যলা উয়াক যীশুর ক্রুশ খুটাটা উবিবার বাদে জোর করি বাধ্য করিলেক।

৩৩ পাছত উমরা “গলগথা” নামের একখান জাগাত আসিয়া পৌছিলেক (গলগথা মানে মাথার খাপড়া)।

৩৪ ওটেকোনা আসিয়া উমরালা যীশুক তিতা জাতিয় বিষ কমেবার ওষুধত আংগুরের রস মিশিয়া খাবার দিলেক। কিন্তুক উয়ায় অল্প মুখত দিয়ায় আর খাবার চাইলেক না।

৩৫ যীশুক ক্রুশত দিবার পাছত সৈন্যলা উয়ার জামা কাপড় নিজের মইন্ধোত নটারি করি ভাগ করি নিলেক।

৩৬ আর ওটেকোনা বসিয়া যীশুক পাহারা দিবার নাগিলেক।

৩৭ উয়ার বিরুদ্ধে আনা একখান দোষ-নামা মাথার উপরাত ক্রুশত নটকেয়া থুইলেক, “এই যীশু, যিহুদীলার রাজা।”

৩৮ উমরালা দুই জন ডাকুকো যীশুর নগত ক্রুশত দিলেক। এক জনক ডাইন পাকে আরেক জনাক উয়ার বাম পাকে।

৩৯ সেই সময় যেই মানষিলা ঐ ঘাটা দিয়া যাবার ধরছিলেক, উমরালা মাথা টকটকেয়া ঠাট্টা করি কইলেক,

৪০ “তুই না মন্দির ভাঙিয়া তিন দিনের মইন্ধে বানে দিবার পারিস! তাইলে এলা নিজক বাঁচাও। তুই যদি ভগবানের বেটা হইস তাইলে ক্রুশ থাকি নামি আইসেক।”

৪১ একে নাকান করি প্রধান বামনলা, পন্ডিতলা আর যিহুদী নেতালাও ঠাট্টা করি কইলেক,

৪২ “ইয়ায় অইন্য মানষিক বাঁচাইচে কিন্তুক নিজক বাঁচের পারে না! উয়ায় তো ইজ্রায়েলের রাজা, এলা উয়ায় ক্রুশ থাকি নামি আসুক, তাইলে হামরা উয়ার উপরাত বিশ্বাস করিমু।

৪৩ ঐ মানষিটা ভগবানের উপরাত নির্ভর করে, এলা ভগবান যদি উয়ার উপরাত খুশি থাকে তাইলে উয়াক মুক্তি দেউক। উয়ায় তো নিজক ভগবানের বেটা কবার ধরছিলেক।”

৪৪ যীশুর সাথত যে দুই জন ডাকুক ক্রুশত দেওয়া হইছিলেক উমরাও একে নাকান কতা কয়া উয়াক ঠাট্টা করির নাগিলেক।

৪৫ সেই দিন বেলা বারোটা থাকি বিকাল তিনটা পর্যন্ত গোটায় দেশ আন্ধারে ঢাকি নিলেক।

৪৬ পেয়ায় তিনটার সময় যীশু খুব জোরে চিকরিয়া কইলেক,  
“এলি, এলি লামা শবক্তানী?” যার মানে হইলেক, “হে মোর  
দয়াল ভগবান, হে মোর দয়াল ভগবান, তুই মোক কেনে ছাড়ি  
দিচিস?”

৪৭ ওটে কোনা যায় যায় খাড়া হয় আছিলেক, উমারলার মইন্ধে  
কয়েক জন এই কতা শুনিয়া কবার নাগিলেক, “উয়ায় এলিয়ক  
ডেকের ধরচে।”

৪৮ উমারলার মইন্ধে একটা মানষি সেলোয় দৌড়ি যায়া জল চুষি  
নেয়, এই নাকান জিনিসত টেঙা ফলের রস ভিজিয়া একটা  
নাটির মাথাত নাগেয়া যীশুক খাবার দিলেক।

৪৯ কিন্তু অইন্য মানষিলা কবার নাগিলেক, “আরে! ছাড়ি দেও,  
দেখি এলিয় উয়াক বাঁচের আইসে কি না?”

৫০ যীশু আরো একবার জোরে চিকরিয়া শেষে উকাস নিয়া  
জিউ ছাড়িলেক।

৫১ সাথে সাথে দশংগতি মন্দিরের মইন্ধের পর্দাখান উপরা থাকি  
নিচা পর্যন্ত চিরিয়া দুই ভাগ হয় গেইলেক। আর ভৈচাল হয় বড়  
বড় শিললা ফাটি গেইলেক।

৫২ গুহার সমাধিলার মুখ খুলি গেইলেক, আর ভগবানের মানষি  
যেইলা মরি গেইচে এমন মেলা মানষি ফির বত্তি উঠিলেক।

৫৩ উমরালার সমাধি থাকি বিরাইলেক আর যীশু ফির বত্তি উঠার  
পাছত পবিত্র যিরুশালেম গঞ্জত গেইলেক। উমরালার ওটেকোনা



ম্যেলা মানষিক দেখা দিলেক।

৫৪ ক্রুশের বগলত প্রধান সেনাপতি আর উয়ার সাথী যেইলা যীশুক পাহারা দিবার ধরছিলেক, উমরা ভৈচাল আর অইন্য ঘটনালা দেখি খুব ভয় পায়া কইলেক, “মাইরি, ইয়ায় ভগবানের বেটা আছিলেক।”

৫৫ ওটেকোনা ম্যেলা বেটিছাওয়া দূরত খাড়া হয় সউগ কিছুই দেখির ধরছিলেক। এই বেটিছাওয়ালা গালীল থাকি যীশুর দেখাশুনা করির বাদে উয়ার নগত আসছিলেক।

৫৬ উমার মইন্ধে আছিলেক মগ্দলিনী মরিয়ম, যাকব আরো যোষেফের মাও মরিয়ম, সিবদিয়ের বেটা যাকব আরো যোহনের মাও।

৫৭ সইন্কা হবার ধরচে এমন সমায় আরিমাথিয়া গেরামের যোষেফ নামে এক জন ধনী মানষি যিরুশালেমত আসিলেক। উয়ায় ছিলেক যীশুর শিষ্য।

৫৮ যোষেফ পীলাতেরটে যায়া যীশুর মরা দেহাটা চাইলেক। সেয়া পীলাত উয়াক দেহাটা দিবার আদেশ দিলেক।

৫৯ যোষেফ দেহাটা নিয়া পরিস্কার একখান কাপড়ত গোটো করিলেক।

৬০ ইয়ার পাছত সেই দেহাটা নিয়া যায়া উয়ায় নিজের বাদে পাহাড়ত যে নতুন সমাধিটা খুড়িয়া থুইছিলেক, দেহাটা ওটে

থুইলেক। তার পাছত সমাধির মুখখান বন্ধ করির বাদে বড় একটা শিল গড়গড়েয়া নিয়া যায়া বন্ধ করি দিয়া উয়ায় চলি গেইলেক।

৬১ কিন্তু মগদলিনী মরিয়ম আরো অইন্য মরিয়ম সমাধির আগপাকে বসিয়া রইলেক।

৬২ পরের দিন মানে জোগার করা পার্বনের, পরের দিন, প্রধান বামনলা আর ফরীশীলা পীলাতের নগত দেখা করিলেক।

৬৩ উমরা কইলেক, “হুজুর, হামার ফম পড়িচে, সেই ঠকবাজটা বত্তি থাকিতে কইচিলেক, মুই তিন দিনের দিন বত্তি উঠিম।

৬৪ এই বাদে তোমরা হুকুম দেও যাতে তিন দিন পর্যন্ত সমাধিটা পাহারা দেওয়া হয়। তা না হইলে উয়ার শিষ্যলা আসিয়া উয়ার দেহাটা চুরি করি নিয়া যায়া মানষিলাক কবে, উয়ায় মরণক জয় করি বত্তি উঠিচে। তাইলে পইলা ছলনার চায়া শেষে ছলনাটা আরো বেয়া হবে।”

৬৫ পীলাত সেলো উমারলাক কইলেক, “পাহারা দারলাক নিয়া যায়া যত ভাল করি পারেন পাহারা দিবার ব্যবস্থা করেন।”

৬৬ সেলো উমরা যায়া সমাধির মুখের শিলটার উপরাত সীলমোহর মারিলেক। আরো পাহারা দারলাক থুইয়া ওটেকোনা সমাধিটা কড়াকড়ি করি পাহারা দিবার ব্যবস্থা করিলেক।

২৮ জিরানের দিনের পর হাপ্তাহের পইলা দিন ভোর বেলা মগদলিনী মরিয়ম আর এক জন মরিয়ম সমাধিটা দেখির

গেইলেক।

২ স্যোলা অচমকায় ভৈচাল হইলেক, কেনেনা পরম প্রভুর এক জন স্বর্গদূত স্বর্গ থাকি নামি আসিলেক। আর সমাধিটার মুখের শিলটা সরেয়া দিয়া উয়ার উপরাত বসিলেক।

৩ স্বর্গদূতটার চেহারা আলোর ঝিলিকের নাকান। উয়ার কাপড় চোপড় একেবারে সাদা ধপধপা।

৪ উয়ার ভয়ে পাহারাদারলা কাপিতে কাপিতে মরার মত হয়। গেইল।

৫ স্বর্গদূত ঐ বেটিছাওয়ালাক কইলেক, “তোমরা ভয় না খান, কেনেনা মুই জানং যেই যীশুক ক্রুশত দেওয়া হইচে তোমরা উয়াকে চান্দের ধরচেন।

৬ উয়ায় এটেকোনা নাই। উয়ায় যেই নাকান কইচিলেক, ঐ নাকান করি বত্তি উঠিচে। আইসো যেটেকোনা উয়াক থাকেয়া থোয়া হইচে ঐ জাগাখান দেখ।

৭ তোমরা পচপচে যায়া উয়ার শিষ্যলা কন যে উয়ায় মরণক জয় করি ফির বত্তি উঠিচে। আর তোমারলার আগে আগে উয়ায় গালীল যাবার ধরচে। তোমরা উয়াক ওটেকোনা দেখির পাবেন। দেখেন এই কতাটা মুই তোমারলাক জানেয়া দিলুং।”

৮ ঐ বেটিছাওয়ালা ভয় পাইছিলেক তাঞা উমরা আনন্দে সমাধিটার ওটে থাকি যীশুর শিষ্যলাক খবর দিবার বাদে দৌড়ির নাগিলেক।

৯ এমন সময় যীশু অচমকায় বেটিছাওয়ালার আগপাকে আসিয়া খাড়া হয় কইলেক, “তোমারলার মঙ্গল হউক।” সেলো ঐ বেটিছাওয়ালা যীশুর বগল যায় ঠেং ধরিয়া ভক্তি দিলেক।

১০ যীশু উমারলাক কইলেক, “ভয় না খান, তোমরা যায়া মোর ভাইলাক গালীল যাবার কন ওটেকোনা উমরা মোক দেখির পাবে।”

১১ ঐ বেটিছাওয়ালা সেলো যাবার ধরছিলেক, সেলো পাহারাদারলার কয়কজন গঞ্জত যায়া কি কি ঘটনা হইছিলেক ঐলা প্রধান বামনলাক কইলেক।

১২ প্রধান বামনলা যিহুদী নেতালার নগত দেখা করিয়া একটা ফন্দি করিলেক। উমরা পাহারা দারলাক মেলা টাকা দিয়া কইলেক,

১৩ “তোমরা মানষিলাক কও, হামরা সেলো রাইতোত নিন যাবার ধরচিলুং সেই সময় যীশুর শিষ্যলো আসিয়া দেহাটা চুরি করি নিয়া গেইচে।

১৪ এই কতা যদি রাজ্যপাল শুনির পায় তাইলে হামরা উয়াক বুঝামু আর তোমারলাক শাস্তির হাত থাকি বাঁচামো।”

১৫ পাহারাদারলা ঐ টাকা নিয়া উমাক যেমন কওয়া হইছিলেক ঐ নাকানে কইলেক। আজিও যিহুদীলার মুখত ঐ কতাটা ছড়াছড়ি হয় আছে।

১৬ যীশু গালীলত যেই পাহাড়ত শিষ্যলোক যাবার কইচে, ঐ এগারো জন শিষ্য ঐ পাহাড়ত গেইলেক।

১৭ উমরা যীশুক দেখি ভক্তি দিলেক, কিন্তু কয়েক জন সন্দেহ করিলেক।

১৮ সেয়েলা যীশু আসিয়া উমাক কইলেক, “স্বর্গের আর দুনিয়ার সউগ অধিকার মোক দেওয়া হইচে।

১৯ এই বাদে তোমরা যাও, তোমরা যায়া সউগ জাতির মানষিলাক মোর শিষ্য বানান। বাপ, বেটা আর পবিত্র আত্মার নামে দীক্ষা দেও।

২০ মুই তোমারলাক যেইলা আদেশ দিচুং সেইলা পালন করির উমারলাক শিক্ষা দেও। দেখ, যুগে যুগে প্রতিদিন তোমারলার সোদে শেষ পর্যন্ত আছং॥”

# মার্ক

১ ভগবানের একটা ভাল খবর কবার চাং। এই খবরটা হইলেক ভগবানের বাছাই করা রাজার সমন্ধে। উয়ার নাম হইলেক যীশু আর উয়ায় হইচে ভগবানের বেটা। এই ভাল খবরটা এই নাকান করি শুরু হইচে।

২ যীশুর আইসার মেলা দিন আগত উয়ার সমন্ধে যিহুদী ভাববাদীলা শাস্ত্রত এই নাকান নেখিচে। ভগবান উয়ার বেটাক কয়, “দেখ, তোর আইসার আগত মোর খবরিয়াক পেঠেবার ধরচুং। উয়ায় তোর আগত যায়া তোর বাদে ঘাটা বানাবে। যাতে তোক সগায় মানি নেয়।” ভাববাদী যিশাইয়ও নেখিলেক যে,

৩ “নিধুয়া পাথারত এক জন চিকিরিয়া কবার নাগচে: পরম প্রভু আসিবার বাদে মনের ঘাটা ঠিক কর! ঘাটাটা সোজা কর!”

৪ ঐ খবরিয়াটা হইলেক যোহন। উয়ায় নিধুয়া পাথারত দীক্ষাদাতা হয় আসিলেক, আর ঢোলাই দিবার নাগিলেক যে, “পাপের ঘাটা হাতে মন ফিরান, আর জল দিয়া দীক্ষা নেও! সেলা ভগবান তোমারলার পাপ ক্ষমা করিবে।”

৫ এই বাদে যিহুদীয়া প্রদেশের আর যিরুশালেম গঞ্জের সগায় বিরিয়া যোহনের-টে আসির ধরিলেক। উমরা নিজের নিজের পাপ স্বীকার করির পাছত যর্দন নামের নদীত যোহন উমারলাক জল দিয়া দীক্ষা দিলেক।

৬ যোহনের পিন্দিবার কাপড় আছিলেক উটের লোমের, আর উয়ার কমড়ত আছিলেক চামড়ার পেড়ি। উয়ায় খাবার খাইচে বড় বড় কুকতি আর জঙলের মধু।

৭ যোহন আরো ঢোলাই দিলেক যে, “মোর পাছত এক জন আসির ধরচে। উয়ায় মোর চায়া শক্তিবান। ছাপরিয়া উয়ার জুতা খুলি দিবারও মোর যোগ্যতা নাই।

৮ মুই তোমারলাক জল দিয়া দীক্ষা দিলুং কিন্তুক উয়ায় তোমারলাক পবিত্র আত্মা দিয়া দীক্ষা দিবে।”

৯ এক দিন যীশু গালীল প্রদেশের নাসারত গেরাম থাকি যোহনের-টে আসিলেক। ওটেকোনা যোহন যীশুক যর্দন নদীত নিয়া যায়া জল দিয়া দীক্ষা দিলেক।

১০ আর যীশু যেলা জল থাকি ডুবিয়া উঠির ধরচে, সেলায় সেলায় দেখিলেক দ্যাওয়া দুই ফাইলটা হয়, ভগবানের আত্মা কইতোরের ঢক ধরি উয়ার উপরাত নামি আসিলেক।

১১ আর দ্যাওয়া হাতে একটা শব্দ শোনা গেইলেক, “তুইয়ে মোর বেটা, মোর মনের এক জন। তোর উপর মুই খুশি আছং।”

১২ ইয়ার পাছত যীশুক ভগবানের আত্মা চালনা করি নিয়া গেইলেক নিধুয়া পাথারত।

১৩ আর ওটেকোনা যীশু চল্লিশ দিন থাকিলেক। কিন্তুক শয়তান-অসুর যীশুক নানা নাকান পাপের ফান্দত ফ্যেলেবার চেষ্টা

করিলেক। ঐ নিধুয়া পাথারত জংলি জীব-জন্তুও আছিলেক  
কিন্তুক স্বৰ্গদূতলা যীশুর যতন করির নাগিলেক।

১৪ পাছত যেলা যোহন জেলখানাত বন্দী হইলেক, সেলা যীশু  
গালীল প্রদেশত আসিলেক। ওটেকোনা ভগবানের দেওয়া ভাল  
খবর নানান জাগাত ঢোলাই দিবার নাগিলেক।

১৫ উয়ায় কইলেক যে, “ভগবান যেই সময়টা ঠিক করিচে, ঐ  
সময়টা হয় গেলিচে। উয়ার রাজ্য বগলা-বগলি আসিচে!  
তোমরালা পাপের ঘাটা থাকি মন ফিরান আর ভাল খবরটা  
বিশ্বাস করো।”

১৬ এক দিন যীশু গালীল সাগরের পার দিয়া বেড়েবার ধরিলেক  
আর উয়ায় দেখির পাইলেক শিমোন আর শিমোনের ভাই  
আন্দ্রিয়, সাগরত জাল ফ্যেলেয়া মাছ ধরির নাগচে। উমরা মাছুয়া  
আছিলেক।

১৭ উমাক দেখিয়া যীশু কইলেক, “বাহে, তোমরা মোর  
এটেকোনা আইসো! তোমরা আগত মাছ মারিয়া আনিবার  
ধরিলেন, এলা হাতে মুই তোমাক ভগবানের ঘাটাত মানষিক  
আনিবার শিখাইম।”

১৮ আর সেলায় উমরা জাল ফ্যেলে থুইয়া যীশুর পাছত  
আসিলেক।

১৯ খানেক দূর যাবার পাছত সিবদিয়ের দুই বেটাক, যাকব আর  
যোহনক দেখির পাইলেক। উমরা একখান নাওয়াত বসিয়া জাল



সিলাই করির ধরচে।

২০ আর যীশু উমারলাক দেখিতে কালেই ডেকেয়া কইলেক,  
“তোমরা মোর এটেকোনা আইসো।” আর সেয়া উমরা  
উমারলার বাপক কামলার নগত নাওযোত খুইয়া যীশুর পাছে  
পাছে চলি গেইলেক।

২১ ইয়ার পাছত যীশু আর উয়ার চেলালা কফরনাহুম গঞ্জত  
গেইলেক। আর যিহুদী নিয়মের জিরানের দিনত যীশু উপাসনা  
ঘরত যায়া শিক্ষা দিবার ধরিলেক।

২২ এই শিক্ষা শুনিয়া সউগ মানষিলা অচানক হইলেক, কেনেনা  
উয়ায় যিহুদী আইন কানুনের পন্ডিতের নাকান শিক্ষা না দেয়।  
উয়ায় ভগবানের অধিকার পাওয়া মানষির নাকান শিক্ষা দেয়।

২৩ অচমকায় ঐ উপাসনা ঘরত একটা অপদেবতা ধরা মানষি  
আসিলেক।

২৪ আর অপদেবতাটা যীশুক দেখিয়া চিকিরিয়া কবার  
নাগিলেক, “হ্যে বাহে! মোর নগত তোমার কি দরকার, কন তো,  
নাসারতের যীশু? তোমরা কি হামারলাক সর্বনাশ করির  
আসচেন? মুই জানং তোমরা কায়, তোমরা তো ভগবানের সেই  
পবিত্র মানষি, ভগবানের আপনজন।”

২৫ যীশু সেয়া অপদেবতাটাক দাবরেয়া কইলেক, “চুপ করি  
রঃ, আর উয়ার ভিত্তিরা থাকি তুই বিরিয়া যা।”

২৬ আর উয়ায় একেবারে চিকিরিয়া গাও মোচড়েয়া বিরিয়া গেইলেক।

২৭ এই দেখিয়া মানষিলা অচানক হয় নিজের মানষির মাঝত ফুসুর-ফাসার করিবার নাগিলেক, “আরে এইটা কি ব্যাপার? এই নয়া শিক্ষার এত ক্ষমতা! অপদেবতাও উয়ার কতা শুনির বাদ্ধ হয়!”

২৮ আর এই নাকান করি যীশুর কতা খুব পচ করি গালীল প্রদেশত ছড়া-ছড়ি হয় পড়িলেক।

২৯ উপাসনা ঘর হাতে বিরিয়া যাকব আর যোহনক নিয়া যীশু শিমোন আর আন্দ্রিয়-এর বাড়িত গেইলেক।

৩০ শিমোনের শশুড়ি জ্বরত ভুগিয়া চাংড়াত শুতিয়া আছে, আর যীশু আইসতে কালেই উয়াক জ্বরের কতা কইলেক।

৩১ যীশু উয়ার-টে যায় হাত ধরি তুলিলেক। সেলো কি হইলেক? উয়ার জ্বর সেলোয় সেলোয় পালে গেইলেক, আর উয়ায় উমারলার বাদে খাবারের যোগাড় করিবার নাগিলেক।

৩২ ঐ দিন যেলা বেলা ডুবিয়া জিরানের দিন চলি গেইলেক, সেলো ওটেকার মানষিলা সউগ অসুকিয়া আর অপদেবতা ধরা মানষিলাক যীশুর-টে আনিলেক।

৩৩ বাড়ির আগপাকে খোলান বাড়িত, কফরনাহূমের মেলা মানষি আসিয়া হাটের নাকান ভিড় করিলেক।

৩৪ যীশু নানা ঢকের অসুকিয়া মানষিক ভাল করিলেক। অপদেবতা ধরা মানষিলার ভিত্তি থাকি ঐলাক খেদাইলেক। কিন্তুক ঐলাক কতা কবার দিলেক না, কেনেনা উমরা জানে উয়ায় কায়।

৩৫ পরের দিন খুব ভোর সাকালে যীশু নিন থাকি উঠিয়া নিধুয়া পাথারত যায়া প্রার্থনা করিবার নাগিলেক।

৩৬ শিমোন আর উয়ার সঙ্গীলা যীশুক খুজিবার নাগিলেক।

৩৭ চান্দেয়া যেলা পাইলেক, সেলা যীশুক কইলেক, “প্রভু, সগায় তোমাক খুজিবার ধরচে।”

৩৮ যীশু উমারলাক কইলেক, “হাটো, হামরালা বগলা-বগলি গেরামলাত যাই, ওটেকোনাও যাতে মুই প্রচার করির পাং। এই বাদেই তো মুই আসচুং।”

৩৯ এই নাকান করি যীশু গালীল প্রদেশের উপাসনা ঘরলাত প্রচার করিয়া, মানষির ভিত্তি হাতে অপদেবতালাক খেদেয়া, ঘুরি বেড়েবার নাগিলেক।

৪০ এমন সমায় একটা কুষ্ঠ রুগী যীশুর-টে আসিয়া হাংকুড়া পাড়ি মিনতি করি কবার নাগিলেক, “ও বাহে যীশু, তোমরা ইচ্ছা করিলে মোক শুদ্ধি করিয়া ভাল করির পান।”

৪১ এই কতা শুনিয়া মানষিটার বাদে যীশুর খুব মায়া হইলেক। যীশু হাত বাড়েয়া অশুদ্ধি রুগীটাক নারিয়া কইলেক, “মুই এইটায় চাং। তুই শুদ্ধি হয়্যা যা।”

৪২ সেলোয় কুষ্ঠ রোগ ছাড়ি গেইলেক আর মানষিটা শুদ্ধি হইলেক।

৪৩-৪৪ যীশু ঈকুম দিয়া কইলেক, “এই ঘটনাটা কাণ্ডোকে কবু না। তুই খালি বামনোক যায়া দেহাখান দেখাও যে তোর অসুখ ভাল হয়্যা গেইচে। আর মহাপুরুষ মোশির বিধান মতে কুষ্ঠ রোগ হাতে ভাল হইলে, যেইলা পূজা করার দরকার, সেইলা করেক। ইয়াতে সমাজের মানষি জানির পাইবে তুই শুদ্ধি হয়্যা গেইচিস।” এই কতালা কয়া যীশু উয়াক বিদায় করিলেক।

৪৫ মানষিটা কিন্তুক এই ঘটনাটা মেলা মানষিক কয়া বেবেবার ধরিলেক। এই বাদে ভিড়টা আরো এমন বাড়ি গেইলেক যে, যীশু কোনো গঞ্জত খোলা-মেলা করি বেড়ের পাইলেক না। খালি নিধুয়া পাথারত থাকির নাগিলেক, কিন্তুক ওটেকোনাও চাইরো পাক হাতে মানষি আসির ধরিলেক।

২ কয় দিন পাছোত যীশু কফরনাহুম গঞ্জত ফিরিয়া আসিলেক, আর ওটেকার মানষি জানির পাইলেক উয়ায় ঘরত আছে।

২ সেলা ওটেকোনা এতলা মানষি একটে হইলেক যে, ঘর ঠাসাঠাসি হয়্যাও দুয়ারতও জাগা ধরে না। আর যীশু উমারলাক ভগবানের কতা প্রচার করির ধরচে।

৩ ঐ সমায় একদল মানষি আসির ধরচে। উয়ারে মাঝত চাইর জন মানষি একটা নুলা রুগীক ওটেকোনা দাগিলাত করিয়া

উবিয়া আনির ধরচে।

৪-৫ কিন্তুক ভিড়ের বাদে রুগীটাক যীশুর-টে নিয়া যাবার পাইলেক না। আর যীশু যেই ঘরত বসিয়া আছে, সেই ঘরের ঢাল ফাকা করিয়া নুলা রুগীটাক দাগিলা সুদায় যীশুরটে নামেয়া দিলেক। উমারলার এই নাকান বিশ্বাস ছিলেক যে রুগীটাক যীশুর-টে নিয়া গেইলে ভাল হইবে। এই দেখিয়া রুগীটাক যীশু কইলেক, “বাউ, তোর তামান পাপ ক্ষমা করা হইল।”

৬ ওটেকোনা কয়জন পন্ডিত কিন্তুক বসিয়া আছে। উমরা মনে মনে ভাবিবার নাগচে,

৭ “আরে! মানষিটা এই নাকান কতা কেনে কবার ধরচে? উয়ায় তো ভগবানের নিন্দা করে! ভগবান ছারা কাণ্ডো কি পাপ ক্ষমা করিবার পায়?”

৮ উমরা যেইলা কতা মনে মনে ভাবির ধরচে, সেইলা কতা যীশু সাথে সাথে অন্তরত বুঝির পাইলেক। উমারলাক পুছিলেক, “এই নাকান কতা কেনে ভাবির নাগচেন?”

৯-১০ মুই যদি কং ‘তোর পাপ ক্ষমা করা হইলেক’, এই কামটা হয় কি না হয় দেখির পাইবেন না। কিন্তুক নুলা রুগীটা হাটিবার পায় না। মুই যদি উয়াক হাটিবার কং, আর উয়ায় সেলোয় সেলোয় হাটে, তাইলে ইয়াতে বুঝির পাইবেন মুইয়ে বাছাই করা মানষিটা। এই বাদে, দুনিয়াত পাপ ক্ষমা করিবার অধিকার মোরে আছে।”

১১ সেলো যীশু কি করিলেক? রুগীটার ভিত্তি ঘুরি দেখিয়া কইল, “বাউ ওঠেক! তোর দাগিলা তুলিয়া তুই বাড়ি চলি যা।”

১২ সেলোয় সেলোয় মানষিটা সগারে চোখুর আগত খাড়া হয়। দাগিলা তুলিয়া বায়রাত চলি গেইলেক। সগায় অচানক হয়। কইলেক, “হামরা এই নাকান ঘটনা কোনো দিন দেখি নাই!” এইটা কইতে কইতে ভগবানের মহিমা করিলেক।

১৩ পাছত যীশু গালীল সাগরের পারোত আরো গেইলেক। সেলো ওটেকোনা মেলা মানষি হইল আর উয়ায় উমারলাক শিক্ষা দিবার নাগিলেক।

১৪ হাটি যাইতে যাইতে দেখিলেক আলফেয়ের একটা বেটা আছে। উয়ায় মাসুল আদায়কারীর ঘরত বসিয়া আছে, কেনোনা উয়ায় এক জন মাসুল আদায়কারী। উয়ার নাম লেবি। যীশু উয়াক কইলেক, “তুই মোর এটেকোনা আয়, আর মোর চেলা হঃ।” আর সেলোয় সেলোয় লেবি উঠিয়া যায়। চেলা হইলেক।

১৫ পাছত যীশু আর উয়ার চেলালা লেবির বাড়িত খাওয়া-দাওয়া করির বসিলেক। আর ওটেকোনা মেলা মাসুল আদায়কারী আর অইন্য নাকান বেয়া নজরে দেখা মানষিলা নগত খাবার ধরচে। কেনোনা এই নাকানের মানষিলা যীশুক গুরু ভজিলেক।

১৬ এই দেখিয়া অইন্য মানষিলা, যায় যায় ফরীশী দলের পন্ডিত, উমরা পুছিলেক যীশুর চেলালাক, “আরে! যীশু মাসুল

আদায়কারী আর বেয়া মানষির নগত খাওয়া-দাওয়া করে কেনে?”

১৭ এই কতাটা যীশু শুনির পায়া উমারলাক কইলেক যে, “ভাল মানষির ডাক্তারের দরকার নাই। যায় রুগী, যায় অসুকিয়া, উমারে ডাক্তারের দরকার আছে। মুই ধার্মিক মানষিক ডেকেবার আইসং নাই। মুই পাপী মানষিক ডেকেবার বাদে আসচুং।”

১৮ এক সমায় দীক্ষাদাতা যোহনের চেলালা আর ফরীশীলা উপাস করির ধরিলেক। এই দেখিয়া কয়জন মানষি আসিয়া যীশুক পুছিলেক যে, “যোহনের চেলালা আর ফরীশীলার চেলালা তো উপাস করে, কিন্তুক তোমার চেলালা উপাস করে না কেনে?”

১৯ সেলো যীশু উমারলাক কইলেক যে, “বর নগত থাকিতে, বরযাত্রী উপাস করির পায় কি? বর নগত থাকিতে উমরা উপাস করির পায় না। উমরা আনন্দ করিবে।

২০ কিন্তুক এমন এক দিন আসিবে যেলা বরক নিয়া যাওয়া হইবে, আর সেলো বরযাত্রীলা উপাস করিবে।

২১ “কাণ্ডোয় বুড়া জামাত নয়া কাপড়ের তালি দেয় না। যদি দেয় ধুবর পাছত নয়া তালিটা টান ধরিয়া ছোট হয় যাবে, আর ইয়াতে ছেড়া জাগাখান আরো ওসার হইবে।

২২ “সেই নাকান, বুড়া চামড়ার ঝোলাত কাণ্ডোয় টাটকা আংগুরের রস থোয় না। যদি থোয় সেলো টাটকা রস পচিয়া রস

বাড়ি যায়া অল্পতে ঝোলা ছিড়ি যায়। ইয়াতে ঝোলা আর রস দুইটায় নষ্ট হয়। সেই বাদে টাটকা রস নয়া ঝোলাত খুবার নাগে।”

২৩ এক দিন, যিহুদী নিয়মের জিরানের দিনত, যীশু আর উয়ার চেলালা ডাবরির মাঝিলা দিয়া যাবার ধরিলেক। যাইতে যাইতে, চেলালা খাবার বাদে শিষ ছিড়িবার নাগিলেক।

২৪ এই দেখিয়া ফরীশীলা যীশুক কইলেক যে, “ধর্মের বেনিয়ম করিয়া, পবিত্র জিরানের দিনে যেইলা করা উচিত নোয়ায়, তোমার চেলালা সেইলায় কেনে করির ধরচে?”

২৫-২৬ যীশু সেয়া উমারলাক কইলেক যে, “এইটা কি তোমরা শাস্ত্রত পড়েন নাই? অবিয়াথর নামের এক জন যেয়া মহাবামন আছিলেক, সেয়া চৌদ্দ গুটির মহারাজা দায়ূদক একবার ভোগ নাগছিল। সেয়া ভগবানের বাড়িত সোন্দেয়া মহারাজা দায়ূদ কি করিলেক? ভগবানের বাড়িটার যে পবিত্র রুটি আছিলেক, সেই রুটি বামন ছাড়া কারো খাবার নিয়ম আছিলেক না। কিন্তুক দায়ূদ ঐ রুটি নিয়া নিজে খাইলেক, উয়ার সঙ্গীলাকো খাবার দিলেক।

২৭ “এই দেখিয়া হামরা জানির পাই যে, জিরানের দিনের সেবা করির বাদে মানষির সিজ্জন হয় নাই। মানষিক আশুর্বাদ দিবার বাদে তো জিরানের দিনের সিজ্জন হইচে।

২৮ আর মুইয়ে তো হইলুং জিরানের দিনের মালিক, সেই বাছাই করা মানষিটা।”



৩ হাপ্তার পবিত্র জিরানের দিনে যীশু যিহুদী উপাসনা ঘরত আসিলেক আর ওটেকোনা মেয়ো মানষি হইলেক। উমারলার মাঝত একটা মানষি আছিলেক যার এক হাত শুকি গেইচে।

২ কিন্তুক ফরীশীলা দোষ দিবার বাদে যীশুক ভাল করি নজর দিবার ধরিলেক। পবিত্র জিরানের দিনে যীশু অসুকিয়া মানষিটাক ভাল করে কি না, উমরা দেখিবার ধরিলেক।

৩ যীশু সেয়ো ঐ শুকান হাতওলা মানষিটাক কইলেক, “তুই সগারে আগত আসিয়া খাড়া হঃ।”

৪ মানষিটা যেয়ো আসিয়া খাড়া হইলেক, যীশু ফরীশীলাক পুছিলেক, “মোশির বিধানত কি নেখা আছে? পবিত্র জিরানের দিনটা কিসের বাদে? ভাল কামাই না বেয়া কামাই করির বাদে? জিউ বত্তেবার, না মারি ফ্যেলেবার বাদে?” কিন্তুক ফরীশীলা কোনো উত্তর দিলেক না।

৫ যীশু ফরীশীলার এই নাকান কঠুর হিয়া দেখিয়া দুঃখ পাইলেক। গোসা হয়্যা চোখু পাকেয়া চাইরো পাকে দেখিয়া ঐ মানষিটাক কইলেক, “তোর হাত বাড়েয়া দো।” মানষিটা কি করিলেক? উয়ার শুকান হাত বাড়ে দিলেক, আর একেবারে ভাল হয়্যা গেইলেক!

৬ এই ঘটনা দেখতে কালে ফরীশীর ঘর উপাসনা ঘরের ভিত্তিরা হাতে বাইরা চলি গেইলেক। আর সেয়োয় সেয়োয় যীশুক

কেংকরি মারি ফ্যেলা যায়, উমরা হেরোদ রাজার মানষিলার নগত ফন্দি করির নাগিলেক।

৭-৮ ইয়ার পাছত ভিড় থাকি যীশু উয়ার চেলালাক নগত নিয়া সাগরের বগলত গেইলেক। কিন্তুক ওটেকোনাও উয়ার পাছে পাছে মেয়ো মানষি আসিলেক। কেনেনা যীশু যে ভাল কাম করির ধরচে, এই নামটা চাইরো পাকে ছড়ি গেইচে। নানান জাগা হাতে, ভাইল্লা মানষি আসিলেক। কোটে হাতে আসিলেক? আসিলেক গালীল আর যিহুদীয়া প্রদেশ হাতে, যিরুশালেম, ইদোম, যর্দন নদীর ওপার থাকি, আর সোর, সীদোন, নানান জাগা হাতে।

৯ ঠাসা-ঠাসি ভিড়ের বাদে যীশু উয়ার চেলালাক কইলেক একখান ছোট নাও ঠিক করি খুবার, মানষির ভিড় যাতে উয়ার দেহার উপরাত না পড়ে।

১০ যীশু মেয়ো রুগীক ভাল করিচে, এই বাদে অসুকিয়া মানষিলা ভিড়ের ঠাসা-ঠাসিতে উয়াক নাড়িবার চেষ্টা করির ধরচে।

১১ যেয়োয় কোনো অপদেবতা ধরা মানষি যীশুক দেখিচে, সেয়োয় এই নাকান হইলেক যে, উয়ায় যীশুর ঠ্যংএর ওটেকোনা পড়িয়া, চিকিরিয়া কবার ধরিলেক, “তুইয়ে ভগবানের বেটা!”

১২ কিন্তুক যীশু সেয়ো কি করিলেক? উয়ায় অপদেবতালোক দাবরেয়া কইলেক, উয়ায় যে ভগবানের বেটা, এই কতাটা যাতে

কাণ্ডোকে না কয়।

১৩ ইয়ার পাছত যীশু পাহাড়ের উপরাত আসিলেক আর উয়ায় উয়ার নিজের মন মতন কতলা মানষিক ডেকে নিলেক, আর উমরা আসিলেক।

১৪-১৫ সেয়া উমারলার মাঝত বারোজনক অধিকার পাওয়া খবরিয়া ঠিক করিলেক, উমরা যেনে যীশুর নগত থাকে, আর অপদেবতা ছাড়েবার ক্ষমতা দিয়া প্রচার করিবার বাদে উমারলাক পেঠেবার পায়।

১৬ উয়ায় যে বারোজনক ঠিক করিলেক, উমারলার নাম হইলেক: শিমোন (যীশু যাক নাম দিলেক পিতর, যার মানে “শিল”);

১৭ সিবদিয়ের দুইটা বেটা যাকব আর যোহন (উমারলার নাম দিলেক বোয়া-নেগিস, যার মানে “মেঘের আওয়াজের বেটা,” কারন উমারলার স্বভাব এই নাকান);

১৮ আন্দ্রিয়, ফিলিপ, বর্থলময়, মথি, থোমাস, আলফেয়ের বেটা যাকব, থদ্দেয়, মৌলবাদী শিমোন;

১৯ আর এক জন আছিলেক ইষ্কোরিয়োটের যুদাস, যায় পাছত যীশুক শত্রুর হাতত দিলেক।

২০ এক দিন যীশু একটা বাড়িত সোন্দাইলেক। সেয়া ওটেকোনা এতলা মানষি জড়ো হইলেক যে, যীশু আর উয়ার চেলালা খাবারে সমায় পাইলেক না।

২১ এই খবরটা যীশুর বাড়ির মানষি শুনির পায়া উয়াক নিয়া যাবার আসিলেক। উমরা মানষিক কবার নাগিলেক যে যীশু বোধ হারা হয় গেইচে।

২২ আরো সেই সমায় যিরুশালেম গঞ্জ থাকি কতলা পন্ডিত আসিয়া উমরা দোষ দিবার নাগিলেক যে, যীশুক অপদেবতার রাজা বেলসবুল-অসুর ধরচে! আর অসুরের ক্ষমতা দিয়া অপদেবতাক খেদায়।

২৩ যীশু সেলা ধর্মগুরুলাক ডেকেয়া গল্পের নাকান করি কইলেক যে, “এইটা কেংকরি হবার পায়? নিজেই অসুর নিজেকেই কি খেদায়?

২৪ কোনো রাজ্য যদি খন্ড-খন্ড ভাগ হয় যায়, সেই রাজ্যটা টিকির না পায়।

২৫ কোনো সংসারত যদি দন-ঝগড়া নাগে, ঝগড়া করি বেগল হয় যায়, তাইলে সেই পরিবারত ভাঙন দেখা দিবেই।

২৬ আর অসুর যদি উয়ার নিজের ক্ষমতার বিরুদ্ধে ভাঙন ধরায়, তায় টিকির পাইবে না। শেষ হয় যাবেই।

২৭ অসুর হয় এক জন শক্তিশালী মানষির নাকান। উয়ার বাড়িত সোন্দেরা উয়াক বান্দি না থোয়া পর্যন্ত কাণ্ডো মাল পত্র নিয়া যাবার পাইবে না। কিন্তুক উয়াক বান্দিয়া মাল পত্র নিয়া যাবার পাইবে।

২৮ মুই তোমারলাক সচাং করি কং, মানষির সউগ পাপ, তামান নিন্দা, ক্ষমা করা হইবে।

২৯ কিন্তুক পবিত্র আত্মার বিরুদ্ধে নিন্দা করিলে, কোনো দিনও ক্ষমা করা হবার নোয়ায়। সেই নিন্দার পাপ চিরকাল ধরি থাকিবে।”

৩০ যীশু এই কতাটা কইলেক কারন ধর্মগুরুলা কবার নাগচে যে উয়াক অপদেবতা ধরচে।

৩১ ইয়ার পাছত যীশুর মাও আর ভাইলা ঐ বাড়ির ওটেকোনা আসিলেক। আর উয়াক ড্যেকেবার বাদে এক জনক পেঠাইলেক।

৩২ সেলো যীশু যেটেকোনা বসিয়া আছে ওটেকোনা মেয়ো মানষি আছিলেক, যীশুর চাইরো পাকে বসিয়া। উমরা যীশুক কইলেক যে, “তোর মাও ভাইলা বায়রাত তোক ড্যেকেবার ধরচে।”

৩৩ সেলো যীশু উমারলাক কইলেক যে, “কায় মোর মাও? কায় মোর ভাইলা?”

৩৪ আর ওইটে যেই মানষিলা বসিয়া আছিলেক, উমারলার চাইরো পাকে দেখিয়া কইলেক যে, “দেখেন! ইমরায় মোর মাও! ইমরায় মোর ভাই!

৩৫ যায় যায় ভগবানের ইচ্ছা পালন করে, উমরায় মোর ভাই, বইনি, মাও।”

৪ যীশু আরো গালীল সাগরের পারত যায়া মানষিলাক শিক্ষা দিবার শুরু করিলেক, আর ওটেকোনা মেয়ো মানষি হইলেক। ভিড়ের বাদে মানষিলাক ডাঙাত খুইয়া যীশু জলের উপরাত একখান নাওয়াত চড়িয়া বসিলেক।

২ ভাইল্লা বিষয়ের উপরাত গল্পের নাকান করি শিক্ষা দিবার নাগিলেক।

৩ “শোন! এক জন চাষা ভুইয়ত বিচন ছিটিবার গেইলেক।

৪ বিচন ছিটাইতে ছিটাইতে কতলা বিচন ঘাটার বগলোত পড়িলেক, আর সেইলা পখি খায়া নিলেক।

৫ কতলা বিচন পড়িলেক শিলবাড়ির ভুইয়ত আর মাটি বেশী নিচত না থাকাতে পচপচ করি গাজেয়া উঠিলেক।

৬ শিপা ভাল করি না হবার বাদে, বেলা উঠিয়া বিচন গছগুলা ঝোমড়ি যায়া মরি গেইলেক বেলার ঝালাত।

৭ আরো কতলা বিচন পড়িলেক কাটা ঝোপের মাঝত, আর কাটা ঝোপ বাড়িয়া ঐলা চিপি ধরিলেক। ঐ গছগুলা বড় হবার পাইলেক না, ফলোনো হইলেক না।

৮ “তার পাছত আরো কতলা বিচন পড়িলেক ভাল ভুইয়ত। ভাল ভুইয়ত যেইলা পড়িচে, সেইলা তো বড় হয় ফসল ফলিলেক। ফসল কাটি আনিয়া দেখিলেক যে কোনো ভুইয়ত হইচে দশ মন,

আর কোনো ভুইয়ত হইচে বিশ মন, আর সগারে থাকি যেইলা  
ভাল ভুই, সেইলাত হইচে তিরিশ মন, যার তুলনা করা যায় না।”

৯ গল্পের শেষত যীশু কইলেক, “যদি কাণ্ডোরো শুনিবার মন  
আছে, তাইলে উমরা শুনুক!”

১০ ভিড় কমিয়া যাওয়ার পাছত কয়জন মানষি আর বারো জন  
চেলা যীশুক পুছিলেক, “গল্পটার মানে কি?”

১১ যীশু উমারলাক উত্তর দিলেক, “ভগবানের রাজ্যের নুকি  
থাকা বিষয়লা তোমারলাক জানে দেওয়া হইচে। কিন্তুক অইন্য  
মানষিলাক এই নাকান গল্প দিয়া কওয়া হয়।

১২ যাতে, ‘উমরা দেখিবে কিন্তুক ভাব বুঝির পাইবে না, উমরা  
শুনিবে কিন্তুক মানে বুঝির পাইবে না। ইয়াতে উমরা ভগবানের  
পাকে ঘুরি আসির না পায় আর উমারলার পাপ ক্ষমা করা যায়  
না।”

১৩ ইয়ার পাছত যীশু উমারলাক পুছিলেক যে, “তোমরালা এই  
গল্পটার মানে বুঝিচেন কি না? না বুঝিলে অইন্য গল্পের মানে  
কেংকরি বুঝির পাইবেন?

১৪ বিচন হইলেক ভগবানের বাইক্য। আর বিচন ছিটাইয়াটা  
হইলেক ভগবানের বাইক্য প্রচার করাইয়া।

১৫ কতলা বিচন ঘাটার বগলত পড়িচে। ইয়ার মানে হইলেক  
সেইলা মানষি যেইলার ভিতরাত ভগবানের বাইক্য গাড়িয়া

দেওয়া যায়। কিন্তুক শোনার নগতে নগতে শয়তান-অসুরটা উমারলার অন্তর হাতে সেই বাইক্য উকুরি ফেঁলায়।

১৬ আর কতলা বিচন শিলা ভুইয়ত পড়িচে। এই শিলা ভুইয়ের মানে যায় বাইক্য পায়া আনন্দের নগত বাইক্যটা মানি নিলেক।

১৭ কিন্তুক উয়ার শিপা মাটির বেশী তলাত না যায়া অল্প দিন থির থাকে। বাইক্য মানি নিবার বাদে নানা নাকান দুঃখ-কষ্ট আর নাঞ্চনা আইসে। ইয়াতে উয়ায় পচপচে ভগবানের প্রতি বিশ্বাস হারে ফেঁলায়।

১৮ আর কতলা বিচন কাটাঝোপত পড়িচে। কাটাঝোপত পড়ি থাকা বিচনের মানে হইলেক যায় বাইক্যটা শুনিচে।

১৯ কিন্তুক সংসারের চিন্তা-ভাবনা, টাকা-পাইসার মায়ামোহ, নানা নাকান হাবিলাস মনত ধরিয়া ঐলা কাটা ঝোপের নাকান করি বিচন-গছক চিপিয়া ধরে। তার বাদে বিচনের গছ বাড়িয়া উঠিবার না পায়।

২০ শেষত আরো কিছু বিচন ভাল ভুইয়ত পড়িচে। তার মানে যায় যায় বাইক্য পায়া মানি নেয়। মানি নিয়া কাণ্ডো দেয় ভাইল্লা ফল, আর কাণ্ডো দেয় আরো ভাইল্লা। আর কাণ্ডো দেয় এত ফল যে তুলনা করা যায় না, সগারে চাইতেও ভাল!”

২১ যীশু আরো কইলেক যে, “কাণ্ডো কি গচা জ্বলেয়া ডেলি দিয়া ঢাকিয়া থোয়? বা চাংরার তলাত থোয়? গচা তো ঠগার উপরাত খুবার নাগে। ঠগার উপরাত জ্বলায় কি না?



২২ কোনো জিনিস যদি নুকিয়া খোয়া হয়, তাইলে সেইটা বির করির বাদে। আর কোনো জিনিস যদি ঢাকা দিয়া খোয়া হয়, সেইটা ঢাকা উদলিবার বাদে।

২৩ যদি কাঙোরো শুনিবার মন আছে, তাইলে উমরা শুনুক!

২৪ ভাল করি শোন এই কতাটা! তোমার যেই নাকান করি বুঝিবার মন আছে, ঐ নাকান করি বুঝি দেওয়া হইবে। বেশী ভাল করি বুঝি দেওয়া হইবে।

২৫ যার বুঝিবার মন আছে, উয়াক আরো বুঝির দিবার নাগিবে, কিন্তুক যার বুঝিবার মন নাই, উয়ার মন থাকি সউগলা কাড়ি-কুড়ি নেওয়া হইবে।”

২৬ যীশু উমারলাক কইলেক যে, “ভগবানের রাজ্য এই নাকান। একটা মানষি ভুইয়ত কিছু বিচন ছিটাইলেক।

২৭ বিচন ছিটি আসিয়া নিন গেইলেক। নিন থাকি উঠি আরো নিন গেইলেক। এংকরি দিন-রাতি কাটাইলেক। আর বিচন নিজে নিজে গাজেয়া উঠিলেক। কিন্তুক মানষিটা জানিলেক না যে, বিচন গছ কেংকরি বড় হইলেক।

২৮ জমি নিজে নিজেই চারা জন্মেয়া সেই চারা-গছ বড় হয়। শিষ হইলেক। শিষ পুরাট হয়। পাকি গেইলেক।

২৯ আর মানষিটা সেলো কি করিলেক? কাচি নিয়া ফসল কাটির গেইলেক। কেনোনা ফসল পাকি যায়। কাটির সমায় হয়। গেইচে।”

৩০ যীশু উমারলাক পুছিলেক যে, “তোমারলাক মুই কি দিয়া ভগবানের রাজ্যের তুলনা করিম? কিসের গল্প দিয়া মুই বুঝাইম?

৩১ তাইলে মুই একটা সইষ্যা দানার গল্প কইম। ভগবানের রাজ্য হইলেক এই নাকান, একটা ছোট সইষ্যা দানার নাকান। যতলা শাকের বিচি আছে, সগারে চায়া এইটা ছোট।

৩২ কিন্তুক এইটা বুনিয়া যেলা বড় হয়, সেলা অইন্য শাকের চাইতে বড় গছ হয়। আর দেখা যায় কি, ইয়ার ঠাইলত পখিও ভাসা বান্দিয়া রবার পায়।”

৩৩ ভিড়ের মানষিলা যেংকরি বুঝির পায়, অংকরি মেলা গল্প দিয়া যীশু উমারলাক ভগবানের বাইক্য শুনাইলেক।

৩৪ ভিড়ত উয়ায় যত বার যত নাকান বাইক্য কইচে, গল্প ছাড়া কিছুই কয় নাই। কিন্তুক গোপনে নিজের চেলালাক তামান কতালা পই-পই করি বুঝিয়া দিলেক।

৩৫ যীশু সেই দিন সইন্ধার সমায় উয়ার চেলালাক কইলেক যে, “চলো! হামরা সাগরের ঐ পারত যাই।”

৩৬ তায় চেলালা মানষিলাক ওটেকোনা খুইয়া যীশু যেই নাওখানত বসিয়া আছিলেক সেইখানত উঠিয়া রওনা দিলেক। উমারলার নগত আরো অইন্য নাও যাবার ধরিলেক।

৩৭ আর খানেক বাদে খুব হুরকা উঠিলেক। হুরকাতে সাগরের বড় বড় ঢেউ নাও-এর উপরাত আছড়ে পড়ির নাগিলেক। এদি কোনা নাওখান জলে ভত্তি হয় যাবার নাগিলেক।

৩৮ যীশু কিন্তুক নাও-এর পাছপাকে একটা বালিশত সিতান দিয়া নিন্দোত আছিলেক। আর এই হরকা দেখি হাতাস খায়া চেলালা যীশুক ডেকে তুলিয়া কইলেক, “ও গুরু! হামরা মরি যাবার ধরচি! তোমার কি কোনো চিন্তা নাই?”

৩৯ সেলো যীশু উঠিয়া হরকা আর সাগরক দাবরেয়া কইলেক যে, “থাম! ঝিত হঃ!” আর সেলোয় সেলোয় হরকা থামিয়া, নিবুম হয় গেইলেক।

৪০ উয়ায় চেলালাক কইলেক, “কি রে! তোমরালা এত ভয়পাদুরা কেনে? এলাও কি তোমারলার বিশ্বাস হয় নাই?”

৪১ চেলালা বেশী করি ভয় খায়া এক জন আর এক জনক কবার নাগিলেক, “ইয়ায় কায়? আরে! বাতাস, সাগরও ইয়ার কতা মানিয়া চলে!”

৫ গালীল সাগরের ঐ পারত যায়া, উমরা গেরাসেনী নামের দেশত পৌছি গেইলেক।

২ যীশু নাও হাতে নামতে কালেই একটা অপদেবতা ধরা মানষি সমাধি বাড়ি থাকি বিরিয়া যীশুর-টে আসিলেক।

৩ উয়ায় সমাধি বাড়ির ওটেকোনা থাকে, আর কোনো কিছু দিয়া উয়াক বান্দি থোয়া যায় না। শিকোল দিয়াও কাণ্ডোয় উয়াক বান্দিবার পায় না।

৪ উয়াক মেলা বার শিকোল আর বেড়ি নাগেয়া বান্দিয়া খুবার ধরিলেক। কিন্তুক উয়ায় শিকোল আর বেড়ি ছিড়িয়া চুরমার করিলেক। কাণ্ডেয় উয়াক সামাল দিবার পাইলেক না।

৫ উয়ায় দিন রাতি পাহাড় হাতে পাহাড়, সমাধি বাড়ি সমাধি বাড়ি, চিকরিয়া বেড়ায়। আর উয়ায় নিজের দেহাত নিজে চোকা শিল দিয়া কাটাছিড়া করিবার ধরিলেক।

৬ উয়ায় দূর থাকি যীশুক দেখিয়া দৌড়ি আসিয়া, যীশুর ঠেংয়ত হাংকুড়া পাড়ি ভক্তি দিবার নাগিলেক।

৭-৮ যীশু অপদেবতাটাক কইলেক, “মানষিটাক ছাড়ি দিয়া চলি যা।” অপদেবতাটা কিন্তুক জোরে জোরে চিকিরিয়া কইলেক, “হ্যে বাহে! মহান ভগবানের বেটা যীশু! মোর নগত তোর দরকার কিসের? মুই ভিক্ষা চাং, তোমরা ভগবানের নামে কিরা কাটি কন, মোক জ্বালা-যাতনা দিবেন না!”

৯ যীশু উয়াক পুছিলেক, “তোর নাম কি?” উয়ায় উত্তর দিলেক, “শতপতি। কেনেনা, এই মানষিটার ভিতরাত হামরা হাজার হাজার অপদেবতা আছি।”

১০ অপদেবতালা বারে-বারে কাউলাকাটি করির নাগিলেক, যীশু যাতে উমারলাক ঐ দেশ থাকি খেয়েদেয়া না দেয়।

১১ ঐ সমায় পাহাড়ের বগলের জাগাখানত একটা শুয়োরের বড় পাল চরেবার ধরিলেক।

১২ অপদেবতালা কাউলিয়া যীশুক কইলেক যে, “হামারলাক ঐ শুয়োরলার ভিতিরাত সোন্দেবার পেঠেয়া দেও।”

১৩ যীশু উমারলাক সোন্দের দিবার রাজি হইতে কালেই, অপদেবতালা বিরিয়া শুয়োরলার ভিতিরাত সোন্দাইলেক। ঐ বাদে সউগ শুয়োরে পাহাড় হাতে দৌড়ি নামিয়া সাগরত ডুবিয়া মরিলেক। ঐ নাকান করি কম করি দুই হাজার শুয়োর মরিলেক।

১৪ যায় যায় শুয়োর চরেবার ধরচে, উমরা সেলো দৌড়ি পালেয়া যায়। বগলা-বগলি গেরামলাত আর গঞ্জের মানষিলাক খবর দিলেক। মানষিলা খবর পায়া কি ঘটনা হইচে, উমরা দেখিবার বাদে আসিলেক।

১৫ যীশুর-টে আসিয়া দেখিলেক যেই মানষিটাক অপদেবতার শতপতি ধরছিলেক, উয়ার মাথা ভাল হয়, কাপড় পিন্দিয়া, ওটেকোনা বসিয়া আছে। এই দেখিয়া উমরা সগায় ভয় খাইলেক।

১৬ যায় যায় এই ঘটনাটা দেখিচে উমরা অইন্য মানষিলাক এইটা কবার ধরচে।

১৭ ভিড়ের মানষিলা যীশুক কাউলা-কাউলি করিলেক যে, “তোমরা হামার দেশ ছাড়িয়া অইন্য জাগা চলি যাও।”

১৮ যীশু নাওযোত উঠিতে কালেই ঐ মানষিটা যাক অপদেবতা ধরছিলেক, উয়ায় যীশুর নগত যাবার কাউলা-কাউলি করিলেক।

১৯ কিন্তুক যীশু উয়াক যাবার না দিয়া, এই কয়া বিদায় করিলেক, “তুই তোর বাড়ি ফিরি যা। পরম প্রভু তোর বাদে কত বড় কাম করিচে, তোর উপরাত কত দয়া করিচে, এইলা তোর বাড়ির মানষিক যায়া ক।”

২০ মানষিটা সেলো চলি গেইলেক, আর যীশু উয়ার বাদে কত বড় কাম করিচে, ঐ কতা ওটেকার ডিকাপলি এলাকাত কয়া বেড়েবার নাগিলেক। এই শুনিয়া সউগ মানষি অচানক হইলেক।

২১ তার পাছত যীশু সাগরের ঐ পার হাতে নাওযোত করি এই পারত আসিলেক। সেলোয় যীশুর ওটেকোনা মেলা মানষির ভিড় হইলেক।

২২ সেই সমায় যায়ীর নামের এক জন উপাসনা ঘরের দেওয়ানী ওটেকোনা আসিয়া যীশুক দেখিয়া উয়ার ঠেংয়ত উবুরি হয় পড়িলেক।

২৩ উয়ায় কাউলা-কাউলি করি কইলেক, “হে দয়াল বাবা! মোর বেটিটা মরি যাবার নাকান হইচে! তোমরা আইসো, উয়ার দেহাত হাত দিয়া নাড়িয়া যাও, ইয়াতে উয়ায় বাঁচি যাবে।”

২৪ সেলো যীশু উয়ার নগত চলি গেইলেক, আর মেলা মানষি চাইরো পাকে ভিড় করি উমারলার নগত যাবার ধরিলেক।

২৫ ভিড়ের মাঝত একটা বেটিছাওয়া আছিলেক, যার বারো বছর হাতে অক্লান্ত শ্রাব অসুখ হইছিলেক।

২৬ মেয়ো বৈদ্য কবিরাজের-টে গেইচে কিন্তুক উমারলাক দিয়া জ্বালা-যাতনা আরো বাড়ি গেইচে। বৈদ্য কবিরাজক টাকা দিতে দিতে ফতুর হয়্যা গেইচে। কোনো উপকার তো হয় নাই। আরো কাহিল হয়্যা পড়িচে।

২৭ যীশুর কতা শুনিয়া উয়ায় ভিড়ের মইদ্বো হাতে যীশুর পাছপাকে আসিয়া চুপ করি কাপড়খান নাড়িলেক।

২৮ উয়ায় মনে মনে চিন্তা ভাবনা করিচে, “যদি মুই উয়ার কাপড়খানও নাড়ির পাং, তাইলে মুই ভাল হয়্যা যাইম।”

২৯ যীশুর কাপড়খান নাড়িলেক সেলোয় সেলোয় উয়ার অক্স্রাব বন্ধ হয়্যা গেইলেক। উয়ায় নিজে নিজে বুঝিবার পাইলেক যে, উয়ার অসুখ ভাল হয়্যা গেইচে।

৩০ যীশু সেলোয় সেলোয় টের পাইলেক যে, উয়ার অসুকিয়া মানষিক ভাল করার যে মহাশক্তি আছিলেক, ঐ মহাশক্তি উয়ার ভিত্তিরা থাকি বিরি গেইচে। আর ভিড়ের চাইরো পাকে দেখিয়া পুছির নাগিলেক, “মোর কাপড় কায় নাড়িলেক?”

৩১ উয়ার চেলালা উত্তর দিলেক যে, “এত ভিড়ের মানষি তোমাক ঠেলা ঠেলি করির ধরচে, চাইরো পাক থাকি। তোমরা তো দেখির ধরচেন। তাণ্ডো তোমরা পোছেন, ‘মোর কাপড় কায় নাড়িলেক?’”

৩২ কিন্তুক এই কামটা কায় করিচে, জানিবার বাদে যীশু চাইরো পাকে দেখির নাগিলেক।

৩৩ সেলো বেটিছাওয়াটা উয়ার জীবনত কি হইচে, এইটা বুঝির পায়া ভয়ে কাপতে কাপতে যীশুর ঠেংয়ত পড়িলেক। আর সউগ ঘটনা কবার নাগিলেক।

৩৪ যীশু উয়াক কইলেক, “মাই, তুই বিশ্বাস করিচিস বুলিয়া ভাল হচিস। যা, শান্তিতে চলিয়া যা। তোর আর এই নাকান কষ্ট না হউক।”

৩৫ যীশু এই কতা কইতে কালেই যায়ীরের ঘর থাকি কয়জন মানষি আসিয়া যায়ীরক কইলেক, “তোর বেটিটা মরিয়া গেইচে। গুরুদেবক আর কষ্ট না দেন।”

৩৬ কিন্তুক ঐলা মানষির কতা শুনিয়া, যীশু যায়ীরক কইলেক, “ভয় না খাইস, মোক বিশ্বাস করেক খালি।”

৩৭ যীশু সেলো ভিড়ের মানষিলাক যাবার না দিয়া, খালি পিতর, যাকব, আর যাকবের ভাই যোহনক নগত নিয়া গেইলেক।

৩৮ ইয়ার পাছত যায়ীরের বাড়িত আসিয়া দেখিলেক ওটেকোনা খুব কাউকাসাং নাগচে। মানষিলা শোকের কান্দন কান্দিবার নাগচে।

৩৯ যীশু বাড়ির ভিতরাত যায়া মানষিলাক কইলেক, “কিসের এত কাউকাসাং? কিসের এত কান্দন? ছাওয়াটা তো মরে নাই, নিন্দোত আছে।”

৪০ এই কতা শুনিয়া মানষিলা হাসা-হাসি করির নাগিলেক। সেলো যীশু সউগ মানষিলাক ঘরের বায়রাত যাবার কইলেক।



খালি চেংড়িটার মাও-বাপ আর চেলা তিনজনক নিয়া যেই ঘরত মরা চেংড়িটা আছে ওটেকোনা গেইলেক।

৪১ চেংড়িটার হাত ধরি যীশু নিজের ভাষাতে কইলেক, “টালিথা কুম,” যার মানে, “মাই, তোক কবার ধরচুং, ওঠেক!”

৪২ আর সেলায় চেংড়িটা উঠিয়া হাটি বেরেবার ধরিলেক। (চেংড়িটার বয়স আছিলেক বারো বছর।) ইয়াতে উমরা দারুন অচানক হয় গেইলেক।

৪৩ এই ঘটনা কাণ্ডোকে না জানেবার বাদে, উমরলাক কড়াকড়ি হুকুম দিলেক। আরো ছাওয়াটাক কোনো কিছু খাবার দিবার কইলেক।

৬ ইয়ার পাছত যীশু ঐ জাগাখান ছাড়িয়া নিজের বাপ মাওয়ের জাগাত নাসারত গেরামত গেইলেক। উয়ার নগত চেলালাও গেইলেক।

২ যিহুদী নিয়মের জিরানের দিনে উপাসনা ঘরত যায় যীশু শিক্ষা দিবার ধরিলেক। আর ওটেকোনা মেলা মানষি এই শুনিয়া সগায় অচানক হইলেক। উমরা কবার ধরিলেক যে, “এই মানষিটা আরো এইলা গেয়ান কোটে হাতে পাইলেক? কেংকরি গেয়ানী হইলেক? আর কেংকরি মহাশক্তির কাম করির ধরচে?” আরো কবার ধরিলেক,

৩ “ইয়ায় তো খুটার মিস্ত্রি! মরিয়মের বেটা! যাকব, যোষেফ, যুদাস আর শিমোনের ভাই, না কি? উয়ার বইনিলা হামারলার এটেকোনা আছে, কি নাই?” এই নাকান করি যীশুক নিয়া মানষিলা নানা নাকান কওয়া-কয়ি করিয়া, মনত সন্দেহ হবার নাগিলেক। এই বাদে উমরা ব্যেজার হয়। উয়াক বিশ্বাস করিলেক না।

৪ সেয়া যীশু উমারলাক কইলেক, “নিজের গেরাম, নিজের সাগাই-সোদর, নিজের বাড়ি ছাড়া সউগ জাগাতে ভাববাদী সন্মান পায়।”

৫ ইয়াতে উয়ায় কয়েক জন অসুকিয়া মানষির মাথাত হাত থুইয়া ভাল করা ছাড়া মহাশক্তির কাম করির পাইলেক না।

৬ কেনেনা মানষিলা উয়াক বিশ্বাস করিলেক না। এই বাদে যীশু অচানক হইলেক। ইয়ার পাছত যীশু গেরামে গেরামে যায়া মানষিলাক শিক্ষা দিবার নাগিলেক।

৭ পাছোত উয়ার বারো জন চেলাক উয়ায় ডেকোইলেক, আর উমারলাক কইলেক, “তোমরা দুই জন দুই জন করিয়া প্রচার করিবার বাদে যাও।” আরো অপদেবতা যাতে উমরা ছাড়েবার পায় সেই ক্ষমতা দিলেক।

৮ উমারলাক হুকুম দিলেক, “যাত্রার সমায় তোমরা একটা নাটি ছাড়া আর কিছুই না নেন।” উমারলাক রুটি, ঝোলা, টাকা-পাইসা নিবার না দিলেক।

৯ জুতা পিন্দিবার দিলেক, কিন্তুক একটার বেশী জামা পিন্দিবার না দিলেক।

১০ উয়ায় আরো কইলেক, “তোমরা যেই বাড়িত সোন্দাবেন, ঐ গেরাম না ছাড়া পর্যন্ত ঐ বাড়িতে থাকিবেন।

১১ কোনো জাগার মানষি যদি তোমারলাক গ্রহন না করে, কিবা তোমারলার কতা না শুনে, তাইলে তোমরা যাবার সমায় ঠ্যংএর ধূলা ঝাড়িয়া ফেলে যাবেন। আর এই ধূলা উমারলাক জানে দিবে যে, উমরলা ভগবানের রাজ্যের বায়রাত আছে।”

১২ সেলো চেলালা প্রচার করির নাগিলেক আর মানষিলাক কইলেক, “তোমরা পাপের ঘাটা থাকি মন ফিরান।”

১৩ উমরা মেয়ো অপদেবতা খেদাইলেক। মেয়ো অসুকিয়া মানষিক মাখাত তেল দিয়া উমারলাক ভাল করিলেক।

১৪ যীশুর নাম চাইরো পাকে ছড়িয়া পড়িলেক বুলিয়া, হেরোদ রাজা যীশুর কতা শুনির পাইলেক। কোনো কোনো মানষি যীশুর সমন্ধে কবার নাগচে যে, “ইয়ায় দীক্ষাদাতা যোহন, যায় মরি গেইচে আরো বত্তি উঠিচে। এই বাদে উয়ায় মহাশক্তির কাম করির ধরচে।”

১৫ কাণ্ডো কাণ্ডো কবার নাগিলেক, “উয়ায় সেই পুরান দিনের ভগবানের ভাববাদী এলিয়া।” আরো কাণ্ডো কাণ্ডো কবার নাগিলেক, “পুরানা ভাববাদীলার নাকান উয়ায় এক জন।”

১৬ আর এই কতা শুনিয়া হেরোদ রাজা কইলেক যে, “না, উয়ায় হইলেক যোহন। মুই যার মাথা কাটি ফ্যেলেবার হুকুম দিচিলুং, উয়ায় বত্তি উঠিচে।”

১৭-২০ এই ঘটনা হইলেক এই নাকান। ইয়ার আগত হেরোদ উয়ার ভাই ফিলিপের মাইয়া হেরোদিয়াক নিকা করিলেক। ভাববাদী যোহন কিন্তুক বারে বারে হেরোদ রাজাক কইচে যে, “তোর ভাইয়ের মাইয়াক তোর নিকা করা ঠিক হয় নাই।” আর এই কতা কবার বাদে হেরোদিয়া যোহনের উপর তুষের অগুনের নাকান রাগ হইলেক। হেরোদিয়ার বাদে রাজাটা মানষিক পেঠেয়া যোহনক হাজোতোত ধরিয়া থুইলেক। হেরোদিয়া যোহনক মারি ফ্যেলের চাইচে, কিন্তুক পায় নাই। কেনেনা রাজাটা যোহনক ভয় খাইচে। যোহন এমন এক জন, ভগবানের ভক্ত আর পবিত্র মানষি আছিলেক। সেইটা জানিয়া রাজাটা যোহনক বিপদের হাত থাকি রক্ষা করিলেক। যোহনের কতা শুনি, মনে মনে অস্থির হইলেক। কিন্তুক তাণ্ডা শুনিবার ইচ্ছা আছিলেক।

২১-২২ এক দিন শেষত হেরোদিয়া একটা সুযোগ পাইলেক। হেরোদ নিজের জন্মদিনত বড় বড় মানষিলা ডাকিয়া উমারলার বাদে একটা ভোজ দিলেক। আর ওটেকোনা হেরোদিয়ার বেটি নাচন দেখাইলেক। ঐ নাচোত মেলা বড় বড় মানষি আসছিলেক যেমন, রাজকর্মচারী, সেনাপতি আর গালীল দেশের প্রধান প্রধান মানষিলা। উমরা হেরোদিয়ার বেটির নাচন দেখিয়া খুব খুশি হইলেক। সেয়া সগারে আগত হেরোদ রাজা চেংড়িটাক

কইলেক, “তোৰ নাচন দেখিয়া মুই খুব খুশি হইচোং। তুই কি চাইস?

২৩ মুই কিৰা কাটি কৰাৰ ধৰচুং, যা চাইস তায় দিম। মোৰ ৰাজ্যেৰ অন্ধেকখান যদি চাইস তাঙো দিম।”

২৪ সেলো হেরোদিয়াৰ বেটি যায়া উয়াৰ মাওয়োক পুছিলেক যে, “মা, পুরস্কাৰ হিসাবে কি চাইম?” হেরোদিয়া কইলেক যে, “তুই দীক্ষাদাতা যোহনের মাথাটা চাবু।”

২৫ সেলো উয়ায় হেরোদ ৰাজাৰ ওটেকোনা টপকৰি যায়া কইলেক যে, “একখান থালাত মোক দীক্ষাদাতা যোহনের মাথাটা এলায় দেও।”

২৬ কিন্তুক, এই কতাটা শুনিয়া হেরোদ ৰাজা মনে মনে খুব দুঃখ পাইলেক। আৰ এই ভোজের সময় মানষিৰ আগত কিৰা কৰি কইচে বুলিয়া চেংড়িটাক ঘুরিয়া দিবাৰ পাইলেক না।

২৭-২৮ সেলোয় সেলোয় যোহনের মাথা কাটি আনিবাৰ বাদে, জল্লাদক হুকুম দিলেক। জল্লাদ কি কৰিলেক? হাজোত খানাত যায়া যোহনের মাথাটা কাটি আনিয়া একখান থালাত কৰি চেংড়িটাৰ হাতোত মাথাটা পুরস্কাৰ হিসাবে তুলি দিলেক। আৰ চেংড়িটা নিয়া উয়াৰ মাওয়োক দিলেক।

২৯ এই খবৰটা পয়া যোহনের চেলালা আসিয়া যোহনের দেহাটা সমাধিত নিয়া থুইলেক।

৩০ যীশু যে বারো জন অধিকার পাওয়া খবরিয়াক পেঠাইচে, উমরা ঘুরি আসিলেক। আর ওটেকোনা কি কি করিচে, কি কি শিক্ষা দিলেক, সউগ আসিয়া যীশুক কইলেক।

৩১ ঐ সমায় মেয়ো মানষি ওটেকোনা আইসা যাওয়া করির ধরিলেক, এই বাদে যীশু আর উয়ার চেলালা খাবার সমায় পাইলেক না। যীশু উমারলাক কইলেক, “তোমরা আইসো। মোর নগত কোনো একখান নিরিবিলি জাগাত, খানেক জিরাই।”

৩২ আর উমরা একটা নাও নিয়া নিধুয়া পাথারত গেইলেক।

৩৩ কিন্তুক উমারলাক যাবার দেখিয়া মেয়ো মানষি চিনির পাইলেক। আর বগলা-বগলি গেরামের মানষিলা দৌড়ি যায়া উমারলার আগত পৌছিলেক।

৩৪ যীশু নাও হাতে নামিয়া ভাইল্লা মানষিক দেখির পাইলেক। আর ঐ মানষিলাক দেখিয়া যীশুর খুব মায়া হইলেক। কেনেনা উয়ায় মনে করিলেক যে উমারলার অবস্থা আখোয়াল ছাড়া ভেড়ার নাকান হইচে। এই বাদে যীশু উমারলাক নানা নাকান বিষয় শিক্ষা দিবার নাগিলেক।

৩৫ সেই দিন সইন্কা বেলা চেলালা আসিয়া যীশুক কইলেক, “জাগাখান নিরিবিলি, বেলাও একেবারে ডুবি গেইচে।

৩৬ মানষিলাক বিদায় করি দেও, যাতে উমরা বগলা-বগলি গেরামলাত যায়া খাবার কিনিবার পায়।”

৩৭ যীশু কইলেক, “তোমরায় উমারলাক খাবার দেও।” আর চেলালা কইলেক, “এত মানষিক খাবার দিলে আট মাসের বেতনের টাকা নাগিবে। এত টাকা হামরা কোটে পামো?”

৩৮ যীশু উমারলাক পুছিলেক, “তোমার-টে কয়খান রুটি আছে? যায়া দেখা।” চেলালা যায়া দেখি আসিলেক, যীশুক কইলেক যে, “পাঁচখান রুটি আর দুইটা মাছ আছে।”

৩৯ আর যীশু উমারলাক কইলেক যে, “তামান মানষিলাক দলে দলে বসেয়া দেও, এই সবুজ ঘাসের উপরাত।”

৪০ মানষিলা একশ একশ, পঞ্চাশ পঞ্চাশ জন করিয়া সারি সারি বসিয়া গেইলেক।

৪১ যীশু সেয়া ঐ পাঁচখান রুটি আর দুইটা মাছ হাতত ধরিয়া, স্বর্গের ভিত্তি চায়া দেখিলেক। ভগবানক ধন্যবাদ দিয়া, মানষিলাক খাবার দিবার বাদে, রুটি ছিড়িয়া চেলালার হাতত দিতেই আছে। ঐ দুইটা মাছও ভাগ করিয়া সগাকে দিলেক।

৪২ উমরা সগায় পেট ভরেয়া খাইলেক।

৪৩ ইয়ার পাছত যেইলা খাবার বাঁচিলেক, চেলালা সেইলা বারোটা ডেলি ভরতি করি থুইলেক।

৪৪ যায় যায় খাইচে, উমারলার মইন্ধে বেটাছাওয়ার সংখ্যা পাঁচ হাজার আছিলেক।

৪৫ ইয়ার পাছত যীশু চেলালাক আদেশ দিলেক যে, “তোমরা এলায় নাওযোত করিয়া বৈৎসৈদা গেরামত চলিয়া যাও।” আর উয়ায় ভিডের মানষিলাক বিদায় দিবার নাগিলেক।

৪৬ বিদায়ের পাছত প্রার্থনা করিবার বাদে উয়ায় পাহাড়ত গেইলেক।

৪৭ যেলা সইন্কা হইলেক সেলা চেলালা সাগরের মাঝত নাওখানত আছিলেক, আর যীশু একলায় ডাঙত আছিলেক।

৪৮ যীশু দেখিলেক, এই চেলালা খুব কষ্ট করিয়া নাও-এর হাল বয়েবার ধরচে। কেনেনা বাতাস নাও-এর উল্টা পাকে আসিবার ধরচে। পেরায় রাতির শেষ হইচে, এই সমায় যীশু কি করিলেক? জলের উপর দিয়া হাটিয়া চেলালার ওটেকোনা আসিলেক আর উমারলাক থুইয়া আগেয়া যাবার চাইলেক।

৪৯-৫০ কিন্তুক এই দেখিয়া চেলালা ভূত মনে করিয়া ভয়ে চিকিরিয়া উঠিলেক। সগায় ভয় খাইলেক। সেলায় সেলায় যীশু উমারলাক কতা কইলেক, “মুই আছং, তোমরা ভয় করেন না, সাহস করো।”

৫১ যীশু চেলালার নাওখানত উঠিতে কালেই বাতাস থামি গেইলেক। আর এই দেখিয়া চেলালা খুব অচানক হয় গেইলেক।

৫২ উমরা অচানক হইলেক কেনে? কারন, যদিও উমরা সেই আগের অচানক রুটি খাবার ব্যাপারটা দেখিচে, তাণ্ডো উমরা



বোঝে নাই যে যীশু কায়। সেলোও উমারলার মন কঠুর  
আছিলেক।

৫৩ যীশু আর উয়ার চেলালা সাগর পার হয় গিনেষরৎ নামের  
এলাকাত যেলা আসিলেক, নাওখান ওটেকোনা বান্দিলেক।

৫৪ উমরা নাওখান হাতে নামতে নামতেই, মানষিলা যীশুক  
চিনির পাইলেক।

৫৫ মানষিলা ঐ এলাকার মইন্ধোত দৌড়া দৌড়ি করির নাগিলেক  
যাতে যীশু যেটেকোনা আছে ওটেকোনা দাগিলাত করিয়া রুগী  
মানষিলাক উবিয়া আনিবার পায়।

৫৬ গেরামত, গঞ্জত, পাড়াত যেটেকোনায় যাবার ধরিলেক,  
মানষিলা রুগীক বাজারত আনিয়া জড়ো করিবার নাগিলেক।  
আর উমরা যীশুক কাউলা-কাউলি করি কবার নাগিলেক যেনে  
রুগীলা উয়ার গিলাপের আচলের কিনারটাও নাড়িবার পায়। যায়  
এই গিলাপের আচলের কিনারটা নাড়িলেক, উমরা সগায় ভাল  
হয়া গেইলেক।

৭ এক দিন কয়েক জন ফরীশী দলের পন্ডিত আর অইন্য  
পন্ডিতলা যিরুশালেম হাতে যীশুর ঐটে আসিয়া একটে হইলেক।

২ আর উমরা দেখিলেক যীশুর চেলালার মাঝত কয়েক জন  
নিয়ম মতন হাত না ধুইয়া ছুয়া হাতত খাবার বসিচে।

৩ (ফরীশীলা আর সউগ যিহুদী মানষিলা তিনপুরানি দিনের ধর্মগুরুলার নিয়ম মানিয়া আসির ধরচে। সেই নিয়ম এই নাকান, উমরা ভালকরি হাত না ধুইয়া খায় না।

৪ এমন কি বাজার থাকি আসিয়াও হাত ঠেং না ধুইয়া উমরা খাবার খায় না। এই নাকান উমারলার আরো ম্যেলা নিয়ম আছে, যেমন গিলাস, ঘটি-বাটি, খুরি ধুইয়া শুদ্ধি করে।)

৫ এই বাদে ফরীশীলা আর পন্ডিতলা যীশুক পুছিলেক যে, “তোমার চেলালা পুরানি দিনের ধর্মগুরুলার নিয়ম নীতি, সেইলা মানে না কেনে? উমরা তো হাত না ধুইয়া ছুয়া হাতে খাবার খায়।”

৬ যীশু উমারলাক উত্তর দিলেক যে, “তোমরালা ভন্ড! ঐ পুরান দিনের ভাববাদী যিশাইয় তোমারলার সমন্ধে শাস্ত্রত ঠিকেই নেখিচে। উয়ার বইয়ত ভগবান এই নাকান কইচে যে, ‘এই মানষিলা মুখতে খালি মোর সন্মান করির নাগচে, কিন্তুক উমারলার অন্তরের টান মোর এদি নাই।

৭ উমরা ফাকের মোর গুণগান গায়, উমরা মানষির বানা নিয়ম নীতিলা ভগবানের নিয়ম কয়া শিক্ষা দেয়।’

৮ “আসলে তোমরা ভগবানক মানেন না, তোমরা ভগবানের আদেশ ছাড়িয়া মানষির বানা নিয়ম নীতি মানিবার ধরচেন।”

৯ যীশু আরো কইলেক, “তোমরা এমনি চালাক হইচেন! নিজের বানা নিয়ম নীতি টেকেবার বাদে তোমরালা ভগবানের আদেশ

ছাড়িলেন।

১০ যেই নাকান, মহাপুরুষ মোশি কইচে, ‘মাও বাপক তোমরা সন্মান করো,’ আর, ‘কাণ্ডো নিজের মাও বাপক শাও দিলে, উয়াক মারি ফ্যেলান।’

১১ কিন্তুক তোমরা ফরীশীলা মাও বাপক সেবা না করির মানষিলাক বুদ্ধি দিবার নাগচেন। যাতে করি উমরা মাও বাপক কবে, ‘মুই তোমাক সাহায্য করির না পাং। যেইটা তোমারলার সাহায্য করির বাদে আছিলেক, সেইটা মুই ভগবানক গতে দিলুং।’

১২ হে ফরীশীলা! মানষি যাতে উয়ার গরীব মাও বাপের সাহায্য করির পায়, এই কামটা তোমরালা করির দেন না।

১৩ ইয়াতে তোমারলার নিজের নিয়মে চলিয়া ভগবানের বাইক্য বাতিল করিচেন। আর এই নাকান মেয়ো বেয়া কাম করির ধরচেন।”

১৪ ইয়ার পাছত যীশু ভিড়ের মানষিলাক ডেকেয়া কইলেক, “তোমরা সউগ মানষিলা মোর কতা শুনো আর বোঝো!

১৫-১৬ বাইরা হাতে যেইলা জিনিস দেহার ভিতিরাত যায়, সেইলা মানষিক ছুয়া করির না পায়। কিন্তুক অন্তরের ভিতিরা হাতে যেইলা বিরি আইসে, সেইলায় মানষিক ছুয়া করে।”

১৭ ইয়ার পাছত যীশু ভিড়ের মানষিলাক ছাড়িয়া আরো ঘরত সোন্দাইলেক। সেয়ো উয়ার চেলালা উয়াক পুছির নাগিলেক যে, “এই গল্পটার মানে কি?”

১৮ যীশু উমারলাক কইলেক যে, “তোমরালাও এত অবুঝ? এই শিক্ষাটার মানেও কি বুঝেন না? যেইটা বাইরা হাতে মানষির দেহার ভিত্তিরাত যায়, সেইটা মানষিক ছুয়া করির না পায়।

১৯ কারন, সেইটা তো পেটত সোন্দায় আর পেট থাকি বিরিয়া যায়, কিন্তুক অন্তরত সোন্দায় না।” এই শিক্ষাটাতে যীশু উমারলাক বুঝিয়া দিলেক যে, যত নাকান খাবার আছে, কোনো খাবারে মানষিক ছুয়া করির পায় না। সউগ খাবারে শুদ্ধ।

২০ যীশু উমারলাক আরো কইলেক, “মানষির অন্তর থাকি যেইলা বিরিয়া আ ইসে, সেইলা মানষিক ছুয়া করে।

২১-২২ কেনেনা কুচিন্তা মানষির অন্তর হাতে বিরিয়া আইসে এইলা কামের মইদ্বো দিয়া: ব্যভিচার, চুরি, মানষিক খুন, মাগিবাজি, লোভ নালসা, অবডাঙি, ছলচাতুরামি, উবঝাউটা, কু নজরে দেখা, অইন্যের গেলানি করা, দর্প আর আজিলি ভাব।

২৩ এই কু জিনিসলা মানষির অন্তর হাতে বির হয়া মানষিক ছুয়া করে।”

২৪ ইয়ার পাছত যীশু নিজের ইজ্রায়েল দেশ ছাড়িয়া সোর নামের এলাকাত গেইলেক, আর উয়ায় একটা ঘরত সোন্দাইলেক। যীশু চাইলেক, উয়ায় এটেকোনা আছে, এই কতাটা মানষিলা যাতে জানিবার না পায়। কিন্তুক এই নাকান হইলেক না।

২৫-২৬ উয়ায় যেটেকোনা গেইলেক, ওটেকোনা একটা বেটিছাওয়া আছিলেক আর উয়ার বেটিক অপদেবতা ধরচে। এই বেটিছাওয়াটা যীশুর সমন্ধে শুনির পাইলেক। যীশুর-টে আসিয়া হাংকুড়া পাড়ি মিনতি করিলেক যাতে যীশু উয়ার বেটির মইন্ধো হাতে অপদেবতাটা খেদেয়া দিবে। বেটিছাওয়াটা আছিলেক অযিহুদী, উয়ায় সুর দেশের ফৈনীকিয়া নামের এলাকাত জন্ম নিচে।

২৭ বেটিছাওয়াটাক কইলেক যে, “আগত ছাওয়া-ছোটক পেটে ভরে খাবার খাউক। কেনেনা ছাওয়া-ছোটর খাবার আগত, উমারলার খাবার নিয়া কুকুরের আগপাকত ফেলা ঠিক নোয়ায়।”

২৮ ইয়াতে বেটিছাওয়াটা কইলেক যে, “হ্যে মালিক, তোমরা ঠিকেই কইচেন। কিন্তুক ছাওয়া-ছোটর খাবারের ফেলা-চেলা আটুয়াও কুকুরে খায়।”

২৯ যীশু সেলা বেটিছাওয়াটাক কইলেক, “বা! এই তো তুই ভাল বুঝিয়া ভাল কতা কবার ধরচিস। যা! এলা বাড়ি যায় দেখেক, তোর বেটির ভিতরা হাতে অপদেবতা বিরিয়া গেইচে।”

৩০ আর সেলা বেটিছাওয়াটা বাড়ি যায় দেখিলেক যে, উয়ার বেটি বিছনাত শুতিয়া আছে, আর উয়ার ভিতরা হাতে অপদেবতা বিরি গেইচে।

৩১ যীশু সোর এলাকা ছাড়িয়া সীদোন এলাকার মইদ্বো দিয়া গালীল সাগরের ওটেকোনা ডিকাপলি এলাকাত গেইলেক।

৩২ আর ওটেকোনা কয়েক জন মানষি একটা টসা তোতলাক নিয়া আসিলেক যীশুর-টে। আর উমরা কাউলা-কাউলি করির নাগিলেক যে, মানষিটাক ভাল করির বাদে উয়ার উপরাত যীশু যাতে হাত ছুইয়া দেয়।

৩৩ যীশু ভিড়ের মইদ্বো হাতে মানষিটাক এক পাকে নিয়া যায়া মানষিটার দুই কানত নগুল দিলেক। আর যীশু ছ্যেপ ফ্যেলে ছ্যেপ নিয়া তোতলার জিবাখান নাড়িলেক।

৩৪ সেলো দ্যাওয়ার ভিতি দেখিয়া একটা দীঘল নিকাশ ফেলাইলেক, মানষিটাক কইলেক, “এপফাথা,” ইয়ার মানে, “খুলিয়া যা।”

৩৫ আর সেলোয় সেলোয় মানষিটা ভাল হয় গেইলেক। উয়ার কান দুইটা খুলি গেইলেক, আর উয়ার জিবাখান ঠিক হয় ভাল করি কতা কবার পাইলেক।

৩৬ যীশু এই ঘটনাটা মানষিলাক কাণ্ডোকে কবার না কইলেক। কিন্তু কতাটা কবার না কওয়াতে মানষিলা আরো বেশী করি কবার নাগিলেক।

৩৭ এই নাকান কাম দেখিয়া ওটেকার মানষিলা সগায় একেবারে অচানক হইলেক। আর কবার নাগিলেক যে, “ইয়ায় একেবারে

নিখুঁত কাম করে! ইয়ায় বোবাক কতা কওয়ায়, টসা মানষিক ভাল করি শূনির শক্তি দেয়।”

৮ পাছত আরো এক দিন যীশুর ওটেকোনা খুব ভিড় হইলেক, আর এই মানষিলার-টে কোনো খাবার আছিলেক না। সেলো যীশু উয়ার চেলালাক ডেকেয়া কইলেক যে,

২ “মানষিলাক দেখিয়া মোর খুব মায়া হইচে। কেনেনা ইমরা তিন দিন মোর নগত আছে, আর ইমারলার-টে কোনো খাবার নাই।

৩ কাণ্ডো কাণ্ডো অনেক দূর হাতে আসিচে বুলিয়া মুই যদি প্যেঠেয়া দেং, তাইলে ঘাটাত বেহুস হয় পড়িবো।”

৪ চেলালা কইলেক, “এই শূনপাথারত এতলা মানষির খাবার কায় কোটে থাকি পাইবে?”

৫ যীশু সেলো উমারলাক পুছিলেক যে, “তোমারলার-টে কয়খান রুটি আছে?” চেলালা কইলেক, “সাতখান।”

৬ মানষিলাক মাটিত বসির কইলেক। আর সাতখান রুটি নিয়া ভগবানক ধন্যবাদ দিয়া মানষিলাক খাবার দিবার বাদে, রুটি ছিড়িয়া চেলালার হাতত দিতেই আছে।

৭ চেলালার-টে কয়টা ছোট মাছও আছিলেক। যীশু ঐ মাছলা নিয়া ধন্যবাদ দিয়া ঐলাও দিবার কইলেক।

৮-৯ কম-বেশী চাইর হাজার মানষি সগায় পেটে ভরেয়া খাইলেক। আর যেইলা টুকরা পড়িয়া আছিলেক, ঐলা ডেলিত করি কুড়াইলেক, আর ঐলা সাত ডেলি হইলেক। খাবার পাছত যীশু মানষিলাক বিদায় করিয়া

১০ চেলালার নগত নাওযোত করিয়া দলমনুখা নামের এলাকাত চলিয়া গেইলেক।

১১ ওটেকার ফরীশী দলের ধর্মগুরুলা আসিয়া যীশুর নগত নিয়াই শুরু করিয়া দিলেক। ফরীশীলা উয়াক পরীক্ষা করিবার নাগিলেক যে, “স্বর্গ হাতে একটা চিন-এর নমুনা দেখাও।”

১২ ইয়াতে যীশু একটা দীঘল নিকাশ ফ্যেলেয়া কইলেক, “আজি কালিকার মানষিলা খালি চিন চান্দায় কেনে? মুই তোমারলাক সচাং করি কবার ধরচুং, তোমারলাক কোনো চিন না দেখাইম।”

১৩ ইয়ার পাছত যীশু উমারলাক ছাড়ি দিয়া নাওযোত করি সাগরের অইন্য পারত চলি গেইলেক।

১৪ চেলালা সাথত করি রুটি আনিবার একেবারে ভুলি গেইচে। আর নাওযোত উমারলার একনা রুটি ছাড়া কিছুই আছিলেক না।

১৫ যাইতে যাইতে যীশু উমারলাক হুকুম দিলেক, “এই তোমরা চেতন থাকেন! ফরীশীলার আর হেরোদ রাজার সোডা হাতে সাবধান হন।”

১৬ আর চেলালা নিয়াই করির নাগিলেক যে, “হামারলার-টে রুটি নাই বুলিয়া এই নাকান কতা কবার নাগচে।”



১৭ চেলালা কি কবার নাগচে, এইটা যীশু বুঝির পায়া কইলেক,  
“তোমরা কেনে কবার নাগচেন যে, তোমারলার-টে রুটি নাই?  
তোমরালা এলাও জানেন না? বুঝেন না? তোমারলার অন্তর কি  
পাষানের নাকান হইচে?

১৮ তোমারলার চোখু আছে, তাণ্ডো কি দেখির না পান? কান  
আছে, তাণ্ডো কি শুনির না পান? মনত কি পড়ে না,

১৯ মুই যেলা পাঁচখান রুটি ছিড়িয়া পাঁচ হাজার মানষিক  
খোয়ালুং, সেলা কয় ডেলি কুড়িয়া জমা করিলেন?” চেলালা  
কইলেক, “বারো ডেলি।”

২০ যীশু আরো কইলেক, “মুই যেলা সাতখান রুটি ছিড়িয়া  
চাইর হাজার মানষিক খোয়ালুং, সেলা কয় ডেলি কুড়াইলেন?”  
আর চেলালা কইলেক, “সাত ডেলি।”

২১ যীশু পুছিলেক, “তাণ্ডো, তোমরা এলাও কি বুঝেন না?”

২২ ইয়ার পাছত যীশু চেলালার নগত বৈৎসৈদা গেরামত  
গেইলেক। আর ওটেকোনা কয়েক জন মানষি মিলিয়া এক জন  
কানা মানষিক উমরা নিয়া আসিলেক। মানষিলা সেলা খুব  
কাউলা-কাউলি করি কবার নাগিলেক, যাতে যীশু ঐ কানা  
মানষিটার দেহাত হাতটা ছুইয়া দেয়।

২৩ যীশু কানা মানষিটার হাত ধরি একেবারে গেরামের বায়রাত  
নিয়া গেইলেক। ওইটে যায়া যীশু কানা মানষিটার চোখুত ছ্যেপ

নাগেয়া দিলেক। আর উয়াক নাড়িয়া পুছিলেক, “তুই এলা কি দেখির পাচিস?”

২৪ মানষিটা দেখিয়া কবার নাগিলেক, “মুই এলা মানষিলাক দেখির পাবার নাগচুং। মানষিলা গছের নাকান ঝাপসা দেখা যাবার নাগচে। ঐলা হাটিয়া বেরেবার ধরচে।”

২৫ যীশু আরো একবার মানষিটার চোখুত হাত দিলেক, ইয়াতে উয়ার চোখু একেবারে ভাল হয়। দেখিবার শক্তি ফিরি পাইলেক। উয়ায় ঝকঝকা করি সউগ দেখির পাবার নাগিলেক।

২৬ যীশু মানষিটাক বাড়িত পেঠেয়া দিবার সমায় উয়াক কইলেক, “তুই বৈৎসৈদা গেরামত যাইস না।”

২৭ ইয়ার পাছত যীশু চেলালাক নিয়া কৈসরিয়া ফিলিপী গঞ্জের অগল বগল গেরামলাত যাবার নাগিলেক। যাইতে যাইতে ঘাটাত যীশু চেলালাক পুছির নাগিলেক, “মুই কায়, এই নিয়া মানষিলা কি কোনো কতা কয়?”

২৮ চেলালা কইলেক যে, “কাণ্ডো কাণ্ডো কয় দীক্ষাদাতা যোহন, কাণ্ডো কয় তোমরা সেই পুরান দিনের ভগবানের ভাববাদী এলিয়; আরো কাণ্ডো কাণ্ডো কয় তোমরা অইন্য কোনো ভাববাদী।”

২৯ সেলো যীশু উমারলাক পুছিলেক যে, “তোমরালা মোক নিয়া কি কন? মুই কায়?” পিতর সেলো উত্তর দিলেক, “তোমরা হইলেন ভগবানের বাছাই করা রাজা।”

৩০ যীশু উমারলাক সাবধান করি দিয়া কইলেক, “এই কতাটা কাণ্ডোকে না কন।”

৩১ পাছত যীশু চেলালাক এই কয়া শিক্ষা দিবার নাগিলেক, “মুই বাছাই করা মানষি হং বুলিয়া, মোক মেয়ো দুঃখ-কষ্ট ভুগিবার নাগিবে। যিহুদী নেতালা, প্রধান বামনলা, আরো পন্ডিতলা, মোক মানি নিবার না হয়। মোক মারি ফেয়ো হইবে। তিন দিনের দিন মোক মরণক জয় করি বত্তি উঠির নাগিবে।”

৩২ এই কতালা গোপন না থুইয়া উয়ায় ভাল করি বুঝিয়া কইলেক। সেয়ো পিতর যীশুক অল্প দূরত নিয়া যায়া দোষ দিবার নাগিলেক।

৩৩ কিন্তুক যীশু মুখ ঘুরিয়া চেলালার পাকে দেখিয়া পিতরক ধমক দিয়া কইলেক, “শয়তান-অসুর! তুই মোর এইটে হাতে দূর হয়্যা যা! ভগবানের যেইলা, সেইলা ভাবিস না। মানষির যেইলা, সেইলা ভাবিস।”

৩৪ ইয়ার পাছত যীশু চেলালাক আর অইন্য মানষিলাক বগলত ডেকেয়া কইলেক, “যায় মোর পাছত আসিবার চায়, উমরা নিজের ইচ্ছা মতন ঘাটা চলা বন্ধ করুক। নিজের কষ্টের বোঝা ঘাড়ত তুলি নিয়া মোর পাছত আসুক।

৩৫ তোমরা নিজের বাদে বত্তি থাকির চাইলে, জীবন হারাবেন। কিন্তুক মোর চেলা হয়্যা ভগবানের ভাল খবরটা মানি নিয়া তোমার জীবন গতে দিলে সচাং জীবন পাইবেন।

৩৬ কাণ্ডো যদি সউগ দুনিয়া জয় করে, আর সচাং জীবনটা হারে ফেলায়, তাইলে কোনো লাভ নাই।

৩৭ সচাং জীবন ফিরি পাবার বাদে উয়ার দিবার নাকান কি আছে?

৩৮ “আজি কালিকার ছেচরা আর পাপী মানষিলার মাঝত মোক নিয়া শরম না খান! মোর শিক্ষালাও নিয়া শরম না খান! যদি খান, তাইলে মুইয়ে বাছাই করা মানষি, মুইও অংকরিয়া তোমারলাক শরম খাইম। যেদিন স্বর্গের বাপের-টে থাকি জাকজমকের সাথে পবিত্র স্বর্গদূতলার নগত আসিম, ঐ দিন মুইও তোমারলাক শরম খাইম।”

৯ যীশু আরো কইলেক যে, “মুই তোমারলাক সচাং কবার ধরচুং। এটেকোনা এই নাকান কয়জন মানষি আছে, যায় যায় ভগবানের রাজ্যের মহাশক্তি না দেখা পর্যন্ত, উমরা কোনো মতেই মরিবে না।”

১০ ইয়ার ছয় দিন পাছত যীশু খালি পিতর, যোহন আর যাকবক নগত করি নিয়া একখান উচা পাহাড়ের উপরাত গেইলেক। আর চেলালার আগত যীশুর চেহারা পালটি গেইলেক।

১১ উয়ার কাপড়-চোপড়ও বদলি গেইলেক, একেবারে সাদা ধপ-ধপা। এই দুনিয়ার কোনো মানষি ঐ নাকান কাপড় ধুবর সাধ্য হইবে না।

৪ চেলালা দেখির পাইলেক ভাববাদী এলিয় আর মহাপুরুষ মোশি যীশুর নগত কতা কবার ধরচে।

৫ সেলো পিতর যীশুক কইলেক যে, “গুরু, ভালে হইচে হামরালা যেই কয়জন এটেকোনা আছি। তোমারলার বাদে ছোট করি তিনটা তাম্বু বানাই বানাই, একটা তোমার, একটা মহাপুরুষ মোশির, আর একটা ভাববাদী এলিয়-এর।”

৬ কিন্তুক কি কওয়ার নাগিবে, সেইটা পিতর ভাবিয়া কুল-কিনারা পাইলেক না, কেনেনা উয়ায় ভয় খাইচে।

৭ সেলো একখান মেঘ দেখা যায়া ঐ জাগাখান ছায়া দিয়া ঢাকি নিলেক। আর ঐ মেঘ থাকি একটা আওয়াজ শোনা গেইলেক, “ইয়ায় মোর বেটা, মোর মনের এক জন। তোমরা ইয়ার কতা শোন।”

৮ সেলোয় সেলোয় চেলালা চাইরো পাকে চায়া দেখিয়া যীশুক ছাড়া কাণ্ডেকেই দেখির পাইলেক না।

৯ পাছত যীশু পাহাড় থাকি নামি আইসার সমায় উমারলাক লুকুম দিলেক, “তোমরা যেইলা দেখিলেন, মুই বাছাই করা মানষিটা মরিয়া বত্তি না ওঠা পর্যন্ত, তোমরা এই কতাটা কাণ্ডেকে কবেন না।”

১০ চেলালা যীশুর এই কতা পালন করিলেক, কিন্তুক “মরিয়া বত্তি ওঠা,” ইয়ার মানোটা কি, উমরা এই কতাটা নিয়া নিজের মানষির মাঝত কওয়া-কয়ি করিবার নাগিলেক।

১১ স্যোলা উমরা যীশুক পুছিবার ধরিলেক, “পন্ডিতলা কেনে কবার ধরচে, ‘বাছাই করা রাজার আগত এলিয় আসির দরকার আছে।’”

১২ যীশু উমারলাক কইলেক, “হে, এইটা সচাং। বাছাই করা রাজার আগত ভাববাদী এলিয় আসিয়া সউগ কিছু ঠিক করির ধরচে। কিন্তুক এই নিয়া মনে করেন। শাস্ত্রত কেনে নেখা আছে যে, বাছাই করা মানষিটাক খুব দুঃখ-কষ্ট ভুগিবার নাগিবে। আর কেনে নেখা আছে যে, মানষিলা উয়াক অবহেলা করিয়া বাতিল করিবে।

১৩ মুই তোমারলাক সচাং করি কবার নাগচুং। শাস্ত্রত যেংকরিয়া নেখা আছে, ভাববাদী এলিয় অংকরিয়া আসি গেইচে, কিন্তুক মানষিলা নিজের ইচ্ছা মতন উয়ার উপরাত বেয়া কামাই করিচে।”

১৪ যীশু আর তিন জন চেলা পাহাড় হাতে নামি আসিয়া দেখিলেক, অইন্য চেলালার-টে মেয়ো মানষি একটে হইচে। আর কয়জন পন্ডিত চেলালার নগত নিয়াই করিবার নাগচে।

১৫ যীশুক দেখিতে কালেই ওটেকার তামান মানষিলা অচানক হইলেক, আর দৌড়ি যায়া উয়াক সন্মান জানাইলেক।

১৬ যীশু উমারলাক পুছিলেক, “তোমরা ইমারলার নগত কি বিষয় নিয়া নিয়াই করির নাগচেন?”

১৭ ভিড়ের মানষিলা হাতে একটা মানষি যীশুর কতার উত্তর দিয়া কইলেক, “গুরু! মোর বেটাক ভাল করির বাদে তোমার এটেকোনা আনিচুং। উয়াক অপদেবতায় ধরচে বুলিয়া কতা কবার পায় না।

১৮ অপদেবতাটা উয়াক স্যেলা ধরে স্যেলা আছড়ে ফ্যেলে দেয়। উয়ার দাঁতে দাঁত কিড়মিরিয়া মুখ দিয়া ফ্যাপনা বিরিয়া দেহাটা টুটরা হয়। য়ায়। মুই তোমার চেলালাক কইলুং উয়ার অপদেবতাটা খেদেয়া দেও। কিন্তুক উমরা পাইলেক না।”

১৯ স্যেলা যীশু কইলেক, “বিশ্বাসহীন মানষিলা! মুই আর কত দিন তোমারলার নগত থাকিম? কত দিন তোমারলার এই নাকান কাম সহ্য করিম? চেংড়াটাক মোর এটেকোনা নিয়া আইসো।”

২০ মানষিলা স্যেলা যীশুর এটেকোনা চেংড়াটাক নিয়া আসিলেক। আর যীশুক দেখিতে কালেই অপদেবতাটা মোচড়েবার ধরিলেক। আর মুখ দিয়া ফ্যাপনা বিরিয়া আসিলেক খুব করি মাটিত গড়া-গড়ি দিবার নাগিলেক।

২১ যীশু চেংড়াটার বাপক পুছিলেক, “কত দিন হাতে চেংড়াটা এই নাকান?” মানষিটা কইলেক, “উয়ার এইটা ছাওয়া কাল থাকি।

২২ ইয়াক মারিবার বাদে স্যেলা বার অগুনত আর জলত ফ্যেলেয়া দিচে। কিন্তুক তোমরা যদি সাহায্য করির পান, দয়া করি করো।”

২৩ যীশু সেলো পুছিলেক, “যদি সাহায্য করির পান’ মানে কি? যায় বিশ্বাস করিবে, উয়ার বাদে সউগ সম্ভব।”

২৪ আর চেংড়াটার বাপ জোরে চিকিরিয়া কইলেক, “মুই বিশ্বাস করিচুং, আর মোর মাঝত যে অবিশ্বাস আছে, তা দূর করি দেও।”

২৫ আর মেলা মানষি দৌড়ি আসির ধরচে দেখিয়া, যীশু অপদেবতাটাক দাবরেয়া কইলেক, “হে টসা বোবা আত্মা, মুই তোক হুকুম দিবার নাগচুং। তুই ইয়ার ভিত্তিরা হাতে বিরিয়া যা! ইয়ার মাঝত আর কোনো দিন সোন্দাবু না।”

২৬ সেলোয় সেলোয় অপদেবতাটা চিকিরিয়া, চেংড়াটাক মোচড়েয়া, উয়ার ভিত্তিরা হাতে বিরিয়া গেইলেক। বিরি যাবার পাছত চেংড়াটা মরার মতন ওটেকোনা পড়ি রইলেক। সগায় কবার নাগিলেক যে মরি গেইচে।

২৭ যীশু কিন্তুক চেংড়াটাক হাত ধরি তুলিলেক আর উয়ায় খাড়া হইলেক।

২৮ ইয়ার পাছত যীশু সেলো ঘরের ভিত্তিরা গেইলেক, সেলো চেলালা গোপনে যীশুক পুছির নাগিলেক, “হামরালা অপদেবতাটাক ছাড়েবার পাইলুং না কেনে?”

২৯ আর যীশু কইলেক, “প্রার্থনা ছাড়া এই নাকান অপদেবতাক কোনো মতেই খেদা যায় না।”



৩০ আর উমরা ঐ জাগাখান ছাড়িয়া গালীল প্রদেশের মাঝিলা দিয়া চলি যাবার ধরচে। কিন্তুক যীশু চাইচে এই কতটা যাতে কাণ্ডেয় জানিবার না পায়।

৩১ কেনেনা উয়ায় চেলালাক শিক্ষা দিবার ধরচে যে, “মুইয়ে বাছাই করা মানষিটা, মোক শত্রুর হাতত ধরেয়া দেওয়া হইবে। আর উমরা মোক মারি ফেলাইবে। মারি ফেলার পাছত তিন দিনের দিন মুই বত্তি উঠিম।”

৩২ চেলালা কিন্তুক যীশুর কতার মানে বুঝির পাইলেক না, আর উয়াক পুছিবারও উমারলার ভয় হইলেক।

৩৩ ইয়ার পাছত যীশু কফরনাহুম গঞ্জত গেইলেক। যীশু ঘরত সোন্দেয়া চেলালাক পুছির নাগিলেক যে, “তোমরা ঘাটাত কি নিয়া নিয়াই করির নাগচেন?”

৩৪ উমরা চুপ করি রইলেক, কেনেনা সগারে থাকি কায় বড় এই নিয়া তর্কা-তর্কি করির নাগিলেক।

৩৫ যীশু বসিয়া বারো জন চেলাক নিজের বগলত ডেকেয়া কইলেক, “কাণ্ডে যদি বড় হবার চায়, তাইলে উয়াক ছোট হয়। সগারে সেবা করির নাগিবে। কাণ্ডে যদি কর্তা হবার চায়, তাইলে উয়াক সগারে পাছত থাকিবার নাগিবে।”

৩৬ যীশু একটা ছোট ছাওয়াক নিয়া সগারে আগপাকে আনিয়া খাড়া করিলেক। ছাওয়াটাক কোলাত নিয়া কইলেক,

৩৭ “মোর শিক্ষা মানিয়া যে কাণ্ডেই এই নাকান ছাওয়াক গ্রহন করে, উয়ায় মোকে গ্রহন করে। আর যায় মোক গ্রহন করে উয়ায় খালি মোক গ্রহন করে না, মোক যায় পেঠে দিচে, তাকো গ্রহন করে।”

৩৮ চেলা যোহন যীশুক কইলেক, “গুরু, হামরা দেখিলুং একটা মানষি তোমার নাম নিয়া অপদেবতা খেদেবার ধরচে। হামরা কিন্তুক মানা করি দিচি, কেনেনা উয়ায় হামার দলের মানষি নোয়ায়।”

৩৯ যীশু কিন্তুক কইলেক যে, “ঐ নাকান মানষিক মানা করি দেন না। মোর নাম নিয়া কাণ্ডে মহাশক্তির কাম করিলে, সহজে মোর নিন্দা করির পাইবে না।

৪০ কেনেনা যায় মোর বিপক্ষে নোয়ায়, উয়ায় মোর পক্ষে আছে।

৪১ মুই তোমারলাক সচাং করি কবার ধরচুং, তোমারলাক বাছাই করা রাজাটার বান্ধব কয়া কাণ্ডে এক গিলাস জলও খাবার দেয়, উয়ায় কোনো মতনে উয়ার পুরুষ্কার হারেবার না হয়।”

৪২ “মোর উপরা বিশ্বাস করা কোনো ছাওয়াক, কাণ্ডে যদি পাপের ঘাটাত নিয়া যায়, উয়ার অবস্থা এই নাকান হইবে। উয়ার কামাইয়ের শাস্তির বদলে উয়ার গালাত একটা বড় শিল বান্দিয়া সাগরের জলত ধাক্কে ফেলে দিলে, উয়ার অবস্থা ভাল হয়।

৪৩-৪৪ তোমার হাত যদি তোমাক পাপের ঘাটাত নিয়া যায়, সেলোয় সেলোয় ঐ হাতটা কাটিয়া ফ্যেলেয়া দেও! কেনেনা পাপের হাত নিয়া নরকত যাওয়ার থাকি এক হাতিয়া হয় অমৃত জীবনত সোন্দা অনেক ভাল। মনত থোন যে, নরকের অগুন কোনো দিন নিভিবার না হয়।

৪৫-৪৬ তোমার ঠেং যদি পাপের ঘাটাত নিয়া যায়, সেলোয় সেলোয় ঐ ঠেংটা কাটিয়া ফ্যেলেয়া দেও! কেনেনা পাপের ঠেং নিয়া নরকত যাওয়ার থাকি ন্যাংরা হয় অমৃত জীবনত সোন্দা অনেক ভাল।

৪৭ তোমার চোখু যদি তোমাক পাপের ঘাটাত নিয়া যায়, ঐ চোখুটা উকরিয়া ফ্যেলে দেও। কেনেনা দুই চোখু নিয়া নরকত যাওয়ার থাকি আধা কানা হয় ভগবানের রাজ্যত সোন্দা অনেক ভাল।

৪৮ ফম করেন যে, ‘নরকত যেইলা পোকা মানষিক খায় ঐলা পোকা কোনো দিনও মরে না, আর নরকের অগুন কোনো দিনও নিভে না।’

৪৯ “যেই নাকান করি গতে দেওয়া জিনিসের উপরাত নুন ছিটিয়া শুদ্ধি করে ঐ নাকান করি পতিটা মানষিক অগুন দিয়া শুদ্ধি করা হইবে।

৫০ “নুন যদিও ভাল জিনিস, কিন্তুক নুনের স্বাদ যদি হারে যায়, সেলা কেংকরি নোস্তা করা যাবে? তোমারলার অন্তরত নুনের

নাকান পবিত্র স্বাদ খোন, তোমরা এক জন অইন্য জনের নগত শান্তিতে থাকো।”

১০ পাছত যীশু কফরনাহুম গঞ্জ ছাড়িয়া দক্ষিন পাকে যায়। যিহুদীয়া প্রদেশ আর যর্দন নদীর ওপার গেইলেক। মেয়ো মানষি আর একবার উয়ার-টে আসিয়া একটে হইলেক। সেয়ো ঐ মানষিলাক যীশু যেই নাকান করি শিক্ষা দিয়া আসির ধরচে, ঐ নাকান করি শিক্ষা দিবার নাগিলেক।

২ ঐ সময় ওটেকোনা কয়েক জন ফরীশী দলের ধর্মগুরু আসিয়া যীশুক ফান্দোত ফ্যেলেবার চেষ্টা করিয়া কইলেক, “বিয়াও করা মাইয়াক ছাড়ি দিবার মোশির বিধানত আছে কি না?”

৩ যীশু পুছিলেক, “মহাপুরুষ মোশি তোমারলাক কি হুকুম দিচে?”

৪ উমরা কইলেক, “বিয়াও করা মাইয়াক একখান চিঠি নেখি ছাড়ি দেওয়া যায়, এই নাকান আইনত নেখিচে।”

৫ যীশু সেয়ো কইলেক, “তোমারলার মন কঠুর দেখিয়া মহাপুরুষ মোশি তোমারলাক এই নাকান করি কইচে।

৬ কিন্তুক দুনিয়ার সিড্জনের গোড়াতে ‘ভগবান মানষিক বেটাছাওয়া বেটিছাওয়া করিয়া সিড্জন করিচে।’

৭ ‘ঐ বাদে মানষি আপন বাপ-মাওক ছাড়িয়া মাইয়া ভাতার একসোদে থাকিবে,

৮ আর উমরা দুইটা দেহা একমন হয় একটা দেহা হইবে।’ ইমরা এলা দুই নাই, এক হইলেক।

৯ ভগবান যে দুইজনক জুড়ি দিচে মানষি ঐ দুইজনক যুদা না করুক।”

১০ ইয়ার পাছত ঘর সোন্দেয়া চেলালা যীশুক আরো ঐ বিষয়ে পুছির নাগিলেক।

১১ উয়ায় উমারলাক কইলেক, “কাণ্ডো যদি নিজের মাইয়াক ছাড়ি দিয়া অইন্য বেটিছাওয়াক বিয়াও করে, তাইলে উয়ায় নিজের মাইয়ার বিরুদ্ধে ব্যভিচার করে।

১২ আর মাইয়া ভাতারক ছাড়ি দিয়া অইন্য মানষিক বিয়াও করে, এইটাও মাগিবাজি।”

১৩ পাছত মানষিলা যীশুর ওটেকোনা ছোট ছোট ছাওয়ালাক নিয়া আসির নাগিলেক যাতে উয়ায় ছাওয়ালাক আশুর্বাদ করে। কিন্তুক চেলালা মানষিলাক গালি দিবার নাগিলেক।

১৪ আর এই দেখিয়া যীশু বেজার হয় চেলালাক কইলেক, “ছাওয়া-ছোটলাক মোর এটেকোনা আসিবার দেও, মানা করেন না। কেনেনা এই ছাওয়ালা যেই নাকান করি মোর এটেকোনা আসির চায়, ঐ নাকান মনের মানষিলা ভগবানের রাজ্যত আসির পায়।

১৫ মুই তোমারলাক সচাং করি কবার ধরচুং, ছাওয়ার নাকান করি ভগবানের রাজ্য মানি না নিলে কোনো দিনও ওটেকোনা আসিবার পাইবেন না।”

১৬ তার পাছত যীশু ছোট ছাওয়ালাক কোলাত তুলি নিলেক আর মাথাত হাত দিয়া আশুর্বাদ করিলেক।

১৭ যীশু যেলা ঘাটাত বেড়েবার নাগিলেক ঐ সমায় একটা মানষি দৌড়ি আসিয়া হাংকুড়া পাড়ি যীশুক কইলেক, “হে বাহে গুরু, তোমরায় এক জন ভাল মানষি। মোক কবেন তোমরা, অমৃত জীবন লাভ করির বাদে মোক কি করির নাগিবে?”

১৮ যীশু সেলা কইলেক, “মোক তোমরা ভাল কবার নাগচেন কেনে? এক মাত্র ভগবান ছাড়া কাণ্ডোয় ভাল নাই।

১৯ তুই তো হুকুমলা জানিস, খুন করেন না, ব্যভিচার করেন না, চোর করেন না, মিছাং সাক্ষী দেন না, কাণ্ডোকো ঠকান না, বাপ-মাওক তোমরা সন্মান করো।”

২০ মানষিটা যীশুক কইলেক, “গুরু, ছাওয়া কাল হাতে মুই ঐলা সউগে মানি আসির ধরচুং।”

২১ উয়ার পাকে চায়া দেখি যীশুর খুব মায়া হইলেক আরো কইলেক, “তোর একনা কাম করির বাকি আছে। যা তুই, তোর সউগ ধন সম্পত্তি বেচেয়া কাঙালক বিলিয়া দে। ইয়াতে তুই স্বর্গত ধন পাবু। সেলা তুই মোর এটেকোনা আসিয়া মোর চেলা হঃ।”

২২ এই কতটা শোনার সাথে সাথে মানষিটার মুখ কালা হয়।  
গেইলেক, কেনেনা উয়ার মেলা ধন সম্পত্তি আছিলেক। এই  
বাদে উয়ায় বেজার হয়। চলি গেইলেক।

২৩ সেলা যীশু চাইরো পাকে দেখিয়া চেলালাক কবার  
নাগিলেক, “ধনী মানষির ভগবানের রাজ্যের প্রজা হওয়া খুব  
কঠিন!”

২৪ চেলালা যীশুর কথা শুনিয়া অচানক হইলেক। যীশু আরো  
কইলেক, “ছাওয়ার ঘর, ভগবানের রাজ্যের প্রজা হওয়া খুব  
কঠিন!”

২৫ একটা বিন্দির ফোড়ং দিয়া একটা উটের সোন্দা সোজা কাম,  
কিন্তুক ভগবানের রাজ্যত ধনী মানষির সোন্দা খুব কঠিন।”

২৬ এই কতটা শুনিয়া চেলালা খুব অচানক হইলেক, আর  
নিজের মাঝত কওয়াকুয়ি করির নাগিলেক, “তাইলে কায় পাপ  
হাতে উদ্ধার পাবার পায়?”

২৭ যীশু সেলা উমারলার ভিত্তি দেখিয়া কইলেক, “মানষির-টে  
যেইটা অসম্ভব সেইটা ভগবানেরটে সম্ভব। ভগবানেরটে সউগ  
কাম করা সম্ভব।”

২৮ পিতর সেলা যীশুক কইলেক যে, “তোমরা দেখেন। হামরা  
কিন্তুক সউগ কিছু ছাড়ি দিয়া তোমার-টে আসচি।”

২৯ যীশু কইলেক, “মুই তোমারলাক সচাং করি কবার ধরচুং।  
মোর চেলা হয়। ভগবানের ভাল খবরটা মানি নিয়া যায় জাগা-

জমিন, বাড়ি-ঘর, ভাই-বইনি, মাও-বাপক, বেটা-বেটিক ছাড়ি দেয়,

৩০ উয়ায় এই যুগের একশ গুন বেশী পাইবে, ঘর-বাড়ি, ভাই-বইনি, মাও, ছাওয়া-ছোট, জাগা-জমি পাইবে। সাথে সাথে নাঞ্চনা ভোগ করিবে। উয়ায় আইসা কালের যুগত অমৃত জীবন লাভ করিবে।

৩১ রাজা হইবে ফকির, ফকির হইবে রাজা।”

৩২ উমরানা সেলো ঘাটা দিয়া যিরুশালেম গঞ্জত যাবার নাগচে। যীশু আগপাকে হাটিবার নাগচে আর চেলালা অচানক হয় পাছে পাছে যাবার নাগচে। উমারলার পাছত অইন্য মানষিলাও ভয়ে ভয়ে হাটিবার নাগচে। যীশু সেলো উয়ার বারো জন চেলাক ডেকেয়া আর এক বার বুঝি দিচে যে, নগতে নগতে মানষিলা উয়ার উপরাত কি কি করিবে।

৩৩ “এলা হামরা যিরুশালেমত যাবার ধরচি। বাছাই করা মানষিটাক (মানে মোক) প্রধান বামনলা আর পন্ডিতলার হাতত ধরে দেওয়া হইবে। উমরা মোর বিচার করি মারি ফ্যেলের দন্ড দিয়া বিধর্মী মানষিলার হাতত তুলি দিবে।

৩৪ আর এই বিধর্মীলা মোক ঠাট্টা টিটকারি করিয়া মোর দেহাত ছ্যেপ দিয়া খুব করিয়া চাবুক মারিবে। মোক মারি ফ্যেলাইবে, আর তিন দিনের দিন মুই মরণক জয় করি বন্তি উঠিম।”



৩৫ পাছত সিৰদিয়েৰ বেটা যাকব আৰ যোহন যীশুর বগলত আসিয়া কইলেক, “গুরু, হামরা যা ইচ্ছা চামু, তা কি হামার বাদে কৰিবেন?”

৩৬ যীশু কইলেক, “তোমার বাদে মুই কি কৰিম? তোমরা কি চান?”

৩৭ আৰ উমরা কইলেক, “তোমরা যেলা মহাশক্তি নিয়া রাজার আসনত বসিবার আসিবেন, সেলা হামরা দুইজনাক, এক জনক ডাইন পাকে এক জনক বাঁও পাকে, বসিবার জাগা কৰি দেন।”

৩৮ যীশু কইলেক, “তোমরা কি চাবার নাগচেন, সেইলা জানেন না। মানষিলা নদীর জলত দীক্ষা নেয়, কিন্তুক মুই দুঃখ-কষ্টের সাগরত দীক্ষা নিম। তোমরা কি মোর নাকান ঐ দুঃখ-কষ্টের দীক্ষা নিয়া সহ্য কৰির পাইবেন?”

৩৯ উমরা কইলেক, “হে, হামরা পামো।” যীশু উমারলাক কইলেক, “মুই যে দুঃখ-কষ্টের দীক্ষা নিম, সেই দীক্ষাটা তোমরালাও নিবেন।

৪০ কিন্তুক ডাইন পাকে আৰ বাঁও পাকে বসির দেওয়া মোর কাম নোয়ায়। ঐ জাগালা যার যার বাদে ঠিক করা হইচে ঐ জাগালাত উমরায় বসিবে।”

৪১ সেলা বাকি দশ-জন চেলা এই কতা শুনিয়া যাকব আৰ যোহনের উপরাত গোসা হইলেক।

৪২ এই বাদে যীশু সগাকে একটে ডেকেয়া কইলেক, “তোমরা জানেন যে, জগতের বিধর্মীলাক যায় যায় দেওয়ানী হয় শাসন করে, উমারলার ক্ষমতা দিয়া মানষিক ডাবে খুইয়া অইত্যাচার করে।

৪৩ কিন্তুক তোমারলার মাঝত এই নাকান হবেই না। তোমারলার মাঝত যায় বড় হবার চায়, উয়াক সেবাকারী হবার নাগিবে।

৪৪ যায় আগত থাকির চায় উয়াক সগারে চাকর হবার নাগিবে।

৪৫ মনত খোন, মুই যে বাছাই করা মানষিটা, মুই সেবা পাবার বাদে আইসোং নাই, সেবা করির বাদে আসচুং। আর অইন্য পরানের বদলে নিজের পরান দিয়া মেয়ো মানষির মুক্তির দাম চুকাইম। এই বাদে আসচুং।”

৪৬ যীশু আর উয়ার চেলালা ঘিরীহো নামের গঞ্জত আসিয়া ঘাটাত চলি যাবার ধরচে, মেয়ো মানষির নগত। ঐ গঞ্জ থাকি বিরিবার সময়, সেয়ো ঘাটার বগলত তীময়ের বেটা বরতীময় নামের এক জন কানা ভিক্ষা আলা বসিয়া আছিলেক।

৪৭ উয়ায় শুনির পাইলেক নাসারতের শ্রী যীশু আইসচে। সেয়ো উয়ায় চিকিরিয়া কইলেক, “ও বাহে, দায়ূদের বংশধর যীশু! মোক তুই দয়া করেক!”

৪৮ মেয়ো মানষি উয়াক ঝিত করি থাকির বাদে ধমকেবার নাগিলেক। উয়ায় কিন্তুক আরো জোরে জোরে চিকরিবার নাগিলেক, “হে দায়ূদের বংশধর যীশু! তুই মোক দয়া করেক!”

৪৯ যীশু সাথে সাথে থামিয়া কানা মানষিটাক ডেকেবার কইলেক। মানষিলা সেলো কানা মানষিটাক ডেকে আনিয়া আরো কইলেক, “ভয় না খাইস, ওঠেক! উয়ায় তোক ডেকেবার নাগচে।”

৫০ সেলো উয়ায় দেহার গিলাপখান ফ্যেলে দিয়া ঝাঙ্গে উঠিলেক আর যীশুর বগলত গেইলেক।

৫১ যীশু উয়াক পুছিলেক, “মুই তোর বাদে কি করিম? তুই কি চাইস, ক।” কানা মানষিটা কইলেক, “গুরু, মুই দেখির চাং।”

৫২ যীশু সেলো কইলেক, “যা, তুই বিশ্বাস করিচিস বুলিয়া, ভাল হয়্যা গেইচিস।” আর সেলোয় সেলোয় মানষিটা দেখির পাবার নাগিলেক, আর ঘাটা দিয়া যীশুর পাছে পাছে যাবার নাগিলেক।

১১ যিরুশালেমের বগলা-বগলি আসিয়া যীশু আর উয়ার চেলালা জলপই পাহাড়ের বৈৎফগী আর বৈথনিয়া গেরামলার-টে আইসচে। যীশু দুই জন চেলোক ডেকেয়া পেঠেয়া দিলেক,

২ “তোমরা ঐ বগলের গেরামটাত যাও। সোন্দাইতে কালে একটা বান্দি থোয়া গাধার বাচ্চা দেখির পাইবেন। উয়ার পিটিত কাণ্ডো কোনো দিনও চড়ে নাই। ঐটা খসেয়া এটেকোনা নিয়া আইসো।

৩ আর কাণ্ডো যদি পুছে, ‘কেনে এইটা নিয়া যাবার নাগচেন?’ তাইলে কবেন, ‘এইটা প্রভুর দরকার আছে। উয়ায় এইটা পচকরি

ফিরি দিবে।”

৪ সেলো উমরা যায়া দেখিলেক যে, ঘাটার বগলত বাড়ির দুয়ারের ওটেকোনা একটা গাধার বাচ্চা বান্দা আছে। উমরা গাধাটার দড়িখান হোসকাইলেক।

৫ আর ওটেকার যেইলা মানষি খাড়া হয় আছিলেক উমরা কইলেক, “কিরে, গাধাটার দড়িখান কেনে হোসকেবার নাগচেন?”

৬ যীশু উমাক য়েংকরিয়া কবার কইচে, অংকরিয়া চেলালা মানষিলাক কইলেক। সেলো মানষিলা গাধাটাক নিয়া যাবার দিলেক।

৭ ইয়াতে চেলালা গাধার বাচ্চাটা যীশুর-টে আনিয়া উয়ার উপরা দেহার গিলাপখান পাতিলেক, আর যীশু বসিলেক।

৮ মেয়ো মানষি যীশুর আগত উমারলার দেহার গিলাপ ঘাটাত পাড়িয়া দিবার নাগচে, আরো অইন্য মানষিলা জঙল হাতে কলার পাতের নাকান পাত কাটি আনিয়া গোটায় ঘাটাত পাড়িয়া দিবার নাগচে।

৯ যেইলা মানষি যীশুর আগপাকে পাছপাকে যাবার নাগচে, উমরা চিকিরিয়া কবার নাগিলেক, “জয়, ভগবানের জয়! যায় পরমপ্রভুর নামে আসিবার নাগচে, উয়ার জয় হউক!

১০ হামারলার চৌদ্দ গুষ্টির মহারাজা দায়ূদের রাজ্য আসির নাগচে, ভগবান এইটাত আশুবাদ করুক! ভগবানের জয়

জয়কার হউক!”

১১ যীশু যিরুশালেম যায়া যিহুদীলার দশংগতি মন্দিরত সোন্দাইলেক। সোন্দেয়া চাইরো পাকে ভাল করি দেখিবার নাগিলেক। কিন্তুক বেলা যায়া সইন্কা হইচে, এই বাদে উয়ায় বারো জন চেলাক নিয়া বৈথনিয়া গেরামত চলি গেইলেক।

১২ পরের দিন সাকালে যীশু যেলা বৈথনিয়া গেরাম ছাড়িয়া চলি যাবার ধরিলেক, সেই সমায় উয়াক ভোগ নাগচে।

১৩ দূর হাতে একটা পাতওলা ডুমুর গছ দেখির পাইলেক। গছটাত ফল আছে কি নাই, যীশু দেখিবার গেইলেক। গছটার ওটেকোনা আসিয়া দেখিলেক, পাত ছাড়া আর কোনো ফলে নাই। কেনেনা ঐ সমায়টা ডুমুর গছের ফল পাকির সমায় আছিলেক না।

১৪ এই বাদে গছটাক কইলেক যে, “আজি হাতে তোর ফল যাতে আর কোনো দিন কাণ্ডো না খায়।” চেলালা যীশুর এই কতাটা শুনির পাইলেক।

১৫ যিরুশালেম পৌছিয়া যীশু দশংগতি মন্দিরটাত সোন্দেয়া যায় যায় বলি দিবার পশু-পখি বেচা-কেনা করির ধরচে, উমারলাক খেদেয়া দিলেক। যায় যায় টাকা-পাইসা দেওয়া-নেওয়া করে, উমারলার টেবিল চেয়ার উল্টা-পাল্টা করি ফেলাইলেক। যায় যায় কইতোর ঘুঘু বেচায়, উমারলার বসিবার জাগা গোটায় উল্টি ফেলাইলেক।

১৬ আর দশংগতি মন্দিরটার মাঝিয়ার মইন্ধো দিয়া কোনো জিনিস-পাতি আনা-নেওয়া করির দিলেক না।

১৭ সেলো যীশু মানষিলাক শিক্ষা দিয়া কইলেক, “শাস্ত্রত এই নাকান কতা কি নেখা নাই? ‘মোর ঘরটাক কওয়া হইবে, সউগ জাতির প্রার্থনার ঘর।’ কিন্তুক তোমরা এইটাক কি বানাইচেন ‘চোর ডাকুর আড্ডাখানা!’”

১৮ প্রধান বামনলা আর পন্ডিতলা এই কতা শুনিয়া যীশুক মারি ফ্যেলেবার বাদে সুযোগ খুজিবার নাগিলেক। উমরা উয়াক ভয় করিলেক কেনেনা ভিড়ের মানষিলা যীশুর শিক্ষা শুনিয়া উমারলার মন আরো শুনিবার বাদে আকুল হয়।

১৯ যেলা সইন্ধা হইলেক, সেলো যীশু চেলালাক নিয়া গঞ্জের বায়রাত চলি গেইলেক।

২০ পরের দিন সাকাল বেলা ঐ ঘাটা দিয়া আসিবার সমায় চেলালা দেখিলেক যে, ঐ ডুমুর গছের শিপা সুদায় মরি গেইচে।

২১ আগের দিনের যীশুর কতা পিতরের মনত পড়িলেক। অচানক হয়। যীশুক কইলেক, “গুরু দেখা! যে ডুমুর গছটাক তোমরা শাও দিচেন সেইটা মরিয়া শুকি গেইচে।”

২২ সেলো যীশু চেলালাক কইলেক, “ভগবানের উপরাত বিশ্বাস থোন।

২৩ মুই তোমারলাক সচাং করি কবার ধরচুং। যদি কাণ্ডো অন্তরত সন্দেহ না রাখে, আর বিশ্বাস করিয়া ঐ পাহাড়টাক কয়,

‘এইটে হাতে উঠি যায়া সাগরত পড়ুক!’ তাইলে ঐ নাকান হইবে।

২৪ মোর কতা তোমরা শোন! বিশ্বাসের নগত প্রার্থনা করিয়া যে কোনো কিছু চান, তা পাইবেন।

২৫-২৬ তোমরা যেহেতু প্রার্থনা করেন, সেহেতু কাণ্ডে বিরুদ্ধে দোষ থাকিলে, উয়াক ক্ষমা করি দেন। ইয়াতে তোমার স্বর্গের বাপ তোমারও পাপ ক্ষমা করি দিবো।”

২৭ পাছত যীশু উয়ার চেলালা আরো যিরুশালেম গেইলেক, আর উয়ায় দশংগতি মন্দিরত হাটি বেড়েবার নাগচে। এই নাকান সমায় প্রধান বামনলা, পন্ডিতলা, যিহুদী নেতালা, উয়াক আসিয়া পুছিবার নাগিলেক,

২৮ “তুই কোন অধিকারে এই নাকান করিবার নাগচিস? কায় তোক এই অধিকার দিচে?”

২৯ ইয়ার উত্তরত যীশু কইলেক, “মুইও তোমারলাক একনা প্রশ্ন পুছিবার চাং। তোমরা যদি এইটার উত্তর দেন তাইলে মুইও কইম কোন অধিকারে এইলা করিবার নাগচুং।

৩০ তোমরা কন দেখি, জল দিয়া দীক্ষা দিবার অধিকার যোহন কারটে হাতে পাইচে? মানষির-টে হাতে, না ভগবানেরটে হাতে?”

৩১ সেহেতু উমরা এক জন অইন্য জনের নগত কওয়াকুয়ি করির নাগিলেক, “হামরা যদি কই ‘ভগবানেরটে,’ তাইলে উয়ায় কবে, ‘তোমরা যোহনক বিশ্বাস করেন নাই কেনে?’

৩২ আরো যদি কই ‘মানষির-টে হাতে’ তা হইলেও?” উমরা মানষিলাক ভয় করির নাগিলেক, কেনেনা সউগ মানষিলা যোহনক ভাববাদী কয়া মানি আসির নাগিলেক।

৩৩ আর এই বাদে উমরা কইলেক, “হামরা জানিনা।” সেলো যীশু কইলেক, “তাইলে মুইও কইম না, কোন অধিকারে এইলা করিবার নাগচুং।”

৪২ ইয়ার পাছত যীশু গল্পের নাকান করি উমরলাক শিক্ষা দিবার নাগিলেক, “এক জন চাষা একখান আংগুর খেতের আবাদ করিয়া চাইরো পাকে বেড়া দিলেক। আংগুর রস করিবার জইনে্যে একটা শিলোত খাল খুড়িলেক। পাহারা দিবার বাদে উচা করি একটা টং বানাইলেক। “পাছত জমিখান দেখাশুনা করির বাদে মানষিলাক আধি দিয়া বিদেশত চলি গেইলেক।

২ য়েলা আংগুর ফল পাকি গেইলেক, ঠিক ঐ সমায় ভাগ নিবার জইনে্যে উয়ার চাকরক পেঠেয়া দিলেক।

৩ কিন্তুক আধিয়ারলা চাকরটাক ডাঙেয়া খালি হাতে পেঠেয়া দিলেক।

৪ উয়ার পাছত খেতের মালিক আর এক জন চাকরক পেঠেয়া দিলেক। আধিয়ারলা চাকরটার মাখাত ডাঙাইলেক। উয়ার নগত খুব বেয়া আচরন করিলেক।



৫ ইয়ার পাছত মালিক আরো এক জনক পেঠেয়া দিলেক।  
উয়াক মারি ফেচলাইলেক। ইয়ার পাছত আরো মেচো চাকরক  
পেঠেয়া দিলেক। উমারলাক একে নাকান করিয়া কয়েক জনাক  
ডাঙাইলেক, কয়েক জনাক মারি ফেচলাইলেক।

৬ “এলা ওটেকোনা পেঠে দিবার বাদে পরানের একনায় আপন  
বেটা আছে। শেষত মালিক উয়াক পেঠে দিলেক। আর মনে  
করিলেক যে, ‘মুই যদি মোর একনায় আপন বেটাক পেঠেয়া  
দেং, তাইলে উমরা সন্মান করিবে।’

৭ আধিয়ারলা কিন্তুক চিন্তা ভাবনা করিবার নাগিলেক, ‘আরে!  
উয়ায় তো একনায় বেটা, পাছত মালিক মরি গেইলে সম্পত্তির  
মালিক ইয়ায় হইবে। তাইলে চলো! ইয়াক হামরা মারি ফেচলাই।  
আর ইয়াক মারিলে সম্পত্তির মালিক হামরা নিজে হমো।’

৮ উমরা মালিকের বেটাক ধরি মার-ধর করিয়া আংগুর খেতের  
বায়রাত মরাটাক ফেচলে দিলেক।”

৯ যীশু ধর্মগুরলাক পুছিলেক, “তাইলে তোমরা এলা কন দেখি,  
এই আংগুর খেতের মালিক কি করিবে? উয়ায় আসিয়া  
আধিয়ারলাক মারি ফেচলাইবে, আর আংগুরের জমিখান দখল  
করি নিয়া অইন্য মানষিক দিবে।

১০ তোমরা কি এই কতাটা পবিত্র শাস্ত্রত পড়েন নাই? ‘মিস্ত্রিলা  
যেই খুটিটা বাতিল করিচে, ঐটায় হইচে ঘরের মূল খুটি।

১১ এইটা পরমপ্রভুর কাম, আর হামারলাক খুব অচানক নাগে।”

১২ সেলো ধর্মের নেতালা যীশুক ধরির চাইলেক। উমরা বুঝির পাইলেক যে গল্পটা উমারলার বিরুদ্ধে কইচে। কিন্তুক উমরা মানষির ভয়ে যীশুক ছাড়ি দিলেক।

১৩ পাছত যিহুদী ধর্মের নেতালা যীশুর এটেকোনা কয়েক জন ফরীশী দলের ধর্মগুরু আর হেরোদ দলের মানষিক পেঠেয়া দিলেক যাতে যীশুক কতা কওয়ার মইদ্বো দিয়া ফান্দোত ফ্যেলেবার পায়।

১৪ উমরা আসিয়া কবার নাগিলেক যে, “গুরু, হামরা ভাল করি জানি তোমরা এক জন সৎ মানষি। মানষি কি মনে করিলেক, কি না করিলেক, এইলা নিয়া তোমরা চিন্তা করেন না। তোমরা মুখ চিনি মুগের ডাইল দেন না। কোনো মানষিক ভয় করেন না। তোমরা ভগবানের বিষয়োত সচাং শিক্ষা দেন। তাণো, হামারলাক কন যে, রোমের মহারাজাক মাসুল দেওয়া ঠিক হয়, কি না?

১৫ হামরা উয়াক মাসুল দিমু কি দিমু না?” যীশু উমারলার ভন্ডামি বুঝির পায়া কইলেক, “তোমরালা কেনে মোক পরীক্ষা করিবার নাগচেন? মোক একটা পাইসা আনি দেখান।”

১৬ আর উমরা একটা পাইসা আনিয়া যীশুক দিলেক। যীশু উমারলাক পুছিলেক, “পাইসাত এই ফটক কার? ইয়ার নাম কি?” উমরা কইলেক, “এই ফটক হইলেক রোমের মহারাজার।”

১৭ যীশু কইলেক, “তাইলে যেইটা মহারাজার, সেইটা মহারাজাক দেও। যেইটা ভগবানের, সেইটা ভগবানক দেও।” যীশুর এই কতা শুনিয়া উমরা সগায় অচানক হইলেক।

১৮ কয়েক জন সদূকী দলের ধর্মগুরু যীশুর বগলত আসিলেক। এই সদূকীলার বিশ্বাস মরি যাওয়া মানষি কোনো দিন বত্তি উঠিবার নোয়ায়।

১৯ এই বাদে উমরা যীশুক ঠাট্টা করি পুছির নাগিলেক, “গুরু, মহাপুরুষ মোশি হামার বাদে এই কতা শাস্ত্রত নেথি দিচে। যদি কাঙোরো ভাই আটকুরা হয় মরি যায়, তাইলে ঐ মরা ভাইয়ের মাইয়াক উয়ার বিয়াও করা খায়, যাতে মরা ভাইয়ের বংশ বত্তি থাকিবে।

২০ বেশ ভাল: উমরা সাত ভাই আছিলেক। পইলা জন বিয়াও করি আটকুরা হয় মরি গেইলেক।

২১ দ্বিতীয় জনও ঐ বিধুয়া বেটিছাওয়াটাক বিয়াও করিয়া আটকুরা হয় মরিলেক। তৃতীয় জন ঐ একে নাকান করি মরি গেইলেক।

২২ আর সাত জনের কারো ছাওয়া-ছোট হইলেক না। শেষত ঐ বিধুয়া মাইয়া মরি গেইলেক।

২৩ সউগ মরা মানষিলা যেলো ভগবান বত্তে তুলিবে সেলো ঐ বেটিছাওয়াটা কার মাইয়া হইবে? কেনেনা সাতজনে উয়াক বিয়াও করিচে।”

২৪ যীশু সেলো উমারলাক কইলেক, “তোমরা ভুল করিবার নাগচেন, কেনেনা তোমরা পবিত্র শাস্ত্র জানেন না, আর ভগবানের যে ক্ষমতা আছে, সেইটাও জানেন না।

২৫ মরা মানষি যেলা বত্তি উঠিবে সেলো উমরা বিয়াও করিবে না, বিয়াও দিবার নাগিবে না, উমরা স্বৰ্গদূতের নাকান হইবে।

২৬ কিন্তুক ভগবান মরা মানষিক বত্তে তোলে কি না, এই বিষয় তোমরা কি শাস্ত্রত পড়েন নাই? মহাপুরুষ মোশির নেখা বইয়ত ভগবানের কাটা ঝোপের মইদ্বো হাতে আওয়াজ দিয়া নিজেই পরিচয় দিলেক যে, ‘মুইয়ে অব্রাহাম, ইসহাক, যাকবের ভগবান।’

২৭ ভগবান কি মরা মানষির, না বত্তা মানষির ভগবান? উয়ায় তো বত্তি থাকা মানষির ভগবান তোমরা খুব ভুল করিবার নাগচেন।”

২৮ এক জন পন্ডিত আসিয়া উয়ায় তৰ্কা-তৰ্কি শুনিবার নাগিলেক। যীশু যে ঠিক উত্তর দিচে পন্ডিতটা জানির পায়া যীশুক পুছিলেক, “মোশির দেওয়া বিধানের মাঝিলাত সগারে চাইতে গুরুত্বপূর্ণ হুকুম কোনটা?”

২৯ ইয়ার উত্তরত যীশু কইলেক, “সউগ চাইতে গুরুত্বপূর্ণ হুকুম হইলেক এই, ‘হে ইজ্রায়েলী জাতির মানষি, তোমরা শুনেন! পরমপ্রভুই হামারলার ভগবান, উয়ায় ছাড়া আর কাণ্ডো নাই।

৩০ তোমারলার সউগ মন-পরান, গেয়ান, শক্তি সঁপে দিয়া পরম প্রভু ভগবানক পিরিত করো।’

৩১ “দোসরা গুরুত্বপূর্ণ হুকুম হইলেক এই, ‘নিজের দেহাক য়েংকরিয়া তোমরা যতন করিয়া পিরিত করেন, অংকরিয়া তোমরা পাড়াপড়শিক পিরিত করো।’ “এই দুইটা সউগ চাইতে বড় হুকুম। আর বেশী বড় হুকুম নাই।”

৩২ সেলো পন্ডিতটা যীশুক কইলেক, “গুরু, বেশ ভাল কতা। তোমরা সচাং করি কইচেন যে, ‘একটায় ভগবান আছে, উয়ায় ছাড়া আর কোনো ভগবান নাই।’

৩৩ আর সচাং কতা আছে যে, ‘সউগ মন-পরান, গেয়ান, শক্তি সঁপে দিয়া পরম প্রভু ভগবানক পিরিত করির নাগে।’ আরো আছে যে, ‘নিজের দেহাক য়েংকরিয়া তোমরা যতন করিয়া পিরিত করেন, অংকরিয়া পাড়াপড়শিক পিরিত করির নাগে’। সউগ পূজা পার্বনের চায়া এইলা বেশী গুরুত্বপূর্ণ।”

৩৪ ধর্মগুরুটা যে বেশ বুদ্ধিমানের নাকান করি উত্তর দিচে, যীশু এইটা দেখিয়া কইলেক, “ভগবানের রাজ্য হাতে তুই বেশী দূরত নাই।” সেলো হাতে কাণ্ডোয় যীশুক আর কোনো কিছু পুছিবার সাহস পাইলেক না।

৩৫ যীশু যিহুদী দশংগতি মন্দিরত শিক্ষা দিবার সমায় পুছিলেক, “পন্ডিতলা কেংকরি কয় যে ভগবানের বাছাই করা রাজাটায় মহারাজা দায়ূদের বংশধর?

৩৬ দায়ূদ তো পবিত্র আত্মা দিয়া কইচে, ‘পরম প্রভু মোর মালিকোক কইলেক, যতক্ষণ মুই তোর শত্রুলাক তোর ঠ্যংএর

তলাত না থোং, অতক্ষণ মোর ডাইন পাকে বইসেক।’

৩৭ “দায়ূদ নিজেই বাছাই করা রাজাটাক ‘মোর মালিক’ কয়া ড্যেকাইলেক, তাইলে কেংকরি উয়ায় দায়ূদের বেটা বা বংশধর হবার পায়?” মেয়ো মানষি খুশি মনে যীশুর কতা শুনিলেক।

৩৮ উয়ায় আরো শিক্ষা দিয়া কইলেক, “পন্ডিতলার সমন্ধে সাবধান থাকেন। উমরা গেরুয়া বসন পিন্দিয়া হাট বাজারত ঘুড়ি বেড়েয়া সন্মান পাবার চায়।

৩৯ উমরা উপাসনা ঘরের প্রধান জাগাত, ভোজের সমায় সন্মানের জাগাত বসির চায়।

৪০ এক পাকে ইমরা মানষিক দেখেবার বাদে অনেকক্ষণ ধরি প্রার্থনা করে। আর অইন্য পাকে বিধুয়ার ধন সম্পত্তি দখল করে। এইলা মানষির সউগ চাইতে বেশী শাস্তি হইবে।”

৪১ পাছত যীশু মন্দিরত দান বাক্সোর বগলত বসিয়া মানষিলা যে দান করিবার নাগচে, ঐলা দেখিবার নাগিলেক। মেয়ো ধনী মানষি মেয়ো টাকা-পাইসা দান করিবার নাগিলেক।

৪২ পাছত এক জন গরীব বিধুয়া আসিয়া খালি দুই পাইসা দান করিলেক।

৪৩ সেয়ো যীশু চেলালাক ড্যেকেয়া কইলেক, “মুই তোমারলাক সচাং কবার ধরচুং। এই গরীব বিধুয়া সগারে থাকি বেশী দান করিচে।

৪৪ অইন্য মানষিলা উমারলার মেয়ো ধন থাকি দান করিচে। কিন্তুক বেটিছাওয়াটা উয়ার সম্বল বুলিতে যা আছিলেক সেইটায় দান করিচে।”

১৩ যীশু দশংগতি মন্দির হাতে বিরাইতে কালেই এক জন চেলা আসিয়া উয়াক কইলেক, “গুরু, দেখেন তো, কত সুন্দর সুন্দর বড় বড় শিল অচানক অচানক মন্দির!”

২ যীশু উয়াক কইলেক, “তুই বড় বড় মন্দির দেখিবার নাগচিস তো। কিন্তুক ইয়ার একটা শিল আরেকটা শিলের উপরাত থাকিবে না! সউগ ভাঙিয়া ফেয়ো হইবে।”

৩ যীশু দশংগতি মন্দিরের উল্টা পাকে জলপই পাহাড়ত বসিলেক। সেয়ো পিতর, যাকব, যোহন, আর আন্দ্রিয় গোপনে পুচ করিবার নাগিলেক,

৪ “তোমরা হামারলাক কন। কোন সমায় এই ঘটনাটা ঘটিবে? কি নাকান চিন দেখিয়া হামরা বুঝিবার পামো যে এইলা পূরণ হয়্যা আসির ধরচে?”

৫ যীশু উমারলাক কইলেক, “সাবধান! কাণ্ডো যাতে তোমারলাক ভুল ঘাটাত নিয়া না যায়।

৬ মেয়ো মানষি ভন্ডামি করি মোর নাম নিয়া আসিয়া কবে, ‘মুইয়ে সেই বাছাই করা রাজাটা।’ আর ছলনা করি মেয়ো মানষিক ভুল ঘাটাত নিয়া যাবে।

৭ তোমরা যুদ্ধের খবরা-খবর শুনির পাইবেন, বগলতে হউক আর দূরত হউক, এইলা হবেই। কিন্তুক তোমরা ভয় করেন না। বিনাশের সমায় হয় নাই।

৮ এক জাতি অইন্য জাতির বিরুদ্ধে, এক রাজ্য অইন্য রাজ্যের বিরুদ্ধে, নড়াই হবেই মেয়ো জাগাত। ভৈচাল আর খুব মঙ্গা দেখা দিবে। এইলা দেখিয়া তোমরা জানির পাইবেন যে, যন্তনা শুরু হইচে, আর বিনাশের সমায় আসির নাগচে।

৯ “তোমরা নিজের ব্যাপার নিয়া সজাগ থাকেন! মানষি তোমারলাক বিচারের সভাত মানষির হাতত ধরেয়া দিবে। উপাসনা ঘরলাত মানষি ধরিয়া তোমারলাক ডাঙাইবে। মোর বাদে তোমারলাক দেশের রাজ্যপাল, রাজার আগত খাড়া হবার নাগিবে। উমারলার আগত মোর চেলা হয় সাক্ষী দিবার নাগিবে।

১০ আর বিনাশের আগত সউগ জাতির-টে ভগবানের দেওয়া ভাল খবর প্রচার করির নাগিবে।

১১ “উমরা যেয়ো তোমারলাক ধরিয়া শত্রুর হাতত দিবে, সেয়ো কি কবার নাগিবে এই নিয়া কোনো চিন্তা করেন না। কেনেনা নিজেই কতা কবেন না, ভগবানের পবিত্র আত্মা তোমারলাক কয়া দিবে, সেইটায় কবেন।

১২ ঐ সমায় ভাই ভাইক, বাপ বেটাক, শত্রুর হাতত তুলি দিবে মারি ফেলের বাদে। ছাওয়ালা মাও বাপের বিরুদ্ধে খাড়া হয় উমাক মারি ফেলাবে।



১৩ মোর চেলা হবার বাদে সউগ মানষি তোমারলাক ঘিন করিবে। পইলা যেই নাকান অন্তর দিয়া বিশ্বাস করিচেন, শেষে পর্যন্ত থির হয় থাকিলে, উদ্ধার পাইবেন।

১৪ “এমন দিনও আসির ধরচে যেলা মন্দিরের পবিত্র জাগাত একটা সর্বনাশা ছুয়া জিনিস দেখিবেন।” (যে কাণ্ডে এই কতাটা পড়ে উয়ায় ভালকরি বুঝুক।) “ঐ দিনত যায় যায় যিহুদীয়া প্রদেশত আছে, উমরা পাহাড়ের এলাকাত পালেয়া যাউক!

১৫ যায় ঘরের বারান্দাত আছে, উমরা কোনো কিছু নিবার বাদে ঘরত না সোন্দাউক!

১৬ যে কোনো মানষি ডাবরিত আছে, উয়ায় ঘুরিয়া জামা নিবার না আসুক!

১৭ ঐ দিনলাত যেইলা গাওভারী বেটিছাওয়া আছে, আর যেইলা ছাওয়াক দুধ খোয়ায়, উমারলার অবস্থা কত না বেয়া হইবে!

১৮ প্রার্থনা করেন যাতে এইলা ঘটনা জারের দিনত না হয়।

১৯ কেনেনা দুনিয়া সিজ্জনের সমায় থাকি এলা পর্যন্ত এই নাকান কষ্ট হয় নাই। ইয়ার পাছত আর হবারো নোয়ায়।

২০ পরম প্রভু যদি সেই দিনলা কমে না দিলেক হয়, তাইলে কাণ্ডে বত্তিলেক না হয়। কিন্তুক নিজের বাছাই করা মানষিলার বাদে ঐ দিনলা কমেয়া দিচে।

২১ সেই কষ্টের সময় যদি কাণ্ডো তোমারলাক কয়, ‘দেখ! বাছাই করা রাজাটা এটেকোনা!’ বা, ‘ওটেকোনা!’ সেলো তোমরা বিশ্বাস না করেন।

২২ কেনেনা ভন্ড বাছাই করা রাজালা আর ভন্ড ভাববাদীলা অনেক অচানক অচানক কাম করিবে। পাইলে ভগবানের বাছাই করা মানষিলাক ভুল ঘাটাত নিয়া যাবে।

২৩ তোমরা কিন্তুক সজাগ থাকেন রে! মুই তো আগতে তোমারলাক এইলা কয়া খুলুং।

২৪ কষ্টের ঠিক অল্প পাছত বেলা আন্ধার হয়্যা যাবে, চান আর আলো দিবার নোয়ায়।

২৫ সউগলা তারা দ্যাওয়া হাতে খসি খসি পড়ি যাবে। দেওয়াত যেইলা মহাশক্তি আছে, ঐলা আর থির থাকির পাবার নোয়ায়।

২৬ সেই সময় মেঘের উপরাত, মহাশক্তি নিয়া জাকজমকের সাথে বেলার ঝিলিকের নাকান করি, সগায় বাছাই করা মানষিটাক আইসা দেখিবে।

২৭ এক সীমনা হাতে আরেক সীমনা পর্যন্ত, চাইরো পাকে মুই বাছাই করা মানষিটা, স্বর্গদূতলাক পেঠেয়া বাছাই করা মানষিলাক জড়ো করিম।

২৮ “এলা তোমরা ডুমুর গছ দেখিয়া শেখেন। যেলা উয়ার ঠাইল নরম হয়্যা যায়, সেলো উয়ার কুশি বিরায়। সেলো তোমরা জানির পাইবেন গরম কাল বগলত আইসচে।

২৯ আর এই নাকান করি, তোমরা যেহেতু দেখিবেন মোর কতার  
নাকান সউগ ঘটিবার নাগচে, সেহেতু বুঝির পাইবেন ঐ সময়টা  
বগলা-বগলি আসি গেইচে।

৩০ আর মুই তোমারলাক সচাং করি কবার ধরচুং যে, এইলা না  
ঘটা পর্যন্ত এই বংশের শেষ হবার নোয়ায়।

৩১ দ্যাওয়া দুনিয়া ধ্বংস হইবে, কিন্তুক মোর কতা চিরদিন  
থাকিবে।”

৩২ “কিন্তুক কোন দিন কোন সময় ভগবানের বাছাই করা দিন  
আসিবে, এইটা কাণ্ডায় জানে না। স্বর্গদূতলাও জানে না,  
ভগবানের বেটা মুইও জানং না, খালি স্বর্গের বাপেই জানে।

৩৩ সাবধান হন! সজাগ থাকেন! কেনেনা ঐ দিন কোন সময়  
আসিবে, তোমরা জানেন না।

৩৪ সেই দিনটা এই নাকান করি আসিবে যেমন কাণ্ডা বিদেশ  
যাবার নাগচে। বাড়ি ছাড়ি যাবার আগত চাকরক সউগ দায়িত্ব  
দিলেক। পতিজন চাকরক আপন আপন কামের দায়িত্ব বুঝিয়া  
দিলেক। পাহারাদারক জাগিয়া থাকির কইলেক।

৩৫-৩৬ এই নাকান করি জাগিয়া থাক যাতে উয়ায় আসিয়া না  
দেখে তোমরা নিন্দোত আছেন। কেনেনা তোমরা জানেন না  
বাড়ির মালিক কোন সময় আসিবে। সইন্ধা সময়, না মইন্ধো  
রাতিত? মুরগা ডাকির সময়, না ভোরের বেলাত? তোমরা  
জানেন না। কিন্তুক উয়ায় আসিবেই।

৩৭ যেই নাকান করি মুই তোমারলাক কইলুং ঐ নাকান করি সগাকে কং। জাগিয়া থাকো!”

১৪ যিহুদী পার্বনের “ভেড়ার বলি দেওয়ার ভোজ” দুই দিন বাকি। ঐ ভোজের পাছত যিহুদীলা সাত দিন খামি ছাড়া বিশেষ এক ধরনের রুটি খাওয়ার পার্বন করে। ঐ সমায় প্রধান বামনলা আর পন্ডিতলা চুপ করি যীশুক ধরিয়া মারি ফ্যেলের চেষ্টা করির নাগিলেক।

২ উমরা কিন্তুক কইলেক, “পার্বনের সমায় উয়াক ধরির পামো না। ধরিলে মানষিলার মাঝত গন্ডগোল উবজন হবার পায়।”

৩ ঐ সমায় বৈথনিয়া গেরামত শিমোন (যার কুষ্ঠ রোগ আছিলেক), উয়ার বাড়িত যীশু বসি আছিলেক। যীশু যেলা খাবার ধরিলেক, সেলা একটা বেটিছাওয়া সাদা শিলের বানা শিশিত করি খুব দামী আর খাটি আতর আনিলেক। আর ঐ শিশিটা ভাঙিয়া বেটিছাওয়াটা কি করিলেক? যীশুর মাথার উপরাত আতর ঢালি দিলেক।

৪ সেলা ওটেকোনা যায় যায় আছিলেক উমরা খুব গোসা হয়া কওয়াকুয়ি করির নাগিলেক, “কি রে! আতরটা বেকার নষ্ট করিলেক কেনে?”

৫ এইটা বেচাইলে তো মেলা দাম হইলেক হয়। নাই করি একটা মানষির এক বছরের কামাইয়ের টাকা। এই টাকা গরীব মানষিক

দেওয়া গেইলেক হয়।” এই নাকান করি কয়া বেটিছাওয়াটাক গালি দিবার নাগিলেক।

৬ সেলো যীশু কইলেক, “তোমরা থামো। কেনে উয়াক দুঃখ দিবার নাগচেন? উয়ায় তো মোর বাদে ঠিকেই কাম করিচে।

৭ গরীব মানষিলা সউগ সমায় তোমারলার মাঝত থাকিবে, যেলা ইচ্ছা সেলো উমারলাক সাহায্য করির পাইবেন। কিন্তুক মুই তোমার নগত সউগ সমায় থাকিম না।

৮ উয়ার সাধ্য মতন কাম করিচে। মরি যাওয়ার পাছত মোর দেহা সমাধিত থোয়া যাবে। এই বাদে বেটিছাওয়াটা মোক আগেহাতে আতর ঢালি দিয়া সাজেবার নাগচে।

৯ মুই তোমারলাক সচাং করি কবার ধরচুং, দুনিয়ার যেটেকোনা ভগবানের দেওয়া ভাল খবর প্রচার করা হইবে, ওটেকোনাও বেটিছাওয়াটার এই কামের কতা কয়া মানষি উয়াক মনে করিবে।”

১০ আর ইয়ার পাছত যীশুর বারো জন চেলার মাঝত ইস্কেরিয়োতের যুদাস নামে এক জন চেলা যীশুক শত্রুর হাতত ধরে দিবার বাদে প্রধান বামনলার-টে গেইলেক।

১১ উয়ার কতা শুনি বামনলা খুব খুশি হয়। উয়াক টাকা দিবার কতা দিলেক। সেলো যুদাস ধরে দিবার বাদে সুযোগ খুজিবার নাগিলেক।

১২ দুই দিন পাছত, বিশেষ রুটির পার্বনের সাত দিনের পইলা দিন হইলেক। (ঐ দিনত ভেড়ার বাচ্চা বলি দেওয়া হয়।) এই বাদে চেলালা যীশুক পুচ করিবার নাগিলেক, “তোমার বাদে ভোজের ব্যবস্থা কোটেকোনা করিমু?”

১৩ সেলো যীশু দুই জন চেলাক কইলেক, “তোমরা গঞ্জত যাও। ওটেকোনা যায়া দেখিবেন একটা মানষি কলসিত করি জল নিয়া যাবার নাগচে। তোমরা উয়ার পাছে পাছে যাও।

১৪ উয়ায় যেই বাড়িত সোন্দাবে, ঐ বাড়ির মালিকক কন, ‘গুরু কইচে, ভেড়ার বলির ভোজ মুই যাতে চেলালার নগত খাবার পাং, ঐ ডারি ঘরটা কোটে?’

১৫ সেলো মালিকটা দোতলাত বড় একটা সাজা ঘর দেখেয়া দিবে। ওটেকোনা ভোজের সউগ কিছুই তোমরা বানান।”

১৬ সেলো চেলালা যায়া গঞ্জত সোন্দাইলেক। আর যীশু যেই নাকান কইচে, ঐ নাকান সউগ দেখির পাইলেক। চেলালা ভোজের সউগ কিছু বানেবার নাগিলেক।

১৭ সইন্কা হওয়ার পাছত যীশু বারো জন চেলাক নিয়া ভোজের বাড়িত গেইলেক।

১৮ উমরা যেলা খাবার ধরিলেক সেলো যীশু কইলেক, “মুই তোমারলাক সচাং কবার নাগচুং। তোমারলার মাঝিলাত এক জন মোক শত্রুর হাতত ধরে দিবে, উয়ায় মোর নগত খাবার ধরচে।”

১৯ চেলালা উদাস হয়। একজনের পাছত আরেক জন আসিয়া পুচ করিবার নাগিলেক, “মুই নোয়াং তো?”

২০ যীশু উমারলাক কইলেক, “তোমারলার বারোজনের মাঝিলাত এক জন, যায় মোর নগত খাওয়া-দাওয়া করির ধরচে।

২১ বাছাই করা মানষিটার সমন্ধে শাস্ত্রত যেই নাকান নেখা আছে, মুই তো ঐ নাকান করি মরি যাইম, কিন্তুক হয় যেই মানষিটা মোক শত্রুর হাতত দিবে! সেই মানষিটার উবজন না হইলে ভাল হইলেক হয়।”

২২ খাওয়া-দাওয়া চলিবার নাগচে, এই নাকান সমায় যীশু একখান রুটি নিয়া ভগবানক ধন্যবাদ দিলেক, আর রুটিখান টুকরা টুকরা করিয়া চেলালার হাতত দিলেক, কইলেক, “এই নেও, এইখান মোর সাঁপে দেওয়া দেহা।”

২৩ ইয়ার পাছত একটা নোটা নিয়া ভগবানক ধন্যবাদ দিয়া চেলালাক দিলেক। উমরা সগায় ঐ নোটা হাতে খাইলেক।

২৪ যীশু উমারলাক কইলেক, “এই মোর অত্ত যা মেয়ো মানষির বাদে গতে দেওয়া হইবে। এই দিয়া ভগবান আর মানষির মইদ্বোত চুক্তি চালু করা হইবে।

২৫ তোমারলাক সচাং করি কবার ধরচুং, মুই এই আংগুরের রস এলা আর খাইম না। কিন্তুক ভগবানক রাজ্য যেয়ো আসিবে, সেয়ো নয়া করি আংগুরের রস খাইম।”

২৬ ইয়ার পাছত কীত্তন করিয়া জলপই পাহাড়ত চলি গেইলেক।

২৭ যীশু উয়ার চেলালাক কইলেক, “তোমরা সগায় বিশ্বাস হারেয়া মোক ছাড়ি দিবেন! কেনেনা শাস্ত্রত নেখা আছে, ‘মুই ভেড়ার আখোয়ালক ঘাত করিম, আর ভেড়ালো চাইরো পাকে ছড়ি পড়িবো।’

২৮ “কিন্তুক মরণক জয় করি ভগবান মোক বত্তে তোলার পাছত মুই তোমারলার আগত গালীল প্রদেশত যাইম।”

২৯ স্যেলা পিতর কইলেক, “সগায় বিশ্বাস হারেয়া তোমাক ছাড়ি দিলেও, মুই ছাড়িবার নোয়াং।”

৩০ যীশু উয়াক কইলেক, “তোক মুই সচাং করি কবার ধরচুং, আজি ভোর রাতিত মুরগা দুই বার ডাকিবার আগত, তুই তিন বার কবু যে মোক তুই চিনিস না।”

৩১ পিতর আরো জোর দিয়া কবার নাগিলেক, “মোক যদি তোমার নগত মরিবার নাগে, তাণ্ডো মুই এই নাকান করি না কইম যে, তোমাক মুই চেনং না।” চেলালা সগায় একে নাকান কতা কইলেক।

৩২ ইয়ার পাছত যীশু আর উয়ার চেলালা গেৎশিমানী নামের একখান জাগাত আসিলেক। উয়ায় চেলালাক কইলেক, “মুই যতক্ষণ প্রার্থনা করং, তোমরা এটেকোনা বসি রন।”

৩৩ এই নাকান করি কয়া যীশু পিতর, যাকব আর যোহনক নিজের নগত নিয়া গেইলেক। আর মনত খুব চিন চিন করা বিষে কষ্ট পাবার নাগিলেক।



৩৪ উয়ায় কইলেক, “দুঃখে মোর পরান বিরি যাবার নাগচে। তোমরা এটেকোনা সজাগ থাকেন।”

৩৫ ইয়ার পাছত যীশু খানেক দূরত যায়া মাটিত উবুর হয়। প্রার্থনা করিবার নাগিলেক, যদি সম্ভব হয়, দুঃখের সময়টা উয়ার বগল থাকি দূর হউক।

৩৬ উয়ায় কইলেক, “আব্বা, মোর স্বর্গের বাবা, তোর-টে সউগ সম্ভব। এই দুঃখের বোঝা মোর-টে হাতে তুই নিয়া যা। তাণ্ডো মোর ইচ্ছা মতন না হউক, তোর ইচ্ছাতে হউক।”

৩৭ ইয়ার পাছত যীশু চেলালার-টে ঘুরিয়া আসি দেখিলেক যে, উমরা নিন্দোত পড়িচে। উয়ায় শিমোন পিতরক কইলেক, “কিরে! তুই নিন গেইচিস? এক ঘণ্টা কি তুই জাগনা থাকির না পাইস?”

৩৮ তোমরা জাগনা থাকেন, আর প্রার্থনা করেন, যাতে ফান্দোত না পড়েন। মনের ইচ্ছা আছে কিন্তুক দেহাটা নিঃশপ্তা।”

৩৯ পাছত যীশু যায়া একে নাকান করি প্রার্থনা করিবার নাগিলেক।

৪০ আরো ঘুরি আসি দেখিলেক যে, উমরা নিন্দোত পড়িচে। কেনেনা উমার দুই চোখু নিন্দে ঢুলিবার নাগচে। চেলালা যীশুক কি কবে, ভাবিবার পাইলেক না।

৪১ তিন বারের বার ঘুরি আসি উয়ায় উমারলাক কইলেক, “এলাও তোমরা কি নিন্দোত জিরিবার নাগচেন? হইচে! সময়

আসি গেইচে। দেখো! বাছাই করা মানষিটাক এলায় পাপী  
মানষির হাতত ধরে দেওয়া হইবে।

৪২ ওঠো, চলো হামরালা যাই। যায় মোক শত্রুর হাতত ধরেয়া  
দিবে, উয়ায় আসিচে।”

৪৩ এই কতা কবার শেষ না হইতে যুদাস ওটেকোনা আসিলেক।  
(বারো জন চেলার মাঝিলাত উয়ায় এক জন।) উয়ার নগত  
মেলা মানষি ছোরা আর নাটি নিয়া আসিলেক। প্রধান বামনলা,  
পন্ডিতলা আর যিহুদী নেতালা, এই মানষিলাক পেঠেয়া দিচে।

৪৪ যীশুক ধরেয়া দিবার বাদে যুদাস একটা চিন ঠিক করিয়া  
দিচে। উয়ায় কইচে, “মুই যাক চুমা দিম, উয়ায় সেই মানষিটা।  
তোমরা উয়াক ধরেন আর পাহারা দিয়া নিয়া যান।”

৪৫ যুদাস একেবারে সোজা-সুজি যায় যীশুক কইলেক, “গুরু!”  
আর উয়াক একটা চুমা দিলেক।

৪৬ আর ঐ মানষিলা যায় যীশুক ধরিলেক।

৪৭ যেইলা মানষি যীশুর বগলত খাড়া হয় আছিলেক, উমারলার  
মাঝিলাত এক জন, উয়ার ছোরা বির করিয়া, মহাবামনের  
চাকরের কানটা কাটিয়া ফেলাইলেক।

৪৮ যীশু সেলা ঐ মানষিলাক কইলেক, “মুই কি ডাকু, মোক  
ধরির বাদে ছোরা নাটি নিয়া আসচেন?

৪৯ মুই তো পতিদিনে তোমারলার মাঝিলাত দশংগতি মন্দিরত  
শিক্ষা দিচুং। সেলা তোমরা মোক ধরেন নাই কেনে? কিন্তুক

পবিত্র শাস্ত্রের কতা পূরণ করির বাদে এইটা হইলেক।”

৫০ আর ঐ সমায় চেলালা উয়াক ছাড়ি পালেয়া গেইলেক।

৫১ একটা গাবুর চেংড়া খালি একখান গামছা পিন্দিয়া যীশুর পাছে পাছে যাবার ধরিলেক। আর মানষিলা উয়াক যেলা ধরিলেক,

৫২ সেলা উয়ায় গামছাখান ছাড়ি দিয়া নেংটা হয়া পালে গেইলেক।

৫৩-৫৪ সেই মানষিলা যীশুক নিয়া মহাবামনের ওটেকোনা গেইলেক। ওটেকোনা প্রধান বামনলা, যিহুদী নেতালা আর পন্ডিতলা একে-টে জড়ো হইলেক। পিতর দূরত থাকি যীশুর পাছে পাছে যাবার নাগিলেক, যাইতে যাইতে মহাবামনের আগিনাত যায়া সোন্দাইলেক। ওটেকোনা পাহারাদারলার নগত অগুন পোহেবার নাগিলেক।

৫৫ মহাবামনলা আর মহাসভার সগায় যীশুক মারি ফ্যেলের বাদে দোষ খুজিবার নাগিলেক। কিন্তুক উয়ার বিরুদ্ধোত কোনো দোষ পাইলেক না।

৫৬ মেলা মানষি মিছাং দোষ দিলেক, কিন্তুক যেইলা দোষ উমরালা দিলেক, ঐলা ঠিক মিলিলেক না।

৫৭ সেলা আরো কয়েক জন খাড়া হয়া উয়ার বিরুদ্ধোত মিছাং দোষ দিয়া কইলেক,

৫৮ “যীশুক এই নাকান কতা কবার শুনিচি, ‘মানষির বানা এই মন্দিরটা মুই ভাঙি ফেলাইম, আর তিন দিনের মইদ্বোত একটা মন্দির বানাইম, যেইটা মানষির বানা নোয়ায়।”

৫৯ তাণ্ডো উমরা যেইলা দোষ দিলেক, ঐলাও ঠিক মিলিলেক না।

৬০ সেলো মহাবামন সগারে আগত খাড়া হয় যীশুক পুছিলেক, “ইমরা তোর বিরুদ্ধোত যেইলা দোষ দিবার নাগচে, এইলা কি সচাং? তুই কি কোনো উত্তর দিবু না?”

৬১ যীশু কিন্তুক কোনো উত্তর না দিয়া চুপ করি রইলেক। মহাবামন আরো অইন্য প্রশ্ন পুছিলেক, “তুইয়ে কি পরমধন্য ভগবানের বেটা, সেই বাছাই করা রাজা?”

৬২ যীশু কইলেক, “মুইয়ে তায়, আর মুইয়ে বাছাই করা মানষিটা, এই নাকান করি মোকে দেখিবেন, ‘মহা শক্তিমান ভগবানের ডাইন পাকে বসি থাকির,’ আর, ‘স্বর্গের মেঘের উপরাত আসিবার।”

৬৩ সেলো মহাবামন যীশুক দোষী করিয়া নিজের কাপড় চিরি কইলেক, “আর হামাক অইন্য সাক্ষী দরকার নাই!

৬৪ তোমরা তো শুনিলেন, উয়ায় নিজক এই নাকান কয়া ভগবানের নিন্দা করিলেক! তোমরা কি সিদ্ধান্ত নিলেন?” উমরা সগায় ঠিক করিলেক, যীশু মরণের শাস্তি পাবার যোগ্য।

৬৫ সেলো কয়েক জন মানষি উয়ার দেহাত ছ্যেপ দিয়া অপমান করিলেক। উয়ার চোখুত কাপড় বান্দিয়া ডাঙেয়া কইলেক, “তোক কায় ডাঙাইলেক, কঃ তো! তুই না এক জন ভাববাদী?” আর পাহারাদারলা চড় থাপড়া মারিবার নাগিলেক।

৬৬ পিতর য়েলা নিচত আগিনাত আছিলেক, সেলো মহাবামনের এক জন চাকরানী ওটেকোনা আসিলেক।

৬৭ উয়ায় পিতরক অগুন পোহেবার দেখিলেক, আরো ভাল করি চায়া দেখি কইলেক, “তোমরায় তো নাসারতের যীশুর নগত আছিলেন।”

৬৮ পিতর কইলেক, “তোর কতা সচাং নোয়ায়। মুই জানং না তুই কি কবার নাগচিস।” এই কতা কয়া পিতর দুয়ারের বায়রাত চলি গেইলেক। আর সেলোয় সেলোয় একটা মুরগা ডেকে উঠিল।

৬৯ চাকরানীটা পিতরক দেখির পায়া, সেলো ওটেকোনা যায় যায় খাড়া হয় আছিলেক, উমারলাক কইলেক, “এই মানষিটাও উমারলার দলের এক জন।”

৭০ পিতর কইলেক, “না, মুই নোয়াং!” ওটেকোনা যায় খাড়া হয় আছিলেক উমরাও খানেক পাছত কইলেক, “নিশ্চয় তুই উমারলার দলের এক জন, তুইও তো গালীল প্রদেশের মানষি।”

৭১ পিতর সেলো কিরাকাটি কইলেক, “তোমরা যার সমন্ধে কবার নাগচেন উয়াক মুই চেনং না! এইটা যদি মিছাং হয়, তাইলে

ভগবানের শাও মোর উপরাত নামি আসুক!”

৭২ আর সেলোয় সেলোয় দুই বারের বার মুরগাটা ডাকিয়া উঠিলেক। যীশু যে কইচে, “মুরগা দুই বার ডেকার আগত তুই মোক তিন বার অস্বীকার করিবু,” ঐ কতাটা উয়ার মনত পড়িলেক। সেলোয় সেলোয় হতাশায় কান্দির নাগিলেক।

১৫ খুব ভোর সাকালে, প্রধান বামনলা, যিহুদী নেতালা, পন্ডিতলার নগত, মহাসভার সউগ মানষিলাক নিয়া শলা পরামর্শ করিলেক। উমরা যীশুক বান্দিয়া নিয়া রোমের রাজ্যপালের হাতত তুলি দিলেক। রাজ্যপালের নাম আছিলেক পীলাত আর উয়াক রোম দেশ থাকি যিহুদীলাক শাসন করির বাদে পেঠা হইচে।

২ সেলো পীলাত পুছিলেক, “তুই কি যিহুদীলার রাজা?” যীশু উত্তর দিলেক, “হে, তোমরা যেই নাকান কইচেন, ঐ নাকান।”

৩ প্রধান বামনলা যীশুর নামে মেলা দোষ দিবার নাগিলেক।

৪ এই বাদে পীলাত যীশুক পুছিবার নাগিলেক, “তুই কি কোনো কিছুই কবু না? দেখেক তো! তোক কত নাকান করি দোষী করির নাগচে।”

৫ যীশু কিন্তুক কোনো কিছুই কইলেক না, এই বাদে পীলাত অচানক হইলেক।

৬ বছরে বছরে এই নাকান করি আসির ধরচে, মুক্তি ভোজ পার্বনের সময়। জেলের বন্দীলার মাঝিলাত ভিড়ের মানষিলা এক জনক বাছাই করে আর রাজ্যপাল পীলাত উয়াক ছাড়ি দেয়।

৭ এই বছরও, পার্বনের সময়, বারাব্বা নামে এক জন বন্দী জেলত আছিলেক। বারাব্বা তো বিদ্রোহীলার নগত থাকিয়া একটা বিদ্রোহত মানষিক খুন করিয়া জেলত বন্দী হইচে।

৮ ভিড়ের মানষিলা পীলাতোক আসিয়া কইলেক, “তোমরা বছরে বছরে যেই নাকান করেন, ঐ নাকানে কর।”

৯ পীলাত সেলো কইলেক, “তোমরা কি চান? মুই যিহুদীলার রাজাক ছাড়ি দিম?”

১০ প্রধান বামনলা যীশুক হিংসা করিয়া উয়াক পীলাতের হাতত তুলি দিচে, এইটা পীলাত জানির পায়া ভিড়ের মানষিলা নগত কতা কইলেক।

১১ কিন্তুক প্রধান বামনলা ভিড়ের মানষিলাক উসকানি দিবার নাগিলেক যাতে উমরা যীশুর বদলে বিদ্রোহী বারাব্বাক ছাড়েয়া নিবে।

১২ পীলাত সেলো ভিড়ের মানষিলাক পুছিলেক, “তোমরা যাক যিহুদীলার রাজা কন উয়াক মুই কি করিম?”

১৩ উমরালা চিকিরিয়া কবার নাগিলেক, “উয়াক ক্রুশত দেও! উয়াক ক্রুশ-খুটাত টাঙেয়া থোন!”

১৪ পীলাত কইলেক, “কেনে? উয়ায় কি দোষ করিচে?” ভিডের মানষিলা আরো জোরে জোরে চিকিরিয়া কবার নাগিলেক, “উয়াক ক্রুশত দেও! উয়াক ক্রুশ-খুটাত টাঙেয়া থোন!”

১৫ সেয়া পীলাত ভিডের মানষিলাক খুশি করিবার বাদে, বারাবাক উমারলার-টে ছাড়ি দিলেক। আর সিপাইলাক হুকুম দিলেক, যীশুক নিদারুন করি চাবুক মারিয়া ক্রুশ-খুটাত টাঙে থুবার।

১৬ ইয়ার পাছত সিপাইলা রাজ্যপাল পীলাতের রাজবাড়িত যীশুক নিয়া সউগ সিপাইলাক ডেকাইলেক।

১৭ উমরা যীশুক বাইগুনি রংএর কাপড় পেন্দাইলেক, আর কাটার একখান মটুক বানেয়া উয়ার মাথাত পেন্দেয়া দিলেক।

১৮ ইয়ার পাছত উমরা ঠাট্টা করিয়া কবার নাগিলেক, “যিহুদী রাজার জয় হউক!”

১৯ আর উমরা একটা নাটি দিয়া যীশুর মাথাত বারে বারে ডাঙের নাগিলেক। উয়ার দেহাত ছেপ দিলেক, আর হাংকুড়া পাড়িয়া উয়াক সন্মান দেখের ভান করিলেক।

২০ এই নাকান করি ঠাট্টা তামশা করিবার পাছত, উমরা উয়ার বাইগুনি কাপড় খুলি ফেলেয়া, নিজের কাপড় পেন্দেয়া দিলেক। আর ক্রুশ-খুটাত টাঙেবার বাদে নিয়া গেইলেক।

২১ সেই সময় ঐ ঘাটা দিয়া শিমোন নামে কুরীণী দেশের এক জন মানষি গেরাম থাকি আসিবার ধরচে। উয়ায় আছিলেক



আলেক্সান্দার আর রূপের বাপ। সিপাইলা উয়াক যীশুর ক্রুশটা উবিবার বাধ্য করিলেক।

২২ উমরা যীশুক গলগথাত নিয়া গেইলেক। ঐ জাগাখানের আর একটা নাম হইলেক মাথার খাপড়া।

২৩ উমরা যীশুক আংগুরের রস দিয়া বিষ কমেবার ওষুধ মিশিয়া খাবার দিলেক। উয়ায় কিন্তুক খাইলেক না।

২৪ ইয়ার পাছত উমরা যীশুক ক্রুশ-খুটাত টাঙেয়া থুইলেক। সেয়া সিপাইলা যীশুর কাপড়লা ভাগ করি নিবার বাদে নটারি করিলেক, কার ভাগ্যত কোনটা পড়ে।

২৫ সাকাল নয়টার সময় উমরা যীশুক ক্রুশ-খুটাত টাঙেয়া থুইলেক।

২৬ যীশুর বিরুদ্ধে, একখান সাইন বোর্ড মাথার উপরাত নটকেয়া থুইলেক। ওটেকোনা নেখা আছিলেক, “যিহুদীলার রাজা।”

২৭-২৮ উয়ার নগত দুই জন ডাকুক এক জনক ডাইন পাকে, আর অইন্য জনক বাঁও পাকে টাঙাইলেক।

২৯ যায় যায় ঐ ঘাটা দিয়া যাবার নাগিলেক, উমরা মাথা ঝকেয়া ঠাট্টা করি কবার নাগিলেক, “কি রে! তুই না মন্দিরটা এলাও ভাঙিবার ধরচিস? আর তিন দিনের মাঝত বানেবার ধরচিস?”

৩০ এলা ক্রুশ-খুটা হাতে নামি আসিয়া নিজক বত্তাও!”

৩১ প্রধান বামনলা আর পন্ডিতলা এক জন আর এক জনক ঠাট্টা করি কবার নাগিলেক, “উয়ায় তো অইন্য মানষিক বত্তাইচে, এলা নিজক কি বত্তের পায় না?”

৩২ আরে! ইয়ায় না বাছাই করা রাজা! ইজ্রায়েলের রাজা না কি! ক্রুশ-খুটা হাতে নামি আসুক যাতে হামরা বিশ্বাস করির পাই।” যীশুর নগত যাক একে নাকান করি টাঙে থোয়া হইচে, উমরাও যীশুক ঠাট্টা করির নাগিলেক।

৩৩ পাছত দুপরা বারোটা হাতে বিকাল তিনটা পর্যন্ত গোটায় দেশটা আন্ধার হয় রইলেক।

৩৪ বেলা তিনটার সমায় যীশু জোরে চিকিরিয়া কইলেক, “এলি এলি লামা শবক্তানী,” ইয়ার মানে “ভগবান মোর, ভগবান মোর, কেনে তুই মোক ত্যাগ করিচিস?”

৩৫ যেই মানষিলা বগলত খাড়া হয় আছিলেক, উমরা এই কতাটা শুনির পায় কবার নাগিলেক, “শুনেন, শুনেন, উয়ায় ভাববাদী এলিয়ক ডেকেবার নাগচে!”

৩৬ সেয়া একটা মানষি দৌড়ি যায়া জল চুষি নেয় এই নাকান জিনিসত টেঙা ফলের রস ভিজিয়া, যীশুক খাবার দিলেক একটা নাটির মাখাত করি। উয়ায় কবার নাগিলেক, “থাক! দেখি, এলিয় উয়াক নামেবার আইসে কি না?”

৩৭ যীশু জোরে চিকিরিয়া শেষ উকাস ছাড়ি দিলেক।

৩৮ আর যিরুশালেমের মন্দিরের পর্দা যেইখান দিয়া শুদ্ধি জাগা আর মহাশুদ্ধি জাগা যুদা করে, ঐ পর্দা উপর হাতে নিচত ছিড়িয়া দুই ভাগ হইলেক।

৩৯ আর ওটেকোনা যে রোমের এক জন প্রধান সিপাই খাড়া হয় আছিলেক, এই নাকান ঘটনা দেখিয়া কইলেক, “সচাং, ইয়ায় ভগবানের বেটা আছিলেক।”

৪০ কয়জন বেটিছাওয়াও দূরত খাড়া হয় সউগ দেখিলেক। উমারলার মইন্ধোত আছিলেক এই তিন জন: মগদলিনী মরিয়ম, যোষেফ আর ছোট যাকবের মাও মরিয়ম, আর শালোমী।

৪১ যীশু যেলা গালীল প্রদেশত আছিলেক, সেলা ঐ বেটিছাওয়া তিন জন যীশুর নগত সউগ জাগাত গেইচে, আর উমরা উয়ার দেখাশুনা করিচে। আরো মেলা বেটিছাওয়া যায় যায় যীশুর নগত যিরুশালেমত আসিচে উমরাও ওটেকোনা আছিলেক।

৪২ শুকুরবার বেলা ডুবো ডুবো সমায়, যিহুদী মানষিলা জিরানের দিনের বাদে সউগ কিছু আয়োজনের কাম করির ধরচে।

৪৩ সেলা আরিমাথিয়া গেরামের যোষেফ সাহস করিয়া পীলাতের-টে যায়া পুছিলেক যে, “মহাশয়! দয়া করিয়া যীশুর মরা দেহাটা মোক দেন।” উয়ায় মহাসভারো সদস্য আছিলেক, আর ভগবানের রাজ্য কোন দিন আসিবে, সেই আশায় বাছে ছিলেক।

৪৪ পীলাত অচানক হইলেক যে যীশু এত পচ করি মরি গেইলেক। সচাং করি যীশু মরিচে কি না জানির বাদে এক জন সিপাই-এর প্রধানক ডেকেয়া পুছিলেক।

৪৫ সিপাই-এর প্রধানটা কইলেক, “হে, ঠিকেই মরিচে।” সেয়া পীলাত যোষেফক যীশুর মরা দেহাটা দিলেক।

৪৬ যোষেফ যায়া কাপড় কিনি আনিলেক। যীশুর মরা দেহাটা নামেয়া কাপড় জড়েয়া পাহাড়ের গুহার ভিত্তিরাত দেহাটাক থুইলেক। ইয়ার পাছত একটা বড় শিল গড়েয়া দিলেক গুহাটার মুখত।

৪৭ আর যীশুর মরা দেহাটা কোটেকোনা থুইলেক, এইটা মগদলিনী মরিয়ম আর যোষেফের মাও মরিয়ম দেখিলেক।

১৬ যিহুদী জিরানের দিন পার হয় শনিবারের সইন্কা সময়, মগদলিনী মরিয়ম, যাকবের মাও মরিয়ম, শালোমী, এই তিন জন বেটিছাওয়া সুগন্ধি মলম কিনি আনিলেক যীশুর দেহাত নাগেবার বাদে।

২ দেওবার খুব ভোর সাকালে, বেলা উঠিতে কালে, উমরা সমাধিটার ওটেকোনা গেইলেক।

৩ যাওয়ার সময় উমরা এক জন অইন্য জনক পুছির নাগিলেক, “সমাধির মুখখান থাকি হামারলাক শিলটা কায় সারেয়া দিবে?”

৪ শিলটা তো মস্তবড়। তাণ্ডো উমরা যায়া কি দেখির পাইলেক?  
কায় বা ঐ শিলটাক সারেয়া থুইচে!

৫ সমাধিটা হইলেক পাহাড়ের গুহাত। ঐ গুহাত সোন্দেয়া  
দেখিলেক, সাদা ধপ-ধপা কাপড় পেন্দা একটা গাবুর চেংড়া  
ডাইন পাকত বসিয়া আছে। উয়ায় স্বর্গদূতের নাকান, এই দেখিয়া  
উমরা খুব অচানক হইলেক।

৬ উয়ায় কইলেক, “অচানক হন না। তোমরা উয়াকে খুজিবার  
নাগচেন? ঐ নাসারত গেরামের যীশু, যাক ক্রুশ-খুটাত টাণ্ডেয়া  
থোয়া হইচে? উয়ায় তো এটেকোনা নাই, মরণক জয় করি বত্তি  
উঠিচে। এটেকোনা উমরা উয়াক থুইয়া দিচে, আসিয়া দেখ।

৭ তোমরা দেখিয়া, পিতর আর অইন্য অইন্য চেলালাক যায়া  
কন, উয়ায় তোমারলার সগারে আগত গালীল প্রদেশত যাবার  
নাগচে। যেই নাকান করি কইচে, ঐ নাকান করি দেখির  
পাইবেন।”

৮ আর বেটিছাওয়ালা কোনো কিছুই বুঝির না পায়া ভয়ে  
কাপিতে কাপিতে গুহা হাতে বিরিয়া দৌড় মাড়িলেক। এত ভয়  
পাইলেক যে কাণ্ডোকো কিছুই কইলেক না।

৯ বত্তি উঠার পাছত, দেওবার খুব ভোরে, যীশু মগদলিনী  
মরিয়মক পরথম দেখা দিলেক। এই মরিয়মের ভিত্তিরা হাতে যীশু  
সাতটা অপদেবতাক খেদাইচে।

১০ উয়াক দেখির পাছত মরিয়ম য়ায়া যীশুর সঙ্গী-সাথীলাক খবর দিলেক। ঐ সমায় উমরা মনের দুঃখে কান্দিবার ধরিলেক।

১১ যীশু যে বত্তি উঠিচে, আর মরিয়ম উয়াক দেখিচে; এই নাকান কতা শুনিয়া উমরা বিশ্বাস করিলেক না।

১২ ইয়ার পাছত দুই জন চেলা গেরামত হাটি বেড়াইতে কালে যীশু অইন্য নাকান চেহারা নিয়া দেখা দিলেক।

১৩ আর উমরা ফিরি য়ায়া সউগ চেলালাক এই খবরটা দিলেক। কিন্তুক উমরাও বিশ্বাস করিলেক না।

১৪ ইয়ার পাছত এগারো জন চেলা য়েলা খাবার ধরচে, সেলা যীশু উমারলাক দেখা দিচে। বিশ্বাসের অভাব আর উমারলার অন্তর পাষানের নাকান হওয়ার বাদে যীশু উমারলাক দাবরাইলেক। কেনেনা মরণ থাকি বত্তি উঠার পাছত যায় যায় উয়াক দেখিচে উমারলার কতা চেলালা কিন্তুক বিশ্বাস করিলেক না।

১৫ যীশু ঐ চেলালাক কইলেক, “তোমরা দুনিয়ার সউগ জাগাত যাও, আর মানষির-টে ভগবানের দেওয়া ভাল খবর প্রচার কর।

১৬ যে কাণ্ডে বিশ্বাস করে, আর জল দিয়া দীক্ষা নেয়, উয়ায় পাপ থাকি মুক্তি পাবে। কিন্তুক যায় বিশ্বাস করিবার নোয়ায়, উয়াক দোষী কয়া শাস্তি দিবে।

১৭ যায় বিশ্বাস করে উমারলার মইন্ধোত এই চিন দেখা দিবে। উমরা মোর নামে অপদেবতা খ্যেদাবে, নয়া ভাষাত কতা কবে,

১৮ হাতত সাপ উঠাবে, আর যদি দারুন বিষ খায় কোনয় ক্ষতি হবার নোয়ায়। আর উমরা অসুকিয়া মানষির দেহাত হাত দিলে, মানষিলা ভাল হইবে।”

১৯ উমারলার নগত কতা কওয়ার পাছত প্রভু যীশুক স্বর্গত তুলিয়া নেওয়া হইলেক। ওটেকোনা ভগবানের ডাইন পাকে বসিলেক।

২০ চেলালা যায়া সউগ জাগাতে ভগবানের দেওয়া ভাল খবর প্রচার করিবার নাগিলেক। আর প্রভু উমারলার নগত চিন কাম করিতে করিতে ভাল খবরটা যে সচাং, এইটা প্রমাণ করিবার নাগিলেক॥

# লুক

১ মানিগুনী শ্রী থিয়ফিল, হামার নিজের মানষিলার মইন্ধোত একটা বিশেষ ঘটনা ঘটিচে। পইলা থাকি যায় যায় নিজের চোখু দিয়া প্রভু যীশুর জীবনের ঘটনালা দেখিচে, উমরা এইলা ঘটনার প্রচার করিয়া হামারলাক জানাইচে। আর উমারলার কতা শুনিয়া মেলা মানষি যীশুর জীবনের কতা নেখিবার চেষ্টা করিচে। আর মুইও শুরু হাতে শেষ পর্যন্ত গোটায় ঘটনালা ভাল করি চান্দা-চান্দি করি একটার পাছত একটা ঘটনা সাজে-গোজে এই বইখান নেখিচুং।

৪ ইয়াতে বইখান পড়িয়া তোমরা বুঝির পাবেন যে, যীশুর সমন্ধে যেইলা জানিচেন, সেইলা সউগে সচাং।

৫ হেরোদ যেলা যিহুদীয়া প্রদেশের রাজা, সেলা সখরিয় নামের এক জন বামন আছিলেক। আর উয়ায় অবিয়ের দলের। উয়ার বউ এলিজাবেদ আছিলেক আগের কালের মহা বামন হারনের গুষ্টির।

৬ সখরিয় আর এলিজাবেদ দুইজনে পরম প্রভু ভগবানের চোখুত ধার্মিক আছিলেক। ভগবানের সউগ বিধি নিয়ম উমরা নিখুঁতিয়ার নাকান করি মানি আসির ধরছিলেক।

৭ কিন্তুক উমার কোন ছাওয়া আছিলেক না কেনেনা এলিজাবেদ আটকুরি আছিলেক। আর দুইজনারে বয়স খুব হয়।



গেইচে।

৮ একবার অবিয়াথর দলের বামনলার উপরা ভগবানের সেবা করির ভার পড়িলেক, আর সেলো বামনের নিয়ম অনুসারে সখরিয়র সেবা করিবার পালা পড়িলেক।

৯ বামনের বিধি মতন সখরিয়ক বাছাই করি নেওয়া হয়, যাতে করি পরমপ্রভুর দশংগতি মন্দিরের পবিত্র জাগাত যায়া ধূপ জ্বলের পারে।

১০ যেলো উয়ায় ধূপ জ্বলের ধরচে সেলো মেলা মানষি বায়রাত জোটো হয় প্রার্থনা করির ধরচে।

১১ এই নাকান সমায় পরম প্রভুর এক জন স্বর্গদূত ধূপ জ্বলের বেদীর ডাইন পাকে আসিলেক।

১২ স্বর্গদূতটাক দেখিয়া সখরিয় আতঙ্ক হয় ভয়ে অস্থির হইলেক।

১৩ কিন্তুক স্বর্গদূতটা কইলেক, “সখরিয়, ভয় না খাইস! ভগবান তোর প্রার্থনা শুনিচে। তোর বউ এলিজাবেদের একটা চ্যেংড়া ছাওয়া হইবে। উয়ার নাম খুবু যোহন।

১৪ আর উয়ার জন্মের তানে তোর জীবনত সুখ আর আনন্দ আসিবে। মেলা মানষি আনন্দও করিবে।

১৫ তোর বেটা তো পরম প্রভু ভগবানের চোখুত মহান হইবে। মদ, আংগুরের রস কোন দিনও খাবার নোয়ায়, আরো জন্ম হাতে পবিত্র আত্মাত ভরপুর হইবে।

১৬ মেলা ইজ্রায়েলী জাতির মানষিক উমার পরমপ্রভুর ঘাটাত ঘুরি আনিবে।

১৭ ভগবানের আগের কালের ভাববাদী এলিয়র যেই নাকান ধার্মিক মনোভাব আরো ক্ষমতা, সেই নাকান তোরও বেটা। প্রভু আইসার আগত প্রভুর বাদে মানষিলাক তৈয়ারি করিবে। বাপের মন বেটার পাকে ঘুরাবে। ভগবানক মানে না এই নাকান মানষিলাক মনের ঘাটাত ঘোরেয়া ভগবানক মানা মানষির নাকান বাদ্ধ করাবে।”

১৮ সেলা সখরিয় স্বর্গদূতটাক কইলেক, “এইলা মুই ক্যেমন করি জানির পাইম! মুই তো বুড়া হয় গেচুং, মোর বউও বুড়ি হয় গেইচে।”

১৯ স্বর্গদূতটা কইলেক, “মোর নাম গাব্রিয়েল। মুই ভগবানের এক জন বিশ্বস্ত দাস। মুই ভগবানের আগপাকে খাড়া হয় থাকং। তোর নগত কতা কবার, আর এই ভাল খবরটা কবার বাদে ভগবান মোক পেঠ্যাইচে।

২০ তুই এই কতাটা শোনেক, মোর কতা ঠিক সমায় পূরণ হইবে। কিন্তুক মোর কতা তুই বিশ্বাস করিস নাই বুলিয়া যত দিন এই ঘটনাটা না ঘটে ততদিন বোবা হয় থাকিবু।”

২১ এই সমায় বাইরার মানষিলা উয়ার বাদে বাচ্ছে রবার নাগিলেক। উমরা অচানক হয় ভাবিবার নাগিলেক যে, মন্দিরের পবিত্র জাগাত এতক্ষণ কি করে?

২২ সখরিয় মন্দির হাতে বাইর হয় আসিয়া কারো সাথত কতা কবার পাইলেক না। বোবা হয় গেইচে, তারে বাদে উয়ায় ইশারা দিয়া কতা কবার নাগচে। ইয়াতে মানষিলা বুঝির পাইলেক যে, উয়ায় মন্দিরত কোন দর্শন পাইচে।

২৩ সখরিয় বামনের কাম শেষ না হওয়া পর্যন্ত মন্দিরের ওটেকোনা রইলেক। যেলা বামনের কাম শেষ হইলেক সেলা বাড়ি চলি গেইলেক।

২৪ ইয়ার কয়েক দিন পাছত এলিজাবেদ গাওভারী হইলেক, আর পাঁচ মাস পর্যন্ত বাড়ির বায়রাত গেইলেক না।

২৫ উয়ায় কইলেক, “প্রভু মোর জীবনত এই কামটা করচে! মানষির মইদ্ধোত মোর যে আটকুরি হবার নইজ্জা আছিলেক, এইটা দূর করি দিচে। ভগবান মোর ভিতি চোখু তুলি দেখিচে।”

২৬-২৭ এলিজাবেদের গাওভারী হবার ছয় মাস হইলেক। ভগবান সেলা গাব্রিয়েল দূতক গালীল প্রদেশের নাসারত গেরামের কুমারী মরিয়মের ওটেকোনা পেঠাইলেক। এই কুমারী মরিয়মের নগত যোষেফ নামে এক জন মানষির নিরক্ষণ হয় গেইলেক। যোষেফ আছিলেক চৌদ্দ গুষ্টির মহারাজা দায়ূদের গুষ্টির।

২৮ গাব্রিয়েল স্বর্গদূত আসিয়া মরিয়মক কইলেক, “হে কুমারী, প্রভু তোর সাথত আছে, তোক আশুর্বাদ করিচে।”

২৯ এই কতা শুনতে কালে মরিয়মের মনটা খুব অস্থির হইলেক, আর মনে মনে ভাবিবার নাগিলেক, “আরে! এইটা কি নাকানের কতা?”

৩০ স্বর্গদূত মরিয়মক কইলেক, “তুই হাতাস না খাইস মরিয়ম, ভগবান তোক আশুর্বাদ করিচে।

৩১ শোনেক! তুই গাওভারী হবু আর তোর একটা চেংড়া ছাওয়া জন্ম হইবে, উয়ার নাম থুবু যীশু।

৩২ উয়াক মহান আরো পরমপ্রভুর বেটা কওয়া হইবে। ভগবান উয়াক চৌদ্দ গুষ্টির মহারাজা দায়ূদের নাকান ক্ষমতা আরো সিংহাসন দিবে।

৩৩ উয়ায় ভগবানের বাছাই করা যাকব বংশের উপরাত চিরকাল শাসন করিবে। ঐ শাসন ব্যবস্থা কোনো দিন শেষ হবার নোয়ায়।”

৩৪ মরিয়ম স্বর্গদূতটাক কইলেক, “এইটা কেমন করি হবার পায়? মোর তো বিয়াও হয় নাই।”

৩৫ মরিয়মক স্বর্গদূতটা কইলেক, “পবিত্র আত্মা তোর উপরাত ভর করিবে, আর পরমপ্রভুর মহাশক্তি, ছায়ার নাকান করি তোক ঢাকি নিবে। এই বাদে যে পবিত্র ছাওয়াটা জন্ম নিবে উয়াক ভগবানের বেটা কওয়া হইবে।

৩৬ আরো শোনেক, তোমার সাগাই এলিজাবেদ বুড়ি বয়সে গাওভারী হইচে। সগায় না কইচে উয়ার ছাওয়া-ছোট হবার

নোয়ায়। এলা উয়ায় গাওভারী হবার ছয় মাস হইচে।

৩৭ কেনেনা ভগবানেরটে অসম্ভবের কিছুই নাই।”

৩৮ মরিয়ম কইলেক, “মুই প্রভুর চাকরানী, তোমরা যেইটা কইলেন সেইটায় হউক।” ইয়ার পাছত স্বর্গদূতটা মরিয়মের ওটে হাতে চলি গেইলেক।

৩৯ খানিক পাছত মরিয়ম পচপচ করিয়া যিহুদী প্রদেশের পাহাড়ি এলাকার একটা গঞ্জত আসিলেক।

৪০ ওটেকোনা সখরিয় আর এলিজাবেদের বাড়ি। উমার বাড়িত সোন্দেয়া মরিয়ম এলিজাবেদোক ভক্তি দিলেক।

৪১ এলিজাবেদ যেলা মরিয়মের কতা শুনিলেক সেলা উয়ার পেটের ছাওয়াটা নাচি উঠিলেক, আরো এলিজাবেদের উপরাত পবিত্র আত্মা ভর করিলেক।

৪২ উয়ায় পবিত্র আত্মাত পূরণ হয় জোরে জোরে কবার নাগিলেক, “সউগ বেটিছাওয়ার মইন্ধোত তুই ভাগ্যবতী! তোর যে ছাওয়াটা আছে, উয়াও আশুর্বাদ পাওয়া।

৪৩ মোর মালিকের মাও মোর এটেকোনা আসিচে, এত ভাগ্যবতী মুই কেমন করি হলুং!

৪৪ যেলায় মুই তোর কতা শুনির পাইলুং সেলায় মোর পেটের ছাওয়াটা আনন্দে নাচিয়া উঠিলেক।

৪৫ তুই ভাগ্যবতী কেনেনা তুই বিশ্বাস করিচিস যে, পরম প্রভু ভগবান যেইলা কইচে সেইলা পূরণ হইবে।”

৪৬ মরিয়ম কইলেক, “মোর মন-পরান পরমপ্রভুর করির ধরচে গুণগান।

৪৭ হে মোর মুক্তিদাতা! হে ভগবান! উথুলি উঠিচে মোর মন-পরান।

৪৮ এই অধম দাসীর ভিত্তি দিচিস ধ্যান, এলা মোক সউগ মানষি কবে ভাগ্যবতী।

৪৯ প্রভু পবিত্র মহান! উয়ায় সর্বশক্তিমান, মোর জীবনের বাদে কত মহান কাম করিচে! মহান!

৫০ যায় যায় মানে উয়াক, উমার বংশের পর বংশ ধরি মায়া করে।

৫১ নিজের হাত দিয়া মহাশক্তির কাম করিচে। যার যার মন অহংকারে ভরি গেইচে, উমাক চাইরো পাকে ছিন্ন ভিন্ন করি দূরত থুইচে।

৫২ সর্বশক্তিমান ভগবান সিংহাসন হাতে রাজালাক নামে দিয়া ফকির বানাইচে, আর যায় যায় নত-নম্র উমাক রাজ সিংহাসনত বসাইচে।

৫৩ দীন দুঃখীলাক উয়ায় ভাল ভাল জিনিস দিচে, কিন্তুক ধনী মানষিলাক খালি হাতে বিদায় করিচে।

৫৪-৫৫ পরম প্রভু হামার চৌদ গুটিরটে করিচে পন। উয়ার চাকর ইজ্রায়েলীলাক সাহায্য করির আইসচে। মহাপুরুষ অব্রাহাম আর উয়ার গুটির মানষিলাক চিরদিন মায়া করিয়া অমৃত জীবন দিবার কতা মনত থুইচে।”

৫৬ ইয়ার পাছত মরিয়ম পেয়ায় তিন মাস পর্যন্ত এলিজাবেদের বাড়িত রইচে, আর তার পাছত নিজের বাড়ি চলি গেইচে।

৫৭ এলিজাবেদের ছাওয়া হবার সমায়, একটা চেংড়া ছাওয়ার জন্ম হইলেক।

৫৮ সেয়া উয়ার পাড়া-পরশী সাগাই সোদর শুনিলেক যে, পরম প্রভু ভগবান এলিজাবেদের ভিতি মহা দয়া করিচে, আর সগায় এক সাথে আনন্দ করিলেক।

৫৯ ছাওয়ার জন্মের আট দিন পাছত পবিত্র যিহুদী জাতির সউগ চেংড়া ছাওয়ার দেহাত চিন দিয়া নাম থোয়া হয়। সাগাই সোদোর বন্ধু-বান্ধব, ওটেকোনা আসিয়া উমরা সগায় ছাওয়াটার বাপের নামে সখরিয় নাম থুবার চাইলেক।

৬০ কিন্তুক ছাওয়াটার মাও কইলেক, “না! ইয়ার নাম যোহন থুবার নাগিবে।”

৬১ মানষিলা এলিজাবেদোক কইলেক, “না তো! তোমার সাগাই সোদরের মইন্ধোত কারো এই নাকানের নাম নাই।”

৬২ উমরা ইশারা করিয়া ছাওয়াটার বাপক পুছিলেক, উয়ায় কি নাম থুবার চায়। (ক্যেনেনা সখরিয় স্বর্গদূতের কতা বিশ্বাস না

করিয়া বোবা হইছিলেক।)

৬৩ সখরিয় ইশারা করিয়া একখান নেখিবার জিনিস চায়া নিয়া ঐখানত নেখিলেক, “উয়ার নাম যোহন।” সগায় অচানক হইলেক,

৬৪ আর সেলোয় সেলোয় বোবা মুখ খুলি যায়া উয়ায় কতা কবার নাগিলেক আর ভগবানের গুণগান করির নাগিলেক।

৬৫ এইটা দেখিয়া পাড়া-পরশী সগায় ভয় খায়া অচানক হইলেক, এইটা কি ঘটনা? যিহুদীয়া দেশের পাহাড়ি এলাকার মানষিলা সগায় এই ঘটনা নিয়া কওয়া-কয়ি করির নাগিলেক।

৬৬ আর যত মানষি এই কতাটা শুনিলেক সগায় মনে মনে চিন্তা-ভাবনা করির নাগিলেক, “ভবিষ্যতে এই ছাওয়াটা কি হবার পায়? কেনেনা পরম প্রভু ভগবানের ক্ষমতা উয়ার সাথত আছে।”

৬৭ ছাওয়াটার বাপ সখরিয় পবিত্র আত্মাত ভরপুর হয়া ভগবানের দেওয়া কতা কইলেক,

৬৮ “ইজ্রায়েলের পরমপ্রভুর হউক গুণগান, নিজের মানষিলাক করিচে মুক্তি আরো দিচে ধ্যান।

৬৯ রাজা দায়ূদ প্রভুর চাকর, উয়ার গুষ্টি থাকি, হামার মুক্তিদাতাক পেয়াইচে, উয়ায় শক্তিশালী।

৭০ পবিত্র ভাববাদীলার মইন্ধো দিয়া মেয়ো দিন আগত করিচে কিরা,



৭১-৭৩ চৌদ্দ গুষ্টি অব্রাহামের নগত যে পবিত্র দয়ার চুক্তি, ভগবান এইটা মনে করিয়া হামাক দিচে মুক্তি।

৭৪-৭৫ শত্রুর ঘিন থাকি উদ্ধার করিচে, ইয়াতে ভয় না করিয়া সৎ আর ধার্মিক জীবন যাপন করিয়া করি প্রভুর সেবা।

৭৬ বেটা, প্রভুর আইসার আগত মানষির মনের ঘাটা বানাবু যাতে প্রভুর আইসার সমায় উয়াক মানি নিবার পাইবে। তোক পরম প্রভু ভগবানের ভাববাদী কবে।

৭৭ কেনেনা উয়ার মানষিলাক এমন মুক্তির কতা কবু যে, পাপ হাতে ক্ষমা পায়া

৭৮ পরম প্রভু ভগবানের দয়া-মায়া তোমার উপরাত নামি আসিবে। আর প্রভু আইসার সমায়, এক নয়া দিনের ভোরের বেলা উঠার আলো, যে নাকান করি হামার উপরাত পরিবে।

৭৯ আন্ধারের মইন্ধোত আর মরণের ছায়াত, যায় যায় বসি আছে, নয়া দিনের আলো পায়া শান্তির ঘাটাত যাবার পায়।”

৮০ পাছত যোহন বড় হবার নাগচে, আর অন্তরত শক্তিশালী হয় গেইচে। ইজ্রায়েলী মানষিলাক প্রচার শুরু না হওয়া পর্যন্ত উয়ায় নিধুয়া পাথারত থাকিলেক।

২ ঐ সমায় রোমের মহারাজা আগস্ত সউগ জাগাতে মানষি গণনার নাম নেখেবার বাদে হুকুম জারি করিলেক।

২ সময়টা হইলেক, সিরিয়ার রাজ্যপাল কুরানির সময়। এই পইলাবার নাম নেখির বাদে মানষি গণতি করা হয়।

৩ নাম নেখেবার বাদে সগায় নিজের নিজের গঞ্জত গেইলেক।

৪-৫ আর যোষেফ আছিলেক চৌদ্দ গুষ্টির মহারাজা দায়ূদের গুষ্টির মানষি। মহারাজা দায়ূদের জন্মের জাগা আছিলেক, যিহুদীয়া প্রদেশের বৈৎলেহেম গেরাম। নাম নেখেবার বাদে গালীল প্রদেশের নাসারত গেরাম থাকি বৈৎলেহেম গেইলেক। উয়ার নিরক্ষণ করা কইনা মরিয়মক সাথত নিয়া গেইলেক। মরিয়ম গাওভারী আছিলেক।

৬ উমরা য়েলা বৈৎলেহেমত পৌছাইলেক স্যেলা মরিয়মের ছাওয়া জন্ম হবার সময় হইলেক,

৭ আর উয়ায় পইলা চেংড়া ছাওয়াটার জন্ম দিলেক। কিন্তুক কোন ভাল ডারি ঘরত থাকিবার না পয়া, ছাওয়াটাক কাপড় দিয়া জড়েয়া গোয়ালী ঘরত যেটেকোনা গরুক খাবার দেওয়া হয় ওটেকোনা শোতে থুইলেক।

৮ ওটেকোনা বৈৎলেহেমের বগলত ডাবরিত রাতির বেলাত কয়েক জন রাখোয়াল ভেড়ার পাল পাহারা দিবার ধরছিলেক।

৯ ঐ সময় অচমকায় পরম প্রভুর এক জন স্বর্গদূত উমার বগলত আসিয়া পরম প্রভু ভগবানের মহিমা দেখেয়া চাইরো পাকে ভৈই-ভৈইয়া আলো হইলেক। এই দেখিয়া রাখোয়ালনা ভয় খাইলেক।

১০ সেলো স্বৰ্গদূত উমাক কইলেক, “ভয় না খান! মুই তোমার বাদে ভাল খবর নিয়া আসচুং। এই খবরটা সগারে বাদে মহা আনন্দের হইবে।

১১ কেনো আজি মহারাজা দায়ুদের গঞ্জত তোমারলার মুক্তিদাতার জন্ম হইচে। উয়ায় ভগবানের বাছাই করা রাজা, উয়ায় মালিক।

১২ এই কতাটা যে সচাং, তোমরা একটা চিন দেখির পাবেন এই নাকান, ছাওয়াটাক কাপড়ত জড়েয়া গোয়ালী ঘরের খোরত শোতেয়া থোয়া হইচে।”

১৩ পইলা স্বৰ্গদূতটার নগত হঠাৎ করি আরো মেলা স্বৰ্গদূত একটে হইলেক, আর উমরা সগায় ভগবানের গুণগান করির নাগিলেক,

১৪ “সনাতন ভগবানের জয় হউক! জয় হউক! স্বৰ্গত ভগবানের গৌরব হউক, আর এই দুনিয়াত উয়ার মনের মানষিলার শান্তি হউক।”

১৫ স্বৰ্গদূতলা উমারলাক ছাড়িয়া স্বৰ্গত চলি গেইলেক, সেলো রাখোয়াললা এক জন আরেক জনক কবার নাগিলেক, “চল, হামরা বৈৎলেহেম যাই। যে কতা প্রভু হামাক কইলেক যয়া দেখি!”

১৬ রাখোয়াললা পচ-পচে যয়া মরিয়ম আর যোষেফের নগত গোয়ালীর খোরত ছাওয়াটাক শোতেয়া থোয়া দেখির পাইলেক।

১৭ এই দেখিয়া ছাওয়াটার সমক্ষে যে কতা কওয়া হইচে সেই কতালা উমরা সগাকে কইলেক।

১৮ ইমার কতা শুনিয়া সগায় অচানক হইলেক।

১৯ কিন্তুক মরিয়ম এই কতাটা মনত গাথিয়া আকুল হয়। ভাবিবার নাগিলেক।

২০ রাখোয়াললাক য়েংকরি কওয়া হইচে, অংকরি সউগ দেখি শুনি ভগবানের মহিমার গুণগান করিতে করিতে ভেড়ার পালের ঐটে চলি গেইলেক।

২১ ছাওয়া জন্মের আট দিন পাছত পবিত্র যিহুদী জাতির প্রতিটা চেংড়া ছাওয়ার দেহাত চিন দিয়া নাম থোয়া হয়। আর একে নাকান করি মরিয়মের ছাওয়াটার নাম থোয়া হইলেক, “যীশু”। কেনেনা মরিয়ম গাওভারী হবার আগত স্বর্গদূত এই নামটা থুইচে।

২২-২৪ মহাপুরুষ মোশির বিধান মতে যিহুদীলার ছাওয়া জন্মের পাছত শুদ্ধি হবার একটা অনুষ্ঠান করা হয়। প্রভুর বিধানোত নেখা আছে এক জোড়া ঘুঘু নাতে এক জোড়া কইতর বলি দিবার নাগিবো। এইলা ছাড়াও প্রভুর বিধানত আছে, “কোন বেটিছাওয়ার পইলা চেংড়া ছাওয়া জন্ম হইলে প্রভুরটে সঁপে দিবার নাগিবো।” এইলা বিধান মানিবার বাদে মরিয়ম আর যোষেফ যিরুশালেমের দশংগতি মন্দিরত যায়া এই নাকান করিচে।

২৫ ঐ সমায় যিরুশালেমত শিমিয়োন নামের এক জন মানষি আছিলেক। উয়ায় ধার্মিক আর ভগবান ভক্ত। ভগবান কোন দিন ইজ্রায়েলী মানষিলার দুঃখ দূর করিবে, এই বাদে উয়ায় বাচ্ছে আছিলেক। পবিত্র আত্মা উয়ার সাথত ছিলেক।

২৬ পবিত্র আত্মা উয়াক আশ্বাস দিছিলেক যে, পরম প্রভু ভগবানের বাছাই করা রাজাটাক না দেখিলে শিমিয়োন মরিবে না।

২৭ সেই দিন শিমিয়নক ভগবানের আত্মা চালনা করি নিয়া গেইলেক যিহুদীলার দশংগতি মন্দিরত। আর একেই দিনে যীশুর বাপ-মাও মোশির বিধান মতে যেইলা করা দরকার সেইলা করির বাদে কাচুয়া ছাওয়া যীশুক নিয়া ঐ মন্দিরত গেইলেক।

২৮ শিমিয়োন কাচুয়া যীশুক কোলাত নিয়া ভগবানক ধন্যবাদ দিয়া কইলেক,

২৯ “হে প্রভু! এলা তোর বাইক্য মতন তোর এই চাকরক শান্তিতে বিদায় দে!

৩০-৩১ কেনেনা সউগ জাতির চোখুর আগত তুই যে মুক্তিদাতাক পেয়েঠেয়া দিচিস, উয়াক মুই নিজের চোখু দিয়া দেখির পালুং।

৩২ অইন্য জাতির মনত আলো দিবার বাদে আইসচে। তোর ইজ্রায়েলী জাতির এইটা গৌরবের বিষয়।”

৩৩ শিমিয়োন ছাওয়াটার বিষয় যেইলা কইলেক, এইলা শুনিয়া ছাওয়াটার বাপ-মাও অচানক হইলেক।

৩৪ ইয়ার পাছত শিমিয়োন উমাক আশুবাদ করিলেক আর যীশুর মাও মরিয়মক কইলেক, “ভগবান আগতে এইটা থির করি থুইচে, এই ছাওয়াটার মইদ্বো দিয়া মেয়ো ইজ্রায়েলী মানষি মুক্তি পাবে, আরো মেয়ো ইজ্রায়েলী মানষি নাশ হইবে। আর উয়ায় একটা এই নাকান চিন হইবে যে, মেয়ো মানষির চোখুর বৈরী হইবে।

৩৫ ইয়াতে মেয়ো মানষির অন্তরের গোপন চিন্তা ভাবনা বিরিয়া আসিবে। আর মরিয়ম তুইও ফম থুইস কাটার গুতার নাকান করি তোর মনত দুঃখ-কষ্ট দিবে।”

৩৬-৩৭ ওটেকোনা হান্না নামে এক জন বেটিছাওয়াও আছিলেক। উয়ায় ভগবানের ভাববাদী, আরো আশের গুষ্টির পনুয়েলের বেটি। আর এলা উয়ার বয়স চুরাশি হয় গেইচে, বিয়াও করার পাছত সাত বছর খালি সোয়ামির সাথত ঘর সংসার করিচে। হান্নার সোয়ামি মরার পাছত উয়ায় বিধুয়া হয় দশংগতি মন্দির ছাড়িয়া কোনটে যায় নাই, খালি উপাস প্রার্থনা করিয়া দিন রাতি ভগবানের সেবা করির ধরচে।

৩৮ ঠিক ঐ সমায় যেয়ো শিমিয়োন যোষেফ আর মরিয়ম কতা কবার ধরচে, হান্না সেয়ো ভগবানের ধন্যবাদ করির নাগিলেক। আর যায় যায় যিরুশালেমের মুক্তির বাদে বাছে আছিলেক,

উমারলাক ছাওয়াটার সমন্ধে কবার নাগিলেক, “মুক্তিদাতা আইসচে!”

৩৯ পরমপ্রভুর বিধান মতে যেইলা করা দরকার সউগে করিয়া যোষেফ মরিয়ম উমরা নিজের গঞ্জত গালীলের নাসারত গেরামত ফিরি আসিলেক।

৪০ কাচুয়া ছাওয়া যীশু বড় হইতে হইতে শক্তিবান আরো খুব জ্ঞানী-গুণী হবার নাগিলেক। উয়ার উপরাত ভগবানের আশুর্বাদ আছিলেক।

৪১ মুক্তি ভোজ পার্বনের সমায় যীশুর মাও বাপ পত্তি বছর যিরুশালেম যায়।

৪২ যীশুর বয়স যেলা বারো বছর, সেলাও উমরা রীতি-নীতি মতন মুক্তি ভোজ পার্বনত গেইলেক।

৪৩ পার্বনের শেষত যেলা উমরা বাড়ি ফিরি আসির ধরলেক, সেলা যীশু যিরুশালেমত রয়া গেইলেক। কিন্তুক উয়ার মাও বাপ কোন কিছুই জানির পাইলেক না।

৪৪ উমরা মনে করিলেক যে, হয় তো সঙ্গী-সাথীর নগত আছে, এই মনে করিয়া এক দিনের ঘাটা হাটার পাছত সঙ্গী-সাথী, সাগাই-সোদোরের মইদ্বোত যীশুক খুজিবার নাগিলেক।

৪৫ কিন্তুক দেখির না পায়া উমরা চান্দাইতে চান্দাইতে আরো যিরুশালেমত চলি গেইলেক।

৪৬ তিন দিন পাছত উয়াক দশংগতি মন্দিরের ওটেকোনা খুজিয়া পাওয়া গেইলেক। উয়ায় ধর্ম গুরুলার সাথত বসিয়া উমার কতা শুনিবার ধরচে। আরো উমাক প্রশ্ন পুছির ধরচে।

৪৭ যায় যায় যীশুর কতা শুনিলেক সগায় উয়ার বুদ্ধি দেখিয়া আরো উয়ার সঠিক উত্তর শুনিয়া অচানক হইলেক।

৪৮ যেলা উয়ার বাপ-মাও উয়াক দেখির পাইলেক, উমরাও অচানক হইলেক। উয়ার মাও পুছিলেক, “কিরে বাউ! কেনে তুই এই নাকান করিলু? তোর বাবা আর মুই ব্যাকুল হয় খুজিবার নাগচি।”

৪৯ যীশু উমাক কইলেক, “তোমরা কেনে মোক খুজিবার নাগচেন? তোমরা কি জানেন না? মোক মোর বাপের বাড়িত রওয়ার নাগিবে।”

৫০ কিন্তুক যীশু যেইলা কইলেক, সেইলার মানে উমরা বুঝির পায় নাই।

৫১ ইয়ার পাছত যীশু উমার সাথত নাসারত গেরামত ফিরি আসিলেক। আর বাপ-মাওয়ের বাদ্ধ হয় থাকিলেক। উয়ার মাও এই কতালা মনত থুইলেক।

৫২ আর এদিয়া যীশু মানষি আরো ভগবানের আশুর্বাদে বয়সে জ্ঞানে বড় হবার নাগিলেক।



৩ এই কালটা হইলেক রোমের মহারাজা তিবিরিয়াস আগাস্তের পনেরো বছর শাসনের সময়। ঐ সময়, যিহুদীয়া প্রদেশের রাজ্যপাল: পন্তীয় পীলাত; আর গালীল প্রদেশের রাজা: হেরোদ; যিতুরিয়া আর ত্রাখোনীতিয়ার রাজা: হেরোদের ভাই ফিলিপ; অবিলীনির রাজ্যপাল আছিলেক: লুমানিয়া;

২ আর যিহুদীলার মহাবামন: হানন আর কাইফা আছিলেক। ঠিক এই সময় সখরিয়র বেটা যোহনক নিধুয়া পাথারত ভগবান ভাল খবরটা জানাইলেক।

৩ উয়ায় যর্দন নদীর চাইরো পাকের মানষিলারটে প্রচার করিলেক, “তোমরা ক্ষমা পাবার বাদে পাপের ঘাটা হাতে মন ফিরান আর চিন হিসাবে জল দিয়া দীক্ষা নেন।

৪ ভগবানের আগের কালের ভাববাদী যিশাইয় যেই নাকান করি শাস্ত্রত নেখিচে, ‘এক জন নিধুয়া পাথারত চিকিরিয়া কবার নাগচে, পরম প্রভু আসিবার বাদে মনের ঘাটা ঠিক কর! ঘাটাটা সোজা কর!

৫ সউগলায় খাল মঞ্জা হইবে, পাহাড়-পর্বত সমান করা হইবে, টেরিয়া-ভ্যেকরা ঘাটা সোজা করা হইবে, হেটা উচা ঘাটা সমান করা হইবে।

৬ ভগবান মানষিক মুক্তি দিবার বাদে যাক পেঠাইচে, উয়াক সউগ জাতির মানষি জানিয়া দেখির পাবে।”

৭ যোহন মেয়ো ভিরের মানষির মইন্ধোত ধর্মের প্রচার করির নাগিলেক। সেয়ো মেয়ো মানষি জল দিয়া দীক্ষা নিবার বাদে যোহনেরটে আসিলেক। আর যোহন উমাক কইলেক, “কিরে! কাল সাপের গুষ্টি! ভগবানের যে বিচার তোমার উপরাত নামি আসির ধরচে, এইটার হাত থাকি পালেয়া বত্তিবার কায় তোমাক চেতনা দিলেক?”

৮ তোমাক প্রমাণ করি দেখেয়া দিবার নাগিবে যে, তোমরা পাপের ঘাটা থাকি মন ঘুরাইচেন। আর এই কতা না কন যে, অব্রাহাম তোমার চৌদ গুষ্টির। ভগবান তো এই শিলগুলা থাকি অব্রাহামের বাদে ছাওয়া সিজ্জন করির পারে।

৯ বিচারের বাদে গছের শিপাত কুড়াল এলাও নাগে দেওয়া আছে। আর যেইলা গছ ভাল ফল দিবে না ঐলা গছক কাটিয়া অগুনত ছোবা দেওয়া হইবে।”

১০ সেয়ো ভিরের মানষিলা পুছিলেক, “তাইলে হামাক কি করির নাগিবে?”

১১ যোহন উমাক কইলেক, “যদি তোমার কারো দুইটা জামা থাকে তাইলে যার জামা নাই উয়াক একটা দেও। আর যার খাবার আছে ঐলা ভাগ করি সগায় খাও।”

১২ কয়েক জন মাসুল আদায়কারী জল দিয়া দীক্ষা নিবার বাদে আসিলেক, আর উমরা যোহনক পুছিলেক “হ্যে বাহে গুরু, হামাক কি করির নাগিবে?”

১৩ যোহন উমাক কইলেক, “তোমার সততা দেখান, রোমীয় সরকারের আইনত যেই নাকান করি আছে, সেই নাকান করি মাসুল নেন। বেশী বেশী মাসুল আদায় না করেন।”

১৪ কয়জন সৈন্যও পুছিলেক, “এলা তাইলে হামারলাক কি করির নাগিবে?” যোহন কইলেক, “অন্যায় করি দোষ দেখেয়া বা জুলুম করি কারোটে থাকি কিছু আদায় করেন না, আর তোমরা যতকোনা বেতন পান অতকোনাতে মন খুশি থোন।”

১৫ সউগ মানষিলা খুব আশা নিয়া মনে মনে ভাবির নাগিলেক যে, যোহনে বুঝি বাছাই করা রাজা।

১৬ এমন সময় যোহন উমারলাক সগাকে কইলেক, “মুই তো তোমারলাক গাও ধোয়ে দীক্ষা দিবার ধরচুং, কিন্তুক যায় মোর থাকিও মহান, উয়ায় আসির ধরচে। উয়ায় এমন এক জন মহাপুরুষ, উয়ার জুতার ফিতা খুলি দিবারও যোগ্যতা মোর নাই। উয়ায় তোমার অন্তর আত্মা শুদ্ধি করির বাদে পবিত্র আত্মার অগুন দিয়া তোমারলাক দীক্ষা দিবে।

১৭ উয়ায় খোলান থাকি ফসলের ভুসি পরিষ্কার করির বাদে তৈরি হয়। আছে। বাতাস দিয়া একপাকে ভুসি অইন্য পাকে ফসল যুদা করি, ফসল গোলাত তুলিবে। তার পাছত ভিরার অগুনত নিয়া যায়া ভুসি ছোবা দিবে। ওই অগুন কোন দিনও নিভিবার না হয়।”

১৮ যোহন নানা নাকান উপদেশ আর উৎসাহ দিয়া মানষিলাকে ভাল খবর প্রচার করির নাগিলেক।

১৯ যোহন শাসনকর্তা হেরোদের বিরুদ্ধে নিন্দা করিলেক  
কেননা হেরোদ উয়ার বৌদি হেরোদিয়াক বিয়াও করিচে, আরো  
নানা নাকান বেয়া কাম করিচে। এই বাদে যোহন উয়ার নিন্দা  
করিলেক।

২০ সেলো হেরোদ কি করিলেক? যোহনক বন্দী করি হাজতোত  
থুইলেক। ইয়াতে হেরোদের অইন্য সউগ বেয়া কামের নগত এই  
বেয়া কামটাও যোগ হইলেক।

২১ এক দিন যোহন ভিড়ের মানষিলাক জল দিয়া দীক্ষা দিবার  
ধরচে, আর ঐ সমায় যীশু নিজেও দীক্ষা নিলেক। দীক্ষার পাছত  
যীশু যেলা প্রার্থনা করির ধরচে সেলো দ্যাওয়া দুই ফাইল্টা হয়,  
স্বর্গের দুয়ার খুলি গেইলেক।

২২ আর সেলো কি হইলেক? সেলোয় সেলোয় পবিত্র আত্মা  
কইতরের ঢক ধরিয়া উয়ার উপরা নামি আসিলেক। আর স্বর্গ  
হাতে এই কতা শোনা গেইলেক, “তুইয়ে মোর বেটা, মোর মনের  
এক জন। তোর উপর মুই খুশি আছং।”

২৩ পেরায় ত্রিশ বছর বয়স কালে যীশু গুরু হয় প্রচার করির  
শুরু করিলেক। কিন্তুক যীশুর জন্মের পাছত যোষেফে উয়াক  
মানষি করে, এই বাদে সমাজের সগায় জানে যীশু হইলেক,  
যোষেফের বেটা, যোষেফ এলির বেটা,

২৪ এলি মন্তথের বেটা, মন্তথ লেবির বেটা, লেবি মন্সির বেটা,  
মন্সি যান্নায়ের বেটা, যান্নায় যোষেফের বেটা,

২৫ যোষেফ মত্তথিয়ের বেটা, মত্তথিয় আমোষের বেটা, আমোষ  
নহুমের বেটা, নহুম ইষ্লির বেটা, ইষ্লি নগির বেটা,

২৬ নগি মাটের বেটা, মাট মত্তথিয়ের বেটা, মত্তথিয় শিমিয়ির  
বেটা, শিমিয়ি যোষেখের বেটা, যোষেখ যূদার বেটা,

২৭ যূদা যোহানার বেটা, যোহানা রীষার বেটা, রীষা  
সরুবাবিলের বেটা, সরুবাবিল শল্টিয়েলের বেটা, শল্টিয়েল  
নেরির বেটা,

২৮ নেরি মন্ধির বেটা, মন্ধি অদ্দীর বেটা, অদ্দী কোষমের বেটা,  
কোষম ইলমাদমের বেটা, ইলমাদম এর বেটা,

২৯ এর যীশুর বেটা, যীশু ইলীয়েষরের বেটা, ইলীয়েষর  
যোরীমের বেটা, যোরীম মত্তের বেটা, মত্ত লেবির বেটা,

৩০ লেবি শিমিয়োনের বেটা, শিমিয়োন যূদার বেটা, যূদা  
যোষেফের বেটা, যোষেফ যোনমের বেটা, যোনম ইলিয়াকীমের  
বেটা,

৩১ ইলিয়াকীম মিলেয়ার বেটা, মিলেয়া মিন্নার বেটা, মিন্না  
মত্তখের বেটা, মত্তখ নাথনের বেটা, নাথন দায়ূদের বেটা,

৩২ দায়ূদ যিশয়ের বেটা, যিশয় ওবেদের বেটা, ওবেদ বোয়সের  
বেটা, বোয়স সলমোনের বেটা, সলমোন নহশোনের বেটা,

৩৩ নহশোন অন্মীনাদবের বেটা, অন্মীনাদব অদমানের বেটা,  
অদমান অর্গির বেটা, অর্গি হিঞ্জোণের বেটা, হিঞ্জোণ পেরসের

বেটা, পেরস যিহুদার বেটা,

৩৪ যিহুদা যাকবের বেটা, যাকব ইসহাকের বেটা, ইসহাক  
অব্রাহামের বেটা, অব্রাহাম তেরহের বেটা, তেরহ নাহোরের বেটা,

৩৫ নাহোর সরুগের বেটা, সরুগ রিয়ুর বেটা, রিয়ু পেলগের  
বেটা, পেলগ এবরের বেটা, এবর শেলহের বেটা,

৩৬ শেলহ কৈননের বেটা, কৈনন অফকষদের বেটা, অফকষদ  
শেমের বেটা, শেম নোহের বেটা, নোহ লেমকের বেটা,

৩৭ লেমক মথুশেলহের বেটা, মথুশেলহ হনোকের বেটা, হনোক  
যেরদের বেটা, যেরদ মহললেলের বেটা, মহললেল কৈননের  
বেটা,

৩৮ কৈনন ইনোশের বেটা, ইনোশ শেথের বেটা, শেথ আদমের  
বেটা, আদম ভগবানের বেটা।

৪ যীশুক ভগবানের পবিত্র আত্মা ভরপুর করিলেক। এই পবিত্র  
আত্মা উয়াক চালনা করি যর্দন নদী হাতে নিধুয়া পাথারত নিয়া  
গেইলেক। ওটেকোনা শয়তান-অসুর চল্লিশ দিন লোভ নালসাত  
ফ্যেলেবার চেষ্টা করিলেক। এই চল্লিশ দিনের মইন্ধোত যীশু  
কিছুই খাইলেক না, এই বাদে যীশুক খুব ভোগ নাগিলেক।

৩ শয়তান-অসুর যীশুক কইলেক, “তুই যদি ভগবানের বেটা  
হইস, তাইলে এই শিলটাক রুটি হবার কঃ।”

৪ যীশু উত্তর দিলেক, “শাস্ত্রত নেখা আছে, মানষি খালি রুটিতে বত্তে না।”

৫ তার পাছত শয়তান-অসুর যীশুক উচা জাগাত নিয়া গেইলেক, আর নিমিষের মইন্ধে জগতের সউগ রাজ্য উয়াক দেখাইলেক।

৬ উয়ায় যীশুক কইলেক, “মুই তোক সউগ রাজ্যলার জাকজমক আর শাসন করির অধিকার দিম। কেনেনা এইলা মোক দেওয়া হইচে। মোর ইচ্ছা যাকে দিবার চাং তাকে দিবার পাং।

৭ এলা তুই যদি মোক ভক্তি করিস, তাইলে এইলা তোরে হইবে।”

৮ যীশু সেলো উত্তর দিলেক, “শাস্ত্রত নেখা আছে, পরমপ্রভুই তোরে ভগবান। খালি উয়াকে পূজা করিবু, আর উয়াক সেবা করিবু।”

৯ ইয়ার পাছত শয়তান-অসুর যীশুক যিরুশালেমের দশংগতি মন্দিরের উচা চূড়াত নিয়া গেইলেক, আর কইলেক, “তুই যদি ভগবানের বেটা হইস তাইলে নিচাত ঝাঁপাও।

১০ কেনেনা শাস্ত্রত এইটাও নেখা আছে, ‘ভগবান উয়ার স্বর্গদূতলাক তোক রক্ষা করির বাদে আদেশ দিবে।

১১ এই নাকানে নেখা আছে যে, তুই যেলা উচা হাতে নিচাত পরিবু সেলো স্বর্গদূতলা তোক চোট না নাগিবার বাদে কোলাত তুলি নিবে।”

১২ যীশু কহিলেক, “শাস্ত্রত নেখা আছে, পরম প্রভু ভগবানক তুই যাচাই না করিস।”

১৩ এই নাকান করি শয়তান-অসুর যীশুক সউগ নাকান লোভ নালসার ফান্দোত ফ্যেলেবার চেষ্টা শেষ করিলেক। সেলো আরো সুযোগ খুজিবার বাদে যীশুক ছাড়িয়া চলি গেইলেক।

১৪ ইয়ার পাছত যীশু ভগবানের আত্মার ক্ষমতার চালনায় গালীল প্রদেশত ফিরি আসিলেক। ঐ অঞ্চলের সউগ জাগাতে উয়ার খবর ছড়াছড়ি হয় পড়িলেক।

১৫ মেলা উপাসনা ঘরত শিক্ষা দিতে দিতে সগায় উয়ার গুণগান করির নাগিলেক।

১৬ ইয়ার পাছত যীশু যেটেকোনা ছাওয়া কাল কাটাইচে, ঐ নাসারত গেরামত গেইলেক। উয়ায় নিজে সউগ সমায় যেইলা নিয়ম নীতি করে, ঐ নাকান করি পবিত্র জিরানের দিন উপাসনা ঘরত গেইলেক, আর ওটেকোনা সনাতন শাস্ত্র পড়িবার বাদে খাড়া হইলেক।

১৭ আগের কালের ভগবানের ভাববাদী, যার নাম যিশাইয়, উয়ার নেখা শাস্ত্রখান যীশুক দেওয়া হইলেক। সেলো মোড়ে থোয়া শাস্ত্রখান মেলেয়া পড়ির নাগিলেক, আর ওটেকোনা নেখা আছে,

১৮ “পরম প্রভু ভগবানের আত্মা মোর সাথত আছে, মোক বাছাই করিয়া দায়িত্ব দিচে, যাতে দীন-দুঃখীলারটে ভাল খবর, বন্দী



মানষিলারটে মুক্তির কতা, কানা মানষিলা দেখির পাবে, এই কতা শোনের বাদে মোক পেঠাইচে। যাতনা পাওয়া মানষিলাক ছাড়েয়া আনিবার,

১৯ আরো এই কতা তোলাই দিবার বাদে মোক পেঠাইচে যে, এলা পরম প্রভু ভগবানের আশুর্বাদ পাবার সমায় আসিচে।”

২০ ইয়ার পাছত শাস্ত্রখান মোড়েয়া উপাসনা ঘরের এক জন সেবাকারী মানষির হাতত দিয়া মানষিলাক শিক্ষা দিবার বাদে বসিলেক। আর ওটেকার সগায় অচানক হয় যীশুর ভিতি একধিন্দে দেখির নাগিলেক।

২১ সেলো যীশু কইলেক, “সনাতন পবিত্র শাস্ত্রের কতা আজি তোমরালা শুনতে কালে পূরণ হইচে।”

২২ সগায় যীশুর মুখের মধুর কতা শুনিয়া গুণগান করিয়া অচানক হয় কবার নাগিলেক, “আরে! ইয়ায় যোষেফের বেটা না কি?”

২৩ যীশু উমারলাক কইলেক, “তোমরা হয় তো নিশ্চয় এই শ্লোকটা কবেন, হে ডাক্তার নিজকে ভাল কর। কফরনাহুমোত যেইলা কাম করার কতা শুনচি, ঐলা তোর নিজের গেরামত করিয়া দেখাও।

২৪ মুই তোমারলাক সচাং কবার ধরচুং, নিজের গেরামের মানষিলা ভগবানের কোন ভাববাদীক মানি নিবার পায় না।

২৫ আর এইটাও সচাং যে, আগের কালের ভাববাদী এলিয়র সময় সাড়ে তিন বছর ইজ্রায়েল দেশত দ্যাওয়ার বর্ষন হয় নাই, সেই বাদে ঐ দেশত খুব মঙ্গা দেখা দিছিলেক। আর নিশ্চয় ঐ সময় ইজ্রায়েল দেশত মেয়ো বিধুয়া আছিলেক। উমার সগারে সাহায্যের দরকার।

২৬ কিন্তুক এলিয়ক নিজের দেশের কোন বিধুয়ার ওটেকোনা না প্যেঠেয়া, খালি প্যেঠাইচে সীদোন প্রদেশের সারিফত গেরামের এক বিধুয়া বেটিছাওয়ারটে।

২৭ আরো দেখেন ভগবানের আগের কালের ভাববাদী ইলীশার সময়, ইজ্রায়েল দেশত মেয়ো কুষ্ঠ রুগী আছিলেক, কিন্তুক সিরিয়া দেশের নামানক ছাড়া আর কাণ্ডোকো শুদ্ধি করি ভাল করা হয় নাই।”

২৮ এই কতা শুনিয়া উপাসনা ঘরের সগায় রাগে অগুন হয়। গেইলেক।

২৯ আর উমরা উঠিয়া সগায় যীশুক গঞ্জের বায়রাত ঠেলিয়া নিয়া গেইলেক। এই গঞ্জটা পাহাড়ের উপরাত আছিলেক। ঠেলিতে ঠেলিতে উয়াক উচা খাড়া পাহাড়ের শেষ পাকে নিয়া গেইলেক, যাতে পাহাড়ের মাথা থাকি নিচাত ফ্যেলে দিবার পারে।

৩০ কিন্তুক যীশু মানষির ভিরের ভিতরি দিয়া চলি গেইলেক।

৩১ ইয়ার পাছত যীশু গালীল প্রদেশের কফরনাহুম নামের গঞ্জত গেইলেক। আর ওটে জিরানের দিনে যীশু মানষিলাক শিক্ষা

দিবার নাগিলেক।

৩২ আর উয়ার শিক্ষার কতা শুনিয়া মানষিলা অচানক হইলেক,  
কেনেনা উয়ার বাইক্যত ভগবানের ক্ষমতা আছিলেক।

৩৩ আর ঐ উপাসনা ঘরত অপদেবতা ধরা একটা মানষি  
আছিলেক। উয়ায় চিকিরিয়া কইলেক,

৩৪ “হ্যে বাহে নাসারত গেরামের মহান যীশু! হামার নগত  
তোমার কিসের দরকার? তোমরা কি হামারলাক নাশ করিবার  
আসচেন? মুই জানং তোমরা কায়, তোমরা তো ভগবানের সেই  
পবিত্রজন!”

৩৫ আর সেলো যীশু অপদেবতাটাক ধমক দিয়া কইলেক,  
“ঝিত করি রং! আর উয়ার ভিত্তিরা হাতে এলায় বাইর হয়্যা যাঃ।”  
সেলায় সেলায় সগারে আগত অপদেবতাটা মানষিটাক আছড়ে  
ফেলেয়া দিয়া বিরি গেইলেক, মানষিটার কিস্তক কোন ক্ষতি  
হইলেক না।

৩৬ এই দেখিয়া সগায় অচানক হয়্যা নিজের মইদ্বোত কওয়া-  
কয়ি করিবার নাগিলেক, “আরে, এইটা কি নাকানের কতা!  
ভগবানের অধিকার আর ক্ষমতা দিয়া হুকুম দিতে কালে  
অপদেবতালা বিরিয়া চলি যায়।”

৩৭ ঐ অঞ্চলের চাইরো পাকে যীশুর কতা ছড়াছড়ি হয়্যা  
পড়িলেক।

৩৮ যীশু উপাসনা ঘর হাতে বিরিয়া শিমোনের বাড়িত গেইলেক।  
ওটেকোনা শিমোনের শাশুড়ি খুব জ্বরত ভুগিবার নাগিচে। আর  
উমরা কাউলা-কাউলি করি কবার নাগিলেক, যাতে যীশু উয়াক  
ভাল করি দেয়।

৩৯ সেলো শিমোনের শাশুড়ি বগলত যায়া জ্বরক ধমক দিতে  
কালে জ্বর ছাড়িয়া গেইলেক, আর সেলোয় বিছনা হাতে উঠিয়া  
উমার বাদে খাবারের জোগার করির নাগিলেক।

৪০ যেলা বেলা ডোবং ডোবং সমায় হইলেক, সেলো মানষিলা  
উমার বন্ধু বান্ধব, সাগাই-সোদর যায় যায় মেলা নানা নাকান  
অসুখোত ভুগিবার ধরছিলেক, উমারলাক সগাকে যীশুর বগলত  
আনিলেক। সেলো যীশু সগাকে হাত দিয়া নারিয়া ভাল  
করিলেক।

৪১ মেলা মানষির ভিত্তিরা থাকি অপদেবতালক খেদাইলেক।  
আর ঐ অপদেবতালা চিকিরিয়া কবার নাগিলেক, “তোমরায় তো  
ভগবানের বেটা!” যীশু যে ভগবানের বাছাই করা রাজা  
অপদেবতালা জানির পাইচে। এই বাদে যীশু দাবরেয়া উমার মুখ  
বন্ধ করি দিলেক।

৪২ যীশু খুব সাকালে ঐ গঞ্জটা ছাড়িয়া নিধুয়া পাথারত চলি  
গেইলেক। আর এই ভিরের মানষিলা যীশুক না পায়া, মেলা  
জাগাত চান্দাইতে চান্দাইতে উয়াক পাইলেক। আর উয়াক পাইতে  
কালে, যাবার দিবার চাইলেক না।

৪৩ যীশু সেলো উমারলাক কইলেক, “ভগবানের শাসন ব্যবস্থার এই ভাল খবর মোক আরো মেয়ো জাগাত প্রচার করির নাগিবে, কেনেনা ভগবান এই বাদে মোক পেঠাইচে।”

৪৪ ইয়ার পাছত যীশু এই নাকান করি যিহুদীয়া প্রদেশের মেয়ো উপাসনা ঘরত যায়া প্রচার করির নাগিলেক।

৫ এক দিন যীশু গালীল সাগরের পারত খাড়া হয় প্রচার করির ধরলেক, আর ভগবানের বাইক্য শুনিবার বাদে মেয়ো মানষি চাইরো পাকে ঠাসা-ঠাসি ভিড় করিলেক।

৬ ঐ সময় সাগরের পারত যীশু দুইখান নাও দেখির পাইলেক, আর জালুয়ালা নাও হাতে নামিয়া জাল ধুবার নাগচে।

৭ একখান নাও আছিলেক শিমোন নামে এক জন মানষির। যীশু ঐ নাওত উঠিয়া শিমোনক কইলেক, “দয়া করিয়া নাওখান ডাঙা থাকি খানিক দূরত নেও।” আর উয়ায় নাওযোত বসিয়া ভিরের মানষিলাক শিক্ষা দিবার নাগিলেক।

৮ যীশুর শিক্ষা দেওয়া শেষ হয় শিমোনক কইলেক, “নাওখান গভীর জলত নিয়া চল, আর মাছ ফান্দেবার বাদে তোমরালা ছাপি জাল ফেলাও।”

৯ শিমোন কইলেক, “হে গুরু, গোটায় রাতি জাল ফেলেয়া একটা মাছও পাই নাই, কিন্তুক তোমরা কইচেন বুলিয়া মুই আরেকবার জাল ফেলাইম।”

৬ আরে বাঃ! যেলা উমরা জাল ফ্যেলাইলেক সেলা এতলা মাছ জালত ফান্দিলেক যে, মাছের ভরায় জাল ছিড়িয়া যাবার নাকান হইলেক।

৭ সেলা উমাক সাহায্য করির বাদে, হাত দিয়া ইশারা করিয়া অইন্য নাওয়ার জালুয়া সাথীলাক ডেকাইলেক। সাথীলা আসিয়া সগায় এক সাথে দুইখান নাওত এতলা মাছ তুলিলেক যে, নাও দুইখান ডুবি যাবার নাকান হইলেক।

৮ এই ঘটনা দেখিয়া শিমোন যার আরেকটা নাম হইলেক পিতর, উয়ায় যীশুর ঠেংএর আগপাকে হাংকুড়া পাড়িয়া, কবার নাগিলেক, “হে গুরু! মুই জঘন্য পাপী মানষি, মোর এটেকোনা আইসেন না।”

৯ কেনেনা জালত এতলা মাছ ফান্দিচে এই দেখিয়া শিমোন আর উয়ার সাথী সগায় অচানক হইলেক।

১০ শিমোনের ব্যবসার ভাগীদার যাকব আর যোহন (যার বাপের নাম সিবদিয়), উমরাও দেখিয়া অচানক হইলেক। যীশু শিমোনক কইলেক, “ভয় না খাইস শিমোন! এত দিন তো তুই মাছ ধরিচিস, এলা হাতে তুই মোর শিষ্য বানের বাদে মানষিক ধরিবু।”

১১ ইয়ার পাছত উমরা নাওখান ডাঙাত আনিয়া সউগ ছাড়িয়া যীশুর পাছে পাছে যাবার নাগিলেক।

১২ এক দিন যীশু একটা গেরামত আসিলেক, আর ঐ গেরামত একটা কুষ্ঠ রুগীও আছিলেক। উয়ার গোটায় দেহাত কুষ্ঠ হইচে।

রুগীটা আসিয়া যীশুর ঠেং-ওত হাংকুড়া পাড়ি পড়িলেক আর কাউলা-কাউলি করি কবার নাগিলেক, “মালিক! তোমার যদি ইচ্ছা হয়, তাইলে মোক শুদ্ধি করি অসুখ থাকি ভাল করি দিবার পান!”

১৩ যীশু উয়ার গাও নাড়িয়া কইলেক, “মুই এই নাকান চাং, তুই শুদ্ধি হয় ভাল হঃ।” আর উয়ার গাও নাড়িতে কালে ভাল হয় গেইলেক।

১৪ সেলো মানষিটাক পরামর্শ দিয়া কইলেক, “এই কতাটা তুই কাণ্ডোকে করু না। তুই যায়া বামনক সতর্ক হবার বাদে তোর দেহাখান দেখাও। আর মহাপুরুষ মোশির বিধান মতে শুদ্ধি হয় যেইলা পূজা করা দরকার, ঐলা করেক। ইয়াতে মানষিলারটে সাক্ষী হইবে তুই শুদ্ধি হয় ভাল হইচিস।”

১৫ তাণ্ডো যীশুর কতা চাইরো পাকে ছড়াছড়ি হয় পড়িলেক। উয়ার কতা শুনিবার বাদে, আর নিজের নিজের অসুখ ভাল হবার বাদে মেয়ো মানষি উয়ারটে আসির ধরচে।

১৬ কিন্তুক অনেক বার ভিড়ের মানষির বাদে যীশু শুনশান জাগাত যায়া প্রার্থনা করির নাগিলেক।

১৭ এক দিন যীশু যেলা শিক্ষা দিবার ধরচে, সেলো ফরীশীলা আর যিহুদী আইন কানুনের পন্ডিত মানষিলা ওটেকোনা বগলত বসিয়া আছিলেক। উমরা গালীল প্রদেশের আর যিহুদীয়া প্রদেশের সউগ গেরাম থাকি আর যিরুশালেমের গঞ্জ থাকি

আইসচে। সেই দিন অসুকিয়া মানষিলাক ভাল করির বাদে পরম প্রভু ভগবানের মহাশক্তি যীশুর মইদ্বোত আছে।

১৮ সেলো কয়জন মানষি দাগিলা-কেতাত করিয়া একটা নুলা রুগীক উবিয়া আনিলেক। উয়ার চলা-ফেরা করির ক্ষমতা অক্ষম হয়্যা গেইচে। যীশু যেই ঘরত বসিয়া আছিলেক, রুগীটাক ঐটে নিয়া যাবার চাইলেক।

১৯ কিন্তুক ভিড়ের বাদে যীশুরটে নিয়া যাবার পাইলেক না, এই বাদে উমরা ঘরত চড়িয়া চাল ফাকা করিয়া রুগীটাক দাগিলা-কেতাত করি ভিড়ের মইদ্বোত যীশুর আগপাকে নামেয়া দিলেক।

২০ উমারলার এমনে বিশ্বাস আছিলেক যে, রুগীটাক যীশুরটে নিয়া গেইলে ভাল হয়্যা যাবে। এই নাকান বিশ্বাস দেখিয়া যীশু অসুকিয়া মানষিটাক কইলেক, “বাউ, তোর পাপ ক্ষমা হয়্যা গেইচে।”

২১ এই শুনিয়া পন্ডিতলা আর ফরীশীলা মনে মনে কবার নাগিলেক, “এই মানষিটা কায়? ইয়ায় ভগবানের নিন্দা করির ধরচে! ভগবান ছাড়া কায় পাপ ক্ষমা করির পারে?”

২২ কিন্তুক যীশু উমারলার মনের কতা বুঝির পায়া কইলেক, “তোমরা মনে মনে কেনে এই নাকান ভাবির নাগচেন?”

২৩-২৪ মুই যদি কং তোর পাপ ক্ষমা করা হইলেক, তা দেখির পাবেন না। কিন্তুক নুলা রুগীটা হাটিবার পায় না, আর মুই যদি উয়াক হাটিবার কং, আর উয়ায় সেলোয় সেলোয় হাটে, তা হইলে



ইয়াতে বুঝির পাবেন মুইয়ে বাছাই করা মানষিটা। এই দুনিয়াত পাপ ক্ষমা করিবার অধিকার মোর আছে।” সেলো যীশু নুলা রুগীটাক কইলেক, “ওঠেক তোর দাগিলা-কেতা নিয়া বাড়ি চলি যা, কেনেনা তুই ভাল হয়্যা গেইচিস।”

২৫ আর সেলোয় সেলোয় রুগীটা সগারে আগত দাগিলা-কেতা তুলি নিয়া ভগবানের মহিমার গুণগান করিতে করিতে বাড়ি চলি গেইলেক।

২৬ এই দেখিয়া সউগ মানষি অচানক হয়্যা ভগবানক মানি নিয়া উয়ার মহিমার গুণগান করিবার নাগিলেক। উমরা ভয়ে ভক্তিতে কবার নাগিলেক, “আজি হামরা অচানক ঘটনা দেখিলুং!”

২৭ যীশু সেলো চলি গেইলেক। যাইতে কালে এক জন মাসুল আদায়কারীক দেখিলেক। উয়ার নাম লেবীয়। উয়ায় একটা ঘরত বসিয়া মাসুল আদায় করির ধরচে। যীশু উয়ার ভিতি দেখিয়া কইলেক, “তুই মোর সাথত আয়, আর মোর শিষ্য হঃ।”

২৮ সেলো লেবীয় উঠিয়া সউগ ছাড়ি দিয়া যীশুর সাথত গেইলেক।

২৯ যীশুক সন্মান দেখের জইন্যে লেবীয় নিজের বাড়িত খাওয়া-দাওয়ার ব্যবস্থা করিলেক। যীশু, লেবীয়, সেলো মাসুল আদায়কারী, আর অইন্য মানষিলা, সগায় একে সাথত বসিয়া খাওয়া-দাওয়া করিলেক।

৩০ এই দেখিয়া ফরীশীলা আর পন্ডিত মানষিলা যীশুর শিষ্যলোক বকর বকর করি কবার নাগিলেক, “আরে, ইয়ায় বেয়া মাসুল আদায়কারী আর পাপী মানষির নগত খাওয়া-দাওয়া করে কেনে?”

৩১ যীশু সেলা কইলেক, “যার অসুখ নাই এই নাকান মানষির ডাক্তারের দরকার নাই। যার অসুখ আছে উয়ার ডাক্তারের দরকার।

৩২ মুই ধার্মিক মানষিক ডেকেবার আইসং নাই। কিন্তুক মুই এই বাদে আসচুং পাপী মানষিক পাপের ঘাটা থাকি মন ঘোরেয়া ভাল ঘাটাত নিয়া যাবার।”

৩৩ পাছত ধর্মগুরুলা যীশুক কইলেক, “যোহনের শিষ্যলা উপাস-প্রার্থনা করে। আর ফরীশী দলের শিষ্যলাও করে, কিন্তুক তোমার শিষ্যলা সউগ সমায় খাওয়া-দাওয়া করে কেনে?”

৩৪ যীশু সেলা কইলেক, “বর সাথত থাকিতে বরের সঙ্গী সাথীলা কি উপাস করিবে? উমরা তো আনন্দ করিবে, উপাস করিবে না।

৩৫ কিন্তুক এমন দিন আসিবে যেলা উমারটে হাতে বরক নিয়া যাওয়া হইবে, আর সেই দিন উমরা উপাস করিবে।”

৩৬ যীশু গল্প দিয়া কইলেক, “নয়া কাপড় কাটিয়া কাণ্ডোয় বুড়া জামাত তালি নাগায় না। যদি নাগে দেয়, ধুবর পাছত নয়া

তালিটা টান ধরিয়া ছোট হয়। আর ইয়াতে ছিড়া জাগাখান আরো ওসার হয়।

৩৭ এইটা দেখেন যে, বুড়া চামড়ার ঝোলাত কাণ্ডায় টাটকা আংগুরের রস থোয় না। যদি থোয় তাইলে টাটকা রস পচিয়া রস বাড়ি যায়। অল্পতে ঝোলা ফাটিয়া যায়। ইয়াতে ঝোলা আর রস দুইটায় নষ্ট হয়,

৩৮ টাটকা আংগুরের রস নয়া ঝোলাতে খুবার নাগে।

৩৯ যায় পুরানা রস খাইচে, উয়ায় কয়, পুরানটায় ভাল। আর উয়ায় নয়া রস খাবার চায় না।”

৬ এক দিন যীশু আর উয়ার শিষ্যলো পবিত্র জিরানের দিনত ডাবরি বাড়ির আল্লি দিয়া হাটিয়া যাবার ধরচে, আর উয়ার শিষ্যলো ফসলের শিষ ছিড়িয়া হাতত মথলেয়া খাবার নাগিলেক।

২ এই দেখিয়া কয়জন ফরীশীলা কইলেক, “আরে! তোমরা এইটা কেনে করির ধরচেন? হামার ধর্মের বিধান অনুসারে পবিত্র জিরানের দিনে এইটা করা উচিত নোয়ায়! তাণ্ডো তোমরা এটা করেন কেনে?”

৩ যীশু ফরীশীলাক কইলেক, “তোমরা কি সনাতন পবিত্র শাস্ত্র পড়েন নাই? পড়িচেন, যেলা মহারাজা দায়ূদ আর উয়ার সঙ্গীলাক ভোগ ধরচে সেলা কি করিলেক?

৪ দায়ূদ ভগবানের ঘরত সোন্দেরা পবিত্র রুটি নিয়া নিজে খাইলেক আর উয়ার সঙ্গীলাকো দিলেক। কিন্তুক এই রুটি বামন ছাড়া কারো খাবার নিয়ম আছিলেক না।”

৫ যীশু ফরীশীলাক আরো কইলেক, “জিরানের দিনের বিধির বিধানের উপরাত মোর অধিকার আছে।”

৬ পাছত অইন্য আরেক দিন, জিরানের দিনত যীশু য়েলা উপাসনা ঘরত শিক্ষা দিবার ধরচে, ওটেকোনা একটা মানষি আছিলেক যার ডাইন হাতটা বাসুলী ধরি শুকি গেইচে।

৭ পন্ডিতলা আর ফরীশীলা যীশুর দোষ ধরির বাদে ভাল করি নজর দিবার নাগিলেক, যে উয়ায় জিরানের দিনত অসুকিয়া মানষিটাক ভাল করে কি না।

৮ যীশু কিন্তুক উমারলার মনের কতা জানির পাইলেক, এই বাদে শুকান হাতওলা মানষিটাক কইলেক, “তুই সগারে আগপাকে আসিয়া খাড়া হঃ।” সেয়ায় সেয়ায় মানষিটা ওটেকোনা আসিয়া সগারে আগপাকে খাড়া হইলেক।

৯ যীশু ফরীশীলাক পুছিলেক, “শ্রী মোশির বিধান মতন পবিত্র জিরানের দিনটা কিসের বাদে? ভাল কামাই না বেয়া কামাই করির বাদে? জিউ বত্তেবার, না মারি ফ্যেলেবার বাদে?”

১০ যীশু সেয়া চাইরো পাকে সগারে ভিতি দেখিয়া, ঐ শুকান হাতওয়ালা মানষিটাক কইলেক, “তোর হাতটা আগে দে।” আর

মানষিটা কি করিলেক? উয়ার শুকান হাতটা আগেয়া দিলেক,  
আর সেলোয় সেলোয় একেবারে ভাল হয় গেলেক,

১১ কিন্তুক ফরীশীলা আর পন্ডিতলা গোসা হয় অগুনের নাকান  
জ্বলির নাগিলেক। যীশুক নিয়া কি করা যায়, এই নিয়া উমরা  
আলোচনা করির নাগিলেক।

১২ ঐ সময় যীশু প্রার্থনা করির বাদে পাহাড়ের উপরাত  
গেলেক, আর গোটায় রাতি ভগবানেরটে প্রার্থনা করি  
কাটাইলেক।

১৩ আর রাতি পোহাইতে কালে উয়ার শিষ্যলোক ডেকেয়া  
উমারলার মাঝিলা হাতে বারো জন অধিকার পাওয়া খবরিয়ার  
পদ দিলেক।

১৪ উমরা হইলেক শিমোন, যার নাম যীশু থুইলেক পিতর,  
শিমোনের ভাই আন্দ্রিয়, যাকব, যোহন, ফিলিপ আর বর্থলময়,

১৫ মথি, থোমাস, আলফেয়ের বেটা যাকব, শিমোন যায়  
স্বাধীনতা সংগ্রামী আছিলেক,

১৬ আর যাকবের বেটা যিহুদা, আর ইষ্কোরিয়োটের যুদাস যায়  
পাছত বিশ্বাস ঘাতকতা করি যীশুক শত্রুর হাতত ধরে দিছিলেক।

১৭ পাছত যীশু আর উয়ার খবরিয়ালা পাহাড় হাতে নামিয়া  
সমান জাগাত খাড়া হইলেক, ওটেকোনা আরো মেলা শিষ্য  
আসিয়া জোটো হইলেক। যিহুদীয়া প্রদেশের সউগ জাগা থাকি,

যিরুশালেম গঞ্জ, সাগরের পারের দুইটা গঞ্জ সোর, সীদোন নামের এলাকা থাকি, মেয়ো মানষি আসিয়া জোটো হইলেক।

১৮ উমরা যীশুর কতা শুনিবার বাদে আরো ফির মেয়ো অসুকিয়া মানষিও ভাল হবার বাদে ওটেকোনা আসির নাগিলেক। আর যাক যাক অপদেবতা ধরিয়া কষ্ট পাবার ধরচে, উমরালাও ভাল হইলেক।

১৯ যীশুর দেহার ভিত্তি থাকি ভাল হবার শক্তি বাইর হয়। সগাকে ভাল করির ধরচে। এই বাদে সউগ মানষি উয়াক নারিবার চেষ্টা করির নাগিলেক।

২০ তার পাছত যীশু শিষ্যলার ভিত্তি দেখিয়া কইলেক, “হে! তোমরা দীন দুঃখী মানষিলা, ভগবানের শাসন ব্যবস্থার আশুর্বাদ তোমারে।

২১ হে! তোমারলাক যাক এলা ভোগ ধরচে, ভগবানের আশুর্বাদে তৃপ্তি করি খাবেন। হে! তোমরা যায় এলা কান্দির ধরচেন, ভগবানের আশুর্বাদে, আনন্দের হাসি হাসিবেন।

২২ মোর শিষ্য হবার জইন্যে মানষি তোমাক ঘিন করিবে, সমাজ থাকি বাইর করি দিবে, নিন্দা করিবে, তোমার নাম মুখত আনিবার চাবে না। এইটা হইচে তোমার আশুর্বাদ।

২৩ খুশি হন, আনন্দে নাচো! কেনেনা স্বর্গত তোমার বাদে একটা বড় পুরুষ্কার থোয়া হইচে। মনে করেন যে, পুরানা কালের

মানষিলা ভগবানের ভাববাদীলার নগত একে নাকান ব্যবহার করিচে।

২৪ কিন্তুক ধিক্কার দেয় ধনী মানষিলাক, কেনেনা তোমারলার যতকোনা সুখ পাওয়ার, অতকোনা সউগে পাইচেন।

২৫ ধিক্কার দেয় তোমারলাক, যায় যায় মনের হাউসে পেট ভরেয়া খাবার ধরচেন, তোমরালা এক দিন হাইখাই করিবেন।  
ধিক্কার দেয় তোমারলাক, যায় যায় হাসিবার ধরচেন, তোমরালা এক দিন শোকের কান্দন কান্দিবেন।

২৬ ধিক্কার দেয় তোমারলাক, যেলা সউগ মানষি তোমার গুণগান করে, কেনেনা এই মানষিলার চৌদ গুটি একে নাকান করি ভন্ড ভাববাদীলার গুণগান করিচিলেক।

২৭ “কি রে, তোমরা যায় যায় শূনির নাগচেন! মুই তোমারলাক কবার ধরচুং, তোমার শত্রুলাক পিরিত কর। যায় যায় তোমাক ঘিন খায়, উমারলার বাদে ভাল কাম কর।

২৮ যায় তোমাক শাও দেয়, উমাক আশুবাদ করো। আর যায় তোমার নগত বেয়া ব্যবহার করে, উমার বাদে প্রার্থনা কর।

২৯ কাণ্ডো যদি তোমার এক গালত চওড়ায়, তাইলে অইন্য গালটাও আগে দেও। কাণ্ডো যদি তোমার গিলাপখান নিয়া নেয় তাইলে উয়াক তোমার জামাটাও দিয়া দেও।

৩০ তোমারটে কাণ্ডো কোন জিনিস চাইলে দেন, আর যদি কাণ্ডো কোন কিছু জিনিস নিয়া না দেয়, তাইলে ফিরিয়া আর চান

না।

৩১ তোমরা মানষিরটে থাকি যেই নাকান ভাল ব্যবহার আশা করেন, তোমরাও মানষির নগত সেই নাকান ব্যবহার করেন।

৩২ “যায় তোমাক পিরিত করে, তোমরা যদি খালি ঐ নাকান মানষিক পিরিত করেন, তাইলে তোমারটে কি আশুর্বাদ আসিবে? ঐ নাকানের পিরিত তো পাপী মানষিলাও করে।

৩৩ যায় তোমার উপকার করে, তোমরা যদি খালি ঐ নাকানের মানষিক উপকার করেন, তাইলে ভগবান কি তোমারলাক সাবাস দিবে? ঐ নাকান তো পাপীলাও করে।

৩৪ যায় টাকা শোধ করিবার পায়, যদি খালি উমাকে টাকা ধার দেন, ইয়াতে তোমারটে কি আশুর্বাদ আসিবে? এই নাকান করি পাপীলাও পাপীলাক ধার দেয়, যাতে আরো ফিরি পায়।

৩৫ “কিন্তুক তোমরা তোমার শত্রুলাকও পিরিত কর, উমারলারও উপকার কর। মানষিলা টাকা শোধ করির পাবে কি পাবে না, এইটা চিন্তা না করিয়া উমাক ধার দেন। তাইলে তোমারলাক মহাপুরুস্কার দেওয়া হইবে। আর তোমরা পরমপ্রভুর ছাওয়া হইবেন, কেনেনা ভগবান অধম পাপীকো দয়া করে।

৩৬ তোমার স্বর্গের বাপ যেই নাকান দয়ালু, তোমরালাও ঐ নাকান দয়ালু হন।”

৩৭ “পরার বিচার করেন না, তাইলে তোমরাও বিচারত পরিবেন না। পরার দোষ দেখেন না, তাইলে তোমরাও দোষ ধরা হইবে না।



অপরক ক্ষমা কর, তাইলে তোমাকো ক্ষমা করা হইবে।

৩৮ অপরক দান করো, তাইলে তোমারলাকও ভগবান দান করিবে। তোমারলাক বেশী করি উথুলি পড়ার নাকান করি মাপিয়া কোলাত দেওয়া হইবে। কেনেনা তোমরা যেই নাকান করি মাপি দিবেন, ঐ নাকান করি তোমারলাকও মাপি দিবে।”

৩৯ যীশু উমারলাক গল্প দিয়া কইলেক, “এক জন কানা অইন্য আরেক জন কানাক ঘাটা দেখের পারে কি? দুইজনে কি খালত পড়ি যাবে না?

৪০ এক জন শিষ্য উয়ার গুরুর থাকি বড় হবার পারে না। কিন্তুক যেলা সাধন সিদ্ধি লাভ করে, সেলা উয়ায় উয়ার গুরুর নাকান হয়।

৪১ তোর ভাইয়ের চোখুত খোচা আছে এইটায় দেখিবার ধরচিস, কিন্তুক তোর নিজের চোখুত তো একটা গছের ডুম আছে, আর ঐটার সমন্ধে ভাবিস না কেনে?

৪২ নিজের চোখুর গছের ডুম যদি দেখির না পাইস, তাইলে তুই ভাইয়োক ক্যেংকরি কবু, ‘ভাই আয়, তোর চোখু হাতে খোচা খান নিকিলিয়া দেং।’ ভন্ড কোটেকার? পইলা তোর নিজের চোখু থাকি গছের ডুমটা নিকলাও! পাছত ভাল করি দেখিয়া ভাইয়ের চোখু থাকি খোচাখান নিকিলি দিবার পাবু।

৪৩ “ভাল গছত বেয়া ফল ধরে না। আর বেয়া গছত ভাল ফল ধরে না। ফল দেখিয়া সউগ গছ চেনা যায়।

৪৪ খুরিয়া কাটাত ডুমুর ফল হয় না, আর কাটা ঝোপ থাকি  
আংগুর ফলে না।

৪৫ সেই নাকান ভাল মানষির অন্তর থাকি ভাল চিন্তা ভাবনা  
বাইরায়। বেয়া মানষির অন্তর থাকি বেয়া চিন্তা ভাবনা বাইরায়।  
মানষির অন্তরত যেইলা চিন্তা ভাবনা ভরা থাকে, সেইলা চিন্তা  
ভাবনায় মুখ দিয়া বিরিয়া আইসে।”

৪৬ “তোমরা মোক ‘হে গুরু, হে গুরু’ করি ড্যেকান, কিন্তুক মুই  
যেইলা করির কং সেইলা করেন না কেনে?

৪৭ এক জন যদি মোর বগলত আসিয়া মোর শিক্ষার মতন চলে,  
তাইলে উয়াক কার নগত তুলনা করিম?

৪৮ উয়ায় এই ধরনের এক জন ঘর বানা মিস্ত্রির নাকান, যায়  
একটা ঘর বানের বাদে মাটির নিচাত খাল খুড়িয়া শক্ত করি ভিটি  
বানাইলেক। আর নদীর বানা আসিয়া ঘরত ধাক্কা মারিলেও  
ঘরটাক নড়েবার পাইলেক না। কেনেনা ঘরটা ভাল করি বানা  
হইচে।

৪৯ কিন্তুক যায় মোর কতা শুনিয়া পালন করে না, উয়ায় এই  
ধরনের ঘর বানা মিস্ত্রির নাকান, যায় ভিটি ছাড়া ঘর বানাইলেক।  
আর বানার জলের ঢেউ আসিয়া ঐ ঘরটাক ধাক্কা মারিয়া ঘরটাক  
সেঁলায় সেঁলায় ভাঙিয়া সর্বনাশ করিলেক।”

৭ যীশু শিক্ষা দেওয়া শেষে করিয়া কফরনাহুম গঞ্জত গেইলেক।

২ ওটেকোনা আছিলেক এক জন রোমের সেনাপতি। উয়ার এক চাকর অসুখোত মরি যাবার নাকান হইচে। কিন্তুক এই চাকরটা সেনাপতির খুব আদরের আছিলেক।

৩ যেলা এই সেনাপতি যীশুর কতা শুনিলেক, সেলা উয়ায় কয়েক জন মানিগুনী যিহুদী নেতাক যীশুর ওটেকোনা পেঠেয়া দিলেক, যাতে যীশু আসিয়া আধামরা চাকরটাক ভাল করি দেয়।

৪ এই মানিগুনী মানষিলা যীশুর বগলত যায়া খুব কাউলা-কাউলি করি কবার নাগিলেক, “রোমের এই সেনাপতি তোমার সাহায্য পাবার যোগ্য।

৫ কেনেনা উয়ায় হামার জাতির মানষিলাক খুব ভাল পায় বুলিয়া, হামার বাদে একটা উপাসনা ঘর বানেয়া দিচে।”

৬ যীশু এই মানষিলাৰ সাথত সেনাপতির বাড়ি যাবার নাগিলেক। কিন্তুক বাড়িটা আর বেশী দূরত নাই, এই নাকান সমায় সেনাপতি উয়ার সখালাক দিয়া খবর পেঠেয়া এই কতাটা উমারলাক কবার কইলেক, “হে গুরু! আর কষ্ট করেন না, কেনেনা তোমরা মোর বাড়িত সোন্দান, ইয়ার মুই যোগ্য না হং।

৭ এই বাদে মুই তোমার ওটেকোনা নিজে যাবার উপযুক্ত মনে করং নাই। তোমরা খালি মুখ দিয়া এইটে হাতে কয়া দেও। ইয়াতে মোর চাকরটা ভাল হয়্যা যাবে।

৮ কেনেনা মুইও তো কাঙোরো অধীনে কাম করং, আর সেনালাও মোর অধীনে কাম করে। আর মুই কাঙোকো যদি কং,

তুই যা, সেলো উয়ায় যায়, যদি কং তুই আয়, তা হইলে উয়ায় আইসে। আর মোর চাকরক যদি মুই কং, তুই এই কামটা করেক, সেলো উয়ায় সেইটায় করে।”

৯ যীশু যেলো এই কতা শুনিলেক সেলো কি হইলেক, উয়ায় অচানক হইলেক! আর যেইলা ভিড়ের মানষি উয়ার পাছে পাছে আসিবার ধরচে, উমারলার ভিতি ঘুরিয়া কইলেক, “মুই তোমারলাক কবার নাগচুং, ইজ্রায়েলী মানষিলার মইন্ধোত এত বড় বিশ্বাস মুই কোন দিনও দেখির পাং নাই।”

১০ সেনাপতিটা যেইলা মানষিক যীশুরটে পেঠাইচে, উমরলা বাড়ি ঘুরি আসিয়া দেখির পাইলেক, চাকরটা ভাল হয় গেইচে!

১১ কিছু দিন পাছত, যীশু নায়িন নামের গঞ্জত গেইলেক, আর উয়ার নগত শিষ্যলো আর অইন্য মেলো মানষি ভিড় করি সাথে সাথে যাবার নাগচে।

১২ এমন সময় যেলো গঞ্জের বগলা বগলি আসিয়া পৌছাইলেক, সেলো কয়েক জন মানষি একটা মরা চেংড়াক নিয়া যাবার দেখিলেক। যেই চেংড়াটা মরি গেইচে, উয়ায় এক বিধুয়া বেটিছাওয়ার এক মাত্র বেটা। মরা চেংড়ার সাথত গঞ্জের মানষি ভিড় করি যাবার ধরচে।

১৩ বিধুয়া বেটিছাওয়াটাক দেখিয়া গুরুর খুব মায়া হইলেক, আর কইলেক, “তুই আর না কান্দিস।”

১৪ তার পাছত যীশু আগপাকে যায়া মরার মৈর্চলি খান নারিলেক, আর যায় যায় মরার মৈর্চলি খান নিয়া যাবার ধরচে, উমরা খাড়া হইলেক। যীশু সেলো কইলেক, “কি রে গাবুর চেংড়া! মুই তোক কবার নাগচুং, তুই ওঠেক।”

১৫ সেলো কি হইলেক? মরা চেংড়াটা উঠি বসিয়া কতা কবার নাগিলেক, আর যীশু চেংড়াটাক উয়ার মাক ফিরি দিলেক।

১৬ এই দেখিয়া সগায় ভয় খায়া ভগবানের মহিমার গুণগান করির নাগিলেক। উমরা আরো কবার নাগিলেক, “ভগবান উয়ার মানষিলাক দেখা দিবার বাদে, হামার মইন্ধোত এক জন মহান ভাববাদীক পেয়ে দিচে। আজি হামরা ভগবানের কাম দেখির পাইলুং।”

১৭ এই ঘটনার কতা গোটায় যিহুদীয়া প্রদেশের চাইরো পাকের সউগ অঞ্চলত ছড়িয়া পড়িলেক।

১৮-১৯ যীশুর সউগ ঘটনার কতা দীক্ষাদাতা যোহনের শিষ্যলো যোহনক যায়া জানাইলেক। সেলো এই কতা পুছিবার বাদে যোহন উয়ার দুই জন শিষ্যক ডেকেয়া গুরুরটে পেঠেয়া দিলেক, “যায় আসিবার কতা আছে তোমরায় কি সেই বাছাই করা রাজা? না হামরা অইন্য কারো বাদে বাছে রমো?”

২০ উমরা যীশুরটে আসিয়া কইলেক, “দীক্ষাদাতা যোহন হামাক পুছিবার বাদে তোমারটে পেঠাইচে। যার আসিবার কতা আছে

তোমরায় কি সেই বাছাই করা রাজা? না হামরা অইন্য কারো বাদে বাছে রমো?”

২১ ঐ সময় যীশু মেয়ো মানষিক নানা নাকান রোগ ব্যাধির জ্বালা-যন্তনা থাকি ভাল করিলেক। মানষিলার ভিত্তিরা থাকি অপদেবতালাকো খেদাইলেক, আর মেয়ো কানা মানষিক দেখিবার ক্ষমতা ফিরি দিলেক।

২২ এইলা করিয়া যীশু যোহনের শিষ্য দুইজনাক কইলেক, “তোমরা যেইলা দেখিলেন আর শুনিলেন, সেইলায় যায়া যোহনক কন। কানা মানষি দেখির পাবার নাগচে, খোড়া মানষি হাটির পাবার নাগচে, কুষ্ঠ রুগী শুদ্ধি হয়। ভাল হবার নাগচে, টসা শুনির ধরচে, মরা মানষি বন্তি উঠির ধরচে, আর গরীব মানষিলারটে ভাল খবর প্রচার করা হবার নাগচে।

২৩ মোক মানি নিবার বাদে যায় বাধা মনে না করে, ভগবান উয়াক আশুর্বাদ করিবে।”

২৪ যোহনের শিষ্যলা যাবার পাছত, যীশু ভিরের মানষিলাক যোহনের বিষয়ে পুছিলেক, “তোমরা নিধুয়া পাথারত কি দেখির গেইচেন? নেলফেয়ো একটা বেত গছ হাওয়াতে ঢুলিবার ধরচে এইটা কি?

২৫ নাঃ! তা না হইলে কি দেখির গেইচেন? খুব ভাল দামী জামা-কাপড় পেন্দা একটা বেটাছাওয়াক? যায় যায় ভাল জামা-কাপড়

পেন্দে, আরামে জীবন যাপন করে, উমরা তো রাজবাড়িত থাকে, নিধুয়া পাথারত থাকে না।

২৬ তোমরায় কন, কি দেখিবার গেইচেন? এক জন ভগবানের ভাববাদীক? হ্যে এইটা ঠিক! তোমরা যাক দেখিচেন উয়ায় এক জন ভগবানের ভাববাদীর চায়াও মহান।

২৭ যোহনে সেই মানষিটা যার সমন্ধে পবিত্র সনাতন শাস্ত্ররত নেখা আছে, দেখ, তোর আইসার আগত মোর খবরিয়াক প্যেঠাইচুং, খবরিয়াটা মানষিলার মনের ঘাটা বানাবে।

২৮ “মুই তোমাক কবার নাগচুং, কোন বেটিছাওয়ার গর্ভত জন্ম নেওয়া, সউগ মানষির মইন্ধে যোহনের চায়া বড় আর কাণ্ডো নাই। তাণ্ডো কোন মানষি ভগবানের শাসন ব্যবস্থা মানিলে, যদিও উয়ায় সউগ চায়া ছোট, উয়ায় তো যোহনের চায়া মহান।”

২৯ যায় যায় যীশুর প্রচার শুনিবার ধরলেক, উমরা যোহনের দীক্ষা নিচে। এই দীক্ষা নিয়া উমরা সগায় মানিলেক যে ভগবান ভাল, ন্যায়, নিষ্ঠাবান। এমন কি অসাধু মাসুল আদায়কারীলাও এইটা মানিলেক।

৩০ কিন্তুক ফরীশী ধর্মগুরু আর পন্ডিত মানষিলা, দীক্ষাদাতা যোহনের দীক্ষা মানি না নেওয়াতে উমারলার জীবনের বাদে ভগবানের যে ইচ্ছা, সেইটা অস্বীকার করিলেক।

৩১ যীশু কইলেক, “এই কালের মানষিলাক কিসের সাথত তুলনা করিম? উমরা কি পছন্দ করে?

৩২ এই কালের ছাওয়ার নাকান করি হাটত বসিয়া এক জন  
অইন্য জনাক চিকিরিয়া কয়, তোমার বাদে হামরা বিয়ার বাঁশী  
বাজাইলোং কিন্তুক তোমরা নাচিলেন না, হামরা শোকের গান  
গাইলোং, কিন্তুক তোমরা কান্দিলেন না!

৩৩ “দীক্ষাদাতা যোহন আসিয়া উপাস থাকিলেক, রুটি,  
আংগুরের রস খাইলেক না, আর তোমরা কইলেন, ‘উয়াক  
অপদেবতা ধরচে।’

৩৪ আর এলা বাছাই করা মানষিটা খাবার খায়, এই বাদে  
তোমরা কন, ‘উয়ায় পেটুক, মদারু। আর সমাজ থাকি বাইর করি  
দেওয়া মাসুল আদায়কারী, পাপী মানষিলা হইলেক উয়ার বন্ধু।’

৩৫ কিন্তুক যাক ভগবানের জ্ঞান দিয়া চালনা করি নেওয়া হয়,  
উয়ায় জীবন দিয়া প্রমাণ করে যে, ঐ জ্ঞান খাটি।”

৩৬ এক দিন এক জন ফরীশী ধর্মগুরু, যীশুক বাড়িত খাবার  
বাদে নিমন্তন করিলেক। যীশু উয়ার বাড়িত যায় খাবার  
বসিলেক।

৩৭ ঐ গেরামত এক জন বেয়া চরিত্রের বেটিছাওয়া আছিলেক।  
উয়ায় শুনির পাইলেক, “যীশু ফরীশী ধর্মগুরুর বাড়িত নিমন্তন  
খাবার আসিচে।” এইটা শুনিয়া উয়ায় একটা সাদা শিলের বানা  
শিশিত দামী আতর আনিলেক,

৩৮ আর বাড়ির ভিতরাত সোন্দেয়া হাংকুড়া পাড়ি যীশুর  
ঠেংয়ত পরিয়া কান্দিবার নাগিলেক, কান্দিতে কান্দিতে যীশুর



ঠেং চোখুর জল দিয়া ধুইয়া, চুলি দিয়া মুছি দিবার নাগিলেক।  
তার পাছত ঠেংয়ত চুমা দিয়া আতর নাগে দিলেক।

৩৯ যেই ফরীশী ধর্মগুরুটা নিমন্ত্রণ করিচে, উয়ায় এই দেখিয়া  
মনে মনে ভাবিবার নাগিলেক, “যীশু যদি ভগবানের এক জন  
ভাববাদী হইলেক হয়, তাইলে জানির পাইলেক হয়, উয়ার ঠেং  
যায় নাড়িচে ইয়ায় কি নাকানের বেটিছাওয়া, ইয়ায় তো পাপী!”

৪০ যীশু সেয়া ফরীশীটাক কইলেক, “শিমোন মুই তোক কিছু  
কতা কবার চাং।” শিমোন কইলেক, “হে গুরু কন! মোক তোমরা  
কি কবেন।”

৪১ যীশু কইলেক, “দুই জন মানষি একটা মহাজনেরটে কিছু  
টাকা ধার নিলেক। এক জন ধার নিলেক পাঁচশো দিনের মজুরীর  
টাকা, অইন্য জন নিলেক পঞ্চাশ দিনের মজুরীর টাকা।

৪২ পাছত উমার দেনা শোধ করার সাধ্য নাই। এই দেখিয়া  
মহাজন দুইজনারে দেনা মুকুব করি দিলেক। ইমার দুই জনের  
মইন্ধে কায় বেশী মহাজনক মায়া করিবে?”

৪৩ শিমোন কইলেক, “মোর মনে হয় যার বেশী দেনার টাকা  
মাপ করা হইচে, তায়ে।” যীশু কইলেক, “তুই ঠিকেই কইচিস।”

৪৪ তার পাছত যীশু বেটিছাওয়াটার ভিতি ঘুরিয়া শিমোনক  
কইলেক, “তুই এই বেটিছাওয়াটাক দেখিছিস? যেয়া মুই তোর  
বাড়ি আসলুং, সেয়া তুই ঠেং ধুবার বাদে জল পর্যন্ত দিলু না।

কিন্তুক উয়ায় উয়ার চোখুর জল দিয়া মোর ঠেং ধুইয়া দিলেক,  
আর চুলি দিয়া ঠেং মুছিয়া দিলেক।

৪৫ তুই মোক সন্মান দেখেবার বাদে চুমা খালু না, এমন কি বরণ  
করি নিলু না! কিন্তুক মুই যেলা হাতে আসচুং সেলা হাতে উয়ায়  
আদর করির বাদে মোর ঠেংয়ত চুমা খাবার চায়।

৪৬ হামার রীতি-নীতি অনুসারে মাথাত জলপই তেলে দিয়া  
বরণও করিলু না। কিন্তুক উয়ায় দেহাত নাগেবার বাদে ভাল  
গন্ধের আতর আনিয়া মোর ঠেংয়ত মাখিয়া বরণ করিচে।

৪৭ এই বাদে মুই তোমাক কবার ধরচুং, উয়ায় মোক বেশী পিরিত  
করিচে বুলিয়া বুঝা যায় যে, উয়ার মেলা পাপ হইলেও, সউগ  
পাপ ক্ষমা করা হইলেক। কিন্তুক যার অল্প পাপ ক্ষমা করা হইচে,  
ঐ মানষিটা মোক অল্প পিরিত করে।”

৪৮ সেলা যীশু বেটিছাওয়াটাক কইলেক, “তোর পাপ ক্ষমা করা  
হইল।”

৪৯ ফির উয়ার সাথত যায় যায় খাবার বসিচে, উমরা মনে মনে  
কবার নাগিলেক, “ইয়ায় কায়, যে পাপও ক্ষমা করি দেয়?”

৫০ সেলা যীশু বেটিছাওয়াটাক কইলেক, “মাই, বিশ্বাস  
করিচিস বুলিয়া তুই পাপ থাকি মুক্তি পাচিস। যা! শান্তিতে চলি  
যা।”

৮ ইয়ার পাছত যীশু ভগবানের শাসন ব্যবস্থার ভাল খবর শোনেবার বাদে গেরামে-গেরামে গঞ্জে ঘুরিয়া প্রচার করির ধরলেক। উয়ার সাথত আছিলেক ঐ বারো জন খবরিয়া আর কয়জন বেটিছাওয়া। ঐ বেটিছাওয়ালা কয়েক জন এই নাকান, যায় নানা নাকান অসুখ থাকি ভাল হইচে বা অপদেবতার কবল থাকি মুক্তি পাইচে। ইমারলার মইন্ধোত আছিলেক মগদলিনী মরিয়ম (উয়ার ভিত্তিরা থাকি যীশু সাতটা অপদেবতাক খেদাইচে)

৩ আর রাজা হেরোদের কর্মচারী কুষের বনুস যোহানা, আর শোশনা, আরো মেয়ো বেটিছাওয়াও আছিলেক। যীশু আর উয়ার শিষ্যলার সেবা, যতন করির বাদে, ঐ বেটিছাওয়ালা নিজের টাকা-পাইসা ধন-সম্পত্তি থাকি খরচ করির ধরছিলেক।

৪ এক দিন যীশুর বাইক্য শুনির বাদে দলে দলে নানান গঞ্জ থাকি মানষি আসিয়া জড়ো হবার নাগিলেক। যীশু সেয়ো গল্পের নাকান করি উমাক উপদেশ দিলেক।

৫ “শোন! এক জন চাষা ভুইয়োত বিচন ছিটিবার গেইলেক। আর বিচন ছিটাইতে ছিটাইতে কতলা বিচন ঘাটার বগলত পড়িলেক, কিন্তুক এইলা বিচন মানষি ঠেং দিয়া খচিলেক, আর পখিও খায়া নিলেক।

৬ আরো কতলা বিচন পড়িলেক শিলবাড়ির ভুইয়োত, আর গাজেয়া উঠিলেক। কিন্তুক রস না থাকার বাদে রৌদের ঝালাত

বিচনলা ঝেমরি গেইলেক।

৭ আরো কতলা বিচন পড়িলেক কাটা ঝোপের মাঝত, আর কাটা ঝোপ বড় হয়। ঐলাক চিপি ধরলেক।

৮ আরো কতলা বিচন পড়িলেক ভাল ভুইয়োত, আর সেইলা বড় হয়। একশ গুন বেশী ফসল হইলেক।” গল্পের শেষত যীশু জোরে জোরে কইলেক, “যার শুনিবার কান আছে উয়ায় শুনুক।”

৯ শিষ্যলো যীশুক কইলেক, “এই গল্পটার মানে কি?”

১০ যীশু উত্তর দিলেক, “ভগবানের শাসন ব্যবস্থার গোপন তত্ত্বের বিষয়লা তোমাক জানে দেওয়া হইলেক। কিন্তুক অইন্য মানষিলাক গল্প দিয়া কওয়া হয়। ইয়াতে, উমরা দেখিবে কিন্তুক ভাব বুঝির পাবে না, শুনিবে কিন্তুক মানে বুঝির পাবে না।

১১ “ইয়ার মানে এই নাকান, যে, বিচন হইলেক ভগবানের বাইক্য।

১২ বিচনলা যে ঘাটার বগলত পড়িচে মানে যেইলা মানষি ভগবানের বাইক্য শোনে, কিন্তুক শোনার পাছত শয়তান-অসুরটা উমার অন্তর হাতে সেই বাইক্য উকুরি ফেলায়, যাতে উমরা বিশ্বাস না করিয়া উদ্ধার পায় না।

১৩ যেইলা বিচন শিলবাড়ির ভুইয়োত পড়িচে, তার মানে এই নাকান মানষিক বুঝায় যে, বাইক্য শুনতে কালে আনন্দে মানি নেয়। কিন্তুক উয়ার শিপা মাটির বেশী তলত না যাবার বাদে অল্প দিন বিশ্বাস রয়। শয়তানের পরীক্ষা আসিলে পাছত পড়ি রয়।

১৪ কাটাঝোপত বিচন পড়া মানে যেই মানষিটা বাইক্য শোনে  
কিন্তুক সংসারের চিন্তা ভাবনায়, ধন সম্পত্তির সুখ ভোগের লোভ  
লালসাত পড়ি বিশ্বাস হারে ফেঁদে। এই নাকান মানষির জীবনত  
ভগবানের বাইক্যের কোন পাকা ফল দেখা দেয় না।

১৫ ভাল ভুইয়োত বিচন পড়া মানে সৎ সরল মানষি বুঝাইচে,  
যায় ভগবানের বাইক্য শুনিয়া মন-পরান দিয়া পালন করিয়া শক্ত  
করি ধরি রয়। উয়ার জীবনত ভগবানের বাইক্যের ভাল ফল  
দেখা দেয়।”

১৬ “কাণ্ডো গচা জ্বলেয়া ডেলি দিয়া ঢাকি থোয় না, বা চাংরার  
তলত থোয় না। মানষিটা গচা জ্বলেয়া ঠগার উপরাত থোয়, যাতে  
ঘরের ভিত্তিরা সোন্দেয়া মানষিলা আলো দেখির পায়।

১৭ এই নাকান নুকি থোয়া কোন কিছুই নাই যে নিকলা হইবে না।  
আরো এমন কিছুই গোপন নাই যে জানা যাবে না।

১৮ এই বাদে মোর কতা মন দিয়া শোন! ভগবানের শাসন  
ব্যবস্থার বিষয় যার বুঝিবার মন আছে, উয়াক আরো বুঝির  
দেওয়া হইবে। কিন্তুক যার বুঝিবার মন নাই, উয়ার মন থাকি  
ভগবানের বাইক্যের সউগ কিছু কাড়ি-কুড়ি নেওয়া হইবে।”

১৯ এক দিন যীশুর মাও আর উয়ার ভাইলা যীশুর নগত দেখা  
করির আসিলেক। কিন্তুক ভিড়ের বাদে যীশুরটে যাবার পারিলেক  
না।

২০ একটা মানষি স্যেলা যীশুক কইলেক, “তোমার মাও আর তোমার ভাইলা তোমার সাথত দেখা করির বাদে বায়রাত খাড়া হয়্যা আছে।”

২১ যীশু স্যেলা উত্তর দিলেক, “উমরায় মোর মাও, উমরায় মোর ভাই, যায় ভগবানের বাইক্য শুনিয়া পালন করে।”

২২ এক দিন যীশু উয়ার শিষ্যলোক নিয়া একখান নাওয়োত উঠিয়া কইলেক, “চলো হামরা সাগরের ওপার যাই।” আর উমরা যাবার নাগিলেক।

২৩ নাও যাইতে যাইতে যীশু নাওয়োতে নিন গেইলেক। ঠিক সেই সমায় সাগরত অচানক একটা ছড়কা উঠিলেক, আর নাও সাগরের ঢেউয়ের জলত ভরতি হবার নাগিলেক। ইয়াতে উমরা খুব বিপদত পড়িলেক।

২৪ স্যেলা শিষ্যলা যীশুক জাগেয়া কইলেক, “গুরু! গুরু! হামরা যে ডুবি যাবার নাগচি।” যীশু উঠিয়া ছড়কার বাতাসক আর সাগরের জলের ঢেউওক ধমক দিয়া কইলেক, “নিবুম হঃ!” আর কইতে কালে সউগ কিছু নিবুম হয়্যা ঝিত হয়্যা গেইলেক।

২৫ স্যেলা যীশু উয়ার শিষ্যলোক কইলেক, “তোমারলার বিশ্বাস কোটে?” কিন্তুক উমরالا ভগবানের প্রতি ভক্তিতে আকুল হয়্যা ভয় খায়া আরো অচানক হয়্যা গেইলেক। উমরالا নিজের মানষিলার মইদ্ধোত কওয়া-কয়ি করির নাগিলেক, “আরেঃ, ইনায়

কায়? ছড়কার বাতাস আর জলের ঢেউওকও ইয়ায় ছকুম দেয়, আর সেইলা উয়ার কতা শোনে!”

২৬ ইয়ার পাছত যীশু আর শিষ্যলা গালীল সাগরের অইন্য পারত, গেরাসেনী অঞ্চলত পৌছিলেক।

২৭ যীশু নাও থাকি নামিতে কালে ঐ অঞ্চলের গঞ্জের একটা অপদেবতা ধরা মানষি যীশুর বগলত আসিলেক। উয়ায় মেয়ো দিন থাকি বাড়িত রয় না, সমাধির জাগাত রয়। উয়ায় কাপড় পিন্দে না।

২৮-২৯ এই অপদেবতাটা বার বার মানষিটাক পিচাশের নাকান করি ধরছিলেক। যদিও সেই সমায় উয়াক পাহারা দিয়া শিকোল বেড়ি নাগেয়া ঠেং হাত বান্দিয়া থোয়, তাঙো উয়ায় ঐলা ছিড়ি ফেলায়। অপদেবতাটা উয়াক বশ করি নিধুয়া পাথারত খেয়েয়া নিয়া যাবার ধরছিলেক। কিন্তুক মানষিটা যীশুক দেখিয়া আগ পাকে হাংকুড়া পাড়ি মাটিত পড়িয়া জোরে জোরে চিকিরিয়া কবার নাগিলেক, “হে বাহে, মহান ভগবানের বেটা যীশু, তুই কি চাইস মোরটে? মুই ভিক্ষা চাং মোক জ্বালা যাতনা দিবু না।” মানষিটা কেনে এই নাকান কইলেক, কেনেনা যীশু মানষিটার ভিতিরা থাকি অপদেবতাক নিকিলি যাবার ছকুম দিলেক।

৩০ যীশু সেয়া উয়াক পুছিলেক, “তোর নাম কি?” উয়ায় কইলেক, “শতপতি।” কেনেনা এই মানষিটার ভিতিরাত হাজারে হাজারে অপদেবতা সোন্দেয়া আছিলেক।

৩১ এই অপদেবতালা বারে বারে কাউলা-কাউলি করি যীশুক কবার নাগিলেক, “হামাক রসার তলে যাবার হুকুম দেন না!”

৩২ সেই সমায় পাহাড়ের বগলোত খুব বড় একটা শুয়োরের পাল চরের ধরচে। অপদেবতালা কাউলিয়া যীশুক কইলেক, “হামাক ঐ শুয়োরের পালত সোন্দের অনুমতি দেও।” যীশু অপদেবতালার কতাত রাজি হইতে কালে,

৩৩ অপদেবতালা মানষিটার ভিত্তিরা হাতে নিকলিয়া শুয়োরলার ভিত্তিরাত সোন্দাইলেক। এই বাদে শুয়োরের পাল পাহাড়ের বগল থাকি জোরে দৌড়ি যায় সাগরের জলত পড়িয়া ডুবি মরিলেক।

৩৪ এই ঘটনা দেখিয়া, যায় যায় শুয়োর চরের ধরচে, উমরা ভয়ে দৌড়ি পালেয়া বগলা বগলি গেরাম গঞ্জের মানষিলাক খবর দিলেক।

৩৫ সেলো কি ঘটনা হইচে এইটা দেখির বাদে মানষিলা আসিলেক। উমরা যীশুর ওটে আসিয়া দেখিলেক, ঐ মানষিটাক যার ভিত্তিরা থাকি অপদেবতালা নিকিলি গেইচে, উয়ায় ভাল হয়। কাপড় পিন্দি চুপ করি যীশুর ঠেংএর বগলত বসি আছে। এই দেখিয়া ভিরের সউগ মানষিলা ভয় খাইলেক।

৩৬ যায় যায় এই ঘটনা দেখিচে উমরাও অইন্য মানষিলাক এই ঘটনাটা কবার ধরচে, কি নাকান করি অপদেবতা ধরা মানষিটা ভাল হইলেক।



৩৭-৩৯ সেলো যীশুক গেরাসেনী অঞ্চলের সউগ মানষিলা খুব ভয় খায়া কাউলা-কাটি করি কবার নাগিলেক, যাতে যীশু উমার গেরাম ছাড়ি চলি যায়। ঐ মানষিটা যার ভিত্তিরা হাতে অপদেবতালা বাইর হয় গেইচে, উয়ায় যীশুর সাথত যাবার বাদে কাউলা-কাউলি করির নাগিলেক। যীশু উয়াক পেয়েঠে দিয়া কইলেক, “তুই বাড়ি ফিরি যা। ভগবান তোর বাদে কত বড় কাম করিচে, তুই যায়া সগাকে এইলা কঃ”। এই কতা কয়া যীশু অইন্য পারত নাওত ফিরি গেইলেক। মানষিটা সেলো চলি গেইলেক, আর উয়ার জীবনের বাদে যীশু যেইলা অচানক কাম করিচে, সেইলা গঞ্জের সগাকে কয়া প্রচার করির নাগিলেক।

৪০ যীশু যেলা সাগরের ঐ পার হাতে এই পারত ফিরি আসিলেক, সেলো মেলা মানষি খুশি মনে মানি নিলেক। কেনেনা উমরা উয়ার ফিরি আইসার বাদে বাছে আছিলেক। উমরা খুব জয় ধ্বনি দিয়া যীশুক অভিনন্দন জানাইলেক।

৪১-৪২ ঠিক ঐ সময় যায়ীর নামে একটা মানষি ওটেকোনা আসিলেক। উয়ায় উপাসনা ঘরের প্রধান দেওয়ানী। উয়ার এক মাত্র ছাওয়া বারো বছরের বেটি মরণ কালের শেষ দশাত পরিয়া আছে। এই বাদে যীশুর ঠেংএর বগলত হাংকুড়া পাড়ি কাউলা-কাউলি করির নাগচে, “হে বাহে যীশু! মোর বাড়ি চল!” যীশু যেলা যায়ীরের বাড়ি যাবার ধরচে, সেলো চাইরো পাকে ভিরের মানষিলা ছড়াছড়ি করি পরির নাগচে।

৪৩ ওটেকোনা ভিড়ের মইদ্বোত একটা বেটিছাওয়া আছিলেক, উয়ায় বারো বছর হাতে অক্লান্ত শ্রাব অসুখে ভুগিবার ধরচে। উয়ার সারা জীবনের কামাইয়ের টাকা-পাইসা, ডাক্তার, কবিরাজের পাছত খরচ করিয়াও অসুখ ভাল হয় নাই।

৪৪ এই বেটিছাওয়াটা পাছপাকে আসিয়া চুপ করি যীশুর গিলাপের আচলের কিনারটা নাড়িলেক। আর নাড়িতে কালে কি হইলেক? উয়ার অক্লান্ত শ্রাব বন্ধ হয় গেলেক।

৪৫ যীশু সেলো পুছিলেক, “কায় মোক নাড়িলেক?” ভিড়ের মানষিলা সগায় অস্বীকার করলেক। পিতরও কইলেক, “হে গুরু তোমরা দেখির নাগচেন, তোমার চাইরো পাকে ভিড়ের মানষিলা ঠেলা ঠেলি করি তোমার উপরাত পরিবার নাগচে।”

৪৬ যীশু কইলেক, “মুই জানং কাণ্ডো মোক নাড়িচে, কেনেনা মুই বুঝির পারলুং অসুখ ভাল করার শক্তি মোরটে থাকি নিকলিচে।”

৪৭ সেলো বেটিছাওয়াটা ভাবিলেক যে, এই ঘটনাটা আর নুকি থোয়া যাবে না। বেটিছাওয়াটা সেলো খরথরে কাপিতে কাপিতে যীশুর আগ পাকে হাংকুড়া পাড়ি সগারে আগত কবার নাগিলেক, “মুই নাড়িচোং আর এলা মোর অসুখ ভাল হয় গেলিচে।”

৪৮ যীশু কইলেক, “মাই, তুই বিশ্বাস করিচিস দেখি ভাল হয় গেলিচিস। যা, শান্তিতে চলি যা।”

৪৯ যীশু সেলোও বেটিছাওয়াটার সাথত কতা কবার ধরচে, এই নাকান সমায় উপাসনা ঘরের দেওয়ানী যায়ীরের বাড়ি হাতে একটা মানষি আসিয়া কইলেক, “তোমার বেটি এই সংসারের মায়া ছাড়ি চলি গেইচে, গুরুক আর কষ্ট দিয়া লাভ নাই।”

৫০ যীশু এই কতা শুনিয়া উপাসনা ঘরের দেওয়ানীটাক কইলেক, “ভয় না খাইস! খালি মোর প্রতি বিশ্বাস করেক, উয়ায় ভাল হয়্যা যাবেই।”

৫১ সেলো উমরা যায়ীরের বাড়ি পৌছিলেক, সেলো যীশু চেংড়িটার বাপ, মাও আর পিতর, যাকব, আর যোহন ছাড়া কাণ্ডেকে ঘরের ভিত্তিরা সোন্দের দিলেক না।

৫২ শোকে ভরা মানষি দিয়া বাড়িটা ভরতি হয়্যা গেইচে। যীশু কইলেক, “কিসের এত শোকের কান্দন! উয়ায় তো মরে নাই, উয়ায় তো নিন যাবার ধরচে।”

৫৩ এই কতা শুনিয়া সগায় যীশুক ঠাট্টা টিটকারি করির নাগিলেক, কেনেনা উমরা জানে চেংড়িটা মরি গেইচে।

৫৪ যীশু চেংড়িটার হাত ধরিয়া কইলেক, “মাই ওঠেক।”

৫৫ এই কতা কইতে কালে চেংড়িটার জিউটা ফিরি আসিলেক, আর সেলোয় সেলোয় উঠিয়া বসিলেক। যীশু চেংড়িটাক খাবার দিবার বাদে উমাক আদেশ দিলেক।

৫৬ উয়ার বাপ-মাও খুব অচানক হইলেক, কিন্তুক যীশু এই ঘটনাটা কাণ্ডেকে কবার না দিলেক।

৯ এক দিন যীশু উয়ার বারো জন খবরিয়াক ডেকেয়া তামান অপদেবতালাক খেদেবার আর অসুকিয়া মানষিলাক ভাল করিবার ক্ষমতা আরো অধিকার দিলেক।

১০ তার পাছত উমাক, ভগবানের শাসন ব্যবস্থা প্রচার করিবার আর অসুকিয়া মানষিলাক ভাল করির বাদে পেঠাইলেক।

১১ যীশু শিষ্যলোক কইলেক, “তোমরা ঘাটা চলার সমায় নাটি, ঝোলা, খাবার, টাকা-পাইসা আর পিন্দিবার বাদে অইন্য জামা-কাপড় কোন কিছুই নেন না।

১২ গেরামের যেই বাড়িত সোন্দাবেন, ঐ গেরামটা না ছাড়া পর্যন্ত ঐটে থাকেন।

১৩ যদি মানষিলা তোমাক মানি না নেয়, অইন্যরটে যাবার সমায় তোমার ঠেংএর ধূলা ঝাড়ি ফেলোন, উমার বিরুদ্ধে সাক্ষী হিসাবে। ইয়াতে উমরা জানির পাবে ভগবানের গোসা উমার উপরাত আছে।”

১৪ শিষ্যলো উমার যাত্রা শুরু করিলেক, উমরা গেরামে গেরামে চাইরো পাকে যায়া ভগবানের ভাল খবর প্রচার করির নাগিলেক, আরো অসুকিয়া মানষিলাক ভাল করির নাগিলেক।

১৫ যীশু যেইলা করির নাগিলেক, সেইলা শাসনকর্তা হেরোদ শুনিয়া ব্যাকুল হয় গেলেক। কাণ্ডো কাণ্ডো কবার নাগিলেক

দীক্ষাদাতা যোহন বত্তি উঠিচে। হেরোদ কিন্তুক কিছুই বুঝির পারিলেক না।

৮ কাণ্ডো বা কবার নাগিলেক আগের কালের ভগবানের ভাববাদী এলিয়—উয়াক দেখা গেইচে। আরো কবার নাগিলেক আগের কালের অইন্য এক জন ভগবানের ভাববাদী মরণ থাকি বত্তি উঠিচে।

৯ হেরোদ কইলেক, “মুই তো যোহনের মাথা কাটিয়া ফেলাইচুং। তাইলে যার বিষয়ে মানষিলা এত অচানক কতা কবার ধরচে উয়ায় কায়?” হেরোদ যীশুক দেখিবার বাদে আকুল হইলেক।

১০ যীশুর অধিকার দেওয়া খবরিয়ালা ফিরি আসিয়া, কি কি কাম করিচে সউগে যীশুক কইলেক। যীশু উমারলাক বৈৎসৈদা গেরামের একটা নির্জন জাগাত নিয়া গেইলেক।

১১ কিন্তুক ভিড়ের মানষিলা জানির পায়া উমারলার পাছে পাছে যাবার ধরলেক। যীশু সেলো মানষিলাক গ্রহন করিয়া ভগবানের শাসন ব্যবস্থার বিষয়ে শিক্ষা দিলেক। আর যে অসুকিয়া মানষিলার ভাল হবার দরকার আছিলেক উমারলাক ভাল করিলেক।

১২ যেহেলা বেলা ডোবং ডোবং হইলেক, সেলো বারো জন শিষ্য আসিয়া যীশুক কইলেক, “হামরা এলা যে জাগাখানত আছি, এইখান হইলেক নিধুয়া পাথার, এলায় মানষিলাক বিদায় কর,

যাতে উমরা বগলা বগলি গেরামত যায়া নিজের থাকির জাগা আর খাবার জোগার করির পায়।”

১৩-১৪ যীশু কইলেক, “তোমরায় উমারলাক খাবার দেও!” ওটেকোনা পেরায় পাঁচ হাজার বেটাছাওয়া আছিলেক। এই বাদে শিষ্যলো উত্তর দিলেক, “এইটা অসম্ভব! হামারটে মাত্র পাঁচখান রুটি আর দুইটা মাছ আছে। তাছাড়া আর কিছুই নাই। তোমরা কি চান যে হামরা এই মানষিলার বাদে খাবার কিনি আনি?” সেলো যীশু শিষ্যলোক কইলেক, “উমারলাক সারি সারি পঞ্চাশ জন করি এক একদলে বসে দেও।”

১৫ শিষ্যলো ঐ নাকানে করিয়া, সগাকে বসেয়া দিলেক।

১৬ যীশু পাঁচখান রুটি আর দুইটা মাছ হাতত নিয়া, স্বর্গের ভিতি চায়া দেখিয়া ভগবানক ধন্যবাদ দিলেক। পাছত মানষিলোক খাবার দিবার বাদে, রুটি ছিড়ি ছিড়ি শিষ্যলোর হাতত দিলেক।

১৭ সগায় শান্তি করি পেট ভরে খাইলেক, বাকি যেইলা পড়ি রইলেক ঐলা একটে জড়ো করি আরো বারো ডেলি হইলেক।

১৮ এক দিন যীশু যেলা একলায় প্রার্থনা করির ধরচে, সেলা খালি শিষ্যলোয় উয়ার সাথত আছিলেক। যীশু উমারলাক পুছিলেক, “মুই কায়, মোর সমন্ধে মানষিলা কি কয়?”

১৯ উমরলা কইলেক, “কাণ্ডো কাণ্ডো কয় দীক্ষাদাতা যোহন, কাণ্ডো কাণ্ডো কয় এলিয়, আরো অইন্য কাণ্ডো কাণ্ডো কয় তিনপুরানি ভগবানের ভাববাদীর মইন্ধোত কাণ্ডো বত্তি উঠিচে।”

২০ যীশু উমারলাক পুছিলেক, “কিন্তুক তোমরা মোর সমন্ধে কি কন, মুই কায়?” পিতর উত্তর দিলেক, “তোমরা হইলেন ভগবানের সেই বাছাই করা রাজা।”

২১ যীশু শিষ্যলোক সাবধান করি দিয়া কইলেক, “এই কতাটা কাণ্ডোকে না কন।

২২ মোক খুব দুঃখ-কষ্ট সহ্য করির নাগিবে। যিহুদী নেতালা, প্রধান বামনলা আরো পন্ডিত মানষিলা মোর বিরোধিতা করিবে, উমরা মোক গ্রাহ্য করিবে না। তুচ্ছ মনে করি মারি ফেল্যাইবে। কিন্তুক তিন দিনের দিন মোক মরণক জয় করি বত্তি উঠির নাগিবে।”

২৩ ইয়ার পাছত যীশু সগাকে কইলেক, “যদি কাণ্ডো মোর শিষ্য হবার চান, তাইলে নিজের ইচ্ছা আর সুবিধা ছাড়ির নাগিবে। প্রতিদিন ক্রুশের বোঝা তুলি নিয়া মোর পাছে পাছে আসির নাগিবে।

২৪ কেনেনা যায় ইহকালের জীবন রক্ষা করির চায় উয়ায় পরকালের জীবন হারাবে। আর যায় মোর বাদে ইহকালের জীবন হারেবার চায় উয়ায় পরকালের জীবন রক্ষা পাবে।

২৫ যদি কোন মানষি গোটায় দুনিয়াটাক জয় করে, কিন্তুক নিজের জীবন হারে ফেল্যায়, তাইলে লাভ কি?

২৬ মোক নিয়া শরম না খান! মোর শিক্ষালাও নিয়া শরম না খান! যদি খান, তাইলে যেই দিন মুই নিজের মহিমা আর স্বর্গের

বাপ আর পবিত্র স্বর্গের দূতলার মহিমা নিয়া বিচার করির ফিরি আসিম, সেই দিন মুইও তোমারলাক শরম খাইম।

২৭ কিন্তুক মুই তোমারলাক সচাং কবার ধরচুং, এটেকোনা এমন কয়জন মানষি আছে, যায় যায় ভগবানের শাসন ব্যবস্থা চালু না হওয়া পর্যন্ত মরিবে না।”

২৮ এই কতালা কবার আট দিন পাছত, যীশু প্রার্থনা করির বাদে, পিতর, যাকব আর যোহনক নিয়া পাহাড়ত চড়িলেক।

২৯ যীশু যেলা প্রার্থনা করির ধরচে, সেলা উয়ার মুখের চেহারা পালটি গেইলেক, আর উয়ার কাপড় চোপড় একেবারে সাদা ধপ-ধপা হয়। ঝল-ঝল করির নাগিলেক।

৩০-৩১ অচমকায় দুই জন মানষি উয়ার সাথত কতা কবার ধরিলেক। উমরা স্বর্গীয় মহিমায় দেখা দিলেক। সেই দুই জন হইলেক মহাপুরুষ মোশি আর ভগবানের ভাববাদী এলিয়। উমরা ভগবানের পরিকল্পনা মত যিরুশালেমোত যীশুর কেংকরি মরণ হইবে, এই নিয়া কওয়া-কয়ি করিবার ধরচে।

৩২ সেলায় পিতর আর উয়ার সঙ্গী সাথীলা ঘোর নিন্দোত আছিলেক। উমরা চেতন পায়া দেখিলেক যে, যীশুর মহিমা, বেলার নাকান ঝল-ঝল করির নাগচে, আরো উয়ার বগলোত দুই জন মানষি খাড়া হয়। আছে।

৩৩ পাছত যেলায় মোশি আর এলিয় যীশুর বগল হাতে যাবার ধরচে সেলায়, পিতর যীশুক কইলেক, “গুরু, ভালে হইচে যে



হামরা এটেকোনা আছি। হামরা তিনটা তাম্বু বানাই, একটা তোমার বাদে, একটা মহাপুরুষ মোশির, আর একটা এলিয়র বাদে।” কিন্তুক পিতর কি কবার ধরচে সেইটা ভাবিয়া কুল কিনারা পাইলেক না।

৩৪ পিতর যেলা এইলা কতা কবার ধরছিলেক, সেলায় একখান মেঘ ওটেকোনা আসিয়া উমারলাক ঢাকি নিলেক। আর উমরানা সেই মেঘের মইন্ধোত ঢাকা পড়াতে শিষ্যলা খুব ভয় খাইলেক।

৩৫ আর ঐ মেঘ থাকি একটা আওয়াজ শোনা গেইলেক, “ইয়ায় মোর বেটা, মোর বাছাই করা মনের এক জন। তোমরা ইয়ার কতা শোন।”

৩৬ আওয়াজ বন্ধ হয় যীশু একলায় উমার সাথত আছে। শিষ্যলা যেইলা ঘটনা দেখিলেক, সেইলা মেলা দিন কাণ্ডোকে কয় নাই।

৩৭ পরের দিন যীশু আর উয়ার শিষ্যলা যেলা পাহাড় থাকি নামি আসিলেক, সেলা মেলা মানষি যীশুর সাথত দেখা করিলেক।

৩৮ আর এই ভিরের মানষিলার মইন্ধোত একটা মানষি খুব জোরে চিকিরিয়া কবার নাগিলেক, “হে গুরু মুই হাত জোড় করি কং মোর বেটাটাক দেখ, ইয়ায় মোর এক মাত্র ছাওয়া।

৩৯ উয়াক একটা অপদেবতা ধরচে, সেলো উয়ায় অচমকায় চিকিরিয়া ওঠে। অপদেবতাটা সেলো উয়াক মোচরে, আছড়ে ফেলে দিয়া, উয়ার মুখ দিয়া ফ্যেপনা বাইর করি দিয়া, টুটরা নাগেয়া খুব কষ্ট দিয়া ছাড়ি দেয়।

৪০ মুই তোমার শিষ্যলোক কাউলা কাউলি করিয়া কইলুং, এই অপদেবতাটাক খেয়েদেয়া দেও। কিন্তুক উমরা পাইলেক না।”

৪১ যীশু সেলো কইলেক, “অবিশ্বাসীর গুষ্টি! ছলুয়া মানষিলা! মুই ধৈর্য ধরি কত কাল তোমার সাথত থাকিম? তোর বেটাক এটেকোনা আনেক।”

৪২ চেংড়াটাক য়েলা আনির ধরচে, সেলো অপদেবতাটা চেংড়াটাক মাটিত আছড়েয়া মোচড়ে ধরিলেক। যীশু অপদেবতাটাক ধমক দিয়া চেংড়াটাক ভাল করিয়া উয়ার বাপক ফিরি দিলেক।

৪৩ ভগবান যে কত মহান আর উয়ার শক্তি দেখিয়া সগায় অচানক হইলেক। যীশুর এই কাম দেখিয়া সগায় অচানক হয়। ভাবিবার নাগিলেক। সেলো যীশু নিজের শিষ্যলোক কইলেক,

৪৪ “মোর কতা মন দিয়া শোন, আর ফম থোন, বাছাই করা মানষিটাক মানষির হাতোত ধরে দেওয়া হইবে।”

৪৫ কিন্তুক যীশুর এই কতার মানে শিষ্যলো বুঝির পারিলেক না। কেনেনা ভগবান উমারটে কতালা গোপন থুইচে যাতে উমরা

বুঝির না পারে। শিষ্যলো যীশুক এই কতাটার মানে কি, পুছিবার ভয় খাইলেক।

৪৬ এক দিন শিষ্যলোর মইন্ধোত কায় বড়, এই নিয়া নিয়াই করির ধরচে।

৪৭ যীশু উমার মনের চিন্তা ভাবনা বুঝির পায়া, একটা ছোট ছাওয়াক নিজের বগলোত খাড়া করিলেক।

৪৮ তার পাছত উমারলাক কইলেক, “যায় ইয়াক গ্রহন করে, উয়ায় মোকে গ্রহন করে। আর যায় মোক গ্রহন করে উয়ায় ভগবানক গ্রহন করে। তোমারলার মইন্ধোত যায় সগারে চায়া ছোটো তায় সগারে চায়া বড়।”

৪৯ যোহন কইলেক, “গুরু তোমারে নামে একটা মানষিক অপদেবতা খেদেবার দেখিচি, উয়ায় হামার সঙ্গী-সাথী না হয়, এই বাদে উয়াক বাদা করি দিচি।”

৫০ যীশু কইলেক, “বাদা করেন না, কেনেনা যায় তোমার বিপক্ষে নোয়ায়, উয়ায় তোমার পক্ষে আছে।”

৫১ এদিয়া যীশুর স্বর্গত যাবার সমায় হয় আসিয়া উয়ায় যিরুশালেমত যাবার মন থির করিলেক।

৫২ যাবার সমায় শমরীয় মানষিলার একটা গেরামত ঢুকিবে বুলিয়া ঐ গেরামত সউগ কিছু ব্যবস্থা করির বাদে উয়ার আগত খবরিয়ালাক পেঠাইলেক।

৫৩ কিন্তুক যীশু যিরুশালেম যাবার ধরচে বুলিয়া ওই গেরামের মানষিলা উয়াক মানি নিলেক না।

৫৪ এই খবরটা যীশুর শিষ্য যাকব আর যোহন জানিয়া কইলেক, “হে প্রভু, তোমরা কি চান যে, উমারলাক ছোবা দিবার বাদে স্বর্গ হাতে অগুন নামেয়া আনিমু?”

৫৫ যীশু কিন্তুক উমারলার ভিত্তি ঘুরি দেখিয়া ধমক দিলেক।

৫৬ সেলো অইন্য গেরামত চলি গেইলেক।

৫৭ উমরা ঘাটা দিয়া যাবার ধরচে, সেলোয় এক জন মানষি যীশুক কইলেক, “তোমরা যেটেকোনা যাবেন মুইও তোমার পাছে পাছে যাইম।”

৫৮ যীশু মানষিটাক কইলেক, “শিয়ালের খাল আছে, পখিরও ভাসা আছে, কিন্তুক মোর মাথা খুবার জাগা নাই।”

৫৯ যীশু অইন্য একটা মানষিক শিষ্য হবার কইলেক, কিন্তুক ঐ মানষি উয়ার বাপের সদগতি আর কাম-কিরিয়া না করা পর্যন্ত দেরি করির চায়।

৬০ যীশু সেলো কইলেক, “যায় অমৃত জীবন পায় নাই, উমাক মরণের চিন্তা করির দেও। কিন্তুক তোর কর্তব্য হইলেক ভগবানের শাসন ব্যবস্থার ভাল খবর প্রচার করা।”

৬১ আরেক জন আরো কইলেক, “গুরু, মুই তোমার শিষ্য হইম। কিন্তুক মোর বাড়ির থাকি বিদায় নিয়া আসির দেও।”

৬২ যীশু উয়াক কইলেক, “যায় নাঙলের মুঠি ধরিয়া পাঁচিলা পাকে দেখিয়া রয়, উয়ায় ভগবানের শাসন ব্যবস্থাত থাকিবার উপযুক্ত নোয়ায়।”

১০ ইয়ার পাছত প্রভু আরো সত্তর জন শিষ্যক প্রচার করির বাদে বাছাই করিলেক। উয়ায় নিজে যেইলা গেরাম-গঞ্জ যাবে ঠিক করিচে, সেইলা জাগাত দুই জন দুই জন করি শিষ্য পেয়েঠেয়া দিলেক।

২ যীশু উমাক কইলেক যে, “ক্ষ্যেতের মেলা ফসল পাকি গেইচে, কিন্তুক ফসল কাটির কামলা কম। এই বাদে ক্ষ্যেতের মালিকেরটে প্রার্থনা কর, যাতে উয়ায় ফসল কাটির বাদে আরো কামলা পেয়েঠেয়া দেয়।

৩ এলা যাও! ফম থোন যেনে, তোমারলাক মুই নেকড়ে বাঘেরটে ভেড়ার নাকান করি পেয়েঠের ধরচুং।

৪ তোমার সাথত টাকা-পাইসা, ঝোলা, জুতা জোড়া না নেন। আর ঘাটা দিয়া যাবার সমায় অকাজের কতা কয়া সমায় নষ্ট করেন না।

৫ তোমরা যে বাড়িত সোন্দাবেন, সোন্দাইতে কালে ঐ বাড়ির মানষিলাক কন, ‘তোমার বাড়িত শান্তি হউক।’

৬ যদি উমরালা শান্তি পাবার যোগ্য হয়, তাইলে শান্তি পাবে, না হইলে তোমার শান্তি তোমারটে ফিরি আসিবে।

৭ যেহেতু কোন গেরামত যাবেন, যেই বাড়িত সোন্দাবেন ঐ বাড়িত রন। উমরা যেইলা খাবার দিবে ঐলায় খান, কেনেনা যায় কাম করে উয়ায় হাজিরা পাবার যোগ্য। এই বাড়ি ঐ বাড়ি করি না বেড়ান।

৮ “যদি তোমরা কোন গঞ্জত যান আর ওটেকার মানষিলা খুশি হয়। তোমাক মানি নেয়, তাইলে মানষিলা যেইলা খাবার দিবে ঐলায় খান।

৯ ঐ গঞ্জের অসুকিয়া মানষিলাক ভাল করেন, আর উমারলাক কন যে ‘ভগবানের শাসন ব্যবস্থা বগলত আসিচে।’

১০ যদি তোমরা কোন গঞ্জত যান আর ওটেকার মানষিলা তোমাক মানি না নেয়, তাইলে ঐ গঞ্জের ঘাটা দিয়া বেড়েয়া এই নাকান কন যে,

১১ ‘তোমাক ছাড়ি দিয়া হামরা এই চিন দিবার নাগচি, তোমারলার গঞ্জের যে ধূলা হামার ঠেংয়ত নাগিচে, ঐলাও হামরা ঠেং থাকি ঝাড়ি ফেলাইলুং। কিন্তুক এই কতাটা ফম করেন যে ভগবানের শাসন ব্যবস্থা বগলত আসিচে।’

১২ মুই তোমাক কবার ধরচুং বিচারের দিনত, এই গঞ্জের মানষিলাক চায়া সদোম গঞ্জের মানষিলা যে বেয়া, উমার অবস্থা ভাল হইবে।”

১৩ “ধিক্কার দেং কোরাসীন আর বৈৎসৈদা গঞ্জের ধর্মীয় মানষিলাক! যেইলা মহাশক্তির অচানক কাম তোমারলার বাদে

করচুং, ঐলা যদি সোর আর সীদোন গঞ্জের বিধর্মীয় মানষির বাদে করা হইলেক হয়, তাইলে মেয়ো দিন আগত উমরা পাপ থাকি মন পস্তেয়া কপালত ছাই মাখিয়া চটের কাপড় পিন্দিলেক হয়।

১৪ হে, এইটা সচাং! বিচারের দিনত সোর আর সীদোন গঞ্জের বিধর্মীয় মানষিলার চায়া তোমারলার বেশী সাজা হইবে!

১৫ ও বাহে! কফরনাহুমের মানষিলা তোমারলাক কি কইম? তোমরা স্বর্গের মহান হবার চান, কোন দিনও হবার পাবেন না। তোমারলাক নরকত ফ্যেলে দেওয়া হইবে।”

১৬ যীশু উয়ার শিষ্যলাক কইলেক, “যায় তোমাক মানি নেয়, উয়ায় মোকও মানি নেয়। আর যায় তোমাক মানি না নেয়, উয়ায় মোকও মানি না নেয়। ভগবান মোক পেঠাইচে বুলিয়া যায় মোক মানি না নেয় উয়ায় ভগবানক মানি না নেয়।”

১৭ সেয়ো সত্তর জন শিষ্য আনন্দে ঘুরি আসিয়া যীশুক কইলেক, “হে গুরু, তোমার নাম নিলে অপদেবতালাও হামার বশ হয়।”

১৮ যীশু উমাক কইলেক, “মুই শয়তান-অসুরক দ্যাওয়া হাতে ঝালিকের নাকান করি পড়ির দেখিলুং।

১৯ শোন! মুই তোমারলাক সাপ আর বিষ কাকড়াক দেং দিয়া ডল্লেবার ক্ষমতা দিচুং আর তোমার শত্রু শয়তানের সউগ শক্তির

উপরাত জয় করিবার ক্ষমতাও দিচুং। কোন কিছুই তোমারলার ক্ষতি করির পাবে না।

২০ অপদেবতালা তোমার বশ হয়্যা গেইচে বুলিয়া তোমরা আনন্দ করেন না, বরং স্বর্গত তোমার নাম নেখা হইচে, এই বাদে তোমরা আনন্দ কর।”

২১ ঠিক ঐ সমায় যীশু পবিত্র আত্মাত আনন্দে ভরি যায়া কইলেক, “হে মোর স্বর্গের বাপ, স্বর্গ আর দুনিয়ার মালিক, মুই তোক সাবাসি দেং, কেনেনা তুই এইলা বিষয় জ্ঞানীগুনি মানষিলারটে নুকিয়া থুইয়া ছাওয়ার নাকান মানষিলারটে উদলি দিচিস। হে মোর স্বর্গের বাপ তোক ধন্যবাদ দেং। কেনেনা এইটায় তোক ভাল নাগিচে।

২২ “মোর স্বর্গের বাপ মোক সউগ কিছুই দিচে। স্বর্গের বাপ ছাড়া কাণ্ডোয় জানে না, বেটা কায়। আর বেটা ছাড়া কাণ্ডো জানে না, বাপ কায়। খালি বেটাটার ইচ্ছাতে অইন্য কাণ্ডোকে এইটা জানে দেওয়া যায়, বাপ কায়।”

২৩-২৪ যীশু বারো জন শিষ্যের ভিতি ঘুরিয়া গোপনে কইলেক, “মুই তোমারলাক কবার ধরচুং, তোমরা যেই ঘটনালা দেখির ধরচেন, তিনপুরানি ভগবানের ভাববাদীলা আর রাজালা দেখির ইচ্ছা করিয়াও দেখির পায় নাই, শুনির ইচ্ছা করিয়াও শুনির পায় নাই। এইলা ঘটনা তোমরা দেখির ধরচেন বুলিয়া তোমরায় ধন্য!”



২৫ এক দিন এক জন পন্ডিত মানষি যীশুরটে আসিয়া, উয়াক ফান্দোত ফ্যেলের বাদে পুছিলেক, “গুরু, অমৃত জীবন লাভ করির বাদে মোক কি করির নাগিবে?”

২৬ যীশু উয়াক কইলেক, “পবিত্র সনাতন শাস্ত্রত মোশির বিধানত কি নেখা আছে? তুই ঐলা পড়িয়া কি বুঝিস?”

২৭ মানষিটা উত্তর দিলেক, “তোর সউগ মন-পরান, গেয়ান, শক্তি সঁপে দিয়া পরম প্রভু ভগবানক পিরিত করেক। আর নিজের দেহক যেই নাকান করি যতন করিয়া পিরিত করিস, ঐ নাকান করি তোর পাড়াপড়শিক পিরিত করেক।”

২৮ যীশু মানষিটাক কইলেক, “তোর কতা তো ঠিক। এই নাকান করিলে তুই অমৃত জীবন পাবু।”

২৯ এই পন্ডিত মানষিটা নিজক নির্দোষ দেখেবার বাদে যীশুক পুছিলেক, “কায় মোর পড়শি?”

৩০ যীশু একটা গল্পের উপমা দিয়া কইলেক, “এক জন যিহুদী মানষি যিরুশালেম থাকি যিরীহো গঞ্জ যাবার ধরচে, আর এই সমায় ডাকুর হাতত পড়িলেক। ডাকুলা এই মানষিটাক ডাঙা-মারি করিয়া পাইসা কড়ি, কাপড় খুলি নিয়া আধামরা করিয়া ঘাটার বগলোত ফ্যেলেয়া চলি গেইলেক।

৩১ সেই সমায় এক জন বামন ওই ঘাটা দিয়া যাবার ধরছিলেক, উয়ায় ওই মানষিটাক পড়ি থাকা অবস্থাত দেখিয়াও না দেখিবার ভান করি পাশ কাটেয়া চলি গেইলেক।

৩২ ঠিক একে নাকান করি মন্দিরের এক জন সহকারী ওই নাকান অবস্থা দেখিয়া উয়ায়ও পাশ কাটে চলি গেইলেক।

৩৩ কিন্তুক শমরীয় প্রদেশের অইন্য সম্প্রদায়ের একটা মানষি বগলোত আসি দেখিতে কালে উয়ার উপরা খুব মায়া হইলেক।

৩৪ উয়ায় মানষিটারটে যায়া উয়ার খেতলে যাওয়া জাগাখানের উপরা জলপই ত্যেল আর মদ দিয়া পট্টি বান্দি দিলেক। তার পাছত রুগীটাক নিজের গাধার পিটিত চড়েয়া একটা ডাড়িঘরত নিয়া যায়া উয়ার সেবা যতন করিবার নাগিলেক।

৩৫ তার পরের দিন শমরীয় মানষিটা দুই দিনের মজুরির টাকা ঐ ডাড়িঘরের মালিকটাক দিয়া কইলেক, ‘ইয়াক দেখাশুনা করেন। আর যদি ইয়ার চায়াও বেশী খরচা হয়, তাইলে মুই আসিয়া শোধ করি দিম।’”

৩৬ শেষত যীশু কইলেক, “এলা তোমরা কি মনে করেন? এই তিন জনের মাঝিলাত ডাকুর হাতত পড়া মানষিটার পাড়া-পড়শি কায়?”

৩৭ পন্ডিত মানষিটা উত্তর দিলেক, “যায় ওই মানষিটাক মায়া করিলেক তায়।” আর সেলো যীশু কইলেক, “যাও তোমরাও ওই নাকান কর।”

৩৮ ইয়ার পাছত যীশু আর উয়ার শিষ্যলো ঘাটা হাটতে হাটতে একটা গেরামত পৌছিলেক, ওই গেরামত মার্খা নামের একটা বেটিছাওয়া খুব খুশি হয়। উমাক বাড়িত জাগা দিলেক।

৩৯ মার্থার বইনি মরিয়ম, উয়ায় প্রভু যীশুরটে আসিয়া ঠেংয়ের বগলোত বসিয়া উয়ার কতা শুনির নাগিলেক।

৪০ মার্থা কিন্তুক খাবারের জোগার করিবার বাদে খুব ব্যস্ত আছিলেক। এই বাদে মার্থা যীশুর বগলোত আসিয়া কইলেক, “হে গুরু! এইটা কি ঠিক হবার ধরচে? মুই একলায় সউগ কাজ কামাই করিবার ধরচুং, আর মোর বইনি বসিয়া আছে? উয়াক তোমরা কন যেনে উয়ায় আসিয়া মোক সাহায্য করে।”

৪১ সেলো যীশু মার্থাক আদর করিয়া কইলেক, “মার্থা, মার্থা, তুই মেয়ো বিষয় নিয়া চিন্তা করি ঘাবড়েবার ধরচিস।

৪২ কিন্তুক একটায় মাত্র দরকারি বিষয় আছে। মরিয়ম সেই ভাল বিষয়টা বাছাই করিচে। ঐটা উয়ারটে থাকি নেওয়া হইবে না।”

১১ এক দিন যীশু এক জাগাত প্রার্থনা করির ধরচে। সেলো উয়ার প্রার্থনা করা শেষ হইলেক, সেলো উয়ার এক জন শিষ্য আসিয়া কইলেক, “হে গুরু! দিক্ষাদাতা যোহন তো উয়ার শিষ্যলোক প্রার্থনা করা শিখাইচে, এলা তোমরাও হামাক প্রার্থনা করা শিখান।”

২ আর যীশু সেলো শিষ্যলোক কইলেক, “তোমরালা এই নাকান করি প্রার্থনা করেন, হে হামার স্বর্গের বাপ, তোমার পবিত্রতা মানুক, তোমার রাজ্য আসুক।

৩ প্রতি দিনের খোরাক হামাক প্রতি দিনে দেও।

৪ হামারলার পাপ ক্ষমা করি দেও, কেনেনা হামার বিরুদ্ধে যায় অন্যায় করে, হামরাও উমাক ক্ষমা করচি। আর হামাক পরীক্ষাত পড়িবার না দিস।”

৫ যীশু ভাল করি বুঝি দিবার বাদে একটা উপমা দিয়া কইলেক, “ধরি নেও মইদ্বো রাতি তোমার এক জন সখার বাড়ি যায়। কইলেন, ‘হে বাহে, মোক তিনখান রুটি হাওলাত দেও,

৬ মোর আর এক সখা ঘাটা দিয়া যাইতে যাইতে মোর এটেকোনা আইসচে, উয়াক খাবার দিবার মতন মোর কিছুই নাই।’

৭ “সেয়ো তোমার সখা ঘরের ভিতরি হাতে কইলেক, ‘নাঃ রে ভাই, মোক আর কষ্ট না দিস, দুয়ার বন্ধ আছে, এলা মুই ছাওয়া ছোট নিয়া বিছনাত শুতিয়া আছং। এই বাদে মুই এলা তোক কোনয় দিবার পাইম না।’

৮ শুনেন! উয়ায় সখা হবার বাদে যদিও কোন কিছুই নাও দেয়, তবু তোমরা অনেকক্ষণ ধরি দুয়ারত খটখটেয়া কাউলা কাটি করির ধরচেন বুলিয়া উয়ায় উঠিয়া যা দরকার তা তোমাক দিবো।”

৯ “আর তারে বাদে মুই তোমারলাক কবার ধরচুং, প্রার্থনা এই নাকানের হয়, চাইতে থাকিবেন সেয়ো তোমাক দেওয়া যাবে, চান্দাইতে থাকিবেন তোমরালা পাবেন, দুয়ার খটখটান তোমারলার বাদে দুয়ার খুলিয়া দেওয়া হইবে।

১০ কেনেনা যায় চায় উয়াক দেওয়া হয়। যায় চান্দায় উয়ায় পায়, আর যায় দুয়ার খট খটায় উয়ার বাদে দুয়ার খোলে দেওয়া হয়।

১১ “হে ছাওয়ালার বাপলা! তোমার ছাওয়া মাছ চাইলে তোমরা উয়াক একটা সাপ দিবেন কি?

১২ বা, ছাওয়াটা একটা ডিমা চাইলে উয়াক বিষ কাকড়া দিবেন কি? নাঃ!

১৩ তোমরা বেয়া মানষি হয়্যো তোমার ছাওয়ার বাদে ভাল ভাল জিনিস দেন। স্বর্গের বাপ তো দয়ালু, কাণ্ডো উয়ারটে পবিত্র আত্মা চাইলে, নিশ্চয় দিবেই দিবে।”

১৪ এক দিন যীশু একটা মানষির ভিত্তিরা থাকি বোবা অপদেবতাক খেদাইলেক। অপদেবতা ধরাতে মানষিটার জবান বন্ধ হয়্য গেইচে। কিন্তুক অপদেবতাটা বিরি যাইতে কালে মানষিটা কতা কবার ধরিলেক, আর এই দেখিয়া ভিড়ের মানষিলা সগায় অচানক হইলেক।

১৫ কিন্তুক উমারলার মইন্ধে কাণ্ডো কাণ্ডো কবার নাগিলেক, “উয়ায় যে অপদেবতালাক খেদায় সেইটা হইলেক অপদেবতালার রাজা বেলসবুলের ক্ষমতা দিয়া!”

১৬ আর অইন্য মানষিলাও, যীশুর ক্ষমতা ভগবান হাতে কি না, সেইটা যাচাই করির বাদে স্বর্গ হাতে একটা চিন দেখির চাইলেক।

১৭ যীশু উমারলার মনের কতা বুঝির পায়া কইলেক, “যেই রাজ্য ঝগড়া করি খন্ড খন্ড হয়। যুদা হয়, সেই রাজ্য ধ্বংস হয়। আরো কোন পরিবার যদি নিজের মইন্ধোত ঝগড়া করে তাইলে উমরাও ধ্বংস হয়।

১৮ তোমরালা কবার ধরচেন যে মুই বেলসবুল-অসুরের ক্ষমতা দিয়া অপদেবতালক খেদাং। কিন্তুক শয়তান-অসুর যদি নিজের শক্তি দিয়া নিজের বিরুদ্ধে নড়াই করে তাইলে উয়ার রাজ্য কেমন করি টিকিবে?

১৯ যদি শয়তান বেলসবুল-অসুরের শক্তি নিয়া মুই অপদেবতাক খেদাং, তাইলে তোমার সাথীলা কোটে থাকি শক্তি পায়া অপদেবতাক খেদায়? তোমরা ঠিক কতা কইচেন কি না তোমার সাথীলা সেইটা বিচার করিবে!

২০ কিন্তুক এইটা মনে করেন যে, মুই যদি ভগবানের শক্তি নিয়া অপদেবতালক খেদাং তাইলে ভগবানের শাসন ব্যবস্থা তোমার মইন্ধোত শুরু হইচে।

২১ “এক জন শক্তিশালী মানষি অস্ত্র-সস্ত্র নিয়া যেলা উয়ার বাড়ি পাহারা দেয়, সেলা উয়ার তামান কিছুই ঠিক ঠাক রয়।

২২ কিন্তুক যেলা উয়ার চায়া কোন বলবান মানষি আইসে সেলা উয়াক নড়াই করি হারে দিয়া অস্ত্র সস্ত্র কাড়ি নেয়। তার পাছত সউগ কিছু কাড়ি কুড়ি নিয়া জিনিসলা ভাগ করি দেয়।

২৩ “তাইলে মুই জানিম, যে মানষি মোর পক্ষে না হয়, উয়ায় মোর বিরুদ্ধে। আর যায় মোর কামত ঢোকা না দেয়, উয়ায় মোর কামের বাধা দেয়।”

২৪ “কোন মানষির ভিত্তিরা থাকি অপদেবতাটা যেহেলা বিরিয়া যায়, সেহেলা সেই অপদেবতাটা জিরিবার বাদে কোন এক শুনশান জাগা চান্দায়। কিন্তুক জিরিবার জাগা না পায় কয়, ‘মুই যেই মানষিরটে থাকি বিরিয়া গেইচোং, উয়ার ভিত্তিরাতে আসি আরো সোন্দাইম।’

২৫ আর ফিরি আসিয়া দেখে যে, ঐ মানষির জীবন খুব ঝকঝকা আরো সাজা গোছা ঘরের নাকান আছে।

২৬ সেহেলা উয়ায় যায় উয়ার চায়া বেয়া আরো সাতটা অপদেবতাক ডেকে নিয়া আসিয়া ঐ ঘরতে সোন্দেয়া রয়। এই বাদে মানষিটার পইলা দশার চায়া শেষ দশা আরো বেশী বেয়া হয়।”

২৭ যীশু যেহেলা এইলা কতা কবার ধরচে, সেহেলা ভিরের মইন্দো হাতে একটা বেটিছাওয়া জোরে চিকিরিয়া যীশুক কইলেক, “ধইন্য সেই মাও, যায় তোমাক গর্ভত ধারন করিচে, আর যার বুকের দুধ তোমরা খাইচেন।”

২৮ কিন্তুক যীশু কইলেক, “ইয়ার চায়াও উমরা ধইন্য যায় ভগবানের বাইক্য শুনিয়া পালন করে!”

২৯-৩০ যীশু উয়ার চাইরো পাকে জড়ো হওয়া ভিরের মানষিলাক কইলেক, “এই কালের মানষিলা কত পাজি! সউগ সময় স্বর্গ হাতে প্রমাণ দেখেবার বাদে একটা চিন চান্দায়। শুনেন! যোনা নামে ঐ পুরানা দিনের ভাববাদী আছিলেক। ভগবানের বাইক্য প্রচার করির বাদে উয়ায় নীনবী গঞ্জের মানষিলারটে গেইলেক, আর উমারলার নজরত উয়ায় হইচে ভগবানের একটা চিন। যোনার নাকান মুই এই কালের মানষির নজরত একটা চিন। এই চিন ছাড়া আর কোন চিন দেখির পাইবেন না।

৩১ মনে করেন, মেয়ো দিন আগত শিবা দেশের যে রাণী আছিলেক। শলোমন রাজার জ্ঞানের কতা শুনির বাদে দুনিয়ার শেষ সীমনা থাকি এই রাণী যাত্রা করিলেক। কিন্তুক এলা তোমার এটেকোনা শলোমনের চায়াও এক জন মহান মানষি আছে। এই বাদে বিচারের দিনত শিবা দেশের রাণী উঠি আসিয়া এই কালের মানষিলার দোষ দেখেয়া দিবে।

৩২ নীনবী গঞ্জের মানষিলাও বিচারের দিনত উঠিয়া এই কালের মানষিলার দোষ দেখে দিবে। কেনেনা উমরা যোনার প্রচার শুনি পাপ থাকি পস্তেয়া মন ফিরাইলেক। কিন্তুক এলা যোনার চায়াও এক জন মহান মানষি আছে।”

৩৩ “কাণ্ডো বাতি জ্বলেয়া গোপন জাগাত থোয় না, বা ডেলি দিয়া ঢাকি থোয় না। ঠগার উপরাত থোয়, যাতে ঘরত সোন্দেয়া মানষিলা আলো দেখির পায়।



৩৪ তোমার চোখু হইলেক তোমার দেহার বাতি, চোখু ভাল হইলে গোটায় দেহা আলোত পরিপূর্ণ হইবে। কিন্তুক তোমার চোখু যদি বেয়া হয় তাইলে দেহা আন্ধারত পরিপূর্ণ হইবে।

৩৫ এই বাদে, তোমার মইন্ধোত যেইটা আলো আছে, সেইটা আন্ধারের কি না, সাবধান হন!

৩৬ যদি তোমার ভিত্তিরাত পবিত্র আলো থাকে, খানিকো আন্ধার না থাকে, তাইলে গোটায় জীবন আলোময় হবে। যেই নাকান করি বাতির আলো তোমার উপরাত পড়ে, ঐ নাকান তোমার জীবন আলোময় হবে।”

৩৭ গুরুর এই কতা কওয়া শেষ হইতে কালে, এক জন ফরীশী ধর্মগুরু উয়াক খাবার নিমন্তন দিলেক। সেলো যীশু বাড়ির ভিত্তিরাত যায় খাবার বসিলেক।

৩৮ কিন্তুক ওই ফরীশী ধর্ম গুরুটা যেলো দেখিলেক যে, যীশু ধর্মের নিয়ম মতন খাবার আগত হাত ধুইলেক না সেলো উয়ায় এই দেখিয়া অচানক হইলেক।

৩৯ প্রভু উমারলাক কইলেক, “তোমরা খালি খুরির বাইরা খান পরিস্কার করেন। কিন্তুক তোমার মনের ভিত্তিরা খান, লোভ-নালসা আর বেয়া চিন্তা-ভাবনাত ভরপুর হয় গেইচে।

৪০ মূর্খ কোটেকার! ভগবান তোমার কি খালি বাইরা খান বানাইচে, ভিত্তিরা খান বানায় নাই?

৪১ তোমার থালা বাটিত যেইলা আছে ঐলা গরীব মানষিক দান কর, তাইলে সউগে শুদ্ধি হয়।

৪২ ছিঃ ধিক্কার দ্যেং ফরীশীলাক! কেনেনা তোমার পুদিনা, তেজপাতা আরো সউগ নাকানের শাকের দশ ভাগের একভাগ ভগবানক সঁপে দিবার নিয়া আসির ধরচেন। কিন্তুক ন্যায়-বিচার আর ভগবানের প্রেম পিরিতি একেবারে ভুলি গেইচেন। আগেরলা পালন করার সাথে সাথে পরেরলাও পালন করা উচিত।

৪৩ “ছিঃ ফরীশীলা তোমাক ধিক্কার দ্যেং! তোমরালা উপাসনা ঘরের প্রধান আসনত বসিবার ভাল পান, আর হাট বাজারত সগায় তোমাক ভক্তি করুক এই নাকান চান।

৪৪ ফরীশীলা! তোমরালা চিন না দেওয়া সমাধির নাকান। যেই নাকান কোন মানষি না জানিয়া সমাধির উপর দিয়া হাটিয়া যায়, উমরা জানির পায় না যে, ছুয়া বাড়ির উপরা দিয়া হাটি যাবার ধরচে।”

৪৫ সেলো এক জন পন্ডিত মানষি যীশুক কইলেক, “হ্যে বাহে গুরু! তোমরা এই নাকান কতা কয়া হামারলাকও অপমান করির ধরচেন।”

৪৬ যীশু কইলেক, “হে পন্ডিতের ঘর, তোমারলাকও মুই ধিক্কার দ্যেং! তোমরা মানষির উপরা খুব ভারি বোঝা চাপেয়া দেন, কিন্তুক এই বোঝা উবিবার বাদে তোমরা নগুল নাগেয়াও সাহায্য করেন না।

৪৭ “ছিঃ ধিক্কার দেয় তোমারলাক! এক পাকে তোমরালা ভগবানের ভাববাদীলার খুব সুন্দর সমাধি বানান, অইন্য পাকে এই ভাববাদীলাক তোমারে চৌদ্দ গুটিলা খুন করিচে।

৪৮ চৌদ্দ গুটিলা খুন করিয়া তোমরা সমাধি খুড়ির ধরচেন। ইয়াতে তোমরা সাক্ষী দিচেন যে তোমারলার বাপ ঠাকুর দাদা, যেইলা কাম করিচে, সেইলা তোমরা সঠিক বুলিয়া মানি নিবার ধরচেন।

৪৯ তোমারে বিষয় ভগবানের জ্ঞানে কইচে, ‘উমারলারটে মুই মোর ভাববাদী আর খবরিয়ালাক পেঠাইম। কিন্তুক উমরা কোন কোন ভাববাদীলাক খুন করিবে, কোন কোন ভাববাদীলাক অইত্যাচার করিবে।’

৫০ ইয়ার ফল হইলেক, এই দুনিয়া সিজ্জনের গোড়ার থাকি যতলা ভগবানের ভাববাদীলাক খুন করা হইচে, উমার খুনের দোষী এই কালের মানষিলা।

৫১ হ্যে মুই তোমাক কবার ধরচুং হেবেলের খুন থাকি আরম্ভ করিয়া ভাববাদী সখরিয়ক খুন করা পর্যন্ত (উয়াক ভগবানের বেদী আর মন্দিরের পবিত্র জাগার মইন্ধোত মারি ফ্যেলা হইচে), এইলা তামান ভাববাদীর অক্তের দায়ী এই কালের মানষিলা।

৫২ “ছিঃ ধিক্কার দেয় পন্ডিত মানষিলাক! কেনেনা ভগবানের জ্ঞান যেইটা, সেইটা তোমরা মানষিরটে থাকি নুকি খুবার ধরচেন।

তোমরা নিজেও ভগবানক জানেন না, আর অইন্য মানষিলাকও ভগবানোক জানিবার দেন না।”

৫৩-৫৪ উয়ায় যেলা সেই জাগাখান ছাড়িয়া চলি গেইলেক, সেলা পন্ডিত মানষিলা আর ফরীশী ধর্মগুরুলা যীশুর শত্রুয়ামি করির বাদে খুব উঠি-পড়ি নাগিলেক। নানা নাকান বিষয়ে প্রশ্ন পুছিয়া উয়াক কতার ফান্দোত ফ্যেলেবার বাদে বাচে রবার নাগিলেক।

১২ ইয়ার মইন্ধে যীশুর ওটেকোনা হাজারে হাজারে মানষি ভিড় করি আসির নাগিলেক। আর ভিড়ের মানষিলা ঠেলা ঠেলি করি এক জন আরেক জনের উপর পরির নাগিলেক। যীশু সেলা উয়ার শিষ্যলোক কইলেক, “ফরীশীলার ভন্ডামি শিক্ষা হাতে সাবধান থাকেন। এইলা শিক্ষার প্রভাব ছিল্লা-ছিল্লি হয়্যা যায় যেই নাকান করি খাবারের জিনিসত অল্প খানিক সোডা দিলে পুরা খাবারের স্বাদ বদলি যায়।

২ নুকি থোয়া তামানে নিকলা হইবে, গোপন সউগে জানে দেওয়া হইবে।

৩ তোমরা আন্ধারত যেইলা কতা কইলেন, সেইলা দিনের আলোত সউগে শোনা যাবে। তোমরা দুয়ার বন্ধ করিয়া ঘরত যেইলা ফুসুর ফাসার করি কইলেন, ঐলা সউগে বারান্দাত প্রচার করা হইবে।

৪ “শোন বন্ধু, যায় তোমার দেহাটাক ধ্বংস করি দিবার পারে, বেশী কিছু করির পারে না উয়াক ভয় না খান।

৫ কিন্তুক কাক ভয় খাবেন, সেইটা মুই জানে দেং। তোমাক মারি ফ্যেলের পাছত নরকত পেয়েঠেবার ক্ষমতা যার আছে, উয়াকে ভয় খান! হ্যে মুই কবার ধরচুং উয়াকে ভয় খান।

৬ পাঁচটা চোচ পখি খুব কম দামে বেচায় কি না? কিন্তুক ভগবান সেইলার একটারো ফম পাসুরি যায় না।

৭ তোমার মাথাত কতলা ঢুলি আছে সউগে ভগবানের গণতি করা আছে। কোন দিনও ভয় না খান। তোমরা তো মেয়লা চোচ পখির চায়াও বেশী দামী।”

৮ “মুই তোমারলাক কবার ধরচুং, যায় এই দুনিয়ার মানষিলার আগত মোক প্রভু বুলিয়া মানি নিবে, মুই বাছাই করা মানষিটা উয়াক ভগবানের পরম প্রভুর স্বর্গদূতলার আগত মানি নিয়া আদর করিম।

৯ কিন্তুক এই দুনিয়াত কাণ্ডো যদি মোক মানষিলার আগত মানি না নেয়, তাইলে ভগবানের স্বর্গদূতলার আগত উমাকও মানি নেওয়া হইবে না।

১০ বাছাই করা মানষিটার বিরুদ্ধে কোন কতা কওয়া হইলে ক্ষমা করা হইবে, কিন্তুক পবিত্র আত্মার বিরুদ্ধে নিন্দা করিলে ক্ষমা করা হইবে না।

১১ “মানষিলা যেহা তোমাক উপাসনা ঘরত নেতালা আর শাসনকর্তালাহাটে নিয়া যাবে, নিজের সমন্ধে কি কবার নাগিবে সেই বিষয়ে চিন্তা করেন না।

১২ কি কতা কবার নাগিবে পবিত্র আত্মা তোমাক কতা কইতে কালে শিখিয়া দিবে।”

১৩ এক দিন ভিড়ের মইন্ধো থাকি একটা মানষি যীশুক কইলেক, “গুরু, বাবা যে সম্পত্তি হামার বাদে থুইয়া গেইচে, মোর ভাইয়োক কন সেইলা মোর সাথে ভাগা-ভাগী করি নিবার।”

১৪ যীশু মানষিটাক কইলেক, “বিচার করির আর তোমার সম্পত্তি ভাগ করি দিবার অধিকার মোক কায় দিচে?”

১৫ যীশু সেহা ভিড়ের মানষিলাক আরো কইলেক, “সাবধান! সউগ নাকানের লোভ থাকি নিজক দূরত থোন। কেনেনা কারো ধন-সম্পত্তি উথলিয়া পড়িলেও, জীবনের আসল উদ্দেশ্য পূরণ হয় না।”

১৬ যীশু সেহা গল্পের উপমা দিয়া কইলেক, “এক জন ধনী মানষি আছিলেক। উয়ার ভুইয়োট খুব ভাল ফসল ফলছিলেক।

১৭ এই দেখিয়া উয়ায় মনে মনে ভাবিবার নাগিলেক, ‘এলা মুই কি করিম? এত ফসল খুবার জাগা তো মোর নাই।

১৮ ঠিক আছে, এলা মুই একটা কাম করিম, মোর গোলাঘরলা ভাঙিয়া বড় বড় গোলাঘর বানাইম। আর সউগ ফসল আর ধন-সম্পত্তি মুই ওটেকোনা থুইম।

১৯ পাছত মুই নিজক কইম বাঃ, ম্যেলা বছরের বাদে ম্যেলা ভাল জিনিস জমা করি থোয়া আছে। এলা খাওয়া-দাওয়া করি, আরাম আনন্দ করি জীবন কাটাইম।’

২০ “কিন্তুক ভগবান উয়াক কইলেক, ‘কিরে ভোদাই কোটেকার! আজি রাতিতে তোক মরিবার নাগিবে। আর তুই যেইলা জমা করি থুচিস সেইলা কায় ভোগ করিবে?’”

২১ গল্পের শেষত যীশু কইলেক, “যায় নিজের বাদে জগতের ভাল ভাল সম্পত্তি জমা করে, কিন্তুক ভগবানের সাথত ভাল সম্পর্ক নাই, উয়ার অবস্থা ঐ নাকানের হইবে।”

২২ ইয়ার পাছত যীশু শিষ্যলোক কইলেক, “এই বাদে মুই তোমারলাক কবার ধরচুং, জিউ বত্তের বাদে কি খাবেন, আর দেহার বাদে কি পিন্দিবেন, এই নিয়া চিন্তা না করেন।

২৩ কেনেনা খাবার জিনিসের চায়া পরানটা দামী, কাপড় চোপড়ের চায়া দেহাটার গুরুত্ব বেশী।

২৪ তোমরালা পখিলার ভিতি দেখ, উমরা বিচন ফ্যেলায় না, ফসলো কাটে না। আর গোলা ঘরও নাই। তাণ্ডো ভগবান উমাক খাবার দেয়। এই পখিলার চায়া তোমরা তো কত বেশী দামী!

২৫ তাইলে ভয়ে দুশ্চিন্তা করি কি কোন লাভ হয়? এই নাকান চিন্তা করি কাণ্ডো কি নিজের আয়ু খানিক বাড়ের পাইচে, না!

২৬ ঐ ছোট উদ্দেশ্যের বাদে দুশ্চিন্তা করিলেও কোন লাভ নাই, তাইলে অইন্য উদ্দেশ্যের বাদে দুশ্চিন্তা করিবেন কেনে?

২৭ “জঙলের ফুললার কতা চিন্তা করি দেখ, উমরা কেমন করি আপেনে আপেনে বড় হয়। কাম করে না, নিজের পিন্দিবার কাপড়ও বানায় না। তাঙো ফুললা শলোমন রাজার ভাল দামী কাপড় চোপড়ের তুলনায় ঐ ফুললার সৌন্দর্য অনেক বেশী।

২৮ ভগবান এই ঘাস ফুললাক, যেইলা আজি আছে কালি ঝেমরি যাবে, ভগবান এইলাক এত সুন্দর করি সাজায়। কি রে অল্প বিশ্বাসীর দল! এইটা নিশ্চয় যে, ভগবান তোমাক আরো বেশী সুন্দর করি সাজাবে।

২৯ কি খাবেন এইলা নিয়া দুশ্চিন্তা করেন না, অস্থির হন না।

৩০ এই দুনিয়ার যেইলা মানষি ভগবানক জানে না উমরা এইলা পাবার বাদে অস্থির হয়। কিন্তুক যায় স্বর্গের বাপ উয়ায় জানে তোমারলার কি কি দরকার!

৩১ পইলা তোমরা ভগবানের শাসন ব্যবস্থা মানিবার বাদে ব্যস্ত থাকো, তাইলে ভগবান সউগ দরকারি জিনিস তোমাক দিবে।”

৩২ রাখোয়াল যেই নাকান করি উয়ার ভেড়ার পালক মায়া করে, যীশু অবলা জীবের নগত তুলনা করি কইলেক, “হে মোর ভেড়ার ছোট দল তোমরা ভয় না খান, স্বর্গের বাপ আনন্দ করি তোমারলাক উয়ার শাসন ব্যবস্থাত থুইবে।

৩৩ তোমারটে যেইলা ধন-সম্পত্তি আছে, ঐলা বেচেয়া গরীবলাক দেও। এই নাকান করিলে স্বর্গত তোমার অক্ষয় ধন



জমা হইবে। ওটেকোনা চোরও আইসে না আর পোকাও টিকিবে না।

৩৪ কেনেনা যেটেকোনা তোমার ধন, ওটেকোনা তোমার মনও থাকিবে।”

৩৫-৩৬ “তোমরা এই নাকান চাকরলার নাকান হন যে কমড়ত কাপড় বান্দিয়া গচা জ্বলেয়া কাজ করিবার তৈয়ার হয়্যা থাকেন। যেলা তোমার মালিক বিয়াও বাড়ি থাকি নিমন্তন খায়া আসিবে, সেলা দুয়ার খট খটাইতে কালে দুয়ার খুলি দিবেন।

৩৭ যে চাকরলাক মালিক আসিয়া জাগনা দেখির পাবে, উমরালা ধইন্যা। আর মুই তোমারলাক সচাং কবার ধরচুং যে, সেলা মালিক কমড়ত কাপড় বান্দিয়া ঐ চাকরলাক খাবার বসির কবে আর নিজে যতন করি খাবার দিবে।

৩৮ আধা রাতি হউক, বা শেষ রাতি যে কোন সমায় মালিক আসিয়া সেই চাকরলাক জাগনা দেখির পাবে, উমরালা ধইন্যা।

৩৯ এই কতা মনত থোন যে, চোর কোন পলকে আসিবে বাড়ির মালিক যদি জানির পাইলেক হয়, তাইলে জাগনা থাকিলেক হয়। নিজের ঘরত সিধ কাটি চোরক সোন্দের দিলেক না হয়।

৪০ ঐ নাকান করি সউগ সমায় তোমরালা সতর্ক থাকেন, কেনেনা বাছাই করা মানষিটা ঠিক ঐ সমায় আসিবে, যেলা তোমরালা সতর্ক থাকিবেন না।”

৪১ পিতর স্যোলা পুছিলেক, “হে গুরু, এই শিক্ষা খালি হামাক দিবার নাগচেন না সগাকে?”

৪২ যীশু স্যোলা কইলেক, “জ্ঞানী আর বিশ্বস্ত কর্মচারী কায়? উয়ায় এই নাকানের, যাক মালিক উয়ার অইন্য চাকরলাক ঠিক সমায় খাবার-দাবার ভাগ করি দিবার ভার দিবে।

৪৩ মালিক ফিরি আসিয়া দেখিবে, যেই নাকান করি কাম করির কইচে, সেই নাকান করি কাম করিচে। ঐ চাকরটা আশুর্বাদ পাবে।

৪৪ মুই সচাং করি কবার ধরচুং, মালিকটা সেই চাকরটাক সউগ ধন-সম্পত্তির দেখাশুনার ভার দিবে।

৪৫ যদিও সেই চাকরটা মনে মনে ভাবিবার নাগিলেক যে, ‘মোর মালিক তো আইসার দেরি আছে।’ আর ধরি নেও উয়ায় অইন্য চাকর-চাকরানীলাক ডাঙামারি করির নাগিলেক, আর খাওয়া-দাওয়া করি মদ খায়া মাতাল হইলেক।

৪৬ স্যোলা কি হইবে? চাকরটা যেই দিন সতর্ক থাকিবে না, সেই দিন মালিকটা আসি হাজির হইবে। মালিকটা কি করিবে? উয়ায় চাকরটাক বড় শাস্তি দিয়া অবাধ্য চাকরের জাগাত খেয়েদেয়া দিবে।

৪৭ “যে চাকরটা নিজের মালিকের ইচ্ছা জানিয়াও কাম করে নাই, মালিকের ইচ্ছা মতন তৈরি হয় নাই, ঐ নাকান চাকরটার মালিক আসিয়া উয়াক খুব শাস্তি দিবে।

৪৮ যেই মানষিক বেশী দেওয়া হইচে উয়ারটে থাকি বেশী পাবার আশা করা হইবে। যারটে বেশী থোয়া হইচে, উয়ারটে থাকি বেশী পাবার আশা করা হইবে।”

৪৯ “মুই এই দুনিয়াত অগুন জ্বলেবার বাদে আসিচুং। আরেঃ সেইটা এলায় জ্বলিলে খুব ভাল হইলেক হয়।

৫০ আর মোক যাতনার দীক্ষা নিবার নাগিবে। যতক্ষণ মুই এই দীক্ষাটা না নেং, ততক্ষণ মোর মনটা ব্যাকুল হয়। থাকিবে।

৫১ তোমরা কি ভাবিবার নাগচেন, এই দুনিয়াত মুই শান্তি দিবার আসচুং? না সেইটা মনে করেন না। মুই তোমারলাক যুদা করির বাদে আসচুং।

৫২ এলা থাকি বাড়ির পাঁচ জন ভাগ হয়। যাবে। দুই জন তিন জনের বিরুদ্ধে।

৫৩ বাপ বেটার বিরুদ্ধে বেটা বাপের বিরুদ্ধে, বেটি মাওয়ের বিরুদ্ধে, মাও বেটির বিরুদ্ধে, বউ শাশুড়ির বিরুদ্ধে, শাশুড়ি বউ-এর বিরুদ্ধে যুদা হয়। যাবে।”

৫৪ যীশু ভিড়ের মানষিলার ভিতি দেখিয়া কইলেক, “তোমরা পশ্চিম পাকে মেঘ দেখেন, আর মেঘ দেখিয়া কন জল পড়িবে, আর ঐ নাকান হয়।

৫৫ আরো দক্ষিণা বাতাস উঠিলে কন, গরম পড়িবে। আর ঐ নাকান হয়।

৫৬ ভন্ডের দল, তোমরালা দ্যাওয়া আর দুনিয়ার অবস্থা বুঝিবার পারেন, কিন্তুক এইটা কি নাকানের! তোমরা বর্তমানের অবস্থা কিছুই বুঝির পারেন না।

৫৭ “যেইলা ন্যায্য সেইলা নিজেই বিচার করেন না কেনে?

৫৮ যেলা তোমার বিবাদীটার নগত বিচারকের ওটে যাবেন, সেলা ঘাটাতে উয়ার সাথে মিমাংসা করির চেষ্টা করেন। আর তা না করিলে তোমাক বিচারের বাদে কোর্ট-কাচারি যাবার নাগিবে। আর বিচারক তোমাক পুলিশের হাতত দিবে। আর পুলিশ তোমাক জেলত ভরে থুবে।

৫৯ মুই তোমারলাক কবার ধরচুং, কোন মতেই জেল থাকি ছাড়া পাবেন না, যতক্ষণ না টাকা-পাইসা শোধ করেন।”

১৩ সেই সময় কয়জন মানষি আসিয়া যীশুক কইলেক, রোমীয় রাজ্যপাল পীলাত, গালীল প্রদেশের কয়জন যিহুদী মানষিক মারিয়া উমার অক্স সঁপে দিছিলেক, উয়ার সাথত বলির অক্সও মিশি দিছিলেক।

২ যীশু উমাক কইলেক, “তোমরা কি মনে করেন, গালীল প্রদেশের মানষিলা যার যার দুর্গতি হইচে, উমরা গালীল প্রদেশের অইন্য মানষির চায়া বেশী পাপী আছিলেক?

৩ মুই তোমারলাক কবার ধরচুং, এই নাকান না হয়। আর তোমরা যদি পাপ থাকি মন ফিরিয়া ভগবানের ঘাটাত না চলেন,

তাইলে তোমরাও সগায় ঐ নাকান করি নষ্ট হয়।

৪ আর যেলা আঠারোজন মানষির উপরাত শীলোহ চুড়া ভাঙিয়া চিপা খায়া মরণ হইচে, উমার বিষয়ে তোমরা কি ফম করেন? উমরা কি ঘিরশালেমের অইন্য মানষির চায়া বেশী দোষী আছিলেক?

৫ মুই তোমারলাক কবার ধরচুং, সেইটা এই নাকান না হয়! তোমরা যদি পাপ থাকি মন না ফিরান, তোমরাও ঐ নাকান করি নষ্ট হয়।

৬ যীশু গল্প দিয়া কইলেক, “এক জন মানষি উয়ার আংগুরের বাগানত একটা ডুমুর গছ গাড়িচে। এক দিন গছটাত ফল ফলিচে কিনা দেখির আসিলেক কিন্তুক কোন ফল চান্দেয়া পাইলেক না।

৭ শেষত বাগানের মালিক, যায় বাগান দেখাশুনা করে তাক কইলেক, ‘তিন বছর থাকি এই ডুমুর গছটাত কোন ফল দেখির পাং নাই। এই বাদে গছটাক কাটি ফেলে দেও, কেনে গছটা ফাকতে জমিন নষ্ট করিবে?’

৮ মালী সেলো কইলেক, ‘বাবু এই বছরটা দেখ! মুই গছটার গোড়াত চাইরো পাকে খুড়িয়া সার দিম।

৯ আইসা বছরত যদি ফল ধরে তো ভাল, না হইলে মুই গছটা কাটি ফেলাইম।”

১০ এক বার জিরানের দিনত যীশু উপাসনা ঘরত শিক্ষা দিবার ধরছিলেক।

১১ ওটেকোনা একটা বেটিছাওয়া আছিলেক, যাক অপদেবতা আঠারো বছর ধরি অসুখোত ভোগেয়া কাহিল করিচে। উয়ায় কুজা ছিলেক সিদা হবার পায় না।

১২ যীশু বেটিছাওয়াটাক দেখিয়া বগলত ডেকেয়া কইলেক, “ও মাও, তোমরা অসুখ থাকি ভাল হয় গেইচেন।”

১৩ যীশু বেটিছাওয়াটাক নাড়িতে কালেই উয়ায় একেবারে সিদা হয় খাড়া হইলেক। আর ভগবানের মহিমার গুণগান করিবার নাগিলেক।

১৪ কিন্তুক যীশু জিরানের দিনত ভাল করিল বুলিয়া যিহুদী উপাসনা ঘরের নেতা রাগ হয়। ভিরের মানষিলাক কইলেক, “হাপ্তার ছয় দিন তো কামাই করির বাদে আছে। অসুখ থাকি ভাল হবার বাদে ঐ ছয় দিনলাত আইসেন, কিন্তুক পবিত্র জিরানের দিনত আইসেন না।”

১৫ কিন্তুক প্রভু কইলেক, “ভন্ড কোটেকার! জিরানের দিনত তোমরা গোয়ালী থাকি গরু বা অইন্য কোন পশু বাইর করি জল খোয়ের নিয়া যান কি না?”

১৬ তাইলে এই বেটিছাওয়াটার ভিতি দেখো, উয়ায় অব্রাহামের বংশত জন্ম নিচে আর শয়তান উয়াক আঠারো বছর থাকি বন্দী করি থুইচে। জিরানের দিন বুলিয়া কি উয়ায় মুক্তি পাবে না?”

১৭ এই কতা কওয়াতে যীশুর শত্রুলা সগায় নইজ্জা খাইলেক। আর যীশু যেইলা অচানক কাম করিচে, অইন্য সউগ মানষি এই

কামের বাদে খুব খুশি হয়। আমোদ করির নাগিলেক।

১৮ ইয়ার পাছত যীশু কইলেক, “ভগবানের শাসন ব্যবস্থা কেমন? মুই কিসের সাথত উয়ার তুলনা করিম?”

১৯ ভগবানের শাসন ব্যবস্থা হইলেক, একটা ছোট সইষ্যা দানার নাকান। যেলা দানাটা নিয়া এক জন মানষি জমিত ফ্যেলে দেয়, সেলা গছটা বড় হয়। এই নাকান হয় যে, উয়ার ঠাইলোত পখিও ভাসা বান্দিয়া রয়।”

২০-২১ “ভগবানের শাসন ব্যবস্থা হইলেক সোডার নাকান, কোন এক জন বেটিছাওয়া আঠারো কেজি ময়দাত যদি অল্প সোডা মিশায় তাইলে সউগ ময়দায় ফাপিয়া ফুলি ওটে।”

২২ যীশু মেলা গেরাম গঞ্জত শিক্ষা দিয়া যাইতে যাইতে যিরুশালেমের ওদি যাবার ধরচে।

২৩ এক জন মানষি যীশুক পুছিলেক, “হে গুরু! খালি অল্প কয়জন মানষি উদ্ধার পাবে কি?” যীশু কইলেক,

২৪ “ভগবানের শাসন ব্যবস্থা একটা ঘরের নাকান যার দুয়ার খুব সরু। মেলা মানষি ঐ ঘরত সোন্দেবার চাইলেও সোন্দের পাবে না। এই বাদে তোমরালা ঐ ঘরের সরু দুয়ারখান দিয়া সোন্দেবার আপ্রাণ চেষ্টা করেন।

২৫ যেলা ঘরের মালিক দুয়ার বন্ধ করি দিবে, সেলা তোমরা বায়রাত খাড়া হয়। দুয়ারত খট-খটাইতে, খট-খটাইতে কবেন,

‘মালিক হামার বাদে দুয়ার খুলি দেও।’ কিন্তুক ঘরের মালিক কবে, ‘তোমরালা কোটে থাকি আসচেন, মুই তোমাক চেনং না।’

২৬ সেলো তোমরা কবেন, ‘তোমার সাথত হামরা খাবার খাইছিলুং। আর তোমরা তো হামারলাক ঘাটায় ঘাটায় শিক্ষা দিচেন।’

২৭ সেলো উয়ায় কবে, ‘তোমরা কোটে হাতে আসচেন, মুই তো তোমাক চেনং না। পাজিরঘর! তোমরা সগায় মোর এটে থাকি চলি যাও।’

২৮ “তোমরা সেলো বায়রাত খাড়া হয়়া রবেন। আর ভগবানের শাসন ব্যবস্থাত অব্রাহাম, ইসহাক, যাকব আরো ভগবানের ভাববাদীলাক দেখির পাবেন। সেলো কান্দিবেন আর যন্তনাত দাঁতে দাঁত কিড়-মিড়াবেন।

২৯ ভগবানের শাসন ব্যবস্থা যেলা পূরণ হয়, সেলো পূব, পশ্চিম, উত্তর, দক্ষিণ এই চাইরো পাকের মানষিলা আসিয়া একটে বসিয়া খাওয়া-দাওয়া করিবে।

৩০ ফম থোন, যায় পাছত আছে, উয়ায় আগত পাটত জাগা করি নিবে। আর যায় আগত আছে উয়ার জাগা হইবে সগারে পাছত।”

৩১ খানিক পাছত কয়জন ফরীশী দলের মানষি আসিয়া যীশুক কইলেক, “এলায় তুই এটে হাতে চলি যা। কেনেনা হেরোদ রাজা তোক মারি ফ্যেলেবার বাদে চান্দের নাগচে।”



৩২ যীশু উমাক কইলেক, “তোমরা যায়া ঐ চালাক শিয়ালটাক কন, মুই আজি আর কালি, এই দুই দিন অপদেবতালাক খেদাইম আর ভাল করির বাদে অচানক কাম করিতে থাকিম। পরশু দিন মোর নিজের কাম শেষ করিম।

৩৩ যাই হউক আজি-কালি আর পরশু মোক আগেয়া যাবার নাগিবে। যিরুশালেম ছাড়া অইন্য কোনটে ভগবানের ভাববাদীর মরণ হবার পায় কি?

৩৪ “ছিঃ যিরুশালেম, হায়, হায় যিরুশালেম! ভগবানের ভাববাদীক তোমরা খুন করেন, ভগবান তোমারটে যাক পেঠাইচে তাক তোমরা শিল দিয়া তেলান। মুরগী যেই নাকান করি উয়ার বাচ্চাক পাখার তলত একটে করি থোয় ঐ নাকান করি মুইও তোমারলাক কতবার একটে করির চেষ্টা করিচুং, কিন্তুক তোমরালা রাজি হন নাই।

৩৫ তোমরা দেখেন, তোমার বাড়ি খালি পড়ি রবে। আর যত দিন তোমরা না কন যে, ‘যায় ভগবানের নামে আসিচে তায় ধইন্য,’ ততদিন তোমরা মোক দেখির পাবেন না।”

১৪ এক দিন যীশু জিরানের দিনত এক জন ফরীশী দলের নেতার বাড়িত নিমন্তন খাবার গেইলেক, ওটেকোনা এক জন পান্দু রুগী আছিলেক, যার গোটায় দেহাত জল ধরি ফুলি গেইচে।

ফরীশী মানষিলা যীশুক খুব ভাল করি নজর দিয়া দেখির নাগিলেক।

৩ যীশু ফরীশীলা আর পন্ডিত মানষিলাক পুছিলেক, “শাস্ত্রের বিধির বিধান মতে জিরানের দিনত কোন অসুকিয়া মানষিক ভাল করা কি ঠিক?”

৪ ধর্ম গুরুল্লা উত্তর না দিয়া চুপ করি রইলেক। যীশু অসুকিয়া মানষিটার দেহাত হাত দিয়া নারিয়া ভাল করিলেক, আর উয়াক পেয়েয়া দিলেক।

৫ তার পাছত ধর্ম গুরুল্লার ভিত্তি দেখিয়া পুছিলেক, “তোমারলার মইন্ধোত কায় এমন আছে? জিরানের দিনত কারো গরু বা ছাওয়া-ছোট যদি ইন্দিরাত পরি যায়, তাইলে কি উয়াক জিরানের দিনের বাদে ইন্দিরা থাকি তুলিবেন না?”

৬ উমরা যীশুর কতার কোন উত্তর দিবার পাইলেক না।

৭ নিমন্তনিয়া মানষিলা বসিবার বাদে সন্মানের জাগা বেছি নিবার ধরচে, এই দেখিয়া যীশু উমাক গল্প দিয়া কবার নাগিলেক,

৮ “যদি কাণ্ডো তোমাক বিয়াও বাড়িত ভোজের নিমন্তন করে, তোমরা সন্মানের ভাল নগত বেশ ভাল ব্যবহার করিলেক, আর উয়াক বন্ধু-বান্ধবেরটে যাবার অনুমতি দিলেক, যাতে উয়ার দরকারি জাগাত যায়া না বইসেন, হয় তো তোমার থাকিও আরো বেশী সন্মানের মানষি নিমন্তন পাইচে।

৯ যদি অইন্য মানষিটা আইসে, তাইলে নিমন্তন দেওয়া মানষিটা, তোমাক কবে, ‘তোমরা এই জাগাখান ইয়াক এটে বসির দেও। সেলো তোমরা শরম খায়া নিচা মানের জাগাত বসির যাবেন।’

১০ এই নাকান যাতে না হয়, তোমরা নিমন্তন পায়া কি করিবেন? নিমন্তন বাড়িত যায়া সউগ চায়া নিচা জাগাত বসিবার যান। সেলো যায় তোমাক নিমন্তন করিচে, উয়ায় তোমারটে আসিয়া কবে, ‘সখা চলো, আরো ভাল জাগা খালি পরি আছে ওটেকোনা বইসো।’ এই নাকান করিলে সউগ নিমন্তনিয়ার আগত সন্মান পাবেন।

১১ যায় নিজক উচা করে উয়াক নিচা করা হইবে, আর যায় নিজক নিচা করে, উয়াক উচা করা হইবে।”

১২ সেলো যীশু নিমন্তন দেওয়াইয়া-টাক কইলেক, “যেলো তুই দুপুরা বা রাতির ভোজের খাওয়া-দাওয়ার ব্যবস্থা করিবু, সেলো তুই তোর সাগাই-সোদর, বন্ধু-বান্ধব, আর ধনী পাড়া-পড়শিক নিমন্তন করিস না। কেনেনা, এই নাকান করিলে, নিমন্তনের বদলে উমরাও তোক নিমন্তন করিবে। ইয়াতে তোমার নিমন্তন শোধ হয়্যা যাবে।

১৩ কিন্তুক তুই যেলো নিমন্তন করিবু দীন-দুঃখী, কানা-খোড়াক নিমন্তন দিস।

১৪ ইয়াতে তুই ভগবানের আশুর্বাদ পাবু। কেনেনা উমরা তোর নিমন্তন শোধ করির পাবে না। আর যেলো মরণ থাকি ভগবানক

মানা মানষিলা বত্তি উঠিবে, সেলো তুই পুরস্কার পাবু।”

১৫ এই কতালা শুনতে কালে, খাবার বইসা মানষিলা মইন্ধো থাকি একটা মানষি যীশুক কইলেক, “ভগবানের রাজ্যত যায় খাবার বসিবে, উয়ায়-এ ধইন্য।”

১৬ যীশু একটা গল্পের উপমা দিয়া কইলেক, “এক জন মানষি বড় একটা ভোজের ব্যবস্থা করিয়া, মেলা মানষিক নিমন্তন করিলেক।

১৭ যেলা ভোজের সমায় হইলেক, সেলো উয়ার এক জন চাকরোক, নিমন্তনিয়া মানষিলাক ডেকে বাদে পেঠেয়া দিলেক। উয়ায় যায়া মানষিলাক কইলেক, ‘তোমরা আইসো রান্দোন-বারোন হয়্যা গেইচে।’

১৮ কিন্তুক উমরা একটার পর একটা তাল-বাহানা দেখেবার নাগিলেক। পইলা জন চাকরটাক কইলেক, ‘মুই অল্প খানিক জমিন কিনিচুং, মোক ঐলা যায়া দেখির নাগিবে, দয়া করি মোক মাপ করেন।’

১৯ “আর এক জন কইলেক, ‘মুই পাঁচ হাল হালুয়া গরু কিনিচুং, ঐলা যাচাই করির যাবার ধরচুং। দয়া করি মোক মাপ করি দেন।’

২০ “অইন্য আরেক জন কইলেক, ‘মুই এলায় বিয়াও করিচুং, এই বাদে মুই যাবার পাইম না।’

২১ “তার পাছত চাকরটা মালিকোক যায়া সউগ কতায় পই-পই করি কইলেক। মালিকটা গোসা হয়্যা চাকরটাক কইলেক, ‘তুই পচ

পচে যায়া গঞ্জের ঘাটার মোড়ে মোড়ে, অলি-গলি যায়া, দীন-দুঃখী, কানা-খোড়া, নুলা উমাক ড্যেকেয়া আনেক।’

২২ “এইলা করার পাছত চাকরটা কইলেক, ‘মালিক তোমার কতা মতন সউগে করা হইচে, কিন্তুক এলাও জাগা খালি পড়ি আছে।’

২৩ “এই কতা শুনিয়া মালিক চাকরটাক কইলেক, ‘গঞ্জের বায়রাত সড়কে সড়কে আর অলি-গলি যায়া মানষিলাক এটেকোনা আসিবার বাদে জোর কর, যাতে করি বাড়ি ভরি যায়।

২৪ মুই তোক কবার ধরচুং, পইলাত যাক যাক নিমন্তন করা হইচে, উমার মইন্ধে কাণ্ডেয় এই নিমন্তন খাবার পাবে না।”

২৫ এক দিন মেয়েলা মানষি ভিড় করি যীশুর সাথত যাবার নাগিলেক, আর যীশু মুখ ঘুরিয়া উমারলাক কইলেক,

২৬ “যদি কোন মানষি মোর পাছত আসির চায়, উয়ায় উয়ার মাও-বাপ, মাইয়া, বেটা-বেটি, ভাই-বইনি এমন কি নিজের জীবনের চায়া মোক যদি বেশী পিরিত না করে, তা হইলে উয়ায় মোর শিষ্য হবার পাবে না।

২৭ যায় যায় মোর পাছত আসির চায়, কিন্তুক নিজের ক্রুশের কষ্টের বোঝা ঘাড়ত নিয়া মোর পাছে পাছে আইসে না, উয়ায় মোর শিষ্য হবার পায় না।

২৮ “তোমার মইন্ধোত কাণ্ডে যদি দালান কোটা বানেবার চায়, তাইলে উয়ায় আগত হিসাব করি দেখিবে যে, বাড়িটা বানাইতে

কত টাকা খরচা হইবে, অতলা টাকা আছে কি না?

২৯ আগত হিসাব না করিলে হবার পায় যে ঘরের ভিটি বানাইতে সউগ টাকা খরচ হয় যাবে, ঘর বানা শেষ করির না পায়। পাছত যে মানষিলা দেখিবে উমরা সগায় হাসা হাসি করিবে।

৩০ আর সগায় কবে, ‘মানষিটা ঘর বানা শুরু করিলেক ঠিকেই, কিন্তুক শেষ করির পারিলেক না।’

৩১ “কোন রাজা যেলা আরেক রাজার সাথত যুদ্ধ করির যায়, সেলা আগত পরামর্শ-দাতার নগত বসিয়া চিন্তা-ভাবনা করিবে কি না? যে উয়ার মাত্র দশ হাজার সৈন্য, আর শত্রু রাজার কুড়ি হাজার সৈন্যের মোকাবিলা করির পাবে কি না।

৩২ যদি না পায়, তাইলে ঐ অইন্য রাজা দূরত থাকিতে শান্তির চুক্তি করির বাদে উয়ার ভাববাদীক পেঠেয়া দিবে।”

৩৩ শেষত যীশু কইলেক, “একেই নাকান করি তোমার মইন্ধোত কাণ্ডো যদি উয়ার নিজের সউগ কিছু ছাড়িয়া না আইসে, তাইলে উয়ায় মোর শিষ্য হবার পারে না।”

৩৪ “নুন তো খুব ভাল জিনিস, কিন্তুক নুনের সোয়াদ যদি হারে যায় তাইলে আরো নোস্তা করা যাবে না।

৩৫ নোস্তা ছাড়া নুন তো অকাজের। ভুইয়েরও হয় না, সারের ভিড়াও হয় না। তাইলে মানষি ফ্যেলেয়া দেয়। “যার শুনিবার মন আছে উয়ায় ধ্যান দিয়া শুনুক আর বুঝির চেষ্টা করুক!”

১৫ মেয়ো পাপী আর মাসুল আদায়কারী মানষিলা যীশুর বগলত বাইক্য শুনিবার বাদে আসিলেক।

২ এই দেখিয়া ফরীশীলা আর পন্ডিতলা বিরক্তি হয়। গোদর গোদর করিয়া কবার নাগিলেক, “আরে! যীশু কেনে জঘন্য পাপী মানষিলাক আপন করি নিয়া উমারলার সাথত মেলা-মেশা আর খাওয়া-দাওয়া করে?”

৩ সেয়ো ঐ মানষিলাক শিক্ষা দিবার বাদে, যীশু গল্প দিয়া কইলেক,

৪ “তোমারলার কারো একজনের একশটা ভেড়া আছিলেক। যদি ঐ ভেড়ার দলের মইন্ধো থাকি একটা হারেয়া যায়, তাইলে কি করিবেন? ঐ নিরানব্বইটা ভেড়া মাঠত থুইয়া হারে যাওয়া ভেড়াটাক চান্দেবার যাবেন কি না? যতক্ষণ না পান, ততক্ষণ চান্দাইতে থাকিবেন।

৫ সেয়ো পাইতে কালে খুশিতে ভেড়াটাক গদনাত নিয়া বাড়িত আসিবেন।

৬ পাছত সাগাই সোদর পাড়া-পরশীক কবেন, ‘আইসো আমোদ করি, মোর যেইটা ভেড়া হারেয়া গেইচে ঐটা মুই পাইচুং!’

৭ একে নাকান করি, কন দেখি যে নিরানব্বই জন ধার্মিক মানষি আছে, যার পাপের ঘাটা থাকি মন ফিরিবার দরকার নাই। উমারলার চায়া এক জন পাপী মানষি পাপ থাকি মন পরিবর্তন করিলে, স্বর্গত বেশী আনন্দ হয়।”

৮ “তোমরা মনে করেন, কোন এক জন বেটিছাওয়ার দশটা রূপার কাঁচা টাকা আছে। এক দিন একটা রূপার টাকা হারেয়া গেইলেক। গচা জ্বলেয়া না পাওয়া পর্যন্ত ঘরের সউগ জাগা ভাল করি ঝাটা দিয়া শাপিটয়া চান্দাবে কি না?

৯ যেলা পারে সেলা উয়ার নিজের বন্ধু-বান্ধব আর পাড়া-পড়শিলাক ডেকেয়া কবে, ‘তোমরাও মোর নগত আমোদ-ফুর্তি কর! কেনেনা হারে যাওয়া টাকাটা মুই পাইচোং।

১০ ঠিক এই নাকান করি যেলা কোন এক জন পাপী নিজের পাপ থাকি পস্তেয়া মন ফিরায়ে, সেলা পরম প্রভুর স্বর্গদূতলা আনন্দে আন্তহারা হয়। য়া।”

১১ যীশু কইলেক, “মনে করেন কোন এক জন মানষির দুইটা বেটা আছিলেক।

১২ ছোট বেটা উয়ার বাপক কইলেক, ‘বাবা! যেইলা সম্পত্তির মুই ভাগ পাইম, তোমরা বত্তি থাকা কালে ঐলা মোক দেও।’ এই বাদে বাপটা দুই বেটাক সম্পত্তি ভাগ করিয়া দিলেক।

১৩ সেলা কি হইলেক? কিছু দিন পাছত ছোট বেটা সউগ সম্পত্তি বেচেয়া টাকা-পাইসা নিয়া ভিন দেশত চলি গেইলেক। ওটেকোনা বেয়া জীবন যাপন করিয়া সউগ টাকা-পাইসা খরচা করি শেষ করিলেক।

১৪ যেলা উয়ার সউগ টাকা-পাইসা খরচা হয়। গেইলেক, সেলায় ঐ দেশের সউগ জাগাত খুব মঙ্গা দেখা দিলেক। আর



এই বাদে উয়ায়ও অভাবত পড়িলেক।

১৫ সেলো চেংড়াটা কাম চান্দের বাদে ঐ দেশের একটা চাষার বাড়িত যায়া কাম করির চাইলেক। চাষাটা উয়াক সউগ চায়া ঘিনের কাম, শুয়োর চরের কাম, যেইলা ছোট জাতের মানষি ডোম, ডাওয়োই এর নাকান করে, ঐ কাম দিলেক।

১৬ আর পেটের ভোগে যেই খাবারলা শুয়োরক খাবার দেওয়া হয় ঐলা খাবার চাইলেক। কিন্তুক ঐলাও দেওয়া হইলেক না।

১৭ “পাছত এক দিন উয়ার হুস ফিরি আইসতে কালে ভাবির নাগিলেক, ‘মোর বাপের বাড়ির মেলা কামলা আছে, উমার খাবারের অভাব হয় না। আর মুই এটেকোনা পেটের ভোগেত মরিবার ধরচুং।

১৮ মুই মোর বাপের বাড়ি যাইম, আর যায়া কইম বাবা মুই তোর বিরুদ্ধে পাপ করিচুং মোক ক্ষমা করেক।

১৯ মোর কোন যোগ্যতা নাই তোর বেটা হবার। মুই কামলার নাকান করি থাকির চাং।”

২০ “আর এই নাকান চিন্তা ভাবনা করিয়া উয়ায় বাড়ির ভিতি ফিরি যাবার ধরলেক। কিন্তুক দূর থাকি বেটাক দেখিয়া বাপের মায়া হইলেক, সেলো বাপটা কি করিলেক? পচপচে হাটি যায়া বেটাক বুকত জড়ে ধরিয়া গাও সোত্তেয়া আদর করির নাগিলেক।

২১ “বেটা বাপক কইলেক, ‘বাবা! মুই ভগবানের নজরত আর তোর বিরুদ্ধেত পাপ করিচুং। মুই তোর অযোগ্য বেটা, মোর বেটা

হবার যোগ্যতা নাই।’

২২ “সেইলো উয়ার বাপ চাকরক ডেকেয়া কইলেক, ‘যাও! বাড়ি যায়া সউগ চায়া ভাল জামা আনিয়া ওড়ে দেও আর হাতত সোনার আংটি, ঠেংয়ত জুতা বাপইওক পেন্দে দেও।

২৩ আর ভোজের বাদে গদ-গদা মোটা পশু মার। আইসো সগায় মিলি আমোদ ফুর্তি করি।

২৪ কেনেনা তোমরা জানেন, উয়ায় মরি গেইচে, এলা ফির বত্তি উঠিচে! উয়ায় হারি গেইচে, এলা উয়াক ফিরি পাচুং।’ তারে বাদে সগায় আমোদ ফুর্তি করির নাগিলেক।

২৫ “এই সমায় বড় বেটা কিন্তুক ভুইয়োত আছিলেক, উয়ায় বাড়ির বগলোত আসতে কালে গান বাজনার শব্দ শুনির পাইলেক।

২৬ আর চাকরটাক পুছিলেক, ‘আরে! বাড়িত কিসের এত গান বাজনা হবার ধরচে?’

২৭ চাকরটা সেইলো কইলেক, ‘তোর ভাই নিরাপদে বাড়ি ফিরি আইসচে। এই বাদে গান বাজনা হবার নাগচে। আর মোটা গদ-গদা পশু মারিয়া ভোজের ব্যবস্থা করিচে।’

২৮ “এই কতা শুনতে কালে বড় দাদা গোসা হয়। বাড়ির ভিত্তিরা যাবার চাইলেক না। সেইলো উয়ার বাপ নিজে বাইরা আসিয়া আদর করিয়া বাড়ি নিয়া যাবার বাদে খোসামদ করির নাগিলেক।

২৯ স্যেলা উয়ায় কইলেক যে, ‘দেখ! মুই ম্যেলা দিন থাকি চাকরের নাকান করি তোর দেখ ভাল করি আসিলুং। কোন দিন অবাধ্য হং নাই। তাণ্ডো কোন দিন মোর বন্ধু বান্ধবের সাথত আমোদ ফুটি করি খাবার বাদে একটা ছাগলের বাচ্চাও দেন নাই।

৩০ কিন্তুক আজি তোর এই বেটা বেশ্যালার পাছত টাকা-পাইসা উড়ি ফুরি দিচে। উয়ায় আইসার সাথে সাথে বাড়ির গদ-গদা পালা পশুটা কাটা হইলেক।’

৩১ “স্যেলা উয়ার বাপ কইলেক, ‘বাপই, শোনেক! তুই তো মোর নগত সউগ সমায় আছিস, আর মোর যেইলা আছে সউগে তোর।

৩২ এলায় খুশি হয় হামার ফুটি করা উচিত। কেনেনা উয়ায় তো তোর ভাই হয় যায় মরি গেইচে, এলা বত্তি উঠিচে। হারেয়া গেইচে, উয়াক পাওয়া গেইচে।”

১৬ যীশু উপমা দিয়া শিষ্যলোক আরেকটা গল্প কইলেক, “এক জন ধনী মানষি আছিলেক, আর উয়ার এক জন প্রধান কর্মচারীও আছিলেক। মালিক প্রধান কর্মচারীর নামে অপবাদ শুনিলেক যে, উয়ায় মালিকের ধন-দৌলত নষ্ট করির ধরচে।

২ মালিক কর্মচারীটাক ডেকেয়া কইলেক, ‘মুই তোর নামে কি শুনির ধরচুং? এলা তুই হিসাব ঠিক করি মোক বুঝিয়া দে। কেনেনা তুই আর প্রধান কর্মচারীর পদত থাকিবার পাবু না।’

৩ “এলা প্রধান কর্মচারীটা মনে মনে চিন্তা করির ধরিলেক, কি হইবে? ‘মোর মালিক তো মোক কাম থাকি নিকিলি দিবে। কিন্তুক মাটি কাটির বা মানষির বাড়িত হাজিরা করির মোর শক্তি নাই, আর ভিক্ষা করিরো মোক শরম নাগে।

৪ যেটায় হউক, মোর কর্মচারীর কাম চলি গেইলেও মানষি যাতে মোক আপন করি নিবার পায়, এলা থাকি তার ব্যবস্থা করিম।’

৫ “এই চিন্তা করিয়া উয়ার মালিকেরটে যায় যায় দ্যেনা করিচে, উমারলাক সগাকে ডেকেয়া পইলা জনক পুছিলেক, ‘মোর মালিকেরটে তোর কত দ্যেনা আছে?’

৬ মানষিটা কইলেক, ‘দুই হাজার চারশো লিটার ত্যেলা।’ কর্মচারীটা কইলেক, ‘বসিয়া পচপচে উয়ার আধা করি নেখেক।’

৭ প্রধান কর্মচারী আরেক জনক পুছিলেক, ‘তোর কত দ্যেনা আছে?’ উয়ায় উত্তর দিলেক, ‘চল্লিশ কুইন্টাল গম।’ কর্মচারীটা কইলেক, ‘তুই তোর কাগজত ত্রিশ কুইন্টাল টাল গম নেখি থো।’

৮ “যদিও ওই কর্মচারীটা অসৎ তাণ্ডো উয়ার শিয়ালের নাকান চালাকি দেখিয়া মালিক উয়াক সাবাসি দিলেক।” যীশু এই গল্প শেষ করিয়া শিষ্যলোক শিক্ষা দিবার বাদে কইলেক, “এইটা ঠিক যে, এই দুনিয়ার মানষিলা উমার নাকান মানষিলা নগত নিজের আচার আচরনে সাধু মানষির তুলনায় বেশী চালাক।

৯ মুই তোমারলাক কবার ধরচুং, এই দুনিয়ার ধন অসৎ, এইলা চিরকাল থাকিবে না। তাইলে কি করা যায়? এই দুনিয়াত তোমার

যে ধন আছে, ওইলা নিয়া মানষিলাক সাহায্য করিয়া সখা পাতাও। ইয়াতে পরকালের ঘরত থাকিবার বাদে তোমাক বরণ করি নেওয়া হইবে।

১০ “যে কাণ্ডায় ছোট বিষয়োত বিশ্বাসযোগ্য, উয়ায় বড় বিষয়োত বিশ্বাসযোগ্য হইবে। আর যায় ছোটো বিষয়োত অসৎ, তায় বড় বিষয়োত অসৎ হইবে।

১১ যদি তুই দুনিয়ার এই অসৎ ধন-দৌলতের বাদে বিশ্বাসযোগ্য না হইস, তাইলে তোক স্বর্গের আসল ধন কায় দিবে?

১২ অইন্যের সম্পদের বিষয়ে তোমরালা যদি বিশ্বাসযোগ্য না হন, তাইলে তোমার যে নিজের সম্পদ আছে সেইলায় বা তোমাক কায় দিবে?”

১৩ “কোন চাকর দুই জন মালিকের সেবা করির পায় না। কেনেনা উয়ায় এক জনক ঘিন খাবে, অইন্য জনাক পিরিত করিবে। বা এক জনক মায়া করিবে, অইন্য জনাক অবহেলা করিবে। তোমরা ভগবান আর ধন-সম্পদ দুইটার সেবা করির পারেন না।”

১৪ যীশুর এই কতা শুনি ফরীশীলা টিটকারি করির নাগিলেক, কেনেনা উমারলার ধন সম্পত্তির খুব লোভ-নালসা আছিলেক।

১৫ যীশু উমারলাক কইলেক, “তোমরালা নির্দোষ দেখের বাদে মানষির আগত নিজক ধার্মিক ভাব দেখান। কিন্তুক ভগবান

তোমার অন্তরের কথা জানে, মানষিরটে যেইটা নামের বিষয়, ভগবানেরটে সেইটা ঘিনের বিষয়।”

১৬ “ধর্মের মূল বিষয় কি? দীক্ষাদাতা যোহনের আইসার আগত মূল বিষয় আছিলেক মহাপুরুষ মোশির দেওয়া বিধির বিধান আর ভগবানের পুরানা ভাববাদীলার খবর। যোহনের আইসার পাছত ভগবানের শাসন ব্যবস্থার ভাল খবর প্রচার শুরু হইচে। আর সেই শাসন ব্যবস্থা সগায় মানিবার চেষ্টা করির ধরচে।

১৭ তাইলে শুনেন, দ্যাওয়া আর দুনিয়া ধবংস হওয়া সহজ। কিন্তুক শ্রী মোশির দেওয়া বিধানের এক বিন্দু গুরুত্ব কমা কঠিন!

১৮ “যে কাণ্ডো নিজের বৌ-ওক ছাড়ি দিয়া অইন্য এক জনক বিয়াও করে, উয়ায় ব্যভিচার করে। আর যায় ভাতার ছাড়ি বেটিছাওয়াক বিয়াও করে, উয়ায়ও ব্যভিচার করে।”

১৯ যীশু একটা গল্প কইলেক, “এক জন ধনী মানষি আছিলেক। উয়ায় বাইগুনি রংয়ের খুব দামী কাপড়-চোপড় পিন্দে। উয়ায় ভোগ বিলাসে আমোদ করিয়া জীবন কাটায়।

২০ ঐ ধনী মানষির দুয়ারত লাসার নামে এক জন কাঙাল ভিখারীক সউগ দিন আনি থোয়া হয়। উয়ার গোটায় দেহাত ঘাউয়া

২১ আর কুকুর আসিয়া লাসারের ঘাউয়া চাটিয়া দেয়। ধনী মানষিটার খাবারের টেবিল থাকি যেইলা ছুয়া-আইটা খাবার পরিয়া রয়, ঐলায় খায়া উয়ায় পেটে ভরের আশা করি রয়।

২২ “এক দিন সেই গরীব লাসার মরি গেইলেক, সেলো স্বর্গদূতলা নিয়া যায়া উয়াক অব্রাহামের কোলাত বসাইলেক। পাছত এক দিন ধনী মানষিটাও মরিলেক, আর উয়াক সমাধি দেওয়া হইলেক।

২৩ ধনী মানষিটার আত্মা নরকত গেইলেক, নরকের যন্তনাত পড়িয়া উয়ায় উপরা ভিতি চায়া দূর থাকি অব্রাহামক দেখির পাইলেক। যাক সউগ জাতির বাপ কওয়া হয়, উয়ারে কোলাত লাসার বসিয়া আছে।

২৪ সেলো ধনী মানষিটা চিকিরিয়া অব্রাহামক কইলেক, ‘হে মোর বাপ মোক দয়া করেক, লাসারক মোর এটেকোনা পেয়েঠেয়া দেও, যাতে উয়ার নগুলের মাথা জলত ডুবিয়া, সেই জল দিয়া মোর জিবাখান ঠাণ্ডা করিয়া দেয়। মুই অগুনের আঁচের যন্তনাত পড়িয়া আছং।’

২৫ “অব্রাহাম কইলেক, ‘বাপই তুই ফম করেক, সারা জীবন সুখ-ভোগ, আমোদ করি জীবন কাটাচিস। কিন্তুক কাঙাল লাসার দুঃখে জীবন কাটাইচে, এলা তুই কষ্ট পাবার ধরচিস, আর উয়ায় সুখে-শান্তিতে আছে।

২৬ এইলা ছাড়াও তোর আর হামার মইন্ধোত আকাশ পাতাল ফারাক আছে। ইচ্ছা করিলেও কাণ্ডো এটে থাকি তোমার ওটেকোনা যাবার পাবে না, আর কাণ্ডো ওটে থাকি এটেকোনা আসির পাবেন না।’

২৭ “ধনী মানষিটা অব্রাহামক কইলেক, ‘হায় রে! বাবা দয়া করি  
লাসারক মোর বাপের বাড়িত পেঠেয়া দেও।

২৮ কেনেনা মোর যে পাঁচ ভাই বাড়িত আছে, উমাক সাবধান  
করি দেউক, যাতে উমাক নরক যন্তনাত কষ্ট পাবার না নাগে।’

২৯ “কিন্তুক অব্রাহাম কইলেক, ‘মহাপুরুষ মোশি আর ভগবানের  
ভাববাদীর নেখা সনাতন পবিত্র শাস্ত্রত সাবধান করি দেওয়া  
হইচে, তোর ভাইলা ঐলা পড়িয়া মানুক।’

৩০ “ধনী মানষিটা অব্রাহামক কইলেক, ‘বাবা! এই নাকান  
নোয়ায়, সনাতন পবিত্র শাস্ত্র উমরা পড়িবার নোয়ায়। কিন্তুক মরা  
মানষির মইন্ধো হাতে কাণ্ডোয় উঠিয়া উমারটে গেইলে সেয়া  
উমরা পাপ থাকি পস্তেয়া ভগবানের ঘাটাত চলিবে।’

৩১ “কিন্তুক অব্রাহাম কইলেক, ‘যদি শ্রী মোশির আর ভগবানের  
ভাববাদীর কথা না শুনে, তাইলে মরা মানষির মইন্ধো থাকি  
কাণ্ডো উঠিলেও উমরা বিশ্বাস করিবে না।”

১৭ যীশু এক দিন উয়ার শিষ্যলোক কইলেক, “পাপের ফান্দ তো  
সউগ সমায় বসা থাকিবেই। কিন্তুক যায় ঐ পাপের ফান্দ বসায়,  
ধিক্কার দেং উয়াক!

২ যায় মোর ছোট শিষ্যলোক পাপের ফান্দত ফ্যেলেবার চেষ্টা  
করে, উয়ার বাদে ভগবানের শাস্তির তুলনায়, গালাত একটা বড়  
শিল বান্দিয়া সাগরের জলত ডুবিয়া মরা অনেক ভাল।”



৩ “সাবধান রন! যদি তোমার গুরু ভাই বা বইনি পাপ করে তাইলে উয়াক ভয় দেখান। আর যদি পাপের ঘাটা থাকি মন ফিরায়ে তাইলে উয়াক ক্ষমা করেন।

৪ যদিও উয়ায় তোমার বিরুদ্ধে দিনে সাত বার পাপ করে, আর পতিবার পাপের বাদে পস্তেয়া তোমারটে ক্ষমা চায়, তাইলে উয়াক ক্ষমা করেন।”

৫ সেলো প্রভু যীশুর বারো জন খবরিয়ালা উয়াক কইলেক, “হে গুরু! হামার মনের বিশ্বাস আরো বাড়ান।”

৬ যীশু কইলেক, “যদি তোমারলার বিশ্বাস একটা সরিষা দানার নাকান হইলেক হয়, তাইলে ঐ বড় তুত গছটাক কবার পাইলেন হয়, শিপা সুদায় উকুরি যায়া সাগরত হঃ। তাইলে গছটা শুনিলেক হয়।

৭ “মনে করেন, তোমারলার মইন্ধোত কোন মালিকের চাকর হাল বয়ের বা ভেড়া চরের গেইচে। যেলো উয়ায় খেতবাড়ি থাকি আসিবে, সেলো কি মালিক উয়াক কবে, ‘তুই মোর নগত বসিয়া খা।’

৮ না, মালিক কবে না। উয়ায় কবে যে, ‘মোর খাওয়া-দাওয়ার ব্যবস্থা করেক। আর কমড়ত গামছা বান্দিয়া মোর সেবা যতন কর। তার পাছত তুই খা।’ মালিক এই নাকান কবে।

৯ আর এই নাকান সাধারন কাম করির বাদে মালিকটা কি চাকরটাক সাব্বাসি দিবে? না, দিবে না। কেনেনা এইটা উয়ার

কাম। উয়াক এইটা করির নাগিবে।

১০ একেই নাকান করি মোর সউগ আঞ্জা পালন করিয়া তোমরা কবেন, ‘হামরা তো অযোগ্য চাকর। হামরা নিজের কর্তব্য পালন করচি মাত্র।’”

১১ যীশু যিরুশালেম যাবার সমায় গালীল আর শমরীয়া অঞ্চলের সীমনা দিয়া যাবার ধরচে।

১২-১৩ যাবার সমায় কোন একটা গেরামত সোন্দের সাথে সাথে উয়াক দশ জন কুষ্ঠ রুগী দেখির পাইলেক। উমরা দূর হাতে জোরে জোরে চিকিরিয়া কবার নাগিলেক, “হে দয়াল প্রভু! হে যীশু! হামাক দয়া করেক।”

১৪ যীশু উমারলাক দেখিয়া কইলেক, “তোমরা সগায় যিহুদী বামনলারটে যাও। তোমরালা যে ভাল হয়্যা গেইচেন, এইটা প্রমাণ করির বাদে তোমারলার দেহা দেখান।” সেয়া উমরা যাবার ধরচে, আর ঘাটা দিয়া যাইতে যাইতে দশ জনেই একেবারে শুদ্ধি হয়্যা ভাল হয়্যা গেইলেক।

১৫ ঐ দশ জনের মইন্ধে এক জন নিজক ভাল হওয়া দেখিয়া জোরে জোরে চিকিরিয়া ভগবানের মহিমার গুণগান করিলেক। জয় ভগবানের জয়! জয় ভগবানের জয়! করিতে করিতে যীশুরটে ফিরি আসিলেক।

১৬ উয়ায় উবুরি হয়্যা যীশুক ভক্তি দিলেক, কেনেনা উয়ায় একেবারে ভাল হয়্যা গেইচে। উয়ায় আছিলেক শমরীয় জাতের

মানষি, যাক যিহুদী মানষিলা ঘিন করে।

১৭ যীশু মানষিটাক কইলেক, “মুই কি তোমার দশ জনকেই শুদ্ধি করি ভাল করং নাই, তাইলে বাকি নয় জন কোটে?”

১৮ ভগবানের গুণগান করির বাদে এই অইন্য জাতের মানষিটা ছাড়া আর কাণ্ডেয় কি ফিরি আসিলেক না?”

১৯ যীশু এই মানষিটাক কইলেক, “ওঠেক, চলি যাঃ! তুই বিশ্বাস করিচিস বুলিয়া ভাল হইচিস।”

২০-২১ এক দিন ফরীশীলা যীশুক পুছিলেক, “ভগবানের শাসন ব্যবস্থা কোন সমায় আসিবে?” যীশু কইলেক, “ভগবানের শাসন ব্যবস্থা এই নাকান করি আইসে না, তোমরা চোখু দিয়া দেখির পাবেন না। মানষি এই নাকান কবার পাইবে না যে এই দেখো, ‘এই জাগাত!’ বা ‘ঐ জাগাত!’ কেনেনা তোমরালা দেখেন ভগবানের শাসন ব্যবস্থা তোমার মইন্ধোত আছে।”

২২ অল্প সমায় পাছত যীশু নিজের শিষ্যলোর মাঝত কতা-বার্তা করির নাগিলেক যে, “এমন এক দিন আসিবে, য়েলা মোক তোমার দেখির ইচ্ছা হইবে, কিন্তুক তোমরা দেখির পাবেন না।

২৩ মানষিলা তোমাক খবর দিবে যে মুই ফিরি আসচুং, উমরা কবে, ‘এইটে দেখো!’ না ‘ঐটে দেখো!’ তোমরা খানিকো বিশ্বাস করেন না আর উমার পাছত তোমরা যান না।

২৪ য়েলা মুই আসিম সেলা কোন কিছু গুপ্ত থাকির না হয়। যেই নাকান করি বিজলী চমকাইলে আলোর ঝলকানি দ্যাওয়ার

এক পাক থাকি অইন্য পাকে ছড়িয়া ভইভইয়া হয় অমন করি আসিম।

২৫ কিন্তুক পইলাতে মোক খুব দুঃখ-কষ্ট ভোগ করির নাগিবে।  
এই কালের মানষিলা মোক মানি নিবার না হয়, উমরা মোক অগ্রাহ্য করিবে।

২৬ নোহ নামের মানষিটার সমায় যেই নাকান বানা হইছিলেক,  
ঐ নাকান হইবে যেয়ো মুই আসিম।

২৭ বানা আসিয়া ধবংস না হওয়া পর্যন্ত মানষিলা খাওয়া-দাওয়া  
করে, বিয়াও করে, বিয়াও দেয়, আর নোহ নাওত চড়িয়া  
সোন্দাইতে কালে বড় বানা আসিয়া সউগ নাশ করিলেক।

২৮ “আরো মনে করেন মেয়ো দিন আগত লোট নামের একটা  
মানষি আছিলেক। ঐ সমায়ও উমরা খাওয়া-দাওয়া, বেচা-কেনা,  
গছ গাড়া, ঘর বানা সউগে করির ধরছিলেক।

২৯ কিন্তুক যেদিন লোট সদোম গঞ্জ হাতে বাইর হয় আসিলেক,  
সেদিন দ্যাওয়া হাতে অগুনের বর্ষন হয় সগাকে নাশ করিলেক।

৩০ “একে নাকান করি মানষিলা যেয়ো সাধারন জীবন যাপন  
করিতে থাকিবে মুই বাছাই করা মানষিটা সেয়ো আসিম।

৩১ সেদিন যায় ঘরের বারান্দাত আছে উয়ায় মাল-পত্র নিবার  
বাদে ঘরত না সোন্দাউক, আর যায় জমিনত কাম করে বাড়িত  
ফিরিয়া না আসুক।

৩২ লোটের বৌ-এর কতা ফম কর!

৩৩ যায় ইহকালের জীবন রক্ষা করির চায় উয়ায় পরকালে জীবন হারাবে। আর যায় ইহকালের জীবন হারেবার চায় উয়ায় পরকালের জীবন পাবে।

৩৪ মুই তোমারলাক কবার ধরচুং, সেই রাইতোত দুই জন একে বিছনাত থাকি রবে এক জনক তুলি নেওয়া হইবে, অইন্য জন ওটে রবে।

৩৫-৩৬ দুই জন বেটিছাওয়া একখান জাতা ঘুরাইতে থাকিবে, এক জনক তুলি নেওয়া হইবে অইন্য জনাক ছাড়ি দেওয়া হইবে।”

৩৭ শিষ্যলো কইলেক, “গুরু! কোটে কোনা এই নাকান হইবে?”  
যীশু শ্লোক দিয়া কইলেক, “মরা যেটেকোনা থাকে ওটেকোনা শকুন আসিয়া জড়ো হয়।”

১৮ যীশু চাইচে শিষ্যলো যাতে সউগ সমায় প্রার্থনা করে। আর নিরাশ না হয়, এই বাদে উয়ায় গল্প দিয়া কইলেক,

২ “কোন একটা গঞ্জত এক জন বিচারক আছে, উয়ায় ভগবানক ভয় না খায় আরো মানষিকও অবহেলা করে।

৩ ঐ গঞ্জত এক জন বেটিছাওয়াও আছে, উয়ায় বিধুয়া। এই বিধুয়াটা বিচারকেরটে বারে বারে আইসে। কেনে আইসে জানেন! উয়ায় মিনতি করি বিচারকটাক কইলেক, ‘ন্যায় বিচার করিয়া মোর বিরোধীটার বিরুদ্ধোত রায় দেও।’

৪ ওই বিচারকটা কিছু দিন পর্যন্ত কিছুই করিলেক না। কিন্তুক শেষত বিচারকটা মনে মনে এই নাকান ভাবিবার নাগিলেক, “মুই তো ভগবানক ভয় না খাং, আরো মানষিক অবহেলা করং।

৫ তাণ্ডো এই বিধুয়াটা মোক বারে বারে বিরক্ত করির ধরচে। তাইলে মুই কি করিম? উয়ায় যাতে মোক বিরক্ত না করে মুই উয়ার ন্যায় বিচার করিম।”

৬ এই উপমা শেষে করিয়া যীশু কইলেক, “এলা তোমরা কি শিখিলেন। এই অধার্মিক বিচারকটাক যাতে বিধুয়াটা বিরক্ত না করে এই বাদে ন্যায় বিচার করিবে।

৭ অধার্মিক বিচারকটা যদি এই নাকান হয়। তাইলে ভগবান সমন্ধে তোমরা কি চিন্তা করেন। ভগবানের নিজের বাছাই করা মানষিলা আছে। এই বাছাই করা মানষিলা দিন-রাতি কাউলা কাউলি করিবার নাগচে। উমরা চায় ভগবান যাতে ন্যায় বিচারের রায় ঘোষনা করিবে। এই বাদে উমরা দিন-রাতি কাউলা কাউলি করির নাগচে। ভগবান উমার বাদে কি ন্যায় বিচার করিবে না? নিশ্চয় করিবে! উমাক সাহায্য করির বাদে উয়ায় দেরি করিবে কি?

৮ ভগবান নিশ্চয় পচ-পচে আসিয়া ন্যায় বিচারের রায় ঘোষনা করিবে। ভাল, তাইলে মুই এইটা পরিস্কার করি কইম যে মুইয়ে বাছাই করা মানষিটা, আর মোর উপরাত বিশ্বাস করির নাগিবে।

কিন্তুক মুই এই দুনিয়াত ফিরি আসিয়া কয়জনক বিশ্বস্ত দেখির পাইম?”

৯ যে কাণ্ডো এই নাকান ভুল চিন্তা করে, “মুই মহান আর অইন্য মানষিলা তুচ্ছ।” এই বাদে ঐ নাকান মানষিলাক শিক্ষা দিবার বাদে যীশু এই গল্পটা দিলেক।

১০ “ধরেন, দুই জন মানষি আছিলেক। এক জন ফরীশীলা, আরেক জন মাসুল আদায়কারী। এই দুই জন মানষি এক দিন দশংগতি মন্দিরত প্রার্থনা করির গেইলেক।

১১ ফরীশীটা খাড়া হয় নিজেৰ বিষয়োত প্রার্থনা করির নাগিলেক, ‘হে ভগবান, অইন্য মানষির নাকান মুই না হং এই বাদে মুই তোমাক ধন্যবাদ দেং। উমরা তো ছল-চাতুরী, অসৎ, ব্যভিচারী। মুই উমার নাকান না হং এই বাদে মুই তোমাক ধন্যবাদ দেং। ঐ ঘুষখোর মাসুল আদায়কারীক দেখেন নিশ্চয় মুই উয়ার নাকান না হং। ধন্যবাদ, ভগবান ধন্যবাদ!

১২ মুই হাপ্তাত দুই দিন উপাস থাকং আর মোর আয়ের দশ ভাগের এক ভাগ দান করং।’

১৩ “ঐ নাকান ফরীশীটা প্রার্থনা করিচে। কিন্তুক মাসুল আদায়কারী মানষিটা অইন্য নাকানের। উয়ায় দূরত খাড়া হয় ছিল। উয়ায় স্বর্গের ভিত্তি চোখু তুলি দেখিবার সাহস পাইলেক না, বরং আপশোস করি কপাল চাপড়েয়া কইলেক, ‘হে ভগবান! মুই পাপী, মোক ক্ষমা করেক।’”

১৪ “উমরা বাড়ি চলি গেইলেক। তোমরা কি মনে করেন, ভগবান কাক নির্দোষ কয়া মানি নিলেক? মাসুল আদায়কারীটাক নির্দোষ কয়া মানি নিলেক। কিন্তুক ফরীশীটাক নির্দোষ কয়া মানি নিলেক না। কেনেনা যায় নিজক ছোট মনে করে, উয়াক বড় করা হইবে, কিন্তুক যায় নিজক বড় মনে করে উয়াক ছোট করা হইবে।”

১৫ এক দিন মানষিলা উমার ছোট ছাওয়ালাক নিয়া যীশুর ওটেকোনা আসিচে। যীশু যাতে ছাওয়ালার মাথাত হাত থুইয়া আশুবাদ করিবে, এইটা উমরা চায়। কিন্তুক শিষ্যলো ছাওয়ালাক যীশুরটে আসিবার দেয় নাই। শিষ্যলো ছাওয়ালাক বাধা দিয়া দাবরেবার নাগিলেক।

১৬ যীশু এই ঘটনা জানিয়া ঐ ছাওয়ালাক নিজের বগলত ডেকাইলেক। ছাওয়ালো আসিয়া যীশু শিষ্যলোক কইলেক, “ছোট ছোট ছাওয়ালাক মোরটে আসির দেও, উমাক বাদা করেন না। এই শিক্ষা শেখেন, ভগবানের শাসন ব্যবস্থা আসির ধরচে, কিন্তুক ঐ শাসন ব্যবস্থা কায় মানির পায়? যায় এই ছোট ছাওয়ার নাকান আছে।

১৭ মুই তোমারলাক সচাং করি কবার ধরচুং, এইটা ভাল করি ফম থোন। নিজক ছোট মনে না করিলে, কোন দিন ভগবানের শাসন ব্যবস্থা জানির পাবেন না!”

১৮ এক দিন যিহুদী সমাজের এক জন নেতা যীশুরটে আসিয়া পুছিলেক, “হে গুরু, তোমরায় ভাল মানষি। এলা মুই অমৃত



জীবন লাভ করির চাং। এই অমৃত জীবন লাভ করির বাদে মোক কি করির নাগিবে?”

১৯ যীশু উয়াক কইলেক, “মোক কেনে ভাল কবার ধরচেন? এক মাত্র ভগবানে ভাল।

২০ তুই তো ভগবানের আজ্ঞা জানিস। ব্যভিচার, খুন, চোর করেন না, মিছাং সাক্ষী দেন না, তোমার মাও-বাপক সন্মান করেন।”

২১ নেতাটা উত্তর দিলেক, “মুই তো ছাওয়া কাল থাকি এইলা মানি আসির ধরচুং।”

২২ এই কতা শুনিয়া যীশু উয়াক কইলেক, “এলাও তোর একনা কাম করির বাকি আছে। তোর সউগ ধন-সম্পত্তি বেচেয়া টাকা-পাইসা কাঙালক বিলিয়া দে, এই নাকান করিলে স্বর্গত তোর ধন জমা হইবে। তার পাছত আসিয়া মোর শিষ্য হঃ।”

২৩ সেলো কি হইলেক? এই কতাটা শুনতে কালে মানষিটার মুখ কালা হয়। গেইলেক। কেনেনা উয়ার মেয়ো ধন-সম্পত্তি আছিলেক।

২৪-২৫ যীশু এই দেখিয়া উপমা দিয়া কইলেক, “ধরি নেও সুইয়ের ফুটা দিয়া একটা উট সোন্দা সহজ। কিন্তুক একটা ধনী মানষির পক্ষে ভগবানের শাসন ব্যবস্থা মানি নেওয়া খুব কঠিন!”

২৬ যায় যায় যীশুর এই কতা শুনিলেক, উমরা কইলেক, “তাইলে কাণ্ডো কি মুক্তি পাইবে? মুক্তি পাইবে কি!”

২৭ যীশু কইলেক, “মানষির বাদে যেইটা অসম্ভব ভগবানের বাদে সেইটা সম্ভব।”

২৮ পিতর নামের যীশুর শিষ্যটা কইলেক, “হামরা তো সউগ কিছু ছাড়ি দিয়া তোমার শিষ্য হইচি।”

২৯ যীশু উয়ার শিষ্যলোক কইলেক, “মুই তোমারলাক সচাং করি কবার ধরচুং, যে কাণ্ডো ভগবানের শাসন ব্যবস্থা মানি নিয়া বাড়ি-ঘর, নিজের বৌ, মাও-বাপ, ভাই-বইনি, ছাওয়া-ছোট ছাড়ি দেয়,

৩০ উয়ায় এই কালত মেলাগুন বেশী পাবে, আর পরকালত অমৃত জীবন পাইবে।”

৩১ যীশু উয়ার বারো জন শিষ্যক বগলোত ডেকেয়া কইলেক, “দেখ, হামরা যিরুশালেম যাবার ধরচি। বাছাই করা মানষিটার সমন্ধে ভগবানের ভাববাদীলা শাস্ত্রত যেইলা নেখি গেইচে, ঐলা সউগে পূরণ হইবে।

৩২ উয়াক অইন্য জাতির মানষিলার হাতত ধরে দেওয়া হইবে। মানষি উয়াক ঠাট্টা, টিটকারি, অপমান করিবে, দেহাত ছেপ দিবে।

৩৩ উয়াক চাবুক দিয়া ডাঙাইবে, পরে মারি ফেলাবে। আর তিন দিনের দিন মরণক জয় করি উয়ায় বত্তি উঠিবে।”

৩৪ শিষ্যলো এই কতার মানে কিছুই বুঝির পাইলেক না। সউগে কতা নুকিয়া রইলেক, কি কি কতা যীশু কইলেক, কিছুই বুঝির পাইলেক না।

৩৫ যীশু যেলা ঘিরীহো গঞ্জের বগলোত আসিলেক, সেলা এক জন কানা মানষি ঘাটার বগলোত বসিয়া ভিক্ষা করির ধরচে।

৩৬ উয়ায় মেলা মানষির যাবার আওয়াজ শুনির পায়া পুছিলেক, “কি ব্যাপার! কি হবার ধরচে?”

৩৭ মানষিলা উয়াক কইলেক, “নাসারতের শ্রী যীশু ঘাটা দিয়া যাবার ধরচে।”

৩৮ আর এই কতা শুনতে কালে উয়ায় খুব জোরে চিকিরিয়া কবার নাগিলেক, “হে মহারাজা দায়ূদের বংশের ছাওয়া শ্রী যীশু, মোক দয়া করেক!”

৩৯ যীশুর সাথত আগে আগে যাওয়া ভিড়ের মানষিলা উয়াক দাবরের নাগিলেক, “ওই! চুপ করি রঃ!” কিন্তুক উয়ায় চুপ করি না রয়া আরো জোরে জোরে চিকিরিয়া কবার নাগিলেক, “হে মহারাজা দায়ূদের বংশের ছাওয়া শ্রী যীশু, মোক দয়া করেক।”

৪০ সেলা যীশু থমকি খাড়া হয় কানা মানষিটাক উয়ার ওটেকোনা আনির আদেশ দিলেক। কানা মানষিটাক বগলত আনিয়া যীশু উয়াক পুছিলেক,

৪১ “তুই কি চাইস? তোর বাদে মুই কি করিম?” মানষিটা কইলেক, “হে গুরু! মুই দেখির চাং।”

৪২ যীশু কইলেক, “আচ্ছা ঠিক আছে। তুই বিশ্বাস করিচিস বুলিয়া ভাল হইচিস।”

৪৩ এই কতা কইতে কালে মানষিটা দেখির পাবার নাগিলেক। আর উয়ায় ভগবানের মহিমার গুণগান করিতে করিতে যীশুর পাছে পাছে যাবার নাগিলেক। ওটেকোনা যতলা মানষি এই ঘটনাটা দেখিলেক, উমরা সগায় ভগবানের গুণগান করিবার নাগিলেক।

১৯ যীশু যিরীহো গঞ্জের মইন্ধো দিয়া যাবার ধরচে।

২ এই গঞ্জত সঙ্কেয় নামের এক জন যিহুদী মানষি আছিলেক। উয়ায় রোমীয় সরকারের প্রধান মাসুল আদায়কারী, আরো উয়ায় ধনী।

৩ যীশুক দেখিবার বাদে সঙ্কেয় খুব আকুল হইচে। কিন্তুক উয়ায় খাটো। আর মানষির ভিড়ের বাদে যীশুক দেখির পাবার ধরছিলেক না।

৪ স্যেলা সঙ্কেয় কি করিলেক? ঐ ঘাটার আগপাকে দৌড়ি যায়া বগলের একটা ডুমুর গছত চড়িলেক, ইয়াতে উয়ায় মনে করিলেক যে যীশুক দেখির পাইবে।

৫ যীশু ওটেকোনা আসিয়া উপরা ভিতি দেখিয়া কইলেক, “সঙ্কেয়! তুই পচ-পচে নিচাত নামি আয়, কেনেনা আজি তোর বাড়িত মোক রবার নাগিবে।”

৬ সঙ্কেয় পচ-পচে নামি আসিয়া মহা আনন্দে যীশুক বাড়ি নিয়া গেইলেক।

৭ কিন্তুক ভিড়ের মানষিলা গোদর-গোদর করিয়া কবার নাগিলেক, “আরেঃ! যীশু এক জন পাপী মানষির বাড়িত রাতি রবার গেইলেক।”

৮ সঙ্কেয় খাড়া হয় যীশুক কইলেক, “গুরু! মোর অর্ধেক ধন-সম্পত্তি গরীব মানষিক বিলিয়া দিম। আর মুই বেআইনি করি যারটেকোনা বেশী মাসুল আদায় করিচুং, তার চাইর গুন ফিরি দিম।”

৯ সেলো যীশু কইলেক, “আজি থাকি এই বাড়ির মানষিলা মুক্তি পাইচে। এই মানষিও মহাপুরুষ অব্রাহামের বংশের এক জন মানষি।

১০ মনত থোন, মুই বাছাই করা মানষিটা, মুই হারে যাওয়া আত্মলাক চান্দেয়া পাপ থাকি উদ্ধার করিবার বাদে আসচুং।”

১১ যীশু যেলো যিরুশালেমের বগলা-বগলি পৌছির ধরচে, সেলো মানষিলা উয়ার কতা শুনির চাইলেক। উমারলার ধারণা হইলেক যে, ভগবানের রাজত্বের শাসন ব্যবস্থা খুব পচ-পচে আসির ধরচে। এইটা উমার ভুল ধারণা দূর করির বাদে, যীশু উমাক শিক্ষা দিয়া এই গল্পটা কইলেক,

১২ “কোন এক জন রাজ পরিবারের মানষি আছিলেক। উয়ায় নিজের দেশের রাজসিংহাসনের অধিকার পাবার বাদে অনেক দূরত অইন্য দেশের মহারাজারটে চলি যাবার চায়। ঐটে যায়া উয়ায় রাজ পদবী নিয়া নিজের দেশত ফিরি আসিবে।

১৩ যাবার আগত উয়ার দশ জন চাকরক ডেকেয়া পতি জনক এক হাজার দিনের হাজিরার টাকা হাওলাদ দিয়া কইলেক, ‘মুই ঘুরিয়া না আইসা পর্যন্ত তোমরা এই টাকা দিয়া ব্যবসা করেন।’

১৪ “কিন্তুক উয়ার নিজের দেশের মানষিলা উয়াক ঘিন করে। এই বাদে উয়ায় যাবার পাছত উমরা কি করিলেক? ঐ দূরান্তরের মহারাজাক খবর পেঠাইলেক যে, ‘হামরা চাই না, এই মানষিটা হামার রাজা হউক।’

১৫ “তাণ্ডো উয়ায় রাজ পদ পায়া নিজের রাজ্যত ফিরি আসিলেক, আর যে দশ জন চাকরক ব্যবসা করির টাকা দিছিলেক উমারলাক ডেকেয়া আনির হুকুম দিলেক। উমারটে জানির চাইলেক ব্যবসা করি কায় কত টাকা লাভ করিচে।

১৬ পইলা জন আসিয়া কইলেক, ‘মালিক! তোমার টাকা দিয়া মুই দশ গুন লাভ করিচুং।’

১৭ “রাজাটা কইলেক, ‘সাব্বাস! তুইয়ে ভাল চাকর, মুই তোক অল্প দিচোং, অল্প খানিকতে বিশ্বস্ত হইচিস। তোর বিশ্বাস দেখিয়া মুই তোক দশটা গঞ্জের দেখাশুনার ভার দিলুং।’

১৮ “দ্বিতীয় চাকরটা আসিয়া কইলেক, ‘মালিক! তোমার টাকা দিয়া মুই পাঁচগুন লাভ করিচুং।’

১৯ “রাজাটা কইলেক, ‘ভাল! তোক পাঁচটা গঞ্জের ভার দিলুং।’

২০ “সেয়লা অইন্য আর এক জন চাকর আসিয়া কইলেক, ‘মালিক! এই নেও, মুই তোমার টাকা রুমালত বান্দিয়া খুইচোং।

২১ মুই জানং যে, তোমরা কঠুর মানষি। যেইলা থোন নাই ঐলা ফিরিয়া চান, যেইলা আবাদ করেন নাই সেইলা আবাদ কাটেন। এই বাদে মুই তোমাক ভয় খায়া তোমার টাকা রুমালত বান্দি থুইচোং।’

২২ “রাজা গোসা হয়া চাকরটাক কইলেক, ‘শয়তান কোটেকার! তোর মুখের কতা মতন বিচার করিম। তুই তো জানিলু মুই কঠুর মানষি। মুই যেটা থোং নাই ঐটায় ফিরিয়া চাং, যেইটা গাড়ং নাই, সেইটায় কাটং।

২৩ তাইলে মোর টাকা তুই মহাজনেরটে জমা থুইস নাই কেনে? থুইলে সেই টাকা মুই কড়ায়-গন্ডায় সুদে-আসলে বুঝিয়া পালুং হয়।’

২৪ “যায় যায় বগলত খাড়া হয়া আছিলেক, উমারলাক আদেশ দিয়া কইলেক, ‘উয়ারটে থাকি এই টাকা নিয়া নেও, আর যায় দশ গুন লাভ করিচে উয়াকে এই টাকা দেও।’

২৫ “স্যোলা উমরা কইলেক, ‘মালিক! উয়ারটে তো এক-লাখ টাকা আছে।’

২৬ “রাজাটা উমারলাক কইলেক, ‘এইটা সচাং, যার আছে উয়াক আরো দেওয়া হইবে। কিন্তুক যার কোনয় নাই উয়ারটে থাকি বাকি কোনাও নেওয়া হইবে।

২৭ যাই হউক, এলা মোর শত্রুলা কোটে? মুই রাজা হয়া উমারলাক শাসন করং, এইটা মোর শত্রুলা চায় নাই। এই বাদে

শত্ৰুলাক মোর এইটে ধরি আনিয়া, মুখের আগত মারি ফেলোন।”

২৮ পাছত যীশু এইলা কতা শেষে করিয়া উমার আগে আগে যিরুশালেমের ওদি ঘাটা দিয়া যাবার ধরলেক।

২৯ যেলা উয়ায় জলপই পাহাড়ের বগলা-বগলি বৈৎফগী আর বৈথনিয়া গেরামের বগলত আসিলেক, সেলা দুই জন শিষ্যক এই কয়া পেঠেয়া দিলেক,

৩০ “তোমার সামনার ঐ গেরামটাত যাও, ওটেকোনা সোন্দের সমায় ঘাটার বগলত একটা গাধার বাচ্চা বান্দি থোয়া দেখির পাবেন। উয়ার পিটিত এলাও পর্যন্ত কাণ্ডো চড়ে নাই, দড়িখান হোসকেয়া গাধাটাক নিয়া আইসো।

৩১ কাণ্ডো যদি পোছে, ‘কে্যেনে এইটা হোসকের ধরচেন?’ তাইলে কন, ‘প্রভুর এইটা দরকার আছে।’”

৩২ আর যাক যাক পেঠা হইলেক, উমরা যায়া প্রভুর কতা মতন ঐ নাকানে দেখির পাইলেক।

৩৩ যেলা উমরা গাধাটার দড়িখান হোসকের ধরচে সেলা গাধাটার মালিকলা আসিয়া কইলেক, “তোমরা গাধার বাচ্চাটাক কে্যেনে হোসকেবার নাগচেন?”

৩৪ উমরা কইলেক, “এইটা প্রভুর দরকার আছে।”

৩৫ তার পাছত শিষ্যলা গাধার বাচ্চাটাক যীশুর ওটে ধরি আনিলেক, আর উমার নিজের দেহার গিলাপ গাধাটার পিটিত



পাড়ি দিয়া যীশুক বসাইলেক।

৩৬ যেহেতু যীশু গাধাটার পিটিত চড়ি যাবার ধরছিলেন, ভিঁরের মানষিলা ঘাটাত নিজের জামা কাপড় পাড়িয়া দিবার নাগিলেক।

৩৭ এই নাকান করি যেই ঘাটাটা জলপই পাহাড় থাকি নামি আসিচে যীশু ঐ ঘাটাত আসিলেক। যীশুর নগত অনেকলা শিষ্য আছিলেক। উমরা উয়ার মেলা অচানক মহাশক্তির কাম দেখিচে বুলিয়া, আনন্দে চিকিরিয়া ভগবানের গুণগান করির নাগিলেক।

৩৮ “জয় জয়কার! ভগবানের নামে যে রাজা আসিচে, তায় ধইন্য! স্বর্গত শান্তি আর ভগবানের গৌরব হউক।”

৩৯ ভিঁদের মানষিলা মইদ্রো থাকি কয়েক জন ফরীশী ধর্মগুরু যীশুক কবার নাগিলেক, “গুরু, তোমার শিষ্যলোক চুপ হবার কন! যাতে এই নাকান কতা না কয়!”

৪০ যীশু উমাক কইলেক, “মুই তোমারলাক কবার নাগচুং, যদি উমরা চুপ করি রয়, তাইলে এই দিনটাত ঘাটার শিললা চিকিরিয়া গুণগান করিবে।”

৪১ উমরা যেহেতু যিরুশালেম গঞ্জের বগলোত পৌছিলেক, সেহেতু যীশু গঞ্জটা দেখি কান্দিয়া কইলেক,

৪২ “হায় যিরুশালেম! শান্তির ঘাটা কি, এইটা আজি তুই যদি বুঝির পারিলু হয়! কিন্তুক এই ঘাটা তোর এলাও চোখের আওডালত।

৪৩-৪৪ ভগবান তোক বাঁচেবার বাদে আসিচে, কিন্তুক তুই বুঝির পাইস নাই। এই বাদে তোর উপরা এই নাকান দিন আসির ধরচে যে, তোর শত্রুলা চাইরো পাকে দেওয়াল বানেয়া মৌ মাছির নাকান করি ঘিরিয়া ধরিবে। উমরা তোক আর তোর সংসারক ধ্বংস করিবে। বাড়ি ঘরলার একটা খুটি আরেকটা খুটির উপরা থাকিবে না, তামান ধ্বংস হইবে। কেনেনা ভগবানের আইসার পরিকল্পনা তুই বুঝিবার পাইস নাই।”

৪৫ স্যেলা যীশু যিহুদীলার দশংগতি মন্দিরত সোন্দেয়া, যায় যায় ভিতরাত বেচা-কেনা করিবার ধরছিলেক, উমাক খেয়ে দিলেক।

৪৬ উয়ায় ওই ব্যবসায়ীলাক কইলেক, “শাস্ত্রত নেখা আছে, মোর ঘর হইবে ভগবানের প্রার্থনার ঘর। কিন্তুক তোমরা এইটাক চোর, ডাকুর আড্ডাখানা বানাইচেন।”

৪৭ এই ঘটনার পাছত যীশু সদায় দশংগতি মন্দিরত যায়া শিক্ষা দিবার নাগিলেক। প্রধান বামনলা, পন্ডিত মানষিলা, আর যিহুদী নেতালা যীশুক মারি ফ্যেলের ফন্দি করির নাগিলেক।

৪৮ কিন্তুক সউগ মানষি খুব মন দিয়া যীশুর পতিটা কতা শুনির নাগচে। এই বাদে উয়াক মারি ফ্যেলের কোন উপায় চান্দেয়া পাইলেক না।

২০ এক দিন যীশু যিহুদীলার দশংগতি মন্দিরত ভাল খবর শোনেয়া মানষিলাক শিক্ষা দিবার ধরচে। এই সমায় প্রধান

বামনলা, পন্ডিত মানষিলা আর যিহুদী নেতালা এক সাথে আসিয়া  
যীশুক পুছিলেক,

২ “হামাক কঃ তুই কিসের অধিকার দিয়া এইলা করির ধরচিস,  
কায় তোক অধিকার দিচে?”

৩ যীশু কইলেক, “মুইও তোমারলাক একটা প্রশ্ন পুছিম।

৪ দীক্ষাদাতা যোহন, জল দিয়া দীক্ষা দিবার অধিকার  
ভগবানেরটে থাকি পাইচে, না মানষিরটে থাকি পাইচে?”

৫ সেলো উমরা এক জন আরেক জনের নগত কওয়া-কয়ি  
করির নাগিলেক, “হামরা যদি কই, ভগবানেরটে হাতে, তাইলে  
উয়ায় কবে, যোহনের প্রচার বিশ্বাস করেন নাই কেনে?

৬ আর যদি কই, মানষিরটে হাতে, তাইলে সউগ মানষিলা  
হামাক শিল দিয়া ঢেলেয়া মারি ফেেলাবে। কেনেনা মানষিলা  
সগারে বিশ্বাস যোহন এক জন ভগবানের ভাববাদী আছিলেক।”

৭ এই বাদে উমরা কইলেক, “হামরা জানিনা।”

৮ সেলো যীশু কইলেক, “তাইলে মুইও কইম না, কিসের  
অধিকার দিয়া মুই এইলা করির ধরচুং।”

৯ যীশু সেলো মানষিলাক গল্প দিয়া কইলেক, “এক জন মানষি  
একখান আংগুরের খেত করিয়া চাষালাক আধিয়ারি দিয়া মেলা  
দিনের বাদে বিদেশ চলি গেইলেক।

১০ যেলা খেতের ফললার ভাগ নিবার সমায় হইলেক, সেলা এক জন চাকরক চাষালারটে পেঠাইলেক। কিন্তুক চাষালা উয়াক ডাঙেয়া খালি হাতে ফিরে পেঠেয়া দিলেক।

১১ সেলা মালিকটা আরেক জন চাকরক পেঠেয়া দিলেক, আর উয়াকও একে নাকান করি ডাঙেয়া অপমান করি খালি হাতে ফিরে পেঠাইলেক।

১২ ইয়ার পাছত তৃতীয় আরেক জন চাকরক পেঠাইলেক, কিন্তুক উমরা উয়াকও আধামারা করি খেতের বায়রাত ফেলেয়া দিলেক।

১৩ “সেলা আংগুর খেতের মালিক চিন্তা ভাবনা করিলেক, ‘মুই এলা কি করিম? ঠিক আছে মোর পরানের আদরের বেটাক পেঠাইম। হয় তো উমরা উয়াক সন্মান করিবে।’

১৪ “কিন্তুক চাষালা সেলা খেতের মালিকের বেটাক দেখিলেক, সেলা এক জন অইন্য জনাক কবার নাগিলেক, ‘আরে! মালিক মরিলে তো, সউগ সম্পত্তির মালিক উয়ায় হইবে। হামরা যাতে খেতের মালিক হমো, এই বাদে আইসো উয়াক মারি ফেলাই।’

১৫ এই কয়া উমরা আংগুর খেতের বায়রাত নিয়া যায়া মালিকের বেটাক মারি ফেলাইলেক। “তোমরা কি চিন্তা করেন, খেতের মালিক উমাক কি করিবে?

১৬ মালিকটা আসিয়া চাষালাক মারি ফেলাবে, আর আংগুর খেত অইন্য মানষিক দিবে।” এই উপমা শুনিয়া মানষিলা

কইলেক, “এই নাকান না হউক।”

১৭ কিন্তুক যীশু উমারলার ভিতি দেখিয়া কইলেক, “তাইলে শাস্ত্রত এই নাকান নেখার মানে কি? ‘রাজ মিস্ত্রিলা যেই খুটিটা বাতিল করি দিচে, ঐটায় হইচে ঘরের মূল খুটি।’

১৮ “কাণ্ডো যদি এই খুটির উপরাত পড়ে তাইলে উয়ায় টুকরা টুকরা হয়্যা যাবে, আর যার উপরাত এই খুটি পড়িবে উয়ায় গুড়া হয়্যা যাবে।”

১৯ যীশুর এই গল্পটা পন্ডিত মানষিলা আর প্রধান বামনলা শুনিতে কালে যীশুক ধরির চাইলেক। উমরা বুঝির পাইলেক যে, গল্পটা উমার বিরুদ্ধে কইচে। কিন্তুক উমরা মানষিলার ভয়ে যীশুক ছাড়িয়া দিলেক।

২০ ধর্মগুরু আর প্রধান বামনলা যীশুক নজর দিবার বাদে কয়জন গুপ্তচর পেঠাইলেক। ইমরা ধার্মিক মানষি সাজিয়া কতার মইন্দো দিয়া ফান্দোত ফ্যেলেবার চেষ্টা করে, যাতে যীশুক রোমীয় রাজ্যপালের হাতত ধরে দিবার পারে।

২১ উমরা আসিয়া কবার নাগিলেক, “হে গুরু, হামরা জানি তোমরা যা কতা কন আর শিক্ষা দেন ঐলা ঠিক। তোমরা মুখ চিনি মুগের ডাইল দেন না। তোমরা ভগবানের সঠিক ঘাটা মানষিক দেখান।

২২ কন দেখি! ভগবানের আইন অনুসারে রোমের মহারাজাক মাসুল দেওয়া হামার উচিত কি না?”

২৩ যীশু উমারলার চালাকি বুঝির পায়া কইলেক,

২৪ “পাইসাত এই ফটক কার? কার নাম এইটে নেখা আছে?”  
উমরা কইলেক, “রোমের মহারাজার।”

২৫ যীশু কইলেক, “তাইলে যেইটা মহারাজার পাওনা সেইটা  
মহারাজাক দেও। আর যেইটা ভগবানের পাওনা সেইটা ভগবানক  
দেও।”

২৬ এই কতা শুনিয়া উমরালা মানষিলার সামনাত যীশুর কোন  
দোষ ধরির পাইলেক না, বরং যীশুর কতা শুনি গুপ্তচরলা সগায়  
অচানক হয় চুপ করি রইলেক।

২৭ কয়জন সদ্বূকী দলের ধর্মগুরু যীশুরটে আসিলেক। এই  
সদ্বূকীলার বিশ্বাস, মরা মানষি কোন দিনও বত্তি উঠিবার পায়  
না। উমার মইন্ধে কয়জন ঠাট্টা করি পুছির নাগিলেক,

২৮ “হ্যে গুরু, মহাপুরুষ মোশি হামার বাদে এই কতা নেখিচে।  
যদি কোন এক জন মানষি ছাওয়া জন্ম না দিয়া আটকুরা হয়  
মরি যায়, তাইলে মরা মানষিটার বংশ বত্তের বাদে বিধুয়া  
মাইয়াটাক ঐ মরা মানষিটার ভাই বিয়াও করিবে।

২৯ বেশ ভাল! ধরেন কাণ্ডো সাত ভাই আছিলেক। পইলা জন  
বিয়াও করি আটকুরা হয় মরি গেইলেক।

৩০-৩১ সেলো দ্বিতীয় আর তার পাছত তৃতীয় ভাই, একে নাকান  
করি সাত ভাইয়ে ঐ বিধুয়াটাক বিয়াও করি আটকুরা হয় মরি  
গেইলেক।

৩২ শেষত ঐ বিধুয়াটাও মরি গেইলেক।

৩৩ সাত ভাইয়ে তো ঐ বিধুয়াটাক বিয়াও করিচে। তাইলে হামার প্রশ্ন হইলেক, ভগবান যেলা সউগ মরা মানষিক বত্তে তুলিবে সেলা ঐ বিধুয়াটা কার মাইয়া হইবে?”

৩৪ যীশু কইলেক, “বিয়াও এই যুগের মানষির বাদে। উমরা বিয়াও করে বিয়াও দেয়।

৩৫-৩৬ কিন্তুক একটা নয়া যুগ আসির ধরচে, আর ঐ সমায় কিছু কিছু মানষির মরণ থাকি বত্তি উঠিবার যোগ্যতা হইবে। বত্তি উঠিয়া উমরা নয়া যুগত সোন্দেয়া বিয়াও করিবে না আর বিয়াও দিবেও না। নয়া যুগত আর কোন দিনও মরিবে না, বরং স্বর্গদূতলার সমান হইবে, ভগবানের ছাওয়ালা।

৩৭-৩৮ যাই হউক, এলা মুই মরা মানষির বত্তি উঠার বিষয়োত খানিক কইম। মহাপুরুষ মোশি এইটা প্রমাণ করিচে যে, মরা মানষি সচাং করি বত্তি উঠিবে। মোশির জীবনের ঐ জ্বলন্ত ঝোপের গল্প দেখেন। ঐটেকোনা মোশি পরমপ্রভুক এই কয়া ডেকাইলেক, অব্রাহামের ভগবান, ইসহাকের ভগবান আরো যাকবের ভগবান। এই তিন জন যদিও মেলা দিন আগত মরিচে, তাঙো উমরালা ভগবানের নজরত বত্তি আছে। সগায় ভগবানের নজরত বত্তি আছে। এই বাদে মোশি ভগবানক ‘অব্রাহামের, ইসহাকের আর যাকবের ভগবান কয়া ডেকাইলেক।”

৩৯ সেলো কয়েক জন পন্ডিত মানষি কইলেক, “হ্যে গুরু, তোমরা খুব ভাল কইলেন।”

৪০ ইয়ার পাছত যীশুক প্রশ্ন পুছির সদ্বূকী আর পন্ডিত মানষিলার কারো সাহস হইলেক না।

৪১-৪৪ যীশু ধর্মগুরুলাক পুছিলেক, “মানষিলা কয় কি, ভগবানের বাছাই করা রাজাটা মহারাজা দায়ূদের বংশধর। কিন্তুক এইটা কেমন করি হবার পারে? দায়ূদ তো নিজেই বাছাই করা রাজাটাক, ‘মোর মালিক’ কয়া ডেকাইলেক, তাইলে বংশধরক কি মালিক কওয়া যায়? তোমরা সনাতন পবিত্র শাস্ত্রের গীতসংহিতাত দেখেন। দায়ূদ নেখিচে, পরম প্রভু মোর মালিকোক কইলেক, যতক্ষণ মুই তোর শত্রুলাক তোর ঠেংএর তলাত না থোং, ততক্ষণ মোর ডাইন পাকে বইসেক। “এই নাকান দায়ূদ কেনে কয় যে, তাইলে ভগবানের বাছাই করা রাজাটা কেমন করি মহারাজা দায়ূদের বংশধর হবার পারে?”

৪৫ মানষিলা যেলো যীশুর কতা শুনির ধরচে, সেলো যীশু উয়ার শিষ্যলোক কইলেক,

৪৬ “তোমরা পন্ডিত মানষিলা থাকি সাবধান রন। উমরা গেরুয়া বসন পিন্দিয়া হাট-বাজারত সন্মান পাবার চায়। উপাসনা ঘরত প্রধান প্রধান আসনত আরো ভোজের সমায় সন্মানের জাগাত বসিবার চায়।



৪৭ উমরা বিধুয়ার ধন-সম্পত্তি দখল করে, আর মানষিক দেখের বাদে অনেকক্ষণ ধরি প্রার্থনা করে। এই বাদে বিচারের সমায় অইন্য মানষির চাইতে ইমার বেশী শাস্তি হইবে।”

২১ ইয়ার পাছত যীশু চায়া দেখিলেক যে, ধনী মানষিলা উমার নিজের ধনের ভান্ডর থাকি মন্দিরের দানের বাস্কত দান করির ধরচে।

২ এই সমায় এক জন দীন দুঃখী বিধুয়াক, দুই পাইসা দান করির দেখিলেক।

৩ এই দেখিয়া যীশু শিষ্যলোক কইলেক, “মুই তোমাক সচাং করি কবার ধরচুং, সগারে চায়া এই বিধুয়াটা বেশী দান করিচে।

৪ কেনেনা অইন্য মানষিলাও উমার বাড়তি ধন থাকি দান করিচে। কিন্তুক এই বিধুয়াটা যদিও গরীব তাঙো উয়ার জীবন যাপনের বাদে যেকিনা সম্বল আছিলেক, সেকিনায় ভগবানক দান করিচে।”

৫ কয়েক জন শিষ্য দশংগতি মন্দিরটার বিষয়ে কতা কবার ধরচে, “কি সুন্দর সুন্দর শিল, আর দামী দামী দানের অলংকার দিয়া মন্দিরটা সুন্দর করি সাজেয়া বানাইচে।” সেয়া যীশু কইলেক,

৬ “তোমরা তো বড় বড় মন্দির দেখির নাগচেন, কিন্তুক এমন দিন আসির ধরচে, যেয়া সউগ ভাঙি ফেলা হইবে! এমন কি,

একটা শিল আরেকটা শিলের উপরাত থাকিবে না!”

৭ অচানক হয় শিষ্যলো যীশুক পুছিলেক, “গুরু, কোন সমায় এই ঘটনাটা ঘটিবে? কি নাকান চিন দেখি হামরা বুঝির পামো যে, এইলা পূরণ হয় আসির ধরচে?”

৮ যীশু কইলেক, “সাবধান! কাণ্ডো যাতে তোমাক ভুল ঘাটাত নিয়া না যায়। মেয়ো মানষি ভন্ডামি করি মোর নাম নিয়া আসিয়া কবে, মুইয়ে ভগবানের বাছাই করা রাজা। বিনাশের সমায় আসি গেইচে। কিন্তুক তোমরা উমার পাছত না যান।

৯ তোমরা যুদ্ধের খবরা খবর শুনির পাইবেন। পইলাতে এই ঘটনালা ঘটিবে, কিন্তুক ইয়ার মানে এই না হয় যে, হঠাৎ করি এই যুগ শেষ হইবে। এইলা ঘটিলেও তোমরা ভয় না খান।

১০ এক জাতি অইন্য জাতির বিরুদ্ধে, এক রাজ্য অইন্য রাজ্যের বিরুদ্ধে নড়াই করিবে।

১১ খুব বড় বড় ভৈচাল হইবে, কোন কোন জাগাত মঙ্গা আর মড়কও দেখা দিবে। দ্যাওয়াত বড় বড় ভয়ংকর চিন দেখা যাবে।

১২ কিন্তুক এই ঘটনা হবার আগত তোমারলাক শত্রুর হাতত ধরিয়া দিয়া অইত্যাচার করিবে। বিচারের বাদে উপাসনা ঘরত ধরি নিয়া সাঁপে দিয়া তোমাক জেলত দিবে। মোর বাদে তোমারলাক দেশের রাজ্যপালের আর রাজালার আগত টানা ছেঁচড়া করিয়া খাড়া করিবে।

১৩ ইয়াতে তোমরা মোর প্রতি বিশ্বস্তের সাক্ষী দিবার সুযোগ পাবেন।

১৪-১৫ ঐ সমায় মুই তোমারলার মুখত জ্ঞানের কতা যোগে দিম যার উত্তর তোমার শত্রুলা দিবার পাইবে না। উমরা অস্বীকারও করিবার পাইবে না। এই বাদে ঐ সমায় কি কবার নাগিবে, এইলা চিন্তা করেন না।

১৬ “তোমার মাও-বাপ, সাগাই-সোদর, ভাই, বন্ধু-বান্ধব বিশ্বাস ঘাতকতা করি তোমাক ধরে দিবে। তোমারলার মইদ্বো থাকি কাণ্ডোকো কাণ্ডোকো মারি ফেলাবে।

১৭ মোর শিষ্য হবার জইনে সগায় তোমাক ঘিন করিবে।

১৮ কিন্তুক তোমারলার একটা চুলিও কাণ্ডো ক্ষতি করির পাইবে না।

১৯ তোমরালা যদি মোর প্রতি বিশ্বাসে থির থাকেন, তাইলে অমৃত জীবন পাইবেন।”

২০ “যেহা যিরুশালেমোত শত্রুর সৈন্যলা ঘিরিয়া ধরিবে, সেহায়া বুঝিবেন যিরুশালেমের বিনাশের সমায় আসিচে।

২১ সেহায়া যায় যায় যিহুদীয়া প্রদেশত আছে, উমরা পাহাড়ি এলাকাত পালেয়া যাউক। যায় যিরুশালেম গঞ্জত আছে উমরা গঞ্জের বায়রাত চলি যাউক, যায় যায় গেরামত আছে উমরা কোন মতে গঞ্জত না আসুক।

২২ কেনেনা সেই সময় ভগবান যিরূশালেমের মানষিলাক শাস্তি দিবে। ভগবানের ভাববাদীলার যেইলা কতা শাস্ত্রত নেথি গেইচে সেইলা পূরণ হইবে।

২৩ ঐ দিনলাত যেইলা গাওভারী বেটিছাওয়া আছে, যেইলা বেটিছাওয়া ছাওয়াক দুধ খোয়ায় উমারলার অবস্থা কত না বেয়া হইবে! কেনেনা দুনিয়াত দারুন কষ্ট হইবে আর এই মানষিলাক উপরাত ভগবানের ভয়ংকর গোসা নামি আসিবে।

২৪ কাণোকো কাণোকো শত্রু সৈন্যের তলোয়ার দিয়া মারি ফেলা হইবে, কাণোকো কাণোকো বন্দী করিয়া নানান দেশের মইন্ধোত ছড়াছড়ি করিয়া থুবে। যত দিন না এই বিধর্মী মানষিলাক সময় পূরণ হয়, ততদিন এই যিরূশালেমক উমার ঠেংয়ের তলত থুবে।”

২৫ “সেলা দ্যাওয়া, বেলা, চান, তারালার, নানান চিন দেখা যাবে। দুনিয়ার সউগ জাতি কষ্ট পাবে আরো সাগরের গর্জন শুনিয়া ভয়ংকর ঢেউ দেখিয়া মানষিলা অস্থির হইবে।

২৬ দ্যাওয়াত যেইলা মহাশক্তি আছে, ঐলা উল্টা পাল্টা হয় পড়িবে। আর এইটা দেখিয়া দুনিয়াত কি ভয়ংকর অবস্থা আইসেচে ঐলা কতা চিন্তা করিয়া মানষিলা হাতাসে অজ্ঞান হয় যাবে।

২৭ সেই সময় মেঘের উপরাত মহাশক্তি নিয়া, জাকজমকের সাথত বেলার ঝিলিকের নাকান করি সগায় বাছাই করা

মানষিটাক আসির দেখিবে।

২৮ তোমরা এইলা ঘটনা ঘটির দেখিলে, উপরার ভিতি নজর দিয়া সিদা হয় খাড়া হন। কেনেনা তোমারলার উদ্ধারের সমায় বগলা-বগলি আসিচে।”

২৯ ইয়ার পাছত যীশু একটা গল্প দিয়া কইলেক, “ডুমুর গছ বা অইন্য যে কোন গছ দেখা।

৩০ উয়ার ঠাইল নরম হয় কুশি বিরাইলে তোমরা জানির পাবেন গরম কাল বগলা-বগলি আসিচে।

৩১ আর এই নাকান করি তোমরা যেলা দেখিবেন মোর কতার নাকান সউগ ঘটিবার নাগচে, সেলায় বুঝির পাবেন যে, ভগবানের শাসন ব্যবস্থা শুরু হবার বেশী দেড়ি নাই।

৩২ মুই তোমারলাক সচাং করি কবার ধরচুং, এই ঘটনালা না হওয়া পর্যন্ত এই কালের বংশের শেষ হবার না হয়।

৩৩ দ্যাওয়া, দুনিয়া ধ্বংস হইবে, কিন্তুক মোর কতা চিরকাল থাকিবে।”

৩৪ “তোমরা নিজের বিষয় সাবধান হন! এই শেষ কালের দিনটা দুনিয়াত বসবাস করে সগারে উপরাত আসি পড়িবে। এই বাদে তোমরা এই দুনিয়ার রঙে-রসে, মাতলামি বা সংসারের চিন্তায় ডুবিয়া না যান।

৩৫ যদি যান তাইলে পখি মারির বাদে, ফান যেই নাকান করি হঠাৎ বন্ধ হয়, সেই নাকান করি তোমারলার উপরাত আসিয়া

পড়িবে।

৩৬ “এইলা ঘটনা ঘটিবে। কিন্তুক তোমাক রক্ষা পাবার বাদে ঘটনালা পার হয় বাছাই করা মানষিটার আগত খাড়া হবার শক্তি কেমন করি পাবেন। তোমরা সজাগ থাকিয়া সউগ সমায় প্রার্থনা করেন।”

৩৭ যীশু এই নাকান শিখাইলেক। এই দিনলার মইন্ধোত উয়ায় সদায় দশংগতি মন্দিরত যায়া শিক্ষা দিলেক, আর রাইতোত জলপই পাহাড়ত আসিয়া থাকিলেক।

৩৮ আর খুব সাকালে সউগ মানষি উয়ার উপদেশ শুনিবার বাদে মন্দিরত আসির নাগিলেক।

২২ সেই সমায় যিহুদীলার বিশেষ রুটি খাওয়ার পার্বন আসিচে। ইয়াকে কওয়া হয় মুক্তি ভোজের পার্বন।

২ এই সমায় প্রধান বামনলা আর পন্ডিত মানষিলা ভিড়ের মানষিলাক ভয় করে বুলিয়া যীশুক গোপনে মারি ফেলের ফন্দি করির চাইলেক।

৩-৪ যীশুর বারো জন শিষ্যের মইন্ধোত ইষ্কোরিয়োটের যুদাস এক জন। উয়ার ভিতরাত শয়তান-অসুর সোন্দেয়া চালনা করি প্রধান বামনলার আর মন্দিরের পাহারাদারলার-টে নিয়া গেইলেক। কেংকরি যীশুক উমার হাতত ধরি দিবে, এইটা নিয়া আলোচনা করিলেক।

৫ উমরালা উয়ার কতা শুনিয়া খুশি হয়। উয়াক টাকা দিবার বাদে রাজি হইলেক।

৬ যুদাস-ও রাজি হইলেক। আর মানষির ভিড় যেহেতু না থাকিবে যীশুক ধরেয়া দিবার বাদে যুদাস এই নাকান সমায় চান্দের নাগিলেক।

৭ যিহুদীলার বিশেষ রুটির পার্বনের দিন আসিলেক। এই দিনে মুক্তি ভোজের ভেড়ার বাচ্চা বলি দেওয়া হয়।

৮ যীশু সেহেতু যোহন আর পিতরক এই কয়া পেঠাইলেক, “হামরা যাতে একটে বসিয়া মুক্তি ভোজ খাবার পামো এইটার ব্যবস্থা কর।”

৯ শিষ্যলো যীশুক কইলেক, “ভোজের খাবার ব্যবস্থা কোটেকোনা করিমু? তোমার ইচ্ছা কি?”

১০ উয়ায় কইলেক, “শোন, তোমরা যেহেতু গঞ্জত সোন্দাবেন, সেহেতু একটা মানষিক কলসিত করি জল নিয়া যাবার দেখিবেন। উয়ার পাছে পাছে যান। উয়ায় যেই বাড়িত সোন্দাবে,

১১ ঐ বাড়ির মালিকক এই কতা কন। গুরু তোমাক কইচে, ‘মুই মোর শিষ্যলার সাথত মুক্তি ভোজ খাবার পাং ঐ ডারি ঘরটা কোটে?’

১২ সেহেতু মানষিটা দোতলাত একটা বড় সাজে থোয়া ঘর দেখেয়া দিবে, ওটেকোনা ভোজের সউগ কিছুই ব্যবস্থা করেন।”

১৩ উমরা চলি গেইলেক। আর যীশু যেই নাকান কইচে, উমরা ঐ নাকান সউগে দেখির পাইলেক। আর উমরা মুক্তি ভোজের সউগ কিছু ব্যবস্থা করিলেক।

১৪ ঠিক সময় যীশু নিজের খবরিয়ালার সাথত খাবার বসিলেক,

১৫ আর কইলেক, “মোর কষ্ট ভোগ করার আগত তোমারলার সাথত মুক্তি ভোজ খাবার খুব ইচ্ছা।

১৬ মুই তোমারলাক কবার ধরচুং, ভগবানের শাসন ব্যবস্থা যেলা চালু করা হইবে সেলা মুক্তি ভোজের উদ্দেশ্য পূরণ হবেই। এই উদ্দেশ্য কিন্তুক পূরণ না হওয়া পর্যন্ত মুক্তি ভোজ আর খাইম না।”

১৭ ইয়ার পাছত যীশু একটা নোটা নিয়া ভগবানক ধন্যবাদ দিয়া কইলেক, “তোমরালা এই আংগুরের রস ভাগ করি খাও।

১৮ মুই তোমারলাক কবার ধরচুং, ভগবানের শাসন ব্যবস্থা চালু না হওয়া পর্যন্ত আর কোন দিন আংগুরের রস খাইম না।”

১৯ তার পাছত রুটি নিয়া ভগবানক ধন্যবাদ দিলেক। আর রুটিখান টুকরা টুকরা করি শিষ্যলার হাতত দিয়া কইলেক, “এই রুটিখান নেও, এইখান মোর দেহা তোমারলার বাদে সঁপে দেওয়া। মোক ফম করির বাদে এই নাকান করেন।”

২০ খাবার পাছত আর একবার নোটা নিয়া কইলেক, “তোমারলার বাদে মোর নিজের অন্ত্র গতে দিম, আর ইয়াতে



নয়া চুক্তি শুরু হইবে। এই নোটাত যেইলা রস আছে, ঐলা হইলেক নয়া চুক্তির চিন।

২১ কিন্তুক দেখ, যায় মোক ধরে দিবে উয়ায় এলা বন্ধুর নাকান করি মোর সাথত খাবার ধরচে।

২২ ভগবান যেই নাকান করি ঠিক করি থুইচে, ঐ নাকান করি মোক মরির নাগিবে। কিন্তুক হয় যেই মানষিটা মোক শত্রুর হাতত দিবে!”

২৩ শিষ্যলা উদাস হয়। এক জন অইন্য জনক পুছিবার নাগিলেক, “হামার মইন্ধোত কায় এই নাকান করির পারে?”

২৪ সেলো কি হইলেক? শিষ্যলার মইন্ধোত কাক বড় কওয়া হইবে, এই নিয়া উমরলা তর্কা-তর্কি করির নাগিলেক।

২৫ যীশু কইলেক, “বিধর্মীলার রাজালা প্রজালা উপরাত ক্ষমতা দেখায়, যেই নাকান বড় মাছ ছোট মাছক ধরি খায়। তাণ্ডো উমরলাক হিতকারী কওয়া হয়।

২৬ কিন্তুক তোমারলার মইন্ধোত এই নাকান হওয়া ঠিক হইবে না। তোমার মইন্ধোত যায় বড়, উয়ায় সউগ চায়া ছোট পদ নেউক। আর যায় নেতা উয়ায় চাকরের নাকান সেবা করুক।

২৭ মানষিলা কি চিন্তা করে, কায় বড়? যায় খাবার বইসে, না যায় যতন করি খাবার দেয়? কিন্তুক মোর প্রতি দেখেন, মুই তোমার মইন্ধোত চাকরের সমান।

২৮ মোর নানা নাকান পরীক্ষার সমায় তোমরায় তো সউগ সমায় মোর সাথে সাথে রইচেন।

২৯ মোর স্বর্গের বাপ মোক রাজা হিসাবে শাসন করির অধিকার দিচে। আর মুই ঐ নাকান অধিকার তোমাকো দিবার নাগচুং।

৩০ এমন কি মোর শাসন যেলা শুরু হইবে সেই সমায় তোমরা মোর নগত টেবিলত বসিয়া খাওয়া-দাওয়া করিবেন। আরো তোমরা সিংহাসনত বসিয়া ইজ্রায়েলের বারোটা গুষ্টির বিচার করিবেন।”

৩১ “শিমোন, শিমোন, দেখা! শয়তান-অসুর তোমারলাক সরিষার ভুসির নাকান করি চালনি দিয়া চাইলি নিকলির চাইচে।

৩২ কিন্তুক মুই তোর বাদে প্রার্থনা করিচুং যাতে তোর বিশ্বাসের অভাব না হয়। তুই যেলা পস্তেয়া বিশ্বাসে ফিরি আসিবু, সেলা তোর ভাইলাক বিশ্বাসে শক্তিশালী করিস।”

৩৩ পিতর যীশুক কইলেক, “গুরু! মুই তোমার সাথত জেলত যাবার, এমন কি মরিবার বাদেও প্রস্তুত আছং।”

৩৪ যীশু কইলেক, “পিতর, আজি রাতি মুরগা ডেকার আগত তিন বার তুই মোক চিনিস না কয়া অস্বীকার করিবু।”

৩৫ তার পাছত যীশু উয়ার অধিকার দেওয়া খবরিয়ালাক কইলেক, “মুই তোমারলাক বায়রাত ভাল খবর প্রচার করির বাদে পেঠাইচুং। সেই সমায় তোমার ঘুরিবার বাদে ঝোলা, টাকা-পাইসা, আর জুতা কোন কিছুই নেন নাই। সেলা কি তোমারলার

অভাব হইচে?” উমরা কইলেক, “না, কোন কিছুর অভাব হয় নাই।”

৩৬ যীশু কইলেক, “কিন্তুক এলা মুই তোমারলাক কইম, যার ঘুরিবার ঝোলা আছে উয়ায় ঐটা নেউক, যার টাকা আছে উয়ায় টাকা-পাইসা নেউক। যার ছোরা নাই উয়ায় উয়ার গিলাপ বেচেয়া নিজের আত্ম-রক্ষার জইন্যে একখান ছোরা কিনুক।

৩৭ কেনেনা এলা মোর জীবনত শাস্ত্রের এই নেখা পূরণ হবার নাগচে যে, ‘উয়াক ডাকু হিসাবে গন্য করা হইবো।’ হ্যে, শাস্ত্রত মোর সমন্ধে যত নেখা ছিল, সউগ পূরণ হবার নাগচে।”

৩৮ শিষ্যলা কইলেক, “গুরু, দেখেন হামারটে দুইখান ছোরা আছে।” যীশু কইলেক, “থাউক।”

৩৯ ইয়ার পাছত যীশু নিজের নিয়ম মতন জলপই পাহাড় গেইলেক, আর শিষ্যলাও উয়ার পাছে পাছে যাবার ধরচে।

৪০ ওটেকোনা পৌছিয়া উয়ায় শিষ্যলাক কইলেক, “তোমরা প্রার্থনা করেন যাতে টানা হেচড়ার পরীক্ষাত না পরেন।”

৪১ তার পাছত যীশু শিষ্যলার থাকি কিছু দূরত যায়া হাংকুড়া পাড়ি প্রার্থনা করির নাগিলেক,

৪২ “হে মোর ভগবান! হে মোর বাপধন! যদি তোর ইচ্ছা হয়, তাইলে এই দুঃখের বোঝা মোরটে থাকি নিয়া যা। এইটা মোর ইচ্ছায় না হউক, তোর ইচ্ছায় হউক।”

৪৩ আর ভগবান শক্তি যোগেবার বাদে যীশুরটে এক জন স্বর্গদূতক পেঠাইলেক।

৪৪ মনের কষ্টে যীশু আকুল হয় প্রার্থনা করির ধরচে। আর উয়ার দেহার ঘাম অক্তের নাকান টোপ-টোপ করি মাটিত পড়ির নাগিলেক।

৪৫ প্রার্থনা শেষ করি যীশু শিষ্যলারটে আসিয়া দেখিলেক, উমরা মনের দুঃখে নিন গেইচে।

৪৬ যীশু উমরলাক কইলেক, “কেনে নিন যাবার নাগচেন? উঠ, প্রার্থনা কর, যাতে শয়তানের পরীক্ষাত না পরেন।”

৪৭ যীশুর কতা কওয়া শেষ না হইতে কালে, মেয়ো মানষিক নিয়া যুদাস ওটেকোনা আসিলেক। বারো জন শিষ্যে মাঝিলাত যুদাস এক জন। উয়ায় মানষিলা নতা হয় আগে আগে আসিচে। (যীশুক ধরেয়া দিবার বাদে যুদাস একটা চিন ঠিক করিয়া দিচে। উয়ায় কইচে, “মুই যাক চুমা খাইম উয়ায় সেই মানষিটা।”) এই বাদে যুদাস চুমা খাবার বাদে যীশুরটে আসিলেক।

৪৮ যীশু সেয়ো কইলেক, “যুদাস তুই কি চুমা খায়া বাছাই করা মানষিটাক ধরেয়া দিবার নাগচিস?”

৪৯ সেয়ো কি ঘটিবার নাগচে এইটা যীশুর অইন্য শিষ্যলা টের পায়া কইলেক, “গুরু, হামরা কি ছোরা দিয়া মারিমু?”

৫০ উমার মইদ্বোত এক জন শিষ্য মহাবামনের চাকরের ডাইন কানটা কাটি ফেলাইলেক।

৫১ যীশু কইলেক, “থামো! থামো! ছোরা চালেবার আর দরকার নাই।” এই কতা কয়া চাকরের কানটা নারিয়া উয়াক ভাল করিলেক।

৫২ প্রধান বামনলা, মন্দিরের পাহারাদারলা আর যিহুদী নেতালা যীশুক ধরির আসিচে। যীশু উমারলাক কইলেক, “মুই কি ডাকু! ডাকু ধরির বাদে মানষি যেই নাকান করি ছোরা, নাটি নিয়া যায়, তোমরা মোক ধরির বাদে এই নাকান করি আসচেন।

৫৩ মুই তো পতিদিন তোমারলার সাথত মন্দিরত ছিলুং। সেয়া তোমরা মোক ধরেন নাই কেনে? কিন্তুক এলা এই সময়টা তোমারে, শয়তান-অসুরের শাসন দেখা যাবার ধরচে।”

৫৪ উমরা যীশুক ধরিয়া মহাবামনের বাড়িত নিয়া গেইলেক। পিতর দূর থাকি পাছে পাছে যাবার নাগিলেক।

৫৫ মহাবামনের আগিনার মইদ্বোত অগুন জ্বলেয়া মানষিলা চাইরো পাকে বসিলেক। পিতরও আসিয়া উমার বগলোত বসিলেক।

৫৬ এক চাকরানী পিতরক অগুনের আলোত দেখির পায়া ভাল করি দেখিয়া কইলেক, “আরে! এই মানষিটাও যীশুর সঙ্গী আছিলেক।”

৫৭ পিতর অস্বীকার করি কইলেক, “তোমরা কি কবার ধরচেন বইনি? মুই তো উয়াক চেনং না!”

৫৮ খানিক পাছত আরেক জন মানষি পিতরক দেখিয়া কইলেক, “ঐ সমায় তুইও উমারলার সাথত ছিলু।” পিতর কইলেক, “না বাহে! মুই না হং।”

৫৯ ঘণ্টা খানিক পাছত আরেক জন মানষি জোর দিয়া কইলেক, “সচাং করি এই মানষিটাও যীশুর সাথত আছিলেক। ইয়াও তো গালীল প্রদেশের মানষি।”

৬০ পিতর কইলেক, “আরে ভাই! তোমরা কি কবার নাগচেন মুই তো কিছুই জানং না!” এই কতা কওয়া শেষ না হইতে কালে মুরগা ডাকি উঠিল।

৬১ সেলায় প্রভু পিতরের ভিত্তি চায়া দেখিলেক, আর পিতরেরও মনে হইলেক প্রভু কইছিল, “কালি মুরগা ডেকার আগত তুই মোক তিন বার অস্বীকার করিবু যে, তুই মোক চিনিস না।”

৬২ মনে হইতে কালে পিতর বায়রাত যায়া খুব কান্দিবার নাগিলেক।

৬৩ যেই মানষিলা যীশুক ধরছিলেক, উমরা উয়াক ডাঙেয়া টিটকারি করির নাগিলেক।

৬৪ উমরা যীশুর চোখুত কাপড় বান্দিয়া কবার নাগিলেক, “তুই না ভগবানের ভাববাদী? কঃ দেখি, তোক কায় ডাঙাইলেক?”

৬৫ উমরা অপমান করির বাদে নানা নাকানের কতা কইলেক।

৬৬ যেলা দিন হইলেক সেলা যিহুদীলার বুড়া নেতালা, প্রধান বামনলা আর পন্ডিত মানষিলা জোটো হইলেক। উমরা যীশুক মহাসভাত আনিয়া পুছিলেক,

৬৭ “তুই কি ভগবানের বাছাই করা রাজা?” যীশু কইলেক, “মুই সচাং কইলেও তোমরা বিশ্বাস করিবেন না।

৬৮ আর মুই তোমারলাক কোন পুছিলে উত্তরও দিবেন না।

৬৯ কিন্তুক এলা থাকি এই বাছাই করা মানষিটা মহা শক্তিমান ভগবানের ডাইন পাকে বসি থাকিবে।”

৭০ উমরা সগায় কইলেক, “তাইলে তুই কি ভগবানের বেটা?” আর যীশু কইলেক, “তোমরালায় কবার নাগচেন মুইয়ে!”

৭১ উমরালা কইলেক, “এলা হামার সাক্ষীর আর দরকার নাই। হামাক তো উয়ায় নিজেই কইলেক।”

২৩ সভা শেষে করিয়া সগায় যীশুক রোমের রাজ্যপাল পীলাতের ওটে নিয়া গেইলেক।

২ আর উমরা যীশুর বিরুদ্ধে নালিশ জানেয়া কবার নাগিলেক যে, “এই মানষিটা হামার জাতিক বেয়া ঘাটাত নিয়া যাবার ধরচে। আরো মানষিলা যাতে মহারাজাক মাসুল না দেয় এই কতা প্রচার করির ধরচে। উয়ায় নিজক বাছাই করা রাজা কয়া দাবি করে।”

৩ এই শুনিয়া রাজ্যপাল যীশুক পুছিলেক, “তুই কি যিহুদীলার রাজা?” যীশু কইলেক, “তুই তো নিজেই কবার ধরচিস।”

৪ সেয়া রাজ্যপাল পীলাত প্রধান বামনলার আর ভিডের মানষিলার ভিতি দেখিয়া কইলেক, “মুই তো এই মানষিটার কোন দোষ খুজিয়া দেখির পালুং না।”

৫ উমরানা রাজ্যপালের কতা শুনিয়া জোর করি কবার নাগিলেক, “এই মানষিটায় তামান যিহুদীয়া প্রদেশের, গালীল থাকি শুরু করিয়া যিরুশালেম পর্যন্ত শিক্ষা দিয়া সরকারের বিরুদ্ধে মানষিক ক্ষেপেয়া তুলিচে। এলা এটেকোনা আইসচে।”

৬ এই কতা শুনিয়া পীলাত জানির চাইলেক, যীশু গালীল প্রদেশের মানষি কি না?

৭ পীলাত জানির পাইলেক রাজা হেরোদের অধীনত যে অঞ্চল আছে, যীশু ওটেকার মানষি। ঐ সমায় হেরোদ যিরুশালেমত আছিলেক। এই বাদে পীলাত যীশুক হেরোদেরটে পেঠেয়া দিলেক।

৮ রাজা হেরোদ যীশুক দেখি খুব খুশি হইলেক, কেনেনা উয়ায় যীশুর সমন্ধে মেলা কতা শুনিচে। এই বাদে উয়ার মেলা দিন থাকি যীশুক দেখিবার আশায় আছিলেক। যাতে উয়ায় যীশুরটে হাতে কোন অচানক চিনের কাম দেখির পাবে।

৯ রাজা হেরোদ যীশুক মেলা প্রশ্ন পুছিলেক, যীশু কিন্তুক কোন উত্তর দিলেক না।



১০ ওটেকোনা পন্ডিত মানষিলা আর প্রধান বামনলা খাড়া হয়।  
চিকিরিয়া যীশুক দোষ দিবার নাগিলেক।

১১ রাজা হেরোদ আর উয়ার সিপাইলা যীশুক অপমান আরো  
ঠাট্টা করিয়া রাজার নাকান কাপড় প্যেন্দেয়া পীলাতের  
ওটেকোনা প্যেঠেয়া দিলেক।

১২ ইয়ার আগত পীলাত আর রাজা হেরোদ সাপে নেউলের  
নাকান শত্রুয়ামি আছিলেক। কিন্তুক এই দিন থাকি উমরা  
দুইজনে সখা হইলেক।

১৩ পীলাত সেলো প্রধান বামনলাক, নেতালাক আর সাধারন  
মানষিলাক এক সাথে ড্যেকেয়া কইলেক,

১৪ “তোমরা এই মানষিটাক মোর এটেকোনা নিয়া আসিয়া দোষ  
দিবার ধরচেন, যে ইয়ায় মানষিলাক সরকারের বিরুদ্ধে ক্ষ্যেপেয়া  
তুলিবার ধরচে। কিন্তুক মুই উয়াক তোমার আগত জেরা করিয়া  
দেখলুং। তোমরা যে দোষ দিবার ধরচেন, এইলার কোনোটাও তো  
উয়ার দোষ প্রমাণ হয় নাই, উয়ায় নির্দোষ।

১৫ এমন কি রাজা হেরোদ উয়ার কোন দোষ না পায়া ফির মোর  
এটেকোনা প্যেঠেয়া দিচে। তোমরালা দেখিবার নাগচেন মারি  
ফ্যেলার মতন উয়ার কোন দোষ নাই।

১৬ এই বাদে মুই উয়াক খুব চাবুক মারিয়া ছাড়ি দিম।”

১৭-১৮ এই কতা শুনিয়া ভিডের মানষিলা এক সাথে চিকিরিয়া  
কবার নাগিলেক, “উয়াক মারি ফ্যেলাও! আর হামার জইন্যে

বারাব্বাক জেল থাকি ছাড়ি দেও।”

১৯ বারাব্বাক যিরুশালেমত খুন, দেশ দ্রোহিতার কাম করির বাদে জেলত বন্দী করি থোয়া হয়।

২০ পীলাতের ইচ্ছা আছিলেক যীশুক ছাড়ি দিবার। এই বাদে মানষিলার সাথত আরো আলোচনা করিলেক।

২১ কিন্তুক মানষিলা চিকিরিয়া কবার নাগিলেক, “উয়াক ক্রুশত দেও! ক্রুশ খুটাত টাঙেয়া থোন!”

২২ তিন বারের বার পীলাত মানষিলাক কইলেক, “ক্যেনে? উয়ায় কি দোষ করিচে? মরণের দন্ড দিবার নাকান মুই তো উয়ার কোন দোষ দেখোং না। এই বাদে মুই উয়াক চাবুক মারিয়া ছাড়ি দিম।”

২৩-২৪ কিন্তুক মানষিলা চিকিরিয়া দাবি করিতেই থাকিল, উয়াক খুটিত টাঙেয়া থোন, শেষত পীলাত মানষিলার কতা মানি নিবার বাধ্য হইলেক। আর মানষিলার জয় হইলেক।

২৫ যাক খুন আর দেশ দ্রোহিতার বাদে জেলত থোয়া হইচে। উয়াকে জেল থাকি মুক্তি দেওয়া হইলেক। কিন্তুক যীশুক মানষিলার ইচ্ছায়, পীলাত উমারলার হাতত তুলি দিলেক। যাতে উমারলার যা খুশি তাই করির পারে।

২৬ সিপাইলা য়েলো যীশুক নিয়া যাবার ধরচে, সেলো শিমোন নামের কুরীণী দেশের এক জন মানষি গেরাম থাকি আসির

ধরচে। সিপাইলা উয়াক ঘাড়ত ক্রুশটা দিয়া যীশুর পাছে পাছে  
উবি নিয়া যাবার বাধ্য করিলেক।

২৭ মেয়ো মানষি যীশুর পাছে পাছে যাবার ধরছিলেক। মেয়ো  
বেটিছাওয়াও আছিলেক, বেটিছাওয়ালা শোকে কপালত হাত  
দিয়া হায়! হায়! করি কান্দির ধরলেক।

২৮ যীশু উমার ভিতি ঘুরিয়া কইলেক, “ও মায়ের ঘর!  
যিরুশালেমের বেটিলা, তোমরা মোর বাদে কান্দেন না। তোমরা  
নিজের বাদে আর তোমার বেটা-বেটির বাদে কান্দো।

২৯ কেনেনা এমন ভয়ংকর দিন আসির ধরচে, যেয়ো মানষি  
কবে, ‘যেইলা বেটিছাওয়ার কোন দিনও ছাওয়া-ছোট হয় নাই,  
যায় এলাও বুকের দুধ খোয়ায় নাই, এই আটকুরি বেটিছাওয়ালা  
হইলেক ভাগ্যবতী।’

৩০ সেই সমায় মানষি পর্বতলাক কবে, ‘হামারলার উপরাত  
আসি পড়েক!’ আর পাহাড়লাক কবে, ‘হামারলাক ঢাকিয়া  
ধরেক!’

৩১ কেনেনা গছ বত্তি থাকতে, মানষি যদি গছক অইত্যাচার  
করে, তাইলে শুকান হইলে কি না করিবে?”

৩২ সিপাইলা দুই জন ডাকুক, যীশুর সাথত মরণের দন্ড দিবার  
বাদে নিয়া যাবার ধরচে।

৩৩ মাথার খাপড়া নামের জাগাত পৌছিয়া ওটেকোনা যীশুক  
ক্রুশত টাঙাইলেক, একে নগত দুই জন ডাকুক এক জনাক ডাইন

পাকে আরেক জনাক বাও পাকে ক্রুশত টাঙা হইলেক।

৩৪ সেলো যীশু কইলেক, “হে মোর স্বর্গের বাপ, ইমরা কি করির ধরচে, এইটা ইমরা জানে না। এই বাদে ইমারলাক ক্ষমা করেক!” আর সিপাইলা নটারি করি যীশুর কাপড়লা নিজের মইন্ধোত ভাগ করি নিলেক।

৩৫ খাড়া হয় মানষিলাও ভিড় করি দেখির ধরচে। আর যিহুদী ধর্মীয় নেতালা যীশুক টিটকারি করি কবার ধরচে, “উয়ায় তো অইন্য মানষিলাক বত্তাইচে, যদি উয়ায় ভগবানের বাছাই করা রাজা হয় তাইলে এলা নিজক বত্তাউক!”

৩৬ আর সৈন্যলাও উয়ার বগলোত আসিয়া টিটকারি করির নাগিলেক। উমরা যীশুক ট্যেঙা ফলের রস খাবার দিয়া কইলেক,

৩৭ “তুই যদি যিহুদীলার রাজা হইস, তাইলে তুই নিজক বত্তাও দেখি!”

৩৮ আর যীশুর ক্রুশ খুটার মাথার উপরাত একখান সাইন বোর্ড নটকেয়া থুইলেক। ওটেকোনা নেখা আছিলেক, “এই মানষিটা যিহুদীলার রাজা।”

৩৯ যীশুর দুই পাকে যে দুই জন ডাকুক ক্রুশত টাঙা হইচে, উমার মইন্ধে এক জন যীশুক ঠাট্টা করি কবার নাগিলেক, “তুইয়ে নাকি বাছাই করা রাজা? তাইলে তুই নিজক আর হামাক বত্তাও দেখি!”

৪০ অইন্য ডাকুটা কিন্তুক উয়াক দাবরেয়া কইলেক, “তুই কি ভগবানক ভয় না খাইস? তুইও তো একে নাকান দন্ড পাবার ধরচিস।

৪১ হামরা তো নিজের কর্ম অনুসারে ন্যায্য শাস্তি পাবার ধরচি। কিন্তুক উয়ায় তো কোন দোষ করে নাই।”

৪২ সেলো আরো কইলেক, “যীশু, তোমার শাসন ব্যবস্থা চালু হয় মোক মনে করেন।”

৪৩ যীশু উয়াক কইলেক, “মুই তোক সচাং করি কবার ধরচুং, আজিই তুই মোর সাথত শান্তির দেশত যাবু।”

৪৪ আনুমানিক বেলা বারোটা, সেলো থাকি বিকাল তিনটা অন্দি গোটায় দেশটা আন্ধার হয় রইলেক।

৪৫ বেলার রৌদ দেখা গেইলেক না, আর যিহুদীলার দশংগতি মন্দিরের যেই পর্দাখান দিয়া শুদ্ধি জাগা আর মহাশুদ্ধি জাগা যুদা করে, ঐ পর্দা অচমকায় ছিড়িয়া দুইফালা হয় গেইলেক।

৪৬ সেলো যীশু জোরে চিকিরিয়া কইলেক, “হে মোর স্বর্গের বাপ, মুই তোর হাতত মোর আত্মা সঁপে দিলুং।” এই কতা কয়া যীশু শেষে নিঃশ্বাস ছাড়িলেক।

৪৭ এই ঘটনা দেখিয়া রোমের প্রধান সেনাপতি ভগবানের গুণগান করি কইলেক, “সচাংয়ে ইয়ায় নির্দোষ আছিলেক।”

৪৮ ক্রুশের ওটেকোনা যেই মানষিলা ভিড় করিচে, উমরালা সগায় কপাল চাপেরেয়া শোক করিতে করিতে চলি গেইলেক।

৪৯ কিন্তুক যীশুর আপন মানষিলা, আর যেই বেটিছাওয়ালা গালীল থাকি আইসচে, উমরালা সগায় দূরত খাড়া হয়। এই ঘটনালা দেখিলেক।

৫০-৫১ যোষেফ নামে এক জন সৎ আরো ধার্মিক মানষি আছিলেক। উয়ায় আছিলেক যিহুদা প্রদেশের আরিমাথিয়া গেরামের। ঐ যিহুদী মহাসভাত যে যীশুর বিচার করা হইচে। যোষেফ ঐ মহাসভার এক জন সদস্য। কিন্তুক মহাসভাত যীশুর মরণের দন্ডের বিচারের বিষয়ে উয়ায় মানি নিবার পায় নাই। এই যোষেফ ভগবানের শাসন ব্যবস্থা কোন দিন শুরু হইবে, সেই আশায় বাড়ে রবার ধরছিলেক।

৫২ যোষেফ রাজ্যপালেরটে যায়া যীশুর মরা দেহাটা চাইলেক।

৫৩ তার পাছত দেহাটা ক্রুশ খুটা থাকি নামেয়া নয়া কাপড় জড়েয়া পাহাড়ের গুহার সমাধিত থুইলেক। এই গুহাটাত কোন দিন আর কোন মরা থোয়া হয় নাই।

৫৪ এইটা করা হইচে শুকুরবার বেলা ডোবোং ডোবোং সমায়। এই দিন যিহুদী মানষিলা জিরানের দিনের বাদে সউগ কিছু জোগার করে আর সইক্কা থাকি জিরানের দিন শুরু হয়।

৫৫ যেই বেটিছাওয়ালা যীশুর সাথত গালীল থাকি আইসচে, উমরা এলা যোষেফের পাছে পাছে যায়া কোন সমাধিত আর কি

নাকান করি, যীশুর মরা দেহাটা থোয়া হয়, এইলা দেখিলেক।

৫৬ ইয়ার পাছত বাড়ি ফিরি যায়া সুগন্ধি জিনিস আর তেল বানাইলেক। জিরানের দিন শুরু হয়। শ্রী মোশির দেওয়া বিধানের অনুসারে উমরা জিরাইলেক।

২৪ দেওয়ার খুব সাকালে বেটিছাওয়ালা যে সুগন্ধি জিনিস তৈয়ারি করিচে, ঐলা নিয়া গুহার সমাধিটার ওটেকোনা গেইলেক।

২ যায়া দেখিলেক, সমাধিটার মুখ থাকি বড় শিলটা কায়বা সারেয়া থুইচে।

৩ উমরা সমাধির ভিতরাত সোন্দেয়া দেখিলেক, ওটেকোনা প্রভু যীশুর মরা দেহাটা নাই।

৪ এই দেখিয়া উমরা অবাক হইচে। সেলোয় সেলোয় সাদা ধপ-ধপা কাপড় পেন্দা দুই জন মানষি অচমকায় উমার বগলত আসিয়া খাড়া হইলেক।

৫ বেটিছাওয়ালা ভয় খায়া হাংকুড়া পাড়িয়া মুখ মাটিত নাগাইলেক। মানষি দুই জন কইলেক, “কে্যে তোমরা বত্তা মানষিক, মরা মানষির সমাধিত চান্দের ধরচেন?”

৬ উয়ায় এটেকোনা নাই, উয়ায় মরণক জয় করি বত্তি উঠিচে! উয়ায় তোমারলাক গালীল প্রদেশত কি কইচে মনে করি দেখ।

৭ উয়ায় কইচে, বাছাই করা মানষিটাক নিশ্চয় পাপী মানষির হাতত ধরে দেওয়া হইবে। তার পাছত উয়াক ত্রুশ-খুটাত টাঙে থোয়া হবে, আর তিন দিনের দিন মরণক জয় করি উয়ায় বত্তি উঠিবে।”

৮ যীশু কি কইচিলেক, সেই কতাটা উমার মনে পড়িলেক।

৯ উমরা সমাধি থাকি ফিরিয়া যায় এগারো জন শিষ্যক আরো অইন্য সগাকে এই খবরটা জানাইলেক।

১০ এই বেটিছাওয়ালার মইন্ধোত আছিলেক মগ্দলিনী মরিয়ম, যোহোনা ও যাকবের মাও মরিয়ম। আর নগত অইন্য কয়েক জন বেটিছাওয়ানা। উমরা যীশুর অধিকার দেওয়া খবরিয়ালাক এই ঘটনালার কতা জানাইলেক।

১১ কিন্তুক এই বেটিছাওয়ালার কতা খবরিয়ালা ফাউকসালি মনে করিয়া বিশ্বাস করিলেক না।

১২ পিতর তাঙো দৌড়িয়া যায় সমাধিটা ছাপড়িয়া দেখিলেক, ওটেকোনা খালি কাপড়লা পড়ি আছে। এই অচানক ঘটনালার চিন্তা করিতে করিতে বাড়ি ফিরি আসিলেক।

১৩ সেদিন দেওবার যীশুর দুই জন শিষ্য ইন্মায়ু নামে একটা গেরামত যাবার ধরচে। গেরামটা যিরুশালেম থাকি সাত মাইল দূরত আছিলেক।

১৪ উমরা ঐলা ঘটনার বিষয় এক জন অইন্য জনের সাথত কওয়া-কয়ি করির ধরচে।



১৫ অচমকায় যীশু আসিয়া উমার সাথত যাবার নাগিলেক।

১৬ কিন্তুক উমরা চিনির পাইলেক না, কেনেনা ভগবান ঐ সমায় উমাক চিনিবার শক্তি দেয় নাই।

১৭ যীশু উমাক পুছিলেক, “তোমরা কিসের গল্প করিতে করিতে যাবার ধরচেন?” উমরা হতাশ হয় খাড়া হয় রইলেক।

১৮ সেলো ক্লিয়পা নামের এক জন যীশুক কইলেক, “আরে! কয় দিন আগত যিরুশালেমত কি ঘটনা ঘটিচে, তোমরায় কি এক মাত্র অজানা মানষি।”

১৯ যীশু উমাক পুছিলেক, “কি ঘটিচে?” উমরা উত্তর দিলেক, “নাসারত গেরামের যীশুক নিয়া কয় দিন আগত যেইলা ঘটনা ঘটিচে। উয়ায় ভগবানের আর মানষির চোখুত শক্তি শালি এক জন ভগবানের ভাববাদী আছিলেক। কাজে-কামাই আর কতার মইন্ধো দিয়া উয়ায় ক্ষমতা দেখাইচে।

২০ কিন্তুক হামার প্রধান বামনলা আর ধর্মের নেতালা উয়াক ধরিয়া রোমীয় সরকারের হাতত সঁপে দিলেক। উমরা বিচার করি উয়াক মরণের দন্ড দিয়া ক্রুশত মারি ফেলাইলেক।

২১ হামরা আশা করচি যে উয়ায় বাছাই করা রাজা, যায় ইজ্রায়েল জাতিক মুক্তি দিবে। আর এই সউগ ঘটনালা ঘটিবার তিন দিন হয় গেইচে।

২২-২৩ সেলো আরো কি হইচে? হামার দলের কয়জন বেটিছাওয়া অচানক কতা শুনাইচে। উমরা খুব সাকালে সমাধির

ওটেকোনা যায়া দেখে যীশুর মরা দেহাটা নাই। স্বৰ্গদূতলাও উমাক দেখা দিয়া কইচে, যীশু বত্তি উঠিচে।

২৪ সেলো হামার সঙ্গী-সাথীলার মইন্ধো থাকি কাণ্ডো কাণ্ডো দৌড়ি সমাধিত যায়া দেখে, বেটিছাওয়ালা যেই নাকান কইচে, সচাংএ ঐ নাকান। কিন্তুক প্রভু যীশুক দেখির পাইলেক না।”

২৫ ইয়ার পাছত যীশু কইলেক, “তোমরা কিছুই বুঝেন না। ভগবানের ভাববাদীলা যেইলা শাস্ত্রত নেখিচে সেইলা তোমরা বিশ্বাস করেন না। তোমারলার অন্তর পাষান হয় গেইচে।

২৬ বাছাই করা রাজাটাক মহিমা পাবার আগত মেয়ো কষ্ট ভোগ করির নাগিবে। এইলার দরকার ছিল।”

২৭ সেলো মহাপুরুষ মোশির আর ভগবানের আগের কালের ভাববাদীলার গ্রন্থ থাকি আরম্ভ করিয়া গোটায় সনাতন পবিত্র শাস্ত্র নিজের বিষয় যেইলা নেখা আছে সউগ বুঝিয়া দিলেক।

২৮ উমরা যে গেরামত যাবার ধরচে, সেই গেরামটার বগলত আসি পৌছিলেক, কিন্তুক যীশু আরো দূরত যাবার ভাব দেখাইলেক।

২৯ উমরা খুব কাউলা-কাউলি করি যীশুক কইলেক, “এলা বেলা যায়া, সইন্ধা হইচে। তোমরা হামার সাথত হামার বাড়ি চলো।” আর যীশু উমার বাড়ি গেইলেক।

৩০ যেয়ো যীশু উমার সাথত খাবার বসিলেক সেলো রুটি নিয়া ভগবানক ধন্যবাদ দিয়া, ছিড়িয়া উমাক দিবার ধরলেক।

৩১ অচমকায় উমার চোখুর ঝাপসা কাটি যায়। যীশুক চিনি ফেলাইলেক। কিন্তুক পলকের মইন্ধে যীশু মিশি গেইলেক।

৩২ সেলো উমরা এক জন অইন্য জনাক কবার নাগিলেক,  
“ঘাটা দিয়া যাবার সমায় যেলো হামার সাথত কতা কইচে, আর  
সনাতন শাস্ত্র বুঝি দিচে, সেলো হামার অন্তর খুশিতে জ্বলি  
উঠিবার ধরছিলেক না!”

৩৩-৩৪ সেই দন্ডে উমরা যিরুশালেম গেইলেক, আর ওটেকোনা  
যায়া দেখির পাইলেক, এগারো জন শিষ্য আর অইন্য সাথীলা  
এক সাথে কতা কবার ধরচে যে, “প্রভু সচাং বত্তি উঠিচে। আরো  
শিমোনক দেখা দিচে।”

৩৫ পাছত সেই দুই জন শিষ্য ঘাটাত যেইলা ঘটনা ঘটিচে সেইলা  
জানাইলেক। রুটি ছিড়িয়া দিবার সমায় কেংকরি চিনির  
পাইলেক তামানে কইলেক।

৩৬ উমরা যেলা এইলা কতা কওয়া-কয়ি করির ধরচে, এমন  
সমায় যীশু আসিয়া উমারলার মইন্ধোত খাড়া হয়। কইলেক,  
“তোমারলার শান্তি হউক।”

৩৭ কিন্তুক উমরা ভয়ে চমকি উঠিল, উমরা মনে করিলেক ভূত  
দেখির ধরচে।

৩৮ যীশু উমাক কইলেক, “তোমরা কেনে এত অস্থির হবার  
ধরচেন। কেনে তোমার মনত সন্দেহ?

৩৯ মোর হাত ঠেং দেখ, মোক নাড়ি দেখ, কেনেনা ভূতের তো,  
মোর মতন হাড়ি আর মসং নাই।”

৪০ এই কয়া উমাক ঠেং, হাত দেখাইলেক।

৪১ তাণ্ডো উমরা এত অচানক হইচে আরো আনন্দও হইচে এই  
বুলিয়া বিশ্বাস করির পাইলেক না। সেলো যীশু কইলেক,  
“তোমার এটেকোনা কি কোন খাবার আছে।”

৪২ উমরা যীশুক এক টুকরা ভাজা মাছ দিলেক।

৪৩ এই নিয়া উমার মুখের আগত খাইলেক।

৪৪ তার পাছত উয়ায় উমারলাক কইলেক, “মুই যেলা তোমার  
সাথত ছিলুং সেলো তো মুই কইচুং, মহাপুরুষ মোশির বিধান আর  
ভগবানের ভাববাদীলার গ্রন্থত আরো গীতসংহিতাত যে মোর  
বিষয়োত নেখা আছে, এইলা সউগ পূরণ হবেই হইবে।”

৪৫ সেলোয় শাস্ত্র বুঝির বাদে যীশু উমার বুদ্ধি খুলি দিলেক।

৪৬ উমাক কইলেক, “এই কতা নেখা আছে যে বাছাই করা  
রাজাটাক কষ্ট ভোগ করির নাগিবে, আরো তিন দিনের দিন  
মরণক জয় করি বত্তি উঠিবে।

৪৭ যিরুশালেম থাকি আরম্ভ করিয়া সউগ জাতিরটে বাছাই করা  
রাজাটার অধিকারে এই ভাল খবরটা তোলাই দিবার নাগিবে যে,  
‘পাপের ঘাটা হাতে মন ফিরান! ইয়াতে তোমার পাপের ক্ষমা  
হইবে!’

৪৮ তোমরালায় এইলার সাক্ষী।

৪৯ হ্যে আরো দেখেন মোর বাবা যে পবিত্র আত্মা দিবার প্রতিজ্ঞা করিচে, মুই স্বর্গ হাতে পেয়েঠেয়া দিম। কিন্তুক স্বর্গ থাকি যতক্ষণ পর্যন্ত শক্তি না পান ততক্ষণ পর্যন্ত এই গঞ্জত থাকেন।”

৫০ পাছত যীশু শিষ্যলোক নিয়া বৈথনিয়া পর্যন্ত গেইলেক, ওটেকোনা উয়ায় হাত তুলিয়া উমারলাক আশুর্বাদ করিলেক।

৫১ আশুর্বাদ করিতে কালে উমারলার হাতে যুদা করিয়া যীশুক স্বর্গত তুলি নেওয়া হইলেক।

৫২ সেয়া উমরা উয়াক ভক্তি করিয়া মহাআনন্দ করিতে করিতে যিরুশালেম ফিরি গেইলেক।

৫৩ আর সউগ সমায় যিহুদী দশংগতি মন্দিরত থাকিয়া ভগবানের গুণগান করির নাগিলেক॥

# যোহন

১ পইলাতে যাক বাইক্য কওয়া হইছিলেক, সেই বাইক্য ভগবানের নগত আছিলেক আর বাইক্য নিজেই ভগবান আছিলেক।

২ আর পইলা উয়ায় ভগবানের নগত আছিলেক।

৩ ভগবান সউগ কিছু সেই বাইক্য দিয়ায় সিজ্জন করিছিলেক, আর যেইলা সিজ্জন করা হইছিলেক, ঐলার মইন্ধোত কোন কিছুই উয়াক ছাড়া সিজ্জন করা হয় নাই।

৪ উয়ার মইন্ধোত জীবন আছিলেক, আর সেই জীবন আছিলেক মানষির আলো।

৫ সেই আলো আন্ধারের মইন্ধোত জ্বলির ধরচে কিন্তুক আন্ধার আলোটাক জয় করির পারে নাই।

৬ ভগবান যোহন নামে এক জন মানষিক পেঠাইচে।

৭ উয়ায় আলোর বিষয়ে সাক্ষী হিসাবে সাক্ষ্য দিবার আসচে। যেনে সগায় উয়ার সাক্ষ্য শুনিয়া বিশ্বাস করির পারে।

৮ যোহন নিজে সেই আলো আছিলেক না, কিন্তুক উয়ায় আসিচে মানষিলারটে সেই আলোর বিষয়ে সাক্ষ্য দিবার।

৯ সেই আসল আলো, উয়ায় সউগ মানষিক আলো দান করে, উয়ায় এই দুনিয়াত আসিচে।

১০ এই আলো দুনিয়াতে আছিলেক আর এই দুনিয়াটা উয়ারে দারায় সিজ্জন হইচে। কিন্তুক দুনিয়ার মানষিলা উয়াক চিনিলেক না।

১১ উয়ায় নিজের দেশত আসিলেক, কিন্তুক উয়ার নিজের মানষিলায় উয়াক মানিলেক না।

১২ কিন্তুক যত জন উয়ার উপরাত বিশ্বাস করি মানি নিলেক, উমারলাক সগাকে উয়ায় ভগবানের ছাওয়া হবার অধিকার দিলেক।

১৩ এই মানষিলার জন্ম দুনিয়ার মানষির জন্মের নাকান অক্স থাকি হয় নাই, মাও বাপের দেহার কামনা বাসনা থাকি নাই হয়, বেটাছাওয়ার কামনা বাসনা থাকিও নাই হয়। কিন্তুক ভগবান থাকিই হইচে।

১৪ সেই বাইক্য মানষির রূপ ধারন করিলেক আর হামারলার মইন্ধোত বসবাস করিলেক। সনাতন পিতার এক মাত্র বেটার যে মহিমা সেই মহিমা হামরা দেখিচি। উয়ায় আশুর্বাদে আর সত্যে ভরপুর।

১৫ যোহন উয়ার বিষয়ে চিকরিয়া সাক্ষ্য দিয়া মানষিলাক কবার নাগিলেক, “উয়ায়ে সেই মানষি যার বিষয়ে মুই কইছিলুং, যায় মোর পাছত আসির ধরচে উয়ায় মোর চায়া মহান, কেনেনা উয়ায় মোর অনেক আগত থাকি আছে।”

১৬ হামরা সগায় উয়ার মেয়ো আশুর্বাদের থাকি দয়ার উপরাত দয়া পাইচি।

১৭ মহাপুরুষ মোশির মইন্ধো দিয়া নিয়ম কানুন দেওয়া হইচে, কিন্তুক বাছাই করা রাজা যীশুর মইন্ধো দিয়া আশুর্বাদ আর সত্য আসিচে।

১৮ ভগবানক কাণ্ডো কোন দিন দেখে নাই। উয়ার সাথে থাকা সেই একনায় মাত্র বেটা, যায় নিজে ভগবান, উয়ায়ে উয়াক প্রকাশ করিচে।

১৯ যেয়ো যিহুদী নেতাক যিরুশালেম থাকি কয়েক জন বামন আর লেবীয় নেতাক যোহনেরটে পেঠাইলেক, সেয়ো উমরা আসিয়া যোহনক পুছিলেক, “তোমরা কায়?”

২০ যোহন অস্বীকার করিলেক না, বরং স্বীকার করিয়া পরিস্কার করি কইলেক, “মুই বাছাই করা রাজা না হং।”

২১ সেয়ো উমরা যোহনক পুছিলেক, “তাইলে তোমরা কায়? তোমরা কি এলিয়?” যোহন কইলেক, “না, মুই এলিয় না হং।” উমরা কইলেক, “তাইলে কি তোমরা কি সেই ভগবানের ভাববাদীটা?” উয়ায় কইলেক, “না।”

২২ সেয়ো উমরা উয়াক কইলেক, “তাইলে তোমরা কায়? যায় যায় হামাক পেঠাইচে, ফিরি যায়া হামারলাক তো উমাক কবার নাগিবে। তোমার নিজের সমন্ধে তোমরা নিজে কি কন?”



২৩ যোহন, ভগবানের ভাববাদী যিশাইয়ের কতা কইচে, “মুই সেই গালার আওয়াজ নিধুয়া পাথারত একজনের চিকরি কবার ধরচে, ‘তোমরা প্রভুর বাদে ঘাটা ঠিক কর।’”

২৪ যোহনেরটে যাক যাক পেঠা হইচে উমার মইন্ধে কিছু ফরীশী দলের ধর্মগুরু আছিলেক,

২৫ উমরা যোহনক কইলেক, “তোমরা যদি বাছাই করা রাজাটা না হন, এলিয় না হন, ভগবানের ভাববাদীও না হন, তাইলে তোমরা দীক্ষা দিবার ধরচেন কেনে?”

২৬ ইয়ার উত্তরে যোহন কইলেক, “মুই জল দিয়া দীক্ষা দিবার ধরচুং, কিন্তুক তোমারলার মইন্ধোত এমন এক জন আছে যাক তোমরালা চেনেন না।

২৭ উয়ায় ঐ মানষিটা যায় মোর পাছত আসিবে। উয়ার জুতার ফিতা খুলি দিবার যোগ্যতাও মোর নাই।”

২৮ যর্দন নদীর অইন্য পারত বৈথনিয়া গেরামত যেটেকোনা যোহন মানষিলাক দীক্ষা দিবার ধরছিলেক, ওটেকোনা এইলা ঘটিছিলেক।

২৯ পরের দিন যোহন যীশুক উয়ার পাকে আসির দেখিয়া কইলেক, “ঐ দেখ এই মানষিটাক! ভগবানের ভেড়ার বাচ্চার মত যাক সঁপে দেওয়া হইচে, উয়ায় মানষির সউগ পাপ দূর করে।

৩০ উয়ায়ে সেই মানষি, যার বিষয়ে মুই কইছিলুং ‘মোর পাছত আসির ধরচে উয়ায় মোর চায়া মহান, কেনেনা উয়ায় মোর

অনেক আগত থাকি আছে।’

৩১ এমন কি মুইও উয়াক চেনং না, কিন্তুক উয়ায় যাতে ইজ্রায়েলীলারটে বাছাই করা রাজা হিসাবে চিনির পারে এই বাদে মুই আসিয়া উমারলাক জলত দীক্ষা দিবার ধরচুং।”

৩২ ইয়ার পাছত যোহন এই নাকান সাক্ষ্য দিলেক, “মুই পবিত্র আত্মাক কইতরের রূপ নিয়া স্বর্গ থাকি নামি আসি উয়ার উপরত বসির দেখিনু।

৩৩ মুই উয়াক চেনং না, কিন্তুক ভগবান মোক জলত দীক্ষা দিবার পেষ্ঠাইচে, আর উয়ায় মোক কইচে, ‘যার উপরত পরমপ্রভুর পবিত্র আত্মা নামি আসি বসিবে উয়ায় সেই মানষিটা, যায় পবিত্র আত্মাত দীক্ষা দিবে।’

৩৪ মুই দেখিচুং আর সাক্ষ্য দিবার ধরচুং যে, উয়ায় ভগবানের বেটা।”

৩৫ পরের দিন যোহন আর উয়ার দুই জন শিষ্য একসোদে ওটেকোনা আসিলেক।

৩৬ এমন সময় যীশুক হাটি যাবার দেখিয়া যোহন কইলেক, “ঐ দেখ, ভগবানের ভেড়ার বাচ্চা!”

৩৭ যোহনক এই কতাটা কবার শুনিয়া ওই দুই জন শিষ্য যীশুর পাছে পাছে যাবার নাগিলেক।

৩৮ যীশু পাছপাকে ঘুরি উমাক আসির দেখিয়া কইলেক, “তোমরালা কি করির চান?” যোহনের শিষ্যলা পুছিলেক, “গুরু,

তোমরা কোটে থাকেন?”

৩৯ যীশু উমাক কইলেক, “আসিয়া দেখ।” সেলো উমরা যায়া দেখিলেক উয়ায় কোটে থাকে। আর ঐ দিনের বাকি সময়টা যীশুর সাথে কাটাইলেক। সেলো সময় আছিলেক পেরায় বিকাল চারটা।

৪০ যোহনের কতা শুনিয়া যে দুই জন মানষি যীশুর পাছে পাছে গেইছিলেক, উমারলার মইন্ধে একজনের নাম আছিলেক আন্দ্রিয়। ইয়ায় আছিলেক শিমোন পিতরের ভাই।

৪১ আন্দ্রিয় পরথমে উয়ার ভাই শিমোনক দেখির পায়া উয়াক কইলেক, “হামরা বাছাই করা রাজাটার দেখা পাইচি।” (গ্রীক ভাষাত হইচে “খ্রীষ্ট”)।

৪২ আন্দ্রিয় শিমোনক যীশুরটে আনিলেক, যীশু শিমোনের ভিতি দেখিয়া কইলেক, “তুই যোহনের বেটা শিমোন, কিন্তুক তোক কৈফা বুলি ড্যেকা হবে।” এই নামের অর্থ হইলেক পিতর মানে শিল।

৪৩ পরের দিন যীশু থির করিলেক উয়ায় গালীল প্রদেশ যাবে। সেই সময় যীশু ফিলিপের খোজ পায়া উয়াক কইলেক, “আইসেক, মোর শিষ্য হঃ।”

৪৪ ফিলিপ আছিলেক বৈৎসৈদা গেরামের মানষি। আন্দ্রিয় আর পিতরও ঐ একে গেরামের মানষি আছিলেক।

৪৫ ফিলিপ শ্রী নথনেলক খুজি বির করিয়া কইলেক, “মহাপুরুষ মোশি আর ভগবানের ভাববাদীলা যার কতা আইন কানুনত নেখি গেইচে। উয়ায় নাসারত গেরামের যোষেফের বেটা যীশু।”

৪৬ নথনেল, ফিলিপক কইলেক, “নাসারত থাকিয়া কি ভাল কিছু আসির পায়?” ফিলিপ উয়াক কইলেক, “আসিয়া দেখ।”

৪৭ যীশু নথনেলক উয়ার ওটে আসির দেখিয়া উয়ার বিষয়ে কইলেক, “ঐ দেখ, এক জন সচাং ইজ্রায়েলীয়। উয়ার মনত কোন ছলনা নাই।”

৪৮ নথনেল যীশুক পুছিলেক, “তোমরা ক্যেমন করি মোক চিনিলেন?” যীশু কইলেক, “ফিলিপ তোক ড্যেকেবার আগত য়েলা তুই ওই ডুমুর গছের তলাত ছিলু, মুই স্যেলায় তোক দেখছিলুং।”

৪৯ ইয়াতে নথনেল যীশুক কইলেক, “গুরু, তোমরায় ভগবানের বেটা, তোমরায় ইজ্রায়েলীলার রাজা।”

৫০ যীশু উয়াক কইলেক, “তোক ওই ডুমুর গছের তলত দেখিচুং, এই কতা কবার বাদে কি বিশ্বাস করিলু? ইয়ার থাকিও বড় ব্যাপার তুই দেখির পাবু!”

৫১ পাছত যীশু কইলেক, “মুই তোমারলাক সচাং করি কবার ধরচুং, তোমরালা স্বর্গ খোলা দেখিবেন, আর দেখিবেন ভগবানের দূতলা বাছাই করা মানষিটার ওটে থাকি স্বর্গত উঠিবার ধরচে আর নামিবার ধরচে।”

২ ইয়ার দুই দিন পাছত গালীলের কান্না নামের গেরামত একখান বিয়াও হবার ধরছিলেক। যীশুর মাও ঐ বিয়াও বাড়িত আছিলেক।

২ ঐ বিয়াও বাড়িত যীশু আর উয়ার শিষ্যলোকও নিমন্তন দেওয়া হইচে।

৩ বিয়াও বাড়ির সউগ আংগুর রস যেয়ো শেষ হয় গেইলেক, সেয়ো যীশুর মাও যীশুক কইলেক, “ইমারলার আর কোন আংগুর রস নাই ইমারলার আংগুর রস শেষ হয় গেইচে।”

৪ যীশু উয়ার মাক কইলেক, “মা, তুই মোক কেনে পুছির ধরচিস যে, মোর কি করা উচিত? মোর সমায় এলাও আইসে নাই।”

৫ উয়ার মাও সেয়ো চাকরলাক কইলেক, “ইয়ায় তোমারলাক যেইলা করির কয় সেইলায় কর।”

৬ যিহুদী ধর্মের নিয়ম অনুসারে জল দিয়া ধুইয়া শুদ্ধি হবার বাদে ঐ জাগাত ছয়টা শিলের বড় বড় কলসি বসা আছিলেক। ওই কলসিলাত পতিটাতে আশি থাকি একশ লিটার করি জল ধরছিলেক।

৭ যীশু ঐ চাকরলাক কইলেক, “এই কলসিলাত জল ভত্তি করি দেও,” চাকরলা সেয়ো কলসির কান্টায় কান্টায় জল ভত্তি করিলেক।

৮ তার পাছত যীশু উমারলাক কইলেক, “এলা ওটে থাকি অল্প জল তুলি নিয়া ভোজের কর্তারটে নিয়া যাও।” উমরা ঐ নাকানে করিলেক।

৯ কলসির জললা যেইলা আংগুর রস হয় গেলেক, ভোজের কর্তা সেইটা খায়া দেখিলেক। কিন্তুক এই রস কোটে থাকি আসিলেক উয়ায় জানে না, খালি যেই চাকরলা জল ভরাইচে উমরায় জানে। এই বাদে ভোজের কর্তা বরক ডেকেয়া কইলেক,

১০ “মানষি প্রথমে ভাল আংগুর রস সাগাই-সোদরক খাবার দেয়, তার পাছত মানষির ইচ্ছামত যেলা খাওয়া শেষ হয় সেলা যে রস দেয় সেইটা আগের চায়া বেয়া থাকে। কিন্তুক তুই ভাল আংগুর রস এলা পর্যন্ত খুইয়া দিচিস।”

১১ যীশু গালীল প্রদেশের কান্না নামের গেরামত এইটা পইলা অচানক চিনের কাম করিয়া নিজের মহিমা প্রকাশ করিলেক। ইয়াতে উয়ার শিষ্যলা উয়ার উপরা বিশ্বাস করিলেক।

১২ ইয়ার পাছত যীশু, উয়ার মাও, উয়ার ভাইলা আর উয়ার শিষ্যলা কফরনাহুম গঞ্জত গেলেক, কিন্তু অল্প কয়েক দিন ওটে রইলেক।

১৩ যিহুদীলার মুক্তি ভোজ পার্বনের দিন বগলত আসির সমায় যীশু যিরুশালেম গেলেক।

১৪ উয়ায় ওটেকোনা দেখিলেক, মন্দিরের মইন্ধোত মানষিলা গরু, ভেড়া আর কইতর বেচের ধরচে আর টাকা বদল করে ঐ

মানষিলাও বসি আছে।

১৫ এইলা দেখিয়া উয়ায় দড়ি দিয়া একখান চাবুক বানাইলেক, আর চাবুক খান দিয়া সউগ গরু, ভেড়া আর মানষিলাকও মন্দির থাকি খেয়েদেয়া দিলেক। টাকা বদল করা মানষিলার টাকা-পাইসা ছিলি ফ্যেলে দিয়া উয়ায় উমার টেবিললাও উল্টি ফ্যেলে দিলেক।

১৬ যায় যায় কইতর বেচের ধরছিলেক যীশু উমারলাক কইলেক, “এই জাগা থাকি এইলা নিয়া যাও। মোর স্বর্গের বাপের ঘর ব্যবসার ঘর করেন না।”

১৭ উয়ার শিষ্যলার শাস্ত্রের নেখা কতাটা ফম পড়িলেক, “তোমারলার ঘরের জইনে্যে এত পিরিত মোর অন্তরক তুষির অগুনের নাকান জ্বলাবে।”

১৮ সেয়া যিহুদী নেতালা যীশুক পুছিলেক, “কিন্তুক এইলা করিবার অধিকার যে তোর সচাং আছে এইটার প্রমাণ হিসাবে তুই কি অচানক চিনের কাম করি দেখের পাবু?”

১৯ যীশু কইলেক, “ভগবানের মন্দির তোমরা ভাঙি ফ্যেলান, আর তিন দিনের মইন্ধোত মুই সেইটা আরো বানাইম।”

২০ এই কতা শুনিয়া যিহুদী নেতালা কইলেক, “এই মন্দিরটা বানাইতে ছেচল্লিশ বছর নাগচে, আর তুই তিন দিনের মইন্ধোত বানাবু?”

২১ কিন্তুক যীশু যে মন্দিরের কতা কইচে, সেটা নিজের দেহাক দিয়া বুঝাইচে।

২২ যেহেলা যীশু মরণ থাকি ফির বত্তি উঠিলেক, সেহেলা শিষ্যলার ফম পড়িলেক যে, উয়ায় তো এই কতা সচাংএ কইচে, সেহেলা উমরানা যীশুর সমন্ধে শাস্ত্রের কতা আর যীশুর বাইক্য বিশ্বাস করিলেক।

২৩ মুক্তি ভোজের পার্বনের বাদে যীশু যেহেলা যিরুশালেমত আছিলেক, সেহেলা মেহেলা মানষি উয়াক বিশ্বাস করিলেক, কেনেনা যীশুক ঐটে নানা নাকান অচানক চিনের কাম করা দেখির পাইছিলেক।

২৪ কিন্তুক যীশু নিজে উমারলার উপরাত কোন ভরসা করে নাই। কেনেনা উয়ায় সউগ মানষিলাক জানে।

২৫ কোনো মানষির সমন্ধে কারোটে কোন কিছু জানিবার দরকার উয়ার আছিলেক না, কেনেনা ঐ মানষিলাক অন্তরত কি আছে উয়ায় সেইলা জানির পায়।

৩ ফরীশীলার মইদ্ধোত নীকদীম নামে একটা মানষি আছিলেক। উয়ায় যিহুদীলার এক জন নেতা আছিলেক।

২ এক দিন রাতিত উয়ায় যীশুরটে আসিয়া কইলেক, “গুরু, হামরা জানি তোমরা এক জন মাষ্টার হিসাবে ভগবানেরটে থাকি



আসচেন। কেনেনা হামরা জানি তোমরা অচানক চিনের কাম করেন, ভগবান নগত না থাকিলে কাণ্ডো এইলা করির পারে না।”

৩ যীশু নীকদীমক কইলেক, “মুই তোমাক সচাং করি কবার ধরচুং, নয়া করি জন্ম না হইলে কাণ্ডো ভগবানের শাসন ব্যবস্থা দেখির পায় না।”

৪ সেলো নীকদীম উয়াক কইলেক, “মানষি বুড়া হয় গেইলে কেমন করি আরো জন্ম হবার পায়? নিশ্চয় দ্বিতীয় বার মাও এর গর্ভত সোন্দেরা জন্ম নিবার পারে না!”

৫ যীশু কইলেক, “মুই তোমাক সচাং করি কবার ধরচুং, জল আর পবিত্র আত্মা থাকি জন্ম না হইলে কাণ্ডো ভগবানের শাসন ব্যবস্থাত সোন্দের পারে না।

৬ মানষি থাকি মানষির জন্ম হয়, আর আত্মা থাকি আত্মার জন্ম হয়।

৭ মুই যে তোমারলাক কইলুং, তোমারলার নয়া করি জন্ম হওয়া দরকার। ইয়াতে অচানক না হন।

৮ বাতাস যেই পাকে খুশি সেই পাকে বয়, আর তোমরা উয়ার শব্দ শুনির পান, কিন্তুক কোটে থাকি আইসে কোটে যায় সেইটা তুই জানিস না। পবিত্র আত্মা থাকি যার জন্ম হইচে ঠিক একে নাকান হয়।”

৯ নীকদীম যীশুক পুছিলেক, “এইটা কেমন করি হবার পায়?”

১০ স্যোলা যীশু উয়াক কইলেক, “তুই ইজ্রায়েলীলার গুরু, আর তুই এইটা জানিস না?

১১ মুই তোমারলাক সচাং করি কবার ধরচুং, হামরা যেইটা জানি সেইটাই কই, হামরা যেইটা দেখচি সেইটার বিষয়ে সাক্ষ্য দেই। কিন্তুক তোমরা হামার সাক্ষ্য মানেন না।

১২ মুই তোমারলাক দুনিয়ার বিষয় নিয়া কতা কইলে বিশ্বাস করেন না তাইলে স্বর্গের বিষয়ে কতা কইলে কেমন করি বিশ্বাস করিবেন?

১৩ যায় স্বর্গ থাকি নামি আসিচে সেই বাছাই করা মানষিটা ছাড়া কাণ্ডো স্বর্গত ওটে নাই।

১৪ “নিধুয়া পাথারত যেই নাকান করি মহাপুরুষ মোশি সাপক উচাত তুলিছিলেক, একে নাকান করি বাছাই করা মানষিটাক উচাত তুলা হবে,

১৫ যে কাণ্ডো উয়াক বিশ্বাস করে উয়ায় অমৃত জীবন পায়।

১৬ “ভগবান দুনিয়াক এত পিরিত করিলেক যে উয়ায় উয়ার একনায় মাত্র বেটাক দান করিলেক, যে কাণ্ডো সেই বেটাক বিশ্বাস করে উয়ায় বিনষ্ট না হয় কিন্তুক অমৃত জীবন পায়।

১৭ ভগবান মানষিক দোষী প্রমাণ করিবার বাদে উয়ার বেটাক দুনিয়াত পেঠায় নাই, বরং মানষি যাতে উয়ার মইন্ধো দিয়া মুক্তি পায় এই বাদে ভগবান উয়াক পেঠাইচে।

১৮ যে কাণ্ডে উয়াক বিশ্বাস করে উয়ায় দোষী না হয়, কিন্তুক যায় বিশ্বাস না করে উয়াক দোষী বুলিয়া আগতে ঠিক করা হইচে, কেনেনা উয়ায় ভগবানের একনায় মাত্র বেটার উপরত বিশ্বাস করে নাই।

১৯ উয়াক দোষী কয়া ঠিক করা হইচে কেনেনা দুনিয়ার আলো আসচে কিন্তুক মানষির কাম বেয়া বুলিয়া আলোর চায়া আন্ধারক বেশী পিরিত করিচে।

২০ যে কাণ্ডে অন্যায় কাম করে উয়ায় আলোক ঘিন করে। উয়ার অন্যায় কামলা আলোত দেখা যাবে এই বাদে আলোত না আইসে।

২১ কিন্তুক যায় সত্যের ঘাটাত হাটে উয়ায় আলোরটে আইসে যাতে উয়ার কামলা ঝকঝকা করি বুঝা যায় যে উয়ার সউগ কাম ভগবানের ইচ্ছার মইদ্বো দিয়া হইচে।”

২২ ইয়ার পাছত যীশু উয়ার শিষ্যলার সাথত যিহুদীয়া এলাকাত আসিলেক। ওটেকোনা উয়ায় শিষ্যলার নগত রবার নাগিলেক আর মানষিলাক দীক্ষা দিবার নাগিলেক।

২৩ শালীম নামে একটা গেরামের ঐটে ঐনোন নামে একটা জাগাত যোহন সেলো দীক্ষা দিবার ধরছিলেক। কেনেনা ওটেকোনা মেয়ো জল আছিলেক, আর মানষিলা উয়ারটে আসিয়া দীক্ষা নিবার ধরছিলেক।

২৪ সেলোও যোহনক জেলখানাত বন্দী করি থোয়া হয় নাই।

২৫ সেই সমায় যিহুদী ধর্মের নিয়ম মতন শুদ্ধি হওয়ার বিষয় নিয়া যোহনের শিষ্যলোর নগত এক জন যিহুদীর সাথত তর্ক নাগিলেক।

২৬ তার পাছত উমরা যোহনক আসিয়া কইলেক, “গুরু, যায় যর্দন নদীর ঐ পারত তোমার নগত আছিলেক, আর যার বিষয় তোমরা সাক্ষী দিচিলেন, উয়ায়ে দীক্ষা দিবার ধরচে আর সগায় উয়ারটে যাবার ধরচে।”

২৭ যোহন কইলেক, “স্বর্গ থাকি যদি কিছু দেওয়া না হইলেক হয় তাইলে কাণ্ডো কোন কিছুই পাইলেক না হয়।

২৮ তোমরালা নিজেই শুনিচেন যে মুই কইচুং ‘মুই বাছাই করা রাজা না হং! কিন্তুক মোক উয়ার আগত পেঠা হইচে।’

২৯ কইনা বরের বাদে, কিন্তুক বরের বন্ধু উয়ার বগলত খাড়া হয় রয় উয়ার কতা শুনির বাদে। আর উয়ায় যেলা বরের গালার আওয়াজ শুনির পায় সেলা খুব খুশি হয়। এই বাদে মোর আজি আনন্দ পূরণ হইলেক।

৩০ উয়াক বড় হয় উঠির নাগিবে আর মোক সরি যাবার নাগিবে।

৩১ “যায় উপর থাকি আইসে উয়ায় সগার উপরত। যায় দুনিয়া থাকি আইসে উয়ায় দুনিয়ার আর উয়ায় দুনিয়ার কতায় কয়। যায় স্বর্গ থাকি আইসে উয়ায় সগার উপরত।

৩২ উয়ায় যেইটা দেখিচে, আর শুনিচে উয়ারে সাক্ষী দেয়।  
কিন্তুক উয়ার সাক্ষ্য কাণ্ডো মানি নিবার রাজি না হয়।

৩৩ যায় উয়ার সাক্ষ্য মানি নেয় উয়ায় উয়ার দিয়া প্রমাণ হয় যে  
ভগবান যেইটা কইচে সেইটা সচাং।

৩৪ ভগবান যাক পেঠায় উয়ায় ভগবানের কতায় কয়। কেনেনা  
ভগবান উয়াক পবিত্র আত্মা দিয়া ভরপুর করে।

৩৫ বাপ বেটাক পিরিত করে আর উয়ার হাতত সউগ কিছু সঁপে  
দিচে।

৩৬ যে কাণ্ডো বেটার উপরত বিশ্বাস করে উয়ায় সেলায় অমৃত  
জীবন পায়। কিন্তুক যায় বেটাক মান্য করে না উয়ায় জীবন কোন  
দিনও পায় না। বরং উয়ার উপরত ভগবানের গোসা থাকিবে।”

৪ ফরীশীলা শুনির পাইলেক যে যীশু যোহনের চায়া বেশী শিষ্য  
বানাইচে আর দীক্ষা দিবার ধরচে।

২ যদিও যীশু নিজে দীক্ষা দেয় নাই উয়ার শিষ্যলায় দিবার  
ধরছিলেক।

৩ যীশু এইটা জানির পায়া যিহুদীয়া প্রদেশ ছাড়িয়া আরো  
গালীল প্রদেশত ফিরি গেইলেক।

৪ গালীল প্রদেশত যাবার সমায় উয়াক শমরীয়া প্রদেশের মইন্ধো  
দিয়া যাওয়ার নাগিল।

৫ যাকব উয়ার বেটা যোষেফক যে জমি দান করিচে উয়ার বগলত শমরীয়াত শুখর নামে এক গেরামত যীশু গেইলেক।

৬ ঐ গেরামত যাকবের চুয়াটা আছিলেক। বেলা দুপর সমায় ঘাটা হাটিতে হাটিতে হাপসিয়া যীশু চুয়াটার বগলত বসিলেক।

৭ এমন সমায় শমরীয়ার এক জন বেটিছাওয়া জল তুলির আসিলেক। যীশু উয়াক কইলেক, “মোক অল্প জল খাবার দেও।”

৮ ঐ সমায় যীশুর শিষ্যলো খাবার কিনির গেরামত গেইছিলেক।

৯ শমরীয় বেটিছাওয়াটা উয়াক কইলেক, “মুই তো এক জন শমরীয়র বেটিছাওয়া। তোমরা যিহুদী হয় ক্যেমন করি মোরটে জল চাবার ধরচেন?” বেটিছাওয়াটা এই কতাটা কইলেক, ক্যেনেনা যিহুদী আর শমরীয়র মইন্ধোত ছোয়া ছুয়ির বাছ বিচার আছিলেক।

১০ যীশু কইলেক, “তুই যদি জানিলু হয় ভগবানের দান কি আর কায় তোরটে খাবার জল চাবার ধরচে, তাইলে তুইয়ে মোরটে জল চালু হয়, আর মুই তোক জীবন্ত জল দিলুং হয়।”

১১ বেটিছাওয়াটা কইলেক, “ভাইরে, তোমারটে তো জল তুলির কোন কিছুই নাই আর চুয়াটার জল খুব নিচাত, তাইলে জীবন্ত জল কোটে থাকি পাইলেন?

১২ তোমরা কি হামারলার বাপ, ঠাকুর দাদা যাকবের চায়া মহান? এই চুয়াটা উয়ায় হামাক দিচে। উয়ায় নিজে এই চুয়ার

জল খাইচে, উয়ার ছাওয়া ছোট আর পশুপালও এই চুয়ার থাকি  
জল খাইচে।”

১৩ যীশু স্যেলা উয়াক কইলেক, “যে কাণ্ডো এই জল খায়  
উয়ার আরো টিস্সা নাগিবে।

১৪ কিন্তুক মুই যে জল দিম, যায় সেই জল খাবে উয়ার কোন  
দিনও টিস্সা নাগিবে না। এই জল উয়ার অন্তরত জোয়ারের  
জলের নাকান উখুলি উঠিয়া অমৃত জীবন দিবে।”

১৫ বেটিছাওয়াটা স্যেলা কইলেক, “ভাইরে, সেই জলেই মোক  
দেও যাতে মোর আর টিস্সা না নাগে আর মোক জল তুলির  
এটেকোনা আসির না নাগে।”

১৬ যীশু স্যেলা কইলেক, “তাইলে যা তোর সোয়ামিক এটে  
কোনা ডেকে আনেক।”

১৭ স্যেলা বেটিছাওয়াটা কইলেক, “মোর সোয়ামি নাই।” যীশু  
উয়াক কইলেক, “তুই ঠিকেই কইচিস, তোর সোয়ামি নাই।

১৮ কেনেনা ইয়ার আগত তোর পাঁচজন সোয়ামি হয় গেইচে।  
আর এলা যায় তোর নগত আছে উয়ায় তোর সোয়ামি নোয়ায়।  
তুই সচাং এ কইচিস।”

১৯ স্যেলা বেটিছাওয়াটা যীশুক কইলেক, “মুই এলা বুঝির  
পালুং যে, তোমরা এক জন ভগবানের ভাববাদী।

২০ হামারলার চৌদগুষ্টিলাও এই পাহাড়ত উপাসনা করির  
ধরছিলেক, কিন্তুক তোমরালা কন যে, যিরুশালেমোতে

মানষিলার উপাসনা করা দরকার।”

২১ যীশু উয়াক কইলেক, “শোন, মোর কতাত বিশ্বাস করেক, এমন সমায় আসির ধরচে যেলা তোমরা ভগবানের উপাসনা এই পাহাড়তও করিবেন না। যিরুশালেমোত ও করিবেন না।

২২ তোমরা শমরীয়লা জানেন না যে তোমরা কার উপাসনা করেন, হামরা যিহুদীলা কার উপাসনা করি হামরা জানি, কেনেনা যিহুদীলার মইন্ধো থাকি মুক্তি আসিচে।

২৩ কিন্তুক এমন সমায় আসির ধরচে আর এলায় সেই সমায় আসিচে যেলা সচাং উপাসনা-কারিলা আত্মায় আর সত্যে বাপের উপাসনা করিবে। স্বর্গের বাপও এই নাকান উপাসনা কারিলাকে খোজে।

২৪ ভগবান হইলেক আত্মা, যায় যায় উয়ার উপাসনা করে, আত্মায় আর সত্যে উমারলাক সেই উপাসনা করির নাগিবে।”

২৫ সেয়া সেই বেটিছাওয়াটা কইলেক, “মুই জানং, বাছাই করা রাজা মশীহ (গ্রীক ভাষাত যাক ‘খ্রীষ্ট’ কওয়া হয়) যেলা আসিবে, সেয়া সউগ কিছুই হামারলাক জানাবে।”

২৬ যীশু উয়াক কইলেক, “মুই এ উয়ায়, যায় তোমার নগত কতা কবার ধরচে।”

২৭ এমন সমায় যীশুর শিষ্যলা আসিয়া এক জন বেটিছাওয়ার নগত যীশুক কতা কওয়া দেখিয়া অচানক হইলেক। কিন্তুক



উমরানা কাণ্ডায় কইলেক না, “তোমরা কি চান? বা কেনে তোমরা উয়ার নগত কতা কবার ধরচেন?”

২৮ ওই বেটিছাওয়াটা স্যেলা উয়ার কলসি ফ্যেলে থুইয়া গেরামত গেইলেক আর মানষিলাক কইলেক,

২৯ “তোমরানা আইস, এক জন মানষিক দেখো, মুই জীবনে যা যা করিচুং সউগে উয়ায় মোক কইচে। তাইলে উয়ায় কি সেই বাছাই করা রাজা?”

৩০ স্যেলা মানষিলা গেরাম থাকি বির হয় যীশুরটে আসির নাগিলেক।

৩১ ইয়ার মইন্ধে যীশুর শিষ্যলা উয়াক অনুরোধ করি কইলেক, “গুরু, কিছু খায়া নেও।”

৩২ কিন্তু যীশু উমারলাক কইলেক, “মোরটে এমন খাবার আছে যার কতা তোমরানা কিছুই জানেন না।”

৩৩ ইয়াতে শিষ্যলা কওয়া কওয়ি করির নাগিলেক, “তাইলে কি কাণ্ডায় উয়াক কিছু খাবার আনি দিচে?”

৩৪ স্যেলা যীশু উমারলাক কইলেক, “যায় মোক পেঠাইচে তার ইচ্ছা পালন করা আর উয়ার কাম শেষ করায় হইলেক মোর খাবার।

৩৫ তোমরানা কি কন না, ‘আর চার মাস বাকি আছে, তার পরেই ফসল কাটির সময় হবে?’ কিন্তুক মুই তোমারলাক কবার

ধরচুং, একবার ভাল করি ক্ষ্যেতের ভিত্তি চোখু মেলিয়া চায়া দেখ,  
ফসললা কাটির মত হইচে।

৩৬ যায় ফসল কাটে উমরা মজুরি এলায় পাবার ধরচে ঐ  
মানষিলা এই ফসল কাটির ধরচে মানষিক ভগবানের ঘাটাত  
আনিয়া উমার অমৃত জীবন লাভ করির বাদে। ইয়ার ফলে বিচন  
যায় ফ্যেলায় আর ফসল যায় কাটে দুই জনেই সমান খুশি হয়।

৩৭ ইয়াতে এই কতা প্রমাণ হয় যে, ‘এক জন বিচন ফ্যেলায়  
আর অন্যজন কাটে।’

৩৮ মুই তোমারলাক এমন ফসল কাটির পেঠাইচুং, যার বাদে  
তোমরালা কোন কঠুর পরিশ্রম করেন নাই। অইন্য মানষিলা  
কঠুর পরিশ্রম করিচে আর তোমরালা ঐলা ফসল কাটিচেন।”

৩৯ বেটিছাওয়াটা এই কয়া সাক্ষ্য দিবার নাগিলেক, “মুই যেইলা  
করিচুং উয়ায় ঐলা সউগে মোক কয়া দিচে, উয়ার কতা শুনিয়া  
ঐ গেরামের মেয়ো শমরীয় মানষি, উয়ায়ে যে বাছাই করা রাজা  
এইটা বিশ্বাস করিলেক।”

৪০ এই শমরীয়লা যীশুরটে যায়া উমারলার নগত উয়াক থাকির  
অনুরোধ করিলেক এই বাদে যীশু ওটেকোনা দুই দিন রইলেক।

৪১ সেয়ো উয়ার কতা শুনিয়া আরো মেয়ো মানষি বিশ্বাস  
করিলেক।

৪২ উমরা ঐ বেটিছাওয়াটাক কইলেক, “এলা যে হামরা বিশ্বাস  
করিচি সেইটা খালি তোমার কতাত না হয়, কিন্তু হামরা নিজেই

উয়ার কতা শুনি বুঝির পাচি যে, সচাং এ উয়ায় দুনিয়ার মুক্তিদাতা।”

৪৩ শমরীয়াত দুই দিন থাকির পাছত উয়ায় ওটে হাতে গালীল প্রদেশ চলি গেইলেক।

৪৪ যীশু নিজে কইচিলেক যে, নিজের দেশত কোনো ভগবানের ভাববাদী সন্মান পায় না।

৪৫ পার্বনের সমায় যীশু যিরুশালেমত যেইলা করিচিলেক, গালীলের মানষিলা সেই পার্বনত গেইচে বুলিয়া সউগে দেখির পাইচে। এই বাদে যীশু যেলা গালীলত গেইলেক সেলা ওটেকার মানষিলা উয়াক মানি নিলেক।

৪৬ পাছত যীশু আরো গালীলের ওই কান্না নগরত গেইলেক। এটেকোনায় উয়ায় জলক আংগুর রস বানাইছিলেক। গালীলের কফরনাহুম গঞ্জত এক জন রাজকর্মচারীর বেটা অসুখত ভুগছিলেক।

৪৭ যীশু যিহুদীয়া থাকি গালীল আসিচে শুনিয়া ওই রাজকর্মচারীটা উয়ারটে গেইলেক, আর বিনতি করিলেক যেনে উয়ায় কফরনাহুমোত যায়া উয়ার বেটাক সুস্থ করে। কেনেনা উয়ার বেটাটা সেলা মরি যাবার নাকান হইছিলেক।

৪৮ যীশু সেই রাজকর্মচারীটাক কইলেক, “কোন চিন বা কোন অচানক অচানক কামের চিন না দেখিলে তোমরালা কোনো মতেই বিশ্বাস করেন না।”

৪৯ সেলো ওই রাজকর্মচারীটা কইলেক, “দয়া করি মোর বেটাটা মরি যাবার আগতে আইসো।”

৫০ যীশু উয়াক কইলেক, “তুই বাড়ি যা, তোর বেটাটা বত্তিলেক।” ইয়াতে উয়ায় যীশুর কতাতে বিশ্বাস করি চলি গেইলেক।

৫১ ওই রাজকর্মচারীটা সেলো বাড়ি যাবার ধরছিলেক সেলো ঘাটাতে উয়ার চাকরনা উয়ারটে যায়া কইলেক, “তোমার বেটা ভাল হয় গেইচে।”

৫২ উয়ায় উয়ার চারকলাক পুছিলেক, “উয়ায় কোন বেলা ভাল হইচে?” উমরালা কইলেক, “যাওয়া কালি, দুপর বেলা একটার সমায় উয়ার জ্বর ছাড়িচে।”

৫৩ ইয়াতে চেংড়াটার বাপ বুঝির পাইলেক যে, ঠিক সেই সমায়েই যীশু উয়াক কইছিলেক, “তোমার বেটা বাঁচিলেক।” সেলো সেই রাজকর্মচারীটা আর উয়ার পরিবারের সগায় যীশুর উপরা বিশ্বাস করিলেক।

৫৪ যিহুদীয়া থাকি গালীলত আইসার পাছত যীশু এই দ্বিতীয় অচানক চিনের কাম করিলেক।

৫ এইলা ঘটনার পাছত যীশু যিরুশালেমত গেইলেক, কেনেনা ওটেকোনা যিহুদীলার একটা পার্বন আছিলেক।

২ যিরুশালেমের ভেড়ার-গেটের বগলত একটা দীঘি আছিলেক,  
ইব্রীয় ভাষাত এই দীঘিটার নাম বৈথেস্‌দা কওয়া হয়। ওটেকোনা  
পাঁচ খান ছাপড়া দেওয়া জাগা আছিলেক।

৩ এই ছাপড়ালাত ম্যেলা অসুকিয়া মানষি শুতিয়া আছিলেক,  
উমারলার মইন্ধোত কাণ্ডো কাণ্ডো কানা, খোড়া, এমন কি দেহা  
শুকিয়া গেইচে এমন মানষিও উমারলার মইন্ধোত আছিলেক।

৪ এক জন স্বর্গদূত মাঝে মইন্ধে ঐ দীঘিটাত নামিয়া জললা  
কাপায়, আর জল কাপার পাছত যায় পরথমে ঐ জলত নামে  
উয়ার যে কোন অসুখ ভাল হয়। ঐ অসুকিয়া মানষিলা জল  
কাপিবার বাদে ওটেকোনা বাছে রবার ধরছিলেক।

৫ ওটেকোনা এমন এক জন মানষি আছিলেক, যায় আটত্রিশ  
বছর ধরিয়া অসুখত ভুগিবার ধরছিলেক।

৬ যীশু দেখিলেক যে উয়ায় অসুখে ভুগিবার ধরচে, আর উয়াক  
ম্যেলা দিন থাকি পড়ি থাকির শুনিয়া, অসুকিয়া মানষিটাক  
কইলেক, “তুই কি ভাল হবার চাইস?”

৭ অসুকিয়া মানষিটা কইলেক, “বাহে, মোর এমন কাণ্ডো নাই যে  
জল কাপার সময় মোক দীঘিত নামে দিবে। মুই ওটে যাইতে না  
যাইতেই অইন্য কাণ্ডোয় মোর আগত দীঘিত নামি পড়ে।”

৮ যীশু উয়াক কইলেক, “ওঠেক! তোর বিছনা তুলি নিয়া হাটি  
বেড়াও।”

৯ সেলোয় সেলোয় মানষিটা ভাল হয় গেইলেক, আর উয়ার বিছনা তুলি নিয়া হাটির নাগিলেক। এই দিনটা আছিলেক যিহুদী নিয়মে জিরানের দিন।

১০ এই দিনত যে মানষিটাক ভাল করা হইচে উয়াক যিহুদী নেতালা কইলেক, “আজি জিরানের দিন, ধর্মের নিয়ম মতে এই দিনত বিছনা উবি নিয়া বেড়া তোর উচিত না হয়।”

১১ সেলো অসুকিয়া মানষিটা কইলেক, “যায় মোক ভাল করিচে উয়ায়ে মোক কইচে যে, ‘তোর বিছনা তুলি নিয়া হাটিয়া বেড়াও।’ ”

১২ উমরা ওই মানষিটাক পুছিলেক, “কায় তোক কইচে যে ‘তোর বিছনা তুলি নিয়া হাটিয়া বেড়াও?’ ”

১৩ কিন্তুক যেই মানষিটা ভাল হইচে উয়ায় জানে না যে, যায় উয়াক ভাল করিচে উয়ায় কায়। কেনেনা ওটেকোনা মেলা মানষি ভিড় করিচিলেক আর যীশু ওটে হাতে চলি গেইছিলেক।

১৪ তার পাছত যীশু যিহুদীলার দশংগতি মন্দিরত মানষিটাক দেখা পায়া পুছিলেক, “দেখেক, তুই এলা ভাল হইচিস, আর পাপত জীবন না কাটাইস, যাতে তোর আরো কোনো বেয়া না হয়।”

১৫ সেলো মানষিটা যায় যিহুদী নেতালাক কইলেক যে, উয়াক যায় ভাল করিচে উয়ার নাম যীশু।

১৬ কেনেনা জিরানের দিনত যীশু এইলা কাম করির ধরছিলেক দেখিয়া যিহুদী নেতালা উয়াক অইত্যাচার করিলেক।

১৭ সেলো যীশু নেতালাক কইলেক, “মোর স্বর্গের বাপ সউগ সমায় কাম করে আর এই বাদে মুইও করির ধরচুং।”

১৮ যীশুর এই কতার বাদে যিহুদী নেতালা উয়াক মারি ফ্যেলের বাদে উঠি পরি নাগিলেক, কেনেনা উয়ায় যে খালি জিরানের দিনের নিয়ম ভাঙে নাই এমন না হয়, ভগবানক বাপ করি ডেকেয়া নিজক ভগবানের সমানও করিচিলেক।

১৯ ইয়াতে যীশু নেতালাক কইলেক, “মুই সচাং করি তোমারলাক কবার ধরচুং, বেটা নিজের থাকি কিছুই করির পারে না। স্বর্গের বাপক যা করির দেখে খালি সেইটায় করির পারে, কেনেনা বাপ যেইটা করে বেটাও ঐটায় করে।

২০ বাপ বেটাক পিরিত করে, আর উয়ায় যেইলা করে সউগে বেটাক দেখায়। ইয়ার চায়া আরো বড় বড় কাম বেটাক দেখাবে। যাতে বেটাক সেই কামলা করির দেখিয়া তোমরালা অচানক হন।

২১ স্বর্গের বাপ যেমন মরা মানষিক জীবন দিয়া বত্তে তুলে একে নাকান বেটাও যাকে ইচ্ছা তাকে জীবন দেয়।

২২ স্বর্গের বাপ কাণ্ডোরো বিচার করে না, কিন্তুক সউগ বিচারের ভার উয়ায় বেটার হাতত দিচে।

২৩ যে কাণ্ডো বাপক সন্মান করে একে নাকান বেটাকও যাতে সন্মান করে। বেটাক যায় সন্মান না করে, যায় উয়াক পেঠাইচে

সেই স্বর্গের বাপকও উয়ায় সন্মান করে না।

২৪ “মুই তোমারলাক সচাং করি কবার ধরচুং, মোর কতা যায় শোনে আর যায় মোক পেঠাইচে উয়াক বিশ্বাস করে উয়ায় অমৃত জীবন লাভ করে। উয়ার দোষ ধরা হবে না, উয়ায় মরণের জীবন পার হইচে।

২৫ মুই তোমারলাক সচাং করি কবার ধরচুং, এমন সমায় আসির ধরচে, বরং আসিচে, য়েলা মরালা ভগবানের বেটার গালার আওয়াজ শুনিবে আর যায় যায় শুনিবে উমরালা বত্তি উঠিবে।

২৬ ইয়ার কারন হইলেক, স্বর্গের বাপের যেমন জীবন দান করার ক্ষমতা আছে একে নাকান বেটাকও জীবন দান করির ক্ষমতা দিচে।

২৭ “স্বর্গের বাপ বেটাক মানষির বিচার করিবার অধিকার দিচে, কেনেনা উয়ায় বাছাই করা মানষি।

২৮ এই কতা শুনিয়া তোমরালা অচানক না হন, কেনেনা এমন সমায় আসির ধরচে, যায় যায় সমাধিত আছে উমরালা সগায় বাছাই করা মানষিটার গালার আওয়াজ শুনিয়া সমাধি থাকি নিকলি আসিবে।

২৯ যায় যায় ভাল কাম করিচে তায় তায় জীবন পাবার বাদে উঠিবে, আর যায় যায় অন্যায় কাম করিয়া জীবন কাটাইচে উমরা শাস্তি পাবার বাদে উঠিবে।



৩০ মুই নিজে থাকি কোন কিছুই করির পারং না, যেমন শুনং তেমন বিচার করং। মুই ন্যায়ের বিচার করং। কেনেনা মুই মোর নিজের ইচ্ছা মতন কাম করং না। কিন্তুক যায় মোক পেঠাইচে উয়ারে ইচ্ছা মতন কাম করির চাং।”

৩১ “মুইয়ে যদি মোর নিজের হয় সাক্ষী দেং, তাইলে মোর বাদে সেই সাক্ষ্য সচাং হবার না হয়।

৩২ অইন্য এক জন আছে যায় মোর হয় সাক্ষী দিবার ধরচে, আর মুই জানং উয়ায় মোর বিষয়ে যে সাক্ষ্য দিবার ধরচে সেইটা সচাং।

৩৩ তোমরা সগায় যোহনের নিজের মানষি পেঠাইচেন, আর উয়ায় সত্যের হয় সাক্ষ্য দিবার ধরচে।

৩৪ কিন্তুক মুই মানষির সাক্ষ্যের উপরত নির্ভর না করং। কিন্তুক যাতে তোমরালা পাপ থাকি মুক্তি পান এই বাদে এইলা কতা কবার ধরচুং,

৩৫ যোহন আছিলেক নেম্পোর নাকান যা জ্বলে আর আলো দেয়, তোমরালা অল্প সমায়ের বাদে সেই আলোত আনন্দ করির রাজি হইছিলেন।

৩৬ কিন্তুক যোহনের সাক্ষ্যের চায়া আরো বড় সাক্ষ্য মোরটে আছে, কেনেনা স্বর্গের বাপ যেইলা কাম মোক করির দিচে সেইলায় মুই করির ধরচুং। আর সেইলা কাম প্রমাণ করে যে স্বর্গের বাপে মোক পেঠাইচে।

৩৭ যেই স্বর্গের বাপ মোক পেঠাইচে, উয়ায় নিজে মোর বিষয়ে সাক্ষ্য দিচে। তোমরালা কাণ্ডায় কোনো দিন উয়ার গালার আওয়াজও শুনে নাই, চেহারাও দেখেন নাই।

৩৮ আর উয়ার শিক্ষাও তোমারলার অন্তরত নাই, কেনেনা ভগবান যাক পেঠাইচে, তোমরা উয়াক বিশ্বাস করেন না।

৩৯ তোমরালা সগায় পবিত্র শাস্ত্র খুব মন দিয়া পড়েন, কেনেনা তোমরা মনে করেন যে সেইলার দারায় তোমরা অমৃত জীবন পাবেন। কিন্তুক সেই শাস্ত্র তো মোরে বিষয়ে সাক্ষ্য দিবার ধরচে।

৪০ তাণ্ডো তোমরা সেই জীবন পাবার বাদে মোরটে আসির চান না।

৪১ “মুই মানষির প্রশংসা পাবার আশা করং না।

৪২ কিন্তু মুই তোমারলাক সগাকে জানং আর এইটাও জানং যে তোমারলার অন্তরত ভগবানের প্রতি পিরিত নাই।

৪৩ মুই মোর স্বর্গের বাপের নামের বাদে আসচুং, আর তাণ্ডো তোমরালা মোক মানি নিবার ধরচেন না, কিন্তুক অইন্য কাণ্ডো যদি উয়ার নিজের নামের বাদে আইসে তাইলে তোমরা উয়াক মানি নিবেন।

৪৪ তোমরালা এক জন অইন্য জনেরটে থাকি প্রশংসা পাবার আশা করেন, কিন্তুক সেই প্রশংসা এক মাত্র ভগবানেরটে থাকি পাওয়া যায় সেইটা পাবার আশা করেন না। ইয়ার পাছত তোমরা কেমন করি বিশ্বাস করির পারেন?

৪৫ তোমরালা মনে করেন না যে, মুই বাপেরটে তোমারলার দোষ দিম, কিন্তুক যেই মহাপুরুষ মোশির উপরা তোমরালা আশা করির ধরচেন সেই মোশিই তোমারলাক দোষী করে।

৪৬ যদি তোমরালা মোশিক বিশ্বাস করিলেন হয়, তাইলে মোকও বিশ্বাস করিলেন হয়। কেনেনা মোশি তো মোরে বিষয়ে নেখিচে।

৪৭ কিন্তুক যেলা তোমরা মোশির নেখা বিশ্বাস করেন না, সেলা কেমন করি মোর কতায় বিশ্বাস করিবেন?”

৬ ইয়ার পাছত যীশু গালীল সাগরের অইন্য পারত চলি গেইলেক। এই সাগরটাক তিবিরিয়া সাগরও কওয়া হয়।

২ মেলা মানষি যীশুর পাছে পাছে যাবার নাগিলেক, কেনেনা অসুকিয়া মানষিলাক সুস্থ করির বাদে উয়ায় যে অচানক চিনের কাম করচিলেক সেইলা মানষিলা দেখির ধরছিলেক।

৩ যীশু উয়ার শিষ্যলাক নিয়া পাহাড়ের উপরত যায়া বসিলেক।

৪ সেই সমায় যিহুদীলার মুক্তি ভোজ পার্বনের দিনও বগলোত আসছিলেক।

৫ যীশু যেলা দেখিলেক মেলা মানষি উয়ার বগলত আসির ধরচে। সেলা উয়ায় ফিলিপক কইলেক, “এই মানষিলাক খোয়ের বাদে হামরা কোনটে থাকি রুটি কিনিমু?”

৬ ফিলিপক পরীক্ষা করির বাদে উয়ায় এই কতাটা কইলেক, কেনেনা উয়ায় জানে উয়ায় কি করিবে।

৭ ফিলিপ যীশুক কইলেক, “সগারে হাতত এক টুকরা করি রুটি দিবার গেইলেও আট মাসের কামাইয়ের টাকা কুলাবে না।”

৮ যীশুর শিষ্যলার মইদ্বোত একজনের নাম আছিলেক আন্দ্রিয়। উয়ায় আছিলেক শিমোন-পিতরের ভাই।

৯ আন্দ্রিয় যীশুক কইলেক, “এটেকোনা একটা ছোট চেংড়ারটে পাঁচটা যবের রুটি আর দুইটা মাছ আছে। কিন্তুক এতলা মানষির মইদ্বোত ঐলা কি হবে?”

১০ যীশু কইলেক, “মানষিলাক বসে দেও।” ঐ জাগাত মেলা ঘাস আছিলেক। মানষিলা উয়ার উপরত বসিলেক। ওটেকোনা বেটাছাওয়া আছিলেক কমপক্ষে পাঁচ হাজার।

১১ ইয়ার পাছত যীশু রুটি কয়খান নিয়া ভগবানক ধন্যবাদ দিলেক, আর ওটেকোনা যায় যায় বসিছিলেক উমারলাক ভাগ করি দিলেক। একে নাকান মাছও ভাগ করি দিলেক। যায় যত চাইলেক উয়ায় অত পাইলেক।

১২ মানষিলা পেট ভরে খাওয়ার পাছত, যীশু উয়ার শিষ্যলোক কইলেক, “যেইলা টুকরা টাকরা পরি আছে সেইলা একটে করো যাতে কোন কিছু নষ্ট না হয়।”

১৩ মানষিলা খাবার পাছত যে পাঁচ খান রুটির টুকরা টাকরা পড়ি আছিলেক, শিষ্যলা সেইলা জড়ো করি বারো ডেলি ভরতি

করিলেক।

১৪ যীশুর এই অচানক চিনের কাম দেখিয়া মানষিলা কবার নাগিলেক, “দুনিয়াত যেই ভাববাদী আসির কতা আছিলেক, সচাং ইয়ায়ে সেই ভাববাদী।”

১৫ ইয়াতে যীশু বুঝির পাইলেক, মানষিলা উয়াক জোর করি উমারলার রাজা বানেবার বাদে ধরির আসির ধরচে। এই বাদে উয়ায় একলায় আরো ঐ পাহাড়ত চলি গেইলেক।

১৬ সইন্কা হবার পাছত যীশুর শিষ্যলো সাগরের পারত গেইলেক।

১৭ আর উমরা একখান নাওত উঠিয়া কফরনাহুম নামের গঞ্জত যাবার বাদে সাগর পার হবার নাগিলেক। ঐ সমায় আন্কার হয়্যা গেইচে, আর যীশু সেলোও উমার ওটে আইসে নাই।

১৮ আর খুব জোরে বাতাস হবার ফলে সাগরত বড় বড় ঢেউ উঠির ধরছিলেক।

১৯ ইয়ার মইন্ধোত তিন চাইর মাইল নাও বয়ে যাবার পাছত দেখিলেক, যীশু সাগরের জলের উপরা দিয়া হাটিয়া উমার নাওয়ের ওটে আসির ধরচে। এই দেখিয়া শিষ্যলো খুব হাতাস খাইলেক।

২০ সেলো যীশু উমারলাক কইলেক, “হাতাস না খান, এই তো মুই।”

২১ সেলো শিষ্যলো যীশুক নাওয়োত তুলি নিবার চাইলেক। আর উমরা যেটেকোনা যাবার ধরছিলেক নাওখান সেলোয় ওটেকোনা

পৌংচি গেইলেক।

২২ সাগরের অইন্য পারত যেই মানষিলা খাড়া হয় আছিলেক, পরের দিন উমরা বুঝির পাইলেক যে একখান নাও ছাড়া আর অইন্য কোন নাও ওটেকোনা আছিলেক না। উমরা আরো বুঝির পাইলেক যে, যীশু উয়ার শিষ্যলার সোদে ওই নাওয়োত চড়ে নাই, বরং শিষ্যলা নিজে নিজে চলি গেইচে।

২৩ কিন্তুক যেটেকোনা প্রভুক ধন্যবাদ দিবার পাছত মানষিলা রুটি খাইছিলেক, ওটেকোনা সেলো তিবিরিয়া থাকি কয়েকখান নাও আসিলেক।

২৪ কিন্তুক যেলা মানষিলা দেখিলেক যে যীশু আর উয়ার শিষ্যলা কাণ্ডায় ওটেকোনা নাই সেলো উমরা ঐ নাওখানত উঠিয়া যীশুক খুজির বাদে কফরনাহুম গেইলেক।

২৫ উমরা সাগরের অইন্য পারত যায় যীশুক দেখির পায়া কইলেক, “গুরু, তোমরা কোন সমায় এটেকোনা আসচেন?”

২৬ যীশু কইলেক, “মুই তোমারলাক সচাং করি কবার ধরচুং, তোমরালা অচানক চিনের কাম দেখিচেন এই বাদে যে মোক খুজির নাগচেন তা কিন্তুক না হয়, বরং পেট ভরেয়া রুটি খাবার পাইচেন বুলিয়া মোক খুজির ধরচেন।

২৭ কিন্তু যে খাবার নষ্ট হয় যায় সেই খাবারের বাদে ব্যস্ত হয় লাভ কি? যে খাবার নষ্ট না হয় বরং অমৃত জীবন দান করে উয়ারে বাদে ব্যস্ত হন। সেই খাবারেই বাছাই করা মানষিটা দিবে,

কেনেনা স্বর্গের বাপ ভগবান প্রমাণ করি দেখে দিচে যে, এই কাম করির অধিকার খালি উয়ারে আছে।”

২৮ উমরা যীশুক কইলেক, “ভগবানের কাম করির বাদে হামারলাক কি করির নাগিবে?”

২৯ যীশু কইলেক, “ভগবান যাক পেঠাইচে তোমরা যেন উয়াক বিশ্বাস করেন, এইটায় হইলেক ভগবানের কাম।”

৩০ উমরা উয়াক কইলেক, “তাইলে তোমরা এমন অচানক চিনের কাম করিবেন যা দেখি হামরা তোমাক বিশ্বাস করির পারি? তোমরা কি কাম করির ধরচেন?

৩১ হামার চৌদ্দ গুষ্টি নিধুয়া পাথারত মান্না রুটি খাইছিলেক। শাস্ত্রত নেখা আছে, ‘ভগবান স্বর্গ থাকি উমারলাক রুটি খাবার দিচে।”

৩২ যীশু উমারলাক কইলেক, “মুই তোমারলাক সচাং করি কবার ধরচুং, স্বর্গ থাকি যে রুটি তোমরালা পাইছিলেন, সেইটা মহাপুরুষ মোশি তোমারলাক দেয় নাই। কিন্তুক মোর বাপ সত্যিকারের রুটি স্বর্গ থাকি তোমারলাক দিবার ধরচে।

৩৩ ভগবান স্বর্গ থাকি নামি আসি, এই দুনিয়াত জীবন দান করে উয়ায়ে ভগবানের দেওয়া রুটি।”

৩৪ মানষিলা কইলেক, “গুরু, তাইলে সেই রুটি সউগ সমায় হামারলাক দেন।”

৩৫ যীশু উমারলাক কইলেক, “মুইয়ে সেই জীবন রুটি। যায় মোরটে আসিবে উয়ার কোন দিন ভোগ নাগির না হয়। যায় মোর উপরত বিশ্বাস করে উয়ার কোন দিনও টিস্সা পাবার না হয়।

৩৬ মুই তো তোমারলাক কবার ধরচুং, তোমরালা মোক দেখির ধরচেন কিন্তুক তাণ্ডো বিশ্বাস করেন না।

৩৭ বাপ যাক যাক মোক দেয় উমরা সগায় মোরটে আসিবে। যায় মোরটে আইসে মুই উমাক কোন মতে বায়রাত ফ্যেলে দিম না।

৩৮ কেনেনা মুই মোর ইচ্ছা পূরণ করির বাদে আইসোং নাই। বরং যায় মোক পেঠাইচে উয়ার ইচ্ছা পূরণ করির বাদে স্বর্গ থাকি নামি আসচুং।

৩৯ যায় মোক পেঠাইচে উয়ার ইচ্ছা এই যে, যাক যাক মোক দিচে উমারলাক একজনাকও যাতে মুই না হারাং বরং শেষ কালত সগাকে বত্তে তোলোং।

৪০ মোর বাপের ইচ্ছা যায় যায় বেটাক দেখিয়া উয়ার উপরত বিশ্বাস করে উমরালা যাতে অমৃত জীবন পায়। আর মুইএ উমারলাক সগাকে শেষ কালত বত্তে তুলিম।”

৪১ সেয়া যিহুদী নেতালা যীশুর বিরুদ্ধে বকর বকর করির নাগিলেক, কেনেনা যীশু কইচিলেক, “স্বর্গ থাকি যে রুটি নামি আসিচে মুইয়ে সেই রুটি।”



৪২ নেতালা কবার নাগিলেক, “ইয়ায় কি যোষেফের বেটা যীশু না হয়? ইয়ার বাপ মাক তো হামরা চিনি। তাইলে ইয়ায় কেমন করি কয়, ‘মুই স্বর্গ থাকি নামি আসচুং?’ ”

৪৩ যীশু উমারলাক কইলেক, “তোমরালা নিজেরলার মইদ্বোত বকর বকর করেন না।

৪৪ মোর স্বর্গের বাপ, যায় মোক পেঠাইচে উয়ায় টানি না আনিলে কাণ্ডো মোরটে আসির পারে না। আর মুইয়ে উয়াক শেষ দিনত বত্তে তুলিম।

৪৫ ভগবানের ভাববাদীলার বইলাত নেখা আছে, ‘উমরা সগায় ভগবানেরটে হাতে শিক্ষা পাবে।’ যে কাণ্ডো স্বর্গের বাপেরটে থাকি শুনি শিক্ষা পাইচে উয়ায়ে মোরটে আইসে।

৪৬ স্বর্গের বাপক কাণ্ডোয় দেখে নাই, খালি উয়ায়ে দেখিচে যায় ভগবানেরটে থাকি আসিচে।

৪৭ মুই তোমারলাক সচাং করি কবার ধরচুং, যে কাণ্ডো মোর উপরত বিশ্বাস করে উয়ায় অমৃত জীবন পায়।

৪৮ “মুইয়ে সেই রুটি যেইটা জীবন দেয়।

৪৯ তোমারলার চৌদ গুটি নিধুয়া পাথারত মান্না খাইছিলেক, আর তাণ্ডো উমরালা মরি গেইচে।

৫০ কিন্তুক এইটায় সেই রুটি যা স্বর্গ থাকি নামি আসিচে, যাতে সেইটা খায়া মানষি মরণ থাকি রেহাই পায়।

৫১ মুইয়ে সেই জীবন্ত রুটি যেইটা স্বর্গ থাকি নামি আসচে। যায় এই রুটি খাবে উয়ায় চিরকালের বাদে জীবন পাবে। মোর দেহায় সেই রুটি, দুনিয়া যাতে জীবন পায় এই বাদে মুই মোর দেহা দিম।”

৫২ এই কতা শুনিয়া যিহুদী নেতালার মইন্ধোত তর্কাতর্কি নাগিলেক। উমরা কবার নাগিলেক, “কেমন করি এই মানষিটা উয়ার দেহা হামারলাক খাবার দিবার পারে?”

৫৩ যীশু কইলেক, “মুই তোমারলাক সচাং করি কবার ধরচুং, তোমরা যদি বাছাই করা মানষিটার সঁপে দেওয়া দেহা আর অত্ত না নেন তাইলে তোমারলার মইন্ধোত জীবন নাই।

৫৪ মানষি খাবার খাইলে বভায় থাকে, একে নাকান মোর সঁপে দেওয়া দেহা আর অত্ত নেন তাইলে উয়ায় অমৃত জীবন পায়। আর মুই শেষ দিনত উয়াক বত্তে তুলিম।

৫৫ মোর দেহা মোর অত্ত মানষিক আত্মিক ভাল খাবার দিয়া সুস্থ থোয়, একে নাকান ভাল খাবার দেহা সুস্থ থোয়।

৫৬ যায় মোর সঁপে দেওয়া দেহা আর অত্ত নেয়, উয়ায় মোর মইন্ধোত থাকে, আর মুইও উয়ার মইন্ধোত থাকং।

৫৭ জীবন্ত বাপ মোক পেঠাইচে আর উয়ার বাদে মুই বভায় আছং। ঠিক একে নাকান মোর সঁপে দেওয়া দেহা আর অত্ত যায় নেয় উয়ায়ও মোর বাদে বভায় থাকিবে।

৫৮ এইটায় সেই রুটি যেইটা স্বর্গ থাকি নামি আসচে। তোমারলার চৌদ্দ গুটি যেই মান্না রুটি খায়াও মরিচে। কিন্তু এই রুটি যায় খাবে উয়ায় চিরকাল বত্তি থাকিবে।”

৫৯ কফরনাহুমের উপাসনা ঘরত শিক্ষা দিবার সমায় যীশু এই কতা কইচে।

৬০ উয়ার বেশীর ভাগ শিষ্য এই কতা শুনিয়া কইলেক, “এই শিক্ষা খুব কঠিন, এইটা কায় মানি নিবার পারে?”

৬১ যীশু মনে মনে টের পাইলেক যে, উয়ার শিষ্যলো এই বিষয় নিয়া বকর বকর করির ধরচে। এই বাদে উয়ায় উমারলাক কইলেক, “এই শিক্ষা নিয়া তোমারলার কি বাধা মনে হয়?”

৬২ তাইলে বাছাই করা মানষিটা আগত যেটেকোনা আছিলেক ওটেকোনা তুলি নিয়া যাবার দেখিলে তোমরা কি কবেন?

৬৩ আত্মা জীবন দান করে, কিন্তু দেহা জীবন দান করির পারে না। মুই তোমারলাক যেইলা কতা কবার ধরচুং সেইলা আত্মিক আর এই কতালা জীবন দান করে।

৬৪ কিন্তুক তোমারলার মইন্ধোত এমন কিছু মানষি আছে উমরলা মোক বিশ্বাস করে না।” ক্যেনো কায় কায় যীশুক বিশ্বাস করে না আর কায় বা যীশুক শত্রুত হাতত ধরেয়া দিবে, যীশু পইলা থাকি এইলা জানে।

৬৫ এই বাদে উয়ায় কইলেক, “মুই তোমারলাক কবার ধরচুং যে, ‘বাপের ইচ্ছা না থাকিলে কাণ্ডো মোরটে আসির পারে না।’ ”

৬৬ যীশুর এই কতার বাদে মেয়ো শিষ্য মুখ ফিরি নিলেক উমরা যীশুর সোদে চলাফিরা বন্ধ করি দিলেক।

৬৭ এই বাদে যীশু উয়ার বারো জন খবরিয়াক কইলেক, “তোমরালাও কি চলি যাবার চান?”

৬৮ শিমোন-পিতর যীশুক কইলেক, “প্রভু, হামরা কার কারটে যামো? অমৃত জীবনের বাণী তো তোমারটেই আছে।

৬৯ হামরা বিশ্বাস করচি, আর জানিরও পাইচি যে, তোমরা ভগবানেরটে থাকি আসিচেন আর তোমরায় সেই পবিত্র মানষি।”

৭০ যীশু সেয়ো কইলেক, “মুই কি তোমারলাক বারো জনাকে বাছাই করং নাই? তাণ্ডো তোমারলার মইন্ধোত এক জন শয়তান অসুর আছে।”

৭১ এটেকোনা যীশু শিমোন ইষ্কোরিয়োটের বেটা যুদাসের কতা কইচিলেক, কেনেনা উয়ায়ে পাছত যীশুক শত্রুর হাতত ধরেয়া দেয়। উয়ায় আছিলেক সেই বারোজনের মইন্ধে এক জন।

৭২ ইয়ার পাছত যীশু গালীল প্রদেশের মইন্ধোত ঘুরাফিরা করির নাগিলেক। যিহুদী নেতালা উয়াক মারি ফ্যেলের চাইচে বুলিয়া উয়ায় যিহুদীয়া প্রদেশত ঘুরা ফিরা বন্ধ করি দিলেক।

৭৩ এই পাকে যিহুদীলার তাম্বু বানা পার্বন আসির ধরছিলেক।

৩ এই বাদে যীশুর ভাইলা যীশুক কইলেক, “এই জাগা ছাড়িয়া যিহুদীয়ার পার্বনত চলি যা, যাতে তুই যেইলা অচানক কামের দিন দেখের ধরচিস সেইলা তোর শিষ্যলাও দেখির পায়।

৪ কাণ্ডো যদি চায় মানষি উয়াক জানুক তাইলে উয়ায় গোপনে কোন কিছু করিবে না। তুই যেহেতু ভাল কাম করির ধরচিস তাইলে মানষিলাৰ আগত নিজক দেখাও।”

৫ আসল কতা হইলেক যীশুর ভাইলাও যীশুর উপরাত বিশ্বাস করে নাই।

৬ যীশু উয়ার ভাইলাক কইলেক, “মোর সমায় এলাও হয় নাই, কিন্তুক তোমরালা তো যে কোন সমায় যাবার পারেন।

৭ এই দুনিয়ার মানষিলা তোমারলাক ঘিন করির পারে না, কিন্তুক মোক ঘিন করে। কেনেনা মুই উমারলার বিষয় সাক্ষ্য দেং যে উমারলার সউগ কামে বেয়া।

৮ তোমরালায় পার্বনত যাও। মুই এলা না যাইম, কেনেনা মোর সমায় এলাও পূরণ হয় নাই।”

৯ এইলা কতা কয়া যীশু গালীল প্রদেশতে রয়া গেইলেক।

১০ কিন্তুক উয়ার ভাইলা পার্বনত চলি যাবার পাছত উয়ায়ও ওটেকোনা গেইলেক, কিন্তুক উয়ায় খোলাখুলি ভাবে না যয়া গোপনে গেইলেক।

১১ পার্বনের সমায় যিহুদী নেতালা যীশুক খুজির নাগিলেক, আরো পুছিলেক “ঐ মানষিটা কোটে?”

১২ ভিড়ের মানষিলা যীশুর বিষয়ে নানা নাকানের কতা কবার নাগিলেক। কাণ্ডো কাণ্ডো কবার নাগিলেক, “উয়ায় ভাল মানষি।” কিন্তুক কাণ্ডো কাণ্ডো কবার নাগিলেক যে, “না, উয়ায় মানষিলাক ভুল ঘাটাত নিয়া যাবার নাগচে।”

১৩ কিন্তুক যিহুদী নেতালার ভয়ে উয়ার বিষয়ে খোলাখুলি করি কাণ্ডো কোন কিছুই কবার চাইলেক না।

১৪ পার্বনের আধা-আধি সমায় যীশু দশংগতি মন্দিরত যায়া মানষিলাক শিক্ষা দিবার নাগিলেক।

১৫ ইয়াতে যিহুদী নেতালা অচানক হয়া কবার নাগিলেক “এই মানষিটা কোন লেখাপড়া না করিয়া কেমন করি এত জ্ঞানী হইলেক?”

১৬ ইয়ার উত্তরে যীশু উমারলাক কইলেক, “মুই যেইলা শিক্ষা দেং সেইলা মোর নিজের না হয়, যায় মোক পেঠাইচে উয়ারে।

১৭ যদি কাণ্ডো ভগবানের ইচ্ছা পালন করির চায় তাইলে উয়ায় বুঝির পাবে মুই যেইলা শিক্ষা দেং সেইলা ভগবানেরটে থাকি আসচে, না মুই নিজের থাকি এইলা কবার ধরচুং।

১৮ যায় নিজের ভাবনার কতা নিজে কয় উয়ায় নিজের গুণগান নিজে করে। কিন্তুক যায় পেঠাইচে, কাণ্ডো যদি উয়ারে গুণগান করে তাইলে উয়ায় সত্যবাদী আর উয়ার মনত কোন ছলনা নাই।

১৯ মহাপুরুষ মোশি কি তোমারলাক কোন আইন-কানুন দেয় নাই? কিন্তুক তোমারলার মইদ্বোত কাণ্ডো সেই আইন-কানুন মানে না। তাইলে তোমরা কেনে মোক মারি ফ্যেলের চাবার ধরচেন।”

২০ ভিরের মানষিলা উত্তর দিলেক, “তোক অপদেবতা ধরচে, কায় তোক মারি ফ্যেলের চেষ্টা করিচে?”

২১ ইয়ার উত্তরে যীশু উমারলাক কইলেক, “মুই একটা অচানক চিনের কাম করিচুং বুলিয়া তোমরা সগায় অবাক হবার ধরচেন।

২২ মোশি তোমারলাক দেহাত চিন দিবার নিয়ম দিচে, আর তোমরা এই চিন জিরানের দিনও দিয়া থাকেন। অবশ্য এই নিয়ম শ্রী মোশিরটে থাকি আইসে নাই, চৌদ গুটিরটে থাকি আসিচে।

২৩ শ্রী মোশির নিয়ম না ভাঙির বাদে জিরানের দিনত চেংড়ালাক দেহাত চিন দেওয়া যায়। আর মুই একটা মানষিক জিরানের দিনত ভাল করিচুং বুলিয়া তোমরালা মোর উপরাত রাগ হবার ধরচেন কেনে?

২৪ বায়রার চেহারা দেখিয়া বিচার না করেন, বরং যেইটা সঠিক সেই হিসাবে ন্যায্য বিচার কর।”

২৫ সেলো যিরুশালেমের কয়েক জন মানষি কইলেক, “যাক যিহুদী নেতালা মারি ফ্যেলের চায়, এইটা কি সেই মানষিটা না হয়?

২৬ কিন্তুক উয়ায় তো খোলাখুলি শিক্ষা দিবার ধরচে, তাণ্ডো নেতালা কাণ্ডোই কিছুই না কয়। তাইলে নেতালা সচাং করি

জানির পাইচে যে ইয়ায়ে সেই ভগবানের বাছাই করা রাজাটা।

২৭ হামরা জানি ইয়ায় কোটে থাকি আসচে, কিন্তুক যেলা ভগবানের বাছাই করা রাজাটা আসিবে সেলা কাণ্ডায় জানিবে না উয়ায় কোটে থাকি আসচে।”

২৮ সেলা যীশু দশংগতি মন্দিরত শিক্ষা দিবার সমায় জোরে জোরে কইলেক, “তোমরালা মোক কি জানেন? আর মুই কোটে থাকি আসচুং সেইটাও কি জানেন? মুই নিজের ইচ্ছাতে আইসোং নাই, কিন্তুক যায় সহিত্য ভগবান উয়ায়ে মোক পেঠাইচে। তোমরালা উয়াক জানেন না।

২৯ কিন্তুক মুই উয়াক জানং, কেনেনা মুই উয়ার ওটে থাকি আসচুং আর উয়ায়ে মোক পেঠাইচে।”

৩০ ইয়াতে সেই মানষিলা যীশুক ধরির চাইলেক, কিন্তুক সেলাও উয়ার সমায় হয় নাই বুলিয়া কাণ্ডা উয়ার দেহাত হাত দিলেক না।

৩১ কিন্তুক মানষিলা মইন্ধে মেলা মানষি যীশুর উপরা বিশ্বাস করি কইলেক, “ইয়ায় তো মেলা অচানক চিনের কাম করিচে। ভগবানের বাছাই করা রাজাটা আসিয়া কি ইয়ার চায়াও বেশী অচানক চিনের কাম করিবে।”

৩২ ফরীশী দলের মানষিলা শুনির পাইলেক যে সাধারন মানষিলা চুপ চুপ করি যীশুর কতা কওয়া কওয়ি করির ধরচে।



সেই প্রাধান বামনলা আর ফরীশীলা যীশুক ধরির বাদে দশংগতি মন্দিরের কয়েক জন কর্মচারীক পেঠেয়া দিলেক।

৩৩ সেই যীশুক কইলেক, “মুই আর বেশী দিন তোমারলার সাথত রইম না। কেনেনা যায় মোক পেঠাইচে উয়ারটে মুই যাইম।

৩৪ তোমরা মোক খুজিবেন কিন্তুক পাবেন না, আর মুই যেটেকোনা থাকিম তোমরা ওটেকোনা আসিরও পাবেন না।”

৩৫ যীশুর এই কতাতে যিহুদী নেতারা একে অপরক কবার নাগিলেক, “এই মানষিটা কোটে যে যাবে, হামরা উয়াক খুজি পামো না? অযিহুদীলার মইন্ধোত যে যিহুদীলা ছড়াছড়ি হয়। আছে উয়ায় কি ওটেকোনা যায়। অযিহুদীলাক শিক্ষা দিবে?”

৩৬ উয়ায় যে কইলেক, ‘তোমরারা মোক খুজিবেন কিন্তুক পাবেন না,’ আর মুই যেটেকোনা যাইম তোমরা ওটেকোনা আসিরও পাবেন না, এই কতার মানে কি?”

৩৭ পার্বনের শেষের দিনটায় আছিলেক বিশেষ দিন। ঐ দিন যীশুক খাড়া হয়। জোরে জোরে চিকরিয়া কইলেক, “কাণ্ডোরো যদি টিস্সা নাগে তাইলে উয়ায় মোর এটে আসি জল খাউক।

৩৮ পবিত্র শাস্ত্রের কতা মত, যায় মোর উপরত বিশ্বাস করিবে উয়ার অন্তর থাকি জীবন্ত জলের নদী বইতে থাকিবে।”

৩৯ যীশুক বিশ্বাস করিয়া যায় যায় পবিত্র আত্মা পাবে ঐ পবিত্র আত্মার বিষয়ে যীশুক এই কতা কইলেক, পবিত্র আত্মা সেলাও

দেওয়া হয় নাই, কেনেনা যীশু সেলোও উয়ার নিজের মহিমা ফিরি পায় নাই।

৪০ এই কতালো শুনি মানষিলার মইন্ধো থাকি কয়েক জন মানষি কবার নাগিলেক, “সচাং করি ইনায়ে সেই ভগবানের ভাববাদী।”

৪১ অইন্য মানষিলা কইলেক, “ইয়ায় ভগবানের বাছাই করা রাজা।” কিন্তুক কাণ্ডো কাণ্ডো কইলেক, “ভগবানের বাছাই করা রাজাটা কি গালীল প্রদেশ থাকি আসিবে?”

৪২ শাস্ত্রত এই কতা নেখা আছে, ভগবানের বাছাই করা রাজাটা দায়ূদের বংশের হবে, আর উয়ায় যেই বৈৎলেহেম গঞ্জত বসবাস করে উয়ায় ঐ গঞ্জতে জন্ম নিবে।”

৪৩ এই নাকান করি যীশুক নিয়া মানষিলার মইন্ধোত মতের অমিল দেখা গেইলেক।

৪৪ কাণ্ডো কাণ্ডো উয়াক ধরির চাইলেক, কিন্তুক কাণ্ডোয় উয়ার দেহাত হাত দিলেক না।

৪৫ যেই কর্মচারীলাক যীশুক ধরির বাদে পেঠা হইছিলেক উমরা প্রধান বামনেরটে আর ফরীশীলারটে ফিরি আসিলেক। সেলো উমরা পুছিলেক, “তোমরা উয়াক ধরি আনিলেন না কেনে?”

৪৬ কর্মচারীলা কইলেক, “মানষিটা যেই নাকান করি কতা কয় ঐ নাকান আর কোন মানষি কোনো দিনও কয় নাই।”

৪৭ সেলো ফরীশীলা উমাক কইলেক, “তাইলে কি তোমরালাও ঠকিলেন?”

৪৮ নেতালার বা ফরীশীলার মইদ্বোত কাণ্ডো তো উয়ার উপরত বিশ্বাস করে নাই।

৪৯ কিন্তুক এই সাধারণ মানষিলা, ইমরা তো মহাপুরুষ মোশির নিয়ম-কানুন জানে না। ইমারলার উপরত ভগবানের অভিশাপ আছে।”

৫০ নীকদীম, যায় আগত যীশুরটে গেইচে, উয়ায় আছিলেক ফরীশীলার মইদ্বো এক জন।

৫১ উয়ায় কইলেক, “কাণ্ডোরো মুখের কতা না শুনিয়া আর উয়ায় কি করিচে না জানিয়া কাণ্ডোকে দোষ দিবার নিয়ম কি হামার আইন-কানুনত আছে?”

৫২ ফরীশীলা নীকদীমক উত্তর দিলেক, “তুইও কি গালীল প্রদেশের মানষি? পবিত্র শাস্ত্রত খুজি দেখা, গালীল প্রদেশত কোন ভগবানের ভাববাদীর জন্মের কতা নাই।”

৫৩ ইয়ার পাছত যিহুদী নেতালা ওটে থাকি উমার নিজের নিজের বাড়িত চলি গেইলেক।

৮ ইয়ার পাছত যীশু ওটে থাকি জলপই পাহাড়ত চলি গেইলেক।

২ পরের দিন খুব সাকালে যীশু আরো যিহুদী দশংগতি মন্দিরত গেইলেক। যাবার পাছত সউগ মানষিলা আরো উয়ারটে

আসিলেক। সেলো যীশু বসিয়া মানষিলাক শিক্ষা দিবার নাগিলেক। ৩,

৪ এই নাকান সমায় পন্ডিতলা আর ফরীশীলা এক জন বেটিছাওয়াক যীশুরটে আনিলেক। উমরা ঐ বেটিছাওয়াটাক উমারলার মইন্ধোত খাড়া করিয়া যীশুক কইলেক, “গুরু, এই বেটিছাওয়াটা ব্যভিচারে ধরা পরিচে।

৫ মহাপুরুষ মোশির নিয়ম-কানুন মতে এই নাকানের বেটিছাওয়ালাক শিল দিয়া ঢেলে মারি ফেলের আদেশ হামারলাক দিচে। কিন্তুক তোমরা কি কন?”

৬ উমরা যীশুক যাচাই করির বাদে এই কতা কইলেক, যাতে উয়ার বিরুদ্ধে দোষ খুজিয়া পাওয়া যায়। যীশু সেলো মাথা হেট করিয়া নগুল দিয়া মাটিত নেখির নাগিলেক।

৭ কিন্তুক যিহুদী নেতালা যেলা বারে বারে পুছির নাগিলেক সেলো যীশু খাড়া হয়। উমারলাক কইলেক, “তোমারলার মইন্ধোত যায় পাপ করে নাই তায় পরথমে শিল দিয়া ঢেলাউক।”

৮ ইয়ার পাছত আরো মাথা হেট করি নগুল দিয়া মাটিত নেখির নাগিলেক।

৯ এই কতা শুনিয়া ঐ নেতালা মইন্ধো থাকি বুড়া মানষি থাকি আরম্ভ করিয়া একে একে সগায় চলি গেইলেক। যীশু খালি একলায় রইলেক আর সেই বেটিছাওয়াটা মইন্ধোত খাড়া হয়। আছিলেক।

১০ স্যেলা যীশু মাথা তুলিয়া ঐ বেটিছাওয়াটাক কইলেক, “হ্যে বাহে, উমরা কোটে? কাণ্ডো কি তোক দোষী মনে করে নাই?”

১১ বেটিছাওয়াটা উত্তর দিলেক, “নারে ভাই, কাণ্ডো করে নাই।” স্যেলা যীশু কইলেক, “মুইও তোক দোষী না করং, যা এলা হাতে আর পাপে জীবন না কাটাইস।”

১২ ইয়ার পাছত যীশু আরো মানষিলাক কইলেক, “মুইয়ে দুনিয়ার আলো। যায় মোর ঘাটা দিয়া চলা ফিরা করে উয়ায় কোন দিনও আন্ধারত ঠেং ফ্যেলাবে না বরং এমন আলো পাবে যা জীবন দেয়।”

১৩ স্যেলা ফরীশীলা যীশুক কইলেক, “তোর সাক্ষ্য সচাং না হয়, কেনেনা তুই নিজের সাক্ষ্য নিজে দিবার ধরচিস।”

১৪ যীশু উমারলাক কইলেক, “যদিও মুই নিজের হয়্যা নিজে সাক্ষ্য দেং তাণ্ডো মোর সাক্ষ্য সচাং। কেনেনা মুই কোটে হাতে আসচুং আর কোটে যাইম সেইটা মুই জানং। কিন্তুক মুই কোটে হাতে আসচুং আর কোটে যাইম সেইটা তোমরালা জানেন না।

১৫ মানষি যেই নাকান করি বিচার করে তোমরালাও সেই নাকান করি বিচার করেন, কিন্তুক মুই কারো বিচার করোং না।

১৬ কিন্তুক মুই যদি কোন দিন বিচার করং তাইলে মোর সেই বিচার সত্য। কেনেনা মুই একলায় না হং। মুই তো আছং আর যায় মোক পেঠাইচে সেই বাপও মোর নগত আছে।

১৭ তোমারলার আইন-কানুনত নেখা আছে, দুই জন মানষি যদি একে সাক্ষ্য দেয় তাইলে সেইটা সত্য।

১৮ মুইয়ে মোর নিজের হয় সাক্ষা দেং, আর যায় মোক পেঠাইচে সেই বাপও মোর পক্ষে সাক্ষ্য দেয়।”

১৯ ফরীশীলা কইলেক, “তোর বাপ কোটে?” যীশু কইলেক, “তোমরা মোকও জানেন না আর মোর বাপকও জানেন না। যদি মোক জানিলেন হয় তাইলে মোর বাপকও জানিলেন হয়।”

২০ দশংগতি মন্দিরত শিক্ষা দিবার সমায় যীশু দান দেওয়া বাক্সর বগলত খাড়া হয় এইলা কতা কইলেক। কিন্তুক সেলোও উয়ার সমায় হয় নাই বুলিয়া কাণ্ডো উয়াক ধরিলেক না।

২১ যীশু আরো ফরীশীলাক কইলেক, “মুই চলি যাবার ধরচুং। তোমরা মোক খুজিবেন, কিন্তুক তোমরা তোমারলার পাপত মরিবেন। মুই যেটেকোনা যাবার ধরচুং তোমরালা ওটেকোনা আসির পাবেন না।”

২২ সেলো যিহুদীলা কইলেক, “উয়ায় কি নিজে নিজে মরির যাবার ধরচে। কেনেনা উয়ায় কবার ধরচে, ‘মুই যেটেকোনা যাবার ধরচুং তোমরা ওটেকোনা আসির পাবেন না।’ ”

২৩ যীশু উমারলাক কইলেক, “মুই উপরা থাকি আসচুং আর তোমরালা নিচা হাতে আসচেন। তোমরা এই দুনিয়ার, কিন্তুক মুই এই দুনিয়ার না হং।

২৪ এই বাদে মুই তোমারলাক কবার ধরচুং, তোমরালা তোমারলার পাপত মরিবেন। যদি তোমরালা বিশ্বাস না করেন যে, মুই উয়ায়, তাইলে তোমরালা তোমার পাপত মরিবেন।”

২৫ সেয়া নেতালা যীশুক পুছিলেক, “তুই কায়?” যীশু উমারলাক কইলেক, “পইলা থাকি মুই তোমারলাক যা কয়া আসচুং মুই তায়,

২৬ তোমারলার সমন্ধে কবার আর বিচার করি দেখার মোর অনেক কিছুই আছে। কিন্তুক যায় মোক পেঠাইচে উয়ার মইন্ধোত মিছাং নাই, আর মুই উয়ারটে যা শুনচুং সেইলায় সউগ মানষিক কং।”

২৭ উমরা বুঝির পারিলেক না যে, যীশুর স্বর্গের বাপের সমন্ধে কবার ধরচে।

২৮ এই বাদে যীশু কইলেক, “যেয়া তোমরা বাছাই করা মানষিটাক ক্রুশের উপরাত বুলাবেন সেয়া বুঝির পাবেন যে, মুই কায়, মুই কবার ধরচুং মুই। মুই নিজে থাকি কোন কিছুই না করং, বরং বাপ মোক যেই শিক্ষা দিচে মুই সেইলা কতায় কং।

২৯ যায় মোক পেঠাইচে উয়ায় মোর নগত আছে। উয়ায় মোক একলায় ছাড়ি দেয় নাই, কেনেনা যেইলা কাম করিলে উয়ায় সন্তুষ্ট হয় মুই সউগ সমায় ঐলা কামে করং।”

৩০ যীশু যেয়া এইলা কতা কইলেক সেয়া মেয়া মানষি উয়ার উপরত বিশ্বাস করিলেক।

৩১ যেই যিহুদীলা উয়াক বিশ্বাস করিচে যীশু উমারলাক কইলেক, “তোমরা যদি মোর শিক্ষা মতন চলেন তাইলে তোমরালা সচাংএ মোর শিষ্য।

৩২ তাছাড়া তোমরা সচাংটা জানির পাবেন, আর সেই সচাংটায় তোমারলাক বন্ধন থাকি মুক্ত করিবে।”

৩৩ যিহুদী নেতালা সেলো যীশুক কইলেক, “হামরা মহাপুরুষ অব্রাহামের গুটির মানষি, হামরা কোন দিনও কাঙরো চাকর হই নাই। তুই কেমন করি কবার ধরচিস যে, হামারলাক মুক্ত করা হবে?”

৩৪ ইয়ার উত্তরে যীশু উমারলাক কইলেক, “মুই তোমারলাক সচাং করি কবার ধরচুং, যায় যায় পাপের মইদ্বোত থাকে উয়ায় পাপের চাকর।

৩৫ চাকর চিরদিন বাড়িত থাকে না কিন্তুক বেটা চিরকাল থাকে।

৩৬ এই বাদে ভগবানের বেটা যদি তোমারলাক মুক্ত করে তাইলে সচাংএ তোমরালা মুক্ত হবেন।

৩৭ মুই জানং তোমরালা মহাপুরুষ অব্রাহামের গুটির মানষি, কিন্তুক তাণ্ডো তোমরা মোক মারি ফেলের চাবার ধরচেন, কেনেনা মোর কতা তোমারলার অন্তরত ফম পড়ে।

৩৮ মুই মোর বাপেরটে যেইলা দেখিচুং সেইলা বিষয় কবার ধরচুং। আর তোমরালা তোমার বাপেরটে থাকি যেইলা শুনিচেন সেইলায় করেন।”



৩৯ এই বাদে যিহুদী নেতালা যীশুক কইলেক, “অব্রাহাম হামারলার বাপ।” যীশু উমারলাক কইলেক, “তোমরালা যদি অব্রাহামের ছাওয়া হইলেন হয় তাইলে অব্রাহামের নাকান কাম করিলেন হয়।

৪০ ভগবানেরটে হাতে যেইলা সচাং জিনিস মুই জানিচোং সেইলায় তোমারলাক কবার ধরচুং। আর তাণ্ডো তোমরালা মোক মারি ফ্যেলের চাবার ধরচেন। কিন্তুক অব্রাহাম তো এই নাকান করে নাই।

৪১ তোমারলার বাপ যেই কাম করে। তোমরালা সেইলায় করেন।” উমরা যীশুক কইলেক, “হামরা তো জারুয়া না হই। হামারলার এক জন বাপ আছে আর সেই বাপ হইলেক ভগবান।”

৪২ যীশু উমারলাক কইলেক, “সচাংএ যদি তোমারলার বাপ ভগবান হইলেক হয় তাইলে তোমরালা মোক পিরিত করিলেন হয়। কেনেনা মুই ভগবানেরটে থাকি আসচুং আর এলা তোমারলার মইন্ধোত আছং। মুই নিজে আইসং নাই কিন্তুক উয়ায়ে মোক পেঠাইচে।

৪৩ মুই যেইটা কং সেইটা তোমরালা বুঝির পারেন না কেনেনা তোমরা মোর কতা মানি নেন না।

৪৪ শয়তান তোমারলার বাপ আর তোমরালা উয়ারে ছাওয়া, এই বাদে তোমরালা উয়ার ইচ্ছা পূরণ করির চান। শয়তান পইলা থাকি খুনী। উয়ায় কোন দিন সত্যত রয় নাই। কেনেনা উয়ার

মইন্ধোত বিন্দু মাত্র সত্য নাই। উয়ায় যেহো মিছাং কতা কয় সেহো স্বাভাবিক ভাবে উয়ার মইন্ধো থাকি সেইলা বিরি আইসে, কেনেনা উয়ায় মিথ্যাবাদী আর সউগ মিথ্যার জন্ম উয়ারটে থাকি হইচে।

৪৫ কিন্তুক মুই সচাং কতা কং বুলিয়া তোমরালা মোক বিশ্বাস করেন না।

৪৬ তোমারলার মইন্ধো থাকি কায় মোক দোষী বুলি প্রমাণ করির পাবে? যদি মুই সত্য কতায় কং তাইলে তোমরালা কেনে মোক বিশ্বাস করেন না?

৪৭ যেই মানষিটা ভগবানের, উয়ায় ভগবানের কতা শুনে। তোমরালা ভগবানের না হন এই বাদে ভগবানের কতা শুনের না।”

৪৮ সেহো যিহুদী নেতালা যীশুক কইলেক, “হামরা কি ঠিক কই নাই যে, তুই এক জন শমরীয় আর তোক অপদেবতা ধরচে?”

৪৯ যীশু কইলেক, “মোক অপদেবতা ধরে নাই। মুই মোর বাপক সন্মান করং। কিন্তুক তোমরালা মোক অসন্মান করেন।

৫০ মুই মোর নিজের বাদে সন্মান চাং না। কিন্তুক এক জন আছে যায় মোক সন্মান দান করে। আর উয়ায়ে বিচারকর্তা।

৫১ মুই তোমারলাক সচাং করি কবার ধরচুং, যদি কাণ্ডো মোর কতার বাধ্য হয় চলে তাইলে উয়ায় কোন দিনও মরির না হয়।”

৫২ যিহুদী নেতালা উয়াক কইলেক, “এলা হামরা সচাং করি বুঝির পাইলং যে, তোক অপদেবতা ধরচে। অব্রাহাম আর ভগবানের ভাববাদীলা মরিচে, আর তুই কবার ধরচিস, ‘যদি কাণ্ডো মোর কতা মানিয়া চলে উয়ায় কোন দিনও মরির না হয়।’

৫৩ তুই কি বাপ অব্রাহামের থাকিও বড়? উয়ায় তো মরি গেইচে আর ভাববাদীলাও মরিচে। তুই নিজক কি মনে করিস?”

৫৪ উত্তরে যীশু কইলেক, “যদি মুই নিজের গুণগান নিজে করং তাইলে সেইটার কোন দাম নাই। মোর বাপ, যাক তোমরা ভগবান কয়া দাবি করেন উয়ায়ে মোক সন্মান দান করে।

৫৫ তোমরা উয়াক জানেন না, কিন্তুক মুই উয়াক জানং। যদি মুই কং উয়াক জানং না তাইলে মুই তোমারলার নাকান মিথ্যাবাদী হইম। মুই উয়াক জানং আর উয়ার কতার বাধ্য হয় চলং।

৫৬ তোমারলার বাপ অব্রাহাম মোর আইসার দিন দেখির পাবে বুলিয়া খুশি হইচে। উয়ায় ঐ দিনটা দেখিয়া খুশিও হইচে।”

৫৭ যিহুদী নেতালা যীশুক কইলেক, “তোমার এলাও পঞ্চাশ বছরও হয় নাই, আর তোমরা কবার ধরচেন যে অব্রাহামক দেখিচেন!”

৫৮-৫৯ যীশু উমারলাক কইলেক, “মুই তোমারলাক সচাং করি কবার ধরচুং, অব্রাহামের জন্মের আগের থাকি মুই আছং।” এই কতা শুনিয়া ওই নেতালা যীশুক ঢেলেবার বাদে পাথর

কুড়াইলেক। কিন্তুক যীশু নিজক লুকিয়া দশংগতি মন্দির হাতে চলি গেইলেক।

৯ যীশু ঘাটা দিয়া যাবার সময় এক জন কানা মানষিক দেখির পাইলেক। উয়ায় আছিলেক জন্নের কানা।

১০ সেলো যীশুর শিষ্যলো উয়াক পুছিলেক, “গুরু, কার পাপের বাদে এই মানষিটা কানা হয় জন্ম হইচে? উয়ার নিজের, না উয়ার মাও-বাপের?”

১১ যীশু কইলেক, “উয়ায় নিজেও পাপ করে নাই, আরো উয়ার মাও-বাপেও পাপ করে নাই। এইটা হইচে যাতে মুই উয়াক সুস্থ করং আর ভগবানের শক্তির প্রকাশ উয়ার মইন্ধো দিয়া দেখা যায়।

১২ যায় মোক পেঠাইচে, বেলা থাকতে উয়ার কাম করা হামার দরকার। রাতি হইলে কাণ্ডো আর কাম করির পারিবে না।

১৩ যত দিন মুই এই দুনিয়াত আছং মুই দুনিয়ার আলো।”

১৪ এই কতা কবার পাছত উয়ায় মাটিত থু ফ্যেলেয়া কাঁদো করিলেক। তার পাছত ঐ কাঁদো মানষিটার চোখুত নাগে দিয়া কইলেক,

১৫ “যা, শীলোহ নামের দীঘিত যায়া ধুইয়া ফ্যেলাও।” শীলোহ মানে পেঠা হইলেক। মানষিটা যায়া চোখু ধুইয়া ফ্যেলাইলেক আর সেলোয় উয়ায় দেখির শক্তি ফিরি পাইলেক।

৮ এই দেখিয়া উয়ার পাড়া পড়শীলা আর যায় যায় আগত উয়াক ভিক্ষা করির দেখিচে উমরা সগায় কবার নাগিলেক, “ইয়ায় ঐ মানষিটা হয় কি না, যায় বসি বসি ভিক্ষা করিচে?”

৯ কাণ্ডো কাণ্ডো কইলেক, “হে, ইয়ায়ে সেই মানষিটা।” আর কাণ্ডো কাণ্ডো কইলেক “যদিও উয়ারে নাকান দেখির কিন্তু উয়ায় না হয়।” মানষিটা কইলেক, “হে, মুইয়ে সেই মানষিটা।”

১০ উমরা উয়াক কইলেক, “কেমন করি তুই দেখির শক্তি ফিরি পালু?”

১১ উয়ায় কইলেক, “যীশু নামের মানষিটা মোর চোখুত কাঁদো করি নাগে দিয়া কইলেক, ‘শীলোহ দীঘিত যায়া ধুইয়া ফেলাও।’ সেয়া মুই যায়া ধুইয়া ফেলালুং আর এলা দেখির পাবার ধরচুং।”

১২ উমরা উয়াক কইলেক, “ঐ মানষিটা কোটে?” উয়ায় কইলেক, “মুই জানং না।”

১৩ যেই মানষিটা আগত কানা আছিলেক মানষিলা উয়াক ফরীশীলারটে নিয়া গেইলেক।

১৪ যেদিন যীশু কাঁদো করি মানষিটার চোখুত নাগে দিয়া দেখিবার শক্তি ফিরি দিচে সেই দিনটা আছিলেক জিরানের দিন।

১৫ এই বাদে ফরীশীলা উয়াক আরো পুছিলেক, “তুই কেমন করি দেখির পাবার ধরচিস?” উয়ায় ফরীশীলাক কইলেক,

“উয়ায় মোর চোখুর উপরা কাঁদো নাগে দিলেক, আর মুই ধুইতে কালে দেখির পাবার নাগলুং।”

১৬ ইয়াতে ফরীশীলার মইন্ধো থাকি কয়েক জন কইলেক, “ঐ মানষিটা ভগবানেরটে থাকি আইসে নাই। কেনেনা উয়ায় জিরানের দিন পালন করে না।” অইন্য ফরীশীলা কইলেক, “যেই মানষিটা পাপী উয়ায় ক্যেমন করি এই নাকান অচানক চিনের কাম করির পারে?” এই নিয়া উমারলার মইন্ধোত মতের অমিল দেখা দিলেক।

১৭ সেলো উমরা ঐ মানষিটাক আরো পুছিলেক, “তুই উয়ার সমন্ধে কি কইস? উয়ায় তো তোর চোখু খুলি দিচে।” মানষিটা কইলেক, “উয়ায় এক জন ভগবানের ভাববাদী।”

১৮ যিহুদী নেতালা কিন্তুক মানষিটার মাও-বাপক না পোছা পর্যন্ত বিশ্বাস করিলেক না। যে উয়ায় আগত কানা আছিলেক এলা দেখির পাবার ধরচে।

১৯ উমরা মানষিটার মাও-বাপক পুছিলেক, “ইয়ায় কি তোমারলার বেটা যার সমন্ধে তোমরা কন যে, উয়ায় কানা হয় জন্ম হইচে? এলা তাইলে উয়ায় ক্যেমন করি দেখির পাবার ধরচে?”

২০ উয়ার মাও-বাপ কইলেক, “হামরা জানি ইয়ায় হামার বেটা, আর ইয়ায় কানা হয় জন্ম হইছিলেক।

২১ কিন্তুক কেমন করি ইয়ায় এলা দেখির পাবার ধরচে তা হামরা জানিনা। কায় উয়ার দেখির শক্তি ফিরি দিলেক তাণ্ডো জানিনা। উয়ার বয়স হইচে, উয়াকে পোছো। উয়ার নিজের বিষয়ে নিজে কউক।”

২২ উয়ার মাও-বাপ যিহুদী নেতালার ভয়ে এইলা কতা কইলেক, কেনেনা যিহুদী নেতালা আগতে ঠিক করি থুইচে যে, কাণ্ডো যদি যীশুক ভগবানের বাছাই করা রাজা হিসাবে মানি নেয় তাইলে উয়াক উপাসনা ঘর থাকি নিকলি দেওয়া হবে।

২৩ এই বাদে উয়ার মাও-বাপ কইলেক, “উয়ার বয়স হইচে, উয়াকে পুচ করো।”

২৪ যেই মানষিটা আগত কানা আছিলেক নেতালা উয়াক দ্বিতীয় বার ডেকেয়া পুছিলেক, “তুই ভগবানের আগত সচাং কতা কয়া মহিমা করিস। হামরা তো জানি ঐ মানষিটা পাপী।”

২৫ যায় কানা আছিলেক উয়ায় কইলেক, “উয়ায় পাপী আছিলেক কিনা তা মুই জানং না, কিন্তুক একটা বিষয় জানং যে আগত মুই কানা আছিলুং এলা দেখির পাবার ধরচুং।”

২৬ সেয়া যিহুদী নেতালা উমারলাক কইলেক, “উয়ায় তোক কি করচে? কেমন করি উয়ায় তোর দেখির পাওয়ার শক্তি ফিরি দিলেক?”

২৭ মানষিটা কইলেক, “মুই তো আগতে তোমারলাক কইচুং, কিন্তুক তোমরালা মোর কতা শুনে নাই। তাইলে আরো কেনে

শুনির চাবার ধরচেন? তোমরালা কি উয়ার শিষ্য হবার চান?”

২৮ এই বাদে নেতালা মানষিটাক খুব গালি পারিয়া কইলেক,  
“তুই ঐ মানষিটার শিষ্য, কিন্তুক হামরা মহাপুরুষ মোশির শিষ্য।

২৯ হামরা জানি ভগবান মোশির সোদে কতা কইচে, কিন্তুক ঐ  
মানষিটা কোটে থাকি আসচে হামরা কিছুই জানিনা।”

৩০ সেলো ইয়ার জবাবে মানষিটা কইলেক, “কি অচানক  
ব্যাপার! তোমরালা জানেন না উয়ায় কোটে থাকি আসচে কিন্তুক  
ঐ মানষিটায় তো মোর দেখির শক্তি ফিরি দিলেক।

৩১ হামরা জানি ভগবান পাপী মানষির কতা শোনে না। যদি  
কোন মানষি ভগবান ভক্ত হয় আর উয়ার ইচ্ছা মতন কাম করে  
তাইলে ভগবান উয়ার কতা শোনে।

৩২ এই দুনিয়া সিজ্ঞনের পাছত এই নাকান কতা কোন দিনও  
শোনা যায় না, জন্ম থাকি কানা এমন কোন মানষির দেখির শক্তি  
কাণ্ডেয় ফিরি দিচে।

৩৩ যদি উয়ায় ভগবানেরটে থাকি না আসিলেক হয় তাইলে  
উয়ায় কিছুই করির পারিলেক না হয়।”

৩৪ নেতালা কইলেক, “তোর জন্ম হইচে একেবারে পাপের  
মইন্ধোত, আর তুই হামারলাক শিক্ষা দিবার ধরচিস?” এই কয়া  
উমরালা মানষিটাক উপাসনা ঘর থাকি নিকলি দিলেক।

৩৫ যীশু শুনির পাইলেক যে, যিহুদী নেতালা মানষিটাক  
উপাসনা ঘর থাকি নিকলি দিচে। সেলো যীশু মানষিটার দেখা



পায়া কইলেক, “তুই কি বাছাই করা মানষিটার উপরত বিশ্বাস করিস?”

৩৬ উয়ায় কইলেক, “দাদারে, উয়ায় কায়? মোক কন যাতে মুই উয়ার উপরত বিশ্বাস করির পাং।”

৩৭ যীশু উয়াক কইলেক, “তুই উয়াক দেখিছিস, আর উয়ায়ে তোর নগত কতা কবার ধরচে।”

৩৮ সেলো মানষিটা কইলেক, “প্রভু, মুই বিশ্বাস করং।” এই কয়া উয়ায় যীশুক উপাসনা করিয়া ভগবানের সন্মান দিলেক।

৩৯ যীশু কইলেক, “মুই এই দুনিয়াত বিচার করির বাদে আসচুং। যাতে যায় দেখির না পারে উমরা দেখির পারে, আর যায় যায় দেখির পায় উমরা কানা হয়।”

৪০ কয়েক জন ফরীশীও যীশুর নগত আছিলেক। উমরা এই কতা শুনিয়া যীশুক কইলেক, “তাইলে তোমরা কি কবার চান যে হামরালাও কানা?”

৪১ যীশু উমারলাক কইলেক, “তোমরালা যদি কানা হইলেন হয় তাইলে তোমারলার কোন দোষ হইলেক না হয়। কিন্তুক তোমরালা কন যে তোমরালা দেখির পান, এই বাদে তোমারলার দোষ আছে।”

৪২ যীশু কইলেক, “মুই তোমারলাক সচাং করি কবার ধরচুং, যে কাণ্ডো দুয়ার দিয়া না সোন্দেয়া অইন্য পাক দিয়া ভেড়ার

খোয়ারোত সোন্দায় উয়ায় চোর আর ডাকু।

২ কিন্তুক যায় দুয়ার দিয়া সোন্দায় উয়ায়ে ভেড়ার রাখয়াল।

৩ ভেড়ার খোয়াড় যায় পাহারা দেয় উয়ায় রাখয়ালক দুয়ার খুলি দেয়। ভেড়ানা উয়ার ডাক শুনে, আর ঐ রাখোয়াল নিজের ভেড়ালক নাম ধরি ডেকেয়া বায়রাত নিয়া যায়।

৪ উয়ার নিজের সউগ ভেড়ানা বাইর করির পাছত উমারলার আগে আগে যায়। আর ভেড়ানা উয়ার পাছে পাছে যায় কেনেনা উমরা উয়ার গালার আওয়াজ চেনে।

৫ উমরা কোন দিনও অচিনা মানষির পাছত যাবে না বরং উমরা উয়ারটে হাতে পালে যাবে। কেনেনা উমরা অচিনা মানষির গালার আওয়াজ চেনে না।”

৬ যীশু মানষিলাক শিক্ষা দিবার বাদে উপমার কতালা কইলেক, কিন্তুক উয়ায় কি কবার চাইচে সেইটা উমরানা বুঝির পাইলেক না।

৭ সেলো যীশু উমারলাক আরো কইলেক, “মুই তোমারলাক সচাং করি কবার ধরচুং, মুইয়ে ভেড়ালার খোয়ারের দুয়ার।

৮ মোর আগত যায় যায় আসিচে উমরানা সগায় চোর আর ডাকু। কিন্তুক ভেড়ানা উমারলার কতা শুনে নাই।

৯ মুইয়ে দুয়ার। যদি কাণ্ডোয় মোর মইন্ধো দিয়া ভিতরাত সোন্দায় তাইলে উয়ায় রক্ষা পাবে। উয়ায় ভিতরাত সোন্দাবে আর বায়রাত যাবে আর চরে খাবার জাগা পাবে।

১০ চোর খালি চুরি, খুন, নষ্টামি এইলা করিবার উদ্দেশ্যের বাদে আইসে। মুই আসচুং যাতে উমরানা জীবন পায়, আর সেই জীবন হবে আশুর্বাদে পরিপূর্ণ।

১১ “মুইয়ে উত্তম রাখোয়াল। মুই মোর ভেড়ালার বাদে মোর জীবন সঁপে দিবার ধরচুং।

১২-১৩ খালি মজুরির বাদে যেই রাখোয়াল কাম করে উয়ায় নিজে রাখোয়াল না হয়। আর ভেড়ানাও উয়ার নিজের না হয়। নেকড়ে বাঘ আসির দেখিতে কালে উয়ায় ভেড়ানা খুইয়া পালেয়া যায়। কেনেনা উয়ায় খালি বেতন পাবার বাদে এই কাম করে আর ভেড়ালার চিন্তাও করে না। নেকড়ে বাঘ উমারলাক ধরি নিয়া যায় আর ভেড়ানা চাইরো পাকে ছড়াছড়ি হয়। পরে।

১৪-১৫ “মুইয়ে উত্তম রাখোয়াল। স্বর্গের বাপ যেই নাকান মোক জানে আর মুইও স্বর্গের বাপক জানং একে নাকান করি মুই মোর ভেড়ালাক জানং আর উমরাও মোক জানে। মুই মোর ভেড়ালার বাদে মোর জীবন সঁপে দিবার ধরচুং।

১৬ মোর এই নাকান আরো ম্যেলা ভেড়া আছে, যেইলা এই খোয়াড়ের না হয় ঐলাকো মোর আনির নাগিবে। উমরা উয়ার গালার আওয়াজ শুনিবে। আর ইয়াতে একটা ভেড়ার পাল হইবে, আর এক জন রাখোয়াল হবে।

১৭ মোর বাপ এই বাদে মোক পিরিত করে, কেনেনা মুই মোর জীবন সঁপে দিবার ধরচুং যাতে আরো ফিরি নিবার পারং।

১৮ কাণ্ডে মোর পরান মোরটে থাকি নিয়া যাবার পাবে না। কিন্তুক মুই নিজেই দিম। মোর জীবন দিবার ক্ষমতা মোর আছে, আর জীবন ফিরি নিবার ক্ষমতাও মোর আছে। এই দায়িত্ব মুই মোর বাপেরটে থাকি পাইচুং।”

১৯ যীশুর এই কতার বাদে যিহুদীলার মইদ্বোত আরো মতের অমিল দেখা দিলেক।

২০ উমারলার মইদ্বোত মেলা মানষি কইলেক, “উয়াক অপদেবতা ধরচে, উয়ায় পাগলা হইচে, তোমরা উয়ার কতা কেনে শুনির ধরচেন?”

২১ আর অইন্য মানষিলা কইলেক, “কিন্তুক ইয়ায় তো অপদেবতা ধরা মানষির নাকান কতা না কয়। অপদেবতা কি কানাক দেখিবার শক্তি ফিরি দিবার পারে?”

২২ ইয়ার পাছত জারের দিনত যেলা যিরুশালেম মন্দির গড়ার পার্বন আসিলেক।

২৩ এক দিন যীশু মন্দিরের চত্বরত শলোমনের বারান্দাত হাটি বেড়ে ধরছিলেক।

২৪ সেই সময় যিহুদী নেতালা উয়ার চাইরো পাকে জড়ো হয়। উয়াক কইলেক, “আর কত দিন তুই হামারলাক সন্দেহর মইদ্বোত থুবু? তুই যদি ভগবানের বাছাই করা রাজা হইস তাইলে হামারলাক পরিষ্কার করি কঃ।”

২৫ যীশু কইলেক, “মুই তো তোমারলাক কইচুং, কিন্তু তোমরালা বিশ্বাস করেন নাই। মুই মোর স্বর্গের বাপের নামে যেইলা অচানক চিনের কাম করং সেইলায় মোর বিষয়ে সাক্ষী দিবার ধরচে।

২৬ কিন্তুক তোমরালা বিশ্বাস করেন না, কেনেনা তোমরা মোর ভেড়ার পালের ভেড়া না হন।

২৭ মোর ভেড়াদা মোর গালার আওয়াজ শুনে। মুই উমারলাক জানং আর উমরা মোক দেখিয়া মোর পাছে পাছে চলে।

২৮ মুই উমারলাক অমৃত জীবন দেং। উমরা কোন দিনও নষ্ট হবার না হয়। মোর হাত থাকি কাণ্ডো উমারলাক কাড়ি নিবার পাবে না।

২৯ মোর স্বর্গের বাপ যায় উমারলাক মোক দিচে, উয়ায় সগারে থাকি মহান কাণ্ডোয় বাপের হাত থাকি কোন কিছু কাড়ি নিবার পারিবে না।

৩০ মুই আর মোর স্বর্গের বাপ, হামরা একে।”

৩১ সেলো যিহুদী নেতালা যীশুক মারির বাদে শিল কুড়ি নিলেক।

৩২ যীশু উমারলাক কইলেক, “স্বর্গের বাপের আদেশ মতন মেলা বড় বড় অচানক চিনের কাম করি মুই তোমারলাক দেখাইচুং। সেই কামলার মইন্ধোত কোন কামের বাদে তোমরালা মোক শিল দিয়া ঢেলের চাবার ধরচেন?”

৩৩ যিহুদী নেতালা কইলেক, “তুই যেইলা অচানক চিনের কাম করিচিস, তার বাদে হামরা তোক শিল দিয়া ঢেলের চাবার ধরচি না, কিন্তুক হামরা তোক শিল দিয়া ঢেলের চাবার ধরচি এই বাদে যে, তুই ভগবানের নিন্দা করির ধরচিস। তুই এক জন মানষি হয়, আর তুই নিজক ভগবান কয়া দাবি করির ধরচিস?”

৩৪ যীশু কইলেক, “তোমারলার আইন কানুনত কি এইলা নেখা নাই যে, ‘মুই কইলুং তোমরালায় ভগবান?’

৩৫ ভগবানের বাইক্য যার যারটে আসছিলেক উমারলাক তো উয়ায় ভগবানের নাকান মনে করচিলেক। শাস্ত্রের কতা সউগ সমায় সচাং।

৩৬ স্বর্গের বাপ যাক নিজের উদ্দেশ্যে যুদা করিলেক আর এই দুনিয়াত পেঠাইলেক আর সেই মুই কবার ধরচুং, ‘মুইয়ে ভগবানের বেটা,’ তাইলে তোমরালা কেমন করি কবার ধরচেন, মুই ভগবানের নিন্দা করির ধরচুং।

৩৭ মোর স্বর্গের বাপের কাম যদি মুই না করং তাইলে তোমরালা মোক বিশ্বাস করিবেন না।

৩৮ কিন্তুক মুই যেহেতু সেইলা কাম করিচুং আর তাণ্ডো যদি মোক বিশ্বাস না করেন, তাইলে মোর কামলাক অন্ততঃ বিশ্বাস করো। ইয়াতে তোমরা জানির আর বুঝির পাবেন স্বর্গের বাপ মোর মইন্ধোত আছে আর মুই বাপের মইন্ধোত আছং।”

৩৯ সেলো যিহুদী নেতালা আরো যীশুক ধরির চেষ্টা করিলেক।  
কিন্তুক উয়ায় উমারলার হাতে এরেয়া চলি গেইলেক।

৪০ ইয়ার পাছত যীশু আরো যর্দন নদীর ঐ পারত যায়া রবার  
নাগিলেক। ওটেকোনায যোহন পরথমে মানষিলাক দীক্ষা  
দিছিলেক।

৪১ মেয়ো মানষি যীশুর বগল যায়া কওয়াকুয়ি করির নাগিলেক,  
“যোহন কোন অচানক চিনের কাম করে নাই, কিন্তুক উয়ায় এই  
মানষিটার বিষয়ে যেইলা কতা কইচিলেক সেইলা সউগে সচাং।”

৪২ আর ওটেকোনা মেয়ো মানষি যীশুর উপরত বিশ্বাস  
করিলেক।

১১ লাসার নামে বৈথনিয়া গেরামের এক জন মানষির অসুখ  
হইছিলেক। মরিয়ম আর উয়ার বইনি মার্থা ঐ গেরামত রবার  
ধরছিলেক।

২ এই মরিয়ম যায় প্রভু যীশুর ঠেংয়ত দামী আতর মাখিয়া  
নিজের চুলি দিয়া মুছি দিবার ধরছিলেক। আর যেই লাসারে  
অসুখ হইচে উয়ায় আছিলেক মরিয়মের ভাই।

৩ এই বাদে উয়ার বইনিলা যীশুক এই কতা কয়া পেঠাইলেক,  
“প্রভু, তোমরা যাক ভাল বাসেন উয়ার অসুখ হইচে।”

৪ যীশু এই কতা শুনিয়া কইলেক, “এই অসুখ উয়ার মরণের বাদে হয় নাই, এইটা হইচে ভগবানের মহিমা প্রকাশ করির বাদে, যাতে ইয়ার মইন্ধো দিয়া ভগবানের বেটার মহিমা প্রকাশ পায়।”

৫ যীশু মার্থাক, উয়ার বইনিক আর লাসারক পিরিত করির ধরছিলেক।

৬ যেয়ো যীশু লাসারের অসুখের কতা শুনিলেক সেয়ো যেটেকোনা আছিলেক ওটেকোনা আরো দুই দিন রয়া গেইলেক।

৭ তার পাছত উয়ায় শিষ্যলোক কইলেক, “চল হামরা আরো যিহুদীয়াত ফিরি যাই।”

৮ শিষ্যলো উয়াক কইলেক, “গুরু, কয় দিন আগত নেতালা তোমাক শিল দিয়া ঢেলে মারি ফ্যেলের চাইছিলেক। আর তোমরা আরো ওটেকোনা যাবার ধরচেন?”

৯ ইয়ার উত্তরে যীশু কইলেক, “দিনে বারো ঘণ্টা আলো থাকে কাণ্ডো যদি দিনের আলোত চলা ফিরা করে তাইলে উসটা খায় না, কারন উয়ায় দুনিয়ার আলো দেখির পায়।

১০ কিন্তুক কাণ্ডো যদি রাতিত চলা ফিরা করে উয়ায় উসটা খায়, কেনেনা উয়ার আগত কোন আলো নাই।”

১১ এই কতা কবার পাছত যীশু আরো শিষ্যলোক কইলেক, “হামারলার সখা লাসার নিন যাবার ধরচে, কিন্তুক মুই উয়াক চেতন করির যাবার ধরচুং।”



১২ এই বাদে শিষ্যলো যীশুক কইলেক, “প্রভু, যদি উয়ায় নিন যাবার ধরচে তাইলে উয়ায় ভাল হয়। যাবে।”

১৩ যীশু লাসারের মরণের কতা কইচিলেক, কিন্তুক উয়ার শিষ্যলো মনে করির ধরছিলেক উয়ায় স্বাভাবিক নিন যাবার কতা কবার ধরচে।

১৪ যীশু সেলো পরিস্কার করি কইলেক, “লাসার মরি গেইচে,

১৫ কিন্তুক মুই তোমারলার কতা চিন্তা করি খুশি আছং যে মুই ওটেকোনা আছিলুং না কেনেনা তোমরা বিশ্বাস করি চলেন। চল হামরা লাসারেরটে যায়।”

১৬ সেলো থোমাস যাক যমজ কওয়া হয়, অইন্য শিষ্যলোক উদ্দেশ্য করি কইলেক, “চল হামরাও যাই, যাতে উয়ার নগত হামরাও মরির পারি।”

১৭ যীশু ওটেকোনা যায়। জানির পারিলেক যে, লাসারক চার দিন আগতে সমাধি দেওয়া হইচে।

১৮ বৈথনিয়া থাকি যিরুশালেমের দূরত্ব আছিলেক পেরায় দুই মাইল।

১৯ যিহুদীলার মইদ্ধোত মেয়ো মানষি মার্থা আর মরিয়মক উয়ার ভাইয়ের মরণের পাছত সান্তনা দিবার আসচে।

২০ মার্থা যেয়ো শুনিলেক যে যীশু আসিচে, সেলো উয়ার নগত দেখা করির গেইলেক। কিন্তুক মরিয়ম ঘরত বসি রইলেক।

২১ মার্থা যীশুক কইলেক, “প্রভু, তোমরা যদি এটেকোনা থাকিলেন হয় তাইলে মোর ভাই মরিলেক না হয়।

২২ কিন্তুক মুই জানং, তোমরা এলাও যা চাবেন ভগবান সেইটা তোমাক দিবে।”

২৩ যীশু উয়াক কইলেক, “তোর ভাই আরো বত্তি উঠিবে।”

২৪ সেলো মার্থা উয়াক কইলেক, “মুই জানং শেষ কালত মরা মানষিলা যেলা আরো বত্তি উঠিবে সেলো উয়াও বত্তি উঠিবে।”

২৫ যীশু মার্থাক কইলেক, “মুইয়ে ফির বত্তি উঠা, মুইয়ে জীবন। যে কাণ্ডো মোক বিশ্বাস করে উয়ায় মরিলেও বত্তি উঠিবে।

২৬ আর যায় বতায় আছে আর মোর উপরত বিশ্বাস করে উয়ায় কোন দিনও মরির না হয়। তুই এই কতা বিশ্বাস করিস?”

২৭ মার্থা কইলেক, “হ্যে প্রভু, মুই বিশ্বাস করং যে, দুনিয়াত যার আসির কতা আছে তোমরায় সেই বাছাই করা রাজা ভগবানের বেটা।”

২৮ এই কতা কয়া মার্থা উয়ার বইনি মরিয়মক গোপনে ডেকে কইলেক, “গুরু আসিচে আর তোক ডেকের ধরচে।”

২৯ মরিয়ম এই কতা শুনিয়া পচপচে উঠি যীশুরটে গেইলেক।

৩০ যীশু সেলোও গেরামত আসি পৌছে নাই। মার্থা যেটেকোনা যীশুর নগত দেখা করির আসচে ওটেকোনা আছিলেক।

৩১ যেই যিহুদীলা মরিয়মের নগত ঘরত থাকিয়া মরিয়মক সান্তনা দিবার ধরছিলেন উমরা মরিয়মক পচপচে উঠি যাবার দেখিয়া উয়ার পাছে পাছে গেইলেক। উমরা চিন্তা করলেক মরিয়ম সমাধিত কান্দির যাবার ধরচে।

৩২ যীশু যেটেকোনা আছিলেক মরিয়ম ওটেকোনা গেইলেক। আর উয়াক দেখির পায়া উয়ার ঠেংয়ত সলসলা হয়। পরি কইলেক “প্রভু তোমরা যদি এটেকোনা থাকিলেন হয় তাইলে মোর ভাই মরিলেক না হয়।”

৩৩ যীশু মরিয়মক আর উয়ার নগত আইসা যিহুদীলা, উমারলাক কান্দির দেখি দুঃখ পাইলেক, আর উয়ার অন্তর খুব অস্থির হইলেক।

৩৪ সেয়া উয়ায় কইলেক, “তোমরা উয়াক কোটে খুইচেন?” উমরা কইলেক, “প্রভু আইসো, আসিয়া দেখা।”

৩৫ যীশু সেয়া কান্দিলেক।

৩৬ ইয়াতে যিহুদীলা কইলেক, “দেখ, উয়ায় লাসারত কত পিরিত করে।”

৩৭ কিন্তুক যিহুদীলার মইন্ধোত কাণ্ডো কাণ্ডো কইলেক, “কানা মানষিটাক দেখির শক্তি ফিরি দিচে, উয়ায় এমন কিছু করির পারলেক না হয় যাতে মানষিটা মরিলেক না হয়?”

৩৮ ইয়াতে যীশুর অন্তর আরো ব্যাকুল হইলেক আর সমাধিটার ওটেকোনা গেইলেক। সমাধিটা আছিলেক একটা গুহাত। আর

গুহাত সোন্দের দুয়ারত একটা বড় শিল দেওয়া আছিলেক।

৩৯ যীশু কইলেক, “ঐ শিলটা সরেয়া ফেলাও।” মরা মানষিটার বইনি মার্থা কইলেক, “প্রভু চার দিন আগত লাসারের মরণ হইচে। এলা শিল সারাইলে উয়ার মইন্ধো থাকি দুর্গন্ধ বাইর হবে।”

৪০ যীশু মার্থাক কইলেক, “মুই কি তোমারলাক কং নাই যে, যদি বিশ্বাস করেন তাইলে ভগবানের মহিমা দেখির পাবেন?”

৪১ মানষিলা সেয়া শিলটাক সরেয়া দিলেক। আর যীশু দ্যাওয়ার পাকে দেখিয়া কইলেক, “হে মোর স্বর্গের বাপ, তুই মোর কতা শুনিচিস এই বাদে মুই তোক ধন্যবাদ দিবার ধরচুং।

৪২ মুই জানং সউগ সমায় তুই মোর কতা শুনিস। কিন্তুক মোর চাইরো পাকে যায় যায় খাড়া হয় আছে উমরা যাতে বিশ্বাস করির পারে, যে তুই মোক পেঠাইচিস।”

৪৩ কতা কবার সমায় যীশু জোরে চিকিরিয়া ডেকে কইলেক, “লাসার তুই বাইর হয় আয়।”

৪৪ মরা লাসার সমাধি থাকি বাইর হয় আসিলেক। উয়ার হাত-ঠেং সমাধির কাপড়ের টুকরা দিয়া বান্দা আছিলেক। উয়ার মুখত রত্মালের কাপড় দিয়া বান্দা আছিলেক। যীশু কইলেক, “বান খুলি দেও আর উয়াক যাবার দেও।”

৪৫ মরিয়মেরটে যেইলা যিহুদী আসছিলেক উমারলার মইন্ধোত মেলা মানষি যীশুর এই কাম দেখিয়া বিশ্বাস করির নাগিলেক।

৪৬ আর উমারলার মইদ্বোত কাণ্ডো কাণ্ডো ফরীশীলারটে যীশু যেইলা করিচে সেইলা কইলেক।

৪৭ সেলো প্রধান বামনলা আর ফরীশীলা মহাসভার মানষিলাক একটে করি কইলেক, “হামরা এলা কি করি? এই মানষিটা তো মেয়ো অচানক চিনের কাম করিচে।

৪৮ হামরা যদি উয়াক এই নাকানে চলির দেই তাইলে সগায় উয়ার উপরত বিশ্বাস করিবে। আর রোমীয় মানষিলা আসিয়া হামারলার দশংগতি মন্দির আর হামার জাতিক ধ্বংস করি ফেলাবে।”

৪৯ উমারলার মইদ্বো কইফা নামে এক জন মহাবামনের পালা আছিলেক ঐ বছরত। উয়ায় কইলেক, “তোমরা কিছুই জানেন না।

৫০ আর ভাবনাও করেন না, গোটায় জাতিটা ধ্বংস হওয়ার চায়া বরং মানষিলা জইন্য একটা মানষির মরণ হওয়া তোমারলার বাদে ভাল।”

৫১ কইফা যে এই কতা নিজের থাকি কইচে তা কিন্তুক না হয় ঐ বছরত মহাবামনের কামের পালা পরাতে এই ভবিষ্যত বাণী করিলেক যে, যিহুদী জাতির বাদে যীশুই মরিবে।

৫২ খালি যিহুদী জাতির বাদে না হয় কিন্তুক ভগবানের যে ছাওয়ালা চাইরো পাকে ছড়াছড়ি হয়। আছে উমারলাক সগাকে জড়ো করি আনিয়া একটে করির বাদে উয়ায় মরিবে।

৫৩ ঐ দিন থাকি যিহুদী নেতালা যীশুক মারি ফেলের বাদে চক্রান্ত করির নাগিলেক।

৫৪ এই বাদে যীশু যিহুদীলার মইদ্বোত খোলামেলা চলাফিরা বন্ধ করিলেক। আর ঐ জাগাখান ছাড়িয়া নিধুয়া পাথারত ইফ্রিম নামে একটা গেরামত চলি গেইলেক। ওটেকোনা উয়ার শিষ্যলোক নিয়া রবার নাগিলেক।

৫৫ সেয়া যিহুদীলার বিশেষ মুক্তি পার্বন আগেয়া আসছিলেক। এই পার্বনের আগত মেয়া মানষি নিজক শুদ্ধি করির বাদে গেরাম ছাড়ি যিরুশালেম গঞ্জত গেইলেক।

৫৬ এই মানষিলা যীশুক খুজির নাগিলেক, উমরা দশংগতি মন্দিরের চত্বরত খাড়া হয় কওয়াকুয়ি করির নাগিলেক, “উয়ায় কি এই পার্বনত আসিবে কি না? তোমারলার কি মনে হয়?”

৫৭ প্রধান বামনলা আর ফরীশীলা আদেশ দিলেক যে, যীশু কোটে আছে, সেইটা যদি কাণ্ডো জানে তাইলে উয়ায় এই খবরটা উমরালোক জানায় যাতে উমরা যীশুক ধরির পারে।

১২ মুক্তি ভোজ পার্বনের ছয় দিন আগত যীশু বৈথনিয়াত গেইলেক যেটে লাসার রয়। এই লাসারক যীশু মরণ থাকি বত্তে তুলিছিলেক।

২ ওটেকোনা উমরা যীশুর বাদে খাবার দাবারের ব্যবস্থা করিলেক। মার্খা খাবার দিবার ধরছিলেক। যায় যায় যীশুর নগত

খাবার বসিলেক উমারলার মইন্ধে লাসারও আছিলেক।

৩ এমন সমায় মরিয়ম পেরায় আধা লিটার খুব দামী, খাটি আতর নিয়া আসিলেক আর যীশুর ঠেংয়ত ঢালি দিয়া নিজের ঢুলি দিয়া মুছিয়া দিলেক। সেলো গোটায় ঘরটা সেই আতরের গন্ধে ভরি গেইলেক।

৪ যীশুর শিষ্যলার মইন্ধে এক জন, যায় যীশুক শত্রুত হাতত ধরেয়া দিবে, সেই ইষ্কোরিয়োটের যুদাস কইলেক,

৫ “এই আতর বেচেয়া এক বছরের কামের টাকা হইলেক হয়, এইলা গরীব দুঃখীলাক দেওয়া গেইলেক হয়। কেনে এই নাকান করা হইলেক না?”

৬ যুদাস যে গরীব মানষিলার বাদে চিন্তা করি এই কতা কইচে তা কিন্তুক না হয়। আসলে উয়ায় আছিলেক একটা চোর। টাকার ডেক্সা উয়ারটে আছিলেক বুলিয়া মাঝে মইন্ধে উয়ায় সেইলা চুরি করিচে।

৭ সেলো যীশু কইলেক, “তোমরা উয়ার মনত কষ্ট না দেন। মোক সমাধি দিবার সমায় সাজের বাদে উয়ায় এই আতরটা রাখিচে।

৮ তোমরা গরীব মানষিলাক সাহায্য করির পাবেন সউগ সমায়। কিন্তুক মোক তোমরা সউগ সমায় পাবেন না।”

৯ যীশু বৈথনিয়াত আছে এইটা মেলা যিহুদী মানষি জানির পায়া উয়ারটে আসিলেক। উমরা যে খালি যীশুর বাদে ওটেকোনা

আসচে এইটা না হয়, কিন্তুক যীশু যেই লাসারক মরণ থাকি বত্তে তুলিচে উয়াকও দেখির আসচে।

১০ সেলো প্রধান বামনলা লাসারক মারি ফেলোর চক্রান্ত করিলেক,

১১ কেনেনা লাসারের বাদে যিহুদীলার মইদ্বোত মেলা মানষি যিহুদী নেতালোক ছাড়িয়া যীশুর উপরত বিশ্বাস করিলেক।

১২ যেইলা মেলা মানষি পার্বনত আসছিলেক উমরা পরের দিন শুনির পাইলেক যে যীশু যিরুশালেমত আসিবে।

১৩ সেলো উমরা খেজুর পাতা নিয়া উয়াক সন্মান জানের বাদে আগিয়া আনির গেইলেক আর চিকিরিয়া কবার নাগিলেক, “জয় হউক যীশুর জয় হউক! যায় প্রভুর নামে আসির ধরচে উয়ার জয় হউক! উয়ায় ইজ্রায়েলের রাজা।”

১৪ শাস্ত্রের কতা মতন যীশু একটা গাধাক দেখির পায়া উয়ার উপরত চড়ি বসিলেক।

১৫ “হে সিয়োনের মানষিলা ভয় না করেন! দেখ তোমারলার রাজা গাধার বাচ্চার উপরত চড়ি আসির ধরচে।”

১৬ যীশুর শিষ্যলো পরথমে এইলা বুঝির পাইলেক না। পাছত যেলা যীশুর মহিমা দেখা গেইলেক, সেলো উমারলার ফম পড়িলেক শাস্ত্রের ঐ কতা যীশুর বিষয়ে কওয়া হইচে। উমার আরো মনে পড়িলেক মানষিলা যীশুর বাদে এইলা করির ধরচে।



১৭ যীশু স্যেলা লাসারক সমাধি থাকি নিকলি আসির কইলেক আর মরা মানষিলার মইন্ধো থাকি বত্তে তুলিলেক স্যেলা ঐ মানষিলা উয়ার নগত আছিলেক, আর ঐ মানষিলায় লাসারের বত্তি উঠিবার বিষয়ে সাক্ষ্য দিবার নাগিলেক।

১৮ এই বাদে মানষিলা যীশুক আগে আনির গেইচে, কেনেনা উমরা শুনিচে যীশুই ঐ অচানক চিনের কামটা করিচে।

১৯ স্যেলা ফরীশীলা একে অইন্যক কবার নাগিলেক, “হামরা সউগ কিছুতেই হারি যাবার ধরচি। দেখ, আজি গোটায় দুনিয়াটা উয়ার পাছে পাছে ঘুরির ধরচে।”

২০ ঐ পার্বনত যায় যায় আরাধনা করির আসছিলেক উমারলার মইন্ধোত কয়েক জন গ্রীকও আছিলেক।

২১ উমরা ফিলিপেরটে আসিয়া উয়াক অনুরোধ করি কইলেক, “এই যে শুনিচেন, হামরা যীশুর নগত দেখা করির চাই।” ফিলিপ আছিলেক গালীল প্রদেশের বৈৎসৈদা গেরামের মানষি।

২২ ফিলিপ যায়া কতাটা আন্দ্রিয়ক কইলেক। তার পাছত আন্দ্রিয় আর ফিলিপ যায়া যীশুক কইলেক।

২৩ যীশু স্যেলা আন্দ্রিয় আর ফিলিপক কইলেক, “বাছাই করা মানষিটার মহিমা নিকলির সমায় হয় আসির ধরচে।

২৪ মুই তোমাক সচাং করি কবার ধরচুং, গমের বিচন মাটিত পরি যদি না মরে তাইলে একটায় বিচন থাকে, কিন্তুক যদি মরে তাইলে মেয়ো ফসল জন্মায়।

২৫ যায় নিজের জীবনক বেশী পিরিত করে উয়ায় জীবন হারাবে, কিন্তুক এই দুনিয়াত যায় উয়ার জীবনক তুচ্ছ মনে করে উয়ায় উয়ার সত্যকারের জীবনটা অমৃত জীবনের বাদে বত্তের পাবে।

২৬ কাণ্ডো যদি মোর সেবা করির চায় তাইলে উয়ায় মোর ঘাটাত আসুক। মুই যেটেকোনা আছং মোর সেবাকারিও ওটেকোনা থাকিবে। যদি কাণ্ডো মোর সেবা করে তাইলে স্বর্গের বাপ উয়াক সন্মান দান করিবে।

২৭ “এলা মোর মন অস্থির হয় উঠিচে। মুই কি এই কতা কইম, ‘হে স্বর্গের বাপ, যে সমায় আসির ধরচে সেই সমায়ের হাত থাকি মোক রক্ষা করেক?’ কেনেনা সেই সমায় আসিচে আর মুই কষ্ট ভোগ করির বাদে আসচুং।”

২৮ “হে স্বর্গের বাপ, তোর মহিমা দেখাও।” সেলো স্বর্গ থাকি একটা আওয়াজ শোনা গেইলেক, “মুই মোর মহিমা প্রকাশ করিচুং, আরেক বার প্রকাশ করিম।”

২৯ যেই মানষিলা ওটেকোনা খাড়া হয় আছিলেক উমরা শুনিয়া কইলেক, “ঐটা মেঘের ডাক।” কাণ্ডো কাণ্ডো আরো কইলেক, “কোন স্বর্গদূত উয়ার নগত কতা কবার ধরচে।”

৩০ যীশু কইলেক, “এই কতা মোর বাদে কওয়া হয় নাই, কিন্তুক তোমারলার বাদে কওয়া হইচে।

৩১ এই জগতের মানষিলার বিচার করির সমায় এইবার আসচে।  
আর জগতের শাসনকর্তালার শাসন ক্ষমতা কাড়ি নেওয়া হবে।

৩২ মোক যেয়ো মাটি থাকি ক্রুশত তুলা হবে সেয়ো মুই সগাকে  
মোরটে টানি আনিম।”

৩৩ উয়ার কেয়মন করি মরণ হবে এইটা বুঝি দিবার বাদে উয়ায়  
এই কতা কইলেক।

৩৪ সেয়ো মানষিলা যীশুক কইলেক, “হামরা মোশির দেওয়া  
নিয়ম থাকি জানির পাইচি ভগবানের বাছাই করা রাজাটা  
চিরকাল থাকিবে। তাইলে তোমরা কেয়মন করি কবার ধরচেন  
বাছাই করা মানষিটাক ক্রুশত তোলা হবে? এই বাছাই করা  
মানষিটা কায়?”

৩৫ যীশু উমারলাক কইলেক, “আর অল্প সমায় তোমারলার  
মইন্ধোত আলো থাকিবে। আলো থাকিতে তোমরা চলাফিরা কর,  
যাতে আন্ধার তোমারলাক ঢাকি নিবার না পারে। যায় আন্ধারত  
চলাফিরা করে উয়ায় কোটে যায় সেইটা জানে না।

৩৬ আলো তোমারলারটে থাকিতে থাকিতে ঐ আলোক বিশ্বাস  
কর, যাতে তোমরা আলোর মানষি হবার পারেন। এইলা কতা  
কবার পাছত যীশু উমারলার ওটে থাকি চলি গেইলেক, আর  
নিজক গোপনে রাখিলেক।”

৩৭ যদিও যীশু উমারলার আগত চিন হিসাবে মেয়ো অচানক  
কাম করিচে তাণ্ডো মানষিলা বিশ্বাস করিলেক না।

৩৮ এইটা হইলেক যাতে ভগবানের ভাববাদী যিশাইয়ের কওয়া কতা পূরণ হয়, “প্রভু, হামারলার দেওয়া খবর কায় বিশ্বাস করিচে? কারটে প্রভুর শক্তিশালী হাত প্রকাশ পাইচে?”

৩৯ এই কারনে উমরা বিশ্বাস করির পারে নাই কেনেনা যিশাইয় যেই নাকান করি কইচে সেই নাকান,

৪০ “ভগবান উমারলার চোখু কানা করি থুইচে, যাতে দেখির না পারে আর অন্তর পাষান বানে দিচে যাতে বুঝির না পারে। আরো ভাল হবার বাদে উয়ারটে ফিরি না যায়।”

৪১ যিশাইয় যীশুর মহিমা দেখিচে বুলিয়া উয়ার বিষয়ে এই নাকানের কতা কইচে।

৪২ তাণ্ডো নেতালার মইন্ধে মেয়ো মানষি উয়ার উপরত বিশ্বাস করিলেক। কিন্তুক ফরীশীলা উপাসনা ঘর থাকি নিকলি দিবে এই ভয়ে উমরা স্বীকার করিলেক না।

৪৩ ফরীশীলা ভগবানের গুণগানের চায়া মানষির পিরিত বেনী ভাল পায়।

৪৪ যীশু জোরে জোরে চিকরিয়া কইলেক, “যায় মোক বিশ্বাস করে, উয়ায় যে খালি মোক বিশ্বাস করে তা না হয়, যায় মোক পেঠাইচে উয়াক বিশ্বাস করে।

৪৫ যায় মোক দেখে, আর যায় মোক পেঠাইচে উয়ায় উয়াকে দেখে।

৪৬ মুই দুনিয়ার আলো হিসাবে আসচুং যায় মোর উপরত বিশ্বাস করে উয়ায় আন্ধারত না রবে।

৪৭ আর যায় মোর কতা শুনে সেই মত মানে না উয়ার বিচার করির আইসং নাই। কেনেনা মুই মানষির বিচার করির আইসোং নাই, কিন্তুক এই দুনিয়াক বাঁচের আসচুং।

৪৮ আর যায় মোক অগ্রাহ্য করে, মোর কতা না শোনে উয়ার বাদে বিচার আছে। যেই কতা মুই কইচুং ঐ কতায় শেষ কালত দোষী কয়া প্রমাণ করিবে।

৪৯ কেনেনা মুই তো নিজের থাকি কোন কং নাই। কিন্তুক যায় মোক পেঠাইচে সেই স্বর্গের বাপ নিজেই আদেশ দিচে মোক কি কি কবার নাগিবে

৫০ মুই জানং উয়ার আদেশ থাকি অমৃত জীবন পাওয়া যায়। এই বাদে মুই যেইলা কতা কং মোর স্বর্গের বাপের আদেশ মতন কং।”

১৩ মুক্তি ভোজ পার্বনের অল্প কিছু দিন আগের ঘটনা। যীশু বুঝির পাইচে যে উয়ার এই দুনিয়া ছাড়িয়া স্বর্গের বাপেরটে যাবার সময় হয় আসচে। এই দুনিয়াত যায় যায় উয়ার নিজের মানষি আছিলেক উমারলাক উয়ায় পিরিত করিচে। আরো শেষ পর্যন্ত পিরিত করিচে।

২ সেলো খাবার সমায়। ইয়ার আগতেই শয়তান শিমোনের বেটাক ইষ্কোরিয়োটের যুদাসের মন যীশুক শত্রুর হাতত ধরে দিবার বাসনা জাগিচে।

৩ যীশু জানে স্বর্গের বাপ উয়ার হাতত সউগ কিছু দিচে। উয়ায় আরো জানে উয়ায় উয়ারটে থাকি আসচে আর উয়ারটে ফিরি যাবার নাগিবে।

৪ এই বাদে উয়ায় খাবার খুইয়া উঠিলেক আর উপরের কাপড় খুলি ফ্যেলে একটা গামছা নিয়া কমড়ত বান্দিলেক।

৫ তার পাছত বাল্টিত জল ঢালিয়া শিষ্যলার ঠেং ধুইয়া দিবার নাগিলেক। আর যেই গামছাখান কমড়ত বান্দিচিলেক সেই গামছাখান দিয়া ঠেং মুছি দিবার নাগিলেক।

৬ এই নাকান করি যেলো শিমোন-পিতরেরটে আসিলেক সেলো পিতর উয়াক কইলেক, “প্রভু তোমরা কি মোর ঠেং ধুইয়া দিবেন?”

৭ যীশু কইলেক, “মুই যেইলা করির ধরচুং সেইলা তুই এলা বুঝির পাবু না, কিন্তুক পরে বুঝির পাবু।”

৮ পিতর উয়াক কইলেক, “তোমরা কোন সমায় মোর ঠেং ধুইয়া দিবেন না।” যীশু উয়াক কইলেক, “যদি মুই তোর ঠেং ধুইয়া না দেং তাইলে তোর সোদে মোর কোন সমন্ধ নাই।”

৯ সেলো শিমোন পিতর কইলেক, “প্রভু, তাইলে খালি মোর ঠেং না হয়, হাত আর মোর মাথাও ধুইয়া দেও।”

১০ যীশু উয়াক কইলেক, “যায় গাও ধুইচে উয়ার ঠেং ছাড়া আর কোন ধুবার নাই। কেনেনা উয়ার সউগ কিছু পরিস্কার আছে। তোমরা অবশ্য পরিস্কারে আছেন, কিন্তুক সগায় না হয়।”

১১ কায় উয়াক ধরেয়া দিবে এইটা উয়ায় জানে। এই বাদে উয়ায় কইলেক, “তোমরা সগায় পরিস্কার না হন।”

১২ শিষ্যলার সগারে ঠেং ধোয়ের পাছত যীশু উয়ার উপরের কাপড় পিন্দিয়া আরো বসিলেক আর উমারলাক কইলেক, “মুই কি করলুং সেইটা কি তোমরা বুঝির পাইলেন?”

১৩ তোমরা মোক গুরু আরো প্রভু কয়া ড্যেকান, তোমরা ঠিকেই ড্যেকান কারন মুই সেইটায়।

১৪ কিন্তুক মুই প্রভু আর গুরু হয়্যাও যেহেতু তোমারলার ঠেং ধুইয়া দিলুং। সেহেতু তোমরালাও এক জন আরেক জনের ঠেং ধুইয়া দেওয়া উচিত।

১৫ মুই এইটা তোমারলারটে করিয়া দেখানু, যাতে তোমারলার প্রতি মুই যেই নাকান করিনু তোমরাও একে নাকান করেন।

১৬ মুই তোমারলাক সচাং করি কবার ধরচুং চাকর উয়ার মালিক থাকি বড় না হয়। আর যাক পেঠা হইচে উয়ায় উয়ার থাকি বড় না হয় যায় উয়াক পেঠাইচে।

১৭ এইলা জানিয়া তোমরা যদি পালন করেন তাইলে তোমরা আশুর্বাদ পাবেন।”

১৮ “মুই তোমারলার সগারে কতা না কং। মুই যাক যাক বাছাই করিচুং উমারলাক মুই জানং। কিন্তুক শাস্ত্রের কতা পূরণ হবারে নাগিবে। যায় মোর নগত খাওয়া-দাওয়া করে উয়ায় মোর বিরুদ্ধে শত্রুয়ামি করির ধরচে।

১৯ এই ঘটনাটা ঘটির আগত মুই তোমারলাক কবার ধরচুং। যাতে এই ঘটনালা যেলা ঘটিবে সেলা বিশ্বাস করির পারেন যে মুইয়ে উয়ায়।

২০ মুই তোমারলাক সচাং করি কবার ধরচুং, মুই যাক পেঠাং, যায় উয়াক মানি নেয় উয়ায় মোক মানি নেয়। আর যায় মোক মানি নেয়, যায় মোক পেঠাইচে, উয়াকও মানি নেয়।”

২১ এই কতালা কবার পাছত যীশু খুব অস্থির হইলেক। উয়ায় খোলাখুলি কইলেক, “মুই তোমারলাক সচাং করি কবার ধরচুং তোমারলার মইন্ধে এক জন মোক শত্রুর হাতত ধরেয়া দিবে।”

২২ যীশু কার কতা কবার ধরচে শিষ্যলা বুঝির না পারিয়া এক জন আরেক জনার পাকে দেখির নাগিলেক।

২৩ উমারলার মইন্ধোত যাক যীশু খুব পিরিত করিচে উয়ায় যীশুর দেহাত হেলান দিয়া আছিলেক।

২৪ শিমোন পিতর উয়াক ইশারা করিয়া কইলেক, “উয়ায় কার কতা কবার ধরচে পুচ কর।”

২৫ সেই শিষ্যটা সেলা যীশুর পাকে হেলিয়া কইলেক, “প্রভু উয়ায় কায়?”



২৬ যীশু কইলেক, “এই রুটির টুকরা খুরিত ডুবিয়া যাক দিম উয়ায়ে সেই মানষি।” আর উয়ায় রুটির টুকরাটা খুরিত ডুবিয়া ইস্কেরিয়োতের শিমোনের বেটা যুদাসক দিলেক।

২৭ রুটির টুকরা নিবার পাছত শয়তান যুদাসের ভিতরা সোন্দাইলেক। যীশু উয়াক কইলেক, “যা করিবু পচপচে করেক।”

২৮ যায় যায় যীশুর নগত খাবার ধরছিলেক উমরা কাণ্ডো বুঝির পারিলেক না কেনে যীশু এই নাকানের কতা যুদাসক কইলেক।

২৯ কাণ্ডো কাণ্ডো মনে করিলেক পার্বনের সমায় যা দরকার যীশু যুদাসক কিনি আনির কইলেক আর না হইলে গরীব মানষিলাক দান করির কইলেক। কেনেনা উয়ায় উমারলার ভান্ডারী আছিলেক।

৩০ রুটির টুকরা নিবার সাথে সাথে যুদাস বায়রাত চলি গেইলেক। সেয়া রাতি হইচে।

৩১ যুদাস বাইরা চলি যাবার পাছত যীশু কইলেক, “বাছাই করা মানষির বেটার মহিমা প্রকাশ হবার সমায় আসচে আর উয়ার মইদ্বোত ভগবানের মহিমা প্রকাশ পাবে।

৩২ ভগবানের মহিমা যেয়া উয়ার মইদ্বোত প্রকাশ হবে সেয়া ভগবানের বেটার মহিমা নিজের মইদ্বোত প্রকাশ করিবে আর এইটা খুব পচপচে করিবে।”

৩৩ “মোর আদরের ছাওয়ার ঘর আর মুই অল্প সময় তোমারলার সোদে আছং। তোমরা মোক খুজিবেন, কিন্তুক মুই যিহুদী নেতালাক যেই নাকান কইচুং, মুই যেটেকোনা যাবার ধরচুং ওটেকোনা তোমরালা আসির পাবেন না। এই কতাটা মুই তোমারলাকও কবার ধরচুং।

৩৪ মুই তোমারলাক একটা নয়া আদেশ দিবার ধরচুং, তোমরা একে অপরক পিরিত কর, মুই যেমন তোমারলাক পিরিত করং তোমরাও তেমন একে অপরক পিরিত করো।

৩৫ তোমারলার একে অপরের প্রতি যদি পিরিত থাকে তাইলে ইয়াতে সগায় জানির পাবে তোমরা মোর শিষ্য।”

৩৬ শিমোন পিতর যীশুক কইলেক, “প্রভু, তোমরা কোটে যাবার ধরচেন?” যীশু কইলেক, “যেটেকোনা মুই এলা যাবার ধরচুং, তুই ওটেকোনা পাছে পাছে আসির পাবু না কিন্তুক পাছত তোমরা আসির পাবেন।”

৩৭ পিতর কইলেক, “প্রভু, মুই কেনে এলা তোমার সোদে যাবার পাইম না? মুই তোমার বাদে মোর জীবন দিম।”

৩৮ যীশু কইলেক, “তুই কি সচাং করি মোর বাদে পরান দিবু? মুই তোক সচাং করি কবার ধরচুং, কালি ভোরে পইলা মুরগা ড্যেকের আগত তিন বার মোক চেনংনা কয়া অস্বীকার করিবু।”

১৪ যীশু কইলেক, “তোমারলার মন যাতে আর অস্থির না হয়। ভগবানের উপরাত বিশ্বাস কর, আর মোর উপরাতও বিশ্বাস কর।

২ মোর স্বর্গের বাপের বাড়িত মেয়ো ঘর আছে, যদি না থাকিলেক হয় তাইলে মুই তোমাক কইলুং হয়। ক্যেনেনা মুই তোমারলার বাদে জাগা ঠিক করির যাবার ধরচুং।

৩ ওটেকোনা জাগা ঠিক করির পাছত মুই আরো আসিম আর তোমারলাক মোর ওটেকোনা নিয়া যাইম। যাতে মুই যেটেকোনা থাকিম তোমরালাও ওটেকোনা থাকির পারেন।

৪ মুই যেটেকোনা যাবার ধরচুং তোমরালা সগায় সেই ঘাটাটা জানেন।”

৫ থোমাস যীশুক কইলেক, “প্রভু, তোমরা কোটেকোনা যাবার ধরচেন সেইটাই হামরা জানিনা, তাইলে ঘাটা জানিমু কোটে থাকি?”

৬ যীশু থোমাসক কইলেক, “মুইয়ে ঘাটা, মুইয়ে সত্য আর জীবন। স্বর্গের বাপেরটে যাবার মুইয়ে এক মাত্র ঘাটা।

৭ তোমরা যদি সচাং মোক জানির পাইচেন, তাইলে স্বর্গের বাপকও জানির পাইচেন। আর এলা থাকি তোমরালা উয়াক জানিচেন আর উয়াক দেখিচেন।”

৮ ফিলিপ যীশুক কইলেক, “প্রভু, তোমরা হামারলাক স্বর্গের বাপক দেখান, তাইলেই হামরা সন্তুষ্ট হমু।”

৯ যীশু উয়াক কইলেক, “ফিলিপ, এত দিন থাকি মুই তোমারলার সাথে সাথে আছং, আর তোমরা এলাও মোক চিনির পারেন নাই? যায় মোক দেখিচে উয়ায় স্বর্গের বাপকও দেখিচে। তুই কেয়মন করি কবার ধরচিস যে, স্বর্গের বাপক হামারলাক দেখান?

১০ তুই কি বিশ্বাস করিস না যে, মুই স্বর্গের বাপের মইন্ধোত আছং আর স্বর্গের বাপ মোর মইন্ধোত আছে? মুই যেইলা কতা তোমারলাক কং সেইলা নিজের থাকি না কং মোর সাথে সাথে যায় রয় সেই স্বর্গের বাপ, উয়ায় উয়ার নিজের কাম করির ধরচে।

১১ মোর কতাত বিশ্বাস কর যে, মুই স্বর্গের বাপের মইন্ধোত আছং আর স্বর্গের বাপ মোর মইন্ধোত আছে। তা না হইলে অন্ততঃ মোর এইলা কামের বাদে মোক বিশ্বাস কর।

১২ “মুই তোমারলাক সচাং করি কবার ধরচুং, কাণ্ডো যদি মোর উপরত বিশ্বাস করে, তাইলে মুই যেইলা কাম করং উয়াও সেইলা করিবে। আর মুই বাপেরটে যাবার ধরচুং বুলিয়া উয়ায় এইলার চায়াও আরো বড় বড় কাম করিবে।

১৩ তোমরা মোর নামে যেইলা চাবেন সেইলা মুই করিম, যাতে স্বর্গের বাপের মহিমা বেটার মইন্ধো দিয়া প্রকাশ পায়।

১৪ তোমরা যদি মোর নামে মোরটে কিছু চান, তাইলে মুই সেইলা পূরণ করিম।”

১৫ “তোমরা যদি মোক পিরিত করেন তাইলে মোর সউগ আদেশ পালন করিবেন।

১৬ মুই স্বর্গের বাপেরটে চাইম, আর উয়ায় তোমারলারটে চিরকাল থাকির বাদে এক জন সাহায্যকারী পেয়ে দিবে।

১৭ সেই সাহায্য কারি হইলেক সত্যের আত্মা। দুনিয়ার মানষিলা উয়াক মানিয়া নেয় না, কেনেনা উয়াক উমরা দেখির পায় না আর জানেও না। তোমরা কিন্তুক উয়াক জানেন, কেনেনা উয়ায় তোমারলার সাথে সাথে রয় আর তোমারলার মইদ্বোত রবে।”

১৮ “মুই তোমারলাক অনাথ করি থুইয়া যাইম না, মুই তোমারলারটে আসিম।

১৯ খানেক পরে দুনিয়ার মানষিলা আর মোক দেখির পাবে না। কিন্তুক তোমরালা দেখির পাবেন। মুই বত্তায় আছং দেখিয়া তোমরালাও বত্তায় থাকিবেন।

২০ ঐ দিন তোমরা জানির পাবেন যে, মুই মোর স্বর্গের বাপের মইদ্বোত আছং, আর তোমরা মোর মইদ্বোত আছেন আর মুইও তোমারলার মইদ্বোত আছং।

২১ যায় মোর সউগ আদেশ জানে আর পালন করে উয়ায়ে মোক পিরিত করে। যায় মোক পিরিত করে মোর স্বর্গের বাপ উয়াক পিরিত করে। মুইও উয়াক পিরিত করিম আর মুই নিজক উয়ারটে প্রকাশ করিম।”

২২ স্যেলা য়ুদাস (ইষ্করিয়োত না হয়) যীশুক কইলেক, “প্রভু, তোমরা কেনে খালি হামারলারটে নিজক প্রকাশ করিবেন দুনিয়ার মানষিলারটে করিবেন না?”

২৩ যীশু উত্তর দিলেক, “যদি কাণ্ডো মোক পিরিত করে তাইলে উয়ায় মোর কতার বাধ্য হয় চলিবে আর মোর বাপ উয়াক পিরিত করিবে আর হামরা উয়ারটে আসিমো আর উয়ার সোদে এক সাথে রমো।

২৪ যায় মোক পিরিত করে না উয়ায় মোর কতার বাধ্য হয় চলা না। যেইলা কতা তোমরা শুনিচেন সেইলা মোর কতা না হয় কিন্তুক যায় মোক পেঠাইচে ঐ স্বর্গের বাপের কতা।

২৫ তোমারলার সোদে থাকিতে থাকিতেই এইলা কতা মুই তোমারলাক কইলুং।

২৬ সেই সাহায্যকারী পবিত্র আত্মা যাক স্বর্গের বাপ মোর নামে পেঠেয়া দিবে, উয়ায় সউগ বিষয়ে তোমারলাক শিক্ষা দিবে। আর মুই তোমারলাক যেইলা কইচুং সেইলা তোমারলাক ফম করি দিবে।

২৭ “মুই তোমারলার বাদে শান্তি থুইয়া যাবার ধরচুং। মোরে শান্তি মুই তোমারলাক দিয়া যাবার ধরচুং। দুনিয়া যেই নাকান করি দেয় মুই সেই নাকান করি দেং না। তোমারলার মন যাতে অস্থির না হয় আর মনত ভয়ও যাতে না থাকে।

২৮ তোমরা শুনিচেন মুই তোমারলাক কবার কইচুং যে, মুই চলি যাবার ধরচুং আরো তোমারলারটে ফিরি আসিম। তোমরা যদি মোক পিরিত করিলেন হয় তাইলে মুই মোর বাপেরটে যাবার ধরচুং জানিয়া খুশি হইলেন হয়। কেনেনা স্বর্গের বাপ মোর চায়াও মহান।

২৯ এইলা ঘটিবার আগত মুই তোমারলাক কয়া থুলুং যাতে এইলা ঘটিলে তোমরা বিশ্বাস করির পারেন।

৩০ মুই তোমারলার নগত আর বেশীক্ষণ কতা কইম না, কেনেনা দুনিয়ার মালিক আসির ধরচে। মোর উপরত উয়ার কোন অধিকার নাই।

৩১ কিন্তুক এইলা ঘটিবার ধরচে যাতে মানষিলা জানির পারে যে, মুই স্বর্গের বাপক পিরিত করং আর স্বর্গের বাপ মোক যেই নাকান আদেশ দিচে মুই সউগ কিছুই সেই নাকানে করং। এই বার ওঠো, হামরা এটে থাকি যাই।”

১৫ যীশু কইলেক, “মুইয়ে আসল আংগুর গছ আর মোর বাপ আংগুর খেতের চাষি।

২ মোর যেইলা ডালত ফল ধরে না সেইলা উয়ায় কাটিয়া ফেলায়। আর যেইলা ডালত ফল ধরে সেইলা ছাটিয়া ফেলায় যাতে আরো মেলা ফল ধরির পারে।

৩ মুই যেইলা কতা তোমারলাক কইচুং তার বাদে তোমরা ছাটি ফ্যেলে তৈরি হয়্যা আছেন যাতে ম্যেলা ফল ধরির পারে।

৪ তোমরা মোর নগত যুক্ত থাক, আর মুইও তোমারলার নগত যুক্ত থাকিম। আংগুর গছত যুক্ত না থাকিলে যেমন কোন ডাল নিজে নিজে ফল ধরির পারে না। তেমন মোর নগত যুক্ত না থাকিলে তোমরাও নিজে নিজে ফল ধরের পারেন না।

৫ “মুইয়ে আংগুর গছ, আর তোমরা উয়ার ডালপালা। যায় মোর নগত যুক্ত থাকে আর মুই উয়ার নগত যুক্ত থাকং উয়ার জীবনত ম্যেলা ফল ধরে, কেনেনা মোক ছাড়া তোমরা কিছুই করির পাবেন না।

৬ যদি কাণ্ডো মোর নগত যুক্ত না থাকে তাইলে উয়াক কাটা ডালের মতয় বায়রাত ফ্যেলেয়া দেওয়া হয় আর শুকিয়া যায়। সেয়া সেই ডাললা কুড়িয়া অগুনত ফ্যেলে দেওয়া হয় আর সেইলা ছোবা যায়।

৭ যদি তোমরা মোর নগত যুক্ত থাকেন আর মোর বাইক্যো তোমারলার মইন্ধোত থাকে তাইলে তোমারলার যা ইচ্ছা তা চান, সেইলা তোমারলার বাদে পূরণ করা হবে।

৮ যদি তোমারলার জীবনত ম্যেলা ফল ধরে আর এই নাকান করি তোমরালা নিজক মোর শিষ্য কয়া প্রমাণ করেন তাইলে মোর স্বর্গের বাপের মহিমা হবে।



৯ স্বর্গের বাপ যেই নাকান মোক পিরিত করিচে মুইও তেমনি তোমারলাক পিরিত করির ধরচুং। তোমরা মোর পিরিতের মইদ্বোতে রন।

১০ মুই মোর স্বর্গের বাপের সউগ আদেশ পালন করিয়া যেমন উয়ার পিরিতের মইদ্বোত আছং, তেমনি তোমরালাও মোর আদেশ পালন করেন তাইলে তোমরাও মোর পিরিতের মইদ্বোত রবেন।

১১ “এইলা কতা মুই তোমারলাক কইলুং যাতে মোর আনন্দ তোমারলার অন্তরত থাকে আর তোমারলার আনন্দ যেন পূরণ হয়।

১২ মোর আদেশ এই, মুই যেই নাকান তোমারলাক পিরিত করিচুং তেমন তোমরালাও একে অপরক পিরিত কর।

১৩ কাণ্ডো যদি উয়ার সখালার বাদে নিজের পরান দেয় তাইলে উয়ার চায়া বেশী পিরিত আর কাণ্ডোরো নাই।

১৪ যেইলা আদেশ মুই তোমারলাক দেং সেইলা যদি তোমরালা পালন করেন তাইলেই তোমরালা মোর সখা।

১৫ মুই আর তোমারলাক আগের মত চাকর না কং, ক্যেনো মালিক কি করে সেইলা চাকর জানে না। কিন্তুক মুই তোমারলাক সখা কং ক্যেনো মুই বাপেরটে যেইলা শুনিচুং সেইলা সউগে তোমারলাক জানাইচোং।

১৬ তোমরালা মোক বাছাই করেন নাই, কিন্তুক মুই তোমারলাক বাছাই করিয়া কামত নাগাইচুং যাতে তোমারলার জীবনত ফল ধরে আর সেই ফল যাতে টিকি রয়। তাইলে মোর নামে স্বর্গের বাপেরটে যা কিছু চাবেন সেইলা উয়ায় তোমারলাক দিবে।

১৭ এই আদেশ মুই তোমারলাক দিবার ধরচুং যে, তোমরালা একে অপরক পিরিত কর।”

১৮ “দুনিয়ার মানষিলা তোমারলাক ঘিন করিবে, কিন্তুক ফম থোন, তার আগত উমরা মোকে ঘিন করিচে।

১৯ যদি তোমরালা এই দুনিয়ার হইলেন হয় তাইলে মানষিলা উমার নিজের কয়া তোমারলাক পিরিত করিলেক হয়। কিন্তুক তোমরা এই দুনিয়ার না হন। মুই তোমারলাক দুনিয়া থাকি বাছাই করিচুং এই বুলিয়া দুনিয়া মানষিলা তোমারলাক ঘিন খায়।

২০ মোর এই বাইক্য তোমরালা ভুলি না যান যে, চাকর উয়ার মালিকের থাকি বড় না হয়। এই বাদে মানষিলা যদি মোক অইত্যাচার করে তাইলে তোমারলাকও অইত্যাচার করিবে। যদি উমরা মোর বাইক্য পালন করে তাইলে তোমারও বাইক্য পালন করিবে।

২১ উমরা মোর বাদে তোমারলার সোদেও এইলা করিবে, কেনেনা যায় মোক পেঠাইচে উয়াক উমরা জানে না।

২২ “মুই যদি না আসিনু হয় আর উমারলার সোদে কতা না কলুং হয় তাইলে উমারলার দোষ হইলেক না হয়। কিন্তুক মুই আসিচুং,

উমারলার সাথে কতা কইচুং এই বাদে এলা উমার পাপ ঢাকিবার বাদে কোন অভুহাত দেখের পাবে না।

২৩ যায় মোক ঘিন করে উয়ায় মোর স্বর্গের বাপকও ঘিন করে।

২৪ যেইলা কাম কাণ্ডো কোন দিনও করে নাই সেইলা কাম যদি মুই উমারলার মইদ্ধোত না করিনু হয় তাইলে উমারলার দোষ হইলেক না হয়। কিন্তুক এলা উমরা মোক আর মোর বাপক দেখিচে আর ঘিনও করিচে।

২৫ উমারলার শাস্ত্রের বাইক্য পূরণ হওয়ার বাদে এইটা ঘটিলেক। ‘উমরালা অকারণে মোক ঘিন করিলেক।’

২৬ “মুই স্বর্গের বাপেরটে থাকি এক জন সাহায্যকারী তোমারলারটে পের্যেইম, উয়ায় সত্যের আত্মা যায় স্বর্গের বাপেরটে থাকি আসিবে। উয়ায় যেলা আসিবে সেলা মোর বিষয়ে সাক্ষ্য দিবে।

২৭ আর তোমরাও মোর বিষয়ে সাক্ষ্য দিবেন। কেনেনা তোমরা পইলা থাকি মোর সাথে সাথে আছেন।”

১৬ “তোমরালা যাতে মনের বিশ্বাস হারে না ফেলোন, তারে বাদে মুই তোমারলাক এইলা কতা কইলুং।

২ মানষিলা তোমারলাক উপাসনা ঘর থাকি বাইর করি দিবে। এমন সমায় আসির ধরচে তোমারলাক মারি ফেলাবে, যায় যায়

মারিবে উমরাদা মনে করিবে যে এইটা ভগবানের সেবা করা হইচে।

৩ উমরাদা এইলা করিবে কেনেনা উমরা স্বর্গের বাপকও জানে নাই, মোকও জানির পায় নাই।

৪ মুই তোমারলাক এইলা কইলুং যাতে সেই সমায় আসিলে তোমারলার ফম পড়ে যে, মুই তোমারলাক এইলা কতা কইছিলুং। “পইলা থাকি মুই তোমারলাক এইলা কতা কং নাই, কেনেনা মুই তোমারলার সাথে সাথে আছিলুং।

৫ যায় মোক পেঠাইচে এলা মুই উয়ারটে যাবার ধরচুং, আর তোমারলার মইন্ধোত কাঙো এলাও মোক পোছেন নাই যে, ‘তোমরা কোটে যাবার ধরচেন?’

৬ এলা মুই তোমারলাক এইলা কতা কইলুং, এই বাদে তোমারলার অন্তর দুঃখে ভরি উঠিলেক।

৭ কিন্তুক মুই সচাং করি কবার ধরচুং, মোর যাওয়াটা তোমারলার বাদে ভাল, কেনেনা মুই না গেইলে সেই সাহায্যকারী তোমারলারটে আসিবে না। কিন্তু মুই যদি যাং তাইলে উয়াক তোমারলারটে পেঠে দিম।

৮ উয়ায় আসিয়া পাপ সমন্ধে, ভগবানের ইচ্ছা পালন করা সমন্ধে আর ভগবানের বিচার সমন্ধে মানষিলাক দোষী করিবে।

৯ উয়ায় পাপ সমন্ধে দোষ দিবে কেনেনা মানষিলা মোর উপরত বিশ্বাস করে না।

১০ তোমরা জানিবেন যে মুই ভগবানের ইচ্ছা পালন করির, এইটা প্রমাণ করির বাদে স্বর্গের বাপেরটে যাবার ধরচুং, তোমরা মোক আর দেখির পাবেন না।

১১ দুনিয়ার বিচার করিবে কেনেনা এই দুনিয়ার যায় শাসক উয়ার দোষী সাব্যস্ত হইচে।

১২ “তোমারলারটে ম্যেলা কতা মোর কবার আছে, কিন্তুক এলা তোমরা সেইলা কতা সহ্য করির পাবেন না।

১৩ কিন্তুক সেই সত্যের আত্মা য্যেলা আসিবে স্যেলা উয়ায় তোমারলাক সউগ সইত্যের ঘাটা দেখেয়া দিবে। উয়ায় নিজের থাকি কিছু কয় না, কিন্তুক যেইলা শোনে সেইলায় কয়। আর আইসা কালে কি ঘটিবে সেইলা উয়ায় তোমারলাক কবে।

১৪ এই সত্যের আত্মা মোরে মহিমা প্রকাশ করিবে, কেনেনা মুই যেইলা করং আর কং সেইলায় তোমারলারটে প্রকাশ করিবে।

১৫ স্বর্গের বাপের যেইলা আছে সেইলা তামানে মোরে, এই বাদে পবিত্র আত্মা মোরটে থাকি সউগে নিবে আর তোমারলাক সেইলা কবে।

১৬ “অল্প কিছুক্ষন পাছত আর তোমরা মোক দেখির পাবেন না। আরো অল্প পাছত দেখির পাবেন।”

১৭ এই কতা শুনিয়া যীশুর শিষ্যলার মইন্ধোত কয়জন একে অপরক কইলেক, “উয়ায় হামারলাক কি কবার ধরচে, ‘কিছুক্ষন পাছত তোমরা মোক আর দেখির পাবেন না, আর কিছু কাল

পাছত তোমরা মোক ফির দেখির পাবেন?’ আরো উয়ায় কবার ধরচে, ‘মুই স্বর্গের বাপেরটে যাবার ধরচুং?’”

১৮ উমরানা আরো কইলেক, “‘কিছুক্ষন পাছত’ মানে কি? হামরা কিছুই বুঝির পাবার ধরচি না।”

১৯ শিষ্যলো এই বিষয়ে কিছু পুছির চাইচে, সেইটা বুঝির পায়া যীশু উমারলাক কইলেক, “মুই যে কইচুং, অল্পকাল পাছত মোক আর দেখির পাবেন না, আরো অল্প কিছু কাল পাছত তোমরা মোক ফির দেখির পাবেন। এই বিষয় নিয়া কি তোমরা নিজের মইদ্বোত কওয়াকুয়ি করির ধরচেন?

২০ মুই তোমারলাক সচাং করি কবার ধরচুং, তোমরা কান্দিবেন আর শোকে ভাঙি পড়িবেন কিন্তু দুনিয়ার মানষিলা আনন্দ করিবে। তোমরা দুঃখ পাবেন, কিন্তু পাছত তোমারলার সেই দুঃখ আর থাকিবে না, তার বদলে তোমরা আনন্দ করিবেন।

২১ ছাওয়া হবার সমায় বেটিছাওয়ালা কষ্ট পায়, কেনেনা উয়ার সমায় আসিচে। কিন্তু ছাওয়া হবার পাছত দুনিয়াত একটা নয়া মানষি আসিবার আনন্দে উয়ার আর সেই কষ্টের কতা ফম থাকে না।

২২ একে নাকান তোমরাও এলা দুঃখ-কষ্ট পাবার ধরচেন কিন্তুক আরো তোমারলার নগত মোর দেখা হবে, সেলো তোমারলার মন আনন্দে ভরি উঠিবে, সেই আনন্দ কাণ্ডো তোমারলারটে থাকি কাড়ি নিবার পাবে না।

২৩ সেই দিন তোমরা কোন কতায় মোক পুছিবেন না। মুই তোমারলাক সচাং করি কবার ধরচুং, তোমরা মোর নামে স্বর্গের বাপেরটে যেইলা চাবেন উয়ায় তোমারলাক সেইলা দিবে।

২৪ এলা পর্যন্ত তোমরালা মোর নামে কোন কিছুই চান নাই। চান, তোমরালা পাবেন যাতে তোমারলার আনন্দ ভরপুর হয়।

২৫ “এইলা শিক্ষার কতা তোমারলারটে মুই উপমা দিয়া কইলুং। কিন্তুক এমন সমায় আসির ধরচে যেলা মুই আর উপমার মইন্দো দিয়া তোমারলাক কোনো কতা কইম না। কিন্তুক খোলাখুলি মোর স্বর্গের বাপক কইম।

২৬ সেই দিন তোমরালা নিজেই মোর নামে চাবেন, আর মুই কবার ধরচুং না যে, তোমারলার পক্ষ হয় মুই স্বর্গের বাপেরটে চাইম।

২৭ স্বর্গের বাপ নিজেই তোমারলাক পিরিত করে কেনেনা তোমরালা মোক পিরিত করিচেন আর বিশ্বাস করিচেন যে, মুই ভগবানেরটে থাকি আসচুং।

২৮ মুই স্বর্গের বাপেরটে থাকি এই দুনিয়াত আসচুং, আরো মুই এই দুনিয়া ছাড়িয়া স্বর্গের বাপেরটে ফিরি যাইম।”

২৯ উয়ার শিষ্যালা সেলা উয়াক কইলেক, “দেখ, তো তোমরা এলা খোলাখুলি কতা কবার ধরচেন উপমা দিয়া না কন।

৩০ এলা হামরা বুঝির পাবার ধরচি যে, তোমার অজানা কিছুই নাই। আর কোন মানষি প্রশ্ন পুছির আগত উত্তর দিবার পারেন।

এই বাদে হামরা বিশ্বাস করি তোমরা ভগবানেরটে থাকি আসচেন।”

৩১ যীশু উয়ার শিষ্যলোক কইলেক, “তাইলে এলা কি তোমরালা বিশ্বাস করির ধরচেন?

৩২ দেখ, সেই সমায় আসির ধরচে, এমন কি আসিচে, য়েলা তোমরা দল ছাড়া হয় মোক একলায় ছাড়িয়া যায় যার জাগাত চলি যাবেন। তাণ্ডো মুই একলা না হং, কেনেনা মোর স্বর্গের বাপ মোর সাথত আছে।

৩৩ মুই তোমারলাক এইলা কতা কইলুং যাতে তোমরালা মোর সোদে যুক্ত আছেন বুলিয়া মনত শান্তি পান। এই দুনিয়াত তোমরালা কষ্ট পাবেন, কিন্তু সাহস না হারান, মুইএ এই দুনিয়াক জয় করিচুং।”

১৭ এইলা কতা কবার পাছত যীশু স্বর্গের ভিতি দেখিয়া কইলেক, “হে মোর স্বর্গের বাপ, এলা সমায় আসিচে। তোর বেটার মহিমা প্রকাশ করেক যাতে তোর বেটাও তোর মহিমা প্রকাশ করির পায়।

২ তুই উয়াক সউগ মানষির উপরাত অধিকার দিচিস, যাতে যাক যাক তুই উয়ার হাতত দিচিস উমারলাক সগাকে উয়ায় অমৃত জীবন দিবার পারে।



৩ তোক, মানে এক মাত্র সচাং ভগবানক, আর তুই যাক পেঠাইচিস সেই বাছাই করা রাজা যীশুক জানির পাওয়ায় হইলেক অমৃত জীবন।

৪ তুই মোক যে কাম করির দিচিস সেইলা শেষে করিয়া এই দুনিয়াত মুই তোর মহিমা প্রকাশ করিচুং।

৫ হে স্বর্গের বাপ, দুনিয়া সিদ্ধজন হবার আগত তোর সোদে মোর যে মহিমা আছিলেক সেই মহিমা তুই মোক আরো দে।

৬ “এই দুনিয়ার মইন্ধো থাকি যাক যাক তুই মোক দিচিস মুই উমারলারটে তোক প্রকাশ করিচুং। উমরা তোরে আছিলেক আর তুই উমারলাক মোক দিচিস, উমরা তোর কতার বাধ্য হয় চলির ধরচে।

৭ উমরা এলা বুঝির পাইচে, তুই যেইলা মোক দিচিস সেইলা তোরটে থাকিই আসিচে।

৮ তুই যেইলা শিক্ষা মোক দিচিস সেইলা শিক্ষা মুই উমাক দিচুং, আর উমরা সেইটা মানি নিচে। আর উমরা এইটা সচাং বুঝির পাইচে, মুই তোমারটে হাতে আসিচুং, আর উমরা বিশ্বাস করিচে যে তোমরায় মোক পেঠাইচেন।

৯ “মুই সগারে বাদে প্রার্থনা না করং, কিন্তু যাক যাক তুই মোর হাতত দিচিস উমার বাদে প্রার্থনা করির ধরচুং, কেনেনা উমরা তো তোরে।

১০ মোর মানষি সউগে তোর আর তোর মানষি সউগে মোর।  
উমারলার মইন্ধো দিয়া মোর মহিমা প্রকাশ পাবার ধরচে।

১১ মুই আর এই দুনিয়াত থাকিম না কিন্তুক উমরা এই দুনিয়াত  
রবে, মুই তোরটে যাবার ধরচুং। পবিত্র বাপ, তুই যে নাম দিচিস  
সেই নামের গুণে উমারলাক রক্ষা করেক যেই নাকান হামরা এক,  
ইমরাও তেমন এক হবার পারে।

১২ মুই যেলা উমার সোদে আছিঁনু মুই উমারলাক মুক্তি  
করচিলুং তুই মোক যে নাম দিচিস, সেই নামের শক্তিতে সেলা  
উমার মইন্ধে কাণ্ডো বিনষ্ট হয় নাই। খালি যার বিনষ্ট হবার কতা  
আছিলেক উয়ায়ে বিনষ্ট হইচে শাস্ত্রের কতা পূরণ হবার বাদে।

১৩ “এলা মুই তোমারটে আসচুং, আর মোর আনন্দ যাতে  
উমারলার অন্তর ভরপুর হয় এই বাদে দুনিয়াত থাকিতে এইলা  
কবার ধরচুং।

১৪ তুই যেইলা কইচিস সেইলায় মুই উমারলাক কইচুং। দুনিয়ার  
মানষিলা উমারলাক ঘিন করিবে। কে্যেনেনা মুই যেই নাকান এই  
দুনিয়ার না হং উমরাও তেমনি এই দুনিয়ার না হয়।

১৫ উমারলাক এই দুনিয়া থাকি নিয়া যাবার বাদে মুই তোমাক  
প্রার্থনা না করং কিন্তু শয়তানের হাত থাক মুক্ত করেক।

১৬ মুই যেই নাকান এই দুনিয়ার না হং তেমন উমরাও এই  
দুনিয়ার না হয়।

১৭ “সত্য দিয়া তোর সেবার বাদে তুই উমারলাক যুদা করি থো।  
তোর বাইক্য হইলেক সেই সত্য।

১৮ তুই যেমন মোক এই দুনিয়াত পেঠাইচিস তেমন মুইও  
উমারলাক এই দুনিয়াত পেঠাইচুং।

১৯ উমারলার উদ্দেশ্যে মুই নিজক যুদা করিচুং। যাতে উমরাও  
সত্যের মইন্ধো দিয়া উমারলাকও যুদা করা হয়।

২০ “মুই যে খালি ইমার বাদে কাউলা কাউলি করির ধরচুং এইটা  
না হয়। কিন্তু যায় যায় ইমার কতার মইন্ধো দিয়া মোক বিশ্বাস  
করিবে উমারলার বাদে কাউলা কাউলি করির ধরচুং,

২১ যাতে উমরা সগায় এক হয়। হে স্বর্গের বাপ, তুই মোর  
মইন্ধোত আছিস আর মুই তোর মইন্ধোত আছং। তেমন উমরাও  
যাতে এক হয় হামার মইন্ধোত থাকির পারে। যাতে দুনিয়ার  
মানষিলা বিশ্বাস করির পারে যে, তুই মোক পেঠাইচিস।

২২ আর যে মহিমা তুই মোক দিচিস সেই মহিমা মুই উমাক দিচুং  
যেই নাকান হামরা এক, উমরাও যাতে এক হবার পারে।

২৩ মুই উমারলার মইন্ধোত আছং আর তুই মোর মইন্ধোত  
আছিস। এই নাকান করি উমরাও যাতে এক হয়। ইয়াতে দুনিয়ার  
মানষিলা যাতে জানির পারে যে, তুই মোক পেঠাইচিস। আর তুই  
মোক যেই নাকান পিরিত করিস, সেই নাকান উমারলাকও পিরিত  
করিস।

২৪ “হে মোর স্বর্গের বাপ, মুই চাং যাক যাক মোক দিচিস মোর মহিমা দেখিবার বাদে উমরা যাতে মুই যেটে কোনা আছং, উমরাও ওটেকোনা থাকির পারে। যে মহিমা তুই মোক দিচিস, কারন দুনিয়া সিড্জনের আগত থাকি তুই মোক পিরিত করিচিস।

২৫ হে ন্যায়বান স্বর্গের বাপ, দুনিয়ার মানষিলা তোক জানে না, কিন্তু মুই তোক জানং। আর তুই যে মোক পেঠাইচিস এইটা উমরা বুঝির পাইচে।

২৬ মুই উমারলারটে তোক প্রকাশ করিচুং আরো প্রকাশ করিম। তুই যেই নাকান মোক পিরিত করিস সেই নাকান পিরিত উমার অন্তরত থাকে আর মুই উমারলার মইদ্বোত থাকিম।”

১৮ এইলা কতা কবার পাছত যীশু উয়ার শিষ্যলার নগত কিদ্রোণ নামে পাহাড়ের ঢালের বড় খালের ঐ পাকে গেইলেক। ওটেকোনা একটা বাগান আছিলেক। যীশু আর উয়ার শিষ্যলো ঐ বাগানত গেইলেক।

২ যীশুক শত্রুর হাতত যায় ধরেয়া দিছিলেক সেই যুদাস এই জাগাখান চেনে কেনেনা পেরায় পেরায় ঐ জাগাখানত শিষ্যলার সোদে একটে মিল হবার ধরছিলেক।

৩ একদল রোমের সৈন্য আর ফরীশীলা আর প্রধান বামনলা আরো কয়জন কর্মচারী নিয়া যুদাস উমারলার নগত মশাল,

হ্যেরিকেন আরো নানা নাকানের অস্ত্র নিয়া যীশুর ওটেকোনা আসিলেক।

৪ উয়ার নিজের উপরাত কি কি ঘটিবে যীশু সেইলা সউগে জানে। এই বাদে উয়ায় আগে আসিয়া কইলেক, “তোমরা কাক খুজির নাগচেন?”

৫ উমরা কইলেক, “নাসারতের যীশুক।” যীশু কইলেক, “মুইএ উয়ায়।” যে যুদাস যীশুক শত্রুর হাতত ধরে দিচে উয়াও উমারলার নগত খাড়া হয় আছিলেক।

৬ যীশু যেলা কইলেক, “মুইএ উয়ায়।” সেলা উমরা পাছে যায়া মাটিত পড়ি গেইলেক।

৭ এই বাদে যীশু আর একবার উমারলাক পুছিলেক, “তোমরালা কাক খুজির নাগচেন?” উমরা কইলেক, “নাসারতের যীশুক।”

৮ যীশু কইলেক, “মুই তো তোমারলাক আগতে কইচুং, মুইএ উয়ায়। তোমরা যদি মোক খুজি থাকেন তাইলে ইমাক চলি যাবার দেও।”

৯ আর এইটা ঘটিলেক যাতে যীশুর আগের কওয়া কতা পূরণ হয়, “তোমরা যাক যাক মোক দিচেন উমার মইন্ধে কাণ্ডো বিনষ্ট হয় নাই।”

১০ শিমোন পিতরেরটে একখান ছোরা আছিলেক। পিতর সেই ছোরাখান বাইর করিয়া মহাবামনের চাকরের ডাইন কানটা কাটি ফেলাইলেক। ঐ চাকরটার নাম আছিলেক মল্ল।

১১ যীশু সেলো পিতরক কইলেক, “তোর ছোরা খাপত ভরে থো। স্বর্গের বাপ মোক যেইলা দায়িত্ব দিচে দুঃখের মইদ্রো দিয়াও মোক ঐলা পূরণ করিবে নাগিবে।”

১২ “সেলো ঐ সৈন্যলো আর উমার সেনাপতি আর যিহুদী নেতালার কর্মচারীলা যীশুক ধরি বান্দিলেক।

১৩ পইলা উমরা যীশুক হাননেরটে নিয়া গেইলেক, কেনেনা ঐ বছর কাইফার শ্বশুড় হানন আছিলেক মহাবামন।

১৪ এই কাইফা যিহুদী নেতালাক পরামর্শ দিছিলেক যে, সউগ জাতির বদলে বরং একজনের মরণ হওয়া ভাল।”

১৫ শিমোন পিতর আর এক জন অইন্য শিষ্য যীশুর পাছে পাছে গেইলেক। এই অইন্য শিষ্যটার নগত মহাবামনের চিনা পরিচয় আছিলেক। ঐ শিষ্যটা যীশুর সোদে মহাবামনের বাড়ির আগিনাত যায়া উঠিলেক,

১৬ কিন্তুক পিতর দুয়ারের বায়রাত খাড়া হয় রইলেক। সেলো মহাবামনের চেনা ঐ শিষ্যটা বায়রাত যায়া পাহারা দেওয়া চেংড়িটাক কয়া পিতরক ভিতরত আনিলেক।

১৭ ঐ চেংড়িটা পিতরক কইলেক, “তুইও কি ঐ মানষিটার শিষ্যলার মইদ্রো এক জন?” পিতর কইলেক, “না, মুই না হং।”

১৮ সেলো খুব জারের সমায় আছিলেক, এই বাদে চাকরলা আর কর্মচারীলা খড়ির অগুন জ্বলেয়া খাড়া হয় অগুন পোহের

ধরছিলেন। পিতরও উমারলার নগত খাড়া হয় অগুন পোহের  
ধরছিলেন।

১৯ মহাবামন সেলো যীশুক উয়ার শিষ্যলার বিষয়ে আর উয়ার  
শিক্ষার বিষয়ে পুছির নাগিলেক।

২০ যীশু কইলেক, “মুই মানষিলাক খোলাখুলি করি কতা  
কইচুং। যেটেকোনা যিহুদীলা সগায় একটেকোনা জোটো হয় সেই  
দশংগতি মন্দিরত আর উপাসনা ঘরলাত মুই সউগ সমায় শিক্ষা  
দিচুং। মুই তো গোপনে কোন কিছু কং নাই।

২১ তাইলে কেনে মোক পুছির ধরচেন? মোর কতা যায় যায়  
শুনিচে উমারলাক পুচ কর যে, মুই উমারলাক কি কইচুং। মুই  
যেইটা কইচুং সেইটা উমরা নিশ্চয় জানে।”

২২ উয়ায় সেলো এইলা কতা কবার ধরচে, সেলো যে কর্মচারীলা  
ওটেকোনা খাড়া হয় আছিলেক উমারলার মইন্ধো থাকি এক জন  
যীশুক চড় মারি কইলেক, “তুই মহাবামনক এই নাকান করি  
জবাব দিলু?”

২৩ যীশু উয়াক কইলেক, “মুই যদি বেয়া কিছু কয়া থাকং  
তাইলে মোর দোষ দেখেয়া দেও। কিন্তু মুই যদি ভাল কয়া থাকং  
তাইলে কেনে মোক ডাঙাইলেন।”

২৪ সেলো হানন যীশুক বান্দা অবস্থায় মহাবামন কাইফারটে  
পেঠেয়া দিলেক।

২৫ যেলা শিমোন পিতর খাড়া হয় অগুন পোহের ধরছিলেক সেলা মানষিলা উয়াক কইলেক, “তুই কি উয়ার শিষ্যলার মইন্ধোত এক জন?” পিতর অস্বীকার করিয়া কইলেক, “না, মুই না হং।”

২৬ পিতর যার কান কাটি ফেলাইচে উয়ারে এক সাগাই মহাবামনের চাকর আছিলেক। উয়ায় কইলেক, “মুই কি তোক বাগানত উয়ার সোদে দেখং নাই?”

২৭ পিতর আরো অস্বীকার করিলেক, আর সেলায় একটা মুরগা ডাকিলেক।

২৮ যিহুদী নেতালা ভোর বেলা যীশুক কাইফারটে থাকি রোমের প্রধান শাসনকর্তা পীলাতের রাজবাড়িত নিয়া গেইলেক। উমরা কিন্তুক বাড়িটার ভিতরত সোন্দাইলেক না যাতে উমরা শুদ্ধি থাকিয়া মুক্তি ভোজ খাবার পারে।

২৯ সেলা পীলাত বায়রাত উমারটে আসিয়া কইলেক, “এই মানষিটাক তোমরা কি দোষে দোষী করচেন?”

৩০ যিহুদী নেতালা কইলেক, “ইয়ায় যদি বেয়া কাম না করিলেক হয় তাইলে হামরা উয়াক তোমারটে না আনিলং হয়।”

৩১ পীলাত উমারলাক কইলেক, “ইয়াক তোমরা নিয়া তোমারলার আইন কানুন মতে বিচার কর।” ইয়াতে যিহুদী নেতালা পীলাতক কইলেক, “কিন্তু কাণোকো মরণ শাস্তি দিবার ক্ষমতা তো হামারলার হাতত নাই।”



৩২ কি নাকান করি নিজের মরণ হবে যীশু সেইটা আগতে কইচিলেক। এইটা ঘটিলেক যাতে উয়ার কওয়া কতা পূরণ হয়।

৩৩ সেলো পীলাত আরো রাজবাড়িত সোন্দাইলেক আর যীশুক ডেকেয়া কইলেক, “তুইয়ে কি যিহুদীলার রাজা?”

৩৪ যীশু কইলেক, “তোমরা তো নিজেই এই কতা কবার ধরচেন, অইন্য কাণ্ডো কি মোর বিষয় তোমাক কইচে?”

৩৫ পীলাত কইলেক, “মুই কি যিহুদী? তোর জাতির মানষিলা আর প্রধান বামনলা তোক মোর হাতত দিচে। তুই কি করচিস?”

৩৬ যীশু কইলেক, “মোর শাসন ব্যবস্থা এই দুনিয়ার না হয়। যদি মোর শাসন ব্যবস্থা এই দুনিয়ার হইলেক হয়, তাইলে মুই যিহুদী নেতালার হাতত না পরির বাদে মোর মানষিলা যুদ্ধ করিলেক হয়, কিন্তু মোর শাসন ব্যবস্থা তো এটেকার না হয়।”

৩৭ পীলাত যীশুক কইলেক, “তাইলে তুই কি এক জন রাজা?” যীশু কইলেক, “তোমরা কবার ধরচেন, মুই এক জন রাজা সচাং এর সাক্ষ্য দিবার বাদে মোর জন্ম হইচে আর এই বাদে মুই দুনিয়াত আসচুং। যে কাণ্ডো সচাং এর ঘাটাত আছে উয়ায় মোর কতা শোনে।”

৩৮ পীলাত উয়াক কইলেক, “সচাংটা কি?” এই কতা কয়া উয়ায় আরো বায়রাত যায়া যিহুদী নেতালাক কইলেক, “মুই তো ইয়ার কোন দোষ দেখির পাবার ধরচুং না।

৩৯ কিন্তু তোমারলার একটা নিয়ম আছে, মুক্তি ভোজ পার্বনের সমায় মুই তোমারলার এক জন বন্দীক ছাড়ি দেং? তোমরা কি চান যে, মুই ‘যিহুদীলার রাজাক’ ছাড়ি দেং?”

৪০ ইয়াতে সগায় চিকরিয়া কইলেক, “উয়াক না হয়! বারাব্বাক!” এই বারাব্বা আছিলেক এক জন দেশের স্বাধীনতা সংগ্রামী।

১৯ সেলো পীলাত যীশুক নিয়া যায় চাবুক মারির আদেশ দিলেক।

২ সৈন্যলো কাটার লতা দিয়া একটা মটুক বানেয়া যীশুর মাথাত পেয়ে দিলেক। তার পাছত উয়াক বাইগুনিয়া কাপড় পেন্দাইলেক,

৩ আর যীশুক যায় কইলেক, “কিরে যিহুদীর রাজা, জয় হোক!” এই কয়া সৈন্যলো উয়াক চড় মারির নাগিলেক।

৪ পীলাত আরো বায়রাত আসিয়া মানষিলাক কইলেক, “দেখ, মুই উয়াক তোমারলার সামনাত নিয়া আসিম যাতে তোমরা বুঝির পারেন যে, মুই উয়ার কোন দোষ খুজিয়া নাই পাং।”

৫ যীশু সেই কাটার মটুক আর বাইগুনিয়া কাপড় পেন্দা অবস্থায় বায়রাত আসিলেক। সেলো পীলাত মানষিলাক কইলেক, “এই দেখ, সেই মানষিটা।”

৬ যীশুক দেখিয়া প্রধান বামনলা আর কর্মচারীলা চিকরিয়া কইলেক, “উয়াক ত্রুশত টাঙান, ত্রুশত মারি ফ্যেলান।” পীলাত মানষিলাক কইলেক, “তোমরায় উয়াক নিয়া যায়া ত্রুশত টাঙান, কেনেনা মুই উয়ার কোন দোষ দেখির পাবার ধরচুং না।”

৭ যিহুদী নেতালা পীলাতক কইলেক, “হামার একটা নিয়ম কানুন আছে, এই নিয়ম কানুন মতে উয়ার মরণ হওয়া উচিত, কেনেনা উয়ায় নিজক ভগবানের বেটা কইচে।”

৮ পীলাত য়েলা এই কতা শুনিলেক স্যেলা উয়ায় আরো খুব হাতাস খাইলেক।

৯ উয়ায় রাজবাড়িত যায়া যীশুক আরো পুছিলেক, “তুই কোটে হাতে আসচিস?” যীশু কিন্তুক পীলাতক কোনয় উত্তর দিলেক না।

১০ এই বাদে পীলাত যীশুক কইলেক, “তুই কি মোর সোদে কতা কবু না? তুই কি জানিস না যে, তোক ছাড়ি দিবার আর ত্রুশত দিবার ক্ষমতা মোর আছে?”

১১ যীশু উত্তর দিলেক, “উপরা থাকি তোমাক ক্ষমতা দেওয়া না হইলে মোর উপরাত তোমার কোন ক্ষমতায় রইলেক না হয়। এই বাদে যায় মোক তোমার হাতত দিচে উয়ারে পাপ বেশী।”

১২ এই কতা শুনিয়া পীলাত যীশুক ছাড়ি দিবার চেষ্টা করির নাগিলেক, কিন্তুক যিহুদী নেতালা চিকরিয়া কবার নাগিলেক, “তোমরা যদি এই মানষিটাক ছাড়ি দেন তাইলে রোমের

মহারাজার মিত্র না হন। যে কাণ্ডে নিজক মহারাজা বুলি দাবি করে উয়ায় তো রোমের মহারাজার শত্রু।”

১৩ এই কতা শুনিয়া পীলাত যীশুক বায়রাত নিয়া আসিলেক আর শিলে বান্দাই করা নামে এক জাগাত বিচারের আসনত বসাইলেক। যিহুদীলার ভাষাত ঐ জাগাখানক “গাববাথা” কওয়া হয়।

১৪ সেই দিনটা আছিলেক মুক্তি ভোজ পার্বনের আয়োজনের দিন। সেলো বেলা পেরায় দুপর। পীলাত যিহুদী নেতালক কইলেক, “এই দেখ, তোমারলার রাজা।”

১৫ ইয়াতে উমরা চিকরিয়া কবার নাগিলেক, “আপদ দূর কর, দূর কর, উয়াক ক্রুশত দেও।” পীলাত কইলেক, “তোমারলার রাজাক কি মুই ক্রুশত দিম?” প্রধান বামনলা কইলেক, “রোমের রাজা ছাড়া হামার আর কোন রাজা নাই।”

১৬ সেলো পীলাত যীশুক ক্রুশত দিবার বাদে উমারলার হাতত দিলেক। আর সৈন্যলো যীশুক নিয়া গেইলেক।

১৭ যীশু নিজের ক্রুশ নিজে উবিয়া মাথার খাপরা নামে একখান জাগাত গেইলেক। এই জাগাখানক যিহুদীলার ভাষাত কওয়া হয় “গলগথা।”

১৮ ওটেকোনা উমরা যীশুক ক্রুশ খুটাত টাঙাইলেক। উয়ার নগত উয়ার দুই বগলত আরো দুই জনাক ক্রুশত টাঙাইলেক, যীশু আছিলেক উমার মইদ্বোত।

১৯ পীলাত ক্রুশের উপরত একখান সাইন বোর্ড নটকেয়া দিলেক। ওটেকোনা নেখা আছিলেক, “নাসারতের যীশু, যিহুদীলার রাজা।”

২০ যেটেকোনা যীশুক ক্রুশত টাঙা হয় ঐ জাগাখান আছিলেক গঞ্জের বগলত। এই বাদে মেয়ো যিহুদী মানষি সাইন বোর্ড খান পড়িলেক। ঐখান যিহুদীলার ভাষা, গ্রীক আর ল্যেটিন ভাষাত নেখা আছিলেক।

২১ সেয়ো যিহুদীলার প্রধান বামনলা পীলাতক কইলেক, “যিহুদীলার রাজা, এইটা না নেখেন, এই নাকান নেখেন যে, ইয়ায় কইচিলেক, মুই যিহুদীলার রাজা।”

২২ পীলাত কইলেক, “মুই যেইটা নেখার সেইটা নেখিচুং।”

২৩ যীশুক ক্রুশত দিবার পাছত সৈন্যলো উয়ার কাপড়-চোপড় নিয়া চাইর ভাগ করিলেক। পাছত উমরালা যীশুর জামাটাও নিলেক। ঐ জামাটাত কোন সিলাই আছিলেক না। উপরা থাকি নীচ পর্যন্ত গোটায় হাতের বানা আছিলেক।

২৪ এই দেখিয়া সৈন্যলো এক জন আরেক জনাক কইলেক, “এইটা না ছিড়িয়া নটারি করি দেখি, এইটা কার ভাগ্যত আছে।” এইটা ঘটিলেক যাতে শাস্ত্রের কতা পূরণ হয়: “উমরা নিজেরলার মইন্ধোত কাপড়-চোপড় ভাগ করি নিলেক, আর মোর কাপড়-চোপড়ের বাদে উমরা নটারি করিলেক।” আর সচাংএ সৈন্যলো ঐটায় করিলেক।

২৫ যীশুর ক্রুশের বগলত যীশুর মাও, মাসী, ক্লোপার বউ মরিয়ম আর মগদলিনী মরিয়ম খাড়া হয়।

২৬ যীশু উয়ার মাক আর যেই শিষ্যক পিরিত করিচে উয়াক খাড়া হয়। রবার দেখিলেক। পইলা উয়ায় উয়ার মাক কইলেক, “মা, ঐ দেখ, তোর বেটা।”

২৭ তার পাছত ওই শিষ্যটাক কইলেক, “ঐ দেখ, তোর মাও।” সেয়া থাকি ঐ শিষ্যটো যীশুর মাক উয়ার নিজের বাড়িত নিয়া গেইলেক।

২৮ ইয়ার পাছত যীশু বুঝির পাইলেক যে, সউগ কিছু শেষ হইচে আর শাস্ত্রের কতা পূরণ হবার বাদে কইলেক, “মোর টিস্সা নাগচে।”

২৯ ওটেকোনা একটা কলসিত টেঙা ফলের রস আছিলেক, সিপাইলা জল চুষি নেয় এই নাকান জিনিসত টেঙা ফলের রস ভিজিয়া এসোব গছের ডালের মাথাত নটকেয়া যীশুর মুখের বগলত ধরিলেক।

৩০ যীশু সেই টেঙা ফলের রস খাওয়ার পাছত কইলেক, “শেষ হইচে” তার পাছত মাথা হেট করিয়া আত্মা সঁপে দিয়া মরিলেক।

৩১ ঐ দিনটা আছিলেক পার্বনের আয়োজনের দিন। পরের দিন আছিলেক জিরানের দিন। আর এই জিরানের দিনটা বিশেষ দিন আছিলেক এই বাদে যিহুদী নেতালা চাইচে যাতে ঐ দিনত দেহালা

ক্রুশের উপরাত না থাকে। এই বাদে উমরা পীলাতেরটে আন্দার করিলেক যাতে যায় যায় ক্রুশত আছে উমারলার ঠেং ভাঙিয়া দেওয়া হয়, যাতে পচপচে উমারলার মরণ হয়। আর মরা দেহালা ঐ দিনে ক্রুশ থাকি নামে ফেলা হয়।

৩২ সেলো সৈন্যলো আসিয়া যীশুর নগত যাক যাক ক্রুশত দেওয়া হইচে উমার দুইজনারে ঠেং ভাঙি দিলেক।

৩৩ কিন্তু সৈন্যলো যীশুরটে আসিয়া দেখিলেক যে উয়ায় মরি গেইচে এই বাদে উয়ার ঠেং ভাঙিলেক না।

৩৪ কিন্তুক এক জন সৈন্য যীশুর পাঞ্জারত বল্লম দিয়া হানিলেক আর সাথে সাথে অস্ত্র আর জল বাইর হয় হইলেক।

৩৫ যায় এই ঘটনাটা নিজের চোখুত দেখিলেক উয়ায় এই বিষয়ে সাক্ষ্য দিয়া কইলেক, “আর উয়ার সাক্ষ্য সচাং। আর উয়াও জানে যে, উয়ায় যেইলা কইচে সেইলা সচাং, যাতে তোমরালাও বিশ্বাস করির পারেন।”

৩৬ এইলা ঘটিলেক যাতে শাস্ত্রের কতা পূরণ হয়, “উয়ার একখান হাড়িও ভাঙা হবে না।”

৩৭ আর শাস্ত্রের আরেকটা কতা এই নাকান, “যাক উমরা হানিছে উয়ার ভিতি উমরা চায়া দেখিবে।”

৩৮ এইলা ঘটনা ঘটির পাছত আরিমাথিয়া গেরামের যোষেফ যীশুর দেহাটা নিয়া যাবার বাদে পীলাতেরটে অনুমতি চাইলেক। যোষেফ আছিলেক যীশুর গোপন শিষ্য, কেনেনা উয়ায় যিহুদী

নেতালোক ভয় করছিলেন। পীলাত অনুমতি দিবার পাছত উয়ায় আসিয়া যীশুর দেহাটা নিয়া গেছিলেন।

৩৯ নীকদীম আর যোষেফ আগত এক দিন রাতির আন্ধারত যীশুরটে দেখা করির আসছিলেন, ঐ নীকদীম পেয়ায় তেত্রিশ কেজি গন্ধরস আর অগুরু মিশি নিয়া আসিলেক।

৪০ পাছত উমরা যীশুর দেহাটা নিয়া যিহুদীলার সমাধি দেওয়ার নিয়ম মতন ঐলা সুগন্ধের জিনিসের নগত দেহাটা কাপড় খান দিয়া জড়াইলেক।

৪১ যীশুক যেটেকোনা ক্রুশত টাঙা হইচে উয়ার বগলত একটা বাগান আছিলেন, ওটে একটা নয়া সমাধি আছিলেন। এই সমাধিটাত কাণোকো কোন দিন থোয়া হয় নাই।

৪২ ঐ দিনটা আছিলেন যিহুদীলার পার্বনের আয়োজনের দিন। আর সমাধিটা বগলত আছিলেন বুলিয়া উমরা যীশুক ঐ সমাধিটাত থুইলেক।

২০ হাপ্তার পইলা দিনে ভোর বেলা আন্ধার থাকিতে মগদলিনী মরিয়ম ঐ সমাধিটার ওটে গেছিলেন। উয়ায় দেখিলেক, সমাধিটার মুখ থাকি বড় শিলটা সরেয়া থুইচে।

২ এই বাদে উয়ায় শিমোন-পিতর আর যীশু যে শিষ্যলোক পিরিত করিচে ঐ শিষ্যলারটে দৌড়ি যায়া কইলেক, “মানষিলা প্রভুক



সমাধি থাকি নিয়া গেইচে। উয়াক কোটে খুইচে হামরা সেইটা জানিনা।”

৩ পিতর আর অইন্য শিষ্যটা সেয়া বাইর হয়়া সমাধির পাকে যাবার নাগিলেক।

৪ উমরা দুইজনে একসোদে দৌড়ির ধরছিলেক কিন্তু অইন্য শিষ্যটা পিতরের আগে আগে আরো পচপচে দৌড়িয়া পরথমে সমাধিটার ওটেকোনা আসিলেক।

৫ উয়ায় নিচা হয়়া দেখিলেক যীশুর দেহাত যেই কাপড়লা পল্টা আছিলেক ঐলা পড়িয়া আছে তাঙো উয়ায় সমাধিটার ভিত্তিৰাত সোন্দাইলেক না।

৬ শিমোন-পিতরও উয়ার পাছে পাছে আসিয়া সমাধিটার ভিত্তিৰাত সোন্দাইলেক আর কাপড়লা পড়ি রবার দেখিলেক।

৭ উয়ায় আরো দেখিলেক, যীশুর মাথাত যে রুমালটা বান্দা আছিলেক সেইখান অইন্য কাপড়ের নগত নাই। কিন্তু যুদা করি এক জাগাত ভাজ করি থোয়া হইচে।

৮ আর যে শিষ্যটা পরথমে সমাধিটার ওটে পৌংচিচে উয়ায়ও সেয়া ভিতরত সোন্দাইলেক আর দেখিয়া বিশ্বাস করিলেক।

৯ মরণ থাকি যীশুর ফির বত্তি উঠির যে দরকার আছে, শাস্ত্রের সেই কতা উমরা আগত বুঝির পায় নাই।

১০ ইয়ার পাছত শিষ্যলা নিজের নিজের বাড়িত চলি গেইলেক।

১১ কিন্তুক মরিয়ম সমাধিটার বায়রাত খাড়া হয়। কান্দির নাগিলেক। উয়ায় কান্দিতে কান্দিতে নিচা হয়। সমাধিটার ভিতরত দেখির নাগিলেক।

১২ যীশুর দেহা যেটেকোনা থাকে থোয়া হইছিলেক ওটেকোনা সাদা কাপড় পেন্দা দুই জন স্বর্গদূত বসি আছে। এক জন শিতানের পাকে আরেক জন ঠেংএর পাকে।

১৩ উমরা মরিয়মক কইলেক, “কান্দির ধরচিস কেনে?” মরিয়ম উমারলাক কইলেক, “মানষিলা মোর প্রভুক নিয়া গেইচে আর উয়াক কোটে থুইচে জানং না।”

১৪ এই কতা কয়া মরিয়ম পাছপাকে ফিরি দেখিলেক যীশু খাড়া হয়। আছে। কিন্তুক উয়ায় যে যীশু সেইটা বুঝির পাইলেক না।

১৫ যীশু উয়াক কইলেক, “কান্দির ধরচিস কেনে? কাক খুজির ধরচিস?” মরিয়ম যীশুক বাগানের মালী ভাবিয়া কইলেক, “হে বাহে দেখ, তোমরা যদি উয়াক নিয়া যায়। থাকেন তাইলে কন কোটেকোনা থুইচেন। মুই উয়াক নিয়া যাইম।”

১৬ যীশু উয়াক কইলেক, “মরিয়ম।” ইয়াতে মরিয়ম ঘুরিয়া খাড়া হয়। যিহুদীলার ভাষাত যীশুক কইলেক, “রব্বুনি।” রব্বুনি মানে গুরু।

১৭ যীশু মরিয়মক কইলেক, “মোক ধরি না থোন, কেনেনা মুই এলাও স্বর্গের বাপেরটে যাং নাই। কিন্তু তুই মোর ভাই-বইনিলারটে যায়। উমারলাক কঃ, যায় মোর আর তোমারলার স্বর্গের বাপ, যায়

মোর আর তোমারলার ভগবান, উপরত মুই উয়ারটে যাবার ধরচুং।”

১৮ সেলো মগ্দলিনী মরিয়ম শিষ্যলারটে যায়া খবরটা দিলেক, উয়ায় প্রভুক দেখিচে আর প্রভুই উয়াক এইলা কতা কইচে।

১৯ হাপ্তার পইলা দিনত সইন্কা বেলা শিষ্যলো যিহুদী নেতালার ভয়ে ঘরের সউগ দুয়ার বন্ধ করিয়া একটে জোটো হইচে। এমন সমায় যীশু আসিয়া মইন্ধোত খাড়া হয় কইলেক, “তোমারলার শান্তি হউক।”

২০ এই কতা কয়া উয়ায় উয়ার দুই হাত আর পাঞ্জারের পাকটা উয়ার শিষ্যলোক দেখাইলেক। প্রভুক দেখির পায়া শিষ্যলো খুব খুশি হইলেক।

২১ পাছত যীশু আরো উমারলাক কইলেক, “তোমারলার শান্তি হউক। স্বর্গের বাপ যেই নাকান মোক পেঠাইচে মুইও সেই নাকান তোমারলাক পেঠেবার ধরচুং।”

২২ এই কতা কয়া উয়ায় শিষ্যলার উপরাত ফোকেয়া কইলেক, “তোমরালা পবিত্র আত্মা নেও।

২৩ তোমরা যদি কারো পাপ ক্ষমা করেন তাইলে উয়ার পাপ ক্ষমা করা হবে। আর যদি কাঙোরো পাপ ক্ষমা না করেন তাইলে উয়ার পাপ ক্ষমা করা হবে না।”

২৪ কিন্তু যীশু যেলা ওটেকোনা আসছিলেক সেলো ঐ বারো জন শিষ্যলার মইন্ধে এক জন থোমাস, উয়ায় উমারলার সাথে

আছিলেক না। এই থোমাসক যমজ কয়া ডেকাইছিলেক।

২৫ অইন্য শিষ্যলো সেলো থোমাসক কইলেক, “হামরা প্রভুক দেখিচি।” থোমাস উমারলাক কইলেক, “মুই উয়ার দুই হাতত যদি খিলের চিন না দেখং, ঐ চিন লাত নগুল না দেং, আর যদি উয়ার পাঞ্জারত হাত না দেং, তাইলে কোন মতে মুই বিশ্বাস না করিম।”

২৬ ইয়ার এক হাপ্তা পাছত শিষ্যলো আরো ঘরত জোটো হইলেক, আর থোমাসও উমারলার সোদে আছিলেক। যদিও সউগ দুয়ার বন্ধ আছিলেক তাণ্ডো যীশু আসিয়া উমার মইদ্বোত খাড়া হয়। কইলেক, “তোমারলার শান্তি হউক।”

২৭ ইয়ার পাছত উয়ায় থোমাসক কইলেক, এটেকোনা তোর নগুল দে, আর মোর হাত দুইটা দেখেক। তোর হাত বাড়েয়া মোর পাঞ্জারত দে, সন্দেহ না করিস, বিশ্বাস করেক।

২৮ ইয়ার উত্তরে থোমাস কইলেক, “প্রভু মোর, ভগবান মোর।”

২৯ যীশু উয়াক কইলেক, “থোমাস, তুই মোক দেখিছিস এই বাদে বিশ্বাস করিচিস। উমরালায় আশুবাদ পায় যায় যায় মোক না দেখিয়া বিশ্বাস করে।”

৩০ যীশু উয়ার শিষ্যলার আগত আরো মেয়ো অচানক চিনের কাম করিছিলেক, যেইলা এই বইয়ত নেখা হয় নাই।

৩১ কিন্তু এইলা নেখা হইচে যাতে তোমরা বিশ্বাস করির পারেন যে, যীশুই বাছাই করা রাজা, ভগবানের বেটা। আর এই বিশ্বাস

করিয়া উয়ার মইন্ধো দিয়া অমৃত জীবন লাভ করির পারেন।

২১ ইয়ার পাছত যীশু তিবিরিয়া সাগরের পারত শিষ্যলোক আরো দেখা দিলেক। ঘটনাটা এই নাকান করি ঘটিছিলেক,

২ শিমোন-পিতর, থোমাস যার অইন্য নাম যমজ, গালীল প্রদেশের কান্না গেরামের বাসিন্দা নথনেন, সিবদিয়ের বেটালা আর অইন্য দুই জন শিষ্য, ইমরা সগায় একটে আছিলেক।

৩ শিমোন-পিতর উমারলাক কইলেক, “মুই মাছ ধরির যাবার ধরচুং।” অইন্য শিষ্যলো কইলেক, “হামরাও তোমার সোদে যামু।” উমরা সগায় বিরিয়া নাওত উঠিলেক, কিন্তু ঐ রাতিত উমরা কোনয় ধরির পারিলেক না।

৪ এই নাকান করি যেলা ভোর হয়্যা আসিলেক, এমন সমায় যীশু সাগরের পারত আসি খাড়া হইলেক। শিষ্যলো কিন্তু চিনির পারিলেক না যে উয়ায় যীশু।

৫ উয়ায় শিষ্যলোক কইলেক, “ছাওয়ার ঘর, কোন কিছুই পান নাই?” উমরা কইলেক, “না, পাই নাই।”

৬ যীশু উমারলাক কইলেক, “নাও এর ডাইন পাকে জাল ফেলান, পাবেন।” সেলা উমরা জাল ফেলাইলেক, আর এতলা মাছ ফান্দিলেক যে, জাল টানি তুলির পাইলেক না।

৭ সেলা যীশু যেই শিষ্যটোক পিরিত করিচিলেক উয়ায় পিতরক কইলেক, “উয়ায়ে প্রভু।” ঐ সমায় শিমোন-পিতরের পিন্দির

গামছা ছাড়া দেহাত কোন কাপড় আছিলেক না। এই বাদে যেয়ো উয়ায় শুনিলেক, “উয়ায়ে প্রভু” সেয়ো দেহাত কাপড় জড়েয়া সাগরের জলত ঝাঁপাইলেক।

৮ অইন্য শিষ্যো নাওত করি সাগরের কাণ্টাত আসিলেক উমরা মাছ ভর্তি জালখান টানি আনিলেক। উমরা সাগরের কাণ্টা থাকি বেশী দূরত আছিলেক না পেরায় দুইশ হাত দূরত আছিলেক।

৯ ডাঙাত উঠিয়া উমরা দেখিলেক খুটার আংরার অগুন জ্বলির ধরচে, ওটেকোনা মাছ আর রুটিও আছে।

১০ যীশু সেয়ো উমরলাক কইলেক, “তোমরা এলা যে মাছ ধরলেন ওটে থাকি কয়টা মাছ আনো।”

১১ শিমোন-পিতর নাওত যায়া জালখান ডাঙাত টানি আনিলেক। একশ তিঙ্গানটা বড় মাছ দিয়া জালখান ভর্তি আছিলেক। যদিও এতলা মাছ আছিলেক তবুও জালখান ছিরিলেক না।

১২ যীশু উমরলাক কইলেক, “এটেকোনা আইসো, সাকাল বেলার জল খাবার খাও।” কিন্তু শিষ্যলার মইন্ধোত কাঙোরো সাহস হইলেক না পুছিবার যে, “তোমরা কায়?” কেনেনা উমরা জানে যে, উয়ায় প্রভু।

১৩ যীশু যায়া রুটি নিয়া উমরলাক দিলেক, আর সেই মাছ নিয়াও উমরলাক দিলেক।

১৪ মরণ থাকি ফির বত্তি উঠার পাছত যীশু এই নিয়া তিন বার শিষ্যলোক দেখা দিলেক।

১৫ উমারলার খাবার শেষ হবার পাছত যীশু শিমোন-পিতরক কইলেক, “যোহনের বেটা শিমোন, ঐ মানষিলার চায়া তুই কি মোক বেশী পিরিত করিস?” শিমোন-পিতর কইলেক, “হ্যে প্রভু, তোমরা জানেন যে মুই তোমাক কত পিরিত করং।” যীশু উয়াক কইলেক, “মোর ছাওয়া ভেড়ার বাচ্চালোক দেখাশুনা করেক।”

১৬ যীশু দ্বিতীয় বার উয়াক কইলেক, “যোহনের বেটা শিমোন তুই কি মোক পিরিত করিস?” পিতর উয়াক কইলেক, “হ্যে প্রভু, তোমরা জানেন মুই তোমাক কত পিরিত করং।” যীশু উয়াক কইলেক, “মোর ভেড়াল লালন পালন কর।”

১৭ পাছত যীশু তৃতীয় বার শিমোন-পিতরক কইলেক, “যোহনের বেটা শিমোন, সচাং করি কি মোক পিরিত করিস।” কেনেনা যীশু একে কতা তিন বার পুছিলেক, এই বাদে পিতর দুঃখ পাইলেক, পিতর যীশুক কইলেক, “প্রভু, তোমরা সউগে জানেন, তোমরা জানেন যে মুই তোমাক পিরিত করং।” যীশু উয়াক কইলেক, “মোর ভেড়ালোক দেখাশুনা করেক।

১৮ মুই তোকে সচাং করি কবার ধরচুং, যেলা তুই গাবুর আছিলু সেলা তুই নিজেই তোরে গামছা দিয়া কোমর বান্দিচিস আর যেটেকোনা খুশি ওটেকোনা গেইচিস। কিন্তুক যেলা তুই বুড়া হবু সেলা তুই তোরে হাত আগে দিবু আর অইন্য মানষি তোরে কোমড়

বান্দিয়া দিবে। আর তুই যেটেকোনা যাবার চাবু না ওটেকোনা নিয়া যাবে।”

১৯ ভগবানের মহিমা প্রকাশ করিবার বাদে পিতর কি নাকান করি মরিবে এইটা বুঝি দিবার বাদে যীশু এই নাকানের কতা কইলেক। এই কতা বুঝি দিবার বাদে যীশু পিতরক কইলেক, “মোক দেখেক।”

২০ পিতর পাছপাকে ঘুরিয়া দেখিলেক, যীশু যাক পিরিত করে ঐ শিষ্য পাছে পাছে আসির ধরচে। ইয়ায় ঐ শিষ্য যায় খাবার সমায় যীশুর বুকের উপর হেলান দিয়া কইচিলেক, “প্রভু, তোমাক যে শত্রুর হাতত ধরেয়া দিবে, উয়ায় কায়?”

২১ পিতর উয়াক দেখিয়া যীশুক কইলেক, “প্রভু, ইয়ার কি হইবে?”

২২ যীশু পিতরক কইলেক, “মুই যদি চাং যে, মুই না আইসা পর্যন্ত উয়ায় থাকিবে, তাতে তোর কি? তুই মোক দেখেক।”

২৩ এই বাদে গুরু ভাইলার মইদ্বোত এই কতা ছড়াছড়ি হইলেক যে, ঐ শিষ্যটা মরিবে না। কিন্তু যীশু উয়াক কয় নাই যে, উয়ায় মরিবে না। উয়ায় কইচিলেক, “মুই যদি চাং, মুই না আইসা অন্দি উয়ায় এটেকোনা থাকিবে, তাতে তোর কি?”

২৪ উয়ায় ঐ শিষ্য যায় এইলা বিষয়ে সাক্ষ্য দিচে, আর উয়ায়ে এইলা নেখিচে। হামরা জানি উয়ার সাক্ষ্য সচাং।



২৫ যীশু আরো ম্যেলা কাম করিচিলেক, ঐলা যদি একটা একটা  
করি নেখা গেইলেক হয় তাইলে এত বই হইলেক হয় যে, দুনিয়াত  
জাগা ধরিলেক না হয়॥

## কাম

১ মানিগুনী শ্রী থিয়ফিল, প্রভু যীশু এই দুনিয়াত রওয়ার সমায় থাকি স্বর্গ তুলি নিয়া যাওয়া পর্যন্ত মেলা কাম করির আর শিক্ষা দিবার শুরু করিচে। ঐলার বিবরণ মোর পইলা বইখানত আছে।

২ যীশুক স্বর্গত তুলি নিবার আগত উয়ার বাছাই করা খবরিয়ালাক কি করির নাগিবে পবিত্র আত্মার সাহায্যে সেইটা হুকুম দিলেক।

৩ ক্রুশত মরণের দুঃখ ভোগের পাছত যীশু যে বত্তি উঠিচে, সেইটা খবরিয়ালাক দেখা দিয়া মেলাবার প্রমাণ করি দিলেক। চল্লিশ দিন পর্যন্ত খবরিয়ালাক দেখা দিয়া ভগবানের শাসন ব্যবস্থা সমন্ধে কইলেক।

৪-৫ এক দিন যীশু খবরিয়ালার নগত খাবার সমায় আদেশ দিলেক, “তোমরা যিরুশালেম ছাড়িয়া না যান, কেনেনা মোর স্বর্গের বাপ যেই দান দিবার প্রতিজ্ঞা করিচিলেক, সেইটা আগতে মোরটে শুনিলেন। মহাপুরুষ যোহন জলত ডোবেয়া দীক্ষা দিলেক, কিন্তু কয়েক দিনের মইন্ধে তোমরা পবিত্র আত্মার দীক্ষা পাইবেন। এই পবিত্র আত্মার দীক্ষার দান পাবার বাদে তোমরা বাচ্ছে রন।”

৬ সেলা খবরিয়ালা একটে হয় যীশুক পুছিলেক, “প্রভু এলা কি ইজ্রায়েলী জাতিক মুক্তি দিয়া নিজের রাজ্য ফিরিয়া দিবেন?”

৭ যীশু কইলেক, “স্বর্গের বাপ নিজের অধিকারেই সেই দিন আর সমায় ঠিক করি থুইচে, ঐলা তোমারলাক জানির দেওয়া হবে না।

৮ কিন্তু পবিত্র আত্মা তোমারলার উপরাত আসিলে তোমরা শক্তি পাবেন। সেলো যিরুশালেম গঞ্জ, গোটায় যিহুদীয়া প্রদেশ, শমরীয়া রাজ্যের মানষিলাক মোর কতা কয়া তোমরা এই দুনিয়ার শেষ সীমনা পর্যন্ত সাক্ষী হবেন।”

৯ এই কতা কইতে কালে খবরিয়ালার চোখুর আগত যীশুক স্বর্গত তুলি নিয়া উয়াক মেঘের আওডাল করা হইলেক।

১০ যীশু যেলা স্বর্গত যাবার ধরছিলেক, সেই সমায় উয়ার খবরিয়ালা সগায় চোখু মেলিয়া দ্যাওয়ার ভিতি দেখিবার নাগিলেক। সেই সমায় সাদা ধপ-ধপা কাপড় পেন্দা দুই জন মানষি উমারলার বগলোত খাড়া হয় কইলেক,

১১ “হে বাহে, গালীলের মানষিলা, খাড়া হয় দ্যাওয়ার ভিতি কি দেখিবার ধরচেন? যীশুক স্বর্গত তুলি নেওয়া হইচে! ক্যংকরিয়া যীশু স্বর্গত গেইচে তোমরা তো দেখিলেন আর একে নাকান করি উয়ায় স্বর্গ থাকি ফিরি আসিবেই।”

১২-১৩ এই ঘটনা দেখিয়া উমরা জলপই পাহাড় থাকি যিরুশালেম গঞ্জত ফিরি আসিলেক। উমরালা হইলেক পিতর, যোহন, যাকব, আন্দ্রিয়, ফিলিপ, থোমাস, বর্থলময়, মথি, আলফেয়ের বেটা যাকব, মৌলবাদী শিমোন আর যাকবের বেটা যুদাস। এই পাহাড় যিরুশালেম থাকি আধা মাইল দূর। গঞ্জত

পৌছিয়া খবরিয়ালা যেই দোতালা ঘরটাত রয় সেই ঘরত সোন্দাইলেক।

১৪ উমরানা সগায় একে সাথে এক মনে প্রার্থনা করিছিলেক।  
উমার নগত কয়েক জন বেটিছাওয়া, যীশুর ভাইলা আর উয়ার  
মাও মরিয়ম প্রার্থনা করির নাগিলেক।

১৫ এক দিন য়েলা যীশুর শিষ্যলা প্রার্থনা করির ধরছিলেক,  
ওটে আন্দাজ একশ কুড়িজন মানষি আছিলেক। এই একশ  
কুড়িজন মানষির মইন্ধোত পিতর খাড়া হয় কইলেক,

১৬ “হে মোর ভাইলা, যেই মানষিলা যীশুক ধরচে, উমারলাক  
ঘাটা দেখে নিয়া গেইলেক যুদাস। উয়ায় যে এই নাকান কাম  
করিবে, সেইটা মেলা দিন আগত পবিত্র আত্মা রাজা দায়ুদের মুখ  
দিয়া জানাইলেক। শাস্ত্রত এইটা নেখা আছে, আর সেই কতা  
পূরণ হবার দরকার আছিলেক।

১৭ যুদাস আছিলেক হামারলার মইন্ধে এক জন, আর হামার  
নগত ভগবানের কাম করির বাদে উয়াক বাছাই করা হইচে।”

১৮ (এই মানষিটা বেয়া কাম করিয়া যে টাকা পাইছিলেক ঐ  
টাকা দিয়া এক খন্ড জমি কিনিলেক। উয়ায় ঐ জমিত মুখ  
থুবরিয়া পড়িয়া গেইলেক, আর পেট ফাটি নাড়ি ভুড়ি বাইর  
হইলেক।

১৯ যিরুশালেমের সউগ মানষিলা এই কতাটা শুনছিলেক।  
উমার ভাষায় জমি খানোক কওয়া হয় আকেল্দামা বা অক্তের

জমি।)

২০ পিতর আরো ফম করি দিলেক, “শাস্ত্রের গীতসংহিতাত নেখা আছে, ‘উয়ার বাড়ি শ্মশানের নাকান হয়্যা থাকুক।’ “আরো নেখা আছে, ‘উয়ার দায়িত্বের উচা পদ অইন্য মানষি নেউক।’

২১-২২ “এই বাদে যীশু যে মরণক জয় করি বত্তি উঠিচে, ঐ ঘটনার মুখ্য সাক্ষী হিসাবে হামার নাকান আর এক জনাক বাছাই করি নিবার নাগিবে। হামরা তাইলে এই নাকান মানষিক বাছাই করিমু যে, যোহনের দীক্ষা দেওয়ার সমায় থাকি যীশুক স্বর্গত তুলি নেওয়া পর্যন্ত, মানে যত দিন প্রভু যীশু হামার নগত চলা ফেরা করিচে, ততদিন সেই মানষিটাও হামার নগত আছে। ইয়াতে মানষিটাও হামার নাকান সাক্ষী দিবার পাবে।”

২৩ সেলো সভাত খবরিয়ালা দুই জনের নাম সমর্থন করিলেক, উমরা হইলেক, যোষেফ, যাক বার্শববা আর যুষ্ট নামে ড্যেকা হয়, আর এক জন মত্তথিয়,

২৪-২৫ খবরিয়ালা প্রার্থনা করিয়া কইলেক, “হে প্রভু, তুই তো অন্তরযামী। যুদাস উয়ার পাওনা শাস্তি পাবার বাদে খবরিয়ার পদ ছাড়ি দিচে। এলা এই দুই জনের মইন্ধে এই পদের বাদে কাক তুই বাছাই করিচিস, হামাক দেখেয়া দে।”

২৬ সেলো উমরা লটারি করিলেক, আর মত্তথিয়ের নাম উঠিলেক। এই নাকান করি সেই এগারো জন খবরিয়ার নগত যুদাসের বদলে ঐ একজনের নাম যোগ করিলেক।

২ পাছত পঞ্চাশতমীৰ পৰ্বনৈৰ দিন আসিলেক, ঐ দিন খবৰিয়ালা সগায় এক জাগাত হইলেক।

২ সেয়া দ্যাওয়া থাকি অচমকা কাল বৈশাখী ঝড়ৈৰ নাকান আওয়াজ ঘরের ভিত্তিৰা ছড়ি গেইলেক।

৩ ইয়াৰ পাছত খবৰিয়ালা অগুনৈৰ শিখাৰ নাকান কৰি ছড়ি যাবাৰ দেখিৰ পাইলেক আৰ সগারে উপৰাত আসিয়া পড়িলেক।

৪ আৰ উমরা সগায় পবিত্র আত্মাত ভৰপূৰ হইলেক। এই আত্মা উমারলাক যাক যেমন কতা কবার সামর্থ দিচে ঐ নাকানে নানা নাকান ভাষায় কতা কবার নাগিলেক।

৫ সেই সময় সউগ জাতিৰ থাকি যিহুদী ভক্তলা আসিয়া যিরুশালেমত বসবাস কৰিৰ ধৰছিলেক।

৬ এই কাল বৈশাখী ঝড়ৈৰ শব্দ শুনিয়া মেয়া মানষি একটে আসিয়া জোটে হইলেক। উমারলার নিজের নিজের ভাষাত শিষ্যলার কতা কওয়া শুনিয়া, সগায় বুদ্ধিহারা হয় গেইলেক।

৭ উমরা খুব অচানক হয় কবার নাগিলেক, “এইটা কেমন কৰি সম্ভব? এই মানষিলা সগায় গালীলৈৰ হয় কি না?

৮ তাইলে হামরা কেমন কৰি সগারে নিজের নিজের ভাষাত কতা কবার শুনিলোং?

৯ হামরা এটে নানা নাকান দেশের মানষি আছি, পার্থীয়, মাদীয়, এলমীয়, মেসোপতেমিয়া, যিহুদীয়া, কাপ্পাদকিয়া, পন্ত, এশিয়া প্রদেশ,

১০ আর ফরুগিয়া, পাম্ফুলিয়া, মিশর, কুরীণীর বগলা বগলি লিবিয়ার জাগার বসবাসকারী মানষিলা,

১১ রোম গঞ্জ থাকি আইসা যিহুদীলা, আর যিহুদী না হয় কিন্তু যিহুদী ধর্মের শিষ্য হইচে এই নাকান মেলা মানষি, ক্রীত দ্বীপের মানষিলা আর আরবীলা, হামরা সগায় নিজের নিজের ভাষায় ভগবানের মহান কামের কতা উমার মুখ দিয়া কবার শুনচি।”

১২ উমরা বুদ্ধিহারা হয় এক জন আরেক জনক কবার নাগিলেক, “ইয়ার মানে কি?”

১৩ কিন্তু অইন্য মানষিলা টিটকারি করি শিষ্যলোক কবার নাগিলেক, “উমরা মদ খায়া মাতাল হইচে।”

১৪ পিতর এগারো জন খবরিয়ার নগত খাড়া হয় ভিডের মানষিলাক চিকিরিয়া কইলেক, “কি রে যিহুদী মানষিলা, আর যিরুশালেমের বসবাসকারী মানষিলা, তোমরা সগায় ভাল করি জানি নেও, মোর কতা মন দিয়া শুন।

১৫ তোমরা কবার ধরচেন, এই মানষিলা মদ খাইচে, কিন্তু এই মানষিলা মদারু নোয়ায়। এলা মাত্র সাকাল নয়টা বাজে।

১৬ আজি সাকালে তোমরা যেইলা দেখিলেন, সেইলা ভগবানের ভাববাদী যোয়েল মেলা দিন আগত কইচে,

১৭ পরম ভগবান কইচে, শেষ কালত এই নাকান হইবে যে, পবিত্র আত্মা সউগ মানষির উপরাত ঢালিয়া দিম, তোমার বেটা-বেটি ভাববাণী কবে, গাবুর যায় উমরা ভগবানের দর্শন পাবে, আর বুড়া মানষিলা স্বপন দেখিবে।

১৮ এমন কি ভগবানের চাকর চাকরানীলার উপরাত মোর আত্মা মুই ঢালিয়া দিম, উমরা ভাববাণী কবে।

১৯-২০ মুই দ্যাওয়াত অচানক অচানক ঘটনা ঘটাইম, বেলা কালা হয়্যা যাবে, চান নাল হয়্যা যাবে। আরো দুনিয়াত অক্ত, অগুন, ধূমার নানা নাকান চিন দেখাইম। এইলা ঘটনা ঘটীর পাছত প্রভুর জাকজমকের দিন আসিবে,

২১ আর যায় যায় প্রভুর নাম ধরি ডেকাবে উমরা সগায় রক্ষা পাবে।

২২ “হে ইজ্রায়েলী মানষিলা শুন! পরম ভগবান নাসারত গেরামের যীশুর মইন্ধো দিয়া মেয়ো অচানক অচানক চিনের কাম করিয়া তোমারলাক এইটা প্রমাণ করিচে যে, উয়ায় সেই মানষি, যাক ভগবান পেঠাইচে আর তোমরা এইলা নিজে জানেন।

২৩ আর ভগবানও এইলা জানে, এইলা হইলেক ভগবানের পরিকল্পনা মতন যীশুক তোমারলার হাতত সাঁপে দেওয়া হইলেক। তোমরা বেয়া মানষিক দিয়া ক্রুশত টাঙেয়া মারি ফেলাইলেন।

২৪ উয়ায় মরণ যন্তনা ভোগ করিলেক কিন্তু পরম ভগবান উয়াক মরা মানষির মইন্ধোত থোয় নাই, উয়াক মরণ থাকি বত্তে



তুলিলেক, কেনেনা যমের সাধ্য হয় নাই উয়াক ধরি খুবার।

২৫ যীশুর কতা মহারাজা দায়ূদের মুখ দিয়া কইচে, মুই পতি দিনেই দয়াল ভগবানক মোর আগপাকে দেখিচুং, উয়ায় মোর ডাইন পাকে আছে, এই বাদে মুই থির থাকিম।

২৬ মোর মন আনন্দে ভরপুর, মোর জিবা উয়ার গুণকিত্তন করিতে আছে, মুই আশা নিয়া বত্তিম।

২৭ কেনেনা তোর ভক্তের দেহা নাশ হবার দিবু না, মোর পরানটা যমের বাড়িত ফ্যেলেয়া খুবু না,

২৮ তুই মোক জীবনের ঘাটা চেনাছিস, তুই মোর সাথত থাকিয়া মোর জীবনত আনন্দে ভরে দিবু।

২৯ “মোর গুনধর ভাইলা, এই কতাটা নিশ্চয় যে, চৌদ গুষ্টির রাজবংশের বাপ মহারাজা দায়ূদ মরি গেইচে, উয়াক সমাধিত দেওয়া হইচে। আর এলাও সমাধিটা আছে।

৩০ উয়ায় এক জন ভাববাদী আছিলেক আর উয়ায় জানির পাইচে ভগবান প্রতিজ্ঞা করি কতা দিচে যে, মহারাজা দায়ূদের গুষ্টির এক জনাক রাজা করি সিংহাসনত বসাবে।

৩১ এইটা দায়ূদ জানির পায়া, বাছাই করা রাজাটার ফির বত্তি উঠার সমন্ধে কইচে, উয়াক যমের বাড়িত ফ্যেলে থোয়া হয় নাই আর উয়ার দেহা নাশ করাও হয় নাই।

৩২ পরম ভগবান এই যীশুক মরণক জয় করি বত্তে তুলিচে, আর হামরা সগায় এই ঘটনার সাক্ষী আছি।

৩৩ এলা উয়ায় স্বর্গের মহান সিংহাসনত পরম ভগবানের ডাইন পাকে বসিয়া আছে। আর পরম বাপের প্রতিজ্ঞা করা পবিত্র আত্মা উয়াক দান করা হইচে। এলা যীশু সেই পবিত্র আত্মা ঢালি দিলেক, তোমরা এইলা দেখির শুনির ধরচেন।

৩৪-৩৫ কেনেনা দায়ূদ নিজে স্বর্গত যাই নাই, তাণ্ডো উয়ায় এই কতা কইচে, ভগবান মোর প্রভুক কইচে, যতক্ষণ না মুই তোর শত্রুলাক তোর ঠেংএর তলত থোং, ততক্ষণ তুই মোর ডাইন পাকে বইসেক।

৩৬ “এই বাদে যিহুদী জাতির সগায় সঠিক করি জানুক, তোমরা যাক ক্রুশত টাঙাইচেন, পরম ভগবান সেই যীশুক প্রভু আর বাছাই করা রাজা দুইটা পদেই নিযুক্ত করিচে।”

৩৭ এই কতাটা শুনিয়া মানষিলার মন দুঃখে ভাঙিয়া গেইলেক। উমরা পিতর আর অইন্য খবরিয়ালাক কইলেক, “কি রে ভাই, হামরা কি করিমু?”

৩৮ পিতর উমারলাক কইলেক, “তোমরা সগায় পাপ থাকি ক্ষমা পাবার বাদে পাপের ঘাটা থাকি মন ফিরিয়া, রাজা যীশুর নামে দীক্ষা নেন। তাইলে তোমরা দান হিসাবে পবিত্র আত্মা পাবেন।

৩৯ এই প্রতিজ্ঞার দান তোর আর তোমার ছাওয়া ছোটোর, দূরত যায় যায় আছে উমারো বাদে। হামার পরম ভগবান উয়ার নিজের মানষি হবার জইন্যে যাক যাক ড্যেকাবে, এই দান উমার সগারে বাদে।”

৪০ আরো মেলা কতার সাক্ষী দিলেক। উমাক আরো মিনতি করি কইলেক, “এই কালের বিবেকহীন মানষি থাকি নিজক বাঁচান!”

৪১ যায় যায় পিতরের কতা বিশ্বাস করিলেক উমরা দীক্ষা নিলেক। আর সে দিনে খবরিয়ালার নগত কমপক্ষে তিন হাজার মানষি যোগ দিলেক।

৪২ যতলা শিষ্য আছিলেক উমরা সগায় মন দিয়া খবরিয়ালার শিক্ষা শুনিয়া, উমরা প্রভুর ভোজ নিয়া সৎ সংঘত প্রার্থনা করি সমায় কাটের ধরছিলেক।

৪৩ খবরিয়ালা মেলা অচানক চিনের কাম করির ধরছিলেক। এই বাদে সগারে অন্তরত শ্রদ্ধার ভয় ভক্তি বাড়ি গেইলেক।

৪৪-৪৫ উমার নিজের সম্পত্তি বেচেয়া যার যেই নাকান দরকার ঐ নাকানে ভাগ করিয়া নিলেক। কেনেনা তোর তোর মোর মোর ভাব আছিলেক না, উমার মইদ্বোত একতা আছিলেক।

৪৬ উমরা পতিদিন যিরুশালেমের দশংগতি মন্দিরত যায়া এক সাথে আরাধনা করির ধরচে। আর একে অইন্য বাড়িত যায়া সাদাসিদা মনে আনন্দ করি খাবার নাগিলেক।

৪৭ উমরা সউগ সমায় ভগবানের গুণগান করির ধরছিলেক। সউগ মানষিলা উমাক শ্রদ্ধা করিছিলেক। আর যায় যায় পাপ থাকি মুক্তি পাবার ধরছিলেক, উমারলাক প্রভু শিষ্যলার নগত যুক্ত করিয়া উমার সংখ্যা দিনে দিনে বাড়ি যাবার নাগিলেক।

৩ এক দিন বিকাল তিনটায় পিতর আর যোহন মন্দিরত যাবার ধরচে। এই সময় যিহুদী মানষিলা প্রার্থনা করে।

২ এমন সময় কয়েক জন মানষি একটা মানষিক উবিয়া আনির ধরচে। উয়ায় জন্ম থাকি খোড়া আছিলেক এই বাদে হাটির পায় না। উয়াক প্রতিদিন মন্দিরের সুন্দর নামে দুয়ারের বগলত বসে থোয়া হয়। আর যেই মানষিলা মন্দিরত যায় উমারটে ভিক্ষা চায়।

৩ পিতর আর যোহনক দশংগতি মন্দিরত সোন্দের দেখিয়া উয়ায় উমারটে কাউলা-কাউলি করি ভিক্ষা চাবার নাগিলেক।

৪ উমরা এক নজর উয়ার ভিতি দেখিয়া কইলেক, “হামার ভিতি খানেক দেখেক।”

৫ সেলো মানষিটা উমারটে কিছু পাবার আশায় উমার ভিতি চায়া রইলেক।

৬ পিতর কইলেক, “হামারটে সোনা, রুপা কিছুই নাই, কিন্তু যেইটা আছে সেইটায় তোক দান করির ধরচি। নাসারতের যীশু, যায় ভগবানের বাছাই করা রাজা, উয়ারে নামত খাড়া হয় হাটিয়া বেড়াও!”

৭ এই কতা কয়া পিতর মানষিটার ডাইন হাত ধরি তুলিলেক, সেলোয় সেলোয় উয়ার ঠেং আর গোড়ালি হাটিবার বল পাইলেক।

৮ আর উয়ায় ঝাপেয়া খাড়া হয়ায় হাটির নাগিলেক। সেলো মানষিটা হাটিতে হাটিতে, ঝাঁপাইতে ঝাঁপাইতে, ভগবানের গুণগান করতে করতে উমার নগত দশংগতি মন্দিরত সোন্দাইলেক।

৯ সউগ মানষিলা উয়াক হাটি বেড়ের আর ভগবানের গুণগান করির দেখিল;

১০ আর সগায় উয়াক চিনির পাইলেক যে, ইয়ায় সেই মানষি যায় দশংগতি মন্দিরের সুন্দর নামের দুয়ারের বগলোত বসি ভিক্ষা করির ধরছিলেক। এই মানষিটার জীবনত যে ঘটনাটা ঘটিচে এইটা দেখিয়া মানষিলা খুব অচানক হয়্যা গেইলেক।

১১ কিন্তু ভিখারীটা পিতর আর যোহনক ধরিয়া খাড়া হয়্যা আছে। মানষিলা সগায় উয়াক সুস্থ হওয়া দেখিয়া অচানক হয়্যা উমার বগলত শলোমনের নামে যে বারান্দাটা উমরالا ওটেকোনায়া দৌড়িয়া আসিলেক।

১২ এই দেখিয়া পিতর মানষিলাক কইলেক, “হে ইজ্রায়েলীর ঘর, এই মানষিটা হাটির পায় দেখিয়া তোমরالا কেনে এত অচানক হবার ধরচেন? হামার শক্তিতে উয়ায় কি হাটির শক্তি পাইচে? ভগবানের প্রতি হামার ভক্তির গুণে উয়ায় কি ভাল হইচে? এইটা মনে করিয়া তোমরা হামার ভিত্তি চায়া আছেন কি?

১৩ না, এইটা না হয়, অব্রাহাম, ইসহাক আর যাকবের ভগবান, অর্থাৎ হামারলার চৌদ্দ গুষ্টির ভগবান এই কামের মইন্ধো দিয়া নিজের চাকর, প্রভু যীশুর মহিমা প্রকাশ করিচে। তোমরالا তো

যীশুক মারি ফ্যেলেবার বাদে শত্রুর হাতত ধরে দিচেন! রাজ্যপাল পীলাত উয়াক ছাড়ি দিবার চাইচে, কিন্তু তোমরালায় উয়াক পীলাতের আগত অস্বীকার করিচেন।

১৪ তোমরালা সেই পবিত্র আর নির্দোষ মানষিটাক মানি না নিয়া এক জন খুনী মানষিক তোমারলারটে ছাড়ি দিবার কইছিলেন।

১৫ আর যায় জীবন দাতা উয়াক তোমরালা মারি ফ্যেলাইচেন, কিন্তু ভগবানের প্রতিজ্ঞা মতন উয়াক মরণের পাছত বন্তে তুলিচে; আর হামরা এইলার সাক্ষী।

১৬ এই যে ভিখারীটাক তোমরালা দেখিচেন আর উয়াক চেনেন, প্রভু যীশুর উপরাত বিশ্বাসের কারনে, উয়ায় ভাল হইচে। প্রভু যীশুর নামের গুণে যে বিশ্বাস আসিচে, সেই বিশ্বাস তোমারলার সগারে চোখুর আগত উয়াক পুরাপুরি সুস্থ করি তুলিচে।

১৭ “ভাইলা, মুই জানং তোমরালা আর তোমার নেতালাও অজ্ঞানী হয়। প্রভু যীশুক ক্রুশত দিচেন।

১৮ কিন্তু ভগবান মেয়ো দিন আগতে উয়ার সউগ ভাববাদীলার মইন্ধো দিয়া কইচিলেক, বাছাই করা রাজাটাক কষ্ট ভোগ করির নাগিবে; আর সেই কতা ভগবান এই নাকান করি পূরণ করিলেক।

১৯ এই বাদে তোমরালা পাপের ঘাটা থাকি মন ফিরান আর ভগবানের প্রতি মন দেও। যেন তোমারলার পাপ ধুইয়া ফ্যেলা হয়।

২০ ইয়াতে তোমারলার জিরানের বাদে শান্তির নানান কাল পাবেন আর ভগবান যেই রাজাটাক বাছাই করি থুইচে উয়াক আরো পেঠা হবে।

২১ যীশুক স্বর্গত বরণ করি নেওয়া হইচে যত দিন অন্দি ভগবান দুনিয়ার সউগ ঠিক ঠাক না করে ততদিন যীশুক স্বর্গত রবার নাগিবে। মেয়ো দিন আগত যেই নাকান করি পবিত্র ভাববাদীলা কইচে ঐ নাকান হবে।

২২ মহাপুরুষ মোশি কইচিলেক, ‘তোমারলার বাদে পরম ভগবান ইজ্রায়েলীয় ভাইলার মইন্ধো থাকি এক জন বিশেষ ভাববাদীক খাড়া করিবে। ভাববাদীটা হবে মোরে নাকান।

২৩ আর এই নাকান হবে, যদি কোন মানষি উয়ার কতা না শুনিবে উয়াক প্রজালার মইন্ধো থাকি একেবারে নাশ করা হবে।’

২৪ “এইলা ছাড়া ভাববাদী শমুয়েল থাকি শুরু করিয়া ভগবানের শেষ ভাববাদীলা, উমরা সগায় এই কালের কতা কয়া গেইচে।

২৫ তোমরালা তো সেই ভগবানের ভাববাদীলার গুষ্টি। তোমারলার চৌদ্দ গুষ্টির বাদে ভগবান যে চুক্তি করিচিলেক, তোমরালা তো তারে ভাগীদার। পরম ভগবান, অব্রাহামক এই কতা কয়া চুক্তি করিচিলেক, ‘তোমার গুষ্টির মইন্ধো দিয়া দুনিয়ার সউগ জাতি আশুর্বাদ পাবে।’

২৬ ভগবান নিজের চাকর যীশুক তুলি আনিয়া পইলা তোমারলারটে মানে যিহুদীলারটে পেঠাইলেক। তোমারলার

সগাকে বেয়া কাম থাকি ফিরি আনিয়া ভগবান তোমারলাক আশুবাদ করিবে।”

৪ পিতর আর যোহন যেয়ো মানষিলার নগত কতা কবার নাগচে, সেই সময় দশংগতি মন্দির থাকি যিহুদী বামনলা, মন্দির রক্ষাকারী প্রধান সেনাপতি আর সদ্দুকীলা উমার বগলত আসিয়া হাজির হইলেক।

২ পিতর আর যোহন প্রচার করির ধরচে যে, যীশুর মইদ্বো দিয়া মরা মানষিক আরো বত্তে তোলা হবে। এই শুনিয়া ঐ নেতালা বিরক্ত হইলেক।

৩ এই বাদে উমরালা পিতর আর যোহনক বন্দী করিয়া নিয়া যায়, আর সহইন্না হইচে বুলিয়া পরের দিন পর্যন্ত হাজতত থুইলেক।

৪ তাণ্ডো মেয়ো মানষি উমার প্রচার শুনিয়া বিশ্বাস করিয়া শিষ্য হইলেক। এই বাদে শিষ্যলোর সংখ্যা বাড়ি যায়া বেটাছাওয়ার সংখ্যা কমপক্ষে পাঁচ হাজার হইলেক।

৫ পরের দিন সাকাল বেলা যিহুদীলার প্রধান বামনলা, যিহুদী নেতালা আর পন্ডিতলা সগায় যিরুশালেমত একটে জোটো হইলেক।

৬ আর ওটেকোনা মহাবামন হানন হাজির আছিলেক। উয়ায় ছাড়াও কাইফা, যোহন, আলেক্রান্দার আর মহাবামনের



পরিবারের আরো মানষি-জনও আছিলেক।

৭ উমরা পিতর আর যোহনক উমার মইন্ধোত খাড়া করিয়া পুছিলেক, “তোমরা কার নামের গুণে বা শক্তিতে এই কাম করির ধরচেন?”

৮ পিতর সেলো পবিত্র আত্মাত ভরপুর হয় কইলেক, “মানিগুনী নেতালা, সমাজপতি ঘর,

৯ এক জন খোড়া মানষির উপকার করচি বুলিয়া তোমরা আজি হামাক জেরা করির ধরচেন, ক্যেংকরি ভাল হইলেক।

১০ তোমরা আর সউগ ইজ্রায়েলী মানষিলা এইলা জানি থোন, তোমরা যাক ক্রুশ খুটাত টাঙেয়া মারিচেন, আর যাক ভগবান মরা মানষির মইন্ধো থাকি বত্তে তুলিচে উয়ায় সেই নাসারতের যীশু যায় বাছাই করা রাজা। যীশুর নামের শক্তিতে ভাল হয় এই মানষিটা তোমার আগত খাড়া হয় আছে।

১১ যীশুই হইলেক, ‘সেই খুটি তোমরা রাজ-মিস্ত্রিলা, অকাজের মনে করি ফ্যেলেয়া দিচেন, আর এলা ঐটায় সউগ চায়া দরকারি কোণার খুটি হইচো।’

১২ পরম প্রভু যীশুর নাম ছাড়া আর অইন্য কোন নামে মুক্তি দিবে না। স্বর্গ-মর্ত্য, এই দুনিয়াত যীশুর নামে যে মুক্তি দিবে ঐটা হামারলাক গ্রহন করির নাগিবে। আর কাঙোরটে মুক্তি পাওয়া যাবে না!”

১৩ নেতালা সগায় পিতর, যোহনের সাহস দেখিয়া আর উমরা আধ্যাত্মিক নেখা পড়া না করা সাধারন মানষি, সেটা জানির পায়া অচানক হইলেক। আর উমরা যে যীশুর সঙ্গে সাথী আছিলেক সেটাও জানির পাইলেক।

১৪ আর ঐ ভাল হওয়া মানষিটাক পিতর আর যোহনের নগত খাড়া হয়্যা আছে দেখির পায়া, নেতালা কোন কিছু কবার পাইলেক না।

১৫ এই জইন্যে উমরالا পিতর আর যোহনক সভার ভিত্তিরা থাকি বায়রাত যাবার কইলেক। সেলো নেতালা একে অপরের নগত পরামর্শ করিয়া কইলেক,

১৬ “এই মানষিলাক নিয়া হামরা কি করিমু? যিরুশালেমত বসবাস কারি মানষিলা সগায় উমার অচানক চিনের কামের কতা জানি ফেলাইচে। আর হামরাও অস্বীকার করির পারি না।

১৭ কিন্তু মানষিলাক মইদ্বোত এই ঘটনা যাতে না ছড়ায় এই বাদে উমাক ভয় দেখেয়া সাবধান করির নাগিবে। উমরা যাতে কাণ্ডোকে যীশুর নামে কোন কিছু না কয়।”

১৮ এই বাদে পিতর আর যোহনক সভার ভিত্তিরা ডেকে আনিয়া হুকুম দিলেক, “কোন দিন তোমরা যীশুর নামে মানষিলাক কোন কিছু কবেন না আর শিক্ষাও দিবেন না।”

১৯ কিন্তু পিতর আর যোহন কইলেক, “তোমরালায় বিচার কর ভগবানের নজরত কোনটা ঠিক! তোমারলার আদেশ পালন

করিমু, না ভগবানের আদেশ পালন করিমু?

২০ হামরা যেইলা দেখিচি, শুনিচি সেইলা মানষিক না কয়া রবার পারি না।”

২১-২২ আর যে মানষিটার উপরাত অচানক চিনের কাম হইচে, উয়ার বয়স চল্লিশের বেশী আছিলেক। ঐ অচানক ঘটনা দেখিয়া মেয়ো মানষি ভগবানের গুণগান করির ধরছিলেক। ইয়াতে নেতালা যদিও পিতর আর যোহনক শাস্তি দিবার চাইছিলেক, কিন্তু মানষিলার ভয়ে পারে নাই। উমাক খুব ভয় দেখেয়া ছাড়ি দিলেক।

২৩ পিতর আর যোহন ছাড়া পায়া নিজের সঙ্গী সাথীলারটে ফিরি গেইলেক। সেয়ো প্রধান বামনলা আর যিহুদী নেতালা যেইলা কইচে সউগে যায়া মানষিলাক কইলেক।

২৪ এই কতা শুনিয়া শিষ্যলা সগায় মিলি এক মনে ভগবানেরটে প্রার্থনা করির নাগিলেক, “হে দিন দুনিয়ার মালিক! দ্যাওয়া-দুনিয়া, সাগর এইলার মইন্ধে সউগে তুই সিজ্জন করিচিস।

২৫ তুই তোর চাকর হামারলার চৌদ গুষ্টির বাপ দায়ূদের মুখ দিয়া পবিত্র আত্মার চালনায় কতা কইচিস, ‘কে্যেনে সউগ জাতির মানষিলা অস্থির হয় চেকরা-চিকরি করে? কে্যেনে মানষিলা ভগবানের বিরুদ্ধে বোকার নাকান চক্রান্ত করে?

২৬ ভগবান আর উয়ার বাছাই করা রাজার বিরুদ্ধে, দুনিয়ার রাজালা খাড়া হইচে, আর শাসনকর্তালা একটে হয় বৈঠক করির

ধরচে।’

২৭ হ্যে এইটা সচাং, তোর পবিত্র চাকর যীশুক তুই নিযুক্ত করিচিস। উয়ার বিরুদ্ধে রাজা হেরোদ আর পন্তীয় পীলাত এই গঞ্জের যিহুদীলা, অযিহুদীলার নগত একটে হয় বৈঠক করিচে।

২৮ হামরা তো জানি, তোর ইচ্ছা আর শক্তিতে যেইলা ঘটনা ঘটিবে সেইলা তুই আগোতে ঠিক করি থুচিস। আর উমরা ঐলায় করিলেক।

২৯ এলা দেখেক দয়াল ভগবান, উমরালা কেংকরি হামারলাক ভয় দেখের ধরচে। তোর অধম চাকর হামারলাক এমন শক্তি দে যাতে খুব সাহস করি তোর বাইক্য কবার ক্ষমতা পাই।

৩০ তোর হাত বাড়েয়া দে যাতে তোর পবিত্র চাকর যীশুর নামে মানষিলাক সুস্থ করির পারে আর অচানক অচানক দিনের কাম করির পারে।”

৩১ উমরালা যে জাগাত একটে হয় প্রার্থনা করির ধরছিলেক, প্রার্থনা শেষ হইতে কালে ঐ জাগাখান কাপিয়া উঠিলেক। উমরা সগায় পবিত্র আত্মাত ভরপুর হয় সাহস করিয়া ভগবানের বাইক্য কবার নাগিলেক।

৩২ যীশুর শিষ্যলা মনে পরানে একে আছিলেক। উমরালা নিজের বুলিয়া কোন কিছু মনে করে নাই, তোর তোর মোর মোর ভাবও আছিলেক না।

৩৩ খবরিয়ালা মহাশক্তিবান হয়া সাক্ষী দিবার নাগিলেক যে, প্রভু যীশু মরণক জয় করি বত্তি উঠিচে। আর উমারলার সগারে উপরাত ভগবানের মেলা আশুর্বাদ আছিলেক।

৩৪ উমার মইন্ধে কাণোরো কোন অভাব আছিলেক না, কেনেনা উমারলার জাগা-জমিন, ঘর-বাড়ি যা কিছু আছিলেক বেচেয়া টাকা-পাইসা খবরিয়ালা হাতত দিলেক।

৩৫ খবরিয়ালা যার যেমন দরকার তাক তেমন দিবার ধরছিলেক।

৩৬ শিষ্যলার মইন্ধোত একজনের নাম আছিলেক যোষেফ। খবরিয়ালা উয়াক বার্ণবা কয়া ডেকায়, যার মানে হইলেক উৎসাহদাতা। উয়ায় আছিলেক সাইপ্রাস দ্বীপত।

৩৭ উয়ায় এক খন্ড জমিন বেচেয়া টাকা-পাইসা আনিয়া খবরিয়ালা হাতত দিলেক।

৫ অননিয় নামে এক জন মানষি আর উয়ার বউ সফীরা দুইজনে মিলিয়া উমার এক খন্ড জমিন বেচাইলেক।

২ সেই জমির টাকা খবরিয়ালা হাতত আনিয়া দিলেক, কিন্তু গোপনে কিছু টাকা নিজেরটে রাখিলেক। এই বিষয়ে উয়ার বউ জানিয়া একমত আছিলেক।

৩ স্যেলা পিতর কইলেক, “অননিয়, শয়তান অসুর কেংকরিয়া তোর মন জয় করি নিলেক? জমি বেচার কিছু টাকা তুই নিজের বাদে খুচিস। তাইলে তুই কেনে পবিত্র আত্মাক মিছাং কতা কলু?

৪ জমি তো তোরে আছিলেক! আর বেচেবার পাছত তুই কত টাকা দান করিবু এইটাও তোর নিজস্ব ব্যাপার। কেনে তুই এই কাম করিলু? তুই মানষিক মিছাং কতা কইস নাই, স্বয়ং ভগবানক মিছাং কতা কইচিস।”

৫ এই কতাটা শুনতে কালে অননিয় মাটিত পড়িয়া মরি গেইলেক; এই ঘটনাটা যায় যায় শুনিলেক উমরা সগায় খুব ভয় খাইলেক।

৬ পাছত গাবুর চেংড়ালো উঠিয়া উয়ার দেহাত কাপড় জড়েয়া বায়রাত নিয়া যায়া উয়াক সমাধি দিলেক।

৭ ইয়ার আনুমানিক তিন ঘণ্টা পাছত অননিয়র বউ সফীরা আসিলেক, কিন্তু কি ঘটনা ঘটিচে, এইটা উয়ায় জানে না।

৮ স্যেলা পিতর উয়াক কইলেক, “হ্যে মাই সফীরা, মোক কঃ দেখি, তোমরা কি জমিটা এই টাকাতে বেচাইচেন?” সফীরা কইলেক, “হ্যে; ঐ টাকাতে জমিন বেচাইচি।”

৯ পিতর কইলেক, “প্রভুর আত্মাক যাচাই করির বাদে তোমরা দুইজনে এইটা ঠিক করিলেন! দেখ, যায় যায় তোর সোয়ামিক সমাধি দিবার গেইচে, উমরা দুয়ারত আসিয়া আছে। তোকো বায়রাত নিয়া যাবে।”

১০ এই কতা শুনিতে কালে সফীরা পিতরের ঠেংএর বগলোত পড়িয়া মরিলেক। গাবুর চেংড়ালো ঘর সোন্দেয়া দেখিলেক, সফীরাও মরি গেইচে। সেলো সফীরাকো নিয়া যায়ো উয়ার সোয়ামির বগলত সমাধি দিলেক।

১১ এই কতা শুনিয়া যীশুক অনুসরনকারী সউগ সমিতির সদস্যলো আরো অইন্য মানষিলা সগায় খুব ভয় খাইলেক।

১২ খবরিয়ালার হাত দিয়া নানা নাকান অচানক অচানক চিনের কাম করির ধরচে। শিষ্যলো সগায় এক মনে পরানে শলোমনের নামে যে বারান্দা আছিলেক, ওটেকোনা একটে হবার ধরচে।

১৩ অইন্য মানষিলা উমার নগত যোগ দিবার সাহস পায় নাই, কিন্তু ঐ মানষিলা উমাক সন্মান করে।

১৪ তাণ্ডো মেয়ো বেটাছাওয়া, বেটিছাওয়া প্রভু যীশুক বিশ্বাস করিয়া এক সাথে শিষ্যলার দলত যোগ দিবার নাগিলেক।

১৫ আর খবরিয়ালা যেইলা কাম করির ধরছিলেক, এইলা দেখিয়া মানষিলা অসুকিয়া মানষিলাক খাটের উপরাত আর মোটা কেতার উপরাত, ঘাটাত আনিয়া খুবার নাগিলেক, যাতে পিতর ঘাটা দিয়া যাবার সমায় দেহার ছায়া কারো কারোর উপরাত পড়ে।

১৬ যিরুশালেমের চাইরো পাকের গেরামের অসুকিয়া আরো অপদেবতা ধরিয়া কষ্ট পাওয়া মানষিলাক আনিয়া ভিড় করির নাগিলেক, আর উমরালো সগায় ভাল হইলেক।

১৭ এই দেখিয়া মহাবামন আর উয়ার সাথী সদুর্কী দলের মানষিলা হিংসায় জ্বলি পুড়ি উঠিলেক।

১৮ উমরালা খবরিয়ালাক ধরিয়া জেলত বন্দী করি থুইলেক।

১৯ কিন্তু রাইতোতে পরম প্রভুর এক জন স্বর্গদূত আসিয়া জেলের দুয়ারখান খুলিয়া যীশুর খবরিয়ালাক বাইরা নিয়া যায়া কইলেক,

২০ “তোমরা দশংগতি মন্দিরত যাও, ওটেকোনা খাড়া হয়্যা অমৃত জীবন সমন্ধে প্রচার কর।”

২১ স্বর্গদূতের আদেশ মতন ভোর সাকাল হইতে কালে উমরা দশংগতি মন্দিরত সোন্দেয়া প্রচার করির ধরিলেক। আর এদিয়া মহাবামন আর উয়ার সঙ্গী-সাথীলা, যিহুদী সমাজের মানিগুনী মানষিলাক একটা সভাত ডেকাইলেক। জেল থাকি খবরিয়ালাক আনির বাদে মানষি পেঠাইলেক।

২২ কিন্তু মন্দিরের কর্মচারীলা জেলখানাত যায়া দেখিলেক মানষিলা নাই।

২৩ উমরা ফিরি আসিয়া এই খবরটা দিলেক, “হামরা দেখিলুং জেলখানার দুয়ারত শক্ত করি তালা দেওয়া আছে, পাহারাদারলাও দুয়ারে দুয়ারে খাড়া হয়্যা আছে। কিন্তু দুয়ারখান খুলিয়া ভিতরাত কাণ্ডোকে দেখির পাইলুং না।”

২৪ এই কতা শুনিয়া মন্দিরের প্রধান কর্মচারী, প্রধান বামনলা, বুদ্ধিহারা হয়্যা চিন্তা করির ধরিলেক, এলা কি হবে?



২৫ ইয়ার মইন্ধে এক জন মানষি আসিয়া কইলেক, “তোমরা যেই মানষিলাক জেলখানাত থুইচেন, উমরা মন্দিরত যায়া প্রচার করির ধরচে।”

২৬ সেলো প্রধান কর্মচারী, উয়ার অধীনে থাকা কর্মচারীলার সোদে ওটেকোনা যায়া খবরিয়ালাক ধরি আনিলেক। কেনেনা উমরা ভিড়ের মানষিলাক ভয় খাইলেক, যদি উমরা শিল দিয়া ঢেলায়!

২৭ পাছত উমারলাক আনিয়া মহাসভাত খাড়া করিয়া মহাবামন খবরিয়ালাক পুছিলেক,

২৮ “হামরা তোমাক কড়া আদেশ দিচি কি না? যে যীশুর বিষয়ে আর প্রচার করেন না, কিন্তু তোমরা যিরুশালেমের সউগ জাগাতে প্রচার করিচেন। ঐ মানষিলাক মরিবার দোষ হামার উপরাত চাপে দিবার ধরচেন।”

২৯ পিতর, আরো অইন্য খবরিয়ালা কইলেক, “মানষির আদেশ পালন না করিয়া ভগবানের আদেশ পালন করা উচিত।

৩০ যাক ক্রুশ খুটাত টাঙেয়া মারি ফেলাইচেন, হামার চৌদ গুষ্টির ভগবান উয়ায় প্রভু যীশুক আরো বত্তে তুলিচে।

৩১ আর ভগবান উয়াক সন্মানের উচা পদ দিয়া মুক্তিদাতা রাজা হিসাবে ভগবানের ডাইন পাকে বসিবার ক্ষমতা দিচে। যাতে ইজ্রায়েলী মানষিলা পাপের ঘাটা থাকি ঘুরিয়া ক্ষমা পাবার পায়।

৩২ হামরা এইলার সউগলার সাক্ষী, আর ভগবানের বাধ্য হয়।  
যায় চলে। উয়াক পবিত্র আত্মা দান করা হইচে, পবিত্র আত্মাও  
এইলার সাক্ষী।”

৩৩ এই কতা শুনতে কালে মহাসভার সউগ মানষিলা রাগে  
অগুন হয়। খবরিয়ালাক মারি ফ্যেলের চাইলেক।

৩৪ কিন্তু মহাসভার এক জন বয়স্ক সদস্য যার নাম গমলীয়েল,  
উয়াক সগায় সন্মান দিবার ধরছিলেক। উয়ায় ফরীশী দলের  
ধর্মগুরু আছিলেক। উয়ায় খাড়া হয়। কইলেক, “অল্প সমায়ের  
বাদে উমারলাক বায়রাত নিয়া যাও।”

৩৫ পাছত মহাসভার মানষিলাক কইলেক, “হে ইজ্রায়েলী  
মানষিলা, এই মানষিলাক কি করির চান, তোমরা এই বিষয়ে  
সাবধান হন।

৩৬ ইয়ার আগত খুদাস নামে এক জন আসিয়া নিজক  
মহাপুরুষ কয়া দাবি করির ধরছিলেক, উয়ার নগত কমপক্ষে  
চারশ মানষি আছিলেক, খুদাসক মারি ফ্যেলা হইচে আর উয়ার  
সাথীলা ছিল্লা ছিল্লি হয়। পড়িচে।

৩৭ তার পাছত মানষি গণার সমায় গালীলের যুদাস আসিয়া  
মানষিলাক ক্ষ্যেপেয়া তুলিলেক, উয়াকও মারি ফ্যেলা হয় আর  
উয়ার সঙ্গী-সাথীলা ছিল্লা ছিল্লি হয়। পড়ে।

৩৮ এই বাদে মুই তোমারলাক কবার ধরচুং, এই মানষিলাক  
কিছু করেন না, ইমাক ছাড়ি দেও, ইয়ার উদ্দেশ্য যদি মানষির

থাকি হয়। থাকে তাইলে ইমরা ধবংস হবে।

৩৯ কিন্তু যদি ভগবানের হয়। থাকে তাইলে তোমরা দমন করির পাবেন না বরং ভগবানের বিরুদ্ধে লড়াই করির ধরচেন।”

৪০ সেলো সভার সগায় গমনীয়েলের কতাত রাজি হইলেক, আর খবরিয়ালাক ভিত্তিরাত আনিয়া চাবুক মারিয়া ছাড়ি দিয়া কইলেক, যীশুর বিষয় প্রচার যেন না করে।

৪১ এই খবরিয়ালা মহাসভার ভিত্তিরা থাকি আনন্দ করিতে করিতে ঘরের বাইরা আসিলেক, কেনেনা ভগবান উমাক যীশুর নামে অপমান সহ্য করির যোগ্য বুলিয়া মনে করে।

৪২ উমরা সউগ দিনে মন্দিরত আর বাড়ি বাড়ি যায়া সনাতন পবিত্র শাস্ত্র সমন্ধে শিক্ষা দিবার নাগিলেক। যীশুই এক মাত্র বাছাই করা রাজা, এই ভাল খবরটা প্রচার করির নাগিলেক।

৬ সেই সময় শিষ্যলো সংখ্যায় বেশী হবার নাগিলেক। আর গ্রীক ভাষাত কতা কওয়া যিহুদীলা, ইব্রীয় ভাষাত কতা কওয়া যিহুদীলার বিরুদ্ধে দোষ দিবার নাগিলেক যে, সদায় খাবার দিবার সময় উমার বিধুয়ালা কিছুই পায় না।

২ সেলো সেই বারো জন অধিকার পাওয়া খবরিয়া সউগ শিষ্যলোক একটে ডেকেয়া কইলেক, “ভগবানের ভাল খবর প্রচার করা ছাড়ি দিয়া, খাবার পরিবেশন করার কামে ব্যস্ত থাকা হামারলার বাদে ঠিক না হয়।

৩ এই বাদে ভাই বইনিলা তোমারলার মাঝিলা থাকি এমন সাত জন মানষিক বাছিয়া নেও, যায় যায় পবিত্র আত্মায়, জ্ঞানে ভরপুর আর যাক যাক সগায় সন্মান করে। উমারলাক এই সেবা কামের ভার দিমু।

৪ ফলে হামরালা প্রার্থনা আর ভগবানের ভাল খবর প্রচারের কামত আরো বেশী করি সমায় দিবার পামো।”

৫ সমিতির সগাকে এই কতা ভাল নাগিলেক। এই বাদে উমরা বিশ্বাসোত আর পবিত্র আত্মাত ভরপুর স্তিফানোক বেছি নিলেক। তাছাড়া ফিলিপ, প্রখর, নীকানর, তীমোন, পার্মীনা, আন্তিয়খিয় গঞ্জের নিকলায়, উমাক বেছি নিলেক। এই নিকলায় অযিহুদী হয়োও যিহুদী ধর্ম পালন করির ধরছিলেক।

৬ স্যেলা সমিতির মানষিলা এই সাত জনাক সেই বারো জন খবরিয়ালারটে নিয়া গেইলেক। আর খবরিয়ালা প্রার্থনা করি উমারলাক কামত যোগ দিবার বাদে হাত খুইয়া আশুর্বাদ করিলেক।

৭ এই নাকান করি ভগবানের বাইক্য ছড়িয়া পড়ির নাগিলেক, আর যিরুশালেমত শিষ্যলার সংখ্যা খুব পচ-পচে বারির নাগিলেক। এমন কি যিহুদী বামনলার মইন্ধো থাকি একটা বড় দল যীশুর ভাল খবর মানি নিলেক।

৮ স্তিফান ভগবানের আশুর্বাদে আর ক্ষমতায় ভরপুর হয়ো মানষিলা মইন্ধোত বড় বড় অচানক চিনের কাম করির

নাগিলেক।

৯ সেলো এদিয়া কয়জন যিহুদী মানষি স্তিফানের এটে আসিয়া কাজিয়া করির নাগিলেক। কাণ্ডো কাণ্ডো যে উপাসনা ঘরের নাম মুক্তি দেওয়া মানষিলার উপাসনা ঘর, সেই উপাসনা ঘরের সদস্য, উমরালা কুরীণী দেশ আর আলেক্সান্দ্রীয়া গঞ্জের মানষি। উমার নগত কিলিকিয়া আর এশিয়া প্রদেশের কয়জন মানষিও আসিয়া যোগ দিলেক।

১০ কিন্তু স্তিফান পবিত্র আত্মার জ্ঞানে কতা কবার নাগিলেক। সেই বাদে উমরা উয়ার কতার বিরুদ্ধে আর খাড়া হবার পাইলেক না।

১১ সেলো ঐ যিহুদীলা গোপনে কয়জন মানষিক এই কতা কবার উসকানি দিলেক, “স্তিফান, মহাপুরুষ মোশি আর ভগবানের বিরুদ্ধে অপমানের কতা কইচে হামরা শুনিচি।”

১২ এই নাকান করি উমরা মানষিলাক, যিহুদী নেতালাক আর ধর্ম পন্ডিতলাক ক্ষেপে তুলিয়া স্তিফানক মহাসভার বগলত ধরি আনিলেক।

১৩ উমরা সেলো কয়জন মিছাং সাক্ষীক খাড়া করিলেক। সাক্ষীলা কইলেক, “এই মানষিটা সউগ সমায় পবিত্র দশংগতি মন্দির আর মহাপুরুষ মোশির আইন-কানুনের বিরুদ্ধে কতা কয়।

১৪ সেই নাসারত গেরামের যীশু এই মন্দির ভাঙিয়া ফেল্যাবে আর মহাপুরুষ মোশি যে প্রথা হামারলাক দিয়া গেইচে, সেইলাও

বদলে দিবে। হামরা উয়ারটে এই কতা শুনিচি।”

১৫ যায় যায় সেই মহাসভাত বসি আছিলেক, উমরা সগায় স্তিফানের ভিতি চায়া দেখিলেক, সেলো উয়ার মুখ এক জন স্বর্গদূতের মুখের নাকান চকচকা হয় গেইলেক।

৭ ইয়ার পাছত মহাবামন, স্তিফানক পুছিলেক, “এই কতা কি সচাং?”

২ সেলো স্তিফান কইলেক, “ভাই বইনিলা বাপের ঘর, তোমরা সগায় শোনো, হামার চৌদো গুষ্টির বাপ আব্রাহাম মেসোপতেমিয়া দেশত রবার সমায় ভগবানের মহিমা দেখা পাইছিলেক। পাছত কিন্তু উয়ায় হারণ গঞ্জত বসতি শুরু করিলেক।

৩ ভগবান উয়াক কইলেক, তুই নিজ দেশ থাকি বিরিয়া, তোর গুষ্টি, সাগাই-সোদর ছাড়িয়া মুই যে দেশ দেখাইম সেই দেশ চলি যা।

৪ “এই বাদে উয়ায় কলদীয় মানষিলার দেশ ছাড়িয়া হারণ গঞ্জত আসিয়া বসতি শুরু করিলেক। আর উয়ার বাপ মরার পাছত ভগবান আগের দেশ থাকি উয়াক এই দেশত আনিলেক, তোমরালায় এলা যে দেশত বসতি করির ধরচেন।

৫ এই দেশত উয়াক সয়-সম্পত্তি কিছুই দিলেক না, এমন কি এক তিল জমিও না। ভগবান আব্রাহামক কতা দিছিলেক, এই

কনান দেশ এক দিন উয়াক আর উয়ার বংশক দিবে। সেলোও উয়ার কোন ছাওয়া-ছোটো আছিলেক না।

৬ ভগবান অব্রাহামক কইলেক, ‘তোর বংশের মানষিলা ভিন দেশত চাকরের নাকান করি জীবন কাটাবে। সেই দেশের মানষিলা উমারলার উপর চারশ বছর ধরিয়া অইত্যাচার করিবে।

৭ উমরা যে জাতির চাকর হবে মুই উমার বিচার করিম, পরে উমরা ঐ দেশ থাকি বাইর হয় আসিয়া মোর উপাসনা করিবে।’

৮ পাছত অব্রাহামের নগত ভগবান এক চুক্তি করিলেক। এই চুক্তির মইন্ধো দিয়া একটা নিয়ম বানাইলেক। অব্রাহামের ইসহাক নামে একটা চেংড়া ছাওয়া জন্ম হইলেক। বিধির বিধান মতন আট দিনের দিন দেহাত চিন দিলেক। উমরা ইসহাকের বেটা যাকবক দেহাত চিন দিলেক, এই নাকান করি যাকবের বেটালা বারোটা গোষ্ঠির বাপ হইলেক।

৯-১০ “যাকবের বেটালা উয়ার ভাই যোষেফক হিংসা করির নাগিলেক আর উয়াক মিশর দেশত চাকর ব্যবসায়ীরটে বেচে দিলেক। ব্যবসায়ী উয়াক মিশর দেশ নিয়া গেইলেক। কিন্তু যোষেফ সেই দেশত নানা নাকান দুঃখ-কষ্ট, বিপদে পরির নাগিলেক। ভগবান উয়ার নগত আছিলেক বুলিয়া সউগ বিপদ-আপদ, কষ্ট থাকি উয়াক রক্ষা করিলেক। সেলো ভগবান যোষেফক দয়া দেখেয়া, জ্ঞান দান করিয়া মিশরের রাজা ফরৌণের নগত দেখা করাইলেক। উয়াক রাজা ফরৌণ নিজের বাড়ি আর মিশর দেশের কর্তা বানাইলেক।

১১ পাছত গোটায় মিশর আর কনান দেশত মঙ্গা দেখা দিলেক।  
হামারলার চৌদ গুষ্টির মানষিলা খাবারের আকালত পড়িলেক,  
আর তাতে কষ্ট পাবার নাগিলেক।

১২ কিন্তু যাকব শুনিলে যে, মিশরত খাবার আছে।  
সেয়া উয়ায় পইলাতে চৌদ গুষ্টির মানষিলাক পেঠে দিলেক।

১৩ দ্বিতীয় বার যোষেফ ভাইলার সোদে পরিচয় হইলেক যে,  
উয়ায় কায়! সেয়ায় ফরৌণ যোষেফের গোষ্ঠির বিষয় জানিলে  
পাইলেক।

১৪ তার পাছত যোষেফ উয়ার বাপ যাকব, আর অইন্য সগাকে  
ডেকে পেঠাইলেক। উমরানা পঁচাত্তর জন আছিলেক।

১৫ এই নাকান করি যাকব মিশর গেইলেক, ওটেকোনা উয়ায়  
আর হামার চৌদ গুষ্টির মানষিলা মরিলেক।

১৬ উমারলার দেহা কনান দেশের শিখেম নামে জাগাত সমাধি  
দেওয়া হইলেক। এই সমাধি দেওয়ার জাগাখান অব্রাহাম শিখেম  
গঞ্জের হমোরের বেটালারটে রূপা দিয়া কিনি নিছিলেক।

১৭ “অব্রাহামেরটে ভগবান যে কতা দিছিলেক, সেই কতা এলা  
পূরণ হবার সময় আসিচে, এলা মিশরত হামার মানষির সংখ্যা  
খুব বেশী হয় উঠিলেক।

১৮ ইয়ার পাছত মিশরত আর এক জন রাজা হইলেক। উয়ায়  
যোষেফক জানে না।



১৯ ঐ রাজা হামার মানষিলার নগত ছল-চাতুরী করিলেক। হামার চৌদ্দ গুষ্টির উপরা খুব অইত্যাচার করিলেক। এইলা ছাড়াও কাচুয়া ছাওয়া জন্ম হবার পরে উমরা যাতে মরি যায় সেই বাদে ওই ছাওয়ালাক বায়রাত ফ্যেলে খুবার উমারলাক বাধ্য করিলেক।

২০ “সেই সমায় মহাপুরুষ মোশির জন্ম হইচে। উয়ায় ভগবানের নজরত দেখিবার খুব সুন্দর আছিলেক। তিন মাস অব্দি উয়ায় উয়ার বাপের বাড়িতে লালন-পালন হইলেক।

২১ পাছত যেলা উয়াক বাইরা ফ্যেলে থোয়া হইলেক, সেলা ফরৌণের বেটি উয়াক নিয়া যায়া নিজের বেটার নাকান মানষি করি তুলিলেক।

২২ মোশি মিশরীয়লার সউগ নাকান বিদ্যায় শিক্ষিত হইলেক। উয়ায় কতায় আর কামত খুব শক্তিশালী হইলেক।

২৩ “শ্রী মোশির বয়স যেলা চল্লিশ বছর হইলেক, সেলা উয়ায় উয়ার ইজ্রায়েলী ভাইলাক দেখিবার ইচ্ছা হইলেক।

২৪ এক জন মিশরীয় মানষি এক জন ইজ্রায়েলীয় মানষির প্রতি বেয়া ব্যবহার করা দেখিয়া মোশি ওই ইজ্রায়েলী মানষিটার পক্ষে হয়, ঐ মিশরীয় মানষিটাক ডাঙেয়া প্রতিশোধ নিলেক।

২৫ শ্রী মোশি ভাবিলেক যে, উয়ার নিজের মানষিলা বুঝির পাবে ভগবান উয়াক দিয়া উমারলাক মুক্তি দিবে। কিন্তু উমরালা সেইটা বুঝির পাইলেক না।

২৬ পরের দিন মোশি দুই জন ইজ্রায়েলীক ডাঙা-ডাঙি করির দেখিলেক। সেলো উয়ায় উমারলার বগলত যায়া মিল করি দিবার চেষ্টা করিলেক, হ্যে বাহে! তোমরা তো ভাই ভাই; তাইলে কেনে এক জন অইন্য জনের সাথে বেয়া ব্যবহার করিবার নাগচেন?

২৭ “কিন্তু যে মানষিটা বেয়া ব্যবহার করিচে, উয়ায় মোশিক ধাক্কেয়া কইলেক, হামারলার উপরা শাসনকর্তা হয়া বিচার করির অধিকার তোমাক কায় দিচে?

২৮ গেল কালি যেই নাকান করি ওই মিশরীয়ক মারি ফ্যেলাইচেন, হামাকো কি সেই নাকান করি মারি ফ্যেলের চান?

২৯ এই কতা শুনিয়া মোশি পালে যায়া মিদিয়ন দেশত রবার নাগিলেক। ওটেকোনায উয়ার দুইটা বেটার জন্ম হইলেক।

৩০ “এই নাকান করি আরো চল্লিশ বছর পার হয়া গেইল। সিনাই পাহাড়ের বগলোত যে মরু এলাকা আছিলেক ওটেকোনা একটা ঝোপের জ্বলন্ত অগুনের মইন্ধোত এক জন স্বর্গদূত মোশিক দেখা দিলেক।

৩১ এই দেখিয়া মোশি অচানক হইলেক। ভাল করি দেখিবার বাদে যেলা বগলোত যাবার ধরচে, সেলো ভগবানের কতা শুনির পাইলেক,

৩২ মুই তোর চৌদ্দ গুটির ভগবান, আব্রাহাম, ইসহাক আর যাকবের ভগবান। সেলো মোশি ভয়ত কাঁপির নাগিলেক; ভাল করি দেখির সাহস আর হইলেক না।

৩৩ “সেইলা ভগবান উয়াক কইলেক, তোর জুতা হোসকাও, কেনেনা তুই যেই জাগাত খাড়া হয়্যা আছিস সেই জাগাখান পবিত্র।

৩৪ মিশর দেশত মোর নিজের মানষিলার উপরাত যে অইত্যাচার হবার নাগচে, সেইলা মুই দেখিচুং। মুই উমারলার কান্দোন শুনিচুং, উমারলাক মুক্তি করিবার বাদে নামি আসিচুং। মোশি তুই আয়, মুই এলা তোক মিশর দেশ পেঠাইম।

৩৫ “মোশিক ইজ্রায়েলী মানষিলা মানি না নিয়া কইলেক, কায় তোমাক হামার শাসনকর্তা আর বিচারক বানাইচে? যেই স্বর্গদূত মোশিক জ্বলন্ত ঝোপের ওটেকোনা দেখা দিছিলেক, সেই স্বর্গদূত মোশিক ভগবানের খবরিয়া করিয়া পেঠাবে।

৩৬ এই মোশিই ইজ্রায়েলী মানষিলাক মিশর দেশ থাকি বাইর করি আনচে, উয়ায় মিশরের নাল সাগরের নিধুয়া পাথারত চল্লিশ বছর ধরি অচানক চিন-এর কাম করিলেক।

৩৭ ইয়ায় সেই মোশি যায় ইজ্রায়েলী ভাইলাক কইটিলেক, তোমারলার মইন্ধো থাকি এক জন ভাববাদী, ভগবান বাছাই করি থুইচে, যায় হইলেক মোর নাকান।

৩৮ ইয়ায় ইজ্রায়েলী মানষিলার মরুভূমির সভাত আরো হামার চৌদ্দ গুষ্টির নগত আছিলেক, যেই স্বর্গদূত সিনাই পর্বতত মোশির নগত কতা কইচে। এই মোশি ভগবানেরটে থাকি জীবন্ত বাইকেরে জ্ঞান পায়া হামারলাক দিচে।

৩৯ “কিন্তু হামার চৌদ্দ গুষ্টি উয়ার বাইক্য না মানিয়া উয়ার বিরোধীতা করিলেক। উমরা মনে মনে মিশর দেশ ফিরি যাবার চাইলেক।

৪০ উমরা হারনক কইলেক, এই মোশি হামাক মিশর দেশ থাকি বাইর করি আনিচে, উয়ার কি হইচে হামরা কিছুই বুঝির পাবার ধরচি না। তাইলে চলো, হামার বাদে দেবতালার মূর্তি বানাও যায় যায় হামাক চালনা করি আগে আগে নিয়া যাবে।

৪১ সেয়া উমরা বাছুরের নাকান একটা মূর্তি বানাইলেক, এই মূর্তির আগত পশু বলিদান করিলেক। উমার নিজের হাতে বানা দেবতাক নিয়া আনন্দ করির নাগিলেক।

৪২ কিন্তু ভগবান বিমুখ হয়। উমাক ছাড়িয়া দিলেক, আর উমরা বেলা, চান, তারার পূজাতে মাতি রইলেক। একে নাকান কতা ভগবানের ভাববাদীর বইয়ত নেখা আছে, ‘হে ইজ্রায়েলীলা, এই নিধুয়া পাথারত তোমরা কি মোর বাদে চল্লিশ বছর ধরি কোন দিন পশু বলি আর নৈবদ সঁপে দিচেন?’

৪৩ না দেন নাই, কিন্তু তোমারলার সেই মোলক দেবের পালকি আর তোমারলার রিফণ দেবতার তারা পূজা করার বাদে নিজের বানা যে মূর্তিলা পালকিত উবিয়া নিয়া গেইচেন। এই বাদে মুই বাবিল দেশের ঐ পাকে পেয়েয়া বনবাস দিম।’

৪৪ “নিধুয়া পাথারত হামার চৌদ্দ গুষ্টিরটেই তাম্বুটা আছিলেক। ভগবান যেই নাকান করি মোশিক আদেশ দিচে, আর স্বর্গদূত

মোশিক যেই নাকান করি বানের কইচে, উমরালা ঐ নাকানে বানাইচে।

৪৫ হামার চৌদ গুটিলা তাম্বুটা পায়া উমার নেতা ঘিহোশূয়র অধীনত নিজের মানষিলার নগত এই দেশত আনিচে। ভগবান এই সমায় উমার আগ হাতে অইন্য জাতিলাক খেয়ে দিচে। আর এই তাম্বু রাজা দায়ূদের কাল পর্যন্ত এই দেশত আছিলেক।

৪৬ ইয়ায় ভগবানের নজরত আশুবাদ পাবার উপযুক্ত হইলেক। আর উয়ায় যাকবের ভগবানের ঘর বানের বাদে অনুমতি চাইলেক।

৪৭ কিন্তু এই ঘরটা শলোমন বানেয়া দিলেক।

৪৮ “ভগবানের ভাববাদী কইচে, মানষির বানা ঘরত পরম প্রভু বসবাস করে না। ভগবান কইলেক,

৪৯ ‘স্বর্গ হইলেক মোর সিংহাসন, দুনিয়া হইলেক ঠেং থুবার জাগা, তুই মোর জইন্যে কি নাকানের ঘর বানাবু?

৫০ মোর জিরিবার জাগা কোটে, মুই কি মোর হাত দিয়া এইলা সিঙ্গন করং নাই?’

৫১ “হে মোর বর্বর জাতি! কেনে তোমরালা সউগ-সমায় পবিত্র আত্মাক নিন্দা করেন? তোমারলার অন্তর আর কান অযিহুদী মানষিলার নাকান, তোমার চৌদ গুটি যেই নাকান করিচে তোমরাও একে নাকান করির ধরচেন।

৫২ তোমারলার চৌদ্দ গুটিলা এমন কোনো ভাববাদীক বাদ দেয় নাই যে, কাণ্ডকে অইত্যাচার করেন নাই। যে ভাববাদীলা মেয়লা দিন আগত ধার্মিক মানষিটার আইসার কতা প্রচার করিচিলেক, তোমারলার চৌদ্দ গুটি উমারলাক খুন করিচে। আর এলা তোমরালা সেই ধার্মিক মানষিটাক শত্রুর হাতত মারি ফ্যেলের বাদে ধরেয়া দিচেন।

৫৩ কিন্তু তোমারলাক তো স্বর্গদূতের মইন্ধো দিয়া নিয়ম-কানুন করি দেওয়া হইচে, এই নিয়ম-কানুন তোমরা পালন করেন নাই।”

৫৪ যিহুদী নেতালা স্তিফানের কতা শুনিয়া অগুনের নাকান গোসা হয়। দাঁত কিরমিরির নাগিলেক।

৫৫ সেয়ালা স্তিফান পবিত্র আত্মাত ভরপুর হয়। স্বর্গের ভিতি দেখিতেই ভগবানের মহিমা দেখির পাইলেক। আরো দেখির পাইলেক যে, ভগবানের ডাইন পাকে যীশু খাড়া হয়। আছে।

৫৬ আর স্তিফান কইলেক, “দেখ! মুই স্বর্গ খোলা দেখির ধরচুং যে, বাছাই করা মানষি ভগবানের ডাইন পাকে খাড়া হয়। আছে।”

৫৭ যিহুদী নেতালা জোরে চিকিরিয়া উঠিলেক আর নিজের কানত নগুল দিলেক। স্তিফানক ধরির বাদে উয়ার দেহাত এক সাথে ঝাঞ্জে পড়িলেক।

৫৮ তার পাছত স্তিফানোক শিল দিয়া ঢেলে মারির বাদে গঞ্জের বাইরা নিয়া গেইলেক। আর সাক্ষীলা উমার কাপড়-চোপড়

হোসকে নিয়া শৌল নামে গাবুর চেংড়ার ঠেংএর বগলত জমা করি থুইলেক।

৫৯ উমরা স্তিফানক শিল দিয়া ঢেলাইতে আছে, সেলো উয়ায় প্রার্থনা করি কইলেক, “প্রভু যীশু, মোর আত্মা তুই নে!”

৬০ সেলো উয়ায় হাংকুড়া পাড়িয়া জোরে চিকরিয়া কবার নাগিলেক, “হে প্রভু, ইমারলার বিরুদ্ধে এই পাপ ধরিস না!” এই কতা কয়া মরি গেইলেক।

৮ শৌল, স্তিফানক মারির বাদে সায় দিবার ধরছিলেক। সেই সমায় যিরুশালেমের সমিতির মানষিলার উপরাত ভয়ংকর অইত্যাচার করির নাগিলেক। বারো জন খবরিয়ালা ছাড়া বাকি সউগ শিষ্যলো যিহুদীয়া আর শমরীয়া প্রদেশের নানান জাগাত ছড়াছড়ি হয় পড়িলেক।

২ কয়েক জন ভগবানের ভক্ত মানষি স্তিফানক সমাধি দিলেক আর খুব শোকের কান্দোন কান্দির নাগিলেক।

৩ কিন্তু শৌল সমিতি ধ্বংস করির বাদে উঠি পরি নাগিলেক। বাড়ি বাড়ি সোন্দেয়া বেটাছাওয়া-বেটিছাওয়ালাক টানি নিয়া যায়া জেলত ভরে থুইলেক।

৪ যেইলা শিষ্য ছড়াছড়ি হয় পড়িলেক, উমরালো চাইরো পাকে যায়া ভগবানের ভাল খবর প্রচার করির নাগিলেক।

৫ ঐ সমায় যীশুর শিষ্য ফিলিপ, শমরীয়া গঞ্জত যায়া বাছাই করা রাজাটার কতা মানষিলারটে প্রচার করির নাগিলেক।

৬ মানষিলা ফিলিপের কতা শুনিলেক আর উয়ার অচানক চিনের কাম দেখিলেক। এইলা দেখিয়া উয়ার কতা আরো মন দিয়া শুনিলেক।

৭ অপদেবতা ধরা মেয়ো মানষিলার মইন্ধো থাকি অপদেবতালা চিকিরিয়া বিরিয়া গেইলেক। মেয়ো অবশ রুগী, খোড়া ভাল হইলেক,

৮ সেয়ো ঐ গঞ্জের মানষিলা খুব আনন্দ করিবার নাগিলেক।

৯ ঐ গঞ্জত শিমোন নামে এক জন মানষি আছিলেক। উয়ায় মেয়ো দিন থাকি যাদু মন্ত্রর খেলা দেখেয়া শমরীয় মানষিলাক অচানক করির ধরছিলেক। উয়ায় নিজক এক জন মহাপুরুষ কয়া দাবি করে।

১০ উয়ার কতা ধনী গরীব সগায় মন দিয়া শুনির ধরছিলেক। মানষিলা কয়, “ভগবানের মহান শক্তি উয়ার দেহাত আছে, এই বাদে উয়ায় মহান।”

১১ মেয়ো দিন থাকি উয়ায় যাদু মন্ত্র খেলা দেখেয়া মানষিলাক অচানক করিচে। এই বাদে মানষিলা উয়ার কতা মন দিয়া শুনির ধরছিলেক

১২ কিন্তু যেয়ো ফিলিপ, ভগবানের শাসন ব্যবস্থা আর রাজা যীশুর সমন্ধে ভাল খবর প্রচার করির ধরছিলেক, সেয়ো



মানষিলা সগায় উয়ার কতা বিশ্বাস করির নাগিলেক। আর বিশ্বাস করিয়া বেটাছাওয়া আর বেটিছাওয়ালা সগায় দীক্ষা নিবার নাগিলেক।

১৩ আর শিমোন নিজেও বিশ্বাস করিয়া দীক্ষা নিয়া ফিলিপের সাথে সাথে যাবার নাগিলেক। আর ফিলিপের বড় বড় অচানক চিনের কাম দেখিয়া শিমোন অবাক হইলেক।

১৪ যেহেতু যিরুশালেমত যীশুর খবরিয়ালা শুনির পাইলেক যে, শমরিয়ার মানষিলা ভগবানের বাইক্য শুনিয়া বিশ্বাস করিছে, উমরা সেহেতু পিতর, যোহনক শমরীয়া মানষিলা ঐটে পেঠাইলেক।

১৫ পিতর আর যোহন শমরীয়াত আসিয়া উমার বাদে প্রার্থনা করিলেক, উমরা যাতে পবিত্র আত্মা পায়।

১৬ কেনেনা উমারলার কাণোরো উপরাত পবিত্র আত্মা নামি আইসে নাই। মানষিলা প্রভু যীশুর নামে খালি দীক্ষা নিচে।

১৭ সেহেতু পিতর আর যোহন, মানষিলা উপরাত হাত থুইতে কালে উমরা পবিত্র আত্মা পাইলেক।

১৮ শিমোন দেখিলেক যে, খবরিয়ালা মাথাত হাত থুইতে কালে মানষিলা পবিত্র আত্মা পাবার নাগিলেক, উয়ায় সেহেতু এই ক্ষমতা কিনিবার বাদে উমারলার ওটে টাকা আনিয়া কইলেক,

১৯ “মোকও এই ক্ষমতা দেও, মুই যেহেতু কাণোরো উপরাত হাত থুইম, সেহেতু যাতে উয়ায় পবিত্র আত্মা পায়।”

২০ পিতর, শিমোনক কইলেক, “তোর টাকা আর তুই ধবংস হঃ। তুই ভগবানের দেওয়া ক্ষমতা টাকা-পাইসা দিয়া কেনা যায় ভাবহিস!

২১ হামারলার এই কামত তোৰ ভাগীদার হবার কোন অধিকার নাই। কেনেনা ভগবানের নজরত তোৰ অন্তর এলাও ঠিক হয় নাই।

২২ তোৰ দুষ্ট মন বদলাও! ভগবানেরটে প্রার্থনা করেক, হয় তো তোৰ মনের চিন্তা ক্ষমা করি দিবার পারে।

২৩ মুই দেখির পালুং যে, তোৰ মন লোভ-লালসাত, পাপে ভরি গেইচে।”

২৪ সেলো শিমোন কইলেক, “তোমরালা মোর বাদে ভগবানেরটে প্রার্থনা কর, যাতে তোমরা যেই নাকান কইচেন, ঐ নাকান যাতে না ঘটে।”

২৫ ইয়ার পাছত পিতর আর যোহন সাক্ষী দিয়া ভগবানের বাইক্য প্রচার করিয়া যিরুশালেম ফিরি গেইলেক। যাবার সমায় শমরীয়লার মেয়ো গেরামত ভাল খবর প্রচার করিলেক।

২৬ এক দিন ভগবানের এক স্বর্গদূত ফিলিপক কইলেক, “ওঠেক, দক্ষিন ভিতি যে ঘাটা যিরুশালেম থাকি গাজা গঞ্জের ওদি গেইচে, ঐ ঘাটা দিয়া যা।” ঘাটাটা হইলেক নিধুয়া পাথারের মইন্ধো দিয়া।

২৭ ফিলিপ উঠিয়া ঘাটা দিয়া যাবার নাগিলেক। যাবার সমায় ইথিয়পিয়া দেশের এক জন রাজকর্মচারীক দেখিলেক। উয়ায় নপুংসক আছিলেক। উয়ায় আছিলেক ইথিয়পিয়ার কান্দাকী রাণীর ধন-দৌলতের ভান্ডারী। ইয়ায় উপাসনা করির বাদে যিরুশালেম আসছিলেক।

২৮ বাড়ি ফিরি আসির সমায় রথত বসিয়া ভগবানের ভাববাদী যিশাইয়ের গ্রন্থ পড়ির ধরছিলেক।

২৯ সেয়া পবিত্র আত্মা ফিলিপক কইলেক, “ঐ রথের বগল যায়া, উয়ার সঙ্গ ধরেক!”

৩০ ফিলিপ দৌড়ি যায়া শুনির পাইলেক ভান্ডারীটা ভাববাদী যিশাইয়ের গ্রন্থখান পড়ির ধরচে। ফিলিপ সেয়া উয়াক পুছিলেক, “তোমরা যেইলা পড়িলেন, সেইলা কি বুঝির পাইলেন?”

৩১ ভান্ডারীটা কইলেক, “কেংকরি বুঝির পাইম? যদি কাণ্ডোয় মোক বুঝিয়া না দেয়?” উয়ায় ফিলিপক রথত চড়িয়া উয়ার বগলত বসিবার অনুরোধ করিলেক।

৩২ শাস্ত্রের যে অংশ উয়ায় পড়ছিলেক, সেইটা এই নাকান: বলি দিবার বাদে যেমন করি ভেড়া নিয়া যাওয়া হয়, তেমনি করি উয়াক নিয়া যাওয়া হইলেক। লোম তোলাইয়ার বগলত ভেড়ার বাচ্চা যেমন ঝিত করিয়া রয়, তেমনি উয়ায় মুখ দিয়া কোন শব্দ করিলেক না।

৩৩ উয়াক অপমান করা হইলেক, উয়ার ন্যায্য বিচার করা হয় নাই। উয়ার জীবন এই দুনিয়া থাকি তুলি নেওয়া হইচে, এই বাদে উয়ার বংশের কতা কবার পাই নাই।

৩৪ ভান্ডারীটা সেলো ফিলিপক কইলেক, “দয়া করি কন, ভগবানের ভাববাদীটা কার সমন্ধে কইচে? উয়ায় কি নিজের সমন্ধে, না অইন্য কারো সমন্ধে কইচে?”

৩৫ সেলো ফিলিপ সনাতন পবিত্র শাস্ত্রের ঐ অংশ থাকি শুরু করিয়া যীশুর বিষয়ে ভাল খবর বুঝিয়া দিলেক।

৩৬-৩৭ উমরা ঘাটা দিয়া যাইতে যাইতে একটা জলের ডোবার ওটে আসিলেক। ভান্ডারীটা কইলেক, “এটেকোনা জল আছে, দীক্ষা নিতে মোর বাধা আছে কি?”

৩৮ ভান্ডারীটা রথ থামের কইলেক, ফিলিপ আর উয়ায় দুইজনে জলত নামিলেক। ফিলিপ উয়াক দীক্ষা দিলেক।

৩৯ যেয়ো জল থাকি দুইজনে উঠি আসিলেক, সেলো পরম ভগবানের আত্মা ফিলিপক নিমিষের মইন্ধে নিয়া গেইলেক। উয়ায় আর ফিলিপক দেখির পাইলেক না, কিন্তু উয়ায় আনন্দ করিতে করিতে নিজের ঘাটা দিয়া চলি গেইলেক।

৪০ এদিয়া ফিলিপ নিজক নিমিষের মইন্ধে অসদোদ গঞ্জত দেখির পাইলেক, আর উয়ায় গঞ্জে গঞ্জে ঘুরি বেড়েয়া ভগবানের ভাল খবর প্রচার করিতে করিতে শেষত কৈসরিয়া গঞ্জত গেইলেক।

৯ শৌল সেলো শিষ্যলোক মারি ফেলের বাদে ভয় দেখের নাগিলেক। উয়ায় প্রধান বামনেরটে যায়া,

২ দামেস্ক গঞ্জের যিহুদী উপাসনা ঘরের নেতালোক দিবার বাদে প্রধান বামনেরটে চিঠি চাইলেক। যিহুদী উপাসনা ঘরের যীশুর ঘাটাত চলা সউগ বেটাছাওয়া আর বেটিছাওয়ালাক বান্দিয়া যাতে যিরশালেমত আনির পায়।

৩ ঘাটা দিয়া যাবার সমায় সেলো দামেস্কের বগলত পৌছিলেক, সেলো অচমকা স্বর্গ হাতে আলোর ঝলক উয়ার চাইরো পাকে ঝল-মল করির নাগিলেক।

৪ ইয়াতে উয়ায় মাটিত পড়ি গেইলেক আর একটা আওয়াজ শুনির পাইলেক, “শৌল, শৌল, কেনে তুই মোক যাতনা দিবার ধরচিস?”

৫ শৌল কইলেক, “প্রভু! তোমরা কায়?” প্রভু কইলেক, “মুই যীশু! যার উপরা তুই যাতনা দিবার ধরচিস!

৬ তুই এলা উঠিয়া গঞ্জত চলি যা, তোক কি করির নাগিবে, তোক কয়া দেওয়া হবে।”

৭ শৌলের সঙ্গী-সাথী সগায় অচানক হয় খাড়া হয় রইলেক আর উমরা কোন কিছু কবার পাইলেক না। উমরা আওয়াজ শুনির পাইলেক কিন্তু কাণেয় কোন কিছুই দেখির পাইলেক না।

৮ সেলো শৌল মাটি থাকি উঠিলেক, কিন্তু চোখু মেলিয়া দেখির পাইলেক না। এই বাদে উয়াক সঙ্গী-সাথীলা হাত ধরিয়া দামেস্ক গঞ্জোত নিয়া গেইলেক।

৯ তিন দিন পর্যন্ত শৌল কানা হয়। রইলেক আর উয়ায় কোন কিছুই খাইলেক না।

১০ দামেস্কোত অননিয় নামে যীশুর এক জন শিষ্য আছিলেক।

১১ প্রভু যীশু অননিয়ক দর্শন দিয়া কইলেক, “অননিয়!” উয়ায় কইলেক, “প্রভু, এই তো মুই।” সেলো প্রভু যীশু কইলেক, “ওঠেক! সোজা নামের যে ঘাটা আছে, ঐ ঘাটা দিয়া তার্ষ গঞ্জোত যুদাসের বাড়িত যায়া শৌল নামে এক জন মানষিক চান্দাও। কেনেনা উয়ায় প্রার্থনা করির ধরচে।

১২ উয়ায় দর্শন পাইচে যে, অননিয় নামের এক জন মানষি আসিয়া উয়ার দেহাত হাত দিতে কালে উয়ায় আরো দৃষ্টিশক্তি ফিরি পাইচে।”

১৩ অননিয় কইলেক, “প্রভু, মুই মেয়লা মানষির মুখত এই মানষির সমন্ধে শুনিচুং, উয়ায় যিরুশালেমের তোমার পবিত্র মানষিলার উপরাত খুব অইত্যাচার করিচে।

১৪ আর এই জাগাত যত মানষি তোমার নামে প্রার্থনা করে, প্রধান বামনলারটে থাকি সগাকে বন্দী করির অধিকার নিয়া আসিচে।”

১৫ প্রভু কিন্তু কইলেক, “তুই যা, কেনেনা অযিহুদী আর উমার রাজালার মইন্ধোত আরো ইজ্রায়েলী ছাওয়ালারটে মোর খবর প্রচার করির বাদে, মুই উয়াক বাছাই করিচুং।

১৬ মুই দেখে দিম, মোর নামের বাদে উয়াক কত দুঃখ-কষ্ট সহ্য করির নাগিবে।”

১৭ সেলো অননিয় যুদাসের বাড়ি গেইলেক। আর শৌলের দেহার উপরাত হাত দিয়া কইলেক, “ভাই শৌল, যায় তোক আসিবার সমায় ঘাটাত দর্শন দিচে, উয়ায় প্রভু যীশু। উয়ায় মোক তোর এটে পেঠাইলেক যাতে তুই দেখির পাইস আর পবিত্র আত্মাত ভরপুর হবার পাইস।”

১৮ সেলোয় শৌলের চোখু থাকি মাছের আইনসা নাকান কিবা বিরিয়া গেইলেক। উয়ায় দেখিবার পাইলেক আর উঠি যায় জল দিয়া দীক্ষা নিলেক।

১৯ তার পাছত খাওয়া-দাওয়া করিয়া বল ফিরি পাইলেক। শৌল কিছু দিন দামেস্কের শিষ্যলার নগত রইলেক।

২০ সেলোয় সেলোয় উয়ায় দামেস্কের অইন্য অইন্য যিহুদী উপাসনা ঘরত যায় প্রচার করির নাগিলেক, যীশুই ভগবানের বেটা!

২১ উয়ার কতা শুনিয়া সগায় অচানক হয় পুছির নাগিলেক, “উয়ায় কি ঐ মানষিটা, যিরুশালেমত যায় যায় যীশুর নামে উপাসনা করে উমারলার উপরাত অইত্যাচার করিচিলেক? আর

যায় যায় যীশুর নামে প্রার্থনা করে উমারলাক প্রধান বামনলারটে বন্দী করি নিয়া যাবার বাদে এটেকোনা আসচে!”

২২ শৌল প্রচার করিয়া খুব ক্ষমতামালা হবার নাগিলেক। দামেস্কেত যেইলা যিহুদী বসবাস করির ধরছিলেক, শৌল উমারলার সাথে তর্কা-তর্কি করিয়া মুখ বন্ধ করি দিলেক। প্রমাণ করি দিলেক, যীশুই বাছাই করা রাজা।

২৩ মেয়ো দিন যাবার পাছত যিহুদীলা শৌলক মারি ফ্যেলের ফন্দি করিলেক,

২৪ কিন্তু শৌল উমার ফন্দির কতা জানির পাইলেক। শৌলক মারি ফ্যেলের বাদে উমরা দিন-রাতি গঞ্জের সউগ দুয়ারত পাহারা দিবার নাগিলেক।

২৫ কিন্তু রাতি বেলাত শৌলের শিষ্যলো উয়াক গঞ্জ থাকি বাইরা নিকিলি দিবার বাদে ডেলিত দড়ি বান্দিয়া উয়াক বসেয়া গঞ্জের দেওয়ালের ওপাকে নামেয়া দিলেক।

২৬ তার পাছত শৌল যিরুশালেম যায়া যীশুর শিষ্যলার নগত যোগ দিবার বাদে চেষ্টা করিলেক। কিন্তু শৌলক সগায় ভয় খাইলেক, শৌল যে যীশুর শিষ্য হইচে, উমরালা এইটা বিশ্বাস করিলেক না

২৭ বার্ণবা, শৌলক যীশুর খবরিয়ালার বগলত নিয়া গেইলেক। উয়ায় কেয়মন করি ঘাটাত প্রভু যীশুর দেখা পায়া কতা কইচে, কেংকরিয়া সাহস করি যীশুর কতা দামেস্কেত প্রচার করিচে,



এইলা কতা বাৰ্ণবা খবরিয়ালাক কইলেক আর খবরিয়ালা শৌলক মানি নিলেক।

২৮ ইয়ার পাছত শৌল যিরুশালেমত শিষ্যলার নগত রইলেক আর সউগ জাগাত চলা ফিরা করির নাগিলেক। আরো প্রভু যীশুর নামে সাহসের সাথে প্রচার করির নাগিলেক।

২৯ উয়ায় গ্রীক ভাষী যিহুদী মানষিলার নগত কতা কইতে কইতে তর্ক করির নাগিলেক। এই বাদে উমরালা উয়াক মারি ফ্যেলের চেষ্টা করির নাগিলেক।

৩০ গুরুভাইলা এই কতা শুনিয়া উয়াক কৈসরিয়া গঞ্জত নিয়া গেইলেক, ওটে থাকি তার্ষ গঞ্জত প্যেঠেয়া দিলেক।

৩১ সেই সমায় যিহুদীয়া, গালীল আর শমরীয়া প্রদেশের সউগ খ্রীষ্টিয় সমিতিত শান্তি আসির নাগিলেক। এই বাদে প্রভুর প্রতি ভয় আর পবিত্র আত্মার সান্তনায় উমারলার সংখ্যা বাড়ি যাবার ধরছিলেক।

৩২ পিতর সউগ জাগাতে ঘুরি বেড়াইতে বেড়াইতে লুদা বাসী গুরু ভাইলারটে আসিলেক।

৩৩ ওটেকোনা ঐনিয় নামে এক জন মানষির নগত দেখা পায়। ঐনিয় আট বছর থাকি বাসুলী অসুখত বিছনাত পড়িয়া ছিলেক।

৩৪ আর উয়াক দেখিয়া পিতর কইলেক, “ঐনিয়, যীশু খ্রীষ্ট তোক ভাল করিচে। ওঠেক, বিছনা গোটে থো।” আর সেলোয় সেলোয় ঐনিয় উঠিয়া খাড়া হইলেক।

৩৫ সেলো লুদা গেরামের আর শারোণ এলাকার বসবাসকারী মানষিলা ঐনিয়ক দেখিয়া প্রভু যীশুক বিশ্বাস করিলেক।

৩৬ যাহো গঞ্জত শ্রীমতি টাবিথা নামে এক জন শিষ্যা আছিলেক, যার নামের মানে গ্রীক ভাষায় দর্কা (হরিণী)। উয়ায় সউগ সমায় মানষিলার উপকার করিয়া গরীবক দান করির ধরছিলেক।

৩৭ এক দিন শ্রীমতি টাবিথা অসুখ হয় মরি গেইলেক। উয়ার সংগতি করির বাদে গাও ধোয়েয়া দোতলা ঘরত শোতেয়া থুইলেক।

৩৮ লুদা গঞ্জ যাহো গঞ্জের বগলোত আছিলেক। শিষ্যলো শুনির পাইলেক যে, পিতর লুদাত আছে। সেলো দুই জন মানষিক ওটে পেঠেয়া দিয়া কইলেক, পিতর পচ-পচে হামার এইটে যেনে আইসে।

৩৯ আর পিতর উঠিয়া উমার নগত আসির নাগিলেক। পিতর উমার ওটেকোনা আসিলে, উমরা উয়াক দোতলা ঘরত নিয়া গেইলেক। বিধুয়ালা সগায় পিতরের চাইরো পাকে খাড়া হয় শোকের কান্দন কান্দির নাগিলেক। দর্কা বত্তি থাকা কালে যেইলা জামা কাপড় বানাইচে ঐলা দেখের নাগিলেক।

৪০ পিতর সেলো সগাকে ঘর থাকি নিকিলি দিয়া হাংকুড়া পাড়ি প্রার্থনা করিলেক। তার পাছত মরা দেহাটার ভিত্তি ফিরিয়া

কইলেক, “টাবিথা ওঠেক!” ইয়াতে উয়ায় চোখু মেলিয়া পিতরক দেখিয়া উঠিয়া বসিলেক।

৪১ সেলো পিতর হাত দিয়া ধরিয়া টাবিথাক তুলিলেক। তার পাছত পিতর শিষ্যলোক আর বিধুয়ালোক ডেকেয়া আনিয়া দর্কাক বত্তা দেখাইলেক।

৪২ এই খবরটা গোটায় যাহো গঞ্জত ছড়াছড়ি হয় পড়িয়া মেয়ো মানষি পরমপ্রভুক বিশ্বাস করিলেক।

৪৩ পিতর যাহো গঞ্জের শিমোন নামে এক জন চামড়া ব্যবসায়ীর বাড়িত মেয়ো দিন রইলেক।

১০ কৈসরিয়া গঞ্জত কর্নিলিয়াস নামে এক জন মানষি আছিলেক। উয়ায় ইতালী সেনা দলের এক জন শতপতি।

২ উয়ায় অযিহুদী হয়ো যিহুদীলার নাকান করি ভগবান ভক্ত আছিলেক। উয়ার পরিবারের সগায় ভগবানের উপাসনা করচিলেক। এই শতপতি গরীব দুঃখীলোক মেয়ো দান করিচে। সউগ সমায় ভগবানেরটে প্রার্থনা করচিলেক।

৩ এক দিন আন্দাজ বেলা তিনটার সমায় পষ্ট দেখির পাইলেক যে, ভগবানের এক জন স্বর্গদূত বগলত আসিয়া কইলেক, “কর্নিলিয়াস!”

৪ কর্নিলিয়াস ভয় খায়া ভগবানের দূতটার ভিত্তি চায়া কইলেক, “দয়াল গুরু, তোমরা কি চান?” দূতটা কইলেক, “তোমার প্রার্থনা

আর গরীব দুঃখীলাক দান করা স্বর্গত পৌছিচে, এইটা ভগবান মানি নিচে।

৫ এলা তুই যাহো গঞ্জত মানষি পেয়ে দিয়া শিমোনক ডেকেয়া আনেক, উয়ার আরেক নাম পিতর।

৬ কিন্তু সাগরের বগলত অইন্য আরেক জন শিমোন আছে। উয়ায় চামড়ার ব্যবসা করে। উয়ারে বাড়িত পিতর আছে।”

৭ স্বর্গদূতটার কতা কওয়া শেষ হইলে, উয়ায় চলি গেইলেক। তার পর কর্ণিলিয়াস বাড়ির দুই জন চাকর আর উয়ার সেবাকারী ভক্ত সেনালার মইন্দো থাকি এক জনক ডেকাইলেক।

৮ উমারলাক সউগ কতা বুঝিয়া দিয়া যাহো গঞ্জত পেয়েয়া দিলেক।

৯ পরের দিন ঐ তিন জন মানষি ঘাটা দিয়া যাইতে যাইতে যেলা গঞ্জের বগলত আসিলেক, সেলা দুপুর বেলা পিতর প্রার্থনা করির বাদে ঘরের ছাদের উপরাত উঠিলেক।

১০ পিতরের খুব ভোগ নাগচে এই বাদে কিছু খাবার ইচ্ছা হইলেক। মানষিলা খাবার বানেবার ধরছিলেক, সেলা উয়ার নিন্দের ভাব আসছিলেক।

১১ পিতর দেখির পাইলেক স্বর্গের দুয়ার খুলি গেইচে। বড় গিলাপের নাকান একখান জিনিস চাইর কোনা ধরিয়া দুনিয়াত নামে দিবার ধরচে।

১২ এই গিলাপত সউগ নাকানের পশু-পখি, বুক দিয়া হাটা প্রাণীও আছিলেক।

১৩ একটা বাণী পিতর শুনির পাইলেক, “পিতর ওঠেক, মারিয়া খা।”

১৪ পিতর কইলেক, “না প্রভু, এইটা হবার না হয়, কেনেনা ছুয়া অপবিত্র জিনিস মুই আজি অন্দি খাং নাই।”

১৫ সেয়া দ্বিতীয় বার এই বাণী হইলেক, “ভগবান যেইলা পবিত্র করিচে, সেইলাক তুই অপবিত্র কইস না।”

১৬ এই নাকান তিন বার বাণী হবার পাছত, সেয়ায় সেয়ায় গিলাপটা নিমিষের মইন্ধোত দ্যাওয়াত তুলি নেওয়া হইলেক।

১৭ পিতর যে দর্শন দেখিচে, এইটার মানে কি হবার পারে, এই বিষয়টা নিয়া মনে মনে উয়ায় ভাবিবার নাগিলেক। সেয়ায় কর্ণীলিয়াসের পেয়ে দেওয়া খবরিয়ালা শিমোনের বাড়ি চান্দেয়া পায়া দুয়ারের আগপাকে আসিয়া খাড়া হইলেক।

১৮ উমরা ডেকেয়া পুছিলেক, “শিমোন যার আরেক নাম পিতর, উয়ায় কি এটেকোনা আছে?”

১৯ পিতর সেয়াও সেই দর্শন নিয়া চিন্তা ভাবনা করির ধরচে। এই সমায় পবিত্র আত্মা পিতরক কইলেক, “দেখেক তিন জন মানষি তোক চান্দের ধরচে।

২০ তুই উঠিয়া নিচাত যা, কোন সন্দেহ না করিয়া উমার নগত যা, কেনেনা মুই উমাক পেঠাইচুং।”

২১ পিতর সেলো নিচাত যায়া মানষিলাক কইলেক, “তোমরা যাক চান্দেবার নাগচেন, মুইয়ে সেই মানষি। তোমরা কি কারনে আসচেন?”

২২ উমরা কইলেক, “শতপতি কণীলিয়াস হামাক পেঠাইচে, উয়ায় এক জন ধার্মিক মানষি, ভগবানের উপাসনা করে সউগ যিহুদী মানষিলাও উয়াক শ্রদ্ধা করে। এক জন পবিত্র স্বর্গদূত আদেশ দিচে যাতে তোমাক উয়ায় উয়ার বাড়িত নিমন্ত্রন করে, তোমরা কি কবেন ঐটায় উয়ায় শুনির চায়।”

২৩ সেলো পিতর উমাক ভিতরাত ডেকে নিয়া গেইলেক আর মানষিলাক থাকা, খাবার বন্দোবস্ত করিলেক। পরের দিন পিতর সেই মানষিলাক নগত রওনা দিলেক। আর যাহো গঞ্জের বসবাস কারি কয়েক জন গুরুভাইও উয়ার নগত গেইলেক।

২৪ পরের দিন যেলা উমরা কৈসরিয়া গঞ্জত আসিলেক, সেলো কণীলিয়াস এর সাগাই-সোদর বন্ধু-বান্ধবক একটে ডেকেয়া উমার বাদে বাছে রবার নাগিলেক।

২৫ যেলায় পিতর ঘরত সোন্দাইলেক সেলায় কণীলিয়াস হাংকুড়া পাড়ি ভগবানের যেই নাকান ভক্তি করে ঐ নাকান পিতরক ভক্তি দিলেক।

২৬ কিন্তুক পিতর উয়াক তুলিয়া কইলেক, “ওঠেক, খাড়া হঃ! মুইও এক জন সাধারন মানষি।”

২৭ কর্ণীলিয়াস এর নগত কতা কইতে কইতে পিতর ঘরের ভিতরাত সোন্দেয়া দেখে মেয়ো মানষি জোটো হয়্যা আছে।

২৮ সেয়ো পিতর কইলেক, “তোমরা তো জানেন, মোর নাকান যিহুদীর নগত অযিহুদীর মেলা-মেশা করা হামার ধর্মের বেনিয়ম। কিন্তুক ভগবান মোক দর্শন দিয়া দেখে দিচে যে, কোন মানষিক ছুয়া বা অপবিত্র কওয়া ঠিক না হয়।

২৯ এই বাদে তোমরা মোক ডেকাইচেন আর মুইও কোন আপত্তি না করি আসচুং। এলা মোক কন, ক্যেনে তোমরা ডেকাইচেন?”

৩০ সেয়ো কর্ণীলিয়াস কইলেক, “আন্দাজ বেলা তিনটার সমায় এই চার দিন আগত মুই মোর ঘরত প্রার্থনা করির ধরচিলুং, অচানক এক জন সাদা ধপ-ধপা কাপড় পেন্দা মানষি আসিয়া মোর আগপাকে খাড়া হইলেক।

৩১ এই দূতটা কইলেক, কর্ণীলিয়াস! ভগবান তোর প্রার্থনা শুনিচে, আর তুই যে গরীব মানষিলাক দান করির ধরচিস এইটাও ভগবানের মানি নিচে।

৩২ এলা তুই যাহো গঞ্জত মানষি পেয়েয়া শিমোনক ডেকেয়া আনেক, যার আরেক নাম পিতর। সাগরের বগলত যে শিমোন চামড়ার ব্যবসা করে উয়ার বাড়িত পিতর আছে।

৩৩ এই বাদে মুই তারাতারি তোমারটে মানষি পেয়েচ্যেয়া দিলুং। আর তোমরা কষ্ট করি আসচেন, এলা হামরা পরম ভগবানের আগত খাড়া হয়্যা আছি। ভগবান তোমাক যেইলা আদেশ দিচে হামরা ঐলা শুনিমু।”

৩৪ সেলো পিতর কইলেক, “এলা মুই সচাং বুঝির পালুং যে, ভগবানের চোখুত সগায় সমান।

৩৫ সউগ জাতির মইন্ধো থাকি ভগবানক যায় মনে পরানে ভয় ভক্তি করে, উয়ার কতার নাকান কাম করে, উমারলাক ভগবান গ্রহন করিয়া কোলাত তুলি নেয়।

৩৬ ভগবান ইজ্রায়েলী মানষিলারটে একটা ভাল খবর পেঠাইচে, রাজা যীশুর মইন্ধো দিয়া শান্তি পাওয়া যায়। উয়ায় সগারে প্রভু।

৩৭ যীশুর জীবনের যেইলা ঘটনা ঘটিচে সেইলা তোমরা সগায় শুনিচেন। দীক্ষাদাতা যোহনের দীক্ষা প্রচার করার পাছত, গালীল থাকি শুরু করিয়া ঘটনাটা গোটায় যিহুদীয়াত ছড়াছড়ি হয়্যা পড়ছিলেক।

৩৮ তোমরা এইটাও জানেন যে, পরম ভগবান নাসারতের যীশুক পবিত্র আত্মার শক্তি দিয়া নিযুক্ত করিচে। ভগবান উয়ার নগত আছিলেক আর এই বাদে ভাল কাম করি বেড়েবার ধরছিলেক। যে মানষিলাক পিচাশ বশ করি ছিলেক, উমারলাক ভাল করিছিলেক।



৩৯ “যিহুদীয়া এলাকাত আর যিরুশালেমত যীশু যেইলা কাম করির ধরছিলেক, হামরা ঐলার সাক্ষী। মানষিলা উয়াক দ্রুশ খুটাত টাঙেয়া মারি ফেয়লাইচে।

৪০ ভগবান কিন্তু উয়াক তিন দিনের দিন বভেয়া তুলিলেক, আর মানষিলা উয়াক বত্তা দেখির পাইলেক।

৪১ সগায় কিন্তু উয়াক দেখির পায় নাই! খালি হামরা দেখির পাইচি, ভগবান আগতে হামাক বাছাই করি থুইচে, উয়ার সাক্ষী হবার বাদে। মরণ থাকি বত্তি উঠার পাছত এমন কি যীশুর নগত হামরা খাওয়া-দাওয়া করচি।

৪২ উয়ায় হামাক আদেশ দিচে যাতে মানষিলারটে এই ভাল খবরটা প্রচার করি সাক্ষী দেই, ভগবান উয়াক মরা আর বত্তা মানষির বিচার করির বাদে বাছাই করিচে।

৪৩ ভগবানের সউগ ভাববাদীলা কয়া গেইচে, যদি কাঙো যীশুক বিশ্বাস করে তাইলে সগায় উয়ার নামের গুণে পাপ থাকি ক্ষমা পায়।”

৪৪ পিতর যেয়ো এই কতা প্রচার করির নাগিলেক, সেয়ো যে মানষিলা উয়ার কতা শুনির ধরছিলেক, উমার সগারে উপরাত পবিত্র আত্মা নামি আসিলেক।

৪৫-৪৬ আর অযিহুদী মানষিলা স্বর্গীয় ভাষাত কতা কবার আর ভগবানের গুণগান করির নাগিলেক। সেয়ো পিতরের সাথে আইসা যিহুদী গুরুভাইলা এই কতা শুনিয়া অচানক হইলেক,

কেনেনা অযিহুদী মানষিলার উপরাত পবিত্র আত্মার বরদান নামিয়া আসিলেক। পিতর সেলো কইলেক,

৪৭ “এই মানষিলা তো হামার নাকান পবিত্র আত্মায় ভরপুর হইচে। জল দিয়া দীক্ষা নিবার বাদে কাণ্ডো কি এই মানষিলাক বাধা দিবার পারে?”

৪৮ সেলো উয়ায় মানষিলাক রাজা যীশুর নামে জল দীক্ষা দিবার আদেশ দিলেক। আরো কয়েক দিন পিতরক উমার নগত রবার বাদে কাউলা-কাউলি করিলেক।

১১ যীশুর অধিকার পাওয়া খবরিয়ীলা আর যিহুদীয়া প্রদেশের গুরুভাইলা জানির পাইলেক যে, অযিহুদী মানষিলাও ভগবানের বাইক্য মানি নিচে।

২ পিতর যেলো যিরুশালেম পৌছিলেক, সেলো যিহুদী গুরুভাইলা পিতরক টিটকারি করি কবার নাগিলেক,

৩ “তোমরা কেনে ভগবানের চিন না দেওয়া অযিহুদী মানষিলার বাড়ি সোন্দেয়া উমার নগত খাওয়া-দাওয়া করির ধরচেন?”

৪ পিতর সেলো পইলা থাকি যেই ঘটনালা ঘটচে সেইলা একটা একটা করি বুঝি দিয়া কবার নাগিলেক,

৫ “মুই যেলো যাহো গঞ্জত প্রার্থনা করির নাগছিলুং, সেলো মুই অচমকায় নিন্দের ভাবত দেখিলুং, স্বর্গ থাকি একটা বড় গিলাপের নাকান উয়ার চার কোনা ধরি মোর এদিয়া নামেয়া দিবার ধরচে।

৬ মুই এক নজর দেখিয়া চিন্তা করিলুং, ঐ গিলাপ খানের উপরাত মেলা নাকানের পশু-পখি, বনুয়া জানোয়ার, বুক দিয়া হাটা জীব আছে।

৭ মুই একটা বাণী শুনির পালুং, পিতর, ওঠেক মারিয়া খা।

৮ “মুই কলুং, হে ভগবান এমন না হউক! অপবিত্র, ছুয়া জিনিস মুই কোনো দিনও খাং নাই।

৯ “দ্বিতীয় বার দ্যাওয়া থাকি আর একটা বাণী হইলেক, ভগবান যেইলা শুদ্ধি করিচে, তুই ঐলাক অপবিত্র না কইস।

১০ “এই নাকান তিন বার হবার পাছত সউগ দ্যাওয়াত তুলিয়া নিলেক।

১১ “সেয়ায় সেয়ায় তিন জন মানষি আসিয়া দুয়ারের বগলত খাড়া হইলেক। উমাক কৈসরিয়া থাকি হামার এটেকোনা পেঠা হইচে।

১২ পবিত্র আত্মা মোক কইলেক, তুই কোন সন্দেহ না করিয়া উমার নগত যা। সেলা মোর সাথত ছয় জন গুরুভাইও যাবার নাগিলেক। যায় হামাক ডেকাইচে, উয়ার নাম কর্নীলিয়াস, উয়ার বাড়ি পৌছিয়া ভিতরা সোন্দালুং।

১৩ সেলা হামাক কইলেক, উয়ায় এক জন স্বর্গদূতক দেখির পাইচে, ঐ স্বর্গদূত উয়ার বাড়িত খাড়া হয় কইচে, ‘যাফো গঞ্জত শিমোন, যার অইন্য নাম পিতর, উয়াক ডেকেয়া আনেক।

১৪ উয়ায় আসিয়া তোক যেই কতা কবে, সেই কতাতে তুই আর তোর পরিবারের সগায় পাপ থাকি মুক্তি পাবেন।’

১৫ “যেই নাকান করি পবিত্র আত্মা পইলাতে হামার উপরাত নামি আসিচে, মুই কতা কওয়া শুরু করিলে ঐ নাকান করি কর্ণালিয়াসের বাড়ির সগারে উপরাত পবিত্র আত্মার বরদান করিবে।

১৬ সেলো প্রভু যীশুর কতালা মোর মনত ফম পড়িলেক। উয়ায় কইচে, যোহন জল দিয়া দীক্ষা দিচে, কিন্তু তোমারলার দীক্ষা হবে পবিত্র আত্মা দিয়া।

১৭ হামরালা প্রভু যীশুক বিশ্বাস করার পাছত ভগবান হামাক যে দান দিচে, সেই নাকান বরদান ভগবান উমাকও দিলেক। তাইলে মুই কায় যে ভগবানক বাধা দিবার পাং?”

১৮ এই কতা শুনিয়া যিহুদী গুরুভাইলা আপত্তি না করিয়া ভগবানের গুণগান করি কবার নাগিলেক, “তাইলে অযিহুদী মানষিলাকও অমৃত জীবন পাবার বাদে ভগবান পাপের ঘাটা থাকি ফিরিবার সুযোগ করি দিলেক!”

১৯ স্তিফানক নিয়া শিষ্যলার উপরাত যে ধর্মীয় অইত্যাচার শুরু হইলেক, এই বাদে শিষ্যলো বহুদূর ছড়াছড়ি হয় পড়িলেক। উমরা ফেনীকিয়া দেশ, সাইপ্রাস দ্বীপ আর আন্তিয়খিয়া গঞ্জের চাইরো পাকে যায় খালি যিহুদীলারটে ভগবানের বাইক্য প্রচার করির নাগিলেক।

২০ উমারলার মইন্ধে কয়জন শিষ্য সাইপ্রাস দ্বীপের আর কুরীণী গঞ্জের মানষি আছিলেক। উমরা আন্তিয়খিয়াত আসিয়া অযিহুদী গ্রীক ভাষা-ভাষী মানষির মইন্ধোত প্রভু যীশুর ভাল খবর প্রচার করির নাগিলেক,

২১ আর মেয়ো মানষি প্রভু যীশুক বিশ্বাস করিয়া শিষ্য হইলেক।

২২ যিরুশালেমের খ্রীষ্টিয় সমিতির সউগ মানষিলা এই খবরটা শুনিয়া বার্ণবাক আন্তিয়খিয়াত পের্যেঠাইলেক।

২৩ ভগবান যে আন্তিয়খিয়ার মানষিলাক আশুবাদ করিচে, এই দেখিয়া বার্ণবার মন আনন্দে মাতি উঠিলেক। সউগ মানষিলা যাতে মন-পরান দিয়া প্রভুর প্রতি থির থাকে এই বাদে উৎসাহ দিবার নাগিলেক।

২৪ বার্ণবা এক জন সৎ মানষি, পবিত্র আত্মা আর বিশ্বাসে ভরপুর আছিলেক। মেয়ো মানষিলা প্রভুর ঘাটাত আসিলেক।

২৫ পাছত বার্ণবা, শৌলক চান্দের বাদে তার্ষ গঞ্জত চলি গেইলেক।

২৬ উয়াক চান্দে পয়া আন্তিয়খিয়াত আনিলেক। উমরা দুইজনে ঐটেকার খ্রীষ্টিয় সমিতিত শিষ্যলার নগত এক বছর থাকিয়া মেয়ো মানষিক শিক্ষা দিলেক। এই পইলা বার আন্তিয়খিয়ার যীশুর শিষ্যলোক “খ্রীষ্টান” বুলিয়া ডেকা হইলেক।

২৭ সেয়ো কয়জন ভাববাদী যিরুশালেম থাকি আন্তিয়খিয়াত আসিলেক।

২৮ উমারলার মইন্ধো থাকি আগাব নামে এক জন পবিত্র আত্মার চালনায় কইলেক, “গোটায় দুনিয়াত ভয়ংকর মঙ্গা আসিবে আর খাবারের আকাল দেখা দিলেক।” মহারাজা ক্লৌদিয়ের শাসন কালত, এই কতা ফলিচে।

২৯ স্যেলা গুরুভাইলা নিজের সাধ্য মতন যিহুদীয়া প্রদেশের গুরুভাইলাক সাহায্য পেয়েবার বাদে মন থির করিলেক।

৩০ উমরালা বার্গবা আর শৌলের হাত দিয়া যিহুদীয়া প্রদেশের খ্রীষ্টিয় সমিতির নেতালার ঐটে সাহায্য পেয়েয়া দিলেক।

১২ সেই সমায় রাজা হেরোদ অইত্যাচার করির বাদে খ্রীষ্টিয় সমিতির কয়জন মানষিক ধরি আনিলেক।

২-৩ যোহনের ভাই যাকবক রাজা হেরোদ ছোরা দিয়া মারি ফ্যেলের কইলেক, উয়ায় দেখিলেক যে ইয়াতে যিহুদী নেতালার খুশি হইলেক। স্যেলা হেরোদ পিতরকও ধরিলেক, দিনটা হইলেক যিহুদীলার মুক্তি ভোজের পার্বনের দিন।

৪ হেরোদ পিতরক বন্দী করি জেলখানাত ভরে থুইলেক। চারজনের দল করি ষোল জন সেনা পাহারা দিবার ব্যবস্থা করিলেক। রাজা হেরোদ ঠিক করিলেক, মুক্তি ভোজের পার্বনের পাছত পিতরক মানষিলারটে বিচারের বাদে হাজির করিবে।

৫ এই বাদে পিতরক জেলখানাত বন্দী করি থোয়া হইলেক, আর খ্রীষ্টিয় সমিতির মানষিলা আকুল হয়। এক মনে ভগবানেরটে

প্রার্থনা করিতেই থাকিলেক।

৬ যেদিন হেরোদ পিতরক বিচার করিবার বাদে নিকিলি আনিবে তার আগের রাতি দুই জন সেনার মইন্ধোত দুইখান শিকল দিয়া বান্দা অবস্থায় পিতর নিন যাবার ধরছিলেক। দুই জন পাহারাদার দুয়ারত পাহারা দিবার ধরছিলেক।

৭ পরম প্রভুর এক জন স্বর্গদূত জেলখানাত সোন্দেয়া পিতরের বগলত খাড়া হইলেক। সেলোয় ঘরটা আলোয় ভৈ-ভৈয়া হয় গেলেক। এই স্বর্গদূতটা পিতরের দেহা নাড়িয়া জাগেয়া তুলিয়া কইলেক, “পচ-পচে ওঠেক।” সেলোয় পিতরের দুই হাতের শিকল খসিয়া গেলেক!

৮ স্বর্গদূতটা কইলেক, “জামা ওড়েক আর জুতা পেন্দেক।” পিতর সেলো ঐ নাকান করিলেক। স্বর্গদূতটা কইলেক, “তোর গিলাপখান উড়িয়া মোর পাছে পাছে আয়।”

৯ পিতর দূতটার পাছে পাছে বাইর হয় যাবার নাগিলেক, স্বর্গদূত যেইলা করিলেক সেইলা যে বাস্তবে সচাং হবার ধরচে। এই ঘটনা পিতর কিছুই বুঝির পাইলেক না। উয়ায় ভাবিবার নাগিলেক যে স্বপন দেখিবার ধরচে।

১০ উমরা পইলা আর দ্বিতীয় পাহারাদার দলটা পার হয়, লোহার দুয়ারখানের বগলত পৌছিলেক। ঐ দুয়ারখান আপনা-আপনি খুলিয়া গেলেক সেলো উমরা বিরিয়া আসিয়া গঞ্জত

সোন্দাইলেক। উমরা ঘাটা দিয়া হাটিয়া শেষ সীমনা পর্যন্ত যাইতে কালে, অচমকায় স্বর্গদূতটা পিতরক ছাড়িয়া চলিয়া গেইলেক।

১১ খানিক পরে পিতর চেতনা ফিরি পায়া কইলেক, “এলা মুই সচাং বুঝির পারলুং, ভগবান উয়ার স্বর্গদূতটাক পেয়েঠেয়া রাজা হেরোদের হাত থাকি আর যিহুদী নেতালার ষড়যন্ত্রের ফন্দি থাকি মোক রেহাই দিলেক।”

১২ সেলো এই কতা ভাবিয়া পিতর যোহনের মাও মরিয়মের বাড়ি গেইলেক। যোহনের আরেক নাম মার্ক। ঐ বাড়িত মেয়ো মানষি একটে হয় প্রার্থনা করির ছিলেক।

১৩ পিতর দুয়ারত খটখট করিলেক, শ্রীমতি রোদা নামে এক জন চাকরানী চেংড়ি দুয়ার খুলির আসিলেক।

১৪ পিতরের গালার আওয়াজ পায়া উয়ায় এত খুশি হইলেক যে, দুয়ার না খুলিয়া দৌড়ি যায়া ভিতরার মানষিলাক জানাইলেক যে পিতর দুয়ারত খাড়া হয় আছে। মানষিলা উয়াক কইলেক, “তুই পাগলি হচিস!” উয়ায় জোর দিয়া কবার নাগিলেক, “উয়ায় হয়!”

১৫ শিষ্যলো কইলেক, “উয়ায় নিশ্চয় পিতরের রক্ষাকারী স্বর্গদূত।”

১৬ এদিয়া পিতর দুয়ার খট খটাইতে আছে। সেলো শিষ্যলো দুয়ার খুলিয়া উয়াক দেখির পাইলেক, সেলো উমরা অচানক হইলেক।



১৭ পিতর উমাক চুপ করি রবার বাদে হাত দিয়া ইশারা করি কইলেক, আর ভগবান কেংকরি উয়াক জেল থাকি নিকিলি আনচে, সেই ঘটনাটা জানাইলেক। আরো কইলেক, “তোমরা যাকব আর অইন্য ভাইলাক এই খবরটা দেও।” এই কতা কয়া পিতর অইন্য জাগাত চলি গেইলেক।

১৮ সাকাল হইতে কালে পিতর কোটে গেইলেক? এই নিয়া জেলখানার সৈন্যলার মইন্ধোত একটা হৈ-চৈ পড়ি গেইলেক।

১৯ ইয়ার পাছত হেরোদ মেলা জাগাত পিতরক চান্দে না পায়া, সেনালার বিচার করিয়া মারি ফ্যেলের হুকুম দিলেক। পাছত রাজা হেরোদ যিহুদীয়া প্রদেশ ছাড়িয়া কৈসরিয়া গঞ্জত গেইলেক আর ওটেকোনা কিছু দিন রইলেক।

২০ সেই সময় রাজা হেরোদ সোর, সীদোন এই দুই গঞ্জের মানষিলার উপরাত রাগে অগুন হইলেক। উমরা তাণ্ডো কিন্তু একমত হয়। সগায় হেরোদের নগত দেখা করির আসিলেক। রাজার সচিব শ্রী ব্লাস্তরক মানষিলা নিজের দলত আনিয়া রাজার নগত মিমাংসা করির বাদে চুক্তি করির চাইলেক। কেনেনা রাজার দেশের খাবার উমার দেশত আইসে।

২১ পাছত হেরোদ একটা দিন ঠিক করিলেক, ঐ দিন উয়ায় রাজপোশাক পিন্দিয়া সিংহাসনত বসিয়া ভাষন দিবার নাগিলেক।

২২ উয়ার কতা শুনিয়া মানষিলা চিকরিয়া কবার নাগিলেক, “এইলা তো মানষির কতা না হয়, দেবতার কতা!”

২৩ রাজা হেরোদ ভগবানের গুণগান না করাতে, এক স্বর্গদূত হেরোদক এমন রোগ দিলেক যে, ত্রিমির উৎপাতে উয়ায় মরি গেইলেক।

২৪ কিন্তু ভগবানের বাইক্য চাইরো পাকে ছড়াছড়ি হয় গেইলেক আর মেয়ো মানষি শিষ্য হবার নাগিলেক।

২৫ বার্ণবা আর শৌলের কাম শেষ করিয়া যোহনের নগত যিরুশালেম ফিরি গেইলেক। এই যোহনক মার্ক বুলি ডেকা হয়।

১৩ সেই সমায় আন্তিয়খিয়া গঞ্জের খ্রীষ্টিয় সমিতি কয়েক জন ভাববাদী আর ধর্ম গুরু আছিলেক। উমরা হইলেক বার্ণবা, শিমোন যার আরেক নাম নীগ, কুরীণী গঞ্জের লুকিয়, মনহেম হইলেক রাজা হেরোদের সহকর্মী আর শৌল।

২ উমরা যেয়ো প্রার্থনা, উপাস করির ধরছিলেক, সেয়ো পবিত্র আত্মা উমাক কইলেক, “বার্ণবা আর শৌলক মোর বাদে যুদা করি দেও, কেনেনা মুই উমাক বিশেষ একটা কামের বাদে বাছাই করিচুং।”

৩ সেয়ো উমরা উপাস, প্রার্থনা করিয়া উমার উপরাত হাত থুইয়া বিদায় দিলেক।

৪ এই নাকান করি ভগবানের পবিত্র আত্মা, বার্ণবা আর শৌলক চালনা করিয়া সিলুকিয়া গঞ্জত নিয়া গেইলেক। সিলুকিয়া থাকি জাহাজত করিয়া সাইপ্রাস দ্বীপ নিয়া গেইলেক।

৫ সাইপ্রাস দ্বীপের সালমি গঞ্জত যায়া যিহুদীলার উপাসনা ঘরত ভগবানের ভাল খবর প্রচার করির নাগিলেক। উমার নগত সাহায্য কারি যোহন আছিলেক।

৬ দ্বীপের সউগ জাগাতে ঘুরিয়া শেষত পাকঃ নামের জাগাত আসিয়া এক জন যিহুদী ভন্ড ভাববাদীক দেখির পাইলেক। উয়ার নাম বর যীশু।

৭-৮ আর আরেক গ্রীক নাম হইলেক ইলুমা, মানে যাদুকর। ঐ ভন্ড ভাববাদী সের্গীয় পৌলের এক জন বন্ধু আছিলেক। এই দেশের রাজ্যপাল সের্গীয়-পৌল এক জন বুদ্ধিমান মানষি। উয়ায় ভগবানের বাইক্য শুনিবার বাদে বার্গবা আর শৌলক ডেকে আনিলেক। কিন্তু ভন্ড ভাববাদী উমার দুইজনাক বাধা দিবার নাগিলেক। সের্গীয়-পৌল ভগবানের বাইক্য যাতে বিশ্বাস না করে তার চেষ্টা করির নাগিলেক।

৯ সেলো শৌল, যাক পৌল কওয়া হয় উয়ায় পবিত্র আত্মাত ভরপুর হয়। ইলুমার ভিত্তি এক নজর দেখিয়া কইলেক,

১০ “পাষান কোটেকার, তুই হলু শয়তানের ছাওয়া, যেইলা ভাল ঐলার শত্রু। তুই একটা ছল-চাতুরীতে ভরা মানষি। ভগবানের সোজা ঘাটা টেরা ভ্যেকরা করা বন্ধ করিবু কি না?

১১ দেখ, ভগবানের শাস্তি তোর উপরাত এলা আসির ধরচে, তুই একেবারে কানা হয়। কিছু দিন কোনো কিছুই দেখির পাবু না।” সাথে সাথে উয়ায় চোখু দিয়া আন্ধার দেখির নাগিলেক।

কাণ্ডো যাতে উয়াক হাত ধরি নিয়া যায়, এই বাদে চাইরো পাকে হাতড়ে বেড়ে মানষিলাক মিনতি করির নাগিলেক।

১২ এইলা ঘটনা দেখিয়া রাজ্যপাল সেগীয়-পৌল বিশ্বাস করিলেক। কেনেনা উয়ায় প্রভুর সমন্ধে যে শিক্ষা পাইছিলেক, এই বাদে উয়ায় অচানক হয় গাইচে।

১৩ ইয়ার পাছত পৌল উয়ার সঙ্গী-সাথীলাক নিয়া পায়ঃ নামে জাগা ছাড়িয়া জল জাহাজত করি পাম্বুলিয়া প্রদেশের পর্গা নামে গঞ্জত গেলেক। কিন্তু যোহন উমারলাক ছাড়িয়া যিরুশালেম ফিরি গেলেক।

১৪ পাছত উমরা পর্গা থাকি পিষিদিয়া প্রদেশের আন্তিয়খিয়া গঞ্জত গেলেক। আর জিরানের দিনত যিহুদী উপাসনা ঘরত যায় বসিলেক।

১৫ পবিত্র শাস্ত্রের মোশির দেওয়া বিধির বিধান থাকি আর ভাববাদীর বই থাকি পড়েয়া শুনাইলেক। তার পাছত উপাসনা ঘরের নেতালা উমারলাক কইলেক, “হে মোর ভাইয়ের-ঘর, হাজির হওয়া মানষিলাক উৎসাহ দিবার বাদে যদি কোন কতা থাকে, তাইলে কন।”

১৬ পৌল উঠি খাড়া হয় হাত দিয়া ইশারা করি কইলেক, “হে ইজ্রায়েলী মানষিলা, হে ভগবান ভক্ত, তোমরা শুন!

১৭ এই ইজ্রায়েল জাতির ভগবান হামার চৌদ্দ গুটিক বাছাই করিচে। যেলা উমরা মিশর দেশত আছিলেক, সেলা হামার

মানষিলা সংখ্যায় বাড়ি যাবার ধরছিলেক। ইজ্রায়েলী মানষিলাক সেই দেশের গোলামীর অইত্যাচার থাকি ভগবান মহাশক্তি দিয়া বাইর করি আনিচে।

১৮ আর চল্লিশ বছর ধরিয়া নিধুয়া পাথারত উমার অন্যায়-আচরন সহ্য করি ছিলেক।

১৯ কনান দেশের সাতটা জাতিক ধ্বংস করিয়া, সেই দেশলা উয়ায় ইজ্রায়েল জাতিক দিলেক।

২০ এই নাকান করি চারশো পঞ্চাশ বছর কাটি গেইলেক। “তার পাহত ভাববাদী শমূয়েলের সমায় পর্যন্ত ভগবান কয়েক জন শাসনকর্তা দিলেক।

২১ সেলো উমরা এক জন রাজা চাইলেক, এই বাদে ভগবান চল্লিশ বছরের পরে বিন্যামীন বংশের কীশের বেটা শৌলক দিলেক।

২২ ভগবান সেলো শৌলক সারে দিয়া দায়ূদক রাজা করিলেক। উয়ায় দায়ূদের বিষয়োত সাক্ষী দিয়া কইলেক, মুই যিশয়ের বেটা দায়ূদক পাচুং। উয়ায় মোর মনের মত মানষি, মোর সউগ ইচ্ছা পালন করিবে।

২৩ উয়ার বংশ থাকি ভগবানের প্রতিজ্ঞা অনুসারে এক জন মুক্তিদাতা পেঠাবে। উয়ার নাম যীশু।

২৪ যীশু আইসার আগত দীক্ষাদাতা যোহন সউগ ইজ্রায়েল জাতিরটে প্রচার করিলেক, যে তোমরা পাপের ঘাটা থাকি মন

ফিরিয়া দীক্ষা নেও।

২৫ কামের শেষত যোহন কইলেক, মুই কায় তোমরা কি মনে করেন? মুই ঐ বাছাই করা রাজা না হং। উয়ায় মোর পাছত আসির ধরচে, উয়ার জুতার ফিতা খুলি দিবার যোগ্যতা মোর নাই।

২৬ “হে মোর ভাইলা, অব্রাহামের বংশের বেটালা আর যত জন তোমরা ভগবানক ভয় খান, হামারলারটে এই মুক্তির ভাল খবর পের্যাইচে।

২৭ যিরুশালেমের মানষিলা, উমার নেতালা যীশুক মুক্তিদাতা হিসাবে চিনির পায় নাই। তাছাড়া ভগবানের ভাববাদীলার যে বাইক্যলা প্রত্যেক জিরানের দিনত পড়া হয়, সেইলাও বুঝির পায় নাই। সেই জইন্যে উমরা যীশুক দোষী সাব্যস্ত করিয়া ভগবানের খবরিয়ালার বাইক্য পূরণ করিলেক।

২৮ যদিও যীশুক মারি ফ্যেলের কোন দোষ পায় নাই, তবু যীশুক মারির ফ্যেলের বাদে রাজ্যপাল পীলাতেরটে দাবি করিলেক।

২৯ যীশুর বিষয় যা কিছু সনাতন পবিত্র শাস্ত্রত লেখা আছিলেক, সউগে পূরণ করির পাছত উমরা মরা দেহাটা ক্রুশ থাকি নামেয়া সমাধিত দিলেক।

৩০ কিন্তু পরম ভগবান যীশুক মরণ থাকি ফির বত্তে তুলিলেক।

৩১ যীশুর নগত গালীল থাকি যিরুশালেমত যায় যায় আসচে, উমারলাক মেলাবার দেখা দিলেক। হামার মানষিলারটে উমরায় এলা উয়ার সাক্ষী দিবার ধরচে।

৩২ “ভগবান হামার চৌদ্দ পুরুষেরটে যে কিরা কাটিচে, সেই ভাল খবরটা তোমারলাক জানেবার ধরচি।

৩৩ ভগবান যীশুক মরণ থাকি ফির বত্তে তুলিয়া হামারলারটে উয়ার গুটির মানষিলার বাদে যে কিরা কাটিচে, সেইলা পূরণ করিচে। গীতসংহিতাত যীশুর সমন্ধে কইচে, ‘তুই মোর বেটা, আজি মুইয়ে তোক জন্ম দিলুং।’

৩৪ “ভগবান উয়াক মরণ থাকি বত্তে তুলিচে। উয়ার দেহা নষ্ট হবার দিবে না। এই বিষয় ভগবান কইচে, ‘মুই তোমারলাক রাজা দায়ূদের নগত যে পবিত্র আশুবাদের প্রতিজ্ঞা করিচুং, সেইলা তোমাকো দিম।’

৩৫ “এই বিষয়ে আরো অইন্য জাগাত নেখা আছে, ‘তোর পবিত্র জনের দেহাক তুই পচন ধরির দিবু না।’

৩৬ “মহারাজা দায়ূদ সেই কালের মানষিলার মইন্ধোত ভগবানের ইচ্ছা অনুযায়ী কাম করার পাছত মরি যায়। উয়ার চৌদ্দ গুটির নগত উয়াক সমাধিত থোয়া হয়। উয়ার দেহাও নষ্ট হইলেক।

৩৭ কিন্তু ভগবান যাক মরণ থাকি বত্তে তুলিচে, উয়ার দেহা নষ্ট হয় নাই।

৩৮ এই বাদে হে মোর ভাইয়ের ঘর, তোমরা শোন, এই যীশুর মইদ্বো দিয়া পাপ থাকি ক্ষমা পাবার বাদে তোমারটে প্রচার করা হবার ধরচে।

৩৯ শ্রী মোশির বিধির বিধান পালনে মানষিক নির্দোষ কয়া মানি নেওয়া হয় না। কিন্তু যে কাণ্ডো যীশুর উপরাত বিশ্বাস করে, উয়াক নির্দোষ কয়া হয়।

৪০ এই বাদে তোমরা সাবধান হন! ভাববাদীর বইয়ত যেইলা কয়া গেইচে সেইলা যাতে তোমার উপরাত না ঘটে,

৪১ ‘তোমরা যায় যায় ভগবানক নিয়া তামশা করেন, তোমরা শোন, তোমরা দেখ, অচানক হন, আর শেষ হয় যাও। কেনেনা তোমারলার সমায়ে মুই এমন কাম করিচুং, যেই কামের কতা তোমারলাক কওয়া হইলেও বিশ্বাস করেন না।”

৪২ পৌল আর বার্ণবা উপাসনা ঘর থাকি চলি যাবার সমায় মানষিলা অনুরোধ করির নাগিলেক, আইসা জিরানের দিনত যাতে আরো ভাল করি আলোচনা করির পান।

৪৩ মানষিলা উপাসনা ঘর থাকি চলি যাবার সমায় মেয়ো যিহুদী আরো যিহুদী ধর্মে শিষ্য, ভগবান ভক্ত অযিহুদী পৌলের আর বার্ণবার সাথে সাথে গেইলেক। উমরা মানষিলার নগত কতা কইলেক, উমারলাক উৎসাহ দিলেক যাতে উমরা ভগবানের দয়ার উপরা ভরসা করি চলিতে থাকে।



৪৪ পরের জিরানের দিনত গঞ্জের পেয়ায় সউগ মানষি ভগবানের বাইক্য শুনিবার বাদে একটে হইলেক।

৪৫ এত মানষির ভিড় দেখিয়া যিহুদীলা হিংসায় জ্বলির নাগিলেক। আর নিন্দা করিয়া পৌলের কতার প্রতিবাদ করির নাগিলেক।

৪৬ কিন্তু পৌল আর বার্ণবা সাহস করিয়া উমার কতার উত্তর দিলেক, “পইলা তোমরা যিহুদীলারটে হামার ভগবানের কতা কওয়া দরকার আছিলেক। কিন্তু তোমরা অবহেলা করিয়া এই অমৃত জীবন পাবার বাদে নিজেকে অযোগ্য মনে করিলেন, এলা হামরা অযিহুদীলারটে যামু।

৪৭ কেনেনা ভগবান হামাক এই নাকান আদেশ দিচে, ‘মুই তোমারলাক অইন্য জাতির বগলত আলোর নাকান করিচুং, যাতে তোমারলার মইন্ধো দিয়া দুনিয়ার সউগ মানষিলা পাপ থাকি মুক্তি পায়।’”

৪৮ এই কতা শুনিয়া অযিহুদীলা খুশি হইলেক, আরো ভগবানের বাইক্যের গুণগান করির নাগিলেক। যাক যাক অমৃত জীবনের বাদে বাছাই করি থোয়া হইচে, উমরা বিশ্বাস করিলেক।

৪৯ ভগবানের বাইক্য গোটায় দেশত ছড়াছড়ি হয় পড়িলেক।

৫০ কিন্তু যিহুদীলা ভগবানের উপাসনাকারী গুনবতী বেটিছাওয়ালাক আর গঞ্জের প্রধান প্রধান মানষিলাক উসকানি

দিবার নাগিলেক। এই নাকান করি পৌল আর বার্ণবাক  
অইত্যাচার করিয়া গঞ্জ থাকি খেদেয়া দিলেক।

৫১ সেলো যিহুদী মানষিলা ভগবানের বাইক্য অবহেলা করাতে  
পৌল আর বার্ণবা সাক্ষী হিসাবে ঠেংএর ধূলা ঝাড়িয়া ইকনিয়  
নামে জাগাত গেইলেক।

৫২ কিন্তু ওটেকার শিষ্যলো আনন্দে আরো ভগবানের পবিত্র  
আত্মাত ভরপুর হইলেক।

১৪ পৌল আর বার্ণবা উমার নিয়ম মতন ইকনিয় গঞ্জের যিহুদী  
উপাসনা ঘর গেইলেক। উমরা কতালা এমন করি কইলেক, যে  
যিহুদী ও গ্রীক মেয়ো মানষি বিশ্বাস করিলেক।

২ কিন্তু কিছু যিহুদী মানষি বিশ্বাস করিলেক না, বরং উমরা  
অযিহুদী মানষিলাক উসকি দিয়া গুরতাইলার বিরুদ্ধে খেপেয়া  
তুলিলেক।

৩ পৌল আর বার্ণবা মেয়ো দিন ইকনিয় গঞ্জত থাকিয়া, সাহস  
করিয়া প্রভু যীশুর কতা প্রচার করিলেক। প্রভুর দয়ার কতা উমরা  
যেইলা প্রচার করিলেক, সেইলা প্রমাণ করির বাদে প্রভু উমার  
মইন্ধো দিয়া অচানক অচানক চিনের কাম করিবার বাদে শক্তি  
দিলেক।

৪ গঞ্জের মানষিলা দুই দলে ভাগ হয় গেইলেক, কাণ্ডো গেইলেক  
যিহুদীলার ওদিয়া আর কাণ্ডো গেইলেক যীশুর পেঠা

খবরিয়ালার ওদিয়া।

৫ সেলো যিহুদী, অযিহুদীলা উমার নেতার নগত মিলিয়া বার্ণবা আর পৌলক অপমান করিয়া শিল দিয়া ঢেলে মারির চেষ্টা করিলেক।

৬ এই ঘটনাটা টের পায়া পৌল আর বার্ণবা লুকানিয়া প্রদেশের লুস্ত্রা আর দর্বি গঞ্জ আর উয়ার চাইরো পাকের অঞ্চলত পালেয়া বেড়েবার নাগিলেক।

৭ সেলো ওটে উমরা প্রভু যীশুর ভাল খবর প্রচার করির নাগিলেক।

৮ লুস্ত্রাত এক জন মানষি বসিয়া আছিলেক, উয়ায় জন্ম থাকি খোড়া, ঠেংয়ত কোন বল ছিলেক না। উয়ায় কোন দিনও চলা ফিরা করির পায় নাই।

৯ এই মানষিটা বসিয়া পৌলের কতা শুনির ধরছিলেক। পৌল মানষিটার ভিতি দেখিয়া বুঝিলেক উয়ার ভাল হবার বাদে ভগবানের উপরাত বিশ্বাস আছে।

১০ পৌল উয়াক ডেকেয়া কইলেক, “তোর দুই ঠেংয়ত ভর দিয়া সোজা হয় খাড়া হঃ!” উয়ায় সেলো ঝাপেয়া উঠি খাড়া হয় হাটি বেড়ের নাগিলেক।

১১ পৌল যেইলা করিলেক, সেইলা দেখি মানষিলা লুকানিয়া ভাষাত কবার নাগিলেক, “দেবতালা মানষির রূপ ধারন করিয়া হামার এটে নামি আসচে!”

১২ এই বাদে মানষিলা বার্ণবার নাম “জেউস” আর পৌলের নাম “হের্মেস” দিলেক। কেনেনা পৌল আছিলেক প্রধান বক্তা।

১৩ গঞ্জের ঠিক আগপাকে জেউসের মন্দির আছিলেক। এই মন্দিরের বামন কয়েকটা পশু আর মালা নিয়া গঞ্জের দুয়ারত আসিলেক। কেনেনা এই বামনটা মানষিলা নগত মিলিয়া পৌল আর বার্ণবাক সন্মান জানের বাদে এই পশু বলিদান দিবার চাইলেক।

১৪ কিন্তু যীশুর খবরিয়া বার্ণবা আর পৌল এই কতা শুনিয়া নিজের কাপড় ছিড়িয়া দৌড়ি যায়া মানষিলাক চিকিরিয়া কবার নাগিলেক,

১৫ “আহা তোমরা এইলা কেনে করির নাগচেন? হামরাও তোমার নাকান সাধারন মানষি। হামরা তোমারটে এই ভাল খবর প্রচার করির নাগচি, তোমরা এই বেয়া জিনিস ছাড়িয়া জীবন্ত ভগবানের ভিত্তি ফিরি আইসো। উয়ায় দ্যাওয়া, দুনিয়া, সাগর সউগে সিজ্জন করিচে।

১৬ আগিলা দিনলাত উয়ায় সউগ জাতিক নিজের ইচ্ছা মতন চলিবার দিচে।

১৭ তাণ্ডো নিজের বিষয় সাক্ষী দিচে। উয়ায় দ্যাওয়া থাকি জল, নানান ঋতুত ফসল দিচে। উয়ায় মেলা খাবার দিয়া তোমারলার মন আনন্দে দিচে।”

১৮ এইলা কতা কয়া পৌল ও বার্ণবা মানষিলাক খুব কষ্ট করিয়া পশু বলি দেওয়া বন্ধ করিলেক।

১৯ এই ঘটনার পাছত ইকনিয় আর আন্তিয়খিয়া থাকি কয়েক জন যিহুদী প্রচারক আসিয়া মানষিলাক পৌলের বিরুদ্ধে উসকি তুলিলেক। উমরা পৌলক শিল দিয়া ঢেলাইলেক। পৌল মরি গেইচে মনে করিয়া যিহুদীলা উয়াক গঞ্জের বায়রাত টানি-ছেচরে নিয়া গেইলেক।

২০ যীশুর শিষ্যলা উয়ার চাইরো পাকে আসিয়া জড়ো হইলে, উয়ায় উঠিয়া উমার নগত গঞ্জত চলি গেইলেক। পরের দিন বার্ণবার নগত দরী গঞ্জত গেইলেক।

২১ পৌল আর বার্ণবা দরী গঞ্জত ভাল খবর প্রচার করিয়া মেলা মানষিক শিষ্য বানেয়া, লুস্ত্রা গঞ্জ থাকি ইকনিয় আর আন্তিয়খিয়াত ফিরে আসিলেক।

২২ ঐ গঞ্জের শিষ্যলার মনের বল যোগাইলেক, উমারলাক বিশ্বাসে থির থাকির উৎসাহ দিলেক। আরো কইলেক, “ভগবানের শাসন ব্যবস্থাত সোন্দের বাদে হামারলাক নানা নাকানের জ্বালা-যাতনা সহ্য করির নাগিবো।”

২৩ উমরা সগায় মিলিয়া খ্রীষ্টিয় সমিতির নেতালক কামত নিযুক্ত করিলেক। এই নেতালা হইলেক যায় যায় প্রভুর উপর বিশ্বাস করিচিলেক, আর প্রার্থনা, উপাস করে, উমারলাক সগাকে প্রভুর হাতত সাঁপে দিলেক।

২৪ তার পাছত পৌল আর বার্ণবা পিষিদিয়া প্রদেশের মইন্ধো দিয়া পাম্ফুলিয়া পৌছাইলেক।

২৫ ওটে উমরা পর্গা গঞ্জত ভগবানের ভাল খবর প্রচার করিয়া অভালিয়া নামে এক জাগাত গেইলেক।

২৬ ওটে থাকি জাহাজত করিয়া আন্তিয়খিয়াত চলি গেইলেক। উমরা যে কাম সাধন করিয়া আসিলেক, সেই কামের বাদে এই জাগাত নিজেকে ভগবানের হাতত সঁপে দিছিলেক।

২৭ পৌল আর বার্ণবা ফিরি আসিয়া শিষ্যলোক জোটো করিলেক। ভগবান উমার নগত রয়া মেয়ো কাম করিয়া অযিহুদীলার বিশ্বাসের ঘাটা খুলি দিচে, সেইলা সউগে তুলি ধরিলেক।

২৮ সেয়ো উমরা মেয়ো দিন ধরিয়া শিষ্যলার নগত রইলেক।

১৫ ইয়ার পাছত যিহুদীয়া প্রদেশ থাকি কয়েক জন যিহুদী আসিয়া গুরু ভাই-বইনিলাক শিক্ষা দিবার নাগিলেক। উমরা কইলেক, “শ্রী মোশির বিধান মতন দেহাত চিন না দিলে তোমরা পাপ থাকি মুক্তি পাবেন না।”

২ এই নিয়া ঐ মানষিলার নগত পৌল আর বার্ণবা খুব তর্কা-তর্কি হইলেক। গুরু-ভাইলা ঠিক করিলেক তর্কের মিমাংসা করির বাদে পৌল আর বার্ণবা আন্তিয়খিয়ার কয়েক জন শিষ্যক নিয়া যিরুশালেমের খ্রীষ্টিয় সমিতি খবরিয়া আর নেতালারটে পেঠাবে।

৩ খ্রীষ্টিয় সমিতির মানষিলা উমারলাক যাবার বন্দোবস্ত করিলেক। সেয়া উমরা ফৈনীকিয়া আর শমরিয়ার ভিত্তিরা দিয়া যাইতে যাইতে অযিহুদী মানষিলা কেংকরি যীশুর ঘাটাত আসিচে, সেইলা পৌল আর বার্ণবা মানষিলাক জানাইলেক। এই শুনিয়া শিষ্যলা সগায় খুব খুশি হইলেক।

৪ ইয়ার পাছত উমরা যিরুশালেমত পৌছিলেক সেয়া খ্রীষ্টিয় সমিতির মানষিলা, যীশুর খবরিয়ালা, আরো নেতালা উমাক বরণ করি নিলেক। উমারলার মইন্ধো দিয়া প্রভু যেইলা কাম করিচে, সেইলা সগাকে জানাইলেক।

৫ কিন্তু ফরীশী দলের কয়জন মানষি শিষ্য হইছিলেক, উমরা উঠিয়া কইলেক, “অযিহুদী মানষিলাক দেহাত চিন দেওয়া আর শ্রী মোশির বিধান পালন করা দরকার।”

৬ এই বিষয় আলাপ করির বাদে যীশুর খবরিয়ালা আর খ্রীষ্টিয় সমিতির নেতালা একটে জোটো হইলেক।

৭ আর নানা নাকান তর্কা-তর্কি হওয়াতে পিতর উঠিয়া কইলেক, “ভাইয়ের-ঘর তোমরা তো জানেন মেয়া দিন আগত তোমারলার মইন্ধো থাকি ভগবান মোক বাছাই করিচে, যাতে মোর মুখ থাকি ভাল খবর শুনিয়া অযিহুদী মানষিলা বিশ্বাস করে।

৮ ভগবান হইলেক অন্তর্যামী, উয়ায় সগারে অন্তরের কতা জানে। ভগবান হামাক যে নাকান করি পবিত্র আত্মা দান করিয়া কোলাত

তুলি নিচে, একে নাকান করি অযিহুদী গুরুভাইলার বাদে সাম্ভ্য হিসাবে পবিত্র আত্মা দান করিলেক।

৯ উমারলার আর হামারলার মইন্ধোত কোন ভেদা-ভেদ নাই। উমরা বিশ্বাস করিচে বুলিয়া ভগবান উমার অন্তর শুচি করিচে।

১০ আর এলা ভগবানক কেনে যাচাই করির ধরচেন? হামারলার চৌদ গুষ্টি আর হামরা যেইলার ভরা উবিবার পায় নাই, তোমরালা কেনে সেই অযিহুদী ভাই বইনিলার ঘাড়ত জোঙাল তুলি দিবার ধরচেন?

১১ হামরা প্রভু যীশুর দয়াত য়েংকরিয়া বিশ্বাস করিয়া মুক্তি পাচি, অংকরিয়া অযিহুদী মানষিলাও পাপ থাকি মুক্তি পাইচে।”

১২ সেলো সউগ মানষি ঝিত করি রইলেক। বার্ণবা আর পৌলক দিয়া ভগবান অযিহুদী মানষিলাৰ মইন্ধোত কি কি অচানক অচানক চিনের কাম করিচে, সেইলা ঘটনা বার্ণবা আর পৌলেরটে থাকি উমরালা শুনিলেক।

১৩ উমার কতা শেষ হইতে কালে যাকব কইলেক, “মোর ভাইয়ের-ঘর মোর কতা শুন!

১৪ ভগবানের মহিমার বাদে পইলা বার অযিহুদী মানষিলাৰ মইন্ধো থাকি একদল মানষিক বাছাই করি গ্রহন করিচে, সেই কতা ভাই শিমোন-পিতর তোমারলাক শুনাইলেক।

১৫ এই কতার নগত ভগবানের ভাববাদীর কতার মিল আছে। কেনেনা শাস্ত্রত নেখা আছে:



১৬ মুই ফিরি আসিম, আর রাজা দায়ূদের যে ঘর ভাঙি গেইচে, সেই ঘর আরো বানাইম। মুই উয়ার ধবংস হওয়া সউগ ঘর নয়া করি গাথিম।

১৭ যাতে করি মানব জাতির অইন্য মানষিলা, আর সউগ অযিহুদী মানষিলা মোক চান্দায়।

১৮ প্রভু মেয়ো দিন আগত এইলা বিষয় জানাইচে।”

১৯ ফির যাকব কইলেক, “অযিহুদী মানষিলা ভগবানের এদিয়া ফিরিচে। এই বাদে হামার বিচার হইলেক যে, হামরা উমাক কষ্ট দিমু না।

২০ বরং উমাক চিঠি নেখিয়া পেয়ে দিবার পাই, উমরা শ্রী মোশির বিধির বিধান মতে প্রতিমাক দেওয়া সউগ কিছু ছুয়া-আইটা, ব্যভিচার আর গালা টিপিয়া মারা পশুর মসং, অত্ত থাকি যুদা হয় থাকুক।

২১ কেনেনা আগিলা কাল থাকি এলাও প্রতিটা গঞ্জত শ্রী মোশির মানষিলা প্রচার করির ধরছিলেক। আর যেইলা নেখি গেইচে, সেইলা প্রতি জিরানের দিন যিহুদী উপাসনা ঘরত মোশির বিধির বিধান পড়া হবার ধরচে।”

২২ সেয়ো খবরিয়ালা, খ্রীষ্টিয় সমিতির নেতালা আর অইন্য মানষিলা ঠিক করিলেক যে, উমার নিজের মইন্ধো থাকি কয়জন মানষিক বাছাই করি নিয়া পৌল আর বার্ণবার সাথে আন্তিয়খিয়াত পেঠাবে। শিষ্য ভাইলার মইন্ধোত দুই জন নেতা আছিলেক।

উমরা হইলেক যিহুদা আর শিলাস, এই যিহুদার আর এক নাম বারশাব্বা।

২৩ আর উমারলার হাতত এই নাকান চিঠি নেখিয়া পেঠাইলেক, “হামরা খবরিয়ালা আর খ্রীষ্টিয় সমিতির নেতালা মিলিয়া আন্তিয়খিয়া, সিরিয়া আর কিলিকিয়ার অযিহুদী শিষ্য ভাইলার বাদে এই চিঠি নেখিচি, তোমারলার মঙ্গল হউক।

২৪ “হামরা শুনির পাইলুং যে, হামার মইদ্বো থাকি কয়জন মানষি তোমার ঐটে যায়া নানা নাকানের সমস্যা তৈরি করি তোমারলার মন অস্থির করি তুলি কষ্ট দিচে। কিন্তুক উমাক হামরা এই নাকান কাম করিবার কই নাই।

২৫ এই বাদে হামরা একমত হয়। কয়জনক বাছাই করিয়া আদরের ভাই বার্ণবা আর পৌলের সাথে পেঠাইলুং।

২৬ বার্ণবা আর পৌল হামার প্রভু যীশু খ্রীষ্টের বাদে মরণ থাকি ফিরি আসিচে।

২৭ হামরা যিহুদা আর শিলাসক পেঠালুং, হামরা যেইলা নেখিচি, যাতে সেইলা উমরা নিজে মুখ দিয়াও কয়।

২৮ ভগবানের পবিত্র আত্মা আর হামরা এইটায় ভাল মনে করিলুং, কয়টা দরকারি বিষয় ছাড়া, অইন্য ভার তোমার উপরাত যাতে চাপে দেওয়া না হয়।

২৯ এই বিষয়লা হইলেক, তোমরালা প্রতিমার সঁপে দেওয়া প্রসাদ, পশুর অক্ল, গালা টিপি মারা কোন পশুর মসং না খান।

আর ব্যভিচার করেন না। এইলা থাকি যুদা হয় থাকিলে তোমারলার মঙ্গল হবে। তোমারলার প্রতি হামার শুভ কামনা রইলেক।”

৩০ যেলা উমাক বিদায় দিলেক সেলা উমরা বিদায় নিয়া আন্তিয়খিয়াত আসিলেক। আর মানষিলাক একটে করিয়া চিঠিখান দিলেক।

৩১ মানষিলা চিঠিখান পড়িয়া সান্তনা পায়া খুশি হইলেক।

৩২ যিহুদা আর শিলাস ভগবানের ভাববাদী হওয়াতে শিষ্য ভাইলাক মেলা কতা কয়া উৎসাহ দিলেক। ইয়াতে উমরা বিশ্বাসে আরো শক্তিশালী হইলেক।

৩৩-৩৪ কিছু দিন থাকার পাছত উমাক পেঠেয়া দিলেক। উমারটে থাকি যিরুশালেম ফিরি যাবার বাদে শান্তির কামনা করিয়া বিদায় দিলেক।

৩৫ কিন্তু পৌল আর বার্ণবা আন্তিয়খিয়াতে রইলেক। উমরা ওটে অইন্য মানষির নগত ভগবানের বাইক্য শিক্ষা দিয়া প্রচার করির নাগিলেক।

৩৬ কিছু কাল পাছত পৌল বার্ণবাক কইলেক, “চল, হামরা আগত যেইলা গঞ্জত প্রভুর বাইক্য প্রচার করচি, এলা ঐলা গঞ্জত ফিরিয়া যায়া গুরুভাইলা কেমন আছে খোজ-খবর নেই।”

৩৭ বার্ণবা মনে করিলেক যে, যোহনক নগত নিয়া যাই, এই যোহনের ডাক নাম মার্ক।

৩৮ যেহেতু মার্ক পাম্ফুলিয়াত উমারলাক ছাড়িয়া গেইচে আর উমার নগত কাম করে নাই, এই বাদে পৌল সিদ্ধান্ত নিলেক, মার্কক নগত না নেওয়াই ভাল।

৩৯ ইয়ার ফলে উমার মইন্ধোত মতের অমিল দেখা দিয়া উমরা যুদা হয়্যা গেইলেক। বার্ণবা মার্কক নগত নিয়া সাইপ্রাস দ্বীপত জাহাজত করি রওনা দিলেক।

৪০-৪১ কিন্তুক পৌল শিলাসক বাছাই করিলেক আর আন্তিয়খিয়ার গুরুভাইলা উমারলাক দয়ালু প্রভুর হাতত সঁপে দিয়া পৌল আর শিলাস চলি গেইলেক। সেলো উমরা সিরিয়া আর কিলিকিয়া দেশের মইন্ধো দিয়া যাইতে যাইতে সমিতিলাৰ বিশ্বাস বাড়েয়া আরো শক্তিশালী করিলেক।

১৬ এক দিন পৌল, দর্বি আর লুস্ত্রা গঞ্জত গেইলেক। ঐটে তীমথিয় নামে এক জন শিষ্য আছিলেক, উয়ার মাও যিহুদী আর যীশুর শিষ্যা, কিন্তুক তীমথিয়র বাপ আছিলেক জাতিতে গ্রীক।

২ লুস্ত্রা আর ইকনিয় গঞ্জত বসবাসকারী গুরুভাইলারটে তীমথিয়ের গুনিজন হিসাবে খুব নাম-ডাক আছিলেক।

৩ পৌল উয়াক সাথত নিয়া যাবার চাইলেক। কিন্তুক সগায় জানে তীমথিয়ের বাপ এক জন গ্রীক জাতির মানষি। পৌলের প্রচারের যাতে বাধা না হয়, তারে বাদে যিহুদীলার নিয়ম মতন তীমথিয়ের দেহাত চিন দিলেক।

৪ পাছত পৌল আৰ উয়ার সঙ্গী-সাথীলা এ গঞ্জ থাকিও গঞ্জের মইন্ধো দিয়া যাবার নাগিলেক। অধিকার পাওয়া খবরিয়ালা আৰ বুড়া নেতালা যে নিয়ম যিরুশালেমত ঠিক করিচে, ঐলা নিয়ম মানষিলাক পালন করির কইলেক।

৫ এই নাকান করি খ্রীষ্টিয় সমিতির মানষিলা বিশ্বাসে বলবান হবার নাগিলেক, আৰ দিনে দিনে সংখ্যায় বাড়ির নাগিলেক।

৬ ঐ সমায় পবিত্র আত্মা উমাক এশিয়া প্রদেশত প্রচার করির দেয় নাই। এই বাদে পৌল আৰ উয়ার সঙ্গীলা ফরুগিয়া আৰ গালাতীয়া দেশ দিয়া গেইলেক।

৭ মুশিয়া দেশের সীমনাত পৌছিয়া বিথুনিয়া প্রদেশ যাবার চাইলেক। কিন্তুক ওটেকোনাও যীশুর আত্মা উমাক যাবার দিলেক না।

৮ এই বাদে উমরা মুশিয়া দেশের মইন্ধো দিয়া ত্রোয়া বন্দরত গেইলেক।

৯ রাতির বেলা পৌল একটা দর্শন দেখিলেক, ম্যাসিডোনিয়া প্রদেশের এক জন মানষি খাড়া হয়। খুব কাউলা কাউলি করি কবার নাগচে, “ম্যাসিডোনিয়াত আসিয়া হামারলাক সাহায্য কৰেক।”

১০ পৌল দর্শন দেখির পাছত, হামরা সেলোয় সেলোয় ম্যাসিডোনিয়া দেশত যাবার বাদে মনস্থ করিলুং, কেনেনা

ঐটেকার মানষিলারটে খ্রীষ্টের ভাল খবর প্রচার করির বাদে  
ভগবান হামারলাক ডেকাইচে।

১১ হামরা ত্রোয়া বন্দর ছাড়িয়া জল-জাহাজত চড়িয়া সিদা ঘাটা  
দিয়া সামোথ্রাকী দ্বীপ গেইলোং, তার পরের দিন নিয়াপলি গঞ্জত  
গেইলোং।

১২ ঐটে থাকি ফিলিপী গঞ্জত আসিলোং, এইটা হইলেক  
ম্যাসিডোনিয়ার একটা বড় গঞ্জ। ওটে রোমীয় জাতি বসবাস  
করে। আর হামরা ঐ গঞ্জত কয় দিন রইলোং।

১৩ হামরা জিরানের দিন গঞ্জের বায়রাত নদীর পারত  
আসিলোং। মনে করিলুং যে ঐটে প্রার্থনা করির জাগা আছে।  
ওটেকোনা যেই বেটিছাওয়ালা জড়ো হয় বসিয়া আছিলেক  
উমার নগত কতা কবার নাগিলুং।

১৪ উমারলার মইন্ধে খুয়াতীয়া গঞ্জের শ্রীমতি লুদিয়া, এক জন  
ভগবান ভক্ত বেটিছাওয়া আছিলেক। উয়ায় বেগুনী রংএর  
কাপড় বেচায়। লুদিয়া হামার কতা শুনিলেক আর প্রভু উয়ার  
অন্তরের দুয়োর খুলি দিলেক, যাতে পৌলের কতা মানি নেয়।

১৫ শ্রীমতি লুদিয়া আর উয়ার বাড়ির সগায় দীক্ষা নিলেক। তার  
পাছত লুদিয়া মিনতি করি কইলেক, “তোমরা যদি মোক যীশুর  
শিষ্যা মনে করেন, তাইলে মোর বাড়িত আসিয়া থাকো।” এই  
কয়া হামারলাক জোর করিয়া বাড়ি নিয়া গেইলেক।

১৬ এক দিন হামরা স্যেলা প্রার্থনার জাগাত যাবার ধরচি, স্যেলা এক জন অপদেবতা ধরা চাকরানীর দেখা হইলেক। এই অপদেবতার সাহায্যে উয়ায় মানষিলার ভবিষ্যত বাণী কয়া দেয়। ইয়াতে উয়ার মালিকলার ভালে টাকা কামাই হবার ধরছিলেক।

১৭ এই চাকরানীটা হামার আর পৌলের পাছপাকে আসিয়া চিকরিয়া কবার নাগিলেক, “এই মানষিলা মহান ভগবানের চাকর! ইমরা তোমারলাক মুক্তির ঘাটা জানে দিবার ধরচে।”

১৮ স্যেলা দিন থাকি চাকরানীটা এই নাকান কবার নাগিলেক। পাছত এক দিন পৌল বিরক্ত হয়। অপদেবতাটাক কইলেক, “রাজা যীশুর নামে মুই তোক আদেশ করির ধরচুং, উয়ার ভিতির। থাকি বিরিয়া যা।” স্যেলায় স্যেলায় অপদেবতাটা বিরি গেইলেক।

১৯ কিন্তুক চাকরানীর মালিকলা দেখিলেক যে, উমার টাকা কামাই করির ঘাটা বন্ধ হয়। গেইলেক। এই বাদে উমরা পৌল আর শিলাসক ধরি নিয়া গঞ্জের শাসনকর্তালার ঐটে টানি নিয়া গেইলেক।

২০ মালিকলা শাসনকর্তালাক কইলেক, “এই মানষিলা হামার গঞ্জত গন্ডগোল নাগেয়া দিচে। হামরা রোমীয় আর উমরা যিহুদী।

২১ রোমীয় হয়। যেইলা নিয়ম নীতি পালন করা মানা আছে সেইলায় উমরা প্রচার করির ধরচে।”

২২ সেলো অইন্য মানষিলাও পৌল আর শিলাসের বিরুদ্ধে খেপি যায়া মারির চাইলেক। গঞ্জের শাসনকর্তালা উমারলার দেহার কাপড় খসে ফ্যেলেয়া নাটি দিয়া ডাঙের আদেশ দিলেক।

২৩ উমারলাক খুব জোরে জোরে ডাঙেয়া জেলত ভরে থুইলেক। আর পাহারাদারক ভাল করি পাহারা দিবার কইলেক।

২৪ পাহারাদার এই আদেশ পায়া জেলের একেবারে ভিতরার ঘরত ঢুকিয়া থুইয়া উমারলার ঠেংয়ত খুটার বেড়ি দিয়া আটকে থুইলেক।

২৫ সেলো মইন্ধো রাতি পৌল আর শিলাস ভগবানেরটে প্রার্থনা করিয়া উয়ার গুন-কীত্তন করির ছিলেক। অইন্য বন্দিলা কান পাতিয়া উমারলার গুন-কীত্তন শুনির নাগিলেক।

২৬ এমন সমায় হঠাৎ খুব বড় একটা ভৈচাল হইলেক। ইয়াতে জেলখানার ভিটি কাপিয়া উঠিলেক। সেলোয় সেলোয় সউগ দুয়ার হুসকি গেইলেক, আর বন্দীলার খুটার বেড়ি খসিয়া পড়িলেক।

২৭ ইয়াতে পাহারাদারের নিন ভাঙি গেইলেক আর জেলখানার সউগ দুয়ার খোলা দেখিয়া মনে করিলেক সউগ বন্দিলা পালে গেইচে। এই বাদে ছোরা নিয়া আত্ম হত্যা করির চাইলেক।

২৮ কিন্তুক পৌল চিকরিয়া কইলেক, “তুই নিজে নিজের জীবন ক্ষতি করিস না। হামরা সগায় এটেকোনা আছি।”



২৯ সেলো পাহারাদারটা অইন্য এক জনক বাতি আনির কয়া নিজেই ভিতিরাত দৌড়ি গেইলেক। আর কাপিতে কাপিতে পৌল আর শিলাসের আগ-পাকে উবুর হয় পড়িলেক।

৩০ তার পাছত উমাক দুই জনাক বায়রাত আনিয়া কইলেক, “মানিগুনীর ঘর! পাপ থাকি মুক্তি পাবার বাদে মোক কি করির নাগিবে?”

৩১ উমরা কইলেক, “তুই প্রভু যীশুক বিশ্বাস করেক তাতে তুই আর তোর পরিবার মুক্তি পাবে।”

৩২ ইয়ার পাছত পাহারাদারের বাড়ি যায়া পৌল আর শিলাস উয়াক আর উয়ার পরিবারের মানষিলাক প্রভুর বাইক্য শুনাইলেক।

৩৩ সেলোয় সেলোয় পাহারাদারটা পৌল আর শিলাসের কাটা যাওয়া জাগালা ধুইয়া যতন করিলেক। উয়ায় আর উয়ার পরিবারের সগায় দীক্ষা নিলেক।

৩৪ তার পাছত নিজের বাড়িত নিয়া যায়া উমারলাক খাবার দিলেক। আর উয়ায় ভগবানের উপরা বিশ্বাস করাতে সগায় আনন্দ করির নাগিলেক।

৩৫ পরের দিন সাকাল বেলা শাসনকর্তালা সিপাই পেয়েঠেয়া জেলের পাহারাদারক কইলেক, “ঐ মানষিলাক ছাড়ি দেও।”

৩৬ সেলো জেলের পাহারাদার পৌলক যায়া কইলেক, “শাসনকর্তালা তোমারলাক ছাড়ি দিবার কয়া পেয়েঠাইচে। তোমরা

এলা শান্তিতে চলি যাও।”

৩৭ কিন্তুক পৌল কইলেক, “হামরা রোমের নাগরিক হওয়া সত্বেও নিয়ম মতন বিচার না করিয়া সগারে আগত হামাক ডাঙেয়া জেলত থুইলেক। এলা কি শাসনকর্তালা গোপনে জেল থাকি বাইর করি দিবার চায়? না, সেইটা হবার পায় না! উমরালা নিজে আসিয়া জেলের বায়রাত হামাক নিয়া যাবার নাগিবে।”

৩৮ এই কতা শুনিয়া সিপাইলা যায়া শাসনকর্তালাক খবর দিলেক। রাজ্যপাল যেলো শুনিলেক যে, পৌল আর শিলাস রোমীয় সেলা উমরা ভয় খাইলেক।

৩৯ তার পাছত শাসনকর্তালা আসিয়া পৌল আর শিলাসেরটে কাউলা-কাউলি করি ক্ষমা চাইলেক। আর জেলখানার বায়রাত আনিয়া গঞ্জ ছাড়ি চলি যাবার বাদে মিনতি করিলেক।

৪০ পৌল আর শিলাস জেলখানার বায়রাত আসিয়া লুদিয়ার বাড়ি গেইলেক। ওটেকোনা গুরুভাইলার সাথত দেখা হইলেক। উমারলাক উৎসাহ দিয়া গঞ্জ ছাড়ি চলি গেইলেক।

৪১ পৌল আর শিলাস আশ্চিপলি আর আপল্লোনিয়া গঞ্জের ভিতিরা দিয়া থিষলনীকী গঞ্জত গেইলেক। ওটেকোনা যিহুদীলার একটা উপাসনা ঘর আছিলেক।

২ পৌল উয়ার নিয়ম মত ওই উপাসনা ঘরত গেইলেক। পর পর তিনটা জিরানের দিন উমারলার সাথত পবিত্র শাস্ত্র আলোচনা

করিলেক।

৩ উয়ায় মানষিলাক বুঝিয়া দিয়া প্রমাণ করি দিলেক যে, বাছাই করা রাজাটার কষ্ট ভোগ করা, মরণক জয় করি বত্তি ওঠা দরকার আছিলেক। পৌল কইলেক, “ঐ যীশুর কতা মুই তোমারলারটে প্রচার করিচুং, সেই যীশুই হইলেক বাছাই করা রাজা।”

৪ এই কতা শুনিয়া উমারলার মইদ্বো থাকি কয়জন যিহুদী বিশ্বাস করিয়া পৌল আর শিলাসের সাথত যোগ দিলেক। আরো মেয়ো ভগবান ভক্ত গ্রীক মানষি, কয়জন মানিগুনী বেটিছাওয়াও উমার সাথত যোগ দিলেক।

৫ কিন্তু যিহুদী মানষিলা পৌল আর শিলাসের উপরা হিংসা করিয়া বাজার থাকি কয়জন বেয়া মানষি আনিয়া এক সাথে দল বান্দিয়া গঞ্জত গন্ডগোল নাগে দিলেক। পৌল আর শিলাসক খুজিয়া ভিড়ের মানষিরটে আনির বাদে যাসোনের বাড়ি আক্রমণ করিলেক।

৬ কিন্তুক উমরানা পৌল আর শিলাসক না পায়া যাসোন আর কয়জন গুরু ভাইয়োক টানি গঞ্জের-শাসনকর্তালারটে নিয়া যায়া চিকরিয়া কবার নাগিলেক যে, “যেই মানষিলা গোটায় দুনিয়া তোলপাড় করি তুলিচে, উমরানা এটেকোনাও আসিচে।

৭ যাসোন উমারলাক নিজের বাড়িত জাগা দিয়া সেবা-যতন করিচে আর উমরা সগায় মহারাজার আদেশ অমান্য করিয়া কয়া

বেড়ের ধরচে, যীশু নামে আরো এক জন রাজা আছে।”

৮ উমরানা এইলা কতা কয়া শাসনকর্তালাক আর গঞ্জের মানষিলাক অস্থির করি তুলিলেক।

৯ কিন্তুক শাসনকর্তালা জামিনের টাকা নিয়া হাসোন আর অইন্য গুরু ভাইলাক ছাড়ি দিলেক।

১০ রাতি হইতে কালে গুরুভাইলা পৌল আর শিলাসক বিরয়া গঞ্জত পেঠেয়া দিলেক। সেলো উমরানা ঐটে হাজির হয়। যিহুদীলার উপাসনা ঘরত গেইলেক।

১১ থিষলনীকী গঞ্জের যিহুদীলার থাকি বিরয়া গঞ্জের যিহুদী মানষিলা খোলা মনের মানষি আছিলেক। উমরানা খুব আগ্রহের সাথে ভগবানের বাইক্য শুনিয়া মানি নিলেক। পৌল যেইলা কতা কইচে, ঐলা কতা সচাং কি না জানিবার বাদে প্রতিদিন শাস্ত্র ঘাটির নাগিলেক।

১২ মেয়ো যিহুদী মানষির নগত মানিগুনী গ্রীক বেটিছাওয়া আর বেটাছাওয়াও বিশ্বাস করিলেক।

১৩ কিন্তুক থিষলনীকীর যিহুদী মানষিলা যেয়ো শুনিলেক যে, পৌল বিরয়া গঞ্জত ভগবানের কতা প্রচার করির ধরচে, সেলো উমরানা ওটেকোনা যায়। ওটেকার মানষিলাক উসকি দিয়া গন্দগোল নাগেয়া দিলেক।

১৪ ওটেকার গুরুভাইলা সেলোয় সেলোয় পৌলক সাগরের পারত পেঠেয়া দিলেক। শিলাস আর তীমথিয় কিন্তুক বিরয়া

গঞ্জত রয়া গেইলেক।

১৫ যায় যায় পৌলক সাথত নিয়া যাবার ধরছিলেক, উমরালা উয়াক এথেন্স গঞ্জত আনিলেক। পৌল মানষিলাক কইলেক, “তোমরা ফিরি যায়া শিলাস আর তীমথিয়ক মোর এইটে আসির কন।” সেলো উমরালা এই কতা শুনিয়া বিরয়া গঞ্জত ফিরিয়া গেইলেক।

১৬ পৌল সেলো এথেন্স গঞ্জত শিলাস আর তীমথিয়ের বাদে বাচে আছিলেক, সেলো দেখিলেক ওই গঞ্জটাত নানা নাকানের দেব-দেবীর মূর্তি দিয়া ভরি গেইচে। এই দেখিয়া উয়ার মন অস্থির হইলেক।

১৭ উয়ায় উপাসনা ঘরত যিহুদী মানষি আর ভগবান ভক্ত গ্রীক মানষিলাৰ সাথত আলোচনা করির নাগিলেক। আর বাজার আইসা মানষিলাৰ সাথতও দিনের পর দিন আলোচনা করিতেই থাকিলেক।

১৮ সেলো ইপিকুরেয় আর স্তোয়িকীয় দলের কয়জন পন্ডিত মানষি পৌলের সাথত তর্ক জুড়ি দিলেক। পৌল যীশু আর উয়ার মরণ থাকি বত্তি উঠার ভাল খবর প্রচার করির ধরছিলেক। এই বাদে কাণ্ডো কাণ্ডো কইলেক, “এই ভাকারু মানষিটা কি কবার চায়?” আরো কাণ্ডো কাণ্ডো কইলেক, “উয়ায় মনে হয় বিদেশী দেব-দেবীর কতা প্রচার করির ধরচে।”

১৯ স্যেলা ওই পন্ডিত মানষিলা পৌলক আরেয়পাগ নামে পাহাড়ের ওটেকোনা মহাসভাত আনিলেক। উমরালা পৌলক পুছিলেক, “তুই যে নয়া শিক্ষা দিবার ধরচিস, সেইটা কি? হামারলাক কঃ!

২০ তুই যে কতালা কবার ধরচিস, সেই কতালা কানত অচানক নাগে! এই কতালার মানে কি? সেইলা জানিবার বাদে হামারলার ইচ্ছা হইচে।”

২১ ক্যেনেনা এথেন্স গঞ্জের সউগ মানষি আর ওটেকার বসবাসকারী বিদেশী মানষিলা খালি নয়া নয়া বিষয় নিয়া আলাপ করি সমায় কাটায়।

২২ স্যেলা পৌল আরেয়পাগের পাহাড়ের ওটে মহাসভাত খাড়া হয় কইলেক, “এথেন্স গঞ্জের মানষিলা শোন! মুই দেখির ধরচুং যে, তোমরালা সউগলাতেই দেবতার ভক্ত।

২৩ ক্যেনেনা মুই ঘুরি বেড়েবার সমায় তোমারলার উপাসনার জিনিসলা দেখিতে দেখিতে এমন একটা পাঠ দেখির পালুং, যার উপরা নেখা আছে, ‘অজানা দেবতার বাদে।’ তোমরালা না জানিয়া যার ভজনা করির ধরচেন, মুই উয়ারে কতা তোমারলারটে প্রচার করিম।

২৪ “এই ভগবান, যায় এই দুনিয়া আর দুনিয়ার সউগ কিছু সিদ্ধজন করিচে, উয়ায় স্বর্গ-মর্ত্যের পরম প্রভু। উয়ায় মানষির তৈয়ারি কোনো মন্দিরত না রয়।

২৫ উয়ার কোন অভাবও নাই, এই বাদে মানষির হাত থাকি পূজা নিবার দরকারও নাই। কেনেনা উয়ায় মানষির জিউ, প্রাণবায়ু আর যেইলা দরকার সউগে দান করে।

২৬ ভগবান একনা মানষি থাকিয়া গোটায় মানব জাতির সিদ্ধজন করিচে, আর গোটায় দুনিয়া মানব জাতিক বসবাস করির দিচে। মানষি কোটে কোন সমায় বাস করিবে এটা উয়ায় ঠিক করি থুইচে।

২৭ ভগবান চায় যে, মানব জাতি যেনে উয়াক খোজে, আর হবার পায় খুজিতে খুজিতে উয়ার নাগাল পায়। কিন্তুক আসলে উয়ায় হামারলার কাণ্ডোরো থাকি দূরত না রয়, বগলতে আছে।

২৮ কেনেনা উয়ার শক্তিতে হামরালা জীবন কাটাই, চলাফিরা করি, আরো বত্তি আছি। তোমারলার কয়জন কবিও কইচে যে, হামরালা উয়ার বংশধর।

২৯ “হামরালা যদি ভগবানের বংশ হই, তাইলে সোনা-রুপা, শিল দিয়া মানষির কল্পনায় খোদাই করা জিনিসোক ভগবান মনে করা হামারলার উচিত না হয়।

৩০ আগের কালের মানষিলা অজানা বুলিয়া ভগবান উমাক দোষ অনুসারে দোষ দেয় নাই। কিন্তুক এলা সউগ জাগার সউগ মানষিলাক পাপের ঘাটা থাকি মন ফিরিবার আদেশ দিচে।

৩১ উয়ায় একটা দিন ঠিক করি থুইচে, যেদিন উয়ার বাছাই করা মানষিক দিয়া এই দুনিয়ার ন্যায় বিচার করিবে। আর যীশুক মরণ

থাকি বত্তে তুলিয়া সগাকে প্রমাণ করি দিচে যে, উয়ায় সেই বাছাই করা মানষিটা।”

৩২ মরণ থাকি বত্তি উঠির কতা শুনিয়া উমার মইন্ধো থাকি কাণ্ডো কাণ্ডো টিটকারি করিলেক, কিন্তুক কাণ্ডো কাণ্ডো কবার নাগিলেক, “হামরা এই বিষয় আরো শুনিমু।”

৩৩ সেলো পৌল উমারলারটে থাকি চলি গেইলেক।

৩৪ উমারলার মধ্যে কয়জন বিশ্বাস করিয়া পৌলের সাথত যোগ দিলেক। উমারলার মইন্ধে হইলেক মহাসভার সদস্য শ্রী দিয়নুষিয়। আর উয়ার সাথত শ্রীমতি দামারী, আরো কয়জন আছিলেক।

১৮ পাছত পৌল এথেন্স গঞ্জ থাকি বিদায় নিয়া করিন্ত গঞ্জত আসিলেক।

২ ঐ গঞ্জত পন্তীয় প্রদেশের আকিলা নামে এক জন যিহুদী মানষির সাথত উয়ার দেখা হইলেক। কয় দিন হইলেক উয়ায় নিজের বউ প্রিক্সিল্লাক সাথত নিয়া ইতালী থাকি আসছিলেক। কেনেনা রোমের মহারাজা ক্লোদিয়, সউগ যিহুদীলাক রোম গঞ্জ থাকি চলি যাবার হুকুম দিছিলেক।

৩ আকিলা আর প্রিক্সিল্লা পৌলের নাকান তাম্বু বানা ব্যবসায়ী আছিলেক। এই বাদে পৌলও উমার সাথত থাকিয়া ঐ কাম করির নাগিলেক।



৪ সউগ জিরানের দিন উপাসনা ঘরত যায়া যিহুদী আর গ্রীক মানষিলারটে যীশুর সমন্ধে আলোচনা করিয়া উমারলার মন জয় করির চেষ্টা করির নাগিলেক।

৫ শিলাস আর তীমথিয় ম্যাসিডোনিয়া থাকি আইসার পাছত পৌল সদায় দিনে খালি ভগবানের বাইক্য প্রচার করির নাগিলেক। যীশুই যে বাছাই করা রাজা, এই সাক্ষী যিহুদীলাক দিবার ধরছিলেক।

৬ কিন্তু যিহুদী মানষিলা পৌলক গালি দিয়া নিন্দা অপমান করির নাগিলেক। পৌল সেয়া নিজের কাপড়-চোপড়ের ধূলা ঝাড়িয়া উমারলাক কইলেক, “তোমারলার অক্তের দায়, তোমারলার মাথার উপরাত থাকুক, মোর কোন দোষ নাই। এলা থাকি মুই অযিহুদী মানষিলার ঐটে যাইম।”

৭ ওটে থাকি পৌল, তিতিয় যুষ্ট নামে এক ভগবান ভক্তের বাড়িত সোন্দাইলেক। উয়ার বাড়িটা আছিলেক উপাসনা ঘরের বগলত।

৮ উপাসনা ঘরের নেতা ক্রীস্প আর উয়ার পরিবারের সগায় যীশুক বিশ্বাস করিলেক। আর করিন্থীয়লার মইন্ধো থাকি মেয়া মানষি পৌলের কতা শুনি বিশ্বাস করিয়া দীক্ষা নিলেক।

৯ এক দিন রাত্রি বেলা প্রভু যীশু পৌলক দেখা দিয়া কইলেক, “তুই ভয় না খাইস, চুপ করি না রইস, কতা কয়া যা।

১০ মুই তোর নগত আছং। তোক আক্রমণ করি কাণ্ডো ক্ষতি করির পাবে না, কেনেনা এই গঞ্জত মোর মেয়া ভক্ত আছে।”

১১ আর এই বাদে পৌল দেড় বছর থাকিয়া ঐ গঞ্জত রয়া ভগবানের বাইক্য শিক্ষা দিলেক।

১২ যেহেতু শ্রী গাল্লিয়ো, গ্রীস দেশের রাজ্যপাল হইলেক, সেহেতু যিহুদীরা জোট বান্দিয়া পৌলের বিরুদ্ধে বিচারের বাদে রাজ্যপালেরটে ধরি আনিয়া কইলেক,

১৩ “এই মানষিটা আইন-কানুনের বিরোধীতা করিয়া ভগবানের ভজনা করির বাদে মানষিলাক কু-বুদ্ধি দিবার ধরচে।”

১৪ কিন্তু পৌল কতা কবার চাইতে কালে, রাজ্যপাল গাল্লিয়ো যিহুদী মানষিলাক কইলেক, “এই মানষিটার যদি দারুন অপরাধ বা আসল কোন দোষ থাকিলেক হয়, তাহিলে তোমারলার কতা শোনা ঠিক হইলেক হয়।

১৫ কিন্তু কতা বা নাম বা তোমারলার সমাজের আইন-কানুন সমন্ধে প্রশ্ন যেইলা থাকে, তাহিলে তোমরালায় উয়ার বিচার কর। মুই ঐ নাকান বিষয়ের বিচারকর্তা হবার চাং না।”

১৬ সেহেতু রাজ্যপাল যিহুদী মানষিলাক আদালত থাকি খ্যেদেয়া দিলেক।

১৭ তার পাছত উমরালা উপাসনা ঘরের কর্তা শ্রী সোস্ট্রিনিক ধরিয়া আনিয়া আদালতের আগ-পাকে ডাঙের নাগিলেক, কিন্তুক রাজ্যপাল গাল্লিয়ো ঐ বিষয়োত মন দিলেক না।

১৮ আর এদিয়া পৌল করিন্থ গঞ্জত মেহো দিন কাটেবার পাছত গুরুভাইলারটে থাকি বিদায় নিলেক। আকিলাক আর প্রিক্সিল্লাক

সাথত নিয়া জল জাহাজত করিয়া সুরিয়া দেশ চলি গেইলেক।  
পৌল যিহুদী নিয়ম মতন কিংক্রিয়া বন্দরত মাথা নাড়িয়া  
করিলেক, কেনেনা উয়ায় মানা-চিনা করিচিলেক।

১৯ পাছত উমরালা ইফিষ গঞ্জত পৌছিয়া আক্সিলাক আর  
প্রিঞ্চিল্লাক ওটেকোনা থুইলেক। সেলো পৌল উপাসনা ঘরত  
সোন্দেয়া যিহুদী মানষিলার সাথত শাস্ত্র আলোচনা করির  
নাগিলেক।

২০ উমরালা পৌলক আরো কয় দিন উমারলার সাথত রবার  
বাদে আন্দার করিলেক, উয়ায় কিন্তুক রাজি হইলেক না।

২১ উমারলারটে বিদায় নিয়া কইলেক, “ভগবানের যদি ইচ্ছা হয়,  
তাইলে আরো তোমারলারটে মুই ফিরি আসিম।” সেলো উয়ায়  
জাহাজত করিয়া ইফিষ থাকি চলি গেইলেক।

২২ পৌল কৈসরিয়া পৌছিয়া জাহাজ থাকি নামিয়া যিরুশালেম  
গঞ্জত গেইলেক। আর ঐটে খ্রীষ্টিয় সমিতির মানষিলার মঙ্গল  
কামনা করিয়া নিজের জাগা আন্তিয়খিয়াত চলি গেইলেক।

২৩ ওটেকোনা কয় দিন কাটেবার পাছত পৌল গালাতীয়া আর  
ফরুগিয়া দেশ যাত্রা করিলেক। নানা নাকান জাগা ঘুরি বেয়েয়া  
সউগ শিষ্যলার বিশ্বাস আরো শক্তিশালী করি তুলিলেক।

২৪ আপল্লো নামে এক জন যিহুদী মানষি ইফিষ গঞ্জত  
আসিলেক। উয়ার বাড়ি আছিলেক আলেক্সান্দ্রীয়া গঞ্জত। উয়ায়  
শাস্ত্র জানা এক জন পন্ডিত মানষি আর ভাল বক্তা আছিলেক।

২৫ প্রভুর ঘাটার বিষয় শিক্ষা পায়া আত্মার শক্তি দিয়া উয়ায় যীশুর সমন্ধে নির্ভুল শিক্ষা দিছিলেক। কিন্তু উয়ায় খালি মহাপুরুষ যোহনের দীক্ষার বিষয়েই জানিছিলেক।

২৬ আপল্লো খুব সাহস করিয়া উপাসনা ঘরত প্রচার করির নাগিলেক। প্রিঙ্কিল্লা আর আকিলা, আপল্লোক বাড়িত ডেকে আনিয়া ভগবানের ঘাটার বিষয় আরো ভাল করি বুঝিয়া দিলেক।

২৭ তার পাছত যেলা আপল্লো গ্রীস দেশত যাবার চাইলেক, সেলা শিষ্য ভাই বইনিলা উয়াক উৎসাহ দিলেক। উমরা আখায়াতের শিষ্যলোক চিঠি নেখিলেক যাতে আপল্লোক মানি নেয়। আপল্লো ওটেকোনা পৌছিয়া যায় যায় ভগবানের দয়াতে শিষ্য হইচে উমারলাক খুব উপকার করিলেক।

২৮ কেনেনা আপল্লো সগার আগত যিহুদীলার সাথত আলোচনা করির সমায় শাস্ত্র থাকি প্রমাণ করিলেক, যীশুই সেই বাছাই করা রাজা। ইয়াতে যিহুদীলা কোন উত্তর দিবার পারিলেক না।

২৯ আপল্লো যেলা করিন্থ গঞ্জত আছিলেক পৌল সেলা এশিয়া প্রদেশের পাহাড়ি অঞ্চলের মইদ্রো দিয়া ইফিষ গঞ্জত আসিলেক। ঐটেকোনা পৌল, কয়জন শিষ্যের দেখা পাইলেক।

৩ উমারলাক পুছিলেক, “তোমরালা প্রভু যীশুর শিষ্য হয়া কি পবিত্র আত্মা পাইচেন?” উমরালা কইলেক, “পবিত্র আত্মা যে আছে, এই কতা তো হামরা কোন দিনও শুনি নাই।”

৩ পৌল কইলেক, “তাইলে তোমরালা কেংকরি দীক্ষা নিচেন?”  
সেয়ো শিষ্যলো কইলেক, “মহাপুরুষ যোহন যেই নাকানের দীক্ষা দেয়।”

৪ পৌল কইলেক, “যোহন তো পাপ থাকি মন ফিরিবার বাদে জল দিয়া দীক্ষা দিছিলেক। যোহন মানষিলাক কইচিলেক, মোর পাছত যায় আসিবে উয়ায় যীশু, উয়াক বিশ্বাস করিবেন।”

৫ শিষ্যলো এই কতা শুনিয়া প্রভু যীশুর নামে দীক্ষা নিলেক।

৬ পৌল উমারলার উপরা হাত খুইতে কালে পবিত্র আত্মা উমারলার উপরাত নামি আসিলেক। আর অজানা ভাষাত কতা কবার আরো ভাববাণী কবার নাগিলেক।

৭ উমরা মোট বারো জন বেটাছাওয়া আছিলেক।

৮ পাছত পৌল তিন মাস ধরি উপাসনা ঘরত যায়া খুব সাহস করিয়া ভগবানের শাসন ব্যবস্থা সমন্ধে মানষিলাক বুঝি দিবার চেষ্টা করিলেক।

৯ কিন্তুক উমারলার মইন্ধো থাকি কয়জনার মন পাষান হয়। পৌলের কতা বিশ্বাস করির চাইলেক না। যীশুর ঘাটার বিরুদ্ধে নিন্দা করির নাগিলেক। সেয়ো পৌল উপাসনার মইন্ধো থাকি শিষ্যলোক যুদা করি নিয়া চলি গেইলেক। আর উমরা শ্রী তুরান্নের ডারি ঘরত সউগ দিন যুক্তি দিয়া শাস্ত্র আলোচনা করির নাগিলেক।

১০ এই নাকান করি দুই বছর চলি গেইলেক। এশিয়া প্রদেশের যিহুদী জাতি আর গ্রীক জাতির মানষিলা সগায় প্রভু যীশুর সমন্ধে জানির পাইলেক।

১১ পৌলক দিয়া ভগবান নানা নাকান অচানক কাম করির নাগিলেক।

১২ পৌলের ব্যবহার করা গামছা, দেহার কাপড়-চোপড়, রুগীর দেহাত নাগাইতে কালে অসুখ আর পিচাশ আত্মালাও ছাড়ি পালায়।

১৩ কয়জন ঘুরি বেড়া যিহুদী কবিরাজ, অপদেবতা ধরা মানষিলার বগলত প্রভু যীশুর নাম জপ করিয়া কবার নাগিলেক, “পৌল যে যীশুর সমন্ধে প্রচার করে, সেই যীশুর নামে কবার ধরচি, উমারলার ভিত্তি থাকি বিরিয়া যা।”

১৪ উমারলার মইন্ধে স্কিবা নামে এক জন যিহুদী প্রধান বামনের সাত জন বেটাও একে নাকান করির ধরছিলেক।

১৫ এক দিন অপদেবতাটা ঐ সাত জনাক কইলেক, “মুই যীশুক জানং, আর পৌলক চেনং কিন্তুক তোমরা কায়?”

১৬ এই কতা কয়া অপদেবতা ধরা মানষিটা উমারলার উপরাত ঝাপে পড়িয়া এমন শক্তি দেখাইলেক যে উমরা চোট পায়া ন্যাংটা হয়া বাড়ি ছাড়ি পালেয়া গেইলেক।

১৭ এদিয়া ইফিষের যিহুদী আর গ্রীক জাতির মানষিলা সগায় জানির পায়া ভয় খায়া আরো প্রভু যীশুর গুণগান করির

নাগিলেক।

১৮ প্রভু যীশুক যায় যায় বিশ্বাস করিচিলেক, তায় তায় অপকর্মের ভুল সগারে আগত স্বীকার করি নিলেক।

১৯ যায় যায় যাদু খেলা দেখে বেড়ায়, উমরা যাদু মন্ত্রের বই-খাতা একটে করিয়া সগারে আগত ছোবা দিলেক। ঐ বইলার দাম হিসাব করিয়া দেখিলেক পঞ্চাশ হাজার রূপার টাকার সমান।

২০ এই নাকান করি প্রভু যীশুর কতা চাইরো পাকে ছড়িয়া পড়িলেক, আর মানষিলার ভিতরিত খুব কাম করির নাগিলেক।

২১ এই ঘটনালা ঘটবার পাছত, পৌল ম্যাসিডোনিয়াতে আর গ্রীস দেশ দিয়া যিরুশালেম যাবার মনস্থির করিলেক। উয়ায় কইলেক, “ঐটে থাকি মুই রোম রাজ্যত যাইম।”

২২ আর যায় যায় পৌলের কামত ঢোকা দিবার ধরছিলেক, উমারলার মইন্ধো থাকি তীমথিয় আর ইরাস্ত নামে দুইজনক ম্যাসিডোনিয়াত পেয়ে দিলেক। পৌল নিজে কয় দিন এশিয়াত রইলেক।

২৩ সেই সমায় যীশুর মুক্তির ঘাটার বিষয় নিয়া ইফিষ গঞ্জত মহা গন্ডগোল দেখা দিলেক।

২৪ ঐটে দীমীত্রিয় নামে এক জন বানিয়া আছিলেক। উয়ায় ছোট ছোট করি দেবী দীয়ানার মন্দির রূপা দিয়া বানাইলেক, এই বাদে ওটেকার মিস্ত্রিলার খুব লাভ হইছিলেক।

২৫ এক দিন দীমীত্রিয় ঐ মিস্ত্রীলোক একটে ডেকেয়া কইলেক,  
“ভাইয়ের ঘর তোমরা তো জানেন, এই ব্যবসা দিয়া হামারলার  
বেশ ভাল আয় হয়।

২৬ কিন্তু তোমরা পৌলের কান্ড-কিৰ্তি দেখির আর শুনিরও  
ধরচেন। খালি ইফিষ গঞ্জত না হয় গোটায় এশিয়া প্রদেশের  
মেলা মানষিক ভুল ঘাটাত নিয়া গেইচে। উমরা উয়ার কতা  
শুনিয়া বিশ্বাস করে, হাত দিয়া বানা দেবতালা দেবতা না হয়।

২৭ এই বাদে যে খালি হামারলার ব্যবসার সুনাম নষ্ট হয় যাবে  
সেটা না হয়। হামারলার মহাদেবী দীয়ানার মন্দিরলোক সগায় তুচ্ছ  
মনে করিবে। গোটায় এশিয়াত এমন কি গোটায় দুনিয়ার  
মানষিলা যে দেবীর পূজা-পার্বন করে, তার কোন সুনাম থাকিবে  
না।”

২৮ এই কতা শুনতে কালে সগায় রাগে অগুন হয় চিকিরিয়া  
কবার নাগিলেক, “ইফিষ বাসীর দীয়ানায় মহাদেবী!”

২৯ তার পাছত গোটায় গঞ্জত গন্ডগোল দেখা দিলেক।  
ম্যাসিডোনিয়ার শ্রী গাইয় আর আরিষ্টার্ক নামে দুই জন পৌলের  
সঙ্গী যাবার নাগছিলেক, মানষিলা ঐ দুইজনাক ধরিয়া  
স্টেডিয়ামত নিয়া গেইলেক।

৩০ পৌল সেলা মানষিলার বগলত যাবার চাইলেক, কিন্তু  
শিষ্যলা যাবার দিলেক না।



৩১ এশিয়াত কয়জন রাজকর্মচারী পৌলের সখা আছিলেক, উমরানা আন্দার করিয়া খবর পেয়ে দিলেক যে, পৌল যেন ঐ সভাত যায়া নিজের বিপদ ডেকে না আনে।

৩২ ঐ সভাত হৈ-হাল্লা শুরু হইচে বুলিয়া নানান মানষি নানান কতা কয়া চিকরির ধরচে। বেশীর ভাগ মানষি জানে না যে উমরানা কেনে সভাত আসচে!

৩৩ কয়জন যিহুদী শ্রী আলেক্সান্দারক সভাত হাজির করিলেক উয়াক কিছু কবার বাদে। সেয়া আলেক্সান্দার নিজের পক্ষে কতা কবার জইনে মানষিলাক হাতের ইশারায় চুপ করির চেষ্টা করিলেক।

৩৪ কিন্তু যেলা মানষিলা জানির পাইলেক যে, উয়ায় এক জন যিহুদী, সেয়া সগায় মিলিয়া এক সুরে পেরায় দুই ঘণ্টা চিকরিতে থাকিলেক, “ইফিষ বাসীর দেবী দীয়ানায় হইলেক মহাদেবী।”

৩৫ শেষত ঐ গঞ্জের বিশেষ সরকারী কর্মচারী মানষিলাক বিত করেয়া কইলেক, “ইফিষের মানষিলা, এই কতা সগায় জানে যে, মহাদেবী দীয়ানার মন্দির আর দ্যাওয়া থাকি উয়ার যে পবিত্র শিল পড়ছিলেক, ঐলার রক্ষাকারী হইলেক ইফিষের বাসী।

৩৬ তাইলে সচাং কতা তো অস্বীকার করা যায় না, এই বাদে তোমারলার বোকার নাকান কাম না করিয়া চুপ করি রওয়ায় ভাল।

৩৭ কেনেনা তোমরালা যে দুই জন মানষিক ধরি আনিচেন, উমরা তো মন্দিরের কোনো কিছুই চুরি করে নাই, আর হামারলার মহাদেবীক নিন্দাও করে নাই।

৩৮ দীমীত্রিয় আর উয়ার সঙ্গী মিস্ত্রিলা তোমারলার যদি কাঙোরো বিরুদ্ধে কোন অভিযোগ দাখিল করির চান, তাইলে আদালত খোলা আছে, শাসনকর্তালাও আছে। তোমরা মামলা দাখিল করির পারেন।

৩৯ কিন্তু তোমারলার যদি অইন্য কোন অভিযোগ থাকে, সেটা নিয়ম মানিয়া এই সভাত বিচার করা হবে।

৪০ কেনেনা আজি এই সভাত যদি কোন গন্ডগোল হয়, তার সউগ দোষ হামারলার উপরাত আসিয়া পড়িবার ভয় আছে। এই ঘটনা যদি হয়, হামরা এই গন্ডগোলের কারন দেখের পামো না। কেনেনা মানষিলাক ইয়ার উত্তর দিবার কোনো উপায় হামারলার রবে না।”

৪১ আর এইলা কতা কয়া সরকারী কর্মচারী সভা শেষে করিলেক।

২০ গন্ডগোল থামার পাছত পৌল শিষ্যলাক ডেকেয়া সগাকে উৎসাহ দিলেক। আর উয়ায় বিদায় নিয়া ম্যাসিডোনিয়াত যাবার বাদে যাত্রা করিলেক।

২ ম্যাসিডোনিয়ার মইন্ধো দিয়া যাবার সময় শিষ্যলোক মেলা কতা কয়া উৎসাহ দিয়া গ্রীস দেশত পৌছিলেক।

৩ ওটেকোনা তিন মাস রইলেক, যেলা পৌল জল-জাহাজত করিয়া সিরিয়া যাবার মন ঠিক করিলেক, সেলা উয়ায় জানির পাইলেক যে, যিহুদীলা উয়ার বিরুদ্ধে চক্রান্ত করির ধরচে। এই বাদে উয়ায় আরো ম্যাসিডোনিয়াত ফিরি গেইলেক।

৪ আর যায় যায় উয়ার সাথত যাবার ধরছিলেক উমরা হইলেক, বিরয়া গঞ্জের পুহের বেটা সোপাত্র, থিসলনীকী গঞ্জ থাকি আইসা আরিষ্টার্খ আর সিকুন্দু, দর্বী নগরের শ্রী গাইয় আর তীমথিয়, আরো এশিয়া থাকি আইসা শ্রী তুখিক আর ত্রফিম।

৫ ঐ মানষিলা আগত যায়া ত্রোয়া বন্দরত হামারলার বাদে বাচে আছিলেক।

৬ মুক্তি ভোজ পার্বনের পাছত হামরা ফিলিপী গঞ্জ থাকি জলপথ দিয়া পাঁচ দিনের দিন ত্রোয়া বন্দরত উমার সাথত হাজির হইলোং। আরো সাত দিন ওটেকোনা রইলোং।

৭ হাপ্তার পইলা দিন প্রভুর ভোজের বাদে হামরা একটে হইলোং। পৌল পরের দিন চলি যাবে বুলিয়া মধ্যরাতি পর্যন্ত শিষ্যলার সাথত কতা কবার নাগিলেক।

৮ হামরা তিন তালার যেই ঘরত হাজির হয় কতা কবার ধরছিলোং, সেই ঘরত মেলা বাতি আছিলেক।

৯ উতুখ নামে এক জন গাবুর চ্যেংড়া জানালার বগলত বসি আছিলেক। পৌল অনেকক্ষণ ধরিয়া কতা কবার নাগচে বুলিয়া উতুখ নিন টুপিবার নাগিলেক। উয়ায় ঘোর নিন যাওয়াতে, নিন্দেৰ ঝোকে তিন তালা থাকি উয়ায় নিচত পড়ি গেইলেক। সেলো মানষিলা উয়াক তুলিয়া দেখে মরি গেইচে।

১০ পৌল নিজে নিচত নামি আসিয়া বুকত জড়ে ধরিয়া কইলেক, “তোমরা ভয় না খান, উয়ায় এলাও বত্তা আছে।”

১১ ইয়ার পাছত পৌল উপর তালাত যায়া প্রভুর ভোজ খায়া অনেকক্ষণ ধরি রাতি ভোর পর্যন্ত আলাপ করিয়া ওটে থাকি রওনা দিলেক।

১২ মানষিলা সেই গাবুর চ্যেংড়াটাক বত্তায় উয়ার বাড়ি নিয়া গেইলেক, আর সগায় খুব খুশি হইলেক।

১৩ হামরা পৌলের আগত জল-জাহাজত চড়ি আঃস নামে বন্দর যাবার বাদে রওনা দিলং। পৌলক ঐটে থাকি তুলি নিবার মনস্থ করিলুং, কেনেনা উয়ায় স্থল পথে যাবে বুলিয়া মনস্থ করচিলেক।

১৪ যেলা পৌলের সাথত আঃস বন্দরত দেখা হইলেক, সেলো উয়াক জাহাজত তুলি নিয়া হামরা সগায় মিতুলীনী গঞ্জত আসিলোং।

১৫ ওটে থাকি জাহাজত করি পরের দিন খীয় দ্বীপের বগলত পৌছিলোং। দ্বিতীয় দিন সামস দ্বীপত অল্প সমায় রয়া, পরের দিন মিলাত গঞ্জত পৌছিলোং।

১৬ কেনেনা পৌল পঞ্চাশত্তমীর পার্বনের আগতে যিরুশালেম পৌছির বাদে উয়ার মন আকুল হইচে। উয়ায় আগতে মনস্থ করিচে, এশিয়াত কোন সমায় না কাটের বাদে ইফিষ গঞ্জত না থামিয়া যিরুশালেম যাবে।

১৭ মিলাত গঞ্জত আসিয়া পৌল ইফিষীয় সমিতির নেতালার সাথত দেখা করির বাদে ডেকেয়া আনিলেক।

১৮ যেলা উমরালা পৌলের বগলত আসিলেক, সেলা পৌল কইলেক, “মুই এশিয়াত আইসার পইলা থাকি সউগ সমায় তোমার সাথত কেংকরি দিন কাটাইচোং তোমরা জানেন।

১৯ যিহুদীলা মোর বিরুদ্ধে চক্রান্ত করিচিলেক, তাণো মুই নম্র হয়্যা চোখুর জল ফ্যেলেয়া নানা নাকান পরীক্ষার মইদ্বো দিয়া ভগবানের চাকর হয়্যা সেবা করিচুং।

২০ কোন মঙ্গল জনক কতা না কয়া চুপ করি থাকং নাই। বাড়ি বাড়ি যায়া আরো বায়রাত খোলাখুলি যীশুর ভাল খবর প্রচার করিচুং।

২১ যিহুদী আর গ্রীকলার সগাকে কইচুং, প্রভু যীশুক বিশ্বাস করিয়া পাপের ঘাটা থাকি মন ফিরিয়া ভগবানের ঘাটাত ফিরি আসির নাগিবে।

২২ “এলা মুই পবিত্র আত্মার চালনায় যিরুশালেম যাবার ধরচুং। ওটেকোনা মোর উপরাত কি কি ঘটনা ঘটিবে মুই কোনই জানং না।

২৩ কিন্তু পবিত্র আত্মা সতর্ক করিচে যে, সউগ গঞ্জত, মোক জেল খাটির নাগিবে, আরো দুঃখ-কষ্ট ভুগির নাগিবে।

২৪ কিন্তুক মোরটে মোর জীবনের কোন দাম নাই। মোর জীবনের সউগ থাকি গুরুত্বপূর্ণ বিষয় হইলেক, যে কামের ভার মুই প্রভু যীশুরটে পাচুং, উয়াতে থির থাকিয়া শেষ পর্যন্ত যাতে দৌড়ির পাং। সেই কামের ভার হইলেক ভগবানের দয়ার ভাল খবরের সাক্ষী দেওয়া।

২৫ “এলা মুই যা কবার ধরচুং, তোমরা মন দিয়া শোন। যার যারটে ভগবানের শাসন ব্যবস্থার কতা প্রচার করিচুং, উমরালা কাণ্ডে আর মোর মুখ দেখির পাবে না।

২৬ এই বাদে মুই আজি পরিস্কার করি কবার ধরচুং, কাণ্ডে যদি অমৃত জীবন না পান, তার অক্তের দায় মুই না হং।

২৭ কেনেনা ভগবান যে সউগ পরিকল্পনালা তোমারলাক জানেবার চায়, মুই সেইলা তোমারলাক জানাইচোং।

২৮ তোমরালা নিজের জইন্যে সাবধান রন, পবিত্র আত্মা তোমারলাক যে শিষ্যলার দেখাশুনা করির ভার দিচে সেই বিষয়ও সাবধান রন। কেনেনা ভগবান এই সমিতি উয়ার নিজের বেটার অক্ত দিয়া কিনিচে।

২৯ মুই জানং, মুই চলি যাবার পাছত পাজি মানষিলা ভয়ংকর ন্যেকড়া বাঘের নাকান করি তোমারলার মইন্ধোত আসিবে, আর ভগবানের শিষ্যলার ক্ষতি করিবে।

৩০ তোমারলার মইন্ধো থাকি কোনো কোনো মানষি বিরি আসিয়া, শিষ্যলাক নিজের দলত টানি নিবার বাদে উল্টা-পাল্টা কতা কবে।

৩১ এই বাদে তোমরা জাগিয়া রন। ফম কর মুই যেয়ো তিন বছর তোমারলার সাথত আছিলুং, সেয়ো দিন রাতি চোখুর জল ফেলেয়া সতর্ক করিয়া চেতনা দিচুং।

৩২ “এলা মুই তোমারলাক ভগবানের আর উয়ার বাইকে্যের হাতত সঁপে দিলুং। ভগবানের বাইক্য দয়ার কতা কয়, আর তোমারলাক গড়ি তুলির ক্ষমতা এই বাইকে্যের আছে। ঐ বাইক্য যে নাকান করি পাপ থাকি মুক্তি পাওয়া মানষিলাক চিরকালের আশুর্বাদ দেয়, ঐ নাকান করি তোমারলাকও সেই আশুর্বাদ দিবে।

৩৩ মুই কারো সোনা-রুপা, কাপড়-চোপড়ের লোভ করং নাই।

৩৪ তোমরালা ভাল করি জানেন, মোর আর মোর নিজের সঙ্গী-সাথীলার মঙ্গা দূর করির বাদে, মুই দুই হাতে কাম করিচুং।

৩৫ মুই তোমারলাক মোর জীবনের মইন্ধো দিয়া দেখেয়া দিচুং, কেয়মন করি কঠুর খাটনি করিয়া অভাবী মানষিলাক সাহায্য করির নাগিবে। এই বাদে প্রভু যীশুর এই বাইক্য ফম করা উচিত, নিজে না নিয়া, অইন্যক দান করিলে বেশী আশুর্বাদ মেলে।”

৩৬ এই কতা কয়া পৌল সগারে সাথত হাংকুড়া পাড়িয়া প্রার্থনা করিলেক।

৩৭-৩৮ উমরা সগায় কান্দির নাগিলেক, আর উয়ার মুখ দেখির  
পাবে না বুলিয়া পৌলের গালা জড়ে ধরিয়া চুমা খায়া উমরা খুব  
দুঃখ পাইলেক। আর জাহাজ পর্যন্ত আগেয়া দিবার গেইলেক।

২১ ইফিষীয়লার সমিতির নেতালারটে থাকি কষ্টে বিদায় নিয়া  
হামরা জাহাজত করি সিদা ঘাটা দিয়া কো-দ্বীপত আসিলোং।  
পরের দিন রোদঃ দ্বীপত আসিয়া, পাতারা গঞ্জত গেইলোং।

২ পাতারা গঞ্জত এমন একখান জাহাজ পাইলোং। সেই জাহাজ  
খান পাতারা গঞ্জ থাকি ফৈনীকিয়া অঞ্চল যাবে আর হামরা সেই  
জাহাজত করি যাত্রা করিলোং।

৩ হামরা যাবার সমায় সাইপ্রাস দ্বীপ দেখির পাইলোং। ঐ দ্বীপের  
বাও পাকে খুইয়া হামরা সিরিয়া দেশের সোর গঞ্জত যায়া জাহাজ  
থাকি নামিলোং। কেনেনা ওটেকোনা জাহাজ থাকি মাল-পত্র  
নামের কতা আছিলেক।

৪ ওটেকার শিষ্যলোক খুজি পায়া হামরা উমারলার ঐটে সাত  
দিন রইলোং। ওই শিষ্যলো পবিত্র আত্মায় ভরপুর হয় পৌলক  
মিনতি করিলেক যেন উয়ায় যিরুশালেম না যায়।

৫ ওই কয় দিন কাটি যাবার পাছত হামরা ওটে হাতে রওনা  
দিলোং। ওটেকার শিষ্যলো উমার বউ, ছাওয়া-ছোট নিয়া গঞ্জের  
বাইরা আসিয়া হামারলাক আগেয়া দিলেক। তার পাছত সাগরের



পারত হাংকুড়া পাড়িয়া প্রার্থনা করিয়া এক জন আরেক জনারটে থাকি বিদায় নিলোং।

৬ হামরা যেয়ো জাহাজত চড়িলোং সেয়ো উমরা বাড়ি ফিরি গেইলেক।

৭ সোর থাকি জল জাহাজত করি যাত্রা করিয়া হামরা তলিমিয়া গঞ্জত পৌছিলোং। ওটেকার গুরুভাইলার মঙ্গল কামনা করিয়া উমারলার সাথত এক দিন রইলোং।

৮ পরের দিন হামরা রওনা হয় কৈসরিয়া গঞ্জত আসিলোং। ওটেকার ভাল খবর প্রচারক ফিলিপ, উয়ায় যিরুশালেমের সমিতির ঐ সাত জনের মইদ্রে এক জন, হামরা উয়ারে বাড়িত রইলোং।

৯ ফিলিপের চাইর জন কুমারী বেটি আছিলেক। উমরা ভাববাণী কবার ধরছিলেক।

১০ হামরা উয়ার বাড়িত বেশ কয়েক দিন রবার পাছত যিহুদীয়া থাকি আগাব নামে এক জন ভাববাদী আসিলেক।

১১ উয়ায় হামারলার এটে আসিয়া পৌলের কোমরের পেড়ি খসে নিয়া নিজের হাত-ঠেং বান্দিয়া কইলেক, “পবিত্র আত্মা কবার ধরচে, যিরুশালেমের যিহুদীলা এই পেড়ির মালিকক এই নাকান করি বান্দিবে আর অযিহুদীলার হাতত দিবে।”

১২ এই কতা শুনিয়া ওটেকার গুরুভাইলা আর হামরালা পৌলক মিনতি করি কইলোং, যেনে উয়ায় যিরুশালেম না যায়।

১৩ পৌল সেলো কইলেক, “কেনে তোমরা কান্দা-কাটি করিয়া মোর মন ভাঙি দিবার ধরচেন? মুই প্রভু যীশুর বাদে যিরুশালেমত খালি বন্দী কেনে, মরিতেও রাজি আছং।”

১৪ সেলো পৌল হামারলার কতা শুনিলেক না, সেলো হামরা চুপ হয় পৰে কইলোং, “ভগবান যা চায় তা পূরণ হউক।”

১৫ কয় দিন পাছত হামরা জিনিস-পাতি গোছে নিয়া যিরুশালেম রওনা দিলোং।

১৬ হামারলার সাথত কৈসারিয়ার কয়জন শিষ্য যাবার নাগিলেক। উমরা সাইপ্রাস দ্বীপের শ্রী মেনাসন নামে এক জন মানষির বাড়িত আনিলেক। উয়ায় আছিলেক শিষ্যলার মইন্ধে পুরান শিষ্য। ইয়ার বাড়িত হামারলার রবার কতা আছে।

১৭ হামরালা যিরুশালেম পৌছিলে ওটেকার গুরুভাইলা হামারলাক আনন্দে মানি নিলেক।

১৮ পরের দিন পৌল, হামারলাক সাথত নিয়া যাকবক দেখির গেইলেক, ওটেকার সমিতির সউগ নেতালা আসিয়া হাজির হইলেক।

১৯ পৌল সেলো উমারলার মঙ্গল কামনা করিয়া, ভগবান কেংকরি উয়ার কামের মইন্ধো দিয়া অযিহুদী মানষিলাৰ ভিতরাত কাম করিচে, ঐলা একটার পর একটা বুঝিয়া দিলেক।

২০ এই কতা শুনিয়া নেতালা ভগবানের গুণগান করিয়া পৌলক কইলেক, “ভাই পৌল, তুই তো দেখির ধরচিস, যীশুর উপরা

বিশ্বাস করিয়া হাজারে হাজারে যিহুদী মানষিলা সগায় মোশির আইন-কানুন পালন করিবার বাদে খুব আগ্রহী।

২১ উমরা তোর সমন্ধে খবর শুনিচে, যে তুই না কি অযিহুদী মানষিলার ঐটে যেইলা যিহুদী বসবাস করে উমারলাক শিক্ষা দিয়া কইচিস, মোশির দেওয়া বিধান ছাড়ি দেও, ছাওয়া-ছোটোলাক ভগবানের চিন না দেন আর আইন-কানুনও মানি না চলেন।

২২ এলা কি করা যায়? উমরা তো শুনির পাবে তুই এটে আছিস।

২৩ এলা হামরা তোক যেইলা করির কমু, সেইলায় তোক করির নাগিবে। হামারলার এইটে এমন চারজন বেটাছাওয়া আছে, উমরা মানা-চিনা করিচে।

২৪ পৌল, তুই উমারলাক নিয়া যায়া উমার সাথত তুইও ছুয়া থাকি শুদ্ধি হঃ, উমারলার মাথা নাড়িয়া করির বাদে যে টাকা-পাইসা নাগিবে তা খরচা করেক। ইয়াতে সগায় জানির পাবে যে তোর সমন্ধে যেইটা শুনিচে সেইটা মিছাং আর তুই নিয়ম কানুন পালন করির ধরচিস।

২৫ কিন্তু যে অযিহুদী মানষিলা যীশুর শিষ্য হইচে, হামরা উমারলাক নেখিয়া জানেয়া দিচি যাতে উমরা ঠাকুরের পসাদ, অক্ল, গালা মোচড়েয়া মারা পশুর মসং না খায়, আর কোন ব্যভিচারও না করে।”

২৬ পরের দিন পৌল ঐ চারজনক সাথে নিয়া নিজেও শুদ্ধি হইলেক। তার পাছত উমারলাক নিয়া মন্দিরত সোন্দাইলেক আর শুচির অনুষ্ঠান কোন দিন হবে, মানে সগার বাদে পশু বলি দেওয়া কোন দিন হবে, সেটা জানেয়া দেওয়া হইলেক।

২৭ শুদ্ধি হবার সাত দিন শেষ হওয়ার আগত এশিয়া প্রদেশের যিহুদীলা পৌলক মন্দিরত দেখা পায়া ঐটেকার সউগ মানষিক উসকানি দিয়া পৌলের বিরুদ্ধে ক্ষ্যেপে তুলিলেক। উমরা পৌলক ধরিয়া চিকরিয়া কবার নাগিলেক,

২৮ “হে ইজ্রায়েলী ভাইলা! তোমরা সগায় আগেয়া আসিয়া সাহায্য কর। এই মানষিটা হামারলার জাতির বিরুদ্ধে আইন কানুনের বিরুদ্ধে এই মন্দিরের বিরুদ্ধে শিক্ষা দেয়। তাছাড়া অযিহুদী মানষিলাক দশংগতি মন্দিরত আনিয়া, এই পবিত্র জাগাখান অপবিত্র করিচে।”

২৯ কেনেনা মানষিলা আগত যিরুশালেমত পৌলের সাথে ইফিষ গঞ্জের শ্রী ত্রফিমক দেখছিলেক। উমরা এই বাদে চিন্তা ভাবনা করিছিলেক, যে পৌলেই ত্রফিমক দশংগতি মন্দিরত আনিচে।

৩০ সেলো গোটায় গঞ্জত হৈ-হাল্লা শুরু হইলেক, ওটেকার মানষিলা দৌড়ি যায়া পৌলক ধরিয়া দশংগতি মন্দির থাকি বাইরা টানিয়া আনিলেক আর সেলোয় সেলোয় দশংগতি মন্দিরের দুয়ার বন্ধ হয় গেইলেক।

৩১ এই নাকান করিয়া উমরানা পৌলক মারি ফ্যেলের চেষ্টা করিলেক। অমনে এই খবরটা রোমীয় শতপতি সেনাপতিটা শুনিলেক যে, যিরুশালেমের সউগ জাগাত হৈ-হাল্লা শুরু হইচে।

৩২ সেলোয় সেলোয় শতপতি সেনাপতি কয়জন সেনা আর শতপতিলাক সাথত নিয়া ঐ মানষিলার ঐটে দৌড়ি গেইলেক। মানষিলা উমরলাক দেখিয়া পৌলক ডাঙা-ডাঙি করা বন্ধ করিলেক।

৩৩ সেলো শতপতি সেনাপতি আসিয়া পৌলক বন্দী করিলেক আর দুইখান শিকোল দিয়া বান্দির আদেশ দিলেক। আর পুছিলেক “ইয়ায় কায়, ইয়ায় কি দোষ করিচে?”

৩৪ ইয়াতে ভিড়ের মানষিলা নানা নাকান কতা কয়া চেচেবার নাগিলেক। শতপতি সেনাপতিটা কোন কিছুই ঠিক করি বুঝির পাইলেক না। এই বাদে পৌলক সেনা ছাউনিত নিয়া যাবার হুকুম দিলেক।

৩৫ সেলো পৌল সিড়ির উপরা উঠিলেক আর উয়াক মানষিলার হাত থাকি বাঁচেবার বাদে সেনালা ঘাড়ত করি উবিয়া নিয়া যাবার নাগিলেক।

৩৬ মানষিলা পাছে পাছে যায়া চিকরিয়া কবার নাগিলেক, “উয়াক মারি ফ্যেলান!”

৩৭ সেলো উমরা, পৌলক সেনা ছাউনির ভিতির নিয়া যাবার চাইলেক, পৌল সেলো শতপতি সেনাপতিটাক কইলেক, “মুই কি

তোমাক একটা কতা পুছির পাং?”

৩৮ শতপতি সেনাপতি কইলেক, “তুই কি গ্রীক ভাষা জানিস? তাইলে তুই কি ঐ মিশরীয় জাতির মানষি, যায় কিছু দিন আগত আন্দোলন করিয়া চার হাজার সন্ত্রাসবাদীক নিয়া নিধুয়া পাথারত পালে গেইচে?”

৩৯ সেলো পৌল কইলেক, “মুই যিহুদী, কিলিকিয়া প্রদেশের তার্ষ গঞ্জের মানষি, মুই যেন-তেন গঞ্জের মানষি না হং। দয়া করি মানষিলার সাথে মোক কতা কবার অনুমতি দে।”

৪০ পৌল অনুমতি পায়া সিড়ির উপরা খারা হয়। মানষিলাক হাতের ইশারা দিয়া ঝিত করি রবার কইলেক। মানষিলা যেলা ঝিত করিলেক, সেলো উয়ায় ইব্রীয় ভাষায় ভাষন দিবার নাগিলেক।

২২ পৌল কইলেক, “হে মোর ভাইয়ের ঘর আর পিতৃ তুল্য মানষিলা, এলা মুই নিজের পক্ষে কয়টা কতা কবার চাং, তোমরা শোন।”

২ উয়ায় এলা উমার ইব্রীয় ভাষাত কতা কবার শুনিয়া, উমরাদা একেবারে চুপ হয়। সেলো কইলেক,

৩ “মুই এক জন যিহুদী। কিলিকিয়ার তার্ষ গঞ্জত মোর জন্ম কিন্তু যিরুশালেম গঞ্জত মুই বড় হইচুং। পন্ডিত গমলীয়েলের চরণের তলত বসিয়া মুই নিখুঁতিয়ার নাকান মোর চৌদ্দ পুরুষের

নিয়ম শিক্ষালাভ করিচুং। ভগবান সমক্ষে আজি তোমরা যেমন আগ্রহী, মুইও তেমন আগ্রহী ছিনুং।

৪ যায় যায় যীশু খ্রীষ্টের ঘাটাত চলির ধরছিলেক, মুই উমার উপরা নির্যাতন করিয়া মেয়ো মানষিক মারি ফেলাইচুং। বেটাছাওয়া, বেটিছাওয়ালাক ধরিয়া জেলত দিচুং।

৫ এই বিষয়ে প্রধান বামন, নেতালা মোর সাক্ষী। মুই উমারলারটে থাকি চিঠি নিয়া দামেস্ক গঞ্জের যিহুদী নেতালাক দিবার বাদে গেলুং, যাতে যিরুশালেমত যীশুর শিষ্যলোক বন্দী করি আনিয়া শাস্তি দিবার পাং।”

৬ “কিন্তু দুপর বেলা মুই যাইতে যাইতে যেয়ো দামেস্কের বগলা-বগলি পৌছিলুং, সেয়ো স্বর্গ থাকি অচমকা আলোর ঝিলিক মোর চাইরো পাকে পড়িলেক।

৭ মুই মাটিত পড়ি যায়া একটা বাণী শুনিচুং, শৌল, ‘শৌল কেনে তুই মোক অইত্যাচার করির ধরচিস?’

৮ “মুই পুছিলুং, ‘প্রভু তোমরা কায়?’ “উয়ায় মোক কইলেক, ‘মুই নাসারতের যীশু, তুই যাক অইত্যাচার করির ধরচিস।’

৯ “যায় যায় মোর সাথত আছিলেক, উমরা আলো দেখির পাইচে, কিন্তু আওয়াজ শুনির পায় নাই।

১০ “তার পাছত মুই কইলুং, প্রভু মোক কি করির নাগিবে? “প্রভু মোক কইলেক, ‘উঠিয়া দামেস্ক গঞ্জত যা। যে কামের বাদে তোক বাছাই করা হইচে ঐ কামের কতা ওটেকোনা কওয়া হবে।’

১১ আলোর ঝিলিকে মোর চোখু কানা হয় গেইচে, এই বাদে মোর সঙ্গী-সাথীলা মোক হাত ধরিয়া দামেস্কত নিয়া গেইলেক।

১২ “অননিয় নামে এক জন মানষি মোর এটে আসিলেক। উয়ায় মোশির নিয়ম-কানুন ভক্তি ভরে পালন করির ধরছিলেক। ওটেকার সউগ যিহুদী মানষিলা উয়াক সন্মান দেয়।

১৩ উয়ায় আসিয়া মোর বগলত খাড়া হয় কইলেক, ভাই শৌল, তুই দেখিবার শক্তি ফিরি পা। আর সেলোয় সেলোয় মুই দেখির পালুং।

১৪ “সেলা অননিয় কইলেক, হামার চৌদ গুষ্টির ভগবান তোক বাছাই করিচে। এই বাদে তুই উয়ার ইচ্ছা যাতে জানির পাইস আর ঐ নির্দোষ যীশু খ্রীষ্টক দেখির আর উয়ার মুখের বাণী শুনির পাইস।

১৫ কেনেনা তুই যেইলা দেখিছিস, শুনিচিস ঐলা সউগ মানষিলাটে কঃ।

১৬ এলা কেনে তুই দেড়ি করির ধরচিস? ওঠেক, দীক্ষা নে আর প্রভু যীশুর নাম ডেকেয়া তোর সউগ পাপ ধুইয়া ফেলাও।”

১৭ “তার পাছত মুই যিরুশালেমত ফিরি আসিয়া দশংগতি মন্দিরত প্রার্থনা করির ধরচিলুং, ঐ সমায় একটা দর্শন দেখির পালুং।

১৮ প্রভু যীশু মোক কইলেক, পচ-পচে ওঠেক, তুই যিরুশালেম থাকি চলি যা। কেনেনা তুই মোর বাদে যেই কতা কবার ধরচিস,



সেই কতা উমরা শুনিবে না।

১৯ “মুই কইলুং, হে প্রভু, যিরুশালেমের মানষিলা তো জানে, যায় যায় তোমাক বিশ্বাস করচিলেক, মুই সউগ উপাসনা ঘরত থাকি উমারলাক ধরি আনিয়া ডাঙেয়া জেলত ভরে থুইছিলুং।

২০ যেলা তোর সাক্ষী স্তিফানক খুন করা হইলেক, সেলা মুই সায় দিচিলুং আর খুন করাইয়ালার কাপড়-চোপড় পাহারা দিবার ধরচিলুং।”

২১ “সেলা প্রভু মোক কইলেক, তুই বহু দূরত যা, মুই তোক অযিহুদী মানষিলারটে পেঠাইম।”

২২ মানষিলা, এতক্ষণ পর্যন্ত পৌলের কতা শুনির ধরছিলেক কিন্তুক যেলা অযিহুদীলার কতা কইলেক সেলা মানষিলা খুব জোরে চিকরিয়া কইলেক, “ইয়াক এই দুনিয়া থাকি দূর করিয়া দেও। ইয়ার বত্তি থাকির কোনো অধিকার নাই।”

২৩ মানষিলা যেলা চিকরিতে চিকরিতে কাপড়-চোপড় ফেলে দিয়া দ্যাওয়ার ভিতি ধূলা উড়ির ধরছিলেক,

২৪ সেলা প্রধান সেনাপতি, পৌলক সেনা ছাউনিত নিয়া যাবার হুকুম দিলেক। আর মানষিলা কেনে চিকরির ধরচে, তা জানির বাদে পৌলক চাবুক মারিয়া জেরা করির আদেশ দিলেক।

২৫ পৌলক যেলা চাবুক মারির বাদে বান্দা হইলেক, সেলা ওটে যে শতপতি খাড়া হয় আছিলেক। পৌল উয়াক পুছিলেক, “এক

জন রোমের নাগরিকক এলাও দোষী সাব্যস্ত করা হয় নাই তাক চাবুক দিয়া মারার কি তোমারলার আইনের কাম?”

২৬ শতপতিটা এই কতা শুনিয়া প্রধান সেনাপতিটাক যায়া কইলেক, “তোমরা কি করির নাগচেন? এই মানষিটা তো রোমীয়।”

২৭ সেলো প্রধান সেনাপতিটা পৌলক কইলেক, “মোক কঃ দেখি, তুই কি রোমীয় নাগরিক?” পৌল কইলেক, “হেঁ।”

২৮ প্রধান সেনাপতিটা কইলেক, “মোর রোমীয় নাগরিক হবার বাদে মেয়ো টাকা-পাইসা খরচ হইচে।” পৌল কইলেক, “মুই জন্ম গত রোমীয় নাগরিক।”

২৯ এই কতা শুনিয়া যায় যায় জেরা করির যাবার ধরছিলেক, উমরা সেলোয় সেলোয় ফিরি যাবার নাগিলেক। প্রধান সেনাপতিটা যেলা জানির পাইলেক, উয়ায় এক জন রোমীয় নাগরিকক বান্দিচে, এই বাদে প্রধান সেনাপতিটাও ভয় খাইলেক।

৩০ পরের দিন যিহুদী মানষিলা কেনে পৌলের উপর দোষ চাপের ধরচে, তা জানিবার বাদে প্রধান সেনাপতি পৌলের বান খসে দিলেক। পরে প্রধান বামনক, মহাসভার মানষিলাক একটে হবার বাদে হুকুম দিলেক। সেলো উয়ায় পৌলক আনিয়া উমার আগপাকে খাড়া করিলেক।

২৩ পৌল মহাসভার মানষিলার ভিত্তি থির দৃষ্টিতে দেখিয়া কইলেক, “হে মোর ভাই বইনিলা মুই আজি পর্যন্ত ভগবানের সউগ বিষয় শুদ্ধি মন নিয়া পালন করির ধরচুং।”

২ সেলো প্রধান বামন অননিয় এই কতা শুনিয়া, যায় যায় পৌলের বগলত খাড়া হয় আছিলেক, উমারলাক পৌলের মুখত চড় মারির হুকুম দিলেক।

৩ সেলো পৌল অননিয়ক কইলেক, “হে ভন্ড! চুনের রং করা দেওয়াল! ভগবান তোক আঘাত করিবে। তুই বিধির বিধান মতে বিচার করির বসিয়া এলা বিধির বিধান ভাঙিয়া মোক আঘাত করির হুকুম দিবার ধরচিস?”

৪ উয়ার বগলত যায় যায় খাড়া হয় আছিলেক, উমরা কইলেক, “ভগবানের মহাবামনক তুই অপমান করির ধরচিস?”

৫ পৌল সেলো কইলেক, “হে মোর ভাইয়ের ঘর! মুই জানিং না যে, উয়ায় হইলেক মহাবামন। কেনেনা শাস্ত্রত নেখা আছে, ‘তোমার জাতির নেতাক অসন্মান করেন না।’”

৬ আর ঐ সভার মানষিলার মইদ্বোত একদল ফরীশী আর অইন্য দল সদ্বুকী, এইটা জানির পায়া পৌল মহাসভাত জোরে চিকিরিয়া কইলেক, “হে ভাইয়ের ঘর, মুই এক জন ফরীশী! ফরীশী গুষ্টির ছাওয়া। মোর বিচার হবার ধরচে, কেনেনা মুই বিশ্বাস করং মরা মানষিলা বত্তি উঠিবে।”

৭ উয়ার কতা শেষ হইতে না হইতে ফরীশী আর সদ্দুকীলার মইন্ধোত ঝগড়া শুরু হইলেক, সেলো সভার মানষিলা দুইটা দলে ভাগ হয় গেলেক।

৮ কেনেনা সদ্দুকীলার বিশ্বাস যে, মরা মানষি কোন দিন বত্তি উঠির না হয়, স্বর্গদূত আর আত্মা বুলিয়া কোন কিছুই নাই। কিন্তু ফরীশীলা এই তিনটা বিশ্বাস করে।

৯ সেলো চাইরো পাকে দারুন হাল্লা-চিল্লা শুরু হয় গেলেক। ফরীশী দলের কয়জন উঠিয়া পন্ডিতলা জোরে তর্কা-তর্কি শুরু করিয়া কইলেক, “হামরা এই মানষিটার কোন দোষ দেখির ধরচি না, হয় তো, কোন স্বর্গদূত বা আত্মা উয়ার নগত কতা কইচে।”

১০ যেলো বড় ধরনের কাজিয়া শুরু হইলেক, সেলো প্রধান সেনাপতি ভয় খাইলেক। কেনেনা মানষিলা যাতে আরো পৌলক টানা-টানি করি ছিড়িয়া না ফেলায়। এই বাদে উয়ায় হুকুম দিলেক, যিহুদীলার মইন্ধো থাকি সেনা ছাউনিত নিয়া যাবার।

১১ পরের দিন রাতি বেলা প্রভু যীশু পৌলের বগলত আসিয়া খাড়া হয় কইলেক, “সাহসী হঃ, যিরুশালেমত তুই যেমন মোর বিষয়ে সাক্ষী দিচিস, একে নাকান করি রোমতও সাক্ষী দিবার নাগিবো।”

১২ আর পরের দিন সাকাল বেলা যিহুদীলা এক জোট হয় কিরা কাটিয়া একটা চক্রান্ত করির সিদ্ধান্ত নিলেক। পৌলক মারি না ফেলা পর্যন্ত, কোন কিছুই খাবে না।

১৩ চল্লিশ জনের বেশী মানষি কিরাকাটি এই চক্রান্ত করিলেক।

১৪ উমরা প্রধান বামন আর যিহুদী নেতালোক যায়া কইলেক,  
“হামরা কিরা কাটিচি, পৌলক মারি না ফ্যেলা পর্যন্ত কোন কিছুই  
খামু না।

১৫ এলা তোমরা মহাসভার সদস্যলার নগত প্রধান সেনাপতিরটে  
যায়া আদার করেন, যাতে পৌলক তোমাক দেয়। তোমরা যায়া  
কন যে, উয়ার ভাল করি বিচার করা চাই। উয়ায় এটে আইসার  
আগত মারি ফ্যেলের বাদে হামরা তৈরি হয় রইলুং।”

১৬ কিন্তু পৌলের এক ভাগিনা এই চক্রান্তের কতা জানির পায়া  
সেনা ছাউনিত সোন্দেয়া পৌলক যায়া কইলেক,

১৭ পৌল সেলো এক জন প্রধান সেনাপতিক বগলত ডেকেয়া  
কইলেক, “তোমরা এই গাবুর চেংড়াটাক প্রধান সেনাপতিরটে  
নিয়া যাও, কেনেনা ইয়ার উয়াক কিছু কতা কবার আছে।”

১৮ এই বাদে চেংড়াটাক নগত নিয়া প্রধান সেনাপতিরটে নিয়া  
যায়া কইলেক, “বন্দী পৌল এই চেংড়াটাক তোমারটে ধরি  
আসির কইলেক, ইয়ায় কিছু কতা কবার চায়।”

১৯ সেলো প্রধান সেনাপতি চেংড়াটার হাত ধরিয়া খানিক দূরত  
নিয়া যায়া গোপনে পুছিলেক, “কঃ দেখি, তুই মোক কি কবার  
চাইস?”

২০ চেংড়াটা কইলেক, “যিহুদীলা ঠিক করিচে, পৌলের বিষয়  
আরো ভাল করি খবর নিবার বাদে তাল-বাহানা দেখেয়া আইসা

কালি মহাসভাত আনিবার তোমাক আন্দার করিবে।

২১ তোমরা উমার কতাত রাজি হন না, কেনেনা চল্লিশ জনের বেশী মানষি পৌলক মারি ফ্যেলের বাদে ঘাটি গাড়ি বসিয়া আছে। উমরা কিরা কাটিচে, উয়াক না মারা পর্যন্ত কোন কিছু খাবে না। এলা খালি তোমার হুকুমের বাচ্ছে আছে।”

২২ সেলো প্রধান সেনাপতি চেংড়াটাক বিদায় দিয়া কইলেক, “তুই যেইলা কতা মোক কচিস, আর কাণ্ডোকে কইস না।”

২৩ পরে প্রধান সেনাপতি দুই জন শতপতিক ডেকেয়া কইলেক, “দুইশ বল্লমধারি সেনা আর সত্তর জন ঘোড়সওয়ারক রাতি নয়টার সময় কৈসরিয়া গঞ্জত যাবার বাদে তৈরি থাকির কন।”

২৪ আর পৌলক নিরাপদে রাজ্যপাল ফীলিক্সেরটে পৌছে দিবার বাদে বাহন জোগার করির কইলেক।

২৫ পাছত প্রধান সেনাপতি একখান চিঠি নেখিলেক,

২৬ মানিগুনী রাজ্যপাল ফীলিক্স, মুই ক্লৌদিয় লুসিয়, মুই তোমার মঙ্গল কামনা করং।

২৭ পৌল নামে মানষিটাক যিহুদীলা ধরিয়া মারি ফ্যেলের চায়। কিন্তু মুই যেলা জানির পালুং উয়ায় এক জন রোমীয় নাগরিক সেলো মোর সেনালাক নিয়া যায়া উয়াক মুক্তি করিলুং।

২৮ পাছত জানির চালুং কেনে মানষিলা দোষ দিবার ধরচে, সেইটা জানের বাদে যিহুদীলার মহাসভাত উয়াক হাজির করিয়া ধরি আসিলুং।

২৯ পাছত মুই বুঝিৰ পালুং যে, যিহুদীলার ধৰ্মেৰ নিয়ম-কানুন নিয়া উয়াক দোষী কৰিচে। কিন্তু মারি ফ্যেলের বা জেলত দিবার মত কোন দোষ নাই।

৩০ যেলা মুই জানিৰ পালুং, এই মানষিটার বিরুদ্ধে চক্ৰান্ত কৰিৰ ধৰচে, এই বাদে মুই তোমারটে পেঠালুং। যায় যায় দোষ দিবার ধৰচে, সেলা মুই পচ-পচে উমারলাক তোমারটে পেঠে দিয়া এই আদেশ দিলুং যাতে উমরা উয়ার দোষের বিষয় তোমাক কয়।

৩১ সেলা আদেশ মতন পৌলক রাতি বেলা আন্তিপাত্ৰিত নিয়া গেইলেক।

৩২ পরের দিন ঘোড়সওয়ার সেনালাক খালি উয়ার নগত যাবার ব্যবস্থা কৰিলেক, আর বাকি সেনালা সেনা ছাউনিত ফিৰি আসিলেক।

৩৩ ঘোড়সওয়ার সেনালা কৈসরিয়াত পৌছিয়া চিঠিখান রাজ্যপালের হাতত দিলেক। আর পৌলক উয়ার বগলত হাজিৰ কৰিলেক।

৩৪ রাজ্যপাল চিঠিখান পড়িয়া পৌলক পুছিলেক, “তুই কোন রাজ্যের মানষি?” সেলা উয়ায় জানিলেক যে, পৌল কিলিকিয়া প্রদেশের মানষি, আর জানিৰ পায়া রাজ্যপাল কইলেক,

৩৫ “যায় যায় তোর উপরাত দোষ দিচে, যেলা উমরা আসিবে সেলা তোর কতা মুই শুনিম।” আর রাজ্যপাল পৌলক রাজা

হেরোদের রাজবাড়ির জেলত খুইয়া পাহারা দিবার কইলেক।

২৪ পাঁচ দিন পাছত প্রধান বামন অননিয়, যিহুদী সমাজের কয়েক জন বুড়া নেতা আর তরুণক নামে এক জন উকিলক সাথত নিয়া কৈসরিয়াত যায়া পৌলের বিরুদ্ধে রাজ্যপালেরটে নালিশ জানাইলেক।

২ পৌলক ডেকে আনার পাছত তরুণ এই কয়া দোষ দিবার নাগিলেক, “হে মানিগুনী ফীলিক্স! হামরা তোমার বাদে মহা শান্তিতে আছি। তোমার জ্ঞানের গুণে এই জাতির নানান অমঙ্গল খন্দন হইচে।

৩ এই উপকার হামরা সগায় সউগ জাগাত কৃতজ্ঞতার সাথত মানি নিবার ধরচি।

৪ কিন্তু বেশী কতা কয়া মুই তোমার মূল্যবান সমায় নষ্ট করির না চাং। এই বাদে আন্দার করির ধরচুং, দয়া করি হামার কতা শুনো, হামরা অল্প কতায় সউগ কমু।

৫ “কিন্তু হামরা দেখির পাইলুং এই মানষিটা হইলেক নষ্টের গোড়া। সারা দুনিয়াত যিহুদীলার মইদ্ধোত গন্দগোল পাকে বেরেবার ধরচে। ইয়ায় নাসারতীয় দলের এক জন নেতা।

৬-৭ ইয়ায় হামার মন্দির ছুয়া করির চেষ্টা করির ধরচে। এই বাদে হামরা ইয়াক ধরি আনিয়া দোষ দিবার ধরচি।

৮ তোমরা নিজে উয়াক পুছিলে, সউগ বিষয় জানির পাবেন।”



৯ ওটে জোটা সউগ যিহুদীলা সাক্ষী দিয়া কইলেক, এই কতাটা সচাং।

১০ পৌলক ইশারা দিয়া রাজ্যপাল ফীলিক্স কিছু কবার কইলেক। সেলা পৌল কইলেক, “তোমরা মেলা বছর থাকি যিহুদী জাতির বিচার করি আসির ধরচেন। এই বাদে মুই খুশি হয় কতা কবার চাং।

১১ তোমরা খোজ খবর নিয়া দেখিবেন এলাও বারো দিনের বেশী হয় নাই, মুই উপাসনা করির বাদে যিরুশালেম গেইচোং।

১২ মোক যায় যায় দোষ দিবার ধরচে, উমরা দশংগতি মন্দিরত সোন্দে তর্কাতর্কি করা, উপাসনা ঘরলাত যায়া, হাটে বাজারে আরো গঞ্জের অইন্য কোনোটে কাণ্ডোকো উসকানি দেওয়া মোক দেখে নাই।

১৩ এলা মোর যে দোষ দিবার ধরচে, উমরা তার প্রমাণ তোমাক দিবার পাবে না।

১৪ কিন্তু মুই এই কতা স্বীকার করং যে, খ্রীষ্ট যীশুর ঘাটা অনুসরন করিয়া চৌদ্দ গুটির ভগবানের উপাসনা করং। আর উমরালা এই ঘাটাক ধর্ম বিরুদ্ধ কয়, যেইলা আসলে মোশির আইন কানুনের সাথে মিল আছে, ভগবানের ভাববাদীলার শাস্ত্রত নেখা আছে, সেইলায় মুই বিশ্বাস করং।

১৫ উমরাও যেই নাকান আশা করে, সেই নাকান মুইও ভগবানের উপরাত আশা-ভরসা করির ধরচুং যে, ধার্মিক-

অধার্মিক সগাকে বন্তে তুলা হবে।

১৬ সেই বাদে মুই এই নাকান করি চলং, যাতে মানষি আর ভগবানেরটে মোর অন্তর সউগ সমায় পরিস্কার খুবার পাং।

১৭ “মেয়ো বছর পাছত, যিরুশালেমের মোর নিজ জাতির গরীব মানষিলাক কিছু দান করিবার আর নৈবদ উৎসর্গ করিবার বাদে আসিলুং।

১৮ সেয়ো মানষিলা মোক শুদ্ধি করার অনুষ্ঠানের পাছত মন্দিরত দেখির পাইলেক। আর ওটে মানষির ভিড়ও হয় নাই, মোক নিয়া কোন গন্ডগোলও হয় নাই।

১৯ কিন্তু এশিয়া প্রদেশের কয়েক জন যিহুদী ওটেকোনা আছিলেক। উমার যদি মোর সমন্ধে কোন দোষ দিবার থাকে, তাহলে এই যিহুদীলা তোমারটে আইসা উচিত আছিলেক।

২০ উমরা যায় যায় হাজির এলা আছে, উমরায় কউক, মুই যেয়ো মহাসভাত খাড়া হয়্যা আছিলুং, সেয়ো উমরা মোর কি দোষ পাইছিলেক।

২১ খালি একটা বিষয় দোষ দিবার পায়, মুই উমার আগত খাড়া হয়্যা জোরে চিকিরিয়া কইছিলুং, মরণ থাকি ফির বত্তি উঠিবার বিষয় নিয়া এই বাদে আজি তোমারলার আগত মোর বিচার হবার ধরচে।”

২২ যীশুর ঘাটার বিষয় রাজ্যপাল ফীলিক্স খুব ভাল করি জানে। উয়ায় বিচার করা মুলতুবী করিয়া কইলেক, “প্রধান সেনাপতি

লুসিয় আসিলে এই বিচার মুই নিস্পত্তি করিম।”

২৩ সেলো উয়ায় পৌলক পাহারা দিবার বাদে শতপতিক হুকুম দিলেক। কিন্তুক উয়াক স্বাধীন রাখির কইলেক, “উয়ার কোন সাগাই-সোদর, বন্ধু-বান্ধব আসিয়া উয়াক দেখ-শোনা করির চাইলে বাধা না দেন।”

২৪ কয়েক দিন পাছত ফীলিক্স আর উয়ার যিহুদী বউ দ্রুসিল্লাক নগত ধরি আসিয়া পৌলক ডেকেয়া আনিলেক। পৌলের মুখ থাকি যীশু খ্রীষ্টের বিশ্বাসের কতা শুনিলেক।

২৫ যেলো পৌল উয়াক সৎ ভাবে চলা, নিজক ইন্দ্রিয় দমনত থোয়া, আর পরকালের বিচারের বিষয় কইলেক, সেলো ফীলিক্স ভয় খায়া কইলেক, “তুই এলা যা, যেলো সমায় পাইম, সেলো তোক মুই ডেকাইম।”

২৬ উয়ায় আশা করিচিলেক যে, পৌল উয়াক ঘুষ দিবে। এই বাদে উয়ায় পৌলক বারে বারে ডেকেয়া কতা কবার নাগিলেক।

২৭ ফীলিক্স যিহুদীলাক খুশি করিবার বাদে পৌলক জেলখানাত বন্দী করি থুইছিলেক। আর দুই বছর চলি যাবার পাছত পর্কিয় ফীষ্ট রাজ্যপালের পদত বসিলেক।

২৫ রাজ্যপাল ফীষ্ট সেই প্রদেশত আসিবার তিন দিন পাছত কৈসরিয়া থাকি যিরুশালেম গেইলেক।

২ সেলো প্রধান বার্মন আর যিহুদী নেতালো ফীষ্টেরটে পৌলের বিরুদ্ধে নালিশ জানাইলেক।

৩ উমরা কাউলো-কাউলি করি কইলেক, দয়া করি পৌলক যাতে যিরুশালেমত নিয়া যাবার ব্যবস্থা করে। কেনেনো উমরায় ঘাটাত নুকিয়া থাকি পৌলক খুন করির চক্রান্ত করিলেক।

৪ কিন্তু ফীষ্ট কইলেক, “পৌলক কৈসরিয়াত বন্দী করি থোয়া হইচে, মুই এলায় ওটে যাইম।

৫ এই বাদে তোমারলার মইন্ধোত যায় যায় ক্ষমতাবান মোর সাথত চল। আর পৌলের কোন দোষ থাকিলে, ওটে দেখে দেও।”

৬ ফীষ্ট যিরুশালেমত আট-দশ দিন থাকার পাছত কৈসরিয়া চলি গেইলেক। পরের দিন উয়ায় বিচার সভাত বসিয়া পৌলক হাজির করির হুকুম দিলেক।

৭ পৌল সেলো ওটে আসিলেক সেলো যিরুশালেম থাকি আইসা যিহুদী মানষিলা উয়ায় চাইরো পাকে খাড়া হয়ো ঘিরি ধরিলেক। উয়ার বিরুদ্ধে সেলো জঘন্য অপরাধের কতা কবার নাগিলেক কিন্তু কোন প্রমাণ দেখের পাইলেক না।

৮ পৌল নিজের সমন্ধে কইলেক, “মুই যিহুদীলার আইন-কানুন আর দশংগতি মন্দির এমন কি মহারাজার বিরুদ্ধেও কোন অন্যায় করং নাই।”

৯ কিন্তু ফীষ্ট যিহুদীলারটে সুনাম পাবার বাদে পৌলক কইলেক, “এই দোষের বিচার মুই যিরুশালেমত করির চাং, তুই কি রাজি আছিস?”

১০ সেয়া পৌল কইলেক, “মুই মহারাজার বিচার সভাত আপিল করলুং, এটেই মোর বিচার হওয়া উচিত। মুই যিহুদীলার বিরুদ্ধে কোন অন্যায় করং নাই, এইটা তোমরা ভাল করি জানেন।

১১ মুই যদি দোষী হং, আর মরণ দন্ড পাবার নাকান কোন দোষ করিয়া থাকং, তাইলে মুই মরিরও রাজি আছং। কিন্তু এই যিহুদীলা মোর বিরুদ্ধে যে দোষ দিবার ধরচে, সেইলা যদি প্রমাণ না হয়, তাইলে মোক উমারলার হাতত তুলি দিবার অধিকার কাঙোরো নাই। এই দাবি মুই মহারাজারটে আপিল করিলুং।”

১২ সেয়া ফীষ্ট মন্ত্রিসভার নগত পরামর্শ করিয়া কইলেক, “তুই মহারাজারটে দাবি আপিল করিচিস, এলা তুই মহারাজার ওটে যা।”

১৩ কিছু দিন পাছত, রাজা আগ্রিপ্পা আর শ্রীমতি বর্গীকী ফীষ্টক মঙ্গল কামনা জানের বাদে কৈসরিয়াত আসিলেক,

১৪ উমরা মেয়া দিন ওটে থাকিলেক। ফীষ্ট পৌলের বিষয় রাজা আগ্রিপ্পাক কইলেক, “ফীলিক্স এটে এক জন মানষিক বন্দী করি থুইয়া গেইচে।

১৫ যেয়া মুই যিরুশালেমত আছিলুং, সেয়া যিহুদী প্রধান বামনলা আর বুড়া নেতালা ঐ মানষিটার বিরুদ্ধে দোষী হিসাবে

শাস্তি দিবার চায়া নালিশ করিচিলেক।

১৬ মুই মানষিলাক কইলুং, কোন মানষির বিরুদ্ধে যদি কোন নালিশ করা হয়, উয়ায় যতক্ষণ নির্দোষ প্রমাণ করিবার সুযোগ না পায় ততক্ষণ পর্যন্ত উয়াক শাস্তি দিবার রোমীয়লার নিয়ম নাই।

১৭ “যিহুদীলা যেলা মোর এটে আসিলেক, সেলা মুই দেড়ি না করিয়া পৌলক বিচার সভাত আনিবার হুকুম দিলুং।

১৮ কিন্তু মুই পৌলের যে নাকান দোষ অনুমান করিচুং, সেই নাকান দোষ উমরা বিচার সভাত নালিশ করে নাই।

১৯ বরং উমরা নিজের ধর্ম সমন্ধে আর যীশু নামে কোন মরা মানষি, যাক পৌল বত্তা কইচিলেক, ঐলা সমন্ধে তর্ক জুড়িয়া দিলেক।

২০ এই ঘটনালা কেংকরি খোজ নিম বুঝির না পায়া, মুই পৌলক পুছিলুং, তুই কি বিচারের বাদে যিরুশালেম যাবার রাজি আছিস?

২১ কিন্তু যেলা পৌল মহারাজার বিচারের রায়ে বাদে মোক আপিল করিলেক, সেলা মুই মহারাজার ওটে না পেয়েয়া উয়াক জেলত থুবার আদেশ দিলুং।”

২২ সেলা আগ্রিপ্পা কইলেক, “মুইও উয়ার বিষয় শুনির চাং।” ফীষ্ট কইলেক, “আইসা কালি শুনির পাবেন।”

২৩ পরের দিন রাজা আগ্রিপ্পা আর বর্ণীকী খুব জাক-জমক করিয়া সভাঘরত সোন্দাইলেক। উমার সাথত সেনাপতিলা আর

গঞ্জের মানিগুণী মানষিলা আছিলেক। ফীষ্টের হুকুমে পৌলক ওটে আনা হইলেক।

২৪ সেলো ফীষ্ট কইলেক, “রাজা আগ্রিঙ্গা আর সভাত হাজির মানি-গুণী জন, ইয়াক দেখির ধরচেন। ইয়ার বিরুদ্ধে যিরুশালেমের সউগ যিহুদীলা মোরটে নালিশ করি ছিলেক, আর চিকরিয়া কইছিলেক, এই মানষিটাক বত্তি রওয়ার দেওয়া উচিত না হয়।

২৫ কিন্তু মুই দেখিলুং, উয়ায় মরণ দন্ড পাবার নাকান কোন দোষ করে নাই। উয়ায় নিজে বিচারের বাদে মহারাজার ওটে যাবার আপিল করিচে। এই বাদে মুই উয়াক ওটে প্যেঠেবার মন ঠিক করিচিলুং।

২৬ কিন্তু মহারাজারটে নালিশ নেখিবার মতন মুই কিছুই পাইলুং না। এই বাদে মুই তোমারলার সগারে আগত বিশেষ করি রাজা আগ্রিঙ্গা তোমারটে উয়াক হাজির করিলুং। যাতে জেরা করিয়া উয়ার সমন্ধে কিছু নেখির পাই।

২৭ কেনেনা মোর মতে কোন বন্দীক চালান দিবার আগত, উয়ার দোষের বিবরণ না দেওয়া বেআইনি।”

২৬ রাজা আগ্রিঙ্গা পৌলক কইলেক, “এলা তোর নিজের যা কবার আছে, তা কবার অনুমতি দেওয়া হইলেক।” সেলো পৌল হাত বাড়েয়া নিজের পক্ষে কতালা কইলেক,

২ “রাজা মশায়, যিহুদীলা মোর বিরুদ্ধে যে দোষ দিচে, মুই আজি তোমার আগত নিজের কতা কবার সুযোগ পাচুং বুলিয়া মুই ভাগ্যবান।

৩ কেনেনা তোমার যিহুদী নিয়ম-নীতি আর তর্কের বিষয়লা ভাল করি জানা আছে। এই বাদে মুই মিনতি করি কবার ধরচুং, মোর কতালা ধৈর্য ধরি শুন।

৪ “ছাওয়া কাল থাকি নিজের দেশত, তার পাছত যিরুশালেমত থাকির সমায় মুই ক্যেমন করি জীবন কাটাইচোং যিহুদীলা সউগে জানে।

৫ মোক যিহুদীলা মেলা দিন থাকি চেনে। মুই যে ফরীশীর নাকান করি জীবন যাপন করিচিলুং, উমরা ইচ্ছা করিলে সাক্ষী দিবার পায়।

৬ হামার চৌদ্দ গুষ্টির মানষিলারটে ভগবান যে প্রতিজ্ঞা করিচিলেক, সেইটার প্রতি আশা আছে বুলিয়া আজি মোর বিচার হবার ধরচে।

৭ হামার জাতির বারো গোষ্ঠির মানষিলা দিন-রাতি মন-পরান দিয়া উপাসনা করিতে করিতে তার ফল পাবার আশায় আছে। হে মহারাজ এইটা আশা করং বুলিয়া যিহুদীলা মোক দোষ দিবার ধরচে।

৮ ভগবান মরা মানষিলাক বত্তে তোলে এই কতা তোমরা কেনে অসম্ভব মনে করেন?



৯ “মুই নিজেই এক সমায় মনে করচিলুং, নাসারতের যীশুর বিরুদ্ধে যা করা যায়, মোর করা উচিত।

১০ মুই যিরুশালেমত এই নাকান করিচিলুং। মুই প্রধান বামনলারটে অনুমতি নিয়া যীশুর শিষ্যলোক জেলত দিচিলুং। এমন কি উমার পরান দন্ড দিবার বাদে সমর্থন করিচিলুং।

১১ উমাক শাস্তি দিবার বাদে মুই এক উপাসনা ঘর থাকি অইন্য উপাসনা ঘরত যায়া উমারলাক জোর করিয়া যীশুর নিন্দা করির চেষ্টা করিচিলুং। উমারলার উপরাত মোর এত গোসা আছিলেক যে, মুই ভিন দেশের গঞ্জলাত যায়া অইত্যাচার করির ধরচিলুং।”

১২ পৌল আরো কইলেক, “হে রাজা মশায়, এক দিন মুই প্রধান বামনলারটে আঙা-পত্র নিয়া দামেস্ক গঞ্জ যাবার ধরচিলুং।

১৩ সেয়া পেরায় দুপুর বেলা, মুই দেখলুং বেলার রৌদে থাকিও খুব তেজি এক আলো দ্যাওয়া থাকি মোর আর মোর সঙ্গী-সাথীলার চাইরো পাকে জ্বলির নাগিলেক।

১৪ হামরা সগায় মাটিত পড়ি গেলুং। ইব্রীয় ভাষায় মুই একটা আওয়াজ শুনির পালুং মোক কইলেক, শৌল! শৌল! তুই কেনে মোক যাতনা করির ধরচিস? অবাধ্য গরুর নাকান কাটা ওলা নাটিত চাইটিয়া তুই নিজের ক্ষতি নিজে কেনে করির ধরচিস?

১৫ “সেয়া মুই কলুং প্রভু, তোমরা কায়? প্রভু কইলেক, মুই যীশু, যাক তুই যাতনা দিবার ধরচিস।

১৬ “প্রভু কইলেক, তুই ওঠেক নিজের ঠেংএর উপরা ভর দিয়া খাড়া হঃ। তোক মোর সেবাকারী আর সাক্ষী হিসাবে নিযুক্ত করির বাদে দর্শন দিনুং। তুই মোক যে নাকান করি দেখিছিস, মুই তোক যা দেখাইম সেইলা তুই অইন্য মানষিরটে কবু।

১৭ তোর নিজের যিহুদী মানষিলার হাত থাকি রক্ষা করিম। আর মুই তোক অযিহুদীলারটে পেয়েবার ধরচুং।

১৮ তুই উমারলার চোখু খুলিয়া দিবু যাতে উমরা আন্ধার থাকি আলোর ভিতি আর শয়তানের কবল থাকি ভগবানের এদিয়া ফিরি আইসে। মোক বিশ্বাস করিলে পাপ থাকি ক্ষমা পাবে আর উমরাও ভগবানের বাদে বাছাই করা শিষ্যলার ভাগিদারী হবে।”

১৯ পৌল রাজা আগ্রিপ্পাক আরো কইলেক, “হে রাজা মশায়, স্বর্গ থাকি দর্শনের মইন্ধো দিয়া মোক যেইলা কওয়া হইচে, তার অবাধ্য মুই হং নাই।

২০ মুই মানষিলারটে প্রচার করিলুং, উমরা যাতে পাপের ঘাটা থাকি ভগবানের ঘাটাত ফিরি আইসে। উমরা এমন কাম করুক যেই দিয়া প্রমাণ হবে যে, সচাং করি ভগবানের ঘাটাত ফিরি আসচে। আর এই কতলা মুই পইলা দামেস্কের মানষিলারটে প্রচার করিচিলুং। তার পর যিরুশালেমত আরো সউগ যিহুদীয়া প্রদেশের যিহুদী আরো অযিহুদী মানষিলারটে প্রচার করলুং।

২১ এই বাদে যিহুদীলা মোক দশংগতি মন্দিরত মারি ফ্যেলের চেষ্টা করির নাগিলেক।

২২ কিন্তু আজি পর্যন্ত মুই যে ভগবানের সাহায্য পাইচুং, আর এলা ছোট বড় সগারে আগত খাড়া হয় সাক্ষী দিবার ধরচুং। মহাপুরুষ মোশি আর ভাববাদীলা যেইলা ঘটবে কয়া গেইচে, সেইলা ছাড়া মুই অইন্য কোন কতা কং নাই।

২৩ উমরা কয়া গেইচে, বাছাই করা রাজাটাক দুঃখ ভোগ করির নাগিবে। আর মরণ থাকি ফির বত্তি উঠিয়া নিজের জাতির মানষিলাক আর অযিহুদীলাক, সগারেটে এক নয়া আলোময় ঘাটার প্রচার করিবে।”

২৪ পৌল যেলা নিজের পক্ষে কতালা কবার ধরচে, সেলা রাজ্যপাল ফীষ্ট ধমকেয়া চিকিরিয়া কইলেক, “পৌল তুই পাগলা হয় গেইচিস! তুই ভালে দূর পড়া শোনা করিচিস বুলিয়া তোর মাথা খারাপ হয় গেইচে!”

২৫ সেলা পৌল কইলেক, “মানিগুনী রাজ্যপাল, মুই পাগলা হং নাই। মুই যেইলা কবার ধরচুং সেইলা সচাং আর যুক্তিপূর্ণ।

২৬ রাজা আগ্রিঙ্গা তো এইলা বিষয় সউগে জানে, আর মুই উয়ার আগত খোলা-মেলা সউগ কতা কবার পাং। মোর ধারণা এই ঘটনালা রাজা মশায়ের অজানা না হয়। কেনেনা এই ঘটনালা গোপনে হয় নাই।

২৭ রাজা মশায়, তোমরা ভগবানের ভাববাদীর কতা বিশ্বাস করেন? মুই জানং তোমরা করেন।”

২৮ স্যেলা রাজা আগ্রিগ্লা পৌলক কইলেক, “তুই কি মনে করির ধরচিস, মোক খানেক সমায়ের মইন্ধোত খ্রীষ্টান বানের চেষ্টা করির ধরচিস?”

২৯ পৌল কইলেক, “অল্প সমায়ে হউক আর বেশী সমায়ে হউক, সেইটা বড় কতা না হয়, খালি তোমরায় না হন, ভগবানেরটে প্রার্থনা করির ধরচুং যতলা মানষি মোর কতা শুনির ধরচে, উমরা সগায় মোর নাকান হউক, খালি এই শিকল খান ছাড়া!”

৩০ স্যেলা রাজা আসন ছাড়ি খাড়া হইলেক, উয়ার সাথে সাথে রাজ্যপাল, শ্রীমতি বর্ণীকী আর যায় যায় বসি আছিলেক সগায় খাড়া হইলেক।

৩১ তার পাছত বায়রাত যায়া এক জন আরেক জনের নগত পরামর্শ করির নাগিলেক, “এই মানষিটা মরণের শাস্তি পাবার, জেল খাটিবারো মত কোন দোষ করে নাই।”

৩২ রাজা আগ্রিগ্লা রাজ্যপালক কইলেক, “এই মানষিটা যদি মহারাজারটে আপিল না করিলেক হয়, তাইলে ছাড়ি দেওয়া গেইলেক হয়।”

২৭ তার পাছত জাহাজত করিয়া পৌলক ইতালিত নিয়া যাবার ঠিক করিলেক, স্যেলা পৌলের নগত আরো কয়েক জন বন্দীক মহারাজার নিজের সৈন্য দলের জুলিয়াস নামের এক জন শতপতির হাতত দেওয়া হইলেক।

২ হামরা আদ্রামুত্তীয় থাকি আইসা একখান জাহাজত চড়ি যাত্রা শুরু করিলুং। এই জাহাজ খান এশিয়া প্রদেশের অইন্য অইন্য বন্দর যাওয়ার কতা আছিলেক। ম্যাসিডোনিয়া প্রদেশের থিমলনীকী গঞ্জের শ্রী আরিষ্টারখ হামার নগত আছিলেক।

৩ হামার জাহাজ পরের দিন সীদোন বন্দরত যায়া থামিলেক। ওটে জুলিয়াস পৌলের নগত বেশ ভাল ব্যবহার করিলেক, আর উয়াক বন্ধু-বান্ধবেরটে যাবার অনুমতি দিলেক, যাতে উয়ার দরকারি জিনিস-পাতি দিবার পায়।

৪ পরে ওটে থাকি হামার জাহাজ ছাড়িলেক। বাতাস হামার উল্টা পাক থাকি আসির ধরছিলেক, এই বাদে হামরা সাইপ্রাস দ্বীপের যে পাকে বাতাস কম ঐ পাকে যাবার নাগিলুং।

৫ তার পর হামরা কিলিকিয়া আর পাম্ফুলিয়া প্রদেশ ছাড়িয়া জলপথ দিয়া লুকিয়া প্রদেশের মুরা নামের বন্দরত আসিলুং।

৬ শতপতিটা আলেক্সান্দ্রীয়া থাকি আইসা একখান জাহাজ পাইলেক, ঐ জাহাজ খান ইতালী যাবার ধরছিলেক, সেলো উয়ায় হামাক ঐখানত চড়াইলেক।

৭ হামার জাহাজ খান মেলা দিন ধরি আস্তে আস্তে চলিয়া খুব কষ্টে ক্লীদোন বন্দরের বগলত আসিয়া পৌছিলেক। কিন্তু বাতাস হামারলাক আগেয়া যাবার দিলেক না। সেলো হামরা ত্রীত দ্বীপের যেই পাকে বাতাস কম, সেই পাক দিয়া সলমোনি বন্দর পার হইলুং।

৮ সাগরের কাইন্টা ধরিয়া কষ্ট করি লাসেয়া গঞ্জের বগলত  
সুন্দর নামের বন্দরত আসিলুং।

৯ এই নাকান করি মেয়ো সমায় নষ্ট হয় গেইলেক। জলপথ  
দিয়া যাত্রা করাটা খুব বিপদের ব্যাপার হইলেক, কেনেনা এই  
পাকে উপাস পার্বনের সমায় চলি গেইলেক। এই বাদে পৌল  
সাবধান করিয়া কইলেক,

১০ “ভাইয়ের ঘর শুন, মুই দেখির পাবার ধরচুং যে, এই যাত্রা  
খুব ভয়ংকর আরো ক্ষতি হবে। এই ক্ষতি খালি জাহাজ আর  
মাল-পত্রের হবে এমন না হয়, হামারলার জীবনেরও ক্ষতি হবে।”

১১ শতপতিটা পৌলের কতা না শুনিয়া জাহাজের ক্যাপ্টেন আর  
জাহাজের মালিকের কতা শুনিলেক।

১২ এই বন্দরটা জারের কাল কাটের ঠিক জাগা না হয়, এই বাদে  
জাহাজের বেশীর ভাগ মানষি একমত হইলেক যে, সম্ভব হইলে  
ফৈনিক যায়া জারের দিন কাটাবে। ফৈনিক আছিলেক ত্রীত  
দ্বীপের একটা জাহাজ থামেবার জাগা। এই জাগাখান হইলেক  
দক্ষিণ পশ্চিম আর উত্তর পশ্চিম দিকের ফাকা জাগা।

১৩ পাছত যেয়ো আস্তে আস্তে দক্ষিণা বাও দেখা দিলেক, সেয়ো  
উমরা মনে করিলেক, উমরা যেমন চাইচে তেমনে হইচে। এই  
বাদে নোংগর তুলিয়া ত্রীত দ্বীপের কাইন্টা দিয়া যাবার নাগিলেক।

১৪ খানিক পাছত ঐ দ্বীপ থাকি ভয়ংকর তুফান শুরু হইলেক,  
এই তুফানক ঈশান বাও কয়।

১৫ তুফানের বাদে হামার জাহাজের মাথা বাতাসের পাকে ঘুরিয়া দিবার পাইলুং না। এই বাদে জাহাজের মাথা ঘুরিবার চেষ্টা করা ছাড়ি দিয়া বাতাসত ভাসেয়া দিলুং।

১৬ ইয়ার পাছত কৌদা নামের ছোট দ্বীপের যেই পাকে বাতাস কম সেই পাকে গেলুং। আর জাহাজত যে ছোট নাও থাকে সেইখান খুব কষ্ট করি ধবংসের হাত থাকি হামরা বাঁচিলোং।

১৭ মানষিলা নাওখান জাহাজের উপরাত টানি তুলিলেক তার পাছত জাহাজের খোলত ভাল করি দড়ি দিয়া বান্দিলেক, যাতে তক্তালা খুলি পড়িয়া না যায়। সুতী নামে চরত জাহাজ আটক হবার ভয়ে পাল নামেয়া জাহাজ খানক হাওয়াত চলির দেওয়া হইলেক।

১৮ তুফানের দাপটে হামার জাহাজ খান খুব কাঁপিবার নাগিলেক, এই বাদে পরের দিন নাবিকলা জাহাজের খোল থাকি ভারি মাল পত্র ফেলে দিবার নাগিলেক।

১৯ তৃতীয় দিনে উমরা নিজের হাতে সাজ-সরঞ্জাম ফেলে দিলেক।

২০ মেলা দিন, বেলা, কি তারা, কোন কিছুই দেখা গেইলেক না, দারুন তুফান হইতে থাকিলেক। শেষত হামরা বক্তির আশা একেবারে ছাড়ি দিলুং।

২১ মেলা দিন মানষিলা কোন কিছু খায় নাই। এই বাদে পৌল উমারলার আগ-পাকে খাড়া হয় কইলেক, “হে মোর ভাই

বইনিলা মোর কতা শুনিয়া ক্রীত দ্বীপ থাকি তোমরা যদি জাহাজ  
না ছাড়িলেন হয় তাইলে এই বিপদ আর ক্ষয় ক্ষতির হাত থাকি  
বাঁচিলেন হয়।

২২ কিন্তু এলা মুই কবার ধরচুং, তোমরালা সাহস কর, কেনেনা  
তোমরা কাণ্ডেয় মরিবেন না! খালি জাহাজ খান নষ্ট হবে।

২৩ মুই যেই ভগবানের উপাসনা করং উয়ার এক জন স্বর্গদূত  
যাওয়া রাতি মোর আগ পাকে খাড়া হয় কইলেক,

২৪ ‘ঐ পৌল ভয় না করেন, তোক মহারাজার আগত খাড়া হবার  
নাগিবে। এই জাহাজত যায় যায় তোর সাথত যাবার ধরচে সগারে  
পরান ভগবান রক্ষা করিবে।’

২৫ এই বাদে তোমরা মনত সাহস থোন, ভগবানের উপরাত মোর  
এই বিশ্বাস আছে উয়ায় যা কইচে তাই হবে।

২৬ তাইলে হামরা কোন না কোন দ্বীপত যায়া আছড়ে পড়িমো।”

২৭ তুফানের মইন্ধোত চৌদ রাতি আদ্রিয়া সাগরত ভাসি থাকার  
পাছত, মইন্ধো রাতিত নাবিকলার মনে হইলেক যে, জাহাজ খান  
কোন ডাঙার বগল আসিচে।

২৮ উমরা জলের তলা মাপিয়া দেখিলেক যে, উপর থাকি  
জলের তলা পর্যন্ত আশি হাত। অল্প খানিক পাছত আরো মাপিয়া  
দেখিলেক ষাইট হাত।

২৯ উমরা ভয় করির নাগলেক যে, জাহাজ খান কাইন্টার  
শিলোত ধাক্কা নাগিবে। এই বাদে উমরা জাহাজের পাছ পাকের



চারটা নোংগর ফ্যেলেয়া দিলেক আর দিনের বাদে প্রার্থনা করির নাগিলেক।

৩০ নাবিকলার মইন্ধোত কাণ্ডো কাণ্ডো জাহাজ থাকি পালেয়া যাবার চেষ্টা করির নাগিলেক। এই বাদে জাহাজের মাথা থাকি আরো নোংগর ফ্যেলের ভান করি ছোট নাও খান সাগরত নামেয়া দিলেক।

৩১ পৌল শতপতি আর সৈন্যলোক কইলেক, “এই মানষিলা যদি জাহাজত না থাকে, তোমরা বত্তির পাবেন না।”

৩২ সেলো সৈন্যলো নাও এর দড়ি কাটিয়া দিলেক, যাতে নাওখান জলত পড়ি ভাসিয়া যায়।

৩৩ খুব সাকালে পৌল সগাকে কিছু খাবার আন্দার করি কইলেক, “আজি থাকি চৌদ্দ দিন হইলেক কি হবে না হবে, এই চিন্তা করিয়া তোমরা না খায়া উপাস করিয়া আছেন।

৩৪ এলা মুই তোমারলাক কিছু খায়া নিবার আন্দার করির ধরচুং। বত্তি রবার বাদে তোমারলাক কিছু খাওয়া দরকার। দেখেন তোমরালার একখান ঢুলি পর্যন্ত নষ্ট হবে না।”

৩৫ এই কতা কয়া পৌল রুটি নিয়া সগারে আগত ভগবানক ধন্যবাদ দিয়া টুকরা করি খাবার নাগিলেক।

৩৬ সেলো উমরা সগায় সাহস পায়া খাবার নাগিলেক।

৩৭ হামরা জাহাজত মোট দুইশ ছিয়াত্তরজন আছিলোং।

৩৮ সগায় পেট ভরে খাবার পাছত জাহাজের ওজন কমেবার বাদে সউগ গম সাগরত ফ্যেলে দেওয়া হইলেক।

৩৯ দিন হবার পাছত উমরা জাগাখান চিনির পাইলেক না। কিন্তু এমন একটা উপসাগর দেখির পাইলেক, যার কাইন্টাখান বালাতে ভত্তি। উমরা ঠিক করিলেক, যদি সম্ভব হয় জাহাজ খান কাইন্টাত তুলিয়া খুবে।

৪০ এই বাদে জাহাজের নোংরলা কাটিয়া সাগরত ফ্যেলেয়া দিলেক। আর হালত বান্দা দড়িলা খসেয়া দিলেক। তার পাছত পাল তুলিয়া কাইন্টার পাকে আগে যায়া বালা বাড়িত আটকি গেইলেক।

৪১ জাহাজের আগপাক খান ডাবি যাওয়াতে পাছপাকে জলের ঢেউয়ের ধাক্কায় ভাঙিয়া টুকরা টুকরা হয় গেইলেক।

৪২ সৈন্যলো সেলো বন্দীলাক মারি ফ্যেলাবে, এইটা ঠিক করিলেক, যাতে উমরলার মইন্ধে কাণ্ডেয় সাতরেয়া পালেয়া যাবার না পায়।

৪৩ কিন্তু শতপতি পৌলের জীবন বত্তের চাওয়াতে সৈন্যলোক ইচ্ছা মতন কাম করির দিলেক না। উয়ায় আদেশ দিলেক, যায় যায় সাতার জানে উমরা পইলা ডাঙাত যায়া উঠুক।

৪৪ আর বাকি সগায় জাহাজের তক্তা বা অইন্য কোন টুকরা ধরিয়া কাইন্টা যাবার চেষ্টা করুক। এই নাকান করি সগায় নিরাপদে ডাঙাত আসিয়া উঠিলেক।

২৮ নিরাপদে পৌঁছির পাছত হামরা জানিলোং যে, দ্বীপটার নাম মাল্টা।

২ ওটেকার মানষিলা হামাক খুব আদর করিলেক। জল পড়ির বাদে খুব ঠাণ্ডা পড়ায়, উমরা অগুন জ্বলেয়া হামারলাক সগাকে ডেকাইলেক।

৩ পৌল এক বোঝা শুকান খড়ি জড়ো করি অগুনত দিবার সমায় অগুনের আছে একটা বিষাক্ত সাপ বাইর হয়। পৌলের হাতত কামড়াইলেক।

৪ সাপটাক পৌলের হাতত বুলা দেখিয়া ঐ দ্বীপের মানষিলা কওয়াকুয়ি করির নাগিলেক, “এই মানষিটা নিশ্চয় খুনী, কেনেনা সাগরের হাত থাকি বত্তিলেও বিচারের দেবতা উয়াক বত্তির দিলেক না।”

৫ কিন্তু পৌল হাতটা ঝাড়িতে কালে সাপটা অগুনত পড়ি গেইলেক, আর উয়ার কোনয় ক্ষতি হইলেক না।

৬ এই ঘটনাটা দেখিয়া মানষিলা মনে মনে ভাবিবার নাগিলেক উয়ার দেহা ফুলিয়া হঠাৎ মরি যাবে। কিন্তু মেয়ো ক্ষণ দেড়ি করিয়াও উয়ার কোনয় হইলেক না, এই বাদে উমরালা মত বদলে কবার নাগিলেক, “উয়ায় নিশ্চয় দেবতা।”

৭ ঐ জাগার বগলত দ্বীপের প্রধান জোতদার পুল্লিয়র একটা খামার বাড়ি আছিলেক। ওটেকোনা হামাক ডেকাইলেক আর

তিন দিন ধরিয়া খুব আদর করি সেবা-যতন করিলেক।

৮ এই সমায় পুন্নিয়র বাপ, জ্বর আর আমাশা অসুখে বিছনাত পড়ি ভুগিবার ধরছিলেক। পৌল উয়াক দেখিবার বাদে ভিতিরাত যায় প্রার্থনা করিলেক, আর দেহাত দুই হাত খোয়াতে ভাল হয় গেইলেক।

৯ এই ঘটনার পাছত ঐ দ্বীপত যত অসুকিয়া আছিলেক, উমরা সগায় পৌলেরটে আসিয়া ভাল হইলেক।

১০ উমরা নানা নাকান উপহার দিয়া হামাক সন্মান জানাইলেক। পাছত জাহাজ ছাড়ির সমায় হামারলার যাত্রার বাদে সউগ দরকারি জিনিস-পাতি জাহাজত বোঝাই করি দিলেক।

১১ ঐ দ্বীপত তিন মাস থাকার পাছত হামরা আলেক্সান্দ্রীয়া গঞ্জের একখান জাহাজত উঠিয়া যাত্রা করিলুং। জারের দিনলা জাহাজ খান ঐ দ্বীপতে থাকিলেক, ঐ জাহাজের মাখাত যমজ দেবতার মূর্তি খোদাই করা আছিলেক।

১২ পাছত হামরা সুরাকুষ নামে বন্দরের ঘাটত জাহাজ বান্দিয়া ওটে তিন দিন রইলোং।

১৩ আর ওটে থাকি যাত্রা করি রীগিয় নামে জাগাত পৌছিলোং। পরের দিন দক্ষিণা বাও বওয়াতে তার পরের দিন পুতিয়লী বন্দরত পৌছিলোং।

১৪ ওটেকোনা হামরা কয়েক জন গুরুভাইয়ের দেখা পাইলোং। উমার সাথত এক হাপ্তা কাটার বাদে হামাক আন্দার করিলেক।

এই নাকান করি হামরা রোম গঞ্জত আসিলোং।

১৫ ওটেকার গুরুভাইলা হামার আসিবার কতা শুনিলেক। শুনিয়া ঘাটাত হামার সঙ্গী হবার বাদে আঙ্গিয়ের হাট, কাণ্ডো কাণ্ডো তিন সরাই পর্যন্ত হামার নগত দেখা করির আসিলেক। এই মানষিলাক দেখিয়া পৌল ভগবানক ধন্যবাদ দিলেক, নিজেরও সাহস বাড়িলেক।

১৬ হামরা রোমত পৌছিবার পাছত পৌলের পছন্দ মতন আলদা ঘরত থাকিবার অনুমতি পাইলেক। কিন্তু এক জন সৈন্য উয়াক পাহারা দিলেক।

১৭ আর তিন দিন পাছত পৌল ওটেকার যিহুদী প্রধান নেতালোক নিয়া একটা সভা ডেকাইলেক। উমাক কইলেক, “হে মোর ভাইলা, যদিও মোর জাতির বিরুদ্ধে, হামার বাপ ঠাকুর দাদার নিয়মের বিরুদ্ধে মুই কোন কিছু নাই করং, তাণ্ডো মোক যিরুশালেমত বন্দী করিয়া রোমীয় সরকারের হাতত তুলি দেওয়া হইচে।

১৮ উমরা মোর বিচার করিয়া মারি ফেলের কোন দোষ না পায়। মোক ছাড়ি দিবার চাইচে।

১৯ কিন্তু যিহুদী মানষিলা ইয়ার বিরোধীতা করায় মুই মহারাজারটে আপিল করির বাধ্য হলুং। তাণ্ডো মোর জাতির মানষিলা অন্যায় করিচে এইটা দোষ দিবার মুই চাং নাই।

২০ আসলে হইলেক, যেই বাছাই করা রাজাটার বাদে ইজ্রায়েল জাতির মানষিলা আশা করে, মুই বিশ্বাস করং উয়ায় আসিচে। আর মোর এই বিশ্বাসের বাদে আজি শিকল দিয়া মুই বন্দী আছং। এই বাদে তোমারলার সাথত দেখাশুনা করিয়া এই বিষয় আলাপ-আলোচনা করির ড্যেকালুং।”

২১ যিহুদী নেতালা কইলেক, “তোমার বিষয়ে যিহুদীয়া প্রদেশ থাকি কোন চিঠি পাই নাই। ওটেকোনা থাকি আইসা হামার ভাইলার মইন্ধো থাকি তোমার বিষয় কাণ্ডো কোন বেয়া খবর দেয় নাই, বেয়া কতাও কয় নাই।

২২ কিন্তু তোমার মতামত কি, সেইটায় তোমার মুখ থাকি হামার শুনিবার ইচ্ছা। কেনেনা এই দলের বিষয় হামরা জানি, মানষিলা সউগ জাগাতে ইয়ার বিরুদ্ধে কতা কয়।”

২৩ পৌলের সাথত একটে হবার বাদে একটা দিন থির করিলেক, আর পৌল যেটে রয় ওটে উমরা ছাড়াও আরো মেয়লা মানষি আসিলেক। সেয়লা পৌল সাকাল থাকি সইন্ধা পর্যন্ত ভগবানের শাসন ব্যবস্থার বিষয় সাক্ষ্য দিলেক। আরো মহাপুরুষ মোশির নিয়ম থাকি আর ভগবানের ভাববাদীলার গ্রন্থের নেখা থাকি যীশুর বিষয় দেখেয়া উমার বিশ্বাস বাড়েবার চেষ্টা করিলেক।

২৪ উয়ার কতা শুনিয়া কাণ্ডো বিশ্বাস করিলেক, কাণ্ডো করিলেক না।

২৫ আর উমার মইদে মতের মিল না হওয়াতে উমরা চলি যাবার নাগিলেক। উমরাল্লা যাবার সমায় পৌল কইলেক, “পবিত্র আত্মা ভাববাদী যিশাইয়ের মইদে দিয়া তোমার বাপ ঠাকুরদাদাক সচাং করি এই কতা কইচে,

২৬ ‘তোমরা এই মানষিলারটে যায়া কও, তোমরা শুনিবেন কিন্তু বুঝিবেন না, চায়া দেখিবেন কিন্তু দেখির পাবেন না।

২৭ এই মানষিলার অন্তর পাষান হয় গেইচে, কান আছে কিন্তু শুনির পায় না, উমরা চোখু মুজিয়া আছে, যাতে দেখির না পায়, আর কান দিয়া শুনির না পায়, অন্তর দিয়া বুঝির না পায়, আর ভাল হবার বাদে মোরটে ফিরিয়া না আইসে।’

২৮ “তোমরা এইটা ফম থোন, ভগবান মানষিক কেমন করি পাপ থাকি মুক্তি দেয়, এই কতা অযিহুদী মানষিলাক জানে দেওয়া হবে। উমরাল্লায় এই কতা শুনিবে।”

২৯-৩০ পৌল দুই বছর নিজের খরচায় ভাড়া বাড়িত থাকিলেক। যত মানষি পৌলের সাথত দেখা করির আসিলেক, উয়ায় সগাকে আপন করিয়া নিলেক।

৩১ পৌল সাহস করিয়া ভগবানের শাসন ব্যবস্থার বিষয় প্রচার করির আরো প্রভু যীশুর বিষয় শিক্ষা দিবার ধরছিলেক, কাণ্ডো উয়াক বাধা দেয় নাই॥

# রোমীয়

১ মুই পৌল, ভগবানের বাছাই করা রাজা যীশুর চাকর, রোম গঞ্জের যীশুর শিষ্যলারটে এই চিঠি নেখির ধরচুং। ভগবান উয়ার খবরিয়া হবার বাদে মোক ডেকাইচে আর সউগ মানষিরটে ভগবানের ভাল খবর প্রচার করির বাদে মোক বাছাই করিচে।

২ ভগবান উয়ার ভাববাদীলাক দিয়া যে ভাল খবর পবিত্র শাস্ত্রত আগতে প্রতিজ্ঞা করিচিলেক,

৩ সেই ভাল খবর হইলেক উয়ার নিজের বেটার সমন্ধে। সেই বেটা মানষি হিসাবে রাজা দায়ূদের গুষ্টির আছিলেক,

৪ আর উয়ায় পবিত্র আত্মার শক্তি দিয়া মরণ থাকি ফির বত্তি উঠিয়া প্রমাণ করিলেক যে, উয়ায় ভগবানের বেটা। আর উয়ায় হইলেক হামারলার প্রভু যীশু খ্রীষ্ট।

৫ খ্রীষ্টের মইন্ধো দিয়া আর উয়ার নামের গুণের বাদে হামরা ভাগ্যবান হয়। খবরিয়ার পদ পাইচি, যেনে সউগ জাতির মানষি বিশ্বাস করিয়া ভগবানের বাধ্য থাকির পায়।

৬ সেই মানষিলার মইন্ধোত তোমরালাও আছেন, যীশু খ্রীষ্টের মনের মানষি হবার বাদে ভগবান তোমারলাক ডেকাইচে।

৭ হে রোমবাসীর ঘর, তোমরা যায় যায় ভগবানের পবিত্র মানষি, ভগবান তোমারলাক ভাল পায়। আর তোমারলাক সগাকে মুই



এই চিঠি নেখির ধরচুং। ভগবান আর খ্রীষ্ট যীশু তোমারলাক দয়া আর শান্তি দান করুক।

৮ পইলাতে মুই তোমারলার সগারে বাদে যীশু খ্রীষ্টের নামে ভগবানক ধন্যবাদ জানের ধরচুং, কেনেনা তোমারলার বিশ্বাসের কতা সারা দুনিয়াত ছড়িয়া পড়িচে।

৯ ভগবানের বেটার সমন্ধে ভাল খবর প্রচার করিয়া মন-পরান দিয়া মুই ভগবানের সেবা করির ধরচুং। যত বার মুই প্রার্থনা করং ততবারেই যে তোমারলার কতা ফম করং, আর উয়ায় ঐলার সাক্ষী।

১০ মোর প্রার্থনা এই মতন, যদি ভগবানের ইচ্ছা হয়, মুই কোনো মতে এইবার তোমারলার ওটে যাবার পাং।

১১ কেনেনা তোমারলাক শক্তিবান করি তুলিবার বাদে কোনো আত্মিক বরদান মুই যেন তোমারলাক দিবার পাং, এই বাদে মুই তোমারলার সোদে দেখা করির চাবার ধরচুং।

১২ মুই কবার চাং যে, হামারলার আর তোমারলার যে বিশ্বাস আছে, হামরা যেন সগায় একে অপরক সায দেই।

১৩ ভাই-বইনির ঘর, তোমরা এই কতা জানেন যে, মুই ম্যেলা বার তোমারলারটে যাবার চেষ্টা করিচুং, কিন্তু খালি বাধা পয়া আসচুং। মুই তোমারলার ঐটে এই বাদে যাবার চাং, যাতে তোমারলার আত্মিক জীবন বাড়েয়া তুলির সাহায্য করির পাং।

যেই নাকান করি দোসরা জাগার অযিহুদী মানষিলাক সাহায্য করির ধরচুং, ঐ নাকান করি তোমারলাকও সাহায্য করির চাং।

১৪ সভ্য-অসভ্য, শিক্ষিত-অশিক্ষিত, সগারেটে মুই ঋণী।

১৫ এই বাদে তোমরা যায় যায় রোমত আছেন তোমারলারটেও যীশু খ্রীষ্টের সমন্ধে ভাল খবর প্রচার করির বাদে মুই আগ্রহী।

১৬ কেনেনা মুই ভাল খবর সমন্ধে শরম না খাং, ভাল খবর তো হইলেক শিষ্যলারটে ভগবানের শক্তি। বিশ্বাস করা দিয়া শিষ্যলাক পাপ থাকি মুক্তি করে, পইলাত যিহুদীলাক পরে অযিহুদীলাক।

১৭ ভগবান কেংকরিয়া মানষিলাক পাপ নির্দোষ কয়া মানি নেয়, সেই কতা ভাল খবরের মইন্ধো দিয়া তুলি ধরা হইচে। পইলা থাকি শেষ পর্যন্ত খালি বিশ্বাসের মইন্ধো দিয়া মানষিক নির্দোষ কয়া মানি নেওয়া হয়। পবিত্র শাস্ত্রত নেখা আছে, “যাক নির্দোষ কয়া মানি নেওয়া হয় উয়ায় বিশ্বাসের বাদেই জীবন পাবে।”

১৮ মানষি ভগবানের সচাংটাক অন্যায় দিয়া ঢাকি থোয়, তারে বাদে ভগবানের প্রতি মানষির ভক্তির অভাব আর সউগ অন্যায় কামের বাদে স্বর্গ থাকি ভগবানের গোসা মানষির উপরা নামি আইসে।

১৯ ভগবান সমন্ধে মানষির যেইটা জানার দরকার সেইটা উমারটে পষ্ট জানা। কেনেনা ভগবান নিজে উমারটে সেইলা তুলি ধরচে।

২০ ভগবান সমক্ষে এমন নিগূঢ় গুণলা মানষি চোখু দিয়া দেখিবে পায় না, তাণ্ডো উয়ার চিরকালের ক্ষমতা আর দৈব স্বভাব, দুনিয়া সিদ্ধজনের পইলা থাকি বাকবাক করি দেখা যাবার ধরচে যে, উয়ায় ভগবান। এই বাদে মানষি আর কোনো তাল-বাহানা দেখের পায় না।

২১ আর মানষি উয়ার সমক্ষে জানিয়াও ভগবান হিসাবে মান দেয় নাই আর উয়াক ধন্যবাদও জানায় নাই। মানষিলার চিন্তা-ভাবনা হীন হয়। গেইচে আর উমারলার হীনবুদ্ধির অন্তর কানা হয়। গেইচে।

২২ যদিও উমরা নিজেকে জ্ঞানী বুলি দাবি করে, আসলে উমরা মূর্থ হয়। গেইচে।

২৩ উমরা চিরকালের ক্ষমতাশালী মহিমায় ভরপুর ভগবানের উপাসনা ছাড়ি দিয়া, ক্ষমতা হীন মানষির, পশু-পখি আর বুক দিয়া হাটা প্রাণীর ফটকলার পূজা করে।

২৪ মানষি ভগবানক ছাড়ি দিচে বুলিয়া ভগবান উমারলার খুশি মতো পাপের ঘাটা দিয়া উমাক যাবার দিলেক। উমার মনের কামনা-বাসনার বাদে বেয়া কাম করির দিলেক।

২৫ উমরা ভগবানের সচাং ঘাটা ফেলে খুইয়া কুঘাটা দিয়া যাবার ধরচে, সিদ্ধজন কর্তাক সারে খুইয়া সিদ্ধজন জিনিসক পূজা করির ধরচে। চিরদিন এক মাত্র ভগবানের উপাসনা করা উচিত।

২৬ মানষিলা ঐলা বেয়া কামের কুঘাটা দিয়া গেইচে বুলিয়া  
ভগবান উমারলাক কামনা-বাসনার ঘাটাত ছাড়ি দিলেক।  
বেটিছাওয়ালা বেটাছাওয়ালার নগত ভাল ব্যবহার বদলে  
অস্বাভাবিক যৌন কামনাত মজিয়া গেইচে।

২৭ ঠিক একে নাকান করি বেটাছাওয়ালা বেটিছাওয়ালার নগত  
স্বাভাবিক ব্যবহারের বদলে দোসরা বেটাছাওয়ার নগত যৌন  
কামনাত মজিয়া গেইচে। বেটাছাওয়ায় বেটাছাওয়ায় শরমের  
খারাপ কাম করিচে। এই বাদে উমরা সগায় এই পাপ কামের  
শাস্তি নিজে নিজে পাইচে।

২৮ মানষি ভগবানক মানির চায় নাই এই বাদে ভগবানও উমাক  
ছাড়ি দিচে যাতে উমরала বেয়া কামত, বেয়া চিন্তাত ডুবি থাকে  
আর যেইলা কাম করা ঠিক না হয় সেইলায় করে।

২৯ সউগ নাকানের অন্যায়, বেয়া কাম, লোভ, ঘিন করা, হিংসা,  
খুন, মারামারি, ছলনা আর অইন্যের ক্ষতি করির ইচ্ছা।

৩০ উমরা কান ভাঙানির কতা কয়, অইন্যের গেলানি গায়, আর  
ভগবানক ঘিন খায়। উমরা বদমেজাজী, অহংকারী, আর সউগ  
কিছুতে দর্প করে। ক্ষতি করির বাদে নয়া নয়া উপায় বাইর করে।  
উমরা বাপ-মাও এর অবাধ্য হয়,

৩১ ন্যায়-অন্যায়ের জ্ঞান উমারলার নাই। উমরала কতা দিয়া  
কতা রাখে না, পরিবারের প্রতি উমার মায়া-দয়া নাই, উমারলার  
অন্তর পাষান হয় গেইচে।

৩২ ভগবানের বিচারের কতা উমরালা খুব ভাল করি জানে, জানিয়াও আজিলির নাকান হয়। মরির বাদে শাস্তি পাবার কাম করে। খালি এই নাকানে না হয় অইন্য মানষিলাক উমরালা এই বেয়া কামলা করির সায দেয়।

২ কাণ্ডো যদি মনে করে ঐ মানষিলাক বিচার করির পারে, তাইলে মুই উয়াক কইম, তুই ভুল করির ধরচিস, কেনেনা তুইও তো দোষী। তুই অইন্য মানষির বিচার করিস, কিন্তু তুইও একে মতন বেয়া কাম করিস। এই বাদে যেলা তুই অইন্য মানষির বিচার করিস, সেলা তুই নিজক দোষী বুলিয়া প্রমাণ করিস।

২ হামরা জানি যায় যায় বেয়া কাম করে, ভগবান উমরলার বিচার করে। আর ভগবানের বিচার হইলেক ন্যায্য বিচার।

৩ যেইলা কামের বাদে মানষিলাক তুই দোষ দিস ঐ একে কাম তুই নিজেও করিস, সেলা কি তুই ভগবানের শাস্তির হাত থাকি রেহাই পাবু বুলি মনে করিস?

৪ তুই তো ভগবানের সীমাহীন দয়া, সহ্যগুণ আর ধৈর্য তুচ্ছ করির ধরচিস। তুই ফম হারে ফেলাইছিস ভগবানের দয়ার উদ্দেশ্য হইলেক, তোক পাপের ঘাটা থাকি মন ঘুরিয়া ভগবানের ঘাটাত ফিরি নিয়া আইসা।

৫ কিন্তুক তোর মন তো পাষান আর অবাধ্য, তুই তো পাপের ঘাটা থাকি মন ফিরির চাইস না। এই বাদে তোর দোষ তুই

ঘোরতর করি তুলির ধরচিস। যেদিন ভগবানের গোসা দেখা দিবে  
সেই দিনের বাদে তুই তোর পাওনা শাস্তি জমা করি খুবার ধরচিস।  
সেই দিন মানষিলা ভগবানের ন্যায্য বিচার দেখির পাবে।

৬ ভগবান পতিটা মানষিক উয়ার কাম অনুসারে ফল দিবে।

৭ যায় যায় ভাল কাম ধৈর্য ধরি করে, উমরা ভগবানেরটে থাকি  
গুণগান, সন্মান, আর ধ্বংস না হওয়া জীবন পাবার চায়, ভগবান  
উমারলাক অমৃত জীবন দিবে।

৮ কিন্তুক যায় যায় স্বার্থপর আর সত্য না মানিয়া অন্যায়ক মানি  
নেয় ভগবান উমারলাক কঠিন শাস্তি দিবে।

৯ যায় যায় পাপ করি বেড়ায় উমারলার সগারে জীবনত দুঃখ-  
কষ্ট আর দুর্দশা আসিবে, পইলা যিহুদীলার তার পাছত  
অযিহুদীলার উপরাত।

১০ কিন্তুক যায় যায় ভাল কাম করে উমরালা ভগবানের  
গুণগান, সন্মান আর শাস্তি পাবে, পইলা যিহুদীলা তার পাছত  
অযিহুদীলা।

১১ ইয়াতে দেখা যায় ভগবানের চখুত সগায় সমান।

১২ শ্রী মোশির বিধানের বায়রা থাকা অবস্থায় যায় যায় পাপ  
করে উমরা বিধান ছাড়ায় ধ্বংস হবে। কিন্তুক যায় যায় বিধানত  
থাকিয়া পাপ করে উমার বিচার বিধান দিয়ায় হবে।

১৩ যায় যায় খালি বিধানের কতা শুনে উমরা ভগবানের চখুত  
নির্দোষ না হয়। কিন্তুক যায় যায় বিধান পালন করে ভগবান

উমাকে নির্দোষ কয়া মানি নিবে।

১৪ অযিহুদীলাক মোশির বিধান দেওয়া হয় নাই, কিন্তুক তাণ্ডে উমরা নিজেৰ থাকি বিধান মত যদি কাম করে তাইলে দেখা যায় উমরা বিধানত না থাকিয়াও নিজেই নিজে বিধান হয়। ওঠে।

১৫ ইয়াতে দেখা যায় যে, বিধানের মতে কোনটা ভাল কোনটা মন্দ সেইটা উমার অন্তরত নেখা আছে। উমার বিবেকও এই ব্যাপারে সাক্ষ্য দেয়। উমার ভাবনা কোন কোন সমায় উমাক দোষী করে আর কোন কোন সমায় উমার পক্ষে সাক্ষ্য দেয়।

১৬ ভগবান যেদিন যীশু খ্রীষ্টের মইদ্বো দিয়া মানষির গোপন সউগ কিছুৰ বিচার করিবে ঐ দিন ঐলা নিকলিবে। মুই এই নাকান প্রচার করং।

১৭ তুই নিজক যিহুদী কইস, হয় কি না? তুই শ্রী মোশির বিধানের উপরত নির্ভর করিস আর নিজক ভগবানের মানষি কয়া দর্প করিস।

১৮ ভগবান কি চায় সেইটা তুই জানিস আর যেইটা ভাল সেইটা মানি নে, কেনেনা বিধান থাকি তুই শিক্ষা পাইচিস।

১৯ তুই মনে করিস কানালাক ঘাটা দেখের ধরচিস। তুই ভাবিস যায় যায় আন্ধারত আছে উমারটে তুই আলোর মতন।

২০ তোর ধারণা, তুই বিবেক হীনের গুরু, ছাওয়ালার মাষ্টার। বিধানের মইদ্বোত জ্ঞান আর সহিত্য আছে বুলিয়া তুই জানিস।

২১ বেশ ভাল, তুই যদি অইন্য মানষিলাক শিক্ষা দিস তাইলে তুই নিজক শিক্ষা দিস না কেনে? তুই প্রচার করির ধরচিস, “চুরি না করিস,” কিন্তু তুই নিজেই চুরি করির ধরচিস।

২২ তুই কয়া থাকিস, “ব্যভিচার না করিস,” কিন্তু তুই নিজে ব্যভিচার করিচিস কিনা? তুই তো প্রতিমা ঘিন খাইস কিন্তুক তুই তো নিজে প্রতিমার মন্দিরত যায়া চুরি করিচিস কিনা?

২৩ বিধান নিয়া গর্ব করিস, কিন্তু তুই নিজে বিধান না মানিয়া ভগবানক অসন্মান করিচিস কিনা?

২৪ শাস্ত্রত নেখা আছে, “তোমারলার বাদে অযিহুদীলা ভগবানের নিন্দা করে।”

২৫ তুই যদি মোশির বিধান মানি চলিস তাইলে তোর সুন্নত করার দাম আছে, কিন্তু যদি বিধান না মানিস তাইলে সুন্নত করা হইলেও সুন্নত না করা মানষির মতন।

২৬ এই বাদে সুন্নত না করা মানষি যদি বিধানের আদেশ মানিয়া চলে, তাইলে কি ভগবান উয়াক সুন্নত করা মানষি কয়া ধরিবে না?

২৭ তোমার যিহুদীলারটে নেখা বিধান আছে আর সুন্নতও দেওয়া হইচে। কিন্তুক তুই যদি বিধান অমান্য করিস তাইলে অযিহুদীলা যায় যায় সুন্নত না করিয়াও বিধান মানির ধরচে, উমরা তোক দোষী করিবে।



২৮ খালি বায়রাত যায় যিহুদী উয়ায় আসল যিহুদী না হয়, দেহাত সুনত হইলেই আসল সুনত হয় নাই।

২৯ কিন্তুক অন্তরত যায় যিহুদী উয়ায় হইলেক আসল যিহুদী। আসল সুনত দেওয়ার কাম অন্তরত হয়। ঐটা হইলেক আত্মিক ব্যাপার, দেহার ব্যাপার না হয়। উমরা মানষির গুণগান না পাইলেও কিন্তুক ভগবানের গুণগান পায়।

৩ তাইলে যিহুদীলার কি বিশেষ সুবিধা হইচে যেইটা অইন্য মানষিলার হয় নাই? সুনত করিয়ায় বা লাভ কি?

২ সউগ পাকে যিহুদীলার মেলা লাভ হইচে। পইলাত ভগবান উয়ার বাইক্য যিহুদীলাকে দিছিলেক।

৩ এই কতা ঠিক যে উমার মইন্ধে কিছু কিছু মানষি বেইমানি করিচে, কিন্তুক তাতে কি হইচে? উমরা বেইমানি করে বুলিয়া কি ভগবানও বেইমানি করিবে?

৪ নিশ্চয় করিবে না। সউগ মানষি মিথ্যাবাদী হইলেও ভগবান সউগ সমায় যে সত্যবাদী সেইটা স্বীকার করা হউক। শাস্ত্রত নেখা আছে, “তোমার রায় ঠিক, তোমার বিচার নিখুঁত।”

৫ কিন্তুক হামারলার অন্যায় কামলা যদি আরো ঝকঝকা করি বুঝায় যে, ভগবান কত ন্যায়বান, তাইলে হামরা কি কমু? ভগবান গোসা হয়্যা যেলা শাস্তি দেয় সেলা অন্যায় বিচার করে, এই কতা কমু কি? (মুই দুনিয়ার মানষির নাকান কবার ধরচুং)

৬ একেবারে না হয়! ভগবান যদি এই নাকান হয় তাইলে দুনিয়ার বিচারের অধিকার উয়ার কেমন করি থাকিবে?

৭ কাণ্ডো হয় তো কবে, “হামরা মিছা কতা কবার বাদে আরো ঝকঝকা করি দেখা যায় ভগবান সত্যবাদী। ইয়াতে হামার মিছার বাদে ভগবানের গুণগান হয় তাইলে পাপী হিসাবে হামারলার বিচার করা হয় কেনে?”

৮ তাইলে কি হামরা এই কতা কমু যে, “চল, হামরা বেয়া কাম করিতে থাকি যাতে সেই বেয়া কামের বাদে ভাল ফল আসির পারে?” কোন কোন মানষি হামার গেলানি করি কয় যে, হামরা নাকি এই নাকান কতা কই, উমরা উমার পাওনা শাস্তি পাবে।

৯ এলা হামরা কি কমু? যিহুদী হিসাবে হামার অবস্থা কি অযিহুদীলার চায়া ভাল? না এই মতন না হয়, হামরা আগত কইচি যে যিহুদী আর অযিহুদী সগায় সমান পাপের অধীন।

১০ পবিত্র শাস্ত্রত তো নেখা আছে, “কাণ্ডো নির্দোষ নাই, এক জনও নাই!

১১ বোঝে এমন কাণ্ডো নাই, ভগবানক খোঁজে এমন কাণ্ডোয় নাই।

১২ সগায় ভগবানের ঘাটা থাকি দূরত সারি গেইচে, সগায় বেয়া হয় গেইচে, ভাল কাম করে এমন কাণ্ডো নাই, এক জনও নাই।

১৩ উমারলার মুখ বন্ধ না করা সমাধির মতন, জিবা দিয়া উমরা ছলনার কতা কয়, উমার ঠোটত যেন সাপের বিষ আছে,

১৪ সউগ সময় উমার মুখত খালি অভিশাপ আর হিংসায় ভরা।

১৫ খুন করির বাদে উমার পাও পচপচে দৌড়ায়,

১৬ উমার পাও যেই ঘাটা দিয়া যায় ঐ ঘাটাত খুইয়া যায় ধ্বংস  
আর নাশ।

১৭ শান্তির ঘাটা উমরা জানে না,

১৮ উমরা ভগবানকও ভয় না খায়।”

১৯ হামরা জানি শ্রী মোশির বিধান উমারে বাদে যায় যায় ঐ  
আইন কানুনের অধীন। এই বাদে যিহুদী বা অযিহুদী কাঙোরো  
কিছু কবার নাই, সউগ মানষি ভগবানেরটে দোষী হইচে।

২০ বিধান পালন করিলে যে ভগবান মানষিক নির্দোষ কয়া মানি  
নিবে এমন কিন্তুক না হয়। বিধানের বাদে মানষি খালি পাপের  
চেতনা বুঝির পাবে।

২১ ভগবান মানষিক এলা বিধান ছাড়ায় কেমন করি নির্দোষ  
কয়া মানি নেয় সেইটা প্রকাশ পাইচে। শ্রী মোশির বিধান আর  
ভাববাদীলা সেই বিষয়ে সাক্ষ্য দিয়া গেইচে।

২২ যায় রাজা যীশুর উপরাত বিশ্বাস থোয় উমার সেই বিশ্বাসের  
বাদেই ভগবান উমাক নির্দোষ কয়া মানি নিবে, যিহুদী আর  
অযিহুদী সগায় সমান,

২৩ কেনেনা সগায় পাপ করিচে, আর ভগবানের সাব্বাস পাবার  
অযোগ্য হয় পড়িচে।

২৪ কিন্তু রাজা যীশু হামারলাক পাপের হাত থাকি মুক্ত করির ব্যবস্থা করিচে আর এই বাদে দয়ার দান হিসাবে নির্দোষ কয়া ভগবান মানি নিচে।

২৫ ভগবান যীশুক বলির বাদে হামারলারটে সঁপে দিলেক, যাতে যায় যায় উয়াক বিশ্বাস করে, বিশ্বাসেই উমার সউগ পাপ ক্ষমা হয়। ভগবান দেখাইচে, উয়ায় উয়ার সহ্যগুণ দিয়া মানষির আগের পাপের শাস্তি দেয় নাই, তাঞো উয়ায় ন্যায়বান।

২৬ উয়ায় যে ন্যায়বান উয়ায় সেইটা এলায় দেখাইচে, যাতে প্রমাণ হয় উয়ায় নিজে ন্যায়বান আর যে কাঙো যীশুক বিশ্বাস করে উয়াকও নির্দোষ কয়া মানি নেওয়া হয়।

২৭ এই বাদে গর্ব করির মত আর কি আছে? কিছুই নাই। কিন্তুক কেনে নাই? মানষি বিধান পালন করে কয়া কি উয়ার গর্ব করির কিছুই নাই? কিন্তুক সেইটা না হয়। আসল কতা হইলেক আস্থার উপরাত গর্বের কোন জাগা নাই।

২৮ কেনেনা হামরা জানি, ভগবান মানষিক উয়ার আস্থার বাদে নির্দোষ কয়া মানি নেয়, বিধান পালন করির বাদে না হয়।

২৯ ভগবান কি খালি যিহুদীলারে ভগবান, অযিহুদীলার না হয়? হ্যে অযিহুদীলারো ভগবান,

৩০ কেনেনা ভগবান তো এক জন। উয়ায় যিহুদীলাক যেই মতন বিশ্বাসের বাদে নির্দোষ কয়া মানি নেয় একে মতন অযিহুদীলাকো বিশ্বাসের বাদে মানি নেয়।

৩১ এই বিশ্বাসের বাদে আমরা কি বিধান বাতিল করির ধরচি? কোন দিন না হয়, বরং বিশ্বাসের ঘাটাত চলিয়া আমরা বিধান যে সচাং সেইটা প্রমাণ করচি।

৪ তাইলে আমার পূর্বপুরুষ শ্রী অব্রাহামের বিষয়ে আমরা কি কোমু? বিশ্বাস সমন্ধে উয়ায় কি বুঝির পাইচে?

২ কামের বাদে যদি অব্রাহামক ধার্মিক কওয়া হয় তাইলে তো গর্ব করিরে বিষয়। কিন্তুক ভগবানের আগত উয়ার গর্ব করির কোন কিছুই নাই।

৩ পবিত্র শাস্ত্রত নেখা আছে, “অব্রাহাম ভগবানক বিশ্বাস করিলেক আর এই বাদে উয়াক নির্দোষ কয়া মানি নিলেক।”

৪ কাম করি যে বেতন পাওয়া যায় সেইটা দান না হয়, সেইটা হইলেক ন্যায্য পাওনা।

৫ কিন্তুক কোন মানষি খালি নিজের চেষ্টার উপরত ভরসা না করিয়া ভগবানের উপরাত বিশ্বাস করে, উয়ার এই বিশ্বাসের বাদে নির্দোষ কয়া গন্য হয়। কেনেনা ভগবান পাপীক নির্দোষ বুলিয়া মানি নিবার পারে।

৬ শ্রী দায়ূদও ঐ মানষিলাক আশুর্বাদ পাওয়া কইচে, যার কাম দিয়া নাই হয়, বিশ্বাসে ভগবান নির্দোষ কয়া গন্য করে। সনাতন শাস্ত্রত দায়ূদ কইচে,

৭ “আশুর্বাদ পাওয়া সেই মানষিলা যার যার অন্যায় ক্ষমা করিচে, যার যার পাপ ঢাকি থুইচে।

৮ আশুর্বাদ পাওয়া সেই মানষিটা পরম প্রভু যার পাপ ক্ষমা করিচে।”

৯ যিহুদী মানষিলা সুনত তার মানে কি খালি উমরলা ভাগ্যবান? অযিহুদী মানষিলাক কি কওয়া হয় নাই? হ্যে উমাকও ভাগ্যবান কওয়া হইচে, ক্যেননা হামরা কবার ধরচি “অব্রাহামের বিশ্বাসের বাদে উয়াক নির্দোষ কয়া মানি নেওয়া হইচে।”

১০ কোন অবস্থাত মানি নেওয়া হইছিলেক? সুনত করার আগত না পাছত? মুই কইম সুনত করার আগতে ধরা হয়।

১১ অব্রাহামক সুনত না করা আবস্থায় বিশ্বাসের বাদে নির্দোষ কয়া মানি নেয় আর পাছত উয়ার সুনত করা সেই বিশ্বাসের প্রমাণ। এই বাদে যায় যায় সুনত না করিয়া বিশ্বাস করে উমরায় অব্রাহামের বেটা, আর ভগবান উমারলাক নির্দোষ বুলিয়া মানি নেয়।

১২ সুনত করার আগত অব্রাহামের যেই নাকান বিশ্বাস আছিলেক, সুনত করা যিহুদীলা যদি অব্রাহামের মতন বিশ্বাসের ঘাটাত চলে তাইলেই উমরাও অব্রাহামের ছাওয়া।

১৩ ভগবান প্রতিজ্ঞা করিছিলেক যে এই দুনিয়া অব্রাহাম আর উয়ার গুষ্টিরে হবে। বিধান মানির বাদে এই প্রতিজ্ঞা উয়ারটে করা

হয় নাই, কিন্তুক উয়ার বিশ্বাসের বাদে উয়াক নির্দোষ কয়া মানি নেওয়া হইছিলেক আর এই বাদে এই প্রতিজ্ঞা করা হয়।

১৪ বিধান পালন করি যদি কাণ্ডো দুনিয়ার অধিকার পায় তাইলে বিশ্বাস কোন কামের না হয় আর ভগবানের প্রতিজ্ঞার কোন দাম থাকিলেক না হয়,

১৫ কেনেনা বিধান ভগবানের শাস্তিক ডেকে আনে। আর সচাং কতাটা হইলেক যেটেকোনা বিধান নাই সেটেকোনা বিধান মানির কোন প্রশ্ন নাই।

১৬ মানষির বিশ্বাসের কারনে এই প্রতিজ্ঞা পূরণ করা হয়। যাতে এইটা ভগবানের দয়ার দান হবার পারে। আর অব্রাহামের গুণ্টিলার সগারে বাদে এই প্রতিজ্ঞা নিশ্চয় পূরণ করা হবে। বিধান মানা মানষিলার বাদে যে এই প্রতিজ্ঞা খালি পূরণ করা হবে সেইটা না হয়, যেইলা মানষি অব্রাহামের মতন একই বিশ্বাসে বিশ্বাসী উমারলার বাদে নিশ্চয় এই প্রতিজ্ঞা পূরণ হবে।

১৭ পবিত্র শাস্ত্রত ভগবান কইচে, “মুই তোক ম্যেলা জাতির বাপ করি থুইচোং,” সেই অনুসারে ভগবানের চখুত অব্রাহাম হামার সগারে বাপ। ভগবান মরা মানষিক জিউ দেয় আর যেইলা নাই সেইলা উয়ায় সিজ্জন করে, এই ভগবানক অব্রাহাম বিশ্বাস করচিলেক।

১৮ অব্রাহামের বাপ হবার কোন আশা আছিলেক না সেলোও অব্রাহাম ভগবানের উপরাত ভরসা থুইয়া বিশ্বাস করিচিলেক।

ভগবান উয়াক কইচিলেক, “তোর গুটিলা দ্যাওয়ার তারার নাকান মেলা হবে।” আর এই কতা মতন অব্রাহাম মেলা জাতির বাপ হয়।

১৯ অব্রাহামের বয়স যেলা একশ বছর সেলা ছাওয়া পাবার দেহার ক্ষমতা উয়ার শেষ হয় গেইছিলেক। উয়ার মাইয়া সারারও ছাওয়া হবার ক্ষমতা আর নাই, তাও অব্রাহাম বিশ্বাসে দুর্বল হয়।

২০ ভগবানের প্রতিজ্ঞা সমন্ধে উয়ার মনত কোন দিনও সন্দেহ আইসে নাই, উয়ায় বিশ্বাসে মজবুত হয়। ভগবানের গুণগান করির নাগিলেক।

২১ অব্রাহাম পুরাপুরি বিশ্বাস করচিলেক যে, ভগবান যে কতা দিচে সেইটা পূরণ করির ক্ষমতা উয়ার আছে।

২২ অব্রাহামের বিশ্বাসের দরুন ভগবান উয়াক “নিদোষ বুলিয়া মানি নেয়।”

২৩ এই কতা খালি অব্রাহামের বাদে নেখা হয় নাই,

২৪ এই কতালা হামারো বাদে নেখা হয়, হামার বিশ্বাসের দরুন ভগবান হামাক নিদোষ বুলি মানি নিবে। কেনেনা উয়ায় প্রভু যীশুক মরণ থাকি ফির বত্তে তুলিচে। হামরা উয়ারে উপরত বিশ্বাস করি।

২৫ হামার পাপের বাদে প্রভু যীশুক মরণের হাতত তুলি দেওয়া হইচে, আর হামারলাক নিদোষ কয়া মানি নিবার বাদে উয়াক



মরণ থাকি বত্তে তোলা হয়।

৫ বিশ্বাসে হামারলাক নির্দোষ বুলি মানি নেওয়া হইচে, উয়ার ফলে প্রভু যীশু খ্রীষ্টের মইন্ধো দিয়া ভগবান আর হামরালা আসল শান্তি পাইচি।

২ ভগবানের যে দয়ার ঘাটাত এলা হামরা চলির ধরচি, এটেকোনা হামরা বাছাই করা রাজাটার মইন্ধো দিয়া বিশ্বাসের মাধ্যমে পৌছিচি। এক দিন হামরা ভগবানের মহিমার ভাগীদার হমো, এই বাদে হামরা আনন্দ করি।

৩ খালি এইটায় না হয় দুঃখ-কষ্টতো হামরা আনন্দ করিমু, কেনেনা হামরা জানি দুঃখ-কষ্টের ফল হইলেক ধৈর্য,

৪ ধৈর্য হামার স্বভাবক খাটি করি তুলে, এই খাটি স্বভাবের ফলে জীবনত আশার সিদ্ধন হয়।

৫ এই আশা হামাক নইজ্জাত ফেলায় না, কেনেনা ভগবানের দেওয়া পবিত্র আত্মা হামারলার অন্তর পিরিতে ভরপুর করি তুলিচে।

৬ যেয়ো হামার কোন শক্তি আছিলেক না, সেয়ো বাছাই করা রাজাটা হামার বাদে পরান দিচে। ঠিক সমায়ে উয়ায় হামার মত পাজি মানষিলার বাদে পরান দিচে।

৭ কোন সৎ মানষির বাদে কাণ্ডো নিজের পরান দেয় না কইলেই চলে। যায় অইন্যের উপকার করে সেই নাকান মানষির বাদে হয়

তো কাণ্ডো সাহস করি পরান দিলেও দিবার পারে।

৮ কিন্তুক ভগবান যে হামাক পিরিত করে উয়ার প্রমাণ এই যে, হামরা পাপী অবস্থায় বাছাই করা রাজাটা হামার বাদে পরান দিচে।

৯ যেহেতু ভগবান বাছাই করা রাজাটার অত্র দিয়া হামারলাক নির্দোষ কয়া মানি নিলেক, এইটা নিশ্চিত যে বাছাই করা রাজাটার মইন্ধো দিয়া ভগবানের শাস্তি থাকি হামরা রেহাই পামো।

১০ হামরা যেলা উয়ার শত্রু আছিলোং সেলা উয়ার বেটার মরণ দিয়া উয়ার নগত হামার মিল হইলেক। এই মিলনের ফলে নিশ্চিত যে, হামরা উয়ার জীবন দিয়া মুক্তি পাইচি।

১১ খালি যে মুক্তি পামো তা কিন্তুক না হয়, যাক দিয়া ভগবানের নগত হামার মিল হইচে সেই বাছাই করা রাজাটার বাদে হামরা পরম প্রভুক নিয়া আনন্দ করির ধরচি।

১২ একটা মানষির মইন্ধো দিয়া এই দুনিয়াত পাপ আসিচে আর এই পাপের কারনে মরণ আসিচে। সউগ মানষি পাপ করিচে বুলিয়া এই নাকান করি সগারেটে মরণ আসিচে।

১৩ হ্যাঁ এই কতা ঠিক যে মোশির বিধান দিবার আগতেই এই দুনিয়াত পাপ আছিলেক, কিন্তু বিধান না থাকিলে পাপক পাপ কয়া ধরা হয় না।

১৪ তাণ্ডো শ্রী আদমের সমায় থাকি মোশির সমায় পর্যন্ত সগারে উপরত মরণ রাজত্ব করির ধরছিলেক। এমন কি, ভগবানের

আদেশ না মানিয়া যায় যায় আদমের মতন পাপ নাই করে  
উমারো উপরত মরণ রাজত্ব করিচিলেক। আসলে যার আসির  
কতা আছিলেক, আদম আছিলেক সেই বাছাই করা রাজার ছায়া।

১৫ কিন্তুক আদমের পাপ যে নাকানের, ভগবানের বিনামূল্যের  
দান সেই নাকানের না হয়। কেনেনা একটা মানষির পাপের ফলে  
মেলা মানষির মরণ হইলেক। একে মতন ভগবানের দয়ায়,  
আরো একটা মানষি দিয়া যে দান আসিলেক, সেইটা মেলা  
মানষির উপরত উখুলি পড়িলেক! সেই অইন্য মানষিটা হইলেক  
রাজা যীশু।

১৬ ভগবানের দান আদমের পাপের ফলের মত না হয়, কেনেনা  
উয়ার একটা পাপের বিচারের ফলে সউগ মানষিক শাস্তির যোগ্য  
কয়া ধরা হইচে, কিন্তুক নির্দোষ কয়া মানি নিবার ভগবানের যে  
দয়ার দান সেইটা মানষি মেলা পাপ করির পাছতও আসিচে।

১৭ কেনেনা এক জন মানষি পাপ করিলেক, আর সেই  
একজনের জইন্যে সগারে উপরত মরণ রাজত্ব করিলেক। কিন্তুক  
যেই মানষিলা মেলা মেলা আশুর্বাদ পায়া নির্দোষ বুলি গন্য হয়,  
উমরালা অইন্য এক জন মানষি মানে রাজা যীশুর মইদ্বো দিয়া  
নিশ্চয় ভরপুর জীবন পাবে।

১৮ আদমের একটা পাপ সগারে উপরত মরণের দন্ড নিয়া  
আসিলেক, একে মতন বাছাই করা রাজাটার একটা ন্যায় কাম  
দিয়া সউগ মানষিক নির্দোষ কয়া মানি নিবার ব্যবস্থা করা হইচে।

আর ইয়ার ফল হইলেক মানষিলাক ধার্মিক বানেয়া আসল জীবন দেওয়া।

১৯ যেই নাকান এক জন মানষির অবাধ্যতার ফলে সউগ মানষিক পাপী কয়া ধরা হইলেক, সেই মতন এক জন মানষির বাধ্যতার কারনে মেলা মানষিক নির্দোষ কয়া গন্য করা হবে।

২০ বিধান দেওয়া হইছিলেক যাতে পাপ বাড়ি যায়, কিন্তুক যেটেকোনা পাপ বাড়িলেক সেটেকোনা ভগবানের দয়া আরো উথুলি পড়িলেক।

২১ সেই দয়া এই বাদে বাড়িলেক, এক সমায় যেই নাকান মরণ দিয়া হামারলার উপরাত পাপ রাজত্ব করিছিলেক, একে নাকান করি মানষিক নির্দোষ কয়া মানি নিবার বাদে এলা দয়া রাজত্ব করির পারে, আর ইয়ার ফল হইলেক হামারলার প্রভু যীশুর মইন্দো দিয়া অমৃত জীবন।

৬ তাইলে কি হামরা কমু যে, ভগবানের দয়া যাতে বাড়ে তার বাদে হামরা পাপ করিতেই থাকিমু?

২ নিশ্চয় না হয়! পুরান পাপ জীবনের বাদে হামার মরণ হইচে, তাইলে কেমন করি আরো পাপের ঘাটাত চলিমু?

৩ তোমরালা কি ভুলি গেইচেন দীক্ষা নিবার সমায় যীশু খ্রীষ্টের মরণের সোদে এক হবার বাদে হামরা জলের দীক্ষা নিচি?

৪ দীক্ষা নিবার সমায় বাছাই করা রাজাটার নগত মরি যায়া হামারলাক সমাধি দেওয়া হইচে, বাছাই করা রাজাটা যেই নাকান ভগবানের মহাশক্তিতে মরা মানষিলার মইন্ধো থাকি ফির বত্তি উঠিচে, সেই নাকান হামরাও উয়ার নগত ফির বত্তি উঠিয়া এক নয়া জীবনের ঘাটাত চলির পাই।

৫ হামরা তো উয়ার মরণে উয়ার সোদে যুক্ত হইলং। আর উয়ায় যেমন মরণ থাকি বত্তি উঠিচে নিশ্চয় তেমন হামরাও উয়ার নাকান বত্তি উঠিমু।

৬ হামরা জানি, হামরালার পাপ স্বভাবক অকাম করিবার বাদে হামরলার পুরান জীবন, যীশুর নগত ত্রুশ খুটাত বুলি থোয়া হইচে, যাতে পাপের চাকর হয় হামারলাক আর থাকির না নাগে।

৭ কেনেনা যার মরণ হইচে উয়ায় পাপের হাত থাকি ছাড়া পাইচে।

৮ যেহেতু হামরা বাছাই করা রাজাটার নগত মরিচি সেহেতু হামরা বিশ্বাসে উয়ার নগত বত্তি রমু।

৯ হামরা জানি বাছাই করা রাজাটাক মরণ থাকি বত্তে তোলা হইচে এই বাদে উয়ায় আর কোন দিন মরিবে না, মানে উয়ার উপরত মরণের আর কোন হাত নাই।

১০ যেহেতু উয়ায় সগারে পাপের ঋণের বাদে মরিলেক আর উয়ার উপরত পাপের কোন দাবি রইলেক না, এলা উয়ায় বত্তি উঠিয়া ভগবানের বাদে বাঁচি আছে।

১১ ঠিক একে নাকান করি তোমরা মনে কর পাপের শক্তির বাদে মরিচেন, আর নিজেরলাক বাছাই করা রাজাটার সোদে যুক্ত করিয়া ভগবানের বাদে বত্তি আছেন।

১২ এই বাদে তোমারলার মরণের অধীন দেহার উপরত পাপক রাজত্ব করির দেন না। যদি দেন তাইলে তোমারলার দেহা বেয়া ইচ্ছার অধীনে চলিতে থাকিবে।

১৩ দেহার কোন অঙ্গক অন্যায় কামের হাতিয়ারের বাদে পাপের হাতত তুলি না দেন। মরণ থাকি বত্তি থাকা মানষি হিসাবে তোমরা বরং ভগবানের হাতত নিজেরলাক সাঁপে দেও, আর ন্যায় কাম করিবার হাতিয়ার হিসাবে তোমারলার গোটায় দেহাক ভগবানের হাতত গতে দেও।

১৪ তোমরা আর পাপের চাকর হন না। কেনেনা তোমরা বিধানের অধীন না হন, ভগবানের দয়ার পাত্র।

১৫ তাইলে হামরা কি করিমু? হামরা বিধানের অধীন না হই, আর এই দয়ার অধীন হইচি বুলিয়া কি পাপ করিমু? নিশ্চয় না হয়।

১৬ তোমরা কি জানেন না? চাকরের মতন যেলা তোমরা নিজক কারো হাতত তুলি দেন আর উয়ার আদেশ পালন করিতে থাকেন, সেলা তোমরা উয়ার চাকর হয় পড়েন। পাপ যদি তোমারলার মালিক হয় থাকে তাইলে তোমরা মরিবেন। আর

ভগবান যদি তোমারলার মালিক হয় তোমরালা ন্যায় কাম করিবেন।

১৭ আগত তোমরা পাপের চাকর আছিলেন, পাপ তোমারলাক চালনা করির ধরছিলেক। কিন্তুক ভগবানক ধন্যবাদ দেং, এলা যে শিক্ষা তোমারলাক দেওয়া হইচে সউগ অন্তর দিয়া তোমরা উয়ার বাধ্য হইচেন।

১৮ পাপের হাত থাকি ছাড়া পায়া তোমরা ন্যায়ের চাকর হইচেন।

১৯ মানষির দুর্বলতার বাদে কতালা মুই মানষি যেই নাকান করি বুঝিবে সেই নাকান করি কবার ধরচুং। আগত তোমরা যেই নাকান আরো বেশী করি অন্যায় কাম করিবার বাদে নিজের দেহাক অপবিত্র আর অন্যায়ের চাকর করি তুলিছিলেন, ঠিক এলা পবিত্রতায় বাড়ি উঠিবার বাদে তোমারলার দেহাক ন্যায় কামের চাকর করি তোলো।

২০ আগত যেলা তোমরা পাপের চাকর আছিলেন সেলা ন্যায় সমন্ধে স্বাধীন আছিলেন।

২১ আগের যেইলা কামের কতা ভাবিয়া তোমরা এলাও নইজ্জা পান সেইলা কাম থাকি তোমারলার কি লাভ হইচে? এই কামের শেষ ফল মরণ।

২২ কিন্তুক এলা তোমরা পাপের হাত থাকি ছাড়া পায়া ভগবানের চাকর হইচেন। ইয়াতে তোমারলার এই লাভ হইচে যে, তোমরা

পবিত্রতায় বাড়ি উঠিছেন, উয়ার শেষ ফল হইলেক অমৃত জীবন।

২৩ কেনো পাপ যে বেতন দেয় সেইটা হইলেক মরণ, কিন্তুক ভগবান যে বরদান দেয় সেইটা হামারলার প্রভু যীশুর মইদ্বো দিয়া অমৃত জীবন।

৭ হে মোর ভাই-বইনিলা, তোমরালা মোশির বিধান জানেন, তাইলে তোমরা তো এইটাও জানেন যে, মানষি যত দিন বত্তি থাকিবে খালি ততদিন বিধানের অধীনত থাকিবে।

২ তোমারলাক একটা উপমা দেং, একটা বেটিছাওয়া নিয়ম মতন যত দিন উয়ার সোয়ামি বত্তি থাকে ততদিন উয়ার প্রতি দায়বদ্ধ থাকে। সোয়ামি মরিলে উয়ায় বিবাহ বন্ধনের আইন থাকি মুক্তি পায়।

৩ এই বাদে সোয়ামি বত্তি থাকাতে ঐ বেটিছাওয়া যদি অইন্য কাণ্ডোকে বিয়াও করে তাইলে উয়াক ব্যভিচারিণী কওয়া হয়। কিন্তু যদি সোয়ামি মরে তাইলে উয়ায় এই আইনের বন্ধন থাকি মুক্তি পায়। আর সেয়া যদি উয়ায় অইন্য কাণ্ডোকে বিয়াও করে তাইলে উয়ায় ব্যভিচারিণী না হয়।

৪ হে মোর ভাই-বইনিলা, একে নাকান করি বাছাই করা রাজাটার সোদে মোশির বিধানের দাবি দাওয়ারটে মরিচেন। আর যাক মরণ থাকি বত্তে তোলা হইচে ইয়ার ফলে তোমরা সেই বাছাই করা



রাজাটার হইচেন যাতে ভগবানের বাদে তোমারলার জীবন ফলবান হয়। ওটে।

৫ হামরা যেহা পাপ স্বভাবের অধীন আছিলং সেহা বিধান হামারলার মইদ্বোত পাপের কামনা বাসনা জাগেহা তুলির ধরছিলেক, এই কামনা বাসনা হামারলার দেহার মইদ্বোত কাম করির ধরছিলেক, এই বাদে হামার জীবনত মরির বাদে ফল ধরির ধরছিলেক।

৬ সেহা বিধান হামারলাক বন্দী বানে থুবর ধরছিলেক, কিন্তুক এলা হামার পুরান স্বভাবের মরণ হইচে আর হামরা বিধান থাকি মুক্ত হইচি। ইয়ার ফলে বিধানের নেখা পুরান ঘাটার চাকর না হই, কিন্তুক পবিত্র আত্মার দেওয়া নয়া ঘাটার চাকর হইচি।

৭ তাইলে হামরা কি কমু যে, বিধান বেয়া? নিশ্চয় না হয়। এই কতা ঠিক যে বিধান না থাকিলে পাপ কি সেইটা হামরা জানির পারিলং না হয়। “লোভ না করেন” বিধান যদি এই কতা না কইলেক হয় তাইলে লোভ কি জানিলং না হয়।

৮ কিন্তুক পাপ সেই আদেশের সুযোগ নিয়া হামার মইদ্বোত সউগ নাকানের লোভ জাগে তুলিচে, কেনেনা বিধান না থাকিলে পাপ যেন মরার মত পড়ি রয়।

৯ মোর জীবনত বিধান আইসার আগত মুই বত্তি আছিলুং, কিন্তুক সেই আদেশ আসিবার সাথে সাথে পাপ আসিয়া রবার নাগিলেক।

১০ আর মুই আত্মিক ভাবে মরি গেলুং, যেই আদেশ পাবার ফলে  
জীবন পাবার কতা সেই আদেশ মোক মরণত ফ্যেলে দিলেক।

১১ কেনেনা সেই আদেশের সুযোগ নিয়া পাপ মোক ঠকাইলেক,  
আর সেই আদেশ দিয়ায় পাপ মোক মারি ফ্যেলাইলেক।

১২ তাইলে এই কতা ঠিক যে, বিধান পবিত্র আর উয়ার আদেশও  
পবিত্র, ন্যায্য আর উপকারী।

১৩ যেইটা উপকারী সেইটার দ্বারায় কি মোর মরণ হইলেক?  
কোন দিনও না। যেইটা উপকারী উয়ার দ্বারা পাপে মোর মরণ  
ঘটিলেক, যাতে পাপ যে সচাংএ পাপ সেইটা বুঝা যায়। পাপ যে  
কত জঘন্য সেইটা বিধানের আদেশলা দিয়া বুঝা যায়।

১৪ হামরা জানি বিধান আত্মিক, কিন্তুক মুই পাপ স্বভাবের অধীন  
কয়া পাপের চাকর হইচুং।

১৫ মুই যে কি সেইটা মুই নিজেই জানং না, কেনেনা মুই যেইটা  
করির চাং সেইটা করং না, যেইটা ঘিন করং সেইটায় করং।

১৬ যেইটা চাং না সেইটা যেলা মুই করং ইয়াতে মানি নেং বিধান  
ভাল।

১৭ তাইলে দেখা যাবার ধরচে যে, মুই নিজে এইলা না করং,  
কিন্তুক মোর মইন্ধোত যে পাপ বসবাস করে উয়ায় মোক দিয়া  
এইলা করের ধরচে।

১৮ মুই জানং মোর মইন্ধোত, মানে মোর পাপ স্বভাবের মইন্ধোত ভালো কোন কিছুই নাই। যেইটা সচাং ভাল সেইটা করির মোর ইচ্ছা আছে কিন্তুক সামর্থ নাই।

১৯ কেনেনা যেইলা ভাল কাম মুই করির চাং সেইলা মুই করং না বরং উয়ার বদলে যেইলা মুই করির না চাং সেই বেয়া কামলায় মুই করং।

২০ যেইলা করির না চাং সেইলায় মুই করং সেইটা আসলে মুই নিজে না করং মোর মইন্ধোত পাপ বসবাস করে উয়ায় মোক দিয়া করের ধরচে।

২১ তাইলে মোর মইন্ধোত একটা নিয়ম দেখির পাবার ধরচুং সেইটা হইলেক এই যে, যেইলা ভাল সেইলা যেলা মুই করির চাং সেলা বেয়া সউগ সমায় মোর মইন্ধোত থাকে।

২২ মোর অন্তর ভগবানের বিধানে আনন্দিত হয়,

২৩ তাণ্ডো মুই দেখির পাবার ধরচুং যে, একটা অইন্য কাম মোর দেহাত করির ধরচে। যেইলা ভাল সেইলা ভাল কওয়ায় মোর মন মানি নেয়, কিন্তু অইন্য নিয়মটা মোর মনের বিরুদ্ধে যুদ্ধ করির ধরচে।

২৪ কি হতভাগা মানষি মুই! মোর মইন্ধোত যে পাপ স্বভাব, যেইটা মরণ নিয়া আইসে উয়ার হাত থাকি মোক কায় বাঁচাবে?

২৫ মুই ভগবানক ধন্যবাদ দেং যে, হামার প্রভু রাজা যীশু মোক বাঁচাবে! তাইলে দেখা যায়, মনের দিক থাকি মুই ভগবানের

বিধানের চাকর, কিন্তুক পাপ স্বভাবের দিক থাকি মুই পাপের  
নিয়মের চাকর।

৮ এই বাদে এলা যায় যায় প্রভু যীশুর নগত যুক্ত হইচে  
উমারলার আর শাস্তি হবার না হয়।

৯ কেনেনা জীবন দাতা পবিত্র আত্মার শক্তিতে বাছাই করা রাজা  
যীশুর মইন্ধো দিয়া মোক পাপ আর মরণের শক্তি থাকি মুক্ত  
করিচে।

১০ মানষির পাপ স্বভাবের বাদে বিধান শক্তিহীন হয় পড়ছিলেক,  
এই বাদে বিধান যেইটা করির পারে নাই ভগবান সেইটা নিজে  
করিচে। উয়ায় মানষির পাপ দূর করির বাদে নিজের নিষ্পাপ  
বেটাক মানষির স্বভাব দিয়া পেয়ে দিলেক, আর সেই বেটার  
মরণ দিয়া পাপের বিচার করি পাপের শক্তিক বাতিল করিলেক।

১১ উয়ায় এইটা করিলেক যাতে পাপ স্বভাবের অধীনে না চলিয়া  
বরং পবিত্র আত্মার বশে চলিবার দরুন হামারলার হয় বিধানের  
দাবি দাওয়া পূরণ হয়।

১২ যায় যায় পাপ স্বভাবের অধীন উমারলার মন পাপ স্বভাব  
যেইলা চায় ঐলাতে আগ্রহ দেখায়। আর যায় পবিত্র আত্মার  
অধীন উমার মন পবিত্র আত্মা যেইলা চায় সেইলাতে আগ্রহ  
দেখায়।

৬ কে্যেনো পাপ স্বভাব যেইলা চায় সেইলাতে আথ্রহী হবার ফল হইলেক মরণ, কিন্তুক পবিত্র আত্মা যেইলা চায় সেইলাত আথ্রহী হবার ফল হইলেক জীবন আর শান্তি।

৭ এই বাদে যার মন পাপ স্বভাব দিয়া চালনা করে, উয়ায় ভগবান বিরোধী কে্যেনো উয়ায় ভগবানের বিধান মানির না চায়, মানির পারেও না।

৮ কাজেই যায় যায় পাপ স্বভাবের অধীন উমরা ভগবানক সন্তুষ্ট করির না পারে।

৯ ভগবানের আত্মা যদি তোমারলার অন্তরত বসবাস করে তাইলে তোমরা পাপ স্বভাবের অধীন না হন কিন্তুক পবিত্র আত্মার অধীন। যার অন্তরত বাছাই করা রাজাটার আত্মা নাই, উয়ায় বাছাই করা রাজাটার না হয়।

১০ কিন্তুক বাছাই করা রাজাটার আত্মা যদি তোমারলার অন্তরত থাকে তাইলে পাপের দরুন তোমারলার দেহার উপরত মরণের কাম করির থাকিলেও তোমারলার আত্মা বত্তি রবে, কে্যেনো ভগবান তোমারলাক নির্দোষ বুলি মানি নিচে।

১১ যায় বাছাই করা রাজাটাক মরণ থাকি বত্তে তুলিচে সেই ভগবানের আত্মা যদি তোমারলার অন্তরত থাকে তাইলে ভগবান উয়ার সেই আত্মার দ্বারা তোমারলার মরণের দেহাক জীবন দান করিবে।

১২ এই বাদে ভাই-বইনিলা, পাপ স্বভাবের অধীন হামরা না হই, পাপ স্বভাবের অধীনে হামার আর চলির একদম দরকার নাই।

১৩ যদি তোমরা পাপ স্বভাবের অধীনে চলেন তাইলে তোমরা চিরকালের মত মরিবেন। কিন্তুক যদি পবিত্র আত্মার দ্বারায় দেহার সউগ অন্যায় কাম ধ্বংস করি ফ্যেলান তাইলে চিরকাল বত্তি রবেন।

১৪ কেনেনা যায় যায় আত্মার চালনায় চলে উমরায় ভগবানের ছাওয়া।

১৫ তোমরা তো চাকরের আত্মা পান নাই যার বাদে ভয় করিবেন, তোমরালা ভগবানের আত্মাক পাইচেন যায় তোমারলাক ছাওয়া হবার অধিকার দিচে। এই বাদে হামরা ভগবানক আববা মানে বাপ কয়া ডেকাই।

১৬ পবিত্র আত্মা নিজে হামারলার আত্মাক এই সাক্ষী দিচে যে, হামরা ভগবানের ছাওয়া।

১৭ হামরা যদি উয়ার ছাওয়া হয় থাকি তাইলে ভগবান উয়ার ছাওয়ালাক যেইলা দিবে কয়া কিরা কাটিচে সেইলা হামরা পামো। বাছাই করা রাজাটাও ভগবানেরটে থাকি সেইলা পাবে, আর হামরাও উয়ার নগত সেইলা পামু, কেনেনা হামরা যদি বাছাই করা রাজাটার নগত কষ্ট ভোগ করি তাইলে উয়ার নগত শোভা-ক্ষমতার ভাগী হমো।

১৮ হামরা জানি, হামারলার বাদে যে জাকজমক পরে প্রকাশ পাবে উয়ার তুলনায় হামারলার এই জীবনের কষ্ট ভোগ কিছুই না হয়।

১৯ এই গোটায় দুনিয়া খুব আগ্রহ নিয়া ভগবানের বাদে বাচ্ছে আছে, কায় উয়ার ছাওয়ালা।

২০ কেনেনা দুনিয়ার উদ্দেশ্য বিফল হয় গেইচে। কিন্তুক এইটা নিজের ইচ্ছায় হয় নাই, ভগবান উয়াক বিফল হবার বাদে ছাড়ি দিচে। আর এইটাও আশা দিচে যে,

২১ ধবংসের হাত থাকি মুক্ত হয় এই দুনিয়া এক দিন ভগবানের ছাওয়ালা অচানক স্বাধীনতার ভাগী হবার পাবে।

২২ হামরা জানি যে, ভগবানের গোটায় দুনিয়া বিষে গোঙের ধরচে যেই নাকান নিদারুন গাওভারী বেটিছাওয়া ছাওয়া হবার বিষে গোঙায়।

২৩ খালি এইটায় না হয়, হামরা যায় যায় পবিত্র আত্মাক মুক্তির পইলা ফল হিসাবে পাইচি, হামরা নিজেও দেহার মুক্তির বাদে বাচ্ছে রয়া অন্তরত গোঙের ধরচি, ভগবানের ছাওয়া কয়া মানি নিবার বাদে।

২৪ মুক্তি পয়া হামরা এই আশা পাইচি। হামরা যার বাদে আশা করি আছি যদি সেইটা পয়া থাকি তাইলে সেই আশা আর আশা রইলেক না। যেইটা পাওয়া গেইচে উয়ার বাদে আর কায় আশা করে?

২৫ কিন্তুক যেইটা পাওয়া হয় নাই উয়ার বাদে হামার আশা আছে, উয়ার বাদে হামরা ধৈর্য ধরি বাঢ়ে আছি।

২৬ একে নাকান করি হামারলার দুর্বলতাত পবিত্র আত্মা হামারলাক সাহায্য করে। কিন্তুক কিসের বাদে প্রার্থনা করা দরকার সেইটা হামরা জানিনা। যেইটা হামরা মুখ দিয়া কই নাই এই নাকান না কওয়া কতা পবিত্র আত্মা খুব গম্ভীর হয় হামার হয় প্রার্থনা করে।

২৭ যায় মানষির অন্তর খুজি দেখে উয়ায় পবিত্র আত্মার মনের কতাও জানে, কেনেনা পবিত্র আত্মা ভগবানের ইচ্ছা মতন ভগবানের মানষিলার বাদে মিনতি করে।

২৮ হামরা জানি যায় যায় ভগবানক পিরিত করে, মানে ভগবান উয়ার উদ্দেশ্যের বাদে যাক যাক ডেকাইচে উমারলার মঙ্গলের বাদে সউগ কিছুই একসোদে কাম করি যাবার ধরচে।

২৯ ভগবান যাক বাছাই করিচিলেক উমারলাক উয়ায় উয়ার বেটার ফটকের নাকান হবার বাদে আগতে ঠিক করি থুইচে, যাতে সেই বেটা মেয়ো ভাই বইনির মইন্ধোত প্রধান হয়।

৩০ যাক যাক উয়ায় আগতে ঠিক করি থুইচে উমারলাক উয়ায় ডেকাইলেক, যাক যাক ডেকাইলেক উমারলাক উয়ায় নির্দোষ কয়া মানি নিলেক আর নিজের মহিমাও দান করিলেক।

৩১ তাইলে এইলা ব্যাপারে হামরা কি কমু? ভগবান যেহেতু হামারলার পক্ষে আছে, সেহেতু হামারলার বিপক্ষে ক্ষতি করির



কায় আছে?

৩২ ভগবান নিজের বেটাক পর্যন্ত রেহাই দেয় নাই উয়ায় হামারলার সগারে বাদে উয়ার বেটাক মরণের হাতত সঁপে দিলেক, উয়ায় কি হামারলাক আর সউগ কিছু দয়া করি দান করিবে না?

৩৩ ভগবান যাক যাক বাছাই করি নিচে উমারলার বিরুদ্ধে কায় নালিশ করিবে? ভগবান তো নিজেই উমারলাক নির্দোষ কয়া মানি নিচে।

৩৪ কায় উমারলাক দোষী কয়া রায় দিবে? যায় মরি গেইচে, আর যাক মরণ থাকি বন্তে তোলা হইচে সেই বাছাই করা রাজা যীশু এলা ভগবানের ডাইন পাকে বসি আছে আর হামারলার বাদে ভগবানেরটে মিনতি করির ধরচে।

৩৫ এই বাদে বাছাই করা রাজাটা থাকি কায় হামাক দূরত সারে থুবে? যন্তনা? মনের দুঃখ-কষ্ট? অইত্যাচার? পেটের ভোগ? কাপড়-চোপড়ের অভাব? বিপদ? মরণ?

৩৬ পবিত্র শাস্ত্রত নেখা আছে, “তোমার বাদে সউগ সমায় হামারলাক মরি ফ্যেলের ধরচে, বলি দেওয়ার ভেড়ার নাকান মানষি হামারলাক মনে করে।”

৩৭ কিন্তুক যায় হামারলাক পিরিত করে উয়ার দ্বারায় সউগ কিছুতে হামরা পুরাপুরি জয় লাভ করির ধরচি।

৩৮ মুই এই কতা ভাল করি জানং মরণ বা জীবন, স্বর্গদূত বা শয়তানের দূত, বর্তমান বা ভবিষ্যতের কোন কিছুই, এমন কি অইন্য যে কোন নাকানের শক্তি,

৩৯ দ্যাওয়ার উপরত বা দুনিয়ার নিচত কোন কিছুই এমন কি সিদ্ধনের কোন ব্যাপার ভগবানের পিরিত থাকি হামারলাক দূরত সারে খুবার পাবে না। ভগবানের এই পিরিত হামারলার প্রভু যীশুত দেখা যায়।

৯ প্রভু যীশু খ্রীষ্টত মুই সচাং কবার ধরচুং, মিছাং না কং মোর বিবেকও পবিত্র আত্মাত মোর হয়। সাক্ষ্য দিবার ধরচে যে

২ মোর অন্তরত মুই দুঃখ-কষ্ট বুঝির পাবার ধরচুং।

৩ কেনেনা মোর ভাই-বইনিলার বদলে যায় যায় মোর জাতির মানষি, উমার বদলে যদি সম্ভব হয় তাইলে নিজেই মুই বাছাই করা রাজাটার বগল থাকি দূরত যাবার অভিশাপ মাখাত নিলুং হয়।

৪ উমরা তো ইজ্রায়েল জাতির মানষি। ভগবান উমাক পোষানি নিচে, নিজের জাকজমক দেখাইচে, উমার নগত চুক্তি করিচে। ভগবান উমারলাক মোশির দেওয়া বিধান, সঠিক উপাসনার নিয়ম আর মেলা কিরা কাটিচে।

৫ ভগবানের মহান ভক্তলা আছিলেক উমার বাপ ঠাকুর দাদার গুণি আর মানষি হিসাবে বাছাই করা রাজাটা উমারে গুণিত জন্ম

নেয়। উয়ায় প্রভু, যায় সউগ কিছুর উপরত কৰ্তা, চিরকাল উয়ার গুণকিত্তন হউক। আমেন।

৬ ভগবানের বাইক্য যে মিছাং তা কিন্তুক না হয়, কেনেনা যায় যায় ইজ্রায়েল জাতির মইদ্ধোত জন্মিচে উমরা সগায় সত্যিকারে ইজ্রায়েল না হয়।

৭ অব্রাহামের গুষ্টির বুলিয়া যে উমরা সত্যিকারের ছাওয়া তা না হয়, কিন্তুক ভগবান অব্রাহামক কইচে, “তোর বেটা ইসহাকের ছাওয়ালাক তোর গুষ্টি কয়া ধরা হইবে।”

৮ ইয়ার মানে হইলেক এই যে, দেহা নিয়া জন্মা অব্রাহামের ছাওয়ালা সগায় ভগবানের ছাওয়া না হয় কিন্তুক অব্রাহামের আসল গুষ্টি উমরায় যায় যায় অব্রাহামেরটে থাকি ভগবানের দেওয়া কিরা মত জন্ম নিচে।

৯ সেই কিরা এই যে, “মুই ঠিক সমায় ফিরি আসিম আর তোর ভার্জা সারার একটা চেংড়া ছাওয়া হবে।”

১০ খালি এইটায় না হয়, রিবিকার জামটিয়া বেটালা একেই বেটাছাওয়ার ছাওয়া আছিলেক। এই বেটাছাওয়াটা হইলেক হামারলার বাপ ঠাকুর দাদা ইসহাক।

১১ ছাওয়া দুইটা জন্ম না হওয়ার আগত য়েলা উমরা ভাল বেয়া কোন কিছুই করে নাই ভগবান সেলায় রিবিকাক কইচে,

১২ “বড়টা ছোটটার চাকর হবে।” ইয়াতে ভগবান এইটা দেখে দিচে, উয়ার নিজের উদ্দেশ্য পূরণ করির বাদে বাছাই করে, কোন

কামের বাদে উয়ায় এইটা নাই করে উয়ার ইচ্ছা মতন উয়ায় মানষিক ডেকায়।

১৩ শাস্ত্রত নেখা আছে, “মুই যাকবক পিরিত করিচুং কিন্তুক এসৌক ঘিন করিচুং।”

১৪ তাইলে হামরা কি কমু ভগবান অন্যায় করে? না একদম না হয়।

১৫ ভগবান মোশিক কইচে, “মোর যাক ইচ্ছা তাক দয়া করিম, যাকে ইচ্ছা তাকে মায়া করিম।”

১৬ এইটা মানষির চেষ্টা বা ইচ্ছার উপরত নির্ভর করে না। ভগবানের মায়ার উপরত নির্ভর করে।

১৭ পবিত্র শাস্ত্রত ভগবান ফরৌণক কইচে, “মুই এই উদ্দেশ্যে তোক রাজা করিচুং যাতে তোর সর্বনাশ করিয়া মুই মোর ক্ষমতা দেখের পাং আর গোটায় দুনিয়াত মোর নাম প্রচার হয়।”

১৮ তাইলে দেখা যায় ভগবান যাক দয়া করির চায় উয়াক দয়া করে আর যার অন্তর পাষান করির চায় তার অন্তর পাষান করে।

১৯ তাইলে তোমারলার মইন্ধে কাণ্ডো মোক পুছির পারে, ভগবান মানষির দোষ ধরে কেনে? কাণ্ডো কি ভগবানের উদ্দেশ্য বাধা দিবার পারে?

২০ উয়ার উত্তরে মুই কইম যে, তুই মানষি, ভগবানের কতার উপরা কতা কবার তুই কায়? কোন মানষি যদি একটা জিনিস

বানায় তাইলে কি সেই বানা জিনিসটা উয়াক পুছির পারে,  
“কে্যেনে মোক এই নাকান বানালু?”

২১ একেই মাটি থাকি কুমোর কি নানা নাকানের মাটির জিনিস  
বানেবার অধিকার নাই, কোনটা ভালো কামের বাদে কোনটা বেয়া  
কামের বাদে?

২২ ঠিক একে নাকান করি ভগবানের গোসা আর শক্তি দেখের  
চাইছিলেক, কিন্তুক যেই মানষিলার উপরত উয়ার গোসা দেখাবে,  
তাণ্ডো উয়ায় ধৈর্যের নগত উমারলাক সহ্য করিলেক। এই  
মানষিলার এক মাত্র পাওনা আছিলেক সর্বনাশ।

২৩ আর উয়ায় উয়ার অশেষ জাকজমকের কতা জানেবার  
চাইছিলেক। যায় যায় উয়ারটে থাকি দয়া পাবার উপযুক্ত উয়ায়  
উয়ার শোভা ক্ষমতার ভাগীদার হবার বাদে আগতে উমাক  
সিদ্ধজন করি থুইচে।

২৪ হামরায় সেই আশুর্বাদের পাত্র। উয়ায় খালি হামারলাক  
যিহুদীলার মইন্ধো থাকি ডেকায় নাই, অযিহুদীলার মইন্ধো থাকি  
ডেকাইচে।

২৫ এই ব্যাপারে ভগবানের খবরিয়া হোশেয় নেখিচে, “যায় যায়  
মোর না আছিলেক উমারলাক, মুই মোর মানষি কয়া ডেকাইম,  
আর যাক মুই আগত পিরিত করং নাই, উয়াক মুই মোর মনের  
এক জন কয়া ডেকাইম।

২৬ আর যেই জাগাত কওয়া হইচে ‘তোমরা মোর মানষি না হন,’  
ওটেকোনা উমাক জীবন্ত ভগবানের বেটা কয়া ডেকা হবে।”

২৭ ভগবানের খবরিয়া যিশাইয় ইজ্রায়েল জাতির বিষয়ে কইচে,  
“ইজ্রায়েলীলা যদিও সংখ্যায় সাগরের পারের বালার নাকান  
তাণ্ডো উমার মইদ্বো থাকি কম মানষি মুক্তি পাবে।

২৮ প্রভু খুব পচপচে দুনিয়ার পাওনা দন্ড দিবো।”

২৯ যিশাইয় আরো কইচে, “সউগ ক্ষমতার অধিকারী প্রভু যদি  
কিছু গুষ্টি থুইয়া না গেইলেক হয় তাইলে হামার অবস্থা সদোম  
আর ঘমোরা গঞ্জের মত নাশ হইলেক হয়।”

৩০ তাইলে হামরা এই কতা কমু যে, যদিও অযিহুদীলা  
ভগবানের মন মত হবার চেষ্টা করে নাই, তাণ্ডো উমারলার  
বিশ্বাসেই ভগবানের মন মত নির্দোষ হইচে।

৩১ কিন্তুক ইজ্রায়েলীলা বিধান পালন করির চেষ্টা করিয়া  
ভগবানের মন মত নির্দোষ হবার চাইচে, কিন্তুক হবার পায় নাই।

৩২ কেনে হবার পারে নাই? কেনেনা উমরা বিশ্বাসের উপরত  
নির্ভর না করিয়া কামের উপরত নির্ভর করিচিলেক। যেই শিলোত  
মানষি উষ্টা খায় ঐ শিলটাতে উমরা উষ্টা খাইচে।

৩৩ শাস্ত্রত নেখা আছে, “দেখ, মুই সিয়োনত এমন একটা শিল  
থুইচোং ঐ শিলটাত মানষি উষ্টা খাবে, কিন্তু যায় উয়ার উপরত  
বিশ্বাস করিবে উমরা কোন দিন হতাশ হবার না হয়।”

১০ এই বাদে ভাই-বইনিলা, মোর অন্তরের খুব ইচ্ছা আর ভগবানেরটে মোর প্রার্থনা যে, মোর ইজ্রায়েল জাতির মানষিলা যাতে মুক্তি পায়।

২ মুই উমার সমন্ধে জানং যে, ভগবানের প্রতি উমার খুব আগ্রহ আছে, কিন্তুক সেইটা ভুলে ভরা।

৩ ভগবান মানষিক ক্যেমন করি নির্দোষ কয়া মানি নেয় সেই কতাত মন না দিয়া উমরা মোশির বিধান মানিয়া নিজেরলার চেষ্টাত উয়ার মনের মত হবার চাইচে। এই বাদে ভগবান মানষিক যেই নাকান করি নির্দোষ কয়া মানি নিবার চাইছিলেক সেই নাকান করি উমরা মানি নেয় নাই।

৪ কিন্তুক যীশুই বিধানের উদ্দেশ্য পরিপূর্ণ করিচে, এই বাদে যায় যায় উয়ার উপরত বিশ্বাস করে উমরালোক ভগবান নির্দোষ কয়া মানি নেয়।

৫ মোশির বিধান পালন করিয়া ভগবান ক্যেমন করি মানি নিবে, এই সমন্ধে মোশি নেখিচে, “যেই মানষি বিধান মানিয়া নির্দোষ হয় চলে উয়ায় বিধানতেই জীবন পাবে।”

৬ কিন্তুক বিশ্বাসে মানষি ক্যেমন করিয়া নির্দোষ হয় এই বিষয়ে সনাতন শাস্ত্রত কওয়া হইচে, “মনে মনে এই কতা না কন, কায় স্বর্গত যাবে?” (ইয়ার মানে হইলেক, স্বর্গ থাকি বাছাই করা রাজাটাক নিচাত নামে আনির কায় স্বর্গত যাবে।)

৭ এইটাও না কন যে, “পাতালত কায় যাবে?” (মানে, মরণের জাগা থাকি যীশুক ফির বত্তে তুলি আনিবার কায় যাবে।)

৮ কিন্তু ভগবানক মানি নিবার বিষয়ে শাস্ত্রত এই কতা কইচে, “ভগবান যেইটা কইচে সেইটা তোমারলার নগত আছে, মানে তোমারলার মুখত আর অন্তরত আছে।” যেই বিশ্বাসের কতা হামরা প্রচার করির ধরচি সেইটা হইলেক ভগবানের সেই কতা।

৯ সেই কতাটা এই নাকান, কেনেনা তুই যদি যীশুক মুখ দিয়া প্রভু বুলিয়া স্বীকার করিস আর অন্তরত বিশ্বাস করিস, যে উয়াক মরণ থাকি ফির বত্তে তুলিচে তাইলে তুই মুক্তি পাবু।

১০ কেনেনা অন্তরত বিশ্বাস করির বাদে ভগবান মানষিক নির্দোষ কয়া মানি নেয়, আর মুখত স্বীকার করির বাদে মুক্তি পায়।

১১ সনাতন শাস্ত্রত কইচে, “যে কাণ্ডো উয়ার উপরাত বিশ্বাস করে উয়ায় হতাশ হবার না হয়।”

১২ যিহুদী বা অযিহুদীর কোন ফারাক নাই, কেনেনা সগারে একে ভগবান। যায় যায় উয়াক ডেকায় উয়ায় উমারলার উপরা মেলা মেলা আশুর্বাদ ঢালি দেয়।

১৩ সনাতন শাস্ত্রত নেখা আছে, “মুক্তি পাবার বাদে যে কাণ্ডো প্রভুক ডেকায় উয়ায় মুক্তি পাবে।”

১৪ কিন্তুক যার উপরত উমরা বিশ্বাস করে নাই উয়াক কেমন করি ডেকাবে? যার কতা উমরা কোন দিন শোনে নাই উয়াক



উমরা কেমন করি বিশ্বাস করিবে? কাণ্ডো যদি উয়াক খবর না শুনায় তাইলে কেমন করি শুনিবে?

১৫ তাছাড়া কাণ্ডো না পেঠাইলে খবরিয়ালা কেমন করি খবর শুনাবে? সনাতন শাস্ত্রত নেখা আছে, “আশুর্বাদ পাওয়া উমার ঠেংলা, যায় যায় ভাল খবর শোনেবার আইসে।”

১৬ কিন্তুক সগায় সেই ভাল খবর শুনিয়া সাড়া দেয় নাই। ভগবানের খবরিয়া যিশাইয় কইচে, “প্রভু, হামার দেওয়া ভাল খবরত কায় বিশ্বাস করিচে?”

১৭ তাইলে দেখা যায়, ভগবানের বাইক্য শুনিয়ায় বিশ্বাস আইসে, আর প্রভু যীশুর ভাল খবর শুনাইলে সেলোয় মানষিলা ভাল খবর শুনির পায়।

১৮ তাইলে মুই পুচ করং ইজ্রায়েলের মানষিলা কি সেই বাইক্য শুনির পায় নাই? নিশ্চয় শুনিচে। সনাতন শাস্ত্রত কইচে, “উমার ড্যেক দুনিয়ার কোণায় কোণায় ছড়িয়া পড়িচে, উমার বাইক্য দুনিয়ার সউগ জাগাতে পৌছিচে।”

১৯ মুই আর একবার কং, ইজ্রায়েলের মানষিলা কি সেই বাইক্য বুঝির পারে নাই? পইলা শ্রী মোশিক দিয়া ভগবান কইচে, “যেই জাতি কোন জাতি না হয়, সেই জাতিক দিয়ায় মুই তোমারলার মনের জ্বালা জাগেয়া তুলিম, একটা তুচ্ছ জাতিক দিয়া তোমার রাগ উঠাইম।”

২০ ইয়ার পাছত ভগবানের খবরিয়া যিশাইয় সাহসের সোদে কইলেক, “যায় যায় মোক খোজে নাই, উমরা মোক পাইচে, যায় যায় মোরটে আসিয়া মোক পোছেই নাই, উমারলাক মুই দেখা দিলুং।”

২১ কিন্তুক ইজ্রায়েলীলার বিষয়ে উয়ায় কইচে, “অবাধ্য আর বর্বরা মানষিলার পাকে মুই সারা দিন মোর হাত বাড়ে দিয়ায় আছিলুং।”

২২ তাইলে মুই পৌল পুচ করং, ভগবান কি উয়ার মানষি ইজ্রায়েলীলাক দূরত সারে থুইচে? নিশ্চয় না। মুই নিজেও এক জন ইজ্রায়েলী, অব্রাহামের বংশের আর বিন্যামীন গুষ্টির মানষি।

২ ভগবান যেই মানষিলাক নিজের মানষি মনে করি আগতে বাছাই করি থুইচে, উমারলাক দূরত সারে থোয় নাই। ভগবানের খবরিয়া এলিয়র বিষয়ে শাস্ত্রত কি কইচে, সেইটা তোমরা কি জানেন না? এলিয় ইজ্রায়েলীলার বিরুদ্ধে ভগবানেরটে মিনতি করিচে,

৩ “প্রভু, ইমরা তোমার ভাববাদীলাক মারি ফ্যেলাইচে আর তোমার যজ্ঞের বেদীলাক ভাঙি ফ্যেলাইচে, খালি মুইয়ে বাকি আছং আর মোকও উমরা মারি ফ্যেলের চেষ্টা করির ধরচে।”

৪ কিন্তুক ভগবান এলিয়ক কি কইচে মুই এলা কইম, “সাত হাজার মানষিক মুই মোর বাদে থুইয়া দিচুং উমরা বাল নামের

দেবতার উপাসনা করে নাই।”

৫ ভগবান একে নাকান দয়া অনুসারে ইজ্রয়েলীলার একটা বিশেষ অংশক এলাও বাছাই করি থুইচে।

৬ ভগবান যদি দয়া অনুসারে বাছাই করি থুইচে তাইলে তো কোন কামের ফল না হয়। যদি কামের ফল হয় তাইলে দয়া আর দয়া থাকিলেক না হয়।

৭ তাইলে বুঝা যায় ইজ্রয়েলীলা যেইটা খুজিয়া পাবার চেষ্টা করিচিলেক সেইটা পায় নাই, কিন্তুক ভগবান যাক বাছাই করি থুইচে উমরায় সেইটা পাইচে, অইন্য সগারে মন পাষান হয়। গেইচে।

৮ শাস্ত্রত নেখা আছে, “ভগবান উমারলার মন এমন পাষান করিলেক যে, আজি পর্যন্ত উমরা চোখ দিয়া দেখিয়াও দেখে না আর কান দিয়া শুনিয়াও শুনে না।”

৯ একে নাকান করি মহারাজা দায়ূদ কইচে, “উমার ভোজের অনুষ্ঠানলা টোপ দেওয়া ফানের মত আর ছাপি জাল যেই নাকান করি ধরে, ঐ নাকান হউক, ঐলা যাতে উমার উষ্টা খাবার কারন হয়, আর উমার পাওনা দন্ড উমরা পাউক।

১০ উমারলার চখু কানা হউক, যাতে উমরা দেখির না পায়, কষ্টের বোঝা নিয়া হেলি পড়ুক।”

১১ তাইলে কি যিহুদীলা উষ্টা খায়া চিরকালের বাদে পড়ি গেইলেক? সেইটা না হয় বরং উমার পাপের বাদে অযিহুদীলা

মুক্তি পাবার সুযোগ পাইলেক। এইটা ঘটিলেক যিহুদীলার হিংসার অগুনত জ্বলে তুলির বাদে।

১২ যিহুদীলার মহা ভুলের বাদে এই দুনিয়াত মহা আশুর্বাদ আসিচে, যিহুদীলার ভুলের বাদে অযিহুদীলাক ধনে ধনবান করি তুলিলেক। এই বাদে উমরা যেহা ভাল খবর মানি নিবে সেহা আরো কত মেহা আশুর্বাদে ভরপুর হবে।

১৩ হে অযিহুদীলা, মুই তোমারলাক কবার ধরচুং, অযিহুদীলার খবরিয়া হয় মুই মোর কাম খুব সন্মানের চখুত দেখং।

১৪ ইয়াতে মুই মোর নিজের যিহুদী জাতির মানষিলাক অন্তর জ্বালা জাগেয়া উমারলার মইদ্বো থাকি কিছু মানষিক মুক্তি করির পারং।

১৫ ভগবান যিহুদীলার পাক থাকি নজর ঘুরি নিচে বুলিয়া জগতের অইন্য মানষিলাক নগত মিল হইলেক। এই বাদে ভগবান যেহা যিহুদীলার প্রতি নজর দিবে সেহা কি ফল হবার পারে? সেইটা মরা মানষির জিউ ফিরি পাবার মত হইলেক কি না।

১৬ ময়দার দালা থাকি তৈরি পইলা রুটি যদি পবিত্র হয় তাইলে গোটা দালাটায় পবিত্র। জলপই গছের মূল শিপা যদি পবিত্র হয় তাইলে উয়ার ডালপালাও পবিত্র।

১৭ যদি সেই জলপই গছের, ডালপালা ভাঙি ফেলেয়া মানে অব্রাহামের বংশের ওটেকোনা, তোর মত জংলি জলপই কলমের

ডাল নাগেয়া দেওয়া হয়, আর তুই আসল গছের শিপা থাকি রস  
টানি নিস,

১৮ তাইলে ভাঙি ফেলা ডালপালার চায়া নিজক তুই বড় মনে না  
করিস। যদি করিস তাইলে ফম করেক তুই শিপাক ধরি খুইস না  
বরং শিপায় তোক ধরি খুইচে।

১৯ তুই হয় তো কবু, “মোক কলম নাগেবার বাদে ডালপালা  
ভাঙা হইচে।”

২০ হ্যে ঠিক। কিন্তুক উমারলাক ভাঙা হইচে উমার অবিশ্বাসের  
বাদে। এই বাদে তুই গর্ব না করিস, বরং শ্রদ্ধার ভয়ে, ভক্তি  
করেক।

২১ কেনেনা ভগবান যেলা আসিলেক ডালপালাকো রেহাই নাই  
দেয় সেলা তোমাকো রেহাই দিবে না।

২২ এই বাদে একবার ভাবিয়া দেখেক যে ভগবান কত দয়ালু  
আর কত করুণ। যায় যায় পড়ি গেইচে উমার প্রতি করুণ হইচে,  
কিন্তুক উয়ায় তোর প্রতি দয়ালু অবশ্য থাকিবে তুই যদি উয়ার  
দয়ার মইন্ধোত থাকিস। তা না হইলে তোক কাটিয়া ফেলা হবে।

২৩ আর উমরা যদি ভগবানেরটে ফিরি আইসে উয়াক বিশ্বাস  
করে, তাইলে উমরা যেটেকোনা আছিলেক ওটেকোনা যুক্ত করি  
দেওয়া হবে। কেনেনা যুক্ত করির কাম ভগবানেই করির পারে।

২৪ আসলে তুই একটা জংলি জলপই গছের ডাল আছিলু, আর  
ঐ গছটা থাকি কলম কাটি বান্দি দেওয়া হইচে। তাইলে যায় যায়

ঐ গছের আসল ডাল আছিলেক, উমারলাক কত না সহজে ঐ গছত যুক্ত করা যাবে!

২৫ ভাই-বইনিলা, তোমরালা নিজক নিজে জ্ঞানী মনে না করেন এই বাদে মুই তোমার বাদে গোপন সইত্য জানে দিবার চাং। এই সইত্য হইলেক ঠিক করি থোয়া অযিহুদী শিষ্য সংখ্যা পূরণ না হওয়া পর্যন্ত বেশীর ভাগ ইজ্রায়েলীলার অন্তর পাষান হয়্যা থাকিবে।

২৬ আর এই নাকান করি ইজ্রায়েল জাতির সগায় মুক্তি পাবে। পবিত্র শাস্ত্রত নেখা আছে, “সিয়োন থাকি মুক্তিদাতা আসিবে, উয়ায় যাকবের গুষ্টির সউগ অধর্ম দূর করিবে।

২৭ যেয়ো উমার পাপ দূর করিম, সেয়ো মুই উমারলার সোদে এই চুক্তি করিম।”

২৮ ভাল খবর মানি না নিবার বাদে ইজ্রায়েলীলা ভগবানের শত্রু হইচে, কিন্তু বাছাই করি নিবার পাক থাকি যিহুদীলা এলাও ভগবানের পিরিতের মানষি। উমারলার বাপ ঠাকুর দাদালারটে ভগবান যে কিরা কাটিচে সেই বাদে উমারলাক পিরিত করে।

২৯ ভগবান যাক যেইটা দান করে আর যাক ড্যেকায় ঐ বিষয়ে উয়ার মন না বদলায়।

৩০ যেই নাকান তোমরালা এক সমায় ভগবানের অবাধ্য আছিলেন, কিন্তুক যিহুদীলার অবাধ্যতার বাদে এলা তোমরা ভগবানের দয়া পাইচেন।

৩১ ঠিক একে নাকান করি তোমরা দয়া পাইচেন কয়া যিহুদীলা এলা অবাধ্য হইচে, যাতে যিহুদীলাও এলা আশুর্বাদ পাবার পারে।

৩২ ভগবান যাতে সগাকে দয়া করির পারে এই বাদে সগাকে অবাধ্যতার মইন্ধোত বন্দী করি থুইচে।

৩৩ কায় মাপির পারে ভগবানের ধন, উয়ার জ্ঞান আর বুদ্ধি! উয়ার সউগ কাম বুঝা মুশকিল।

৩৪ “কায় ভগবানের মন বুঝির পাইচে? কায় উয়াক আদেশ দেয়?”

৩৫ কায় ভগবানক কিছু দান দিচে? এই নাকান কায় যারটে ভগবানের দেনা আছে?”

৩৬ সউগ কিছুই তো উয়ারটে থাকি আর উয়ারে দিয়া আইসে আর সউগ কিছু উয়ারে বাদে। চিরকাল উয়ারে গৌরব হউক। আমেন।

১২ তাইলে ভাই-বইনিলা, ভগবানের এইলা দয়ার বাদে মুই তোমারলাক বিশেষ করি মিনতি করির ধরচুং, তোমরালা তোমার দেহাক ভগবানের উদ্দেশ্যে বভায় পবিত্র বলিদানের বাদে সঁপে দেও। এইটায় হবে তোমারলার উপযুক্ত সেবা।

২ এলাকার বেয়া দুনিয়ার চাল-চলনের মইন্ধোত তোমরা নিজেরলাক ডুবিয়া না দেন। বরং নয়া চিন্তায় নিজেরলাক

বদলান, যাতে বুঝির পারেন ভগবান কি চায়। ভগবানের ইচ্ছা ভাল, সউগলায় নির্ভুল আর উয়াতে ভগবান সন্তুষ্ট হয়।

৩ মুই যে ভগবানেরটে থাকি বিশেষ দয়া পাইচুং সেই দয়ার গুণে মুই তোমারলাক সগাকে কবার ধরচুং, নিজক যতকোনা বড় মনে করা দরকার উয়ার চায়া তোমরা নিজক বেশী বড় মনে না করেন। যতকোনা মনে করা দরকার অতকোনা কর। ভগবান যাক যতকোনা বিশ্বাসের শক্তি দিচে উয়ার চায়া কাণ্ডো যাতে নিজক বেশী মনে না করে।

৪ হামার সগারে দেহাত ম্যেলা অংশ আছে, কিন্তুক সউগ অংশ একে নাকান কাম না করে।

৫ ঠিক একে নাকান করি হামরা সংখ্যায় ম্যেলা হইলেও খ্রীষ্টের শিষ্য হয়। একটা দেহা হইচি। হামারলার সগারে একে অপরের সোদে যোগ আছে।

৬ ভগবানের দয়া অনুসারে হামরা আলদা আলদা বরদান পাইচি। সেই বরদান যদি ভগবানের খবরিয়া হিসাবে ভগবানের বাইক্য কবার ক্ষমতা হয় তাইলে বিশ্বাস অনুসারে উয়ায় ভগবানের বাইক্য কউক।

৭ যদি সেবা করির ক্ষমতা থাকে তাইলে উয়ায় সেবা করুক। যায় শিক্ষা দিবার ক্ষমতা পাইচে উয়ায় শিক্ষা দেউক।

৮ যায় উৎসাহ দিবার ক্ষমতা পাইচে উয়ায় উৎসাহ দেউক। যায় অইন্যক দান করির ক্ষমতা পাইচে উয়ায় সাদাসিদা মনে দান



করুক। যায় নেতা হবার ক্ষমতার বরদান পাইচে উয়ায় আগ্রহ  
সহকারে পরিচালনা করুক।

৯ পিরিতের মইন্ধোত ভন্ডামি না থাকুক। যেইটা বেয়া সেইটা ঘিন  
কর, যেইটা ভাল সেইটা শক্ত করি ধরি থোন।

১০ একে অপরক ভাইয়ের নাকান অন্তর দিয়া পিরিত কর।  
নিজের চায়া অপরক বেশী সন্মান কর।

১১ যতন করির আলসিয়া না হন, প্রভুর কামত ঠাণ্ডা না হন,  
প্রভুর সেবা করিতেই থাক।

১২ তোমারলার আগত আশা আছে উয়ার বাদে আনন্দ কর।  
দুঃখে কষ্টে ধৈর্য ধর। সউগ সমায় প্রার্থনা কর।

১৩ ভগবানের মানষিলার অভাবের সমায় সাহায্য কর। সাগাই  
সোদরক সেবা করির আগ্রহী হন।

১৪ যায় যায় তোমারলাক অইত্যাচার করে উমারলার অমঙ্গল না  
চান। বরং মঙ্গল চান।

১৫ যায় যায় আনন্দ করে উমার সোদে আনন্দ কর, যায় যায়  
কান্দে উমার সোদে কান্দো।

১৬ তোমারলার একে অপরে একতা রাখ। দীনহীন মানষিলার  
সোদে সম্পর্ক খুইয়া চল। নিজক জ্ঞানী মনে না করেন।

১৭ বেয়ার বদলে কাণোরো বেয়া না করেন। সউগ মানষির  
নজরত যেইটা ভাল সেই বিষয়ে মন দেও।

১৮ তোমারলার দিক থাকি যত দূর পারেন সউগ মানষির সাথে শান্তিতে বসবাস করেন।

১৯ মোর আদরের ভাই-বইনিলা, তোমারলার বিরুদ্ধে কাণ্ডো অন্যায় করিলে উয়াক শাস্তি দিবার না যান, বরং ভগবানক শাস্তি দিবার দেও। শাস্ত্রত প্রভু কইচে, “অন্যায়ের শাস্তি দিবার অধিকার খালি মোরে আছে, যার যা পাওনা মুই তাক সেইটায় দিম।”

২০ শাস্ত্রের কতা মত, “তোমার শত্রুর যদি ভোগ নাগে খাবার দেও, যদি টিস্সা নাগে জল দেও। এই নাকান করিলে উয়ার মাখাত জ্বলন্ত আংরা টিব করি থুবু।”

২১ বেয়ারটে হারি না যান, ভাল দিয়া বেয়াক জয় কর।

১৩ প্রতিটা মানষির উচিত দেশের শাসনকর্তালার শাসন মানি চলা, কেনেনা ভগবান যাক শাসনকর্তা বানায় উয়ায় ছাড়া আর কাণ্ডো শাসনকর্তা হবার পারেনা।

২ এই বাদে যায় শাসনকর্তার বিরুদ্ধে খাড়া হয়, উয়ায় ভগবানের শাসনের বিরুদ্ধে খাড়া হয়। যায় যায় এই নাকান করে উমরা নিজের শাস্তি নিজে ডেকে আনে।

৩ যায় যায় ভাল কাম করে শাসনকর্তালাক উমার ভয় খাবার কোন কারন না রয়। কিন্তুক যায় যায় অন্যায় কাম করে উমরায় ভয় খায়। শাসনকর্তাক ভয় না খায়া কি তোমরা চলির চান?

তাইলে যেইটা ভাল সেইটায় করিতে থাকো। ইয়াতে শাসনকর্তা তোমার গুণগান গাবে।

৪ তোমারলার ভালের বাদেই উয়ায় ভগবানের সেবাকারী হিসাবে কাম করে। তোমরা যদি অন্যায় করেন তাইলে ভয় খান, কেনেনা অন্যায় কারিলাক শাস্তি দিবার অধিকার শাসনকর্তার আছে। উয়ায় তো ভগবানের সেবাকারী হিসাবে কাম করে, যায় যায় অন্যায় কাম করে উমারলাক উয়ায় ভগবানের হয় শাস্তি দেয়।

৫ এই বাদে তোমরা শাসনকর্তার অধীনে থাকির বাধ্য হন। ভগবানের শাস্তির ভয়ে যে খালি উমার অধীনত থাকিবেন তা কিন্তুক না হয়, তোমারলার বিবেক ঝকঝকা করি খুবার বাদে এইটা কর।

৬ আর এই বাদে তোমরা মাসুল দিয়া থাকেন, কেনেনা মাসুল আদায়কারীলা উমার কাম দিয়ায় ভগবানের সেবা করির ধরচে।

৭ তোমারলারটে যার যেইটা পাওনা সেইটা উয়াক দেও। যায় মাসুল আদায় করে উয়াক মাসুল দেও। তোমারলার কর্তব্য হিসাবে যাক শ্রদ্ধা করা উচিত উয়াক শ্রদ্ধা কর, যাক সন্মান করা উচিত উয়াক সন্মান কর।

৮ অন্যেরটে পিরিতের দেনা ছাড়া অইন্য কোন দেনা তোমার না থাকুক। যায় যায় অইন্যক পিরিত করে উমরالا তো শ্রী মোশির আইন-কানুন মানি চলির ধরচে।

৯ উয়ার আদেশ আছে, ব্যভিচার না করেন, খুন না করেন, চোর না করেন, লোভ না করেন, এইলা আর এই নাকান আরো অইন্য অইন্য আদেশলা মিলিয়া এক কতায় কওয়া হইচে, “তোমার পাড়া-পড়শিলাক নিজের দেহার নাকান পিরিত কর।”

১০ পিরিত করিলে কাণ্ডো কাণ্ডোরো ক্ষতি করির না পারে, তাইলে দেখা যায়, পিরিত দিয়ায় সউগ আইন-কানুন পালন করা যায়।

১১ এইলা ছাড়াও তোমরা জানেন হামরা এই দুনিয়াত অল্প দিন বসবাস করমু, তোমরা এলাকার সমায় বুঝিয়া সেই নাকান করি চল, কেনেনা এলা নিন থাকি জাগিবার সমায় হইচে, পইলা হামরা যেলা প্রভুর উপরত বিশ্বাস থুইছিলং, সেলোকার চায়া এলায় রক্ষা পাবার সমায় ঘড়ির কাটার একেবারে বগলত আসিচে।

১২ রাতি পেরায় শেষ, ভোর হবার ধরচে, এই বাদে আইস, আন্ধারের বেয়া কাম ছাড়ি দিয়া আলোত সৎ কাম করির বাদে ভগবানের দেওয়া সাজ পোশাক পিন্দি।

১৩ হৈ-হুল্লা করি মদ খাওয়া আর মাতলামি করি না হয়, ব্যভিচার আর বিশৃঙ্খল জীবনত না হয়, ঝগরাঝাটি আর হিংসাতে না হয়, কিন্তু যায় যায় দিনের আলোত চলাফেরা করে, আইস, হামরা উমারলার নাকান সঠিক ভাবে জীবন কাটাই।

১৪ তোমরা যেই নাকান করি কাপড় পেন্দেন সেই নাকান করি  
প্রভু যীশুক নিয়া নিজের জীবন ঢাকো, পাপ স্বভাবের ইচ্ছা পূরণ  
করির ভিত্তি মন না দেন।

১৪ যেই গুরু ভাই-বইনিলা বিশ্বাসে দুর্বল উমারলাক আপন করি  
নেও, উমার মতামত নিয়া উমার নগত তর্কাতর্কি না করেন।

২ কাণ্ডো মনে করে উয়ায় সউগ কিছুই খাবার পারে, কিন্তুক যায়  
বিশ্বাসে দুর্বল উয়ায় খালি শাক-সবজিই খায়।

৩ আমিষ খাওয়া মানষি যাতে নিরামিষ খাওয়া মানষিক তুচ্ছ  
মনে না করে। আর নিরামিষ খাওয়া মানষি যাতে আমিষ খাওয়া  
মানষিলাক ঘিন না করে, কেনেনা ভগবান তো সগাকে আপন  
করি নিচে।

৪ তুই কায়, যে অইন্যের চাকরের বিচার করিস? উয়ায় খাড়া  
হয়া আছে, না পড়ি গেইচে, উয়ার মালিকে সেইটা বুঝিবে।  
কেনেনা উয়ার প্রভুই উয়াক খাড়া করি খুবার পারে।

৫ কাণ্ডো হয় তো মনে করির পারে ঐ দিনটার থাকি এই দিনটা  
ভাল। আর কাণ্ডো কাণ্ডো সউগ দিনকে সমান মনে করে। পতিটা  
মানষি নিজের নিজের মনত নিশ্চিত হউক।

৬ বিশেষ কোন একটা দিন কাণ্ডো পালন করে উয়ায় প্রভুক খুশি  
করির বাদে পালন করে। যায় সউগ কিছুই খায় উয়ায় প্রভুক খুশি  
করির বাদে খায়, কেনেনা উয়ায় ভগবানক ধন্যবাদ দিয়া খায়।

যায় সউগ কিছু না খায় উয়ায় ভগবানক খুশি করির বাদে না খায়  
আর উয়ায়ও ভগবানক ধন্যবাদ দেয়।

৭ হামরালা কাণ্ডো নিজের বাদে বত্তি থাকি না আর কাণ্ডো  
নিজেই মরি না।

৮ হামরা যদি বত্তি রই তাইলে প্রভুর বাদে বত্তি রই, আর যদি  
মরি প্রভুর বাদেই মরি। তাইলে হামরা বত্তি বা মরি হামরা প্রভুর।

৯ বাছাই করা রাজাটা মরিচে আরো ফির বত্তি উঠিচে, যাতে  
উয়ায় মরা আর বত্তা দুইএর প্রভু হবার পারে।

১০ তাইলে কেনে তুই তোর ভাইয়ের দোষ ধরির ধরচিস? আর  
কেনে তোর ভাইয়োক তুচ্ছ মনে করির ধরচিস? বিচারের বাদে  
তো হামরা সগায় ভগবানের আগত খাড়া হমো।

১১ শাস্ত্রত নেখা আছে, “প্রভু কইলেক, মুই মোর জীবনের কিরা  
কাটি কবার ধরচুং, মোর আগত সগায় হাংকুড়া পাড়িবে আর  
মোক ভগবান কয়া স্বীকার করিবে।”

১২ তাইলে দেখা যায়, হামারলাক সগাকে নিজের বিষয়ে  
ভগবানক হিসাব দিবার নাগবে।

১৩ হামরা যাতে এক জন অইন্য জনের দোষ না ধরি, এমন কাম  
না করিমু কয়া ঠিক করি যেইটা দেখিয়া অইন্য ভাই-বইনিলার  
মনত বিশ্বাসের গোলন্দগোল দেখা দিবার পারে, বা পাপত পড়ির  
পারে।

১৪ প্রভু যীশুর নগত মুই যুক্ত হইচুং বুলিয়া মুই ভাল করিয়া জানং, এমনি কোন খাবার অশুদ্ধি না হয়, কিন্তুক কাণ্ডো যদি কোন খাবারক অশুদ্ধি মনে করে সেইটা উয়ারটে অশুদ্ধি।

১৫ কোন খাবারের বাদে যদি তুই তোর ভাই বইনিক দুঃখ দিস তাইলে বুঝির নাগবে তোর আর পিরিতের ঘাটাত চলির মনোভাব নাই। খাবারের বাদে উয়ার সর্বনাশ না করিস। বাছাই করা রাজা তো উয়ারও বাদে পরান দিচে।

১৬ তোরটে যেইটা ভাল সেইটা যাতে কাণ্ডো গেলানি করির না পারে।

১৭ ভগবানের শাসন ব্যবস্থাত খাওয়া-দাওয়া বড় কতা না হয়, বড় কতা হইলেক পবিত্র আত্মার দেওয়া শান্তি আর আনন্দত থাকিয়া সৎ হয় চলা।

১৮ যায় এই নাকান করি বাছাই করা রাজাটার সেবা করে, ভগবান উয়ার উপরত সন্তুষ্ট হয় আর মানষিলাও উয়াক ভাল পায়।

১৯ এই বাদে যেইটা করিলে শান্তি হয় আর যেইটা দিয়া হামরা এক জন অইন্য জনক গড়ে তুলির পারি, আইসো হামরা সেইটারে চেষ্টা করি।

২০ কোন খাবারের বাদে ভগবানের কাম নষ্ট না করেন। সউগ খাবারে শুদ্ধি, কিন্তুক কাণ্ডো কোন খাবার খায়া যদি অইন্যের

মনত বাধা দেখা দেয় তাইলে সেইটা খাবার খাওয়া উয়ার পক্ষে  
অন্যায়।

২১ মসং খাওয়া, মদ খাওয়া, আর এমন কিছু করা উচিত না হয়  
যাতে তোর কোন ভাইয়ের মনত বাধা জন্মায়।

২২ এই বিষয়ে তুই যেইলা কাম করা বা না করা ভাল মনে করিস  
সেইলা তুই তোর আর ভগবানের মইন্ধোত থো। কাণ্ডোরো বিবেক  
যদি সন্দেহ না করিয়া কোনো কাম করে তাইলে উয়ায় ভাগ্যবান।

২৩ কিন্তু কাণ্ডো যদি সন্দেহ করি কোন কিছু খায় তাইলে উয়ায়  
দোষী, কেনেনা উয়ায় উয়ার বিশ্বাস মত কাম না করে। বিশ্বাসের  
বিরুদ্ধে কোন কিছু করায় পাপ।

১৫ হামরা যায় যায় বিশ্বাসে শক্তিশালী, হামরা যাতে  
নিজেরলাক সন্তুষ্ট করির বাদে নজর না দিয়া দুর্বল বিশ্বাসী  
গুরুভাইলার দুর্বলতা সহ্য করি।

২ গুরুভাইলাক গড়ে তুলির বাদে হামরা সগায় যাতে অইন্যক  
খুশি করির চেষ্টা করি, উমরা যাতে বিশ্বাসে শক্তিশালী হয় উঠির  
পারে।

৩ বাছাই করা রাজাটাও নিজক সন্তুষ্ট করে নাই। সনাতন শাস্ত্রত  
নেখা আছে, “যায় যায় তোক অপমান করে, উমারলার অপমান  
মোর উপরত পড়িচে।”



৪ শাস্ত্রত যেইলা আগতে নেখা হইচে সেইলা সউগ হামারলাক শিক্ষা দিবার বাদেই নেখা হইচে। যাতে সেই শাস্ত্র থাকি হামরা ধৈর্য, উৎসাহ আর অন্তরত আশা দেখির পাই।

৫ মুই প্রার্থনা করং, রাজা যীশুর সোদে চলিবার ঘাটাত ধৈর্য আর উৎসাহদাতা ভগবান সগারে মনত শান্তি দিয়া এক করুক।

৬ তাইলে তোমরা মনে মুখে এক হয়া হামার প্রভু যীশু খ্রীষ্টের ভগবান আর বাপের গুণগান করির পারিবেন।

৭ ভগবানের মহিমা যাতে প্রকাশ পায়, এই বাদে যীশু যেমন তোমারলাক আপন করি নিচে তেমন তোমরাও এক জন অইন্য জনক আপন করি নেও।

৮ ফম থোন, ভগবানের কতা যে সচাং সেইটা প্রমাণ করির বাদে বাছাই করা রাজাটা যিহুদীলার সেবাকারী হইছিলেক। ইয়ার উদ্দেশ্য আছিলেক, উমার বাপ ঠাকুর দাদালারটে ভগবান যে কিরা কাটিচে সেইটা যাতে পূরণ হয়,

৯ আর উয়ার দয়ার বাদে অযিহুদীলা উয়ার গুণগান করে। শাস্ত্রত নেখা আছে, “এই বাদে অযিহুদীলার মইন্ধোত মুই তোমার গুণগান করিম, আর তোমার সুনাম গাইম।”

১০ আরো নেখা আছে, “অযিহুদীলা তোমরা আইস, ভগবানের বাছাই করা মানষিলার নগত আনন্দ কর।”

১১ আর নেখা আছে, “সউগ অযিহুদীলা তোমরা প্রভুর গুণগান কর, সউগ জাতির মানষি আসিয়া উয়ার উপাসনা করুক।”

১২ ভগবানের খবরিয়া ঘিশাইয় কইচে, “মহাপুরুষ দাউদের গুটি থাকি এক জন শাসন করির আসিবে, উয়ায় সউগ জাতিক শাসন করিবে, আর উমরা উয়ার উপরত আশা থুবে।”

১৩ মুই প্রার্থনা করং, যায় তোমারলার মনত আশা জাগেয়া তোলে সেই ভগবানের উপরত বিশ্বাস করিয়া আনন্দ আর শান্তি দিয়া তোমারলাক ভরপুর করি তুলুক। তাইলে পবিত্র আত্মার শক্তি দিয়া তোমারলার অন্তরত আশা উথুলি পড়িবে।

১৪ মোর ভাই-বইনিলা, মুই তোমারলার সমন্ধে এই কতা বিশ্বাস করির পারং যে, তোমারলার মন মঙ্গলের ইচ্ছায় ভরপুর, তোমারলার সউগ নাকানের জ্ঞান আছে, আর তোমরা এক জন অইন্য জনক উপদেশ দিবার পারেন।

১৫-১৬ তাঞো কয়েকটা বিষয় ফম করি দিবার বাদে মুই সাহস করি তোমার অযিহুদীলারটে এই কতালা নেখিলুং, কেনেনা ভগবান মোক অযিহুদীলারটে ভাল খবর প্রচার করির বাদে যীশুর সেবাকারী হবার আশুর্বাদ দান করিচে। পবিত্র আত্মা যত অযিহুদীলাক যীশুর বাদে যুদা করি থুইচে, উমরা যাতে ভগবানক সঁপে দেওয়া পবিত্র উপহার হয়। এই বাদে মুই উয়ারে দেওয়া ভাল খবর প্রচার করি বামনের কাম করির ধরচুং।

১৭ মুই ভগবানের বাদে যে কাম করির ধরচুং ইয়াতে যীশু খ্রীষ্টক নিয়া মোর গর্ব করির অধিকার আছে।

১৮ বাছাই করা রাজাটা মোক দিয়া যেইলা করিচে উয়ার বায়রাত কোন কতা কবার সাহস মুই করিম না। প্রভু মোর কতা আর কাম দিয়া, অচানক কামের আর চিন দিয়া, আর পবিত্র আত্মার শক্তি দিয়া অযিহুদীলাক ভগবানের বাধ্য করিচে।

১৯ এই বাদে মুই যিরুশালেম থাকি আরম্ভ করি ইল্লুরিকা দেশ অন্দি সউগ জাগাত বাছাই করা রাজাটার বিষয় ভাল খবর প্রচার করিচুং।

২০ যেটেকোনা বাছাই করা রাজাটার নাম কোন দিনও কওয়া হয় নাই ওটেকোনা ভাল খবর প্রচার করায় হইলেক মোর জীবনের আসল লক্ষ্য, যাতে অইনের গড়া ভিটার উপরত মোক বানবার না নাগে।

২১ মুই এই নাকান করং যাতে পবিত্র শাস্ত্রের কতা পুরা হয়, “যাক যাক উয়ার বিষয়ে কওয়া হয় নাই উমরা ওইলা দেখির পাবে, আর যায় যায় শুনে নাই উমরা বুঝির পাবে।”

২২ এই বাদে মুই তোমারটে মেলোবার যাবার চায়াও বাধা পাইচুং।

২৩ মেলো বছর থাকি তোমারলার ওটে মোর যাবার ইচ্ছা, কিন্তুক এলা এইলা এলাকাত মোর কাম শেষ হইচে।

২৪ এই বাদে স্পেন দেশ যাবার সমায় মুই তোমারলার নগত দেখা করিম। মুই আশা করং যে, ঐ ঘাটা দিয়া যাবার সমায় তোমারলারটে যাবার পাইম আর কিছু সমায় আনন্দে তোমারলার

সোদে কাটের পাছত তোমরায় মোক স্পেন দেশ যাবার ব্যবস্থা করি দিবেন।

২৫ কিন্তুক এলা মুই ভগবানের মানষিলাক সাহায্য করির বাদে যিরুশালেম যাবার ধরচুং,

২৬ কেনেনা যিরুশালেমের ভগবানের মানষিলাক মইদ্বোত যেইলা গরীব মানষি আছে, উমারলার বাদে ম্যাসিডোনিয়ার আর গ্রীস দেশের সমিতির মানষিলা কিছু চান্দা তুলিচে।

২৭ এই চান্দা উমরা খুশি হয়ায় তুলিচে। এইলা ছাড়াও সমিতিলা যিরুশালেমের ভগবানের মানষিলাকটে দেনাদার, কেনেনা যিহুদীলা যেলা উমার আত্মিক আশুর্বাদের ভাগ অযিহুদীলাক দিচে, সেলা অযিহুদীলারো উচিত সংসারের বিষয়ে যিহুদীলাক সাহায্য করা।

২৮ মোর এই কাম শেষ হবার পাছত মুই জানিম যে, সেই চান্দা ঠিক মত যিরুশালেমোত পৌছিচে, সেলা মুই তোমারলারটে কিছু দিন রয়া স্পেনত যাইম।

২৯ মুই জানং মুই যেলা তোমারলার ওটে যাইম সেলা মুই বাছাই করা রাজাটার ভরপুর আশুর্বাদ নিয়ায় যাইম।

৩০ ভাই-বইনিলা, হামার প্রভু যীশু খ্রীষ্টের নামে আর পবিত্র আত্মার দেওয়া পিরিত নিয়া মুই তোমারলাক বিশেষ করি মিনতি করির ধরচুং, তোমরা ভগবানেরটে মোর বাদে প্রার্থনা করিতে থাক।

৩১ তোমরালা প্রার্থনা করেন, যিহুদীয়া প্রদেশত যায় যায় প্রভু যীশুক না মানে উমারলার হাত থাকি যাতে মুই রক্ষা পাং আর যিরুশালেমের ভগবানের মানষিলা যাতে মোর এই সাহায্য উমরা নেয়।

৩২ সেলো ভগবানের ইচ্ছায় মুই খুশি মনে তোমারলারটে যাবার পাইম আর তোমারলার সোদে থাকিয়া পরানটা জুড়াইম।

৩৩ শান্তিদাতা ভগবান তোমারলার সগারে সাথে সাথে থাকুক।  
আমেন।

১৬ এলা মুই হামারলার গুরু বইনি ফৈবির বিষয় কং। উয়ায় কিংক্রিয়া গঞ্জের সমিতির পরিচালিকা।

২ ভগবানের মানষিলাক যেই নাকান করি আপন করি নেওয়া দরকার ঐ নাকান করি আপন করি নেন। কোন ব্যাপারে যদি তোমারলারটে সাহায্য চায় তোমরালা সাহায্য করেন, কেনেনা উয়ায় মেলা মানষিক সাহায্য করিচে এমন কি মোকও সাহায্য করিচে।

৩ শ্রীমতি প্রিক্সিল্লা আর শ্রী আকিলাক মোর পিরিত জানান।  
উমরাও বাছাই করা রাজা যীশুর কামত মোর সোদে পরিশ্রম করিচে।

৪ মোর পরান বাঁচের যায়া উমরা মরণ ফান্দের মুখত পিরিচে।  
খালি মুই না হং কিন্তুক সউগ অযিহুদী সমিতিলাও উমারলারটে

উপকার পাইচে।

৫ উমার বাড়িত সমিতি হিসাবে যায় যায় একটে হয় উমারলাকও মোর মঙ্গল কামনা জানান। মোর পরানের সখা ইপিণিতাকও মঙ্গল কামনা জানান। এশিয়ার মইন্ধোত উয়ায়ে পইলা ধর্মান্তরিত হয়। যীশুর শিষ্য হয়।

৬ মরিয়ম, যায় তোমারলার বাদে ম্যেলা পরিশ্রম করিচে, উয়াকও মঙ্গল কামনা জানান। আন্দ্রনীক আর শ্রীমতি যুনিকও মঙ্গল কামনা জানান।

৭ উমরা মোরে নাকান যিহুদী আর মোরে নাকান উমরাও জেলত বন্দী আছিলেক। খবরিয়ালার মইন্ধে উমরা খুব মানিগুণী মানষি। উমরা মোর আগতে বিশ্বাস করিয়া প্রভু যীশুর শিষ্য হয়।

৮ প্রভুর উপরত আস্থা থুইচে মোর পরানের সখা আমপ্লিয়াতকও মঙ্গল কামনা জানান।

৯ উরবানুসক মঙ্গল কামনা জানান, উয়ায়ও হামারলার নগত বাছাই করা রাজাটার বাদে কাম করে। মোর পরানের সখা শ্রী স্তাখিস, উয়াকও মঙ্গল কামনা জানান।

১০ আর শ্রী আপিলিসক মঙ্গল কামনা জানান, বাছাই করা রাজার মানষি হিসাবে উয়াক যাচাই করি দেখা হইচে। শ্রী আরিষ্টবুলের বাড়ির মানষিলাকও মঙ্গল কামনা জানান।

১১ শ্রী হেরোদিয়ান, উয়ায় মোর মতয় যিহুদী, উয়াক মঙ্গল কামনা জানান। শ্রী নার্কিসের বাড়ির মইন্ধোত যায় যায় প্রভুর

উপরাত আস্থা থোয় উমাকও মঙ্গল কামনা জানান।

১২ শ্রীমতি ত্রফেনা, শ্রীমতি ত্রফোষা, আর আদরের বইনি  
শ্রীমতি পর্ষিসকও মঙ্গল কামনা জানান। ইমরালা প্রভুর বাদে খুব  
পরিশ্রম করিচে।

১৩ খ্রীষ্টের বাছাই করা শ্রী রুফক আর উয়ার মাকও মঙ্গল  
কামনা জানান। উয়ার মাও মোরটে মোর মাও এর নাকান।

১৪ শ্রী অসুংক্রিত, শ্রী ফ্লিগোন, শ্রী হের্মেস আর উমারলার সোদে  
অইন্য অইন্য ভাইলাকও মঙ্গল কামনা জানান।

১৫ শ্রী ফিললগ আর শ্রীমতি যুলিয়া, শ্রী নিরীয় আর উয়ার  
বইনি, শ্রী ওলুম্প আর উমারলার নগত যেই গুরু ভাই বইনিলা  
আছে সগাকে মঙ্গল কামনা জানান।

১৬ পিরিতের মনভাব নিয়া তোমরা একে অইন্যক মঙ্গল কামনা  
জানান। খ্রীষ্টের সউগ সমিতিলা তোমারলাক মঙ্গল কামনা  
জানেনবার ধরচে।

১৭ ভাই-বইনিলা, তোমরা যেইলা শিক্ষা পাইচেন উয়ার বিরুদ্ধে  
শিক্ষা দিয়া যায় যায় দলাদলি আর বাধার সৃষ্টি করে, উমার ভিতি  
নজর দিবার মুই তোমারলাক বিশেষ করি অনুরোধ করির ধরচুং।  
তোমরালা উমার বগল থাকি দূরত রন।

১৮ কেনেনা এই মানষিলা হামার প্রভু যীশুর সেবা না করিয়া  
উমরা খালি নিজের পেটের সেবা করির ধরচে। তোষামোদ আর  
মিষ্টি কতা কয়া উমরা সরল মনা মানষিলাক ঠকের ধরচে।

১৯ তোমারলার বাধ্য থাকির কতা সগায় জানে আর এই বাদে মুই খুশি হচুং। তাঙো মুই চাং তোমরা যেইটা ভাল সেইটা চিনিয়া মানি নেও আর যেইটা বেয়া সেইটা থাকি দূরত থাকো।

২০ শান্তিদাতা ভগবান খুব পচকরি শয়তানক তোমারলার ঠেংএর নিচত ফ্যেলে খচিয়া চেপ্টা করিবে।

২১ হামার সোদে কাম করে তীমথিয় উয়ায়ও তোমারলাক মঙ্গল কামনা জানাইচে। শ্রী লুকিয়, শ্রী যাসোন আর শ্রী সোষিপাত্রও তোমারলাক মঙ্গল কামনা জানাইচে। উমরাও হামার নাকান যিহুদী জাতির মানষি।

২২ মুই, শ্রী তর্তিয়, পৌলের এই চিঠিখান নেখিচুং। প্রভুর মানষি হয় মুইও তোমারলাক মঙ্গল কামনা জানের ধরচুং।

২৩-২৪ মুই যার বাড়িত থাকং আর সমিতির মানষিলা যার বাড়িত একসোদে মিল হয় উয়ায় শ্রী গাইয়, উয়াও তোমারলাক মঙ্গল কামনা জানাইচে। এই গঞ্জের ভান্ডারী শ্রী ইরাস্ত আর হামারলার ভাই শ্রী কার্ত তোমারলাক মঙ্গল কামনা জানেবার ধরচে।

২৫ বাছাই করা রাজা যীশুর বিষয়ে যে ভাল খবর মুই প্রচার করং সেই ভাল খবর দিয়া থির খুবার ক্ষমতা ভগবানের আছে। মেয়ো কাল থাকি ভগবান উয়ার গোপন বিষয় কাঙোকে কয় নাই।



২৬ কিন্তুক এলা ভাল খবর থাকি নিকলির ধরচে। আর ঐ নাকানে মুই প্রচার করির ধরচুং। সনাতন ভগবানের আদেশ মত খবরিয়ালার নেখা থাকি সউগ জাতির মানষিলারটে জানে দেওয়া হবার ধরচে। যাতে উমরা খ্রীষ্টের উপরাত বিশ্বাস করি ভগবানের বাধ্য হয় চলে।

২৭ এক মাত্র খালি উয়ায়ে ভগবান, উয়ায় জ্ঞানী। যীশু খ্রীষ্টের গুণে চিরকাল পরমপ্রভুর গুণগান হউক। আমেন॥

## ১ করিন্থীয়

১ হে করিন্থ গঞ্জের যীশু-ভক্তের দল, জয় যীশু! মুই পৌল, আর গুরু ভাই সোস্থিনির সোদে এই চিঠি তোমারলারটে নেখির ধরচি। ভগবানের ইচ্ছাত মুই যীশু খ্রীষ্টের এক জন খবরিয়া হিসাবে নিযুক্ত হচুং। তোমারলাক রাজা যীশুর সোদে যুক্ত হবার বাদে, পরম ভগবান উয়ার নিজের উদ্দেশ্যে তোমারলাক শুদ্ধি করিচে। উয়ার নিজের মানষিলা হবার বাদে তোমারলাক নিযুক্ত করিচে। তোমারলারটে আর অইন্য সউগ জাগাত যায় যায় হামার রাজা যীশুক প্রভু কয়া মানি নেয়, উমারলারটে হামরা এই চিঠি নেখির ধরচি। উয়ায় উমারলার প্রভু, হামারলারও প্রভু।

৩ হামারলার স্বর্গের বাপ আর প্রভু যীশু খ্রীষ্ট তোমারলাক দয়া আর শান্তি দান করুক।

৪ যীশু খ্রীষ্টের নগত একটে হইচেন বুলিয়া তোমরা ভগবানের দয়া পাইচেন, এই বাদে সউগ সমায় তোমারলার বাদে মুই ভগবানক ধন্যবাদ দেং।

৫ আর সেই দয়ায় তোমরালা খ্রীষ্টের সোদে যোগ হয় চাইরো পাকে সউগ কিছু কবার ক্ষমতা পাইচেন আর জ্ঞানও বারি গেইচে।

৬ এই নাকান করি খ্রীষ্টের সোদে তোমারলার সম্পর্ক যে সচাং, এইটা প্রমাণ হইচে।

৭ তোমরা প্রভু যীশু আইসার বাদে খুব আগ্রহ নিয়া বাচ্ছে আছেন। এই বাদে ভগবানের পবিত্র আত্মার দান দেওয়া নানা নাকানের ক্ষমতা পাইচেন বুলিয়া তোমারলার কোনো অভাব নাই।

৮ হামার প্রভু যীশু শেষকাল পর্যন্ত তোমারলাক থির থুবে, যাতে উয়ায় ফির আইসার দিন পর্যন্ত তোমরা নির্দোষ হয়্যা থাকেন।

৯ ভগবান বিশ্বাসযোগ্য, উয়ায় তোমারলাক ডেকাইচে, যাতে উয়ার বেটা হামারলার প্রভু যীশু খ্রীষ্ট আর তোমারলার মইন্ধোত যোগাযোগের সমন্ধ থাকে।

১০ মোর ভাই-বইনির ঘর, হামার প্রভু যীশু খ্রীষ্টের নামে তোমারলাক মিনতি করির ধরচুং, তোমারলার মইন্ধোত কোনো দলা-দলি না হউক, যাতে একমন আর একমত হন।

১১ হে মোর ভাই-বইনির ঘর, তোমারলার সমন্ধে বইনি ক্লেয়ীর বাড়ির মানষিলারটে জানির পালুং তোমরা এক জন আরে জনের নগত ঝগড়া করির নাগচেন।

১২ মুই এই কতা কবার চাং, তোমারলার মইন্ধোত কাণ্ডো কয়, “মুই পৌলের দলের,” কাণ্ডো কয়, “মুই আপল্লোর দলের,” কাণ্ডো কয়, “মুই পিতরের দলের,” আর কাণ্ডো কয়, “মুই বাছাই করা রাজা যীশুর।”

১৩ বাছাই করা রাজাটাক কি ভাগ করা যায়? পৌলক কি তোমারলার বাদে ক্রুশ খুটাত টাঙা হইচে? তোমরালা কি পৌলের নামে দীক্ষা নিচেন?

১৪ মুই ভগবানক ধন্যবাদ দেং যে, শ্রী ক্রীস্প আর শ্রী গাইয় ছাড়া মুই কাণ্ডোকে দীক্ষা দেং নাই।

১৫ এই বাদে কাণ্ডো কবার না পায় যে, তোমরালা মোর নামে দীক্ষা নিচেন।

১৬ ও মোর ফম হইলেক স্তিফানের পরিবারের মানষিলাকও মুই দীক্ষা দিচুং। তাছাড়া কাণ্ডোরো কতা মোর ফম না পরে।

১৭ বাছাই করা রাজাটা তো মোক দীক্ষা দিবার নাই পেঠাই, মোক পেঠাইচে ভাল খবর প্রচার করির বাদে। এই ভাল খবর মোক জাগতিক জ্ঞানে প্রচার করির নাই পেঠায়, মোক পেঠাইচে বাছাই করা রাজাটার ক্রুশের মরণ যাতে বিফল না হয়।

১৮ “হামাক বন্তেবার বাদে রাজা যীশু ক্রুশত মরিচে” এই কতা শুনিয়া মেয়ো মানষি মনে করে যে, এইটা মুখামি কতা। উমরালা তো ধবংসের ঘাটাত যাবার ধরচে, হামরালা কিন্তু মুক্তির ঘাটাত যাবার ধরচি। এই বাদে হামরা জানি যে, ক্রুশের কতা দিয়া ভগবানের শক্তি দেখা দেয়।

১৯ সনাতন শাস্ত্রত নেখা আছে যে, মুই পন্ডিতলার জ্ঞান ধবংস করিম, আর যায় নিজক বুদ্ধিমান মনে করে, উমার বুদ্ধি মুই বুদ্ধিহারা করিম।

২০ তাইলে জ্ঞানী মানষি কোটে? পন্ডিত মানষি কোটে? যার তর্ক করির ক্ষমতা আছে, এই যুগত এই নাকান মানষি বা কোটে? ভগবানের নজরত উমার গুরুত্ব আছে কি?

২১ ভগবানের বুদ্ধিতে দুনিয়ার মানষিলা নিজের বুদ্ধি দিয়া ভগবানক জানির পায় নাই। ভগবান কিন্তু এইটা ভাল পাইচে যে, হামারলার মূর্খের নাকান প্রচার মানি নিয়া মানষিলা বিশ্বাস করিয়া মুক্তি পায়। ইয়াতে ভগবান এই দুনিয়ার জ্ঞানী মানষিলাক অজ্ঞানী করি থুইচে।

২২ হামারলার প্রচার না মানিয়া, যিহুদী মানষিলা খালি অচানক কাম দেখির চায়, আর গ্রীক মানষিলা খালি জ্ঞান খোজে,

২৩ কিন্তু হামরালা এই কতা প্রচার করি যে, “ভগবানের বাছাই করা রাজাক ক্রুশ খুটাত মারি ফেলা হইচে।” এই কতা শুনিয়া যিহুদীলার মনত বাধা আসচে, আর গ্রীক মানষিলা মনে করে যে, এইটা মূর্খের নাকান।

২৪ কিন্তু যিহুদী হউক আর অযিহুদী হউক, ভগবান যাক যাক ডেকাইচে উমারলারটে রাজা যীশুই ভগবানের শক্তি আর ভগবানের জ্ঞান।

২৫ কেনেনা মানষিলার জ্ঞানের তুলনায় ভগবানের মূর্খতা অনেক বুদ্ধিমান। আর মানষিলার শক্তির তুলনায় ভগবানের দুর্বলতা অনেক শক্তিমান।

২৬ ভাই বইনিলা তোমারলাক যেলা ডেকা হইচে, সেলা তোমরালা কেনমন মানষি আছিলেন, খানিক চিন্তা ভাবনা কর। মানষির বিচারে তোমরালা যে জ্ঞানী বা উচা বংশের তা কিন্তু খুব কম মানষি তোমারলার মইদ্বোত হয়।

২৭ কিন্তু এই দুনিয়ার মানষিলার যে বিষয়লা মূর্খ বুলিয়া মনে হয়, ভগবান সেইটাই বাছাই করি নিচে যাতে জ্ঞানীলা নইজ্জা পায়।

২৮ দুনিয়া যেইলাক নিচা আর তুচ্ছ মনে করে, ভগবান সেইলায় বাছাই করি নিচে। যেইলা দুনিয়ার চোখুত খুব দামী, সেইলা যাতে মূল্যহীন হবার পারে।

২৯ উয়ায় ঐলা বাছাই করিয়া নিছিলেক, যাতে কোন মানষি উয়ার আগত গর্ব করির না পায়।

৩০ পরম প্রভু তোমারলাক রাজা যীশুর নগত এক করিচে। আর যীশুই হামারটে ভগবানের দেওয়া জ্ঞান, বুদ্ধি, সৎ জীবন, পবিত্রতা আর মুক্তি।

৩১ এই বাদে পবিত্র শাস্ত্রের কতা মত, “যায় গর্ব করে, উয়ায় পরমপ্রভুর বাদে গর্ব করুক।”

২ ভাই বইনিলা যেলা মুই পইলা তোমারটে গেইচোং সেলা ভগবানের দেওয়া ভাল খবর প্রচার করির সমায় মুই খুব সুন্দর কতাবার্তা বা জ্ঞানী মানষির নাকান কতা নাই কং।

২ মুই মনত থির করিচুং যে, তোমার সোদে থাকির সমায় মুই যীশু খ্রীষ্টক, বিশেষ করি উয়ার ক্রুশের উপরত মরণের কতা ছাড়া আর কিছুই না জানাইম।

৩ যেহেতু তোমারলারটে আছিলুং, সেহেতু মুই নিজেকে দুর্বল মনে করির ধরছিলুং আর ভয়ে কাঁপির ধরছিলুং।

৪ আর মোর শিক্ষা আর মোর প্রচার কোন মানষির মন জয় করির মতন জ্ঞানী কতা না আছিলেক। সেহেতু পবিত্র আত্মার শক্তিতে ভরা আছিলেক।

৫ যাতে করি তোমারলার বিশ্বাস মানষির জ্ঞানের উপর নির্ভর না করে, ভগবানের শক্তির উপর নির্ভর করে।

৬ কিন্তু তাহো উমরলা যায যায খ্রীষ্ট জীবনত পাকা, উমরলারটে জ্ঞানের কতা কই। তাও সেই জ্ঞান এই জগতের না হয়। সেইলা এই কালের শাসকের জ্ঞানের মত না হয়। এই শাসকের ঘরের তো ক্ষমতা শূন্য হয় পড়ির ধরচে।

৭ কিন্তু হামরা ভগবানের আসল জ্ঞানের উদ্দেশ্যের কতা কই। এই উদ্দেশ্য গোপন আছিলেক। আর এইলা দুনিয়া সিদ্ধানের আগতে ভগবান থির করি থুইচে, যাতে হামরা উয়ার মহিমার ভাগী হবার পাই।

৮ এই যুগের শাসকলার মইন্ধোত কাহো ঐ বিষয় বুঝির নাই পায়, যদি বুঝিলেক হয়, তাইলে মহিমাময় প্রভুক ক্রুশ খুটাত না টাঙাইলেক হয়।

৯ পবিত্র শাস্ত্রের কতা মত, “ভগবানক যায যায ভালবাসে উমরলার বাদে যেইলা ঠিক করি থুইচে, সেইলা কাহোয় চোখু দিয়া দেখে নাই, কান দিয়া শুনে নাই এমন কি ভাবেও নাই।”

১০ কিন্তু ভগবান উয়ার আত্মার মইদ্বো দিয়া খালি হামারটে প্রকাশ করিচে। কেনেনা পবিত্র আত্মার অজানা কিছুই নাই, এমন কি উয়ায় ভগবানের গুরুত্বপূর্ণ আসল বিষয়ও জানে।

১১ মানষিলার মইদ্বোত এমন কায় আছে, যে অইন্য মানষির মনের কতা জানির পায়? মানষির মনের মইদ্বোত যে আত্মা আছে, উয়ায় খালি উয়ার নিজের বিষয় জানির পায়। একে নাকান ভগবানের আত্মা ছাড়া ভগবানের মনের কতা অইন্য কাণ্ডো জানে না।

১২ হামরা দুনিয়ার আত্মা নাই পাই, কিন্তুক ভগবানেরটে থাকি উয়ার আত্মা পাইচি, যাতে ভগবান হামরালোক যে দানলা দিচে সেইলা বুঝির পাই।

১৩ আর হামরালা সেই দানলার কতায় কই। আর হামরা সেইলা কবার বাদে, যে কতা ব্যবহার করি, সেইলা মানষির দেওয়া জ্ঞান থাকি শিক্ষা পায় কই না। কিন্তুক পবিত্র আত্মার মইদ্বো দিয়া শিক্ষা পায় হামরা কই। আত্মিক কতা বুঝি দিবার হামরা আত্মিক কতায় কই।

১৪ যেই মানষি আত্মিক জীবন পায় নাই, উমরালা ভগবানের আত্মা থাকি যেইলা বিরিয়া আইসে সেইলা মানি নেয় না। উমারটে ঐলা মূর্খের বিষয়। ঐলা উয়ায় বুঝির পায় না, কেনেনা পবিত্র আত্মা শিক্ষা না দিলে, সেইলা পরীক্ষা করি দেখা যায় না।



১৫ যেই মানষিটা আত্মিক উয়ায় সউগ কিছুই পরীক্ষা করিয়া দেখে, কিন্তু কাণ্ডো উয়াক পরীক্ষা করিয়া দেখির পায় না।

১৬ পবিত্র শাস্ত্রত নেখা আছে, “কায় প্রভুর মন বুঝির পায়? যে উয়ায় উয়াক উপদেশ দিবার পায়?” কিন্তু হামরা বুঝির পাই কেনেনা খ্রীষ্টের মন হামার অন্তরত আছে।

৩ কিন্তু ভাই বইনিলা তোমরা কোন মতেই আত্মিক হন নাই, এই বাদে আত্মিক মানষিলারটে যেই নাকান করি কতা কওয়া উচিত, মুই সেই নাকান করি কতা কবার নাই পাং। বরং জগতের মানষিক যেই নাকান করি কতা কওয়া দরকার, সেই নাকান করি মোক তোমারলারটে কতা কওয়া খাইলেক। খ্রীষ্টীয় জীবনত তোমরা একে বারে কাচুয়া ছাওয়ার নাকান, এই বাদে জগতের মানষির নাকান কতা কইচুং।

২ মুই তোমারলাক শক্ত খাবার না দিয়া, দুধ খোয়াইচোং কেনেনা সেই সমায় তোমারলার শক্ত খাবার খাওয়ার নাকান না আছিলেন। আর এলাও তোমরালা নাই হন।

৩ তোমরা এলাও জগতের চিন্তা ভাবনা নিয়া আছেন। তোমারলার মইন্ধোত হিংসা-ঝগড়া নাগিয়ায় আছে। ইয়াতে জানা যায় যে, তোমরা আত্মিক মানষি না হন, তোমরালা জাগতিক।

৪ তোমারলার মইন্ধে কাণ্ডো যেলা কয় মুই পৌলের দলের, আর কাণ্ডো কয়, মুই আপল্লোর দলের, তাইলে তোমরালা চাল-চলন

একেবারে সাধারণ মানষির মতন ব্যবহার করির ধরচেন কি না?

৫ আপল্লো কায়? আর পৌলেই বা কায়? হামরা তো ভগবানের সেবাকারী মাত্র, যার মইন্ধো দিয়া তোমরালা বিশ্বাসের ঘাটাত আসিচেন। প্রভু হামারলাক এক এক জনক এক এক নাকানের কাম দিচে, হামরা খালি ঐলা করির ধরচি।

৬ মুই বিচন ফ্যেলালুং, আপল্লো জল দিলেক, আর ভগবান ঐলাক বড় করি তুলিলেক।

৭ যায় বিচন নাগায় উয়ায় কিছু না হয়, যায় জল দেয় উয়াও কিছু না হয়, কিন্তু পরম ভগবান যায় বড় করি তোলে উয়ায়ে সউগ।

৮ যায় বিচন ছিটায় আর যায় জল দেয় উমার দুই জনের উদ্দেশ্য এক। উমরা সগায় যেমন কর্ম করিবে, তেমনে ফল পাবে।

৯ কেনেনা হামরা দুইজনে ভগবানের নগত কাম করচি, তোমরালা ভগবানের ফসলের ভুই যার মালিক হইলেক ভগবান। তোমরা ভগবানের বানা দালান।

১০ ভগবান যে মোক ক্ষমতা দিচে, সেই অনুসারে পাকা রাজমিস্ত্রির মতন করি ভিটি গাখিচুং। আর উয়ার উপরত অইন্য মানষিলা দালান বানেবার ধরচে। কিন্তু কায় কি নাকান করি বানেবার ধরচে উয়ায় ঐ বিষয়ে সাবধান হউক।

১১ কেনেনা যে ভিটি গাথা হইচে, সেইটা ছাড়া অইন্য ভিটি কাণ্ডো গাথির পায় না, সেই ভিটি হইলেক যীশু খ্রীষ্ট।

১২ কিন্তু সেই ভিটির উপরাত সোনা, রূপা, দামী শিল দিয়া গাথনি হউক, বা খুটা, খেড়, নাড়া দিয়া গাথনি,

১৩ তাইলে কায় কি নাকানের কাম করির ধরচে তা ভাল করি দেখা যাবে। বিচারের দিনত সেইটা প্রকাশ পাবে, কার কাম কি নাকানের সেইটা অগুনে যাচাই করিবে। আর ঐ অগুন দিয়া সগারে কাম যাচাই করা হবে।

১৪ যায় যেইলা গাথিয়া তুলিচে, সেইলা যদি টিকিয়া থাকে, তাইলে উয়ায় পুরস্কার পাবে।

১৫ আর যদি কাণ্ডোরো কাম ছোবা যায় তাইলে উয়ার ক্ষতি হবে। কিন্তুক উয়ায় মুক্তি পাবে। উয়ার অবস্থা হবে অগুনের মইন্ধো দিয়া পার হয়। আইসা মানষির নাকান।

১৬ তোমরা কি জানেন না যে, তোমরা ভগবানের মন্দির, আর ভগবানের আত্মা তোমারলার অন্তরত বাস করে?

১৭ কাণ্ডো যদি ভগবানের মন্দির নষ্ট করে, তাইলে ভগবান উয়াক নষ্ট করিবে। কারন ভগবানের মন্দির পবিত্র, আর তোমরালায় সেই মন্দির।

১৮ তোমরা কাণ্ডো নিজক ফাকি দেন না। তোমারলার মইন্ধে কাণ্ডো যদি এই কালের চিন্তা ধারা অনুসারে নিজক জ্ঞানী মনে

করে, তাইলে উয়ায় জ্ঞানবান হবার বাদে মূর্খ হউক। যাতে উয়ায় সচাং করি জ্ঞানী হবার পারে।

১৯ কেনেনা ভগবানের চোখুত এই জগতের জ্ঞান খালি মূর্খতা। পবিত্র শাস্ত্রত নেখা আছে, “ভগবান জ্ঞানীলাক উমারলার ছলচাতুরিতে ধরে।”

২০ আর নেখা আছে, “জ্ঞানীলার সউগ চিন্তা যে নিস্বফল সেইলাও প্রভু জানে।”

২১ এই বাদে তোমরা কোন মানষিক নিয়া গর্ব করেন না, কেনেনা সউগে তোমারলার।

২২ পৌল, আপল্লো, পিতর, এমন কি এই দুনিয়া, জীবন, মরণ, বর্তমান আর ভবিষ্যত, এইলা সউগ কিছুই তোমারলার।

২৩ আর তোমরালা খ্রীষ্টের আর খ্রীষ্ট পরমপ্রভুর।

৪ মুই পৌল আর আপল্লো হামার এইটায় পরিচয়, হামরা খ্রীষ্টের সেবাকারী আর হামারলাক ভগবানের গোপন সত্য জানেবার ভার দেওয়া হইচে।

২ যার যার উপরাত যে কোন ভার দেওয়া হইচে, উমারলাক কাজে কর্মে দেখের নাগিবে যে, উমরালা বিশ্বস্ত।

৩ তোমরালা মোর বিচার কর বা আদালতে করুক, তাতে কি আইসে যায়। এমন কি, মুইও মোর নিজের বিচার না করং।

৪ যদিও মোর অন্তর পরিস্কার, ইয়াতে এইটা প্রমাণ হয় না যে, মুই নির্দোষ। প্রভুই মোর বিচার করিবে।

৫ এই বাদে তোমরা সঠিক সমায়ের আগত মানে প্রভু আইসার আগত, কোনো কিছুর বিচার না করেন। কেনেনা ঐ সমায় আন্ধারত যেইলা নুকি থোয়া আছে, প্রভুই সেইলা আলোত আনিবে। মানষির মনের গোপন উদ্দেশ্যলাও প্রকাশ করিবে। সেই সমায় ভগবানেরটে থাকি যার যা পাওনা প্রশংসা তায় তা পাবে।

৬ ভাই বইনিলা তোমারলার উপকারের বাদে মুই মোর নিজের আর আপল্লোর উপমা দিয়া এইলা কতা কলুং, তোমরালা যাতে হামারটে থাকি শিখির পান যে, পবিত্র শাস্ত্রত যেইলা নেখা আছে, সেইলার বায়রাত না যান। এই বাদে তোমরা এক জনক ফ্যেলেয়া আর জনক নিয়া অহংকার করেন না।

৭ অইন্যের চায়া যে তুই নিজক বড় মনে করিস এইটা কি তোর উচিত? তোর এমন কি আছে যে, তুই ভগবানেরটে থাকি দান হিসাবে পাইস নাই? আর যদি সেইলা পাইচিস, তাইলে এমনি পাং নাই কয়া, কেনে অহংকার করির ধরচিস?

৮ তোমারলাক দেখিয়া মনে হবার ধরচে যে, তোমরা আগতেই দরকারি সউগে পাইচেন, আগতে ধনী হইচেন, আর হামারলাক বাদ দিয়া রাজার নাকান হয়। বসি আছেন! তোমরা আসল রাজা হইলে ভালে হইলেক হয়, তাইলে হামরাও তোমারলার সাথত রাজার অংশিদার হবার পাইলং হয়!

৯ কিন্তুক আসল কতা হইলেক, মারি ফ্যেলা হবে বুলিয়া বন্দীলাক মিছিলের একে বারে পাছত থোয়া হয়, মোর মনে হয় ভগবান হামাক মানে যীশুর খবরিয়ালাক ঠিক তেমনি সগারে পাছপাকে থুইচে। হামরা ত্রিভুবন, মানে স্বর্গদূত আর মানষিলারটেও ঠাটার পাত্র হইচি।

১০ হামরা খ্রীষ্টের বাদে মূর্খ হইচি, আর তোমরালা মনে হয় খ্রীষ্টতে বুদ্ধিমান হইচেন! হামরা কাহিল কিন্তু তোমরা বলবান! তোমরা সন্মান পাইচেন আর হামরা অসন্মান হইচি!

১১ এলাও হামরা পেটের ভোগ আর টিস্সায় কষ্ট পাবার ধরচি, হামরালার কাপড়ের অভাব আছে, হামারলাক মারপিট করা হবার ধরচে, হামারলার বাড়ি-ঘর নাই।

১২ হামরা বাঁচির বাদে নিজের হাতে কঠুর খাটনি করচি। যেলা মানষিলা হামাক গালি পাড়ে, সেলা হামরা উমারলার মঙ্গল কামনা করি, যেলা উমরা হামারলাক তান্না দেয়, সেলা হামরা সহ্য করি।

১৩ যেলা উমরা হামারলার গেলানি করে, সেলা হামরা নত-নম্র হয়। উমারলার উত্তর দেই। এলা পর্যন্ত হামরা এই দুনিয়াত জাবুরার নাকান জঞ্জাল হয়। আছি।

১৪ মুই তোমারলাক নইজ্জা-শরম দিবার বাদে এইলা নেখির ধরং নাই, বরং মোর মনের আপনজন মনে করি, তোমারলাক চেতনা দিবার বাদে এইলা নেখির ধরচুং।

১৫ কেনেনা খ্রীষ্টের বিষয়ে শিক্ষা দিবার মতন মানষি তোমারলার হাজার হাজার থাকির পায়, কিন্তু তোমারলার বাপ মেয়ে নাই। মুইয়ে যীশু খ্রীষ্টের ভাল খবর প্রচারের মইদ্রো দিয়া তোমারলার আত্মিক বাপ হচুং।

১৬ এই বাদে মুই তোমারলাক মিনতি করি কবার ধরচুং, মুই যেইলা করং তোমরাও সেইলা কর।

১৭ আর এই বাদে মুই ভাই তীমথিয়ক তোমারলারটে পেঠাচুং। প্রভুর শিষ্য হিসাবে উয়ায় মোর আদরের বিশ্বস্ত ছাওয়া। যীশু খ্রীষ্টত মুই কি নাকান করি চলির ধরচুং উয়ায় তোমারলাক ফম করি দিবো। সউগ জাগার সউগ সমিতিত মুই একে নাকান শিক্ষা দিয়া থাকং।

১৮ মুই আসিম না মনে করিয়া তোমারলার মইদ্রো কাণ্ডো কাণ্ডো অহংকার করি বেড়ের ধরচে।

১৯ কিন্তু প্রভুর ইচ্ছা হইলে মুই পচ-পচে তোমারলারটে ফিরি আসিম। যায় যায় অহংকারে ফুলি উঠিচে উমার কতা শুনির বাদে আসিম না, উমার ক্ষমতা কি সেইটায় জানির আসিম।

২০ ভগবানের শাসন ব্যবস্থা খালি কতার ব্যাপার না হয়! এইটা হইলেক ক্ষমতার ব্যাপার।

২১ তোমরা কি চান? শাস্তি দিবার বাদে মুই নাটি নিয়া আসিম, না পিরিত আর শান্তির মনোভাব নিয়া আসিম?

৫ একটা কতা শোনা যাবার ধরচে যে, তোমারলার মইন্ধোত ব্যভিচার আছে, এমন জঘন্য ব্যভিচার যেইলা পরজাতিলার মইন্ধোতও দেখা যায় না। এমন কি তোমারলার এক জন উয়ার সৎ মাক নিজের বউ এর নাকান করি ধরি আছে।

২ তাণ্ডো তোমরা গর্ব করির ধরচেন! বরং তোমরালা পস্তেবার দরকার, এই নাকানের কাম যেই মানষিটা করিচে, উয়াক তোমারলার মইন্ধো থাকি নিকিলি দেওয়া উচিত ছিল কি না?

৩ মোর দেহা নিয়া তোমারলার ওটে থাকির না পাইলেও, আত্মাতে তোমারলার সোদে আছং। যায় এই নাকান পাপ কাম করিচে, মুই তোমারলার বগলত হাজির হওয়ার মত উয়ার বিচার করিচুং।

৪ হামারলার প্রভু যীশুর নামে যেলা তোমরা কোন জাগাত একটে হবেন, মুইও আত্মাত তোমারলার সোদে থাকিম। আর প্রভু যীশুর ক্ষমতা তোমারলার উপরত থাকিবে।

৫ সেলা ঐ মানষিটাক সমিতি থাকিয়া নিকিলি দিয়া শাস্তির বাদে শয়তানের হাতত দিবার নাগিবে। যাতে উয়ার পাপ স্বভাব ধ্বংস হয় আর অবশেষে প্রভু যীশু আইসার দিন আত্মাটা মুক্তি পায়।

৬ অহংকার করা তোমারলার শোভা পায় না। তোমরা তো এই কতা জানেন, “অল্প খানিক সোডা ময়দার গোটায় দালাটাক ফাপেয়া তোলে?”



৭ তোমারলার মইন্ধো থাকি পুরান সোডা নিকিলি ফ্যেলেয়া দেও। যেনে তোমরা নয়া খাটি ময়দার দালা হবার পান। খ্রীষ্টান হিসাবে তোমরালা তো সোডা ছাড়া রুটির নাকান। কেনেনা হামারলার মুক্তি ভোজের পার্বনের ভেড়ার বাচ্চা হিসাবে বাছাই করা রাজাটাক বলি দিবার বাদে সঁপে দেওয়া হইচে।

৮ এই বাদে আইসো হামরা মুক্তি ভোজের পার্বন ঐ রুটি দিয়া পালন করি, যার মইন্ধোত সেই পুরান সোডা নাই। এই পুরান সোডা হইলেক পাপ আর হিংসা; কিন্তুক আইসো হামরা সোডা ছাড়া রুটি খাই আর সাদা-সিদা মন আর সত্য দিয়া মুক্তি ভোজটা পালন করি।

৯ মুই মোর আগের চিঠিত নেখিচিলুং, যাতে তোমরালা বেয়া চরিত্রের মানষিলা সোদে মেলা-মেশা না করেন।

১০ কিন্তুক এই দুনিয়ার বেয়া চরিত্রের মানষিলা লোভী, ঠগবাজী, যায় প্রতিমা পূজা করে, উমার কতা অবশ্য মুই কং নাই, কেনেনা তাইলে তো তোমারলাক একেবারে এই দুনিয়ার বায়রাত যাবার নাগিবে।

১১ আসলে মুই যা নেখিচুং তার মানে হইলেক এই, যে কাণ্ডো নিজক যীশুর শিষ্য কয়া পরিচয় দেয়, অথচ উয়ায় বেয়া চরিত্রের মানষি, লোভী, ঠগবাজ আর প্রতিমা পূজাকারী, নিন্দুক, মাতাল, এই নাকান নাম ধারি শিষ্যর সোদে মেলা-মেশা না করেন। এমন কি উমার নগত খাওয়া-দাওয়াও না করেন।

১২ খ্রীষ্টিয় সমিতির বায়রার মানষিলার বিচার করিবার মোর কি দায় পড়িচে? কিন্তু খ্রীষ্টিয় সমিতির ভিত্তির মানষিলার বিচার করার দায় তো তোমারলার অবশ্যই আছে।

১৩ বায়রার মানষিলার বিচার ভগবানে করিবে। পবিত্র শাস্ত্রের কতা মত, “তোমারলার মইন্ধো থাকি সেই বেয়া মানষিলাক নিকলি দেও।”

৬ তোমারলার মইন্ধে কাণ্ডো যদি কোন গুরু ভাইয়ের বিরুদ্ধে কোন দোষ থাকে, তাইলে কোন সাহসে ভগবানের পবিত্র মানষিলারটে না যায়া আদালত, মানে অধার্মিক মানষিলারটে যায়া বিচার চান?

২ তোমরা কি জানেন না যে, ভগবানের মানষিলা এই দুনিয়ার বিচার করিবে? যদি দুনিয়ার বিচার তোমরালা করেন, তাইলে কেনে এই ছোট ছোট ঘটনালার বিচার করির পান না?

৩ তোমরা কি জানেন না যে, স্বর্গদূতলারও বিচার হামরায় করিমু? আর এইটায় যদি হয় তাইলে দুনিয়ার বিষয় তো ছোট ঘটনা।

৪ যদি তোমারলার কোন নালিশ থাকে, তাইলে যায়া খ্রীষ্ট সমিতির মানষি না হয়, তোমরা এই নাকান মানষিক বিচার করির দায়িত্ব কেনে দেন?

৫ তোমারলাক নইজ্জা দিবার বাদে মুই এই কতা কবার ধরচুং।  
তোমারলার মইন্ধোত সচাংয়ে কি এই নাকান জ্ঞানী মানষি নাই যে  
গুরুভাইলার গন্ডগোল মিমাংসা করি দিবার পায়?

৬ নিজের মইন্ধোত মিমাংসা না করিয়া ভাই ভাইয়ের বিরুদ্ধে  
কাচারি যায়, আর গুরু ভাই না হয় এমন মানষিলারটে!

৭ তোমরা একে অইন্যের বিরুদ্ধে মামলা করির ধরচেন, ইয়াতে  
প্রমাণ হবার ধরচে যে তোমরা হারি গেইচেন। তার চায়া ভাল  
তোমরা ঝিত করি রন, তোমারলার বিরুদ্ধে অন্যায় করির দেন।

৮ কিন্তু তোমরালা নিজে অন্যায় করির ধরচেন, তোমরালা  
ঠকের ধরচেন। এমন কি তোমার গুরু ভাইলাকও!

৯ তোমরা কি জানেন না, যায় যায় অন্যায় করে উমারলার  
ভগবানের শাসন ব্যবস্থাত জাগা নাই? তোমরা দোমনা না হয়  
নিশ্চিত হও, যার যার চরিত্র বেয়া, যায় যায় প্রতিমা পূজা করে,  
ব্যভিচার করে, মাগা-মাগি, সমকামী,

১০ চোর, লোভী, মাতাল, অইন্যের গেলানি করে, ঠকবাজী,  
উমারলার ভগবানের শাসন ব্যবস্থাত থাকির অধিকার নাই।

১১ আর তোমারলার মইন্ধোত তো কাণ্ডো কাণ্ডো এই নাকানের  
মানষি আছিলেন। কিন্তু প্রভু যীশু খ্রীষ্টের নাম নিয়া ভগবানের  
আত্মার মইন্ধো দিয়া তোমাক ধুইয়া পরিস্কার করা হইচে।  
ভগবানের কামের বাদে তোমারলাক যুদা করা হইচে, আর নির্দোষ  
কয়া মানি নেওয়া হইচে।

১২ কাণ্ডো কাণ্ডো কয়, “সউগ কিছু করির অধিকার মোর আছে।” কিন্তু মুই কং, সউগ যে মানষির উপকার করে এমন না হয়। যদিও সউগে করিবার অধিকার মোর আছে, তাণ্ডো কোন কিছুর মুই চাকর না হং।

১৩ আর কাণ্ডো কাণ্ডো কয়, “খাবার পেটের বাদে, পেট খাবারের বাদে।” সেটা ভাল কতা, কিন্তু ভগবান দুইটায় এক দিন বাতিল করিবে। দেহা ব্যভিচার করির বাদে না হয়, এইটা ভগবানের বাদে, আর ভগবান দেহার বাদে।

১৪ ভগবান উয়ার শক্তি দিয়া প্রভুক মরণ থাকি বত্তে তুলিচে, উয়ায় হামারলাকও বত্তে তুলিবে।

১৫ তোমরা কি জানেন না, তোমারলার দেহা খ্রীষ্টের দেহার অঙ্গ? তাইলে মুই কি খ্রীষ্টের দেহার অঙ্গ নিয়া বেশ্যার দেহার নগত যুক্ত করিম? কোন দিনও না, এইটা হবার না পায়।

১৬ তোমরা কি জানেন না, যায় বেশ্যার নগত যুক্ত হয়, উয়ায় উয়ার নগত এক দেহা হয়। কেনেনা শাস্ত্রত নেখা আছে, “উমরা দুইজনে এক দেহা হবে।”

১৭ কিন্তু যে কাণ্ডো প্রভুর নগত যুক্ত হয় উয়ায় আত্মাতেও উয়ার নগত এক হয়।

১৮ এই বাদে সউগ নাকানের ব্যভিচার থাকি দূরত পালাও। মানষি যেইলা অইন্য নাকানের পাপ করে দেহার বায়রাত করে, কিন্তু যায় ব্যভিচার করে উয়ায় নিজের দেহার বিরুদ্ধে করে।

১৯ তোমরা কি জানেন না, তোমারলার দেহা পবিত্র আত্মার মন্দির, তোমারলার অন্তরত যায় বসবাস করে যাক ভগবানেরটে থাকি পাইচেন, সেই পবিত্র আত্মার থাকিবার ঘর হইলেক তোমারলার দেহা? তোমরা তোমারলার নিজের না হন,

২০ তোমারলাক মেয়ো দাম দিয়া কেনা হইচে। এই দান হইলেক প্রভু যীশুর ক্রুশের মরণ, এই বাদে তোমারলার দেহাক ভগবানের গুণকিত্তন করির বাদে ব্যবহার কর।

৭ তোমরা মোক যে সমন্ধে নেখিচেন, সেই সমন্ধে মুই এলা উত্তর দিম। তোমারলার কতা ঠিক, বিয়াও না করা ভাল।

২ কিন্তুক মুই কং, চাইরো পাকে মেয়ো ব্যভিচার হবার ধরচে, এই বাদে সউগ বেটাছাওয়ার ভার্জা থাকুক আর সউগ বেটিছাওয়ার সোয়ামি থাকুক।

৩ দেহার দিক থাকি ভার্জার যেইলা পাওনা, সোয়ামি সেইলা পূরণ করুক, একে নাকান ভার্জাও সোয়ামির পূরণ করুক।

৪ ভার্জার দেহা তো উয়ার নিজের না হয়, উয়ার সোয়ামির। একে নাকান সোয়ামির দেহা উয়ার নিজের না হয়, উয়ার ভার্জার।

৫ সোয়ামি-ভার্জা, তোমরা একে অপরের সোদে মিলন হবার আপত্তি না করেন, খালি প্রার্থনা করির বাদে দুইজনে পরামর্শ করিয়া অল্প সমায়ের বাদে যুদা থাকির পান। তার পরে আরো

একটে হন, যাতে তোমরা নিজক দমনের অভাবে শয়তান তোমারলাক পাপত ফ্যেলের না পায়।

৬ এইলা কতা মুই তোমারলাক আদেশ দিয়া না কং, তোমারলাক অনুমতি দিবার ধরচুং।

৭ মোর ইচ্ছা সগায় যাতে মোর নাকান ঢেনা হয়, কিন্তু সগাকে ভগবান দান হিসাবে এক একটা ক্ষমতা দিচে। একজনের ক্ষমতা এক নাকানের, অইন্য জনের ক্ষমতা আরেক নাকানের। কাঙোরো বিয়াও করার ক্ষমতা আর কাঙোরো বিয়াও না করা ক্ষমতা আছে।

৮ যায় বিয়াও করে নাই, আর যায় বিধুয়া, উমারলাক কবার ধরচুং, উমরা যদি মোর নাকান ঢেনা থাকির পারে তাইলে উমার বাদে এইটা ভাল।

৯ কিন্তু উমরা যদি নিজক দমনে খুবার না পারে তাইলে বিয়াও করুক। কেনেনা দেহার কামনাত জ্বলি পুরি মরির চায়া বিয়াও করা অনেক ভাল।

১০ যার বিয়াও হইচে উমারলাক মুই এই আদেশ দিবার ধরচুং। মুই দিবার ধরচুং যে, সেটা না হয়, ভগবানে দিবার ধরচে। ভগবান যে ভার্জা দিচে উয়ায় যাতে সোয়ামীরটে থাকি চলিয়া না যায়।

১১ কিন্তু যদি চলি যায়, তাইলে আর বিয়াও না করুক, তা না হইলে যদি পারে নিজের সোয়ামির সোদে আর মিল হউক। একে নাকান, সোয়ামির উচিত ভার্জাক ছাড়িয়া না দেউক।

১২ এলা মুই অইন্য সউগ মানষিলাক কবার ধরচুং, মুই কবার ধরচুং প্রভু না কয়, যদি কোন গুরু ভাইয়ের ভার্জা যীশুর শিষ্য নাই হয়, আর উয়ায় সোয়ামির সোদে থাকির রাজি থাকে তাইলে সোয়ামীটা উয়াক ছাড়িয়া না দেউক।

১৩ আর যদি কোন গুরু বইনির সোয়ামি যীশুর শিষ্য নাই হয়, একে নাকান করি সোয়ামি উয়ার সোদে থাকির রাজি থাকে, তাইলে উয়ায় সোয়ামিক ছাড়িয়া না দেউক।

১৪ কেনেনা যীশুর শিষ্য হওয়া ভার্জার মইন্ধো দিয়া যীশুর শিষ্য না হওয়া সোয়ামি, আর যীশুর শিষ্য হওয়া সোয়ামির মইন্ধো দিয়া সেই যীশুর শিষ্য না হওয়া ভার্জা পবিত্র হইচে। এই নাকান না হইলে তোমারলার ছাওয়া-ছোটলা ছুয়া হইলেক না হয়। কিন্তু আসলে উমরা শুদ্ধি।

১৫ কিন্তু সেই যীশুর শিষ্য না হওয়া সোয়ামি বা ভার্জা যদি ছাড়িয়া চলি যাবার চায়, তাইলে উয়ায় চলি যাউক। এই নাকান অবস্থাত শিষ্য ভাই বা বইনি ধরাবান্দার মইন্ধে রইলেক না। ভগবান তো তোমারলাক শান্তিতে জীবন যাপন করিবার বাদে ডেকাইচে।

১৬ আর ভার্জা তুই কি করি জানিস, তোর সোয়ামিক তুই মুক্তির ঘাটাত আনির পাবু কি না? আর সোয়ামি তুই কি করি জানিস, তোর ভার্জাক তুই মুক্তির ঘাটাত আনির পাবু কি না?

১৭ প্রভু যাক যেই নাকান খুইচে আর ভগবান যাক যেই বাদে ডেকাইচে, উয়ায় ঐ নাকান জীবন যাপন করুক। এই আদেশ মুই সউগ খ্রীষ্ট সমিতিক দিবার ধরচুং।

১৮ কোন ভগবানের চিন দেওয়া মানষিক কি ডেকা হইচে? তাইলে উয়ার চিন মুছিয়া না ফেলাউক। কোন ভগবানের চিন না দেওয়া মানষিক কি ডেকা হইচে? তাইলে উয়াক ভগবানের চিন দেওয়া না হউক।

১৯ দেহাত চিন দিলেই বা কি, না দিলেই বা কি, ভগবানের আদেশ মানায় হইলেক আসল কতা।

২০ ভগবান যাক যে অবস্থাত ডেকাইচে, উয়ায় ঐ অবস্থাতে থাকুক।

২১ যেলা তোক ডেকা হইচে সেলা কি তুই চাকর আছিলু? এই বাদে চিন্তা না করিস। তাণ্ডো যদি স্বাধীন হবার সুযোগ পাইস, তাইলে সুযোগ হারাইস না।

২২ চাকর অবস্থায় ভগবান যাক ডেকাইচে, উয়ায় প্রভুর স্বাধীন মানষি হইচে। একে নাকান স্বাধীন অবস্থাত ভগবান যাক ডেকাইচে উয়ায় যীশু খ্রীষ্টের চাকর।

২৩ তোমারলাক মেলা দাম দিয়া কেনা হইচে, মানষির চাকর না হন।

২৪ ও ভাই-বইনির ঘর, মুই আর কং ভগবান যাক যেই অবস্থাত ডেকাইচে, উয়ায় ঐ অবস্থাত থাকুক।



২৫ কুমারী কইনা ছাওয়ালার বাদে ভগবানেরটে থাকি মুই কোন আদেশ পাং নাই। তাণ্ডো ভগবানের দয়া পায়া মোর শিক্ষা বিশ্বস্ত এই বাদে মোর মতামত জানালুং।

২৬ যে দারুন দুঃখ-কষ্টের সমায় আসির ধরচে, এই বাদে মোর মনে হয় তোমরা যায় যেই নাকান আছেন ঐ নাকানে থাকা ভাল।

২৭ তোর কি ভার্জা আছে? তাইলে ভার্জাক ছাড়ি দিবার চেষ্টা না করিস। যদি বিয়াও করিস নাই, তাইলে বিয়াও করির চেষ্টা করিস না।

২৮ কিন্তু বিয়াও যদি তুই করিস তোর কোন পাপ হবে না। কোন কইনা ছাওয়া যদি বিয়াও করে তাইলে উয়ারও কোন পাপ হয় না। কিন্তু যায় যায় বিয়াও করে, উয়ায় এই সংসারে কষ্ট পাবে। এই কষ্ট এরেবার বাদে মুই তোমারলাক সাহায্য করির চাং।

২৯ ভাই-বইনির ঘর মুই তোমারলাক কবার ধরচুং, সমায় বেশী নাই। যার যার ভার্জা আছে ভগবানের কামের বাদে উমরা এলা থাকি এমন করি চলুক, যেন উমারলার ভার্জা নাই।

৩০ যায় যায় দুঃখ করির ধরচে, যেন উমারলার দুঃখ নাই। যায় যায় আনন্দ করির ধরচে, যেন উমার আনন্দ নাই। যায় যায় কিনা কাটা করির ধরচে, উমরা এমন করি ভাবুক, যে উয়ার নিজের বাদে না হয়।

৩১ যায় যায় সংসারের বিষয় বস্তু ভোগ করির ধরচে, উমরা যাতে পুরাপুরি জড়িয়া না যায়, কেনেনা সংসারের রূপ বদলি

যাবার ধরচে।

৩২ মুই চাং যে, তোমরা যাতে ভাবনা-চিন্তা থাকি মুক্ত থাকির পারেন। যায় বিয়াও করে নাই, উয়ায় প্রভুর বিষয় বেশী চিন্তা করে, কেংকরি উয়ায় প্রভুক সন্তুষ্ট করিবে।

৩৩ কিন্তু বিয়াও করা মানষি সংসারের বিষয় চিন্তা করে, উয়ায় চিন্তা করে যে, কেংকরিয়া ভার্জাক সন্তুষ্ট করা যাবে।

৩৪ উয়ায় দোমনা, প্রভুকও সন্তুষ্ট করির চায়, আর ভার্জাকো সন্তুষ্ট করির চায়। বিয়াও না করা কুমারী চেংড়ি প্রভুর বিষয় চিন্তা করে যাতে উয়ায় দেহা মনে পবিত্র থাকে। কিন্তু বিয়াও ওলা বেটিছাওয়া সংসারের বিষয় চিন্তা করে, উয়ায় তো সংসারের বিষয় বেশী চিন্তা করে, আর উয়ার চিন্তা হইলেক কেমন করি উয়ার সোয়ামিক সন্তুষ্ট করিবে।

৩৫ মুই তোমারলার ভালের বাদে এই কতা কবার ধরচুং, কোন নিয়ম-কানুন চাপে দিবার বাদে না হয়। যাতে তোমরা সঠিক ঘাটাত চলির পান, আর নানা নাকান বিষয়োত জড়িয়া না পড়েন। যাতে মনে পরানে প্রভুর সেবা করির পান।

৩৬ যদি কাণ্ডো মনে করে উয়ার কুমারী বেটির প্রতি দায় দায়িত্ব পালন করির ধরচে না, যদিও বেটিটার বিয়াওয়ের বয়স ভাটি যাবার ধরচে। আর উয়ায় যদি বেটিটাক বিয়াও দিবার দরকার মনে করে, তাইলে উয়ায় নিজের ইচ্ছা মতন কাম করুক। বেটিটার বিয়াও হউক, তাতে কোন পাপ না হয়।

৩৭ কিন্তু যেই বাপের মন খির আছে, বেটিক বিয়াও দিবার দরকার নাই, উয়াক কুমারী খুবে, সেই বাপটা ভালে করে।

৩৮ তাইলে দেখা যায় যে, যায় বেটিক বিয়াও দেয় উয়াও ভাল করে, আর যায় বিয়াও না দেয় উয়ায় আর বেশী ভাল করে।

৩৯ সোয়ামি যত দিন বত্তি থাকে ততদিন ভার্জা বিয়াও এর বন্ধনত বান্দা থাকে। কিন্তু যদি সোয়ামি মরি যায় তাইলে উয়ায় যাকে খুশি আর বিয়াও করির পায়। কিন্তু যাতে মানষিটা যীশুর শিষ্য হয়।

৪০ তাণ্ডো মোর মতে যদি আর বিয়াও না করে, তাইলে আর সুখী হবে। আর মোর মনে হয় মুই এই কতালা ভগবানের আত্মার মইন্ধো দিয়া কবার ধরচুং।

৮ এইবার মুই প্রতিমাক সঁপে দেওয়া খাবারের বিষয় কবার ধরচুং। হামরা জানি, হামারলার সগারে জ্ঞান আছে। এইটা ঠিক কতা, কিন্তু জ্ঞান মানষিক অহংকারী করি তোলে, পিরিত মানষিক গড়ে তোলে।

২ যদি কাণ্ডো মনে করে যে, উয়ায় খানিক জানে, তাইলে উয়ায় মনে করুক উয়ার যেই নাকান জ্ঞান থাকা দরকার, সেই নাকান জ্ঞান উয়ার এলাও নাই।

৩ কিন্তু কাণ্ডো যদি ভগবানক পিরিত করে, তাইলে প্রভু উয়াক চেনে।

৪ এইবার প্রতিমারটে সঁপে দেওয়া খাবার খাওয়ার বিষয় কবার ধরচুং, হামরা জানি, এই দুনিয়াত প্রতিমা আসলে কোন কিছুই না হয়, আর ভগবানও মাত্র এক জন।

৫ স্বর্গত হউক আর দুনিয়াতে হউক, দেব-দেবী বুলি যদি কোন কিছু থাকে, অবশ্যে দেবতাও ম্যেলা, প্রভুও ম্যেলা।

৬ তাণ্ডো হামারলার বাদে পরম প্রভু এক জনেই আছে। উয়ায় স্বর্গের বাপ; উয়ারটে থাকি সউগ কিছু সিজ্জন হইচে, উয়ারে বাদে হামরালা বত্তি আছি। আর প্রভু হামার এক জন, উয়ায় যীশু খ্রীষ্ট। উয়ার মইন্ধো দিয়া সউগ কিছু আসিচে আর উয়ারে মইন্ধো দিয়া হামরালা বত্তি আছি।

৭ কিন্তু সগারে এইলা জ্ঞান নাই। যীশুর শিষ্য হওয়ার আগত প্রতিমা পূজার অভ্যাস আছিলেক বুলিয়া প্রতিমারটে দেওয়া প্রসাদ যদি খায়, তাতে উমারলার বিবেক দুর্বল হওয়াতে উমরা অশুদ্ধি মনে করে।

৮ কিন্তু আসলে কোন খাওয়ার জিনিস হামারলাক ভগবানেরটে নিয়া যায় না। ঐলা যদি হামরালা না খাই তাইলে কোন ক্ষতিও না হয় আর খাইলে লাভও না হয়।

৯ কিন্তু সাবধান! যায় যায় বিশ্বাসে দুর্বল, তোমারলার এই স্বাধীনতা যাতে দুর্বল মনের মানষিলার পাপের কারন না হয়।

১০ তোর তো জ্ঞান আছে, কিন্তু যার বিবেক দুর্বল উয়ায় যদি তোক দেবতার মন্দিরত বসিয়া খাওয়া দেখে, তাইলে কি উয়ায়

প্রতিমারটে সঁপে দেওয়া বলির মসং খাবার বাদে সাহস করিবে না? যদিও উয়ায় বিশ্বাস করে যে, এইটা ঠিক না হয়।

১১ তোর এই নাকান জ্ঞানের বাদে, তোর দুর্বল বিবেকের ভাই, যার বাদে যীশু মরিচে, উয়ায় ধ্বংস হয়।

১২ এই নাকান করি তোমরা তোমারলার শিষ্য ভাইলার বিরুদ্ধে পাপ করিলেন আর উয়ার দুর্বল বিবেকক দুঃখ দিয়া তোমরা যীশুরো বিরুদ্ধে পাপ করিলেন।

১৩ এই বাদে কোন খাবারের আর যদি মোর ভাই পাপত পরে তাইলে সেই খাওয়ার মুই কোনো দিনও খাইম না। মোর ভাই যাতে পাপত না পড়ে, তার আর এমন কি মুই মসংও খাওয়া ছাড়ি দিম।

১৪ ভাই বইনিলা মুই কি এক জন স্বাধীন মানষি না হং? মুই কি এক জন খবরিয়া না হং? হামারলার প্রভু যীশুক কি মুই দেখং নাই? প্রভুর বাদে মুই যেইলা কাম করিচুং, তোমরা কি তার ফল না হন?

১৫ অইন্য মানষিলা যদি মোক খবরিয়া কয়া মানি না নেয়, কিন্তু তাএগো তোমরা মানি নিবেন। তোমরা যে ভগবানের মানষি হইচেন, এইটায় মোর খবরিয়া পদের প্রমাণ।

১৬ যায় যায় মোর দোষ-গুণ বিচার করে, উমরা মোর কতা শুনুক।

৪ বার্নবার আর মোর কি খাওয়া-দাওয়া করির অধিকার নাই?

৫ অইন্য সউগ খবরিয়ালা, প্রভু যীশুর আপন ভাইলা আর পিতর যেই নাকান করি নিজের ভার্জাক নিয়া প্রচারত বাইর হয়, সেই নাকান করি খ্রীষ্ট বিশ্বাসী নিজের ভার্জাক নিয়া প্রচারত বাইর হবার অধিকার কি হামারলারও নাই?

৬ বার্নবাক আর মোকেই খালি কি নিজের হাতে কাম করি খাবার নাগিবে?

৭ কোন সৈন্য কি নিজের পাইসা খরচ করিয়া সৈন্য দলত থাকে? আংগুর গছ যায় গাড়ে তায় কি তার ফল না খায়? যায় পশুর পাল চড়ায় তায় কি তার দুধ না খায়?

৮ মুই কি এইলা কতা সাধারন মানষির বিচার বুদ্ধির উপর নির্ভর করি কবার ধরচুং? শ্রী মোশির আইন-কানুনত কি একই কতা কয় নাই?

৯ ওটে কোনা নেখা আছে, “ফসল মাড়া দিবার সমায় গরুর মুখত গোমা না দেন।” ভগবান কি খালি হালুয়া গরুর কতা চিন্তা করে?

১০ আসলে উয়ায় হামারলারও কতা চিন্তা করিয়া এই কতালা কইচে, হয় কি না? কেনেনা যায় চাষ করে আর ফসল মাড়ে, ফসল পাবার আশা নিয়া উমারলার এইলা করা দরকার।

১১ যেহেতু হামরা তোমারলার মইন্ধোত আত্মিক বিচন গাড়চি, এই বাদে তোমারলারটে থাকি যদি জাগতিক খাওয়া-পড়া

জোগার করির পাই, তাইলে কি সেইটা খুব বেশী কিছু?

১২ এই ব্যাপারে যদি তোমারলারটে অইন্য মানষিলার দাবি থাকে, তাইলে হামারলার কি আরো বেশী থাকিবে না? হামরা কিন্তুক সেই দাবি করি নাই বরং সউগে সহ্য করচি। যাতে যীশুর বিষয়ে ভাল খবর প্রচারের কামত হামরা কোন বাধা না হই।

১৩ তোমরা কি জানেন না, যায় যায় মন্দিরত কাম করে, উমরা মন্দির থাকি খাবার পায়। আর যায় যায় বেদীত কামাই করে উমরা বেদীত যেইলা সঁপে দেওয়া হয় ঐলার ভাগ পায়?

১৪ একে নাকান করি ভগবানের ভাল খবর প্রচারকলার বাদে প্রভু বিধান দিচে, যাতে ভাল খবর প্রচারের মইন্ধো দিয়া উমরালা জীবন যাপন করির পারে।

১৫ কিন্তু এলা পর্যন্ত মুই কোন কিছু ভোগ করং নাই। তোমরালা যাতে মোর বাদে এই নাকান ব্যবস্থা করেন, এই বাদে মুই এই কতালা নেখং নাই। এই বিষয়ে কাণ্ডো মোর গর্ব করা যদি মিথ্যা বানায় তাইলে ইয়ার চায়া মোর মরণ ভাল।

১৬ আর যাই হউক মুই ভাল খবর প্রচার করং, এই বাদে মোর গর্ব করিবার মত কিছু নাই। কেনেনা মোক এইলা করিবার নাগিবেই। আর যদি মুই সেই ভাল খবর প্রচার না করং, তাইলে মোর এইটা দুর্ভাগ্য।

১৭ যদি মুই নিজের ইচ্ছায় প্রচার করিলুং হয়, তাইলে মুই পুরস্কার পাবার যোগ্য হলুং হয়। যেহেতু মুই নিজের ইচ্ছায় করং

নাই, মোর উপরত দায়িত্ব হিসাবে এই ভার দেওয়া হইচে, এই বাদে মুই এইলা করং।

১৮ তাইলে মুই কি পুরস্কার পাইম? পুরস্কারটা হইলেক এই নাকান, যেলা মুই ভাল খবর প্রচার করং, সেলা বিনা পাইসায় করং। এই নাকান করি ভাল খবর প্রচার করির সমায়, মোর বেতন পাবার যে অধিকার আছে সেইলা মুই ব্যবহার না করং। আর এই হইলেক মোর পুরস্কার।

১৯ যদিও মুই কাণোরো চাকর না হং, তাণো মুই নিজে সগারে চাকর হইচুং। যাতে করি মুই মেলা মানষিক বাছাই করা রাজাটার বাদে জয় করির পাং।

২০ যিহুদী মানষিলাক জয় করির বাদে মুই উমারলারটে যিহুদীর মত হইচুং। যদিও মুই মহাপুরুষ শ্রী মোশির আইন-কানুনের অধীনোত না হং, তাণো যায় যায় আইন-কানুনের অধীনে আছে, উমারলাক জয় করির বাদে মুই উমারলার নাকান হইচুং।

২১ আর আইন-কানুনের বায়রাত যায় যায় আছে উমারলাক জয় করির বাদে, আইন-কানুনের বায়রাত থাকা মানষির নাকান হইচুং। অবশ্য ইয়ার মানে এই না হয় যে, মুই ভগবানের আইন-কানুন মানং না, মুই তো যীশুর আইন-কানুন মানিয়া জীবন যাপন করির ধরচুং।

২২ যায় যায় বিশ্বাসে দুর্বল, উমারলারটে মুই উমার নাকান মানষি হলুং, যাতে উমারলাক বাছাই করা রাজাটার বাদে জয়



করির পাং। মুই সগারেটে উমার মনের মতন হলুং, যাতে যে কোন উপায়ে উমারলাক বাঁচের পারং।

২৩ এইলা সউগে মুই ভাল খবরের বাদে করির ধরচুং, যাতে করি এইলার আশুর্বাদের অংশিদার হবার পারং।

২৪ তোমরা কি জানেন না, যেলা দৌড়া দৌড়ি খেলা হয়, সেলা মেলা মানষি অংশগ্রহন করে কিন্তু জয়ী হয় এক জন, আর উয়ায়ে পুরুস্কার পায়। এই বাদে তোমরা এমন করি দৌড়ান যাতে পুরুস্কার পান।

২৫ আর দেখেন যায় যায় দৌড়ত যোগ দেয় উমরা আগত থাকি সগায় কঠিন নিয়ম মানিয়া চলে। উমরা যেইলা নষ্ট হয় যায় সেই জয়ের মালা পিন্দির এইলা করে। কিন্তু হামরা এমন পুরুস্কারের বাদে দৌড়াই, যেই পুরুস্কার কোন দিনও নষ্ট হবার না হয়।

২৬ এই বাদে উদ্দেশ্য ছাড়া মুই দৌড়াং না। যায় যায় ফাকাত ঘুসি মারে এই নাকান মানষির নাকান মুই না হং।

২৭ মুই দেহাক কষ্ট দিয়া নিজের অধীনত থুইচোং, যাতে দোসরা মানষিলারে ভাল খবর প্রচার করিবার পাছত পুরুস্কার পাবার বাদে অযোগ্য হয় না পড়ং।

১০ ভাই-বইনির ঘর, মুই চাং তোমরা ফম না হারান যে, হামার চৌদ্দ গুষ্টির সগায় অচানক মেঘের নিচত আছিলেক আর সগায় লোহিত সাগর পার হইছিলেক।

২ মহাপুরুষ শ্রী মোশির নগত এক হবার বাদে ঐ মেঘ আর ঐ সাগরের মইন্ধোত উমারলার সগারে দীক্ষা হয় গেইচে।

৩ পরম প্রভুর দেওয়া একে আত্মিক খাবার

৪ আর একে আত্মিক জল উমরা সগায় খাইচে। কেনেনা উমরানা পরম প্রভুর দেওয়া যে শিল নগত নিয়া যাবার ধরছিলেক, ঐটা থাকি উমরা খাবার জল পাবার ধরছিলেক। আর সেই শিলটা হইলেক বাছাই করা রাজা।

৫ কিন্তু উমারলার মইন্ধে বেশীর ভাগ মানষির প্রতি পরম প্রভু সন্তুষ্ট আছিলেক না। এই বাদে উমার মরাদেহা নিধুয়া পাথারত পরি রইলেক।

৬ হামরা যাতে শিখির পাই, এই বাদে ঐ ঘটনালা ঘটিছিলেক, যাতে উমরা যে নাকান বেয়া জিনিসের উপরাত লোভ করিছিলেক, হামরা ঐ নাকান না করি।

৭ উমারলার মইন্ধে কাণ্ডো কাণ্ডো মূর্তি পূজা করিছিলেক, তোমরা ঐ নাকান না করেন। পবিত্র শাস্ত্রত উমারলার সমন্ধে নেখা আছে, “মানষিলা খাওয়া-দাওয়া করির বসিলেক, পাছত হাল্লা-চিল্লা করিয়া আমোদ করির বাদে খাড়া হয় নাচির নাগিলেক।”

৮ উমারলার মইন্ধে মেয়লা মানষি ব্যভিচার করির বাদে একদিনে তেইশ হাজার মানষি মরি গেইচে। হামরানা যাতে এই নাকান ব্যভিচার না করি।

৯ উমারলার মইন্ধে মেয়ো মানষি প্রভুক পরীক্ষা করির যায়া সাপের কামড়ে মরি গেইছিলেক, হামরা যেনে ঐ নাকান করি প্রভুক পরীক্ষা না করি।

১০ উমারলার মইন্ধে মেয়ো মানষি বিরক্ত বোধ করিচে বুলিয়া, ধ্বংসকারী এক দূত উমারলাক ধ্বংস করিচে, তোমরা ঐ নাকান বিরক্ত বোধ প্রকাশ না করেন।

১১ সগায় যাতে দেখিয়া শিখির পায় তারে বাদে এই ঘটনালা উমার উপরাত ঘটিচে। আর হামারলাক সাবধান করি দিবার বাদে এইলা নেখা হইচে, কেনেনা হামরা শেষে কালত আসিয়া পৌছিচি।

১২ এই বাদে কাণ্ডো যদি মনে করে উয়ায় শক্ত হয় খাড়া হয় আছে, তাইলে উয়ায় সাবধান হউক যাতে পড়িয়া না যায়।

১৩ মানষির জীবনত যেইলা পরীক্ষা আইসে, এইলা ছাড়া দোসরা কোনো পরীক্ষা তোমারলার উপরাত আইসে নাই। তোমরা ভগবানের প্রতি বিশ্বস্ত থাক, যে পরীক্ষা তোমরালা সহ্য করির পাইবেন না সেইটা উয়ায় তোমারলার নগত হবার দিবে না। এই পরীক্ষাত পড়ার সাথে সাথে ঐলা থাকি বাইর হবার ও ঘাটা উয়ায় দেখেয়া দিবে, যাতে তোমরা ঐলা সহ্য করির পান।

১৪ মোর আদরের সখার ঘর, তোমরালা সউগ নাকানের প্রতিমা পূজা থাকি দূরত রও।

১৫ মুই জানং তোমরা বুদ্ধিমান; এই বাদে মুই তোমারলাক কবার ধরচুং, মুই যেইলা কং, তোমরালা সেইলা নিজে নিজে বিচার করিয়া দেখ।

১৬ প্রভুর ভোজের সমায় ধন্যবাদ দিয়া যে আশুর্বাদের নোটা থাকি যেইলা হামরা খাই, ঐটা কি খ্রীষ্টের অক্তের সহভাগিতা না হয়? আর যে রুটি টুকরা টুকরা করিয়া খাওয়া হয়, সেইটা কি খ্রীষ্টের দেহার সহভাগিতা না হয়?

১৭ হামরা ম্যেলা হইলেও একখান রুটির সগায় অংশিদার হয়। একে দেহা হইচি।

১৮ ইজ্রায়েল জাতির কতা চিন্তা কর। উমারলার মইন্ধে যায় যায় বলির মসং খায়, উমরালা কি বেদীর সউগ কিছুতে অংশগ্রহন করে না?

১৯ তাইলে মোর কতার মানে কি? মুই কি এইটা কবার ধরচুং যে, যায় প্রতিমাক গতে দিবার নিয়া আইসে বাস্তবে এইটা বত্তা আছে? আর বাস্তবে এইটা কি ভগবান? এই গতে দেওয়ার কোন গুরুত্ব আছে?

২০ না, কোন গুরুত্ব নাই। মুই কবার ধরচুং অযিহুদীলা যেইলা গতে দেয় সেইলা ভগবানেরটে না দেয়, অপদেবতালার উদ্দেশ্যে দেওয়া হয়। মুই চাং না, অপদেবতালার নগত তোমারলার যোগাযোগ থাকুক।

২১ প্রভুর ভোজের নোটা আর অপদেবতার ভোজের যে নোটা এই দুইটা নোটা থাকি তোমরা খাবার পারেন না। আর তোমরালা প্রভুর টেবিল আর অপদেবতার টেবিল এই দুইটা টেবিলত অংশ নিবার পারেন না।

২২ তোমরা কি প্রভুর মনত গোসা তুলির চাবার ধরচেন? হামরালা কি উয়ার চায়া বলবান?

২৩ মানষি কয়, “হামারলার সউগ কিছু করিবার স্বাধীনতা আছে।” এই কতা ঠিক, কিন্তু সউগে যে মানষির উপকার করে এমন না হয়। যে কোন কিছু করির স্বাধীনতা হামারলাক দেওয়া হইচে, কিন্তুক সউগে যে মানষিক গড়ে তোলে এমন না হয়।

২৪ কাণ্ডো খালি নিজের মঙ্গলের চেষ্টা না করুক, সগায় সগারে মঙ্গলের চেষ্টা করুক।

২৫ বাজারত বেচের আনা যে কোন মসং খাও, পোছেন না যে এই মসং প্রতিমার আগত সঁপে দেওয়া হইচে কি না, এমন না হউক উয়ার উত্তরে তোমরা মনত দুঃখ পান।

২৬ কেনেনা শাস্ত্রত নেখা আছে, “দুনিয়া আর উয়ার মইন্ধোত সউগে পরম প্রভুর।”

২৭ এই বাদে যদি কোন মানষি গুরু ভাই না হয়, উয়ায় তোমাক নিমন্ত্রন করে আর তুই যাবার চাইস, তাইলে কোন কিছু না পুছিয়া তোর আগত যেইলা খাবার আনিয়া দিচে ঐলা খা।

২৮ কিন্তুক কাণ্ডো যদি কয়, “এইলা প্রতিমারটে সঁপে দেওয়া হইচে,” তাইলে উয়ার আর খালি বিবেকের কতা চিন্তা করিয়া সেইটা না খাইস।

২৯ মুই তোর নিজের বিবেকের কতা কবার ধরচুং না, অইন্য মানষিটার বিবেকের কতা কবার ধরচুং। মোর স্বাধীনতা কেনে অইন্য মানষির বিবেক দিয়া বিচার করা হবে?

৩০ মুই যদি ধন্যবাদ দিয়া এই খাবার খাং তাইলে উয়ার বাদে কেনে মোর নিন্দা করা হবে?

৩১ এই বাদে তোমরা খাওয়া-দাওয়া কর আর যাই কর, সউগ কিছুই ভগবানের মহিমার বাদে কর।

৩২-৩৩ মুই যেই নাকান সউগ মানষিক সউগ নাকান করি সন্তুষ্ট করির চেষ্টা করং, তোমরাও একে নাকান কর। কি যিহুদী, কি গ্রীক, কি খ্রীষ্ট সমিতি, কারো ঘাটার বাধা না হন। মুই খালি নিজের ভাল না চাং, অইন্যের ভাল চাং যাতে উমরালা পাপ থাকি মুক্তি পায়।

১১ মুই যেই নাকান খ্রীষ্টের মত চলির ধরচুং তোমরাও তেমনি মোর মত চল।

২ মুই তোমারলার গুণগান করির ধরচুং, কেনেনা তোমরা সউগ সমায় মোর কতা মনে করেন, আর মুই তোমারলাক যেই শিক্ষা দিচুং সেইলা তোমরা ভাল করি পালন করির ধরচেন।

৩ কিন্তুক মুই চাং তোমরা যাতে বুঝির পারেন যে পতিটা বেটাছাওয়ার মাথা হইলেক খ্রীষ্ট। বেটিছাওয়ার মাথা হইলেক সোয়ামি, আর খ্রীষ্টের মাথা হইলেক পরম প্রভু।

৪ যেই বেটাছাওয়া মাথা ঢাকিয়া প্রার্থনা করে বা ভাববাণী কয় উয়ায় উয়ার মাথার অসন্মন করে।

৫ আর যেই বেটিছাওয়া মাথাত ঘোমটা না দিয়া প্রার্থনা করে বা ভাববাণী কয়, উয়ায় উয়ার মাথার অপমান করে। উয়ায় মাথা নাড়িয়া করা বেটিছাওয়ার মতই হয়।

৬ যদি কোন বেটিছাওয়া উপাসনার সমায় মাথাত ঘোমটা না দেয়, তাইলে উয়ার চুল একেবারে কামেয়া ফেলোউক! কিন্তুক বেটিছাওয়ার বাদে চুল কামেয়া ফেলা নজ্জার বিষয় এই বাদে উয়ার মাথাত ঘোমটা দিয়া থুক।

৭ উপাসনা করির সমায় মাথা ঢাকিয়া থোয়া বেটাছাওয়ার উচিত না হয়। কেনেনা পরম প্রভু বেটাছাওয়াক নিজের মত করিয়া সিদ্ধন করিচে। আর বেটাছাওয়ার মইদ্বো দিয়া পরম প্রভুর মহিমা প্রকাশ পায়। কিন্তুক বেটিছাওয়ার মইদ্বো দিয়া বেটাছাওয়ার মহিমা দেখা যায়।

৮ বেটাছাওয়া বেটিছাওয়া থাকি আইসে নাই। কিন্তু পইলা বেটিছাওয়া সিদ্ধন হইচে পইলা বেটাছাওয়া থাকি।

৯ বেটিছাওয়ার বাদে বেটাছাওয়ার সিদ্ধন হয় নাই, কিন্তুক বেটাছাওয়ার বাদে বেটিছাওয়ার সিদ্ধন হইচে।

১০ এই কারনে, আর স্বর্গদূতলার বাদে, অধীনতার চিন হিসাবে এক জন বেটিছাওয়ার মাথাত ঘোমটা দেওয়া উচিত।

১১ যাই হউক, প্রভু যীশুর সমাজত যোগ দিয়া বেটিছাওয়া সোয়ামির উপরত নির্ভর করে, আর সোয়ামি বেটিছাওয়াটার উপরাত নির্ভর করে।

১২ কেনেনা যেই নাকান পইলা বেটাছাওয়া থাকি পইলা বেটিছাওয়া আসিচে, একে নাকান বেটিছাওয়ার মইন্ধো দিয়া বেটাছাওয়ার জন্ম হয়। কিন্তুক সউগে পরম প্রভু থাকি হয়।

১৩ তোমরা নিজেই বিচার করি দেখ, মাথাত ঘোমটা না দিয়া ভগবানেরটে প্রার্থনা করা বেটিছাওয়ার মানায় কি?

১৪ সাধারণ বুদ্ধি দিয়া কি এইটা বুঝা যায় না যে, বেটাছাওয়া যদি লম্বা চুল থোয় উয়ার বাদে ঐটা অসন্মানের।

১৫ কিন্তুক বেটিছাওয়ার লম্বা চুল থোয়া সন্মানের।

১৬ যদি কাণ্ডো এই নিয়া তর্ক করির চায়, তাইলে মুই কইম যে, অইন্য কোন নিয়ম হামারলার মইন্ধোত নাই আর খ্রীষ্ট সমিতিলাতও নাই।

১৭ এইবার মুই তোমারলাক যেইলা বিষয় আদেশ দিবার ধরচুং, ঐলার বিষয় মুই কোন গুণগান না করিম। কেনেনা তোমরালা যেই নাকান করি খ্রীষ্ট সমিতিত একটে হন তাতে কোন ভাল হয় না বরং ক্ষতি হয়।



১৮ পইলা মুই শুনির পাবার ধরচুং, তোমরা যেলা খীষ্ট সমিতিত এক সাথে মিল হন সেলা তোমারলার মইদ্বোত দলাদলি থাকে, আর মুই খানিক বিশ্বাস করং।

১৯ তোমারলার মইদ্বোত মতের অমিল হবেই ইয়ার ভাল দিক হইলেক, ভগবানের চোখুত তোমারলার মইদ্বোত যোগ্য মানষি কায় সেইটা ঝকঝকা করি ধরা পড়ে।

২০ খীষ্ট সমিতিত প্রভুর ভোজের বাদে একটে মিল হয়। যা খান আসলে সেইটা প্রভুর ভোজ না হয়।

২১ কেনেনা তোমরা কাণ্ডো কারো বাদে বাচ্ছে না রয়া খায়া নেন। উয়াতে কাণ্ডোয় ভোগতে রয় আর কাণ্ডো খায়া মাতাল হয়।

২২ খাওয়া-দাওয়া করির বাদে তোমারলার কি ঘর-বাড়ি নাই? তোমরা কি সমিতিক তুচ্ছ মনে করেন, আর যার কিছুই নাই উমারলাক নইজ্জা দিবার ধরচেন? মুই তোমারলাক কি কইম? ইয়াতে মুই কি তোমারলার গুণগান করিম? মোটেও না!

২৩ মুই প্রভুর ভোজের বাদে প্রভুরটে থাকি যেই শিক্ষা পাইচুং সেইটায় মুই তোমারলাক দিবার ধরচুং। যেই রাতিত প্রভু যীশুক শত্রুলার হাতত ধরেয়া দেওয়া হইচে, সেই রাতিত উয়ায় রুটি নিয়া,

২৪ পরম প্রভুক ধন্যবাদ দিছিলেক আর সেইটা টুকরা টুকরা করি কইলেক, “এইটা মোর দেহা, এইখান তোমারলার বাদে, মোক ফম করির বাদে তোমরালা এই নাকান করো।”

২৫ খাওয়া শেষে করিয়া প্রভু একে নাকান নোটা নিয়া কইলেক,  
“এই নোটা হইলেক মোর অত্ত, এই অত্ত দিয়া মানষির মুক্তির  
বাদে নয়া চুক্তি করা হইলেক। তোমরালা যত বার এইটা হাতে  
খাবেন মোক ফম করেন।”

২৬ এই বাদে উয়ায় না আইসা পর্যন্ত তোমরা যত বার এই রুটি  
খাবেন আর এই নোটা থাকি খাবেন, ততবার প্রভুর মরণের কতা  
প্রচার করিতে থাকেন।

২৭ এই বাদে যে কাণ্ডো অযোগ্য হয় এই রুটি আর এই নোটা  
থাকি খায় উয়ায় প্রভুর দেহার আর অত্তের বিরুদ্ধে পাপ করিচে  
বুলিয়া দোষী হয়।

২৮ এই রুটি আর নোটা থাকি খাবার আগত মানষি নিজক  
পরীক্ষা করিয়া দেখুক।

২৯ কেনেনা খাবার সমায় উয়ায় যদি প্রভুর দেহার বিষয় না  
বোঝে তাইলে ঐ খাওয়াতে উয়ায় নিজের উপরত শাস্তি ডেকেয়া  
আনে।

৩০ এই বাদে তোমারলার মইন্ধোত আজি মেলা দুর্বল আর  
অসুকিয়া মানষি আছে, আর কাণ্ডো কাণ্ডো মরিয়াও গেইচে।

৩১ যদি হামরা নিজক বিচার করিয়া দেখি তাইলে হামরা প্রভুর  
বিচারের হাত থাকি রেহাই পাইলাং হয়।

৩২ কিন্তু প্রভু যেলা হামারলার বিচার করে সেলা হামারলাক  
শাসনও করে, যাতে দুনিয়ার মানষিলাস সগারে নগত হামারলাক

দোষী কয়া ধরা না হয়।

৩৩ এই বাদে মোর ভাই-বইনিলা, তোমরা যেহে প্রভু ভোজ করির বাদে একটে হন সেহে এক জন অইন্য জনের বাদে বাছে রন।

৩৪ যদি কাণ্ডোরো ভোগ নাগে তাইলে উয়ায় বাড়ি যায়া খায়া আসুক, যাতে সমিতি হিসাবে একটে মিল হবার ফলে শাস্তি পাবার না নাগে। আর অইন্য বিষয়লা সমন্ধে যেহে মুই আসিম সেহে উপদেশ দিম।

১২ মোর ভাই-বইনিলা, মুই চাং না যে, পবিত্র আত্মার দেওয়া বরদান সমন্ধে তোমরালা অজানা থাকে।

২ তোমরা জানেন, যেহে তোমরা যীশুর শিষ্য হন নাই, সেহে তোমারলাক এমন সউগ প্রতিমার পাকে টানিয়া নিয়া গেইলেক হয়, যেইলা কতা কবার পারে না।

৩ মুই তোমারলাক কবার ধরচুং, পরম প্রভুর আত্মার মইন্দো দিয়া কতা কইলে কাণ্ডো কয় না যে, “যীশুর উপরত অভিশাপ আসুক।” আর পবিত্র আত্মার মইন্দো দিয়া ছাড়া কাণ্ডো কবার পারে না যে, “যীশুই প্রভু।”

৪ একে পবিত্র আত্মার দেওয়া বরদান নানা নাকানের।

৫ হামরা এক প্রভুর নানা নাকান করি সেবা করি।

৬ হামারলাক সগাকে আলদা আলদা কাম দেওয়া হইচে, কিন্তু একই ভগবান সউগ নাকানের কাম সউগ মানষির মইদ্বোত করান।

৭ সগারে মংগলের বাদে পবিত্র আত্মার বরদান এক এক মানষিক আলদা আলদা করি দেওয়া হয়।

৮ এই আত্মার মইদ্বো দিয়া জ্ঞানের কতা বা বুদ্ধির কতা কবার দেওয়া হইচে।

৯ আর কাণ্ডোকে কাণ্ডোকে একে আত্মার বরদান দিয়া বিশ্বাসের ক্ষমতা, বা অসুখ ভাল করির ক্ষমতা,

১০ বা অচানক কাম করির ক্ষমতা, আর ভগবানের বাইক্য কবার ক্ষমতা দেওয়া হইচে। আর কোন বাইক্য ভাল আত্মা থাকি আসিচে না বেয়া আত্মা থাকি সেইটা চিনির ক্ষমতা দেওয়া হইচে। অইন্য কাণ্ডো কাণ্ডোক স্বর্গের ভাষাত কতা কবার ক্ষমতা আর কাণ্ডো কাণ্ডোক এইলা ভাষার মানে বুঝি দিবার ক্ষমতা দেওয়া হইচে।

১১ এইলা সউগ কাম পবিত্র আত্মা একলায় করে। উয়ার খুশি মতন সগাকে এইলা ক্ষমতা আলদা আলদা করি দেয়।

১২ হামারলার সগারে দেহা নানা অঙ্গ প্রত্যঙ্গ দিয়া গড়া। যদিও মেয়ো অঙ্গ প্রত্যঙ্গ তবু সউগে মিলিয়া একটা দেহা। খ্রীষ্টর দেহাও তেমন একে নাকান, এই দেহা হইলেক সমিতি।

১৩ সমিতির মইন্ধোত হামরা যিহুদী কি অযিহুদী, চাকর কি স্বাধীন, সগায় একটা পবিত্র আত্মা দিয়া দীক্ষা হইচে। আর এলা হামরা সগায় একটা দেহা হইচি। কেনেনা হামরা তো সগায় একটায় পবিত্র আত্মাক পাইচি।

১৪ দেহা খালি এক অঙ্গ দিয়া গড়া না হয়, ম্যেলা অঙ্গ দিয়া গড়া।

১৫ ঠ্যেং যদি কয়, “মুই হাত না হং, এই বাদে মুই দেহার অঙ্গ না হং,” তাইলে সেইটা যে দেহার অঙ্গ না হয় এমন না হয়।

১৬ আর কান যদি কয়, “মুই চোখু না হং এই বাদে মুই দেহার অঙ্গ না হং,” তাইলে সেই কতাটা ঠিক না হয়।

১৭ যদি গোটায় দেহাটা চোখু হইলেক হয় তাইলে শুনিবার শক্তি কোটে থাকিলেক হয়? আর গোটায় দেহাটা যদি কান হইলেক হয় তাইলে গন্ধ নিবার শক্তি কোটে থাকিলেক হয়?

১৮ আসলে ভগবান যেই নাকান চাইচে ঠিক সেই নাকান করি দেহার অঙ্গলাক উয়ায় একটা একটা করি দেহাত বসাইচে।

১৯ যদি সউগ অঙ্গলা একে নাকান হইলেক হয় তাইলে দেহা কোটে থাকিলেক হয়?

২০ অঙ্গ ম্যেলা কিন্তুক দেহা একটায়।

২১ চোখু কোন দিনও হাতক কবার পারেনা, “তোক মোর দরকার নাই,” আর মাথা ঠ্যেং দুইটাক কবার পারে না,

“তোমারলাক মোর দরকার নাই।”

২২ আসলে দেহার যেই অঙ্গলা দুর্বল মনে হয় সেইলায় বেশী দরকারি।

২৩ আর যেই অঙ্গলাক হামরা তুচ্ছ মনে করি, সেইলাক বেশী করি যতন করির নাগিবে। যে অঙ্গলা মানষিক দেখা না যায় ঐলা হামরা আর যতন করি ঢাকি থুই।

২৪ কিন্তু যে অঙ্গলা বায়রাত দেখা যায় ঐলা হামরা ঢাকি থুবার দরকার হয় না। দেহার যে অঙ্গলার কোন সন্মান নাই ভগবান সেইলাক বেশী সন্মান দিচে, আর সউগলাকে এক সাথে যুক্ত করিচে।

২৫ যাতে দেহা ভাগ হয় না যায়, বরং সেইলা যাতে আর একে অইন্যের বাদে চিন্তা করে।

২৬ দেহার কোন অঙ্গ যদি কষ্ট পায় তাইলে উয়ার সাথত সগায় কষ্ট করে। যদি একটা অঙ্গ সন্মান পায় তাইলে উয়ার নগত অইন্য অঙ্গলাও আনন্দিত হয়।

২৭ ঠিক তেমনি তোমরায় খ্রীষ্টের দেহা, আর এক এক জন এক একটা অঙ্গ।

২৮ খ্রীষ্ট সমিতিত পইলা যীশুর খবরিয়ালাক, দ্বিতীয়তঃ ভাববাদীলাক, তৃতীয়তঃ মাষ্টার, ভগবান নিযুক্ত করিচে। তার পাছত এই মানষিলাক নিযুক্ত করিচে যায় যায় অচানক কাম করির ক্ষমতা, যায় যায় অসুখ ভাল করির ক্ষমতা, যায় যায়

সাহায্য করির ক্ষমতা, আর স্বর্গের ভাষাত কতা কবার ক্ষমতা পাইচে।

২৯ ইমরা সগায় কি খবরিয়া? সগায় কি ভাববাদী? সগায় কি মাষ্টার? সগায় কি অচানক কাম করিবার ক্ষমতা পাইচে?

৩০ সগায় কি অসুকিয়া মানষিলাক ভাল করির ক্ষমতা পাইচে? সগায় কি স্বর্গের ভাষাত কতা কবার ক্ষমতা পাইচে? সগায় কি উয়ার মানে বুঝিয়া দিবার ক্ষমতা পাইচে? না পায় নাই!

৩১ কিন্তুক তোমরালা আত্মার সউগ চায়া দরকারি ক্ষমতা পাবার আগ্রহী হন। আর মুই তোমারলাক এইবার আর একটা ভাল ঘাটা দেখেয়া দিবার ধরচুং:

১৩ মুই যদি দুনিয়ার যত ভাষা আছে, আর স্বর্গদূতলার ভাষাত কতা কং কিন্তুক মোর মইন্ধোত পিরিত না থাকে, তাইলে মুই জোরে বাজা ঘণ্টা আর বন বন করা করতাল হয় পড়িচুং।

২ যদি ভাববাণী কবার ক্ষমতা মোর থাকে, যদি মুই সউগ গোপন বিষয় বুঝির পাং আর মোর যদি সউগ নাকানের জ্ঞান থাকে, এমন কি পাহাড়ক এক জাগা থাকি অইন্য জাগাত সরেয়া দিবার পুরা বিশ্বাস থাকে, কিন্তু মোর মইন্ধোত পিরিত না থাকে তাইলে মোর কোন দাম নাই।

৩ মোর যা কিছু আছে তা যদি মুই গরীবলাক খাবার বাদে দান করি দেং, এমন কি, দেহাটা পোড়েবার জন্যে দিয়া দেং, কিন্তু

মোর মইদ্বোত পিরিত না থাকে, তাইলে মোর কোন লাভ নাই।

৪ পিরিত সউগ সমায় ধৈর্য ধরে, দয়া করে, হিংসা করে না, বড় বড় কতা কয় না, অহংকার করে না।

৫ বেয়া ব্যবহার করে না, নিজের সুবিধার চেষ্টা করে না। গোসা হয় না, কারো বেয়া ব্যবহারের কতা ফম থোয় না।

৬ পিরিত কোন বেয়া বিষয় নিয়া আনন্দ করে না, কিন্তু সচাং বিষয় নিয়া আনন্দ করে।

৭ পিরিত সউগ কিছু সহ্য করে, সগাকে বিশ্বাস করে, সউগ কিছুতে আশা করে, সউগ কিছুই ধৈর্য ধরিয়া মানিয়া নেয়।

৮ পিরিত কোন দিনও শেষ হয় না। ভাববাণী কবার ক্ষমতা তাণ্ডো এক দিন শেষ হবে। নানা নাকান ভাষাত কতা কবার ক্ষমতা তাণ্ডো শেষ হয় যাবে। যদি জ্ঞান থাকে তাণ্ডো এক দিন অকামের হবে।

৯ এলা হামরা সউগ বিষয়ে পুরাপুরি জানিনা, ভাববাণীও পুরাপুরি কবার পারি না।

১০ কিন্তু শেষকালে সউগ পরিপূর্ণ হয় য়েলা আসিবে, যেইলা পরিপূর্ণ নাই হয় সেইলাও শেষ হবে।

১১ মুই য়েলা ছাওয়া আছিলুং সেয়া ছাওয়ার নাকান কতা কইচুং, ছাওয়ার নাকান চিন্তা করিচুং, ছাওয়ার নাকান বিচার করিচুং। এলা মোর বয়স হইচে এই বাদে ছাওয়ার নাকান চিন্তালা বাদ দিচুং।



১২ এলা হামরা আয়নাত আবছা দেখির ধরচি। কিন্তুক সেই সময় পরিস্কার দেখিমু।

১৩ তাইলে হামরা জানির পাবার ধরচি যে, বিশ্বাস, আশা আর পিরিত এই তিনটায় শেষ পর্যন্ত টিকি রবে। কিন্তুক এইলার মইদ্বোত পিরিত হইলেক সউগ চায়া মহান।

১৪ তোমরা পিরিত করিবার বাদে চেষ্টা কর আর পবিত্র আত্মার দেওয়া ক্ষমতালা, বিশেষ করি ভগবানের বাইক্য কবার ক্ষমতা পাবার বাদে আগ্রহী হও।

২ পবিত্র আত্মার দেওয়া স্বর্গের ভাষাত যে কোন মানষি কতা কয় উয়ায় মানষিরটে কয় না, ভগবানেরটে কয়। উয়ায় তো পবিত্র আত্মার দেওয়া গোপন তত্ত্বের বিষয় কয়, এই বাদে অইন্য মানষি সেইলা বুঝির পারে না।

৩ কিন্তুক যায় ভগবানের বাইক্য কয় উয়ায় মানষিক গড়ে তুলিয়া উৎসাহ আর সান্তনা দেয়।

৪ যায় স্বর্গের ভাষাত কতা কয়, উয়ায় খালি নিজক গড়ে তুলে, কিন্তুক যায় ভগবানের বাইক্য কয় উয়ায় খ্রীষ্ট সমিতির মানষিলাক গড়ে তুলে।

৫ মোর ইচ্ছা যাতে তোমরা সগায় স্বর্গের ভাষাত কতা কবার পারেন। আর চাং যাতে তোমরা ভগবানের বাইক্য কবার পান। স্বর্গের ভাষাত কতা কবার চায়া তো ভগবানের বাইক্য কওয়া আর

ভাল। খালি মানে বুঝিয়া দিবার পারে এমন মানষি যদি থাকে তাইলে স্বর্গের ভাষাত কতা কইলে লাভ হয় যাতে খ্রীষ্ট সমিতির মানষিলাক গাথিয়া তুলা যায়, তা না হইলে বেকার।

৬ মোর ভাই-বইনিলা, মুই যদি তোমারটে আসিয়া খালি স্বর্গের ভাষাত কতা কং, তাইলে মুই তোমারলাক কি উপকার করির পারং? মুই যদি ভগবানের কোন সচাং কতা বা জ্ঞানের কতা ভগবানের বাইক্য বা শিক্ষার কতা কং তাইলে উপকার হবে।

৭ এমন কি জিউ না থাকা বাঁশী বা বীণার নাকান বাজনা যদি পরিষ্কার সুর-তাল না বাজে তাইলে কেমন করি গান বুঝা যাবে?

৮ যুদ্ধের শিংগা যদি পরিষ্কার না বাজে তাইলে কায় নিজক যুদ্ধত যাবার বাদে তৈরি করিবে?

৯ একে নাকান যেই ভাষা মানষিলা বোঝে না সেই ভাষাত তোমরা যদি কতা কন, তাইলে তোমরা যেইটা কন সেইটা কেমন করি বুঝা যাবে? কেনেনা তোমরা যেইলা কন সেইলা ফাকোতে বাতাসক কন।

১০ এই দুনিয়াত নানা নাকানের ভাষা আছে ঐলার মইন্ধে কোনটায় অথহীন না হয়।

১১ কিন্তুক মুই যদি ভাষার মানে না বুঝং তাইলে যায় মোর সোদে কতা কবার ধরচে মুই উয়ারটে বিদেশীর নাকান হইম, উয়াও মোরটে একে নাকান হবে।

১২ তোমারলার বেলাও একে নাকান। মুই জানং তোমরা পবিত্র আত্মার বরদান পাবার বাদে হাউস করির ধরচেন। কিন্তু মুই কং, যেইলা দিয়া খ্রীষ্ট সমিতিক গড়ে তোলা যায় খালি সেইলায় পাবার চেষ্টা কর।

১৩ এই বাদে যেই মানষি স্বর্গের ভাষাত কতা কয় উয়ায় প্রার্থনা করুক যাতে উয়ার মানে বুঝির ক্ষমতা পায়।

১৪ কেনেনা মুই যদি স্বর্গের ভাষাত প্রার্থনা করং খালি মোর আত্মায় করে, মুই নিজেই বুঝির না পারং।

১৫ তাইলে মোর কি করা দরকার? মুই আত্মা দিয়া প্রার্থনা করিম, বুদ্ধি দিয়াও প্রার্থনা করিম। মুই আত্মা দিয়া গুণকিত্তন করিম, বুদ্ধি দিয়াও গুণকিত্তন করিম।

১৬ যদি তুই খালি আত্মাতে গুণগান করিস, তাইলে যেই মানষি ওটেকোনা শুনির ধরচে উমরা না বুঝিয়া কেমন করি তোর গুণগানের আমেন কবে? কেনেনা তুই কি কবার ধরচিস উমরা তো বোঝে না।

১৭ তুই হয় তো ঠিক করি গুণগান করির ধরচিস, কিন্তু অইন্য জনাক আত্মিক করি গড়ে তুলির নাই পারিস।

১৮ মুই তোমারলার সগারে চায়া বেশী স্বর্গের ভাষাত কতা কবার পাং এই বাদে মুই ভগবানক ধন্যবাদ দেং।

১৯ কিন্তু সমিতির মইন্ধোত স্বর্গের ভাষাত হাজার হাজার কতা কবার বদলে অইন্যলোক শিক্ষা দিবার আর মুই বুদ্ধি দিয়া বরং

পাঁচটা কতা কইম।

২০ ভাইয়ের ঘর, চেংড়ার নাকান আর বুদ্ধি না করেন।  
তোমারলার বয়স্ক মানষির নাকান বুদ্ধি হউক, হিংসা নিন্দার  
ব্যাপারে কাচুয়া ছাওয়ার নাকান সাদাসিদা হন।

২১ মহাপুরুষ মোশির আইন-কানুনত নেখা আছে, অইন্য ভাষার  
মানষিলাক দিয়া আর বৈদেশিয়ার মুখ দিয়া মুই এই জাতিরটে  
কতা কইম তাণ্ডো উমরা মোর কতা শুনিবে না। মুই ভগবান কবার  
ধরচুং।

২২ তাইলে দেখা যায়, শিষ্যলার বাদে স্বর্গের ভাষাত কতা কওয়া  
কোন চিন না হয়, বরং যায় শিষ্য হয় নাই উমারে বাদে এই চিন।  
কিন্তু যায় শিষ্য হয় নাই উমার বাদে ভগবানের বাইক্য কওয়া  
কোন চিন না হয়, বরং শিষ্যলার বাদে ঐটায় চিন।

২৩ সমিতির মানষি এক জাগাত জড়ো হইলে সগায় স্বর্গের  
ভাষাত কতা কইতে থাকে, সেলো কোন বায়রার মানষি যায় শিষ্য  
নাই হয়, উমরা যদি ভিতরত সোন্দায় তাইলে কি তোমারলাক  
পাগলা কবে না?

২৪ কিন্তু যদি সগায় ভগবানের বাইক্য কয় সেই সমায় কোন  
সাধারন মানষি যায় শিষ্য নাই হয় উয়ায় আইসে, তাইলে সেই  
মানষিটা সগারে কতা শুনি নিজের পাপের সমন্ধে চেতনা পাবে  
আর ঐলা কতার দ্বারা উয়ার অন্তরের বিচার নিজে করিবে।

২৫ ইয়াতে উয়ার অন্তরের গোপন বিষয়লা বাইর হয় পড়িবে, সেলা উয়ায় মাটিত উবুর হয় পড়িয়া ভগবানের গুণগান করি কবে, “সচাংএ ভগবান তোমারলার মইন্ধোত আছে।”

২৬ হে মোর আদরের ভাই বইনিলা তাইলে কি কইম? তোমরা যেলা সমিতিত এক জাগাত জোড়ো হন সেলা তোমারলার মইন্ধোত কাণ্ডো গুণকিত্তন করে, কাণ্ডো শিক্ষা দেয়, কাণ্ডো সচাংটা উদলি দেয়, কাণ্ডো স্বর্গের ভাষাত কতা কয়, আর কাণ্ডো উয়ার মানে বুঝিয়া দেয়। যায় যেই নাকান করুক না কেনে সউগে যাতে সমিতিক গড়ে তুলির বাদে হয়।

২৭ দুই বা তিন জনের বেশী স্বর্গের ভাষাত কতা না কউক, উমরা যাতে পালা নিয়া কয়, আর এক জন যাতে উয়ার মানে বুঝিয়া দেয়।

২৮ বুঝিয়া দেওয়া মানষি যদি না থাকে তাইলে স্বর্গের ভাষাত কতা কওয়া মানষি সমিতিত চুপ থাকুক। উয়ায় একলায় নিজের নগত আর ভগবানের নগত স্বর্গের ভাষাত কতা কউক।

২৯ ভাববাদীলা যায় যায় ভগবানের বাইক্য কয় উমরা দুই বা তিন জন কতা কউক, অইন্যলা উয়ার বিচার করি দেখুক।

৩০ ওটেকোনা বসিয়া আছে এমন কাণ্ডোরোটে যদি ভগবানের বাইক্য আইসে তাইলে পইলা যায় বাইক্য কবার ধরছিলেক উয়ায় চুপ করুক।

৩১ যাতে একের পর এক সগায় বাইক্য কবার পায়, শিক্ষালাভ করিয়া সমিতির সগায় আর উৎসাহিত হয়।

৩২ ফর্ম থোন, ভাববাদীলার আত্মা নিজের বশে থুক।

৩৩ ভগবান তো গন্ডগোলের ভগবান না হয়, উয়ায় শান্তির ভগবান। ভগবানের মানষিলার সউগ সমিতিত যেমন হয়। থাকে,

৩৪ একে নাকান বেটিছাওয়ালা সমিতিত গল্প না করিয়া চুপ করি থাকুক, কেনেনা কতা কবার অধিকার উমারলাক দেওয়া হয় নাই। মোশির বিধানত যেই নাকান কয় সেই নাকান উমরা বাধ্য হয়। থাকুক।

৩৫ যদি উমরা কোন কিছু জানির চায় তাইলে বাড়িত উয়ার সোয়ামিক পুছুক, কেনেনা সমিতিত কতা কওয়া বেটিছাওয়ার বাদে নজ্জার বিষয়।

৩৬ পরম প্রভুর বাইক্য কি তোমারলার মইদ্বো থাকি বাইর হয়। আইসচে আর খালি কি তোমারলারটেই আইসচে?

৩৭ কাণ্ডো যদি নিজক ভাববাদী মনে করে বা আত্মিক বরদান পাইচে কয়া মনে করে, তাইলে উয়ায় স্বীকার করুক যে, মুই যেইলা নেখিচুং সেইলা প্রভুর আদেশ।

৩৮ যদি কাণ্ডো এই কতা অবজ্ঞা করে তাইলে উয়াকও অবজ্ঞা করা হবে।

৩৯ এই বাদে হে মোর ভাই বইনির ঘর, ভগবানের বাইক্য কবার  
আগ্রহী হন, আর স্বর্গের ভাষাত কতা কবার মানা না করেন।

৪০ কিন্তু সউগ কিছু যাতে নিয়ম মানিয়া সঠিক করা হয়।

১৫ মোর ভাই-বইনির ঘর, তোমরা জানিচেন মুই তোমারলারটে  
আগত ভগবানের ভাল খবর প্রচার করিচুং, ঐলা তোমরা মানি  
নিয়া থির আছেন। এলা মুই ঐ ভাল খবর ফম করি দিবার  
ধরচুং।

২ আর যে বাইক্য শুনিচেন, সেইটা যদি জীবনত শক্ত করি ধরি  
রাখেন, তাইলে তোমরালা এই ভাল খবরের মইন্ধো দিয়া মুক্তি  
পাবার ধরচেন। কিন্তু সাবধান, সেই বিশ্বাস খালি মানষিক দেখা  
বিশ্বাস না হউক।

৩ মুই যেই খবর প্রভুরটে থাকি পাইচুং সেইটা খুব জরুরি খবর  
মনে করিয়া তোমারটে পৌছে দিচুং। সেই জরুরি খবরটা  
হইলেক, বাছাই করা রাজাটা শাস্ত্রের কতা মতন হামারলার  
পাপের বাদে মরিলেক,

৪ উয়াক সমাধিত দেওয়া হইলেক, শাস্ত্রের কতা মতন তিন  
দিনের দিন মরণ থাকি ফির বত্তে তুলা হইলেক।

৫ আর উয়ায় খবরিয়া পিতরক, আরো পরে উয়ার নিজের বারো  
জন খবরিয়ালাক দেখা দিলেক।

৬ ইয়ার পাছত উয়ায় একই সমায় পাঁচশোর বেশী শিষ্যলোক দেখা দিলেক। উমার মইন্ধে কাণ্ডো কাণ্ডো মরি গেইলেও বেশীর ভাগ মানষি এলাও বত্তিয়া আছে।

৭ তার পাছত উয়ায় যাকবক দেখা দিলেক আরো খবরিয়ালাক সগাকে দেখা দিলেক।

৮ তার পাছত যেমন অকালে জন্মা ছাওয়ার নাকান, সগারে শেষত মোকও দেখা দিলেক।

৯ খবরিয়ালার মইন্ধে মুই সউগ চায়া ছোট, খবরিয়া কয়া কাণ্ডো মোক ড্যেকায় এইটা মোর যোগ্যতা নাই, কেনেনা মুই শিষ্য হবার আগত প্রভুর সমিতিলাক অইত্যাচার করির ধরচিলুং।

১০ কিন্তু এলা মুই যা হইচুং সেইটা ভগবানের দয়াতে হইচুং। মোর উপরত উয়ার ঐ দয়া নিস্কল হয় নাই। মুই বরং অইন্য খবরিয়ালার তুলনায় বেশী পরিশ্রম করিচুং। মুই যে বেশী করিচুং এইটা না হয়, মোর উপরত যে ভগবানের দয়া আছে এই দয়াতে এইলা করিচুং।

১১ এই বাদে মুই হং বা অইন্য খবরিয়ালা হউক, সগায় একে ভাল খবর প্রচার করচি আর তোমরালা সেইটা বিশ্বাস করিচেন।

১২ কিন্তু হামরা প্রচার করির ধরচি বাছাই করা রাজাটা মরণ থাকি ফির বত্তি উঠিচে, তাইলে তোমারলার মইন্ধে কাণ্ডো কাণ্ডো কি করি কবার ধরচে, মরালা ফির বত্তি উঠির না হয়?



১৩ মরালার যদি ফির বত্তি না ওঠে তাইলে বাছাই করা রাজাটাকও ফির বত্তে তোলা নাই হয়।

১৪ আর উয়ায় ফির বত্তি না উঠিয়া থাকে তাইলে হামার প্রচার মিছাং আর তোমারলার বিশ্বাসও মিছাং।

১৫ হামার সাক্ষ্য এই, ভগবান বাছাই করা রাজাটাক ফির বত্তে তুলিচে। মরালার যদি বত্তে তোলা না হয়, তাইলে বাছাই করা রাজাটাকও বত্তে তোলা নাই হয়। তাইলে এইটা প্রমাণ হবার ধরচে যে, ভগবানের বিষয় হামরা মিছাং সাক্ষী দিবার ধরটি।

১৬ কেনেনা মরালার যদি ফির বত্তে তুলা না হয় তাইলে বাছাই করা রাজাটাক বত্তে তোলা হয় নাই।

১৭ যদি উয়াক বত্তে তোলা না হয় থাকে তাইলে তোমারলার বিশ্বাসের কোন দাম নাই, আর তোমরা এলাও পাপের মইন্ধোত পড়িয়া আছেন।

১৮ তাইলে বাছাই করা রাজাটার শিষ্য হয় যায় যায় মরিচে উমরা সগায় নাশ হইচে।

১৯ আর বাছাই করা রাজাটার উপরত যে আশা খালি যদি এই জীবনের বাদে হয়, তাইলে অইন্য মানষিলার চায়া হামারা খুব হতভাগা হমু!

২০ বাছাই করা রাজাটাক কিন্তু সচাং করি বত্তে তোলা হইচে। উয়ায় ফসলের পইলা ফল, মানে মরণ থাকি যাক যাক ফির বত্তে তোলা হবে উমারলার মইন্ধে উয়ায় পইলা বত্তি উঠিচে।

২১ কেনেনা একটা মানষির মইন্ধো দিয়া যেমন মরণ আসিচে, মরালার মইন্ধোত ফির বত্তি উঠা তেমনি একটা মানষি দিয়া আইসেচে।

২২ পইলা মানষি আদমের নগত যুক্ত আছি বুলিয়া যেই নাকান সউগ মানষি মরে, একে নাকান করি যায় যায় বাছাই করা রাজাটার নগত যুক্ত আছে উমারলাক সগাকে নয়া জীবন দান দিয়া বত্তে তোলা হবে।

২৩ কিন্তু সগাকে উয়ার পালা মতন বত্তে তোলা হবে, পইলা বাছাই করা রাজাটাক, তার পাছত উয়ার যায় যায় নিজের। বাছাই করা রাজাটা আইসার সমায় উমারলাক বত্তে তোলা হবে।

২৪ ইয়ার পাছত বাছাই করা রাজাটা যেলা ত্রিভুবনের মইন্ধোত শত্রুলার সউগ ক্ষমতা, অধিকার আর শক্তি ধবংস করিয়া স্বর্গের বাপ ভগবানের হাতত শাসন ব্যবস্থা দিয়া দিবে সেলায় শেষকাল আসিবে।

২৫ কেনেনা যত দিন স্বর্গের বাপ উয়ার সউগ শত্রুলাক বাছাই করা রাজাটার ঠেংএর তলাত না থোয়, ততদিন পর্যন্ত বাছাই করা রাজাটাক শাসন করির নাগিবে।

২৬ শেষ শত্রু যে মরণ উয়াকও ধবংস করা হবে।

২৭ শাস্ত্রের কতা মতন, “ভগবান সউগ কিছু উয়ার অধীন করিয়া ঠেংএর তলাত থুবে।” এইটা ঝকঝকা যে, ভগবান নিজক বাদ দিয়া সউগ কিছুই বাছাই করা রাজাটার অধীন করিচে।

২৮ সউগ কিছু বাছাই করা রাজাটার অধীনে য্যেলা থোয়া হবে, স্যেলা যায় সউগ কিছু উয়ার অধীনে থুইলেক, সেই ভগবান যাতে এক মাত্র মালিক হবার পারে, এই বাদে বেটাও নিজে স্বর্গের বাপ ভগবানের অধীন হবে।

২৯ মনে কর, মরা মানষির উদ্দেশ্যে যায় যায় দীক্ষা নেয়, উমরালার কি লাভ হবে? মরালাক যদি বত্তে তোলা না হয়, তাইলে কেনেই বা উমরা মরালার বাদে দীক্ষা নিবে?

৩০ আর হামরা কেনে সউগ সমায় বিপদত পড়ির ধরচি?

৩১ ভাই বইনিলা প্রভু যীশুর কামত তোমারলাক নিয়া মোর যে গর্ব, ঐ গর্বত নিশ্চিত যে সউগ দিনে মুই মরণের নগত নড়াই করির ধরচুং।

৩২ ইফিষ গঞ্জত বনুয়া জানোয়ারলার নগত মুই যে নড়াই করিচুং আরে! সেইটা খালি জাগতিক উদ্দেশ্যের বাদে করি থাকং তাইলে মোর কি লাভ হইচে? মরালাক যদি ফির বত্তে তোলা না হয়, “তাইলে আইসো খাওয়া-দাওয়া করি কেনেনা কালি তো মরি যামো।”

৩৩ ঐ নাকান ভুল না করেন। কতাত কয়, “বেয়া সঙ্গী ভাল মানষিকও বেয়া বানেয়া দেয়।”

৩৪ ধার্মিক হবার বাদে চেতন হও, পাপ না করেন, কেনেনা কাঙরো কাঙরো ভগবান-জ্ঞান নাই। মুই তোমারলাক নজ্জা দিবার বাদে এই কতা কবার ধরচুং।

৩৫ কাণ্ডো কাণ্ডো কবে, “মরা মানষিক কেমন করি বত্তে তোলা হবে? উমারলার দেহাটা বা কেমন হবে?”

৩৬ কি বোকার মতন প্রশ্ন! তুই নিজে যে বিচন ছিটাইস, সেইটা না মরা পর্যন্ত বত্তা যায় না।

৩৭ তোর গাড়া বিচি থাকি যে চারা হয় সেইটা তুই গাড়িস নাই, খালি বিচি গাড়িস, সেইটা গমের বিচন বা অইন্য কোন।

৩৮ ভগবান নিজের ইচ্ছা মতন সেই বিচিক একটা দেহা দেয়। পতিটা বিচিক উয়ার উপযুক্ত দেহা দান করি থাকে।

৩৯ মনে কর, সউগ প্রাণীর মসং একে নাকান না হয়, মানষির মসং এক নাকানের, পশুর মসং আরেক নাকানের, পখিলার মসং অইন্য নাকানের।

৪০ আর স্বর্গের যেমন দেহালা আছে, তেমন জাগতিক দেহালাও আছে। স্বর্গের দেহালার তেজ এক নাকানের, জাগতিক দেহালার তেজ অইন্য নাকানের

৪১ বেলার তেজ এক নাকানের, চানের তেজ অইন্য নাকানের, আর তারালার তেজ আরেক নাকানের। তেজের দিক দিয়াও একটা তারা আর একটা তারার থাকি আলদা।

৪২ মরালার বত্তি ওঠা ঠিক একে নাকানের। দেহা সমাধিত দিলে তা নষ্ট হয় যায়, কিন্তু সেই দেহা এমন অবস্থাত বত্তে তোলা হবে আর কোন দিনও নষ্ট হবার না হয়।

৪৩ যে দেহা সমাধিত দেওয়া হয় তার কোন সন্মান থাকে না, কিন্তু মহিমার নগত বত্তে তোলা হবে। দুর্বল অবস্থায় সমাধিত দেওয়া হয়, শক্তিমান অবস্থায় ফির বত্তে তোলা হয়।

৪৪ যে দেহা সমাধিত দেওয়া হবে তা হবে জাগতিক দেহা, আর যে দেহা ফির বত্তে তোলা হবে সেইটা হবে আত্মিক দেহা।

৪৫ শাস্ত্রত তো এই নাকান নেখা আছে, “পইলা মানষি আদম জীবন্ত প্রাণী হইলেক।” আর শেষ আদম (মানে যীশু) জীবন দানকারী আত্মা হইলেক।

৪৬ যেইটা আত্মিক সেইটা পইলা না হয়, যেইটা জাগতিক সেইটা পইলা, আর যেইটা আত্মিক সেইটা পাছত আইসে।

৪৭ পইলা মানষি আদম আসিলেক দুনিয়ার ধূলা থাকি, সেই দুতিয়া মানষি আসছিলেক স্বর্গ থাকি।

৪৮ দুনিয়ার মানষিলা সেই মাটির গড়া মানষি আদমের মত, আর যায় যায় স্বর্গত যাবে উমরা স্বর্গের মানষি যীশুর মত।

৪৯ হামরা যেই নাকান মাটির মানষির আকার পাইচি, ঠিক তেমনি স্বর্গের মানষির আকারও পামো।

৫০ হে মোর ভাই বইনিলা মুই যা কবার ধরচুং সেইটা হইলেক, কোন মানষি উয়ার অক্ল-মসং এর দেহা নিয়া ভগবানের শাসন ব্যবস্থার অধিকারী হবার পারে না। যেইলা নষ্ট হয় যাবে, সেইলা এমন কিছুর অধিকারী হবার পায় না যা নষ্ট হবার না হয়।

৫১ মুই তোমারলাক একটা গোপন সচাং কতা কং শোন। হামরা সগায় যে মরি যামু এমন না হয়, কিন্তু বদলি যামু।

৫২ এক মুহূর্তের মইন্ধে, চোখুর পলকে, শেষ সমায়ের শিংগা র আওয়াজের সঙ্গে সঙ্গে হামরা সগায় বদলি যামু। সেই শিংগা যেলা বাজিবে সেলা মরলা এই নাকান করি বত্তি উঠিবে উমরা আর কোন দিনও মরির না হয় আর হামরাও অইন্য আকার ধরিমু।

৫৩ কেনেনা এই নষ্ট হওয়া দেহাক এমন নয়া কাপড় পেন্দার নাকান নয়া আকার দিবার নাগিবে যা কোন দিন নষ্ট হবার না হয়, মরিবারো না হয়।

৫৪ এই নষ্ট হওয়া দেহা পুরান কাপড়ের নাকান খুলিয়া ফ্যেলেয়া নষ্ট না হওয়া দেহা নয়া কাপড়ের নাকান যেলা পিন্দিবে, আর মরিবে না, সেলা শাস্ত্রের এই নেখা সচাং হবে,

৫৫ “মরণ তোর জয় কোটে? মরণ তোর হল কোটে?”

৫৬ মরণের হল হইলেক পাপ আর পাপের শক্তিই আইন কানুন।

৫৭ কিন্তু ভগবানক ধন্যবাদ, হামারলাক প্রভু যীশুর মইন্ধো দিয়া জয়ী করিচে।

৫৮ এই বাদে হে মোর আদরের ভাই বইনিলা শক্ত হয়া খাড়া হও, কোন কিছুই যাতে তোমারলাক নড়ের না পারে। প্রভু যীশুর কামত নিজক একেবারে সাঁপে দেও, কেনেনা তোমরা জানেন উয়ার কামত তোমারলার প্রশ্রম ফলহীন হবার না হয়।

১৬ এলা মুই ভগবানেরে মানষিলাক সাহায্য দিবার বাদে চান্দা তুলিবার বিষয় কবার ধরচুং। গালাতীয়া প্রদেশের সমিতির মানষিলাক যেমন করিবার কইচুং তোমরাও তেমন কর।

২ তোমরালা সগায় তোমারলার আয় অনুসারে কিছু খুইয়া পতি রবিবারের বাদে জমা কর। তাইলে মুই যেয়ো আসিম সেয়ো যাতে চান্দা তুলির না নাগে।

৩ মুই যেয়ো তোমারলার ওটেকোনা আসিম সেয়ো তোমারলার জমা করা দান যিরুশালেমত নিয়া যাবার বাদে তোমরা যাক যাক যোগ্য মনে করেন, মুই চিঠি নেখি উমাকে দিয়া পেঠাইম।

৪ আর মোর যাওয়া যদি দরকার মনে করেন তাইলে মুই উমার সোদে যাইম।

৫ মুই ম্যাসিডোনিয়া প্রদেশ হয়া যাবার সিদ্ধান্ত নিচুং, ম্যাসিডোনিয়া দিয়া যাবার সমায় তোমারলার ওটেকোনা আসিম।

৬ মুই কিছু দিন তোমারলার ওটেকোনা থাকির পারং, যদি সম্ভব হয় গোটায় জারের কালটা কাটাইম। ইয়ার পাছত মুই তোমারলার ওটে থাকি যেটেকোনা যাইম তোমরা মোক আগেয়া দিবার পাবেন।

৭ যাত্রার সমায় মুই তোমারলার নগত খালি দেখা করির চাং না, ভগবানের ইচ্ছা হইলে বেশ কিছু দিন তোমারলার নগত থাকিম।

৮ পঞ্চাশত্তমীর পার্বনের দিন পর্যন্ত মুই ইফিষ গঞ্জত থাকিম।

৯ কেনেনা এটেকোনা যে কামের ফল পাওয়া যায় সেই নাকান কামের একটা মস্তবড় সুযোগ মোরটে আইসচে যদিও ম্যেলা মানষি বিরোধীতা করির ধরচে।

১০ ভাই তীমথিয় তোমারলার ওটেকোনা যাবার পারে, উয়াক আদর যতন করেন। দেখেন যাতে উয়ায় তোমারলার নগত নির্ভয়ে থাকির পারে। উয়ায়ও মোর নাকান প্রভুর কাম করে, এই বাদে কাণ্ডো যেন উয়াক তুচ্ছ মনে না করুক।

১১ উয়াক তোমরা উয়ার যাত্রার সমায় শান্তিতে আগেয়া দেন, যাতে উয়ায় মোর এটে আসির পারে। উয়ায় অইন্য গুরুভাইলার নগত আসিবে এই বাদে মুই বাচ্ছে আছং।

১২ এলা মুই ভাই আপল্লোর সমন্ধে কং, মুই উয়াক অনেক কাউলা কাউলি করিচিনুং যাতে উয়ায় গুরুভাইলার নগত তোমারলার ওটে যায়। কিন্তু এলা উয়ার যাবার কোন ইচ্ছা নাই। উয়ায় সুযোগ পাইলে পাছত তোমারলার ওটে যাবে।

১৩ তোমরা সতর্ক থাকেন, বিশ্বাসে থির থাকেন, সাহসী আর বলবান হও।

১৪ তোমরালা যেইলায় করেন না কেনে পিরিতের মনোভাব নিয়া কর।

১৫ ভাইয়ের ঘর তোমরা জানেন, শ্রী স্তিফানের পরিবারের মানষিলা গ্রীস দেশত উমরায় পইলা যীশুর শিষ্য হয়। ভগবানের



মানষিলাক সেবা করির বাদে উমরা নিজক সঁপে দিচে।

১৬ এই বাদে তোমরা এই নাকান যায় প্রভুর সেবাত যুক্ত আছে,  
উমার নেতৃত্ব মানিয়া নেও।

১৭ মুই খুব খুশি কেনেনা স্তিফান, ফর্তুনাত আর আখাই ভাই  
আসিয়া তোমরালা না থাকির অভাব পূরণ করি দিচে।

১৮ উমরা মোর আর তোমারলার অন্তরত উৎসাহ জাগাইচে।  
তোমরা এই নাকান মানষিলাক সন্মান কর।

১৯ এশিয়া প্রদেশের সমিতির মানষিলা তোমারলার মঙ্গল কামনা  
করির ধরচে। ভাই আকিলা আর বইনি প্রিক্সিল্লা উমার বাড়িত যায়  
যায় প্রার্থনা করির আইসে, সগায় তোমারলার মঙ্গল কামনা  
করির ধরচে।

২০ সউগ গুরু ভাই-বইনিলাও তোমারলার মঙ্গল কামনা করির  
ধরচে। তোমরা একে অপরক পিরিতের মনভাব নিয়া মঙ্গল  
কামনা জানান।

২১ মুই পৌল নিজের হাতে চিঠির শেষ মঙ্গল কামনা জানালুং।

২২ কাণ্ডো যদি প্রভুক পিরিত না করে উয়ার উপরত অভিশাপ  
নামিয়া আসুক। হে হামারলার প্রভু আইস!

২৩ প্রভু যীশুর আশুবাদ তোমারলার নগত থাকুক।

২৪ তোমারলার সগারে বাদে মোর খ্রীষ্টিয় পিরিত রইলেক॥

## ২ করিন্থীয়

১ মুই পৌল, ভগবানের ইচ্ছায় মোক যীশু খ্রীষ্টের এক জন খবরিয়া বানাইচে। মুই আর গুরুভাই শ্রী তীমথিয় দুইজনে এই চিঠি নেখিচি। করিন্থ গঞ্জের ভগবানের সমিতি আর গ্রীস দেশের সউগ ভগবানের মানষিলারটে হামরা নেখিচি।

২ হামারলার স্বর্গের বাবা ভগবান আর হামারলার প্রভু যীশু খ্রীষ্ট, তোমারলাক দয়া আর শান্তি দান করুক।

৩ হামারলার প্রভু যীশু খ্রীষ্টের ভগবান আর স্বর্গের বাপের মহিমা হউক। উয়ায় দয়াময় বাপ, উয়ায় সউগ সান্তনা দাতার ভগবান।

৪ উয়ায় হামারলাক সউগ দুঃখ-কষ্টের মইন্ধোত সান্তনা দেয়, যাতে উয়ারটে থাকি পাওয়া সান্তনা হামরা অইন্য মানষিলাক দুঃখ-কষ্টের সমায় দিবার পারি।

৫ যেমন যীশু খ্রীষ্টের দুঃখ-কষ্ট হামারলার উপরত উথলি পড়িচে, তেমন যীশুর মইন্ধো দিয়া সান্তনাও হামারলারটে উথলি পড়ে।

৬ হামরা যদি কষ্ট পাই সেইটা হইলেক সান্তনা আর মুক্তির উদ্দেশ্যে। আর যদি সান্তনা পাই সেইটা হইলেক তোমারলার সান্তনার উদ্দেশ্যে। এই সান্তনা হামারলার নাকান তোমারলাকও একে নাকান শক্তি আর ধৈর্য যোগান দেয়।

৭ তোমারলার সমন্ধে হামারলার থির বিশ্বাস আছে, কেনেনা তোমরালা যেই নাকান হামারলার কষ্টের ভাগী সেই নাকান হামারলার সান্তনারও ভাগী।

৮ ভাই-বইনিলা, এশিয়া প্রদেশত রবার সমায় হামার যে কষ্ট হইছিলেক, সেইটা তোমারলাক জানেবার চাবার ধরচুং। ওটেকার দুঃখ-কষ্ট হামারলার সহ্যের বায়রা আছিলেক, হামরা বাঁচির আশা ছাড়ি দিচিলং।

৯ হামরা ভাবছিলং যে, এইবার হামরা নিশ্চয় মরিমো। কিন্তুক এই অবস্থায় হামরা যাতে নিজের উপরাত নির্ভর না করিয়া ভগবানের উপরত নির্ভর করি, কেনেনা ভগবান মরা মানষিক বত্তে তোলে।

১০ উয়ায় হামাক ভয়ংকর মরণের হাত থাকি রক্ষা করিচে আর এলাও করিতে আছে। হামরা উয়ার উপরত আশা থুই যে, উয়ায় সউগ সমায় হামারলাক রক্ষা করিবে।

১১ আর তোমরালাও হামারলার বাদে প্রার্থনা করি হামারলাক সাহায্য করো। তাইলে মেয়ো মানষির প্রার্থনার ফলে হামরা যে আশুর্বাদ পামো, উয়ার দরুন হামার বাদে মেয়ো মানষি ভগবানক ধন্যবাদ দিবে।

১২ হামরা গর্ব করি, হামারলার বিবেক এই সাক্ষ্য দিবার ধরচে যে, ভগবানের দেওয়া পবিত্রতা আর সাদাসিদা মনে হামরা যেইলা মানষির মইন্ধোত, বিশেষ করি তোমারলার পতি যে আচরন করি

আসির ধরটি। এই জীবন জগতের জ্ঞান বুদ্ধি ব্যবহার করি নাই হয়। এইটা হইচে ভগবানের দয়ার গুণের চালনায়।

১৩-১৪ তোমরা যেইটা পড়ির আর বুঝির পান, সেইটায় হামরা সহজ সরল করিয়া নেখিলং। মুই আশা করং, তোমরালা এক দিন হামারলাক ভাল করি জানির পাবেন। যদিও তোমরালা এলা অল্প জানির পাইচেন। যাতে প্রভু যীশু আইসার দিনত তোমরালা যেমন হামারলার গর্বের বিষয় তেমন হামরাও তোমারলার গর্বের বিষয় হমো।

১৫ এই কতা যে সচাং সেইটা পুরাপুরি বিশ্বাস করিয়া আগতে তোমারলারটে যাইম কয়া ঠিক করিচুং, যাতে তোমরালা দ্বি গুণ লাভ হয়।

১৬ মুই চাইছিলুং যে, ম্যাসিডোনিয়া যাবার সমায় তোমারলার নগত দেখা করি যাইম আর ওটে থাকি থাকি ফিরি আসির সমায় তোমারলার নগত আরো দেখা করিম। যাতে তোমরালা মোক যিহুদীয়াত পেয়েঠেবার ব্যবস্থা করির পারেন।

১৭ তোমরা কি মনে করেন কেনে মুই মোর পরিকল্পনা বদলাচুং? তোমরা কি মনে করেন মুই কোন তামসার মনভাব নিয়া এইটা ঠিক করিচুং? সাধারন মানষি যেই নাকান এলায় কয় “হা” আর এলায় কয় “না”। মুই কি ঐ নাকান করি কোন কিছু ঠিক করং?

১৮ ভগবান বিশ্বস্ত, এই কতা যেই নাকান সচাং সেই নাকান এইটাও সচাং যে, তোমারলারটে হামার কতা একে সমায় “হা” কইলে আর “না” হয় না।

১৯ ভগবানের বেটা যীশু খ্রীষ্টের কতা মুই, শিলাস, আর তীমথিয় তোমারলারটে প্রচার করিচিলুং, সেই যীশু খ্রীষ্ট একে সমায় দুই নাকানের কতা “না” আর “হা” কয় না। কিন্তুক যেইটা কয় সেইটায় হয়।

২০ ভগবানের সউগ কিরা খ্রীষ্টের মইন্ধো দিয়া “হা” হয়্যা ওঠে। সউগ কিরা খ্রীষ্টের মইন্ধো দিয়া পুরা হইচে। এই বাদে ভগবানের মহিমা করির জইন্যে হামরা “আমেন” কই।

২১ যায় হামারলাক খ্রীষ্টের নগত শক্ত করি খাড়া করি থুইচে, উয়ায়ে ভগবান। আর উয়ায় তোমারলাকও শক্ত করি তুলিচে, উয়ায় হামারলাক অভিষেক করিচে,

২২ মানে পবিত্র আত্মা উয়ার নিজের সম্পত্তি সরিক হিসাবে উয়ায় হামাক সীলমোহর দিয়া থুইচে; আর হামারলার অন্তর আত্মাক বায়না করি থুইচে।

২৩ মোর জীবন দিয়া মুই ভগবানক সাক্ষী থুইয়া কবার ধরচুং, শাস্তি থাকি তোমারলাক রেহাই দিবার বাদে মুই করিন্থ ফিরি যাং নাই।

২৪ মালিকের নাকান করি হামরা যে তোমারলার বিশ্বাসোত হাত দিবার ধরচি তা কিন্তুক না হয়, বরং তোমরালা যাতে আনন্দ পান

এই বাদে তোমারলার নগত সহকর্মীর মত কাম করির ধরচি, কেয়েনা বিশ্বাসে তোমরা শক্ত হয়া খাড়া হয়া আছেন।

২ তোমারলাক গালি না দিবার বাদে মুই মনে মনে ঠিক করিলুং, আর তোমারলাক মনত দুঃখ দিবার বাদে তোমারলারটে না যাইম।

২ কেয়েনা তোমারলাক যদি মুই দুঃখ দেয়, তাইলে মোক আনন্দ কায় দিবে? এক মাত্র তোমরায়, যায় যায় মোরটে দুঃখ পাইচেন।

৩ যেয়ো মুই তোমারটে যাইম, যার যারটে মোর আনন্দ পাবার কতা উমারলারটে থাকি মুই যাতে দুঃখ না পাং, এই বাদে মুই এই কতা আগতে নেখিচিলুং, তোমারলার উপরাত মোর বিশ্বাস আছে তোমরা যেইটাত আনন্দ পান সেইটাতে মোর আনন্দ।

৪ তোমারলাক মেয়ো গালি দিবার বাদে মোর দুঃখ আর মনের জ্বালা যন্তনায় মেয়ো চখুর জল ফেলেয়া মুই তোমারলাক নেখিচিলুং। মুই তোমারলাক দুঃখ দিবার বাদে নাই নেখং, বরং তোমারলার পতি মোর যে কত পিরিত, সেইটা জানেবার বাদে নেখিলুং।

৫ ঐ মানষি যদি মোক দুঃখ দিয়া থাকে, তাইলে উয়ায় খালি মোকে দুঃখ নাই দেয়, কিন্তু অল্প হইলেও তোমারলাকও সগাকে দুঃখ দিচে।

৬ তোমারলার বেশীর ভাগ মানষি মিলিয়া উয়াক যে শাস্তি দিচেন, সেইটায় উয়ার পক্ষে যথেষ্ট।

৭ বরং তোমারলার এলা ক্ষমা করি সান্তনা দেওয়া উচিত যাতে বেশী দুঃখে হাতাস না খায়,

৮ মুই তোমারলারটে বিশেষ করি মিনতি করং, উয়াক যে তোমরা পিরিত করেন সেইটা প্রমাণ করি দেখান।

৯ তোমরা মোর আগের নেখা কতা অনুসারে সউগ কিছু ঠিক করি মানেন কি না, এইলার সমন্ধে জানেবার বাদে তোমারলাক নেখিচিলুং।

১০ কোন ব্যাপারে যদি কাণ্ডাকো তোমরালা ক্ষমা করেন, তাইলে মুইও উয়াক ক্ষমা করিম। যদি ক্ষমা করার মত কোন কিছু থাকে, তাইলে যেইটা মুই করিচুং সেইটা খ্রীষ্টের নজরত তোমারলার ভালের বাদে করিচুং,

১১ যাতে শয়তান হামারলার উপরা কোন সুযোগ সুবিধা নিবার না পারে, উয়ার মতলবের কতা তো হামারলার অজানা না হয়।

১২ মুই ত্রোয়া গঞ্জত খ্রীষ্টের বিষয় ভাল খবর প্রচার করির যায়া দেখিলুং যে, ওটেকোনা প্রচার করির বাদে প্রভু মোক একটা সুযোগ করি দিচে।

১৩ কিন্তু তাণ্ডো মুই মনত শাস্তি নাই পাং, কেনেনা মোর ভাই তীত ওটেকোনা আছিলেক না। এই বাদে ত্রোয়া গঞ্জের মানষিলারটে বিদায় নিয়া মুই ম্যাসিডোনিয়া চলি গেলুং।

১৪ ভগবানক ধন্যবাদ যে, হামরা খ্রীষ্টের নগত যুক্ত হইচি বুলিয়া সউগ সমায় হামাক জয়ের ঘাটা দেখাইচে। খ্রীষ্টক জানাটা হইলেক সুগন্ধের মতন, এইটা হামারলার মইন্ধো দিয়া সউগ জাগাত ছড়িয়া যাবার ধরচে।

১৫ যায় যায় মুক্তি পাবার ধরচে আরো যায় যায় ধবংস হবার ধরচে, উমার আগত হামরা ভগবানের উদ্দেশ্যে খ্রীষ্টের সুগন্ধ ওয়ালা ধূপ।

১৬ যায় যায় হারেয়া যাবার ধরচে, উমারলারটে হামার গন্ধ হইলেক মরণের গন্ধ। যার ফল হইলেক জঘন্য মরণ। আর যায় যায় মুক্তি পাবার ধরচে, উমারটে হামরা সুগন্ধ, যার ফল হইলেক অমৃত জীবন। আর এই কামের যোগ্য কায়?

১৭ নিজেরলার লাভের বাদে মেয়ো মানষি ভগবানের বাইক্য নিয়া ব্যবসা করে, হামরা ঐ নাকান না হই। বরং হামরা খাটি অন্তর থাকি কতা কই কেনেনা হামরা খ্রীষ্টের নগত যুক্ত আছি, আর ভগবান হামারলাক দেখির নাগচে।

৩ হামরা এইলা কতা কয়া কি আরো নিজেরলার গুণগান করা শুরু করচি? কোন কোন মানষির পরিচয় জানিবার বাদে যেই নাকান চিঠি দরকার হয় থাকে, হামারলারও কি তোমারলারটে ঐ নাকানের চিঠির দরকার আছে? না, দরকার নাই।



২ কিন্তুক তোমরালায় হামার পরিচয়ের চিঠি, হামারলার অন্তরত নেখা আছে, যেইটা সউগ মানষিলা জানে আর পড়ির পাড়ে।

৩ তোমরালায় যে খ্রীষ্টের নেখা চিঠি আর হামারলার কামের ফল সেইটা বাকবাকা করি দেখা যায়। এই চিঠি কালি দিয়া নেখা নাই হয়, এইটা জীবন্ত ভগবানের আত্মা দিয়া নেখা হইচে। এইটা কোন শিলের স্লেটের উপরত নেখা নাই হয়, মানষির অন্তরত নেখা হইচে।

৪ হামরা সউগ বিষয়ে নিশ্চিত কেনেনা খ্রীষ্টের মইন্দো দিয়া ভগবানের পতি হামারলার বিশ্বাস মজবুত হইচে।

৫ কিন্তু ইয়ার মানে এই না হয় যে, হামরা নিজেই নিজের যোগ্যতা দিয়া এই কাম করির পারি কিন্তুক ভগবান থাকি এই শক্তি আইসে।

৬ উয়ায় হামারলাক নয়া চুক্তি জানেবার জইন্যে হামারলাক যোগ্য করি তুলিচে। এই চুক্তি অক্ষরে অক্ষরে পালনের ব্যাপার না হয়। কিন্তুক পবিত্র আত্মার পরিচালনায় অন্তর দিয়া মানি চলার ব্যাপার, কেনেনা পুরানা চুক্তি হইলেক মরণ আর পবিত্র আত্মা জীবন দান করে।

৭ শিলোত নেখা যে চুক্তির ফলে মরণ আইসে, যদিও সেই নিয়ম দিবার সমায় ভগবানের মহিমা প্রকাশ পাইছিলেক। ইয়াতে মোশির মুখও ভগবানের মহিমায় ভইভইয়া হইছিলেক। এই বাদে

ইজ্রায়েলী মানষিলা মোশির মুখের ভিত্তি তাকের নাই পায়, কিন্তুক  
ঐ ভইভইয়া আলোর তেজ আস্তে আস্তে কমি যাবার ধরছিলেক।

৮ এই চুক্তির ফল এত মহিমায় ভরপুর হবার পারে, তাইলে  
পবিত্র আত্মার কামের ফল কি আরো বেশী ভরপুর হবার পারে  
না?

৯ যেই চুক্তি দিয়া মানষিক দোষী কয়া সাব্যস্ত করা হয় উয়ার  
কাম যদি এত মহিমাত ভরপুর, তাইলে যে চুক্তি দিয়া মানষিক  
নির্দোষ কয়া মানি নেওয়া হয়, উয়ার কাম আরো কতয় না বেশী  
মহিমাত ভরপুর হবে!

১০ আর এইটা সচাং, আগত যেইটা মহিমায় ভরপুর আছিলেক,  
আসলে উয়ার এলা কোন মহিমা নাই, কেনেনা উয়ার তুলনায়  
এলাকার নয়া চুক্তির মহিমা মেলা অচানক।

১১ যেই নিয়ম-কানুন অল্প দিনে ধ্বংস হয় উয়ার মহিমার তেজ  
যদি এত ভইভইয়া হয়, তাইলে যেইটা চিরস্থায়ী উয়ার মহিমার  
তেজ আরো কতয় না বেশী ভইভইয়া হবে।

১২ হামারলার এই নাকানের আশা আছে বুলিয়া হামরা  
খোলাখুলি কতা কবার পারি।

১৩ হামরা মোশির নাকান না হই, মোশি তো নিজেই মুখ ঢাকা  
দিয়া খুবার ধরছিলেক যাতে ইজ্রায়েলী মানষিলা ভইভইয়া আলো  
দেখির না পারে। যে উয়ার মহিমার ভইভইয়া আলো আস্তে আস্তে  
কমি যাবার ধরছিলেক।

১৪ কিন্তু ঐ মানষিলার অন্তর পাষান আছিলেক। এই বাদে এলাও যেলা পুরান চুক্তির কতা পড়া হয় সেলা উমারলার অন্তরের উপরা একে নাকানের ঢাকনা দিয়া ঢাকা রয়ায় যায়, কেনেনা খালি খ্রীষ্টের নগত যুক্ত হইলেই ঐ ঢাকনা সারি যায়।

১৫ আজিও মোশির নিয়ম-কানুনের বইলা পড়িবার সমায় ইজ্রায়েলীলার অন্তর সেই ঢাকনা দিয়া ঢাকা থাকে।

১৬ কিন্তুক উমারলার মইন্দো থাকি কাণ্ডো যেলা প্রভুর ঘাটাত ফিরে সেলায় সেই ঢাকনা সারি যায়।

১৭ এই প্রভুই হইলেক পবিত্র আত্মা; আর যেটেকোনা পবিত্র আত্মা ওটেকোনায় স্বাধীনতা।

১৮ এই বাদে হামরা খ্রীষ্টের নগত যুক্ত হয় ঢাকনা খুলি ফেলাইচি। হামরা প্রভুর মহিমা দেখিয়া বদলি গেইচি আর যীশুর নাকান আকার ধারন করচি। আর এইটা প্রভুর কাম, মানে পবিত্র আত্মার শক্তিতেই এইটা হয়।

৪ হামরা ভগবানের দয়াতে এই নয়া ঘাটা প্রচারের ভার পাইচি এই বাদে হামরা নিরাশ না হই।

২ মানষি গোপনে যেইলা নইজ্জার কাম করে সেইলা হামরা একেবারে না করি। হামরা কোন কামত ছলনা না করি, ভগবানের কতার কোন পেচ না দেই, হামরা বরং ভগবানেরটে বাকবাকা করি পতিটা মানষির বিবেকেরটে হামার সত্যতা তুলি ধরি।

৩ হামার ভাল খবর যদি ঢাকা থাকে তাইলে যায় যায় ধবংস হয়।  
যাবার ধরচে খালি উমারলারটে ঢাকা থাকে।

৪ অবিশ্বাসী মানষিলার মন এই কালের অসুর কানা করি দিচে,  
যাতে উমরা ভগবানের রূপ নিয়া আইসা যে খ্রীষ্ট উয়ার মহিমার  
ভাল খবরের আলো উমরা দেখির না পারে।

৫ হামরা তো নিজের বিষয় প্রচার না করি বরং প্রচার করির  
ধরচি যে, যীশু খ্রীষ্টই প্রভু আর যীশুর বাদে হামরা তোমারলার  
চাকর হইচি।

৬ হামরা এই কতা প্রচার করির ধরচি কেনেনা উয়ায় কইচে,  
“আন্ধার জাগাত আলো হউক,” ঐ ভগবানেই হামারলার অন্তরত  
জ্ঞানের আলোর মহিমা জ্বলাইছিলেক, যেই আলোর মহিমা  
খ্রীষ্টের মইন্ধোত আছে।

৭ ভাবিয়া দেখ, দামী ধন নরম মাটির বাসনত থোয়া হইচে,  
হামরাও একে নাকান। ভগবানের দামী ধন এই নশ্বর মানষির  
মইন্ধোত থোয়া হইচে, যাতে মানষি বুঝির পারে যে, অসাধারণ  
মহাশক্তি হামার নিজেরলারটে থাকি নাই আইসে, এইটা  
ভগবানেরটে থাকি আসচে।

৮ হামরা সউগ পাক থাকি নানা নাকানের কষ্টের যন্তনার  
মইন্ধোত আছি তাঞো হামরা ভাঙি না পড়ি। হামরা জানিনা কি  
করিমু কিন্তুক হাল ছাড়ি দেই নাই।

৯ হামার উপরাত মানষিলা অইত্যাচার করিলেও ভগবান হামাক ছাড়ি নাই দেয়। মাটিত আছড়ে ফেলাইলেও হামরা ধবংস না হই।

১০ হামরা সউগ সমায় যীশুর নাকান এই দেহা মরণের মুখামুখি হবার ধরচি। যাতে হামার দেহার মইদ্বোত যীশুর জীবনও দেখা যায়।

১১ হামরালা বত্তি থাকিয়াও হামারলাক সউগ সমায় যীশুর বাদে মরণের হাতত সঁপে দেওয়া হবার ধরচে, যাতে হামার অক্ল মসং এর দেহাত শত দুঃখ ভোগের মইদ্বোত যীশুর দেওয়া শান্তি আর যীশুর জীবন হামার জীবনত দেখির পাবার ধরচে।

১২ এই নাকান করি হামারলার মইদ্বোত মরণ আর তোমারলার মইদ্বোত অমৃত জীবনের কাম করির ধরচে।

১৩ পবিত্র শাস্ত্রত নেখা আছে, “মুই বিশ্বাস করিচুং বুলিয়া কতা কবার ধরচুং।” একে নাকান বিশ্বাসের মনভাব নিয়া হামরাও বিশ্বাস করি বুলিয়া কতা কই।

১৪ কেনেনা হামরা জানি, পরম প্রভু যীশুক বত্তে তুলিচে, উয়ায় যীশুর নাকান হামারলাকও বত্তে তুলিবে। আর তোমারলার নগত হামারলাকও খ্রীষ্টের সামনাত হাজির করিবে।

১৫ সউগলায় তোমারলার উপকারের বাদে হবার ধরচে, যাতে ভগবানের যে দয়া মেয়ো মানষির উপরাত ঢালি দেওয়া হইচে, ঐ দয়ার বাদে মেয়ো মানষি আরো বেশী করি ভগবানের গুণগান করে, আর এই নাকান করি ভগবানের মহিমা হয়।

১৬ এই বাদে হামরা হতাশ না হই। যদিও হামার বায়রার দেহা ক্ষয় হবার ধরচে, তাঞো হামার অন্তর আত্মা দিনে দিনে নয়া হবার ধরচে।

১৭ এলা হামরা অল্পকালের বাদে খণিকের কষ্ট ভোগ করির ধরচি, ইয়ার ফলে হামরা চিরকালের মহিমা লাভ করিমু। এই মহিমা এত বেশী যে, সেইটা মাপা যায় না।

১৮ যেইলা দেখা যায় সেইলা না দেখিয়া বরং যেইলা দেখা না যায় সেইলার উপরাত হামরা নজর দেই। যেইলা দেখা যায় সেইলা অল্প দিনের কিন্তুক যেইলা দেখা না যায় সেইলা চিরদিনের।

৫ হামরা জানি যে, মানব দেহা নিয়া এই দুনিয়াত হামরা বসবাস করির ধরচি। সেই দেহা যদি নষ্ট হয় যায়, তাঞো ভগবানের দেওয়া একটা মানব দেহা আছে। এই দেহাটা মানষির হাতের বানা না হয়, সেইটা স্বর্গত চিরকাল ধরি আছে।

২ এই মানব দেহা থাকা অবস্থায় হামরা দীর্ঘনিঃশ্বাস ফেলের ধরচি আর সউগ অন্তর দিয়া চাবার ধরচি স্বর্গের পাওয়া সেই নয়া মানব দেহাত হামারলাক কাপড় পেন্দা হউক।

৩ কেনেনা হামরা স্বর্গের দেহা ধারন করিমু আর দেহা ছাড়া তো আত্মা থাকে না।

৪ এইটা সচাং, দুর্বল দেহা থাকা অবস্থায় হামার জীবনত বোঝা হইচে। এই ভারে হামরা দীঘনিঃশ্বাস ফেলের ধরচি। হামরা চাই না যে, দেহাহীন হই, হামরা ভগবানের দেওয়া নয়া দেহা দিয়া ঢাকা হবার চাই। যাতে হামার মরণের অধীনত থাকা দেহা চিরকালে বত্তা থাকা দেহায় বদলি যায়।

৫ ভগবান হামারলাক এই বাদে সিদ্ধজন করিচে আর অমৃত জীবনের জামিনদার হিসাবে পবিত্র আত্মাক দিচে।

৬ এই বাদে কোন সমায় হামারলার সাহসের অভাব হয় না। আর হামরা বুঝির পাই যত দিন হামরা এই মানব দেহাত বসবাস করিমু ততদিন ভগবানেরটে থাকি দূরত রমু।

৭ যেইটা দেখা যায় সেইটার দ্বারায় হামরা না চলি, বরং বিশ্বাসের দ্বারায় হামরা চলাফিরা করি।

৮ হামার নিশ্চিত ভরসা আছে এই দেহা ছাড়িয়া হামার আসল দেহাত প্রভুর সোদে থাকায় ভাল।

৯ এই বাদে হামরা মানব দেহাত বসবাস করি বা না করি, হামার আসল উদ্দেশ্য প্রভুক খুশি করা।

১০ কেনেনা হামারলাক সগাকে খ্রীষ্টের সামনাত বিচারের বাদে খাড়া হবার নাগবে। আর এই দেহা থাকিতে যেইলা বেয়া, ভাল কাম করচি উয়ার উপযুক্ত পাওনা পামো।

১১ প্রভুক সন্মান করি বুলিয়া নিজের সমন্ধে মানষির মনত বিশ্বাস জন্মের চেষ্টা করি, ভগবান হামার অন্তরের কতা ঝকঝকা

করি জানে, আর আশা করং, তোমরালাও এইটা জানেন।

১২ ইয়াতে হামরা তোমারলারটে নিজের গুণগান না করি, কিন্তুক হামারলার বাদে তোমারলাক গর্ব করির সুযোগ দিবার ধরটি। যাতে অন্তর না দেখিয়া, যায় যায় বায়রার চেহারা দেখি গর্ববোধ করে, উমারলাক তোমরা জবাব দিবার পারেন।

১৩ যদি হামরা পাগলা হয় থাকি তাইলে ভগবানের বাদেই হইচি, আর যদি সুস্থ হয় থাকি তাইলে তোমারলার বাদেই হইচি।

১৪ কেনেনা খ্রীষ্টের পিরিতের অধীনে বশ করিয়া হামারলাক চালের ধরচে, হামরা নিশ্চিত হয় বুঝির পাইচি যে, হামার জীবনের বাদে সগারে হয় এক জন মরিলেক। মানে হামার পুরান জীবনও মরিচে।

১৫ ভগবানের পরিকল্পনা অনুসারে উয়ায় সগার জইন্যে মরিলেক। যায় যায় বত্নায় আছে আর যায় উয়ার উপরত ভরসা রাখে উমরা নিজের বাদে না বত্নুক কিন্তু, উয়ারে বাদে বত্নুক যায় উমার বাদে মরিচে আর ফির বত্তি উঠিচে।

১৬ এই বাদে এলা থাকি মানষিক আর হামরা দুনিয়ার দৃষ্টিভঙ্গি নিয়া বিচার না করি। অবশ্য যীশুক এই নাকান করি আগত বিচার করছিলং, কিন্তুক এলা আর না করি।

১৭ যদি কাণ্ডো খ্রীষ্টের নগত যুক্ত হয় থাকে, তাইলে উয়ায় নয়া করি সিদ্ধজন হইলেক। উয়ার পুরান বিষয়লা সউগে মুছি যায় নয়া হয় উঠিচে।



১৮ এইলা সউগে ভগবান থাকি হয়। উয়ায় খ্রীষ্টের মইদ্বো দিয়া উয়ার নিজের সাথে হামারলাক মিলন করিচে, আর উয়ার নগত মিলন করির দায়িত্ব হামারলার উপরত দিচে।

১৯ ইয়ার মানে হইলেক, ভগবান মানষির পাপ না ধরিয়া, খ্রীষ্টের মইদ্বো দিয়া নিজের নগত দুনিয়াক মিল করিলেক, আর এই মিল হবার খবরের দায়িত্ব উয়ায় হামারলার উপরত দিচে।

২০ এই বাদে হামরা খ্রীষ্টের রাজদূত হিসাবে উয়ার হয়। কতা কবার ধরচি। আসলে ভগবান নিজেই হামারলার মইদ্বো দিয়া মানষিলারটে মিনতি করিচে। এই বাদে খ্রীষ্টের হয়। হামরা মিনতি করির ধরচি, “তোমরালাও ভগবানের সাথে মিল হন।”

২১ যীশু খ্রীষ্টের মইদ্বোত কোন পাপ আছিলেক না, কিন্তুক ভগবান হামারলার পাপ উয়ার উপরাত তুলি দিয়া উয়াকে পাপের জাগাত খাড়া করিলেক। যাতে খ্রীষ্টের নগত যুক্ত থাকিবার ফলে ভগবানের পবিত্রতা হামারলার পবিত্রতা হয়।

৬ ভগবানের সহকর্মী হিসাবে হামরা তোমারলাক আবদার করির ধরচি, তোমরালা যেহেতু ভগবানের দয়া পাইচেন, সেহেতু সেইটা নিস্বফল হবার না দেন।

২ ভগবান পবিত্র শাস্ত্রত কইচে, “সঠিক সমায়ে মুই তোমারলার কতা শুনিচুং আর মুক্তি পাবার দিনে মুই তোমারলাক সাহায্য

করিচুং।” মুই যেইটা কইম সেইটা শোন, এলায় সঠিক সময়, আজিই মুক্তি পাবার দিন।

৩ যীশু খ্রীষ্টের বাদে হামরা যেই কাম করি উয়ার যাতে নিন্দা না হয়, এই বাদে হামরা এমন কোন কাম না করি যার বাদে অইন্য মানষির মনত বাধা পাবার পারে।

৪ কিন্তুক হামরা সউগ বিষয়ে ভগবানের সেবাকারী হিসাবে নিজক প্রমাণ করি। অইত্যাচার, বিপদ আর কষ্টের মইদ্বো দিয়া ধৈর্য ধরি হামরা ইয়ার প্রমাণ দিবার ধরচি।

৫ কতবার হামারলাক মাইর, ডাং করা হইচে, কতবার জেলত দেওয়া হইচে, কত দাংগা-হাংগামা হামার উপরা দিয়া গেইচে, কত খাটাখাটনি করচি, কত রাতি হামরা নিন না পাড়ি কাটাচি, কত দিন না খায়া কাটাচি।

৬ এইলা ছাড়া হামারলার খাটি জীবন দিয়া, হামারলার জ্ঞান, সহ্যগুণ আর দয়া, পবিত্র আত্মার মইদ্বো দিয়া, আসল খাটি পিরিত দিয়া,

৭ সত্যের প্রচারের মইদ্বো দিয়া আর ভগবানের শক্তির মইদ্বো দিয়া হামরা প্রমাণ দিবার ধরচি যে, হামরা ভগবানের সেবাকারী। আরো দুই হাতত ন্যায়ের অস্ত্র তুলি নিয়া হামরা প্রমাণ করির ধরচি, হামরা ভগবানের সেবাকারী।

৮ মানষি হামাক সন্মান করুক বা না করুক, হামারলার বিষয়ে ভাল কউক বা বেয়া কউক হামরা প্রমাণ করি দিবার ধরচি যে,

হামরা ভগবানের সেবাকারী। মানষি হামাক ঠক কউক, কিন্তুক আসলে হামরা সত্যের ঘাটাত চলির ধরচি।

৯ কিছু মানষি হামারলাক খবরিয়া বুলিয়া চেনে না, কিন্তুক সগায় হামারলাক চেনে, হামরা মরার নাকান হবার ধরচি, তাঞো হামরা বত্তি আছি। হামারলাক মাইর, ডাং করা হবার ধরচে তাঞো মারি ফ্যেলা হবার ধরচে না।

১০ হামরা মেয়ো দুঃখ ভোগ করির ধরচি তাঞো হামারলার অন্তর আনন্দে ভরা। হামরা নিজে গরীব, তাঞো হামরা মেয়ো মানষিক ধনী করচি। হামারলার কিছুই নাই তাঞো হামরা সউগ কিছুর অধিকারী। এই নাকান করি হামরা প্রমাণ করির ধরচি হামরা ভগবানের সেবাকারী।

১১ হা বাহে করিন্ত গঞ্জের গুরু ভাই-বইনিলা, হামরা তোমারলারটে খোলাখুলি কতা কবার ধরচি আর হামারলার অন্তর তোমারলার বাদে খুলি দেওয়া হইচে।

১২ তোমারলার পতি হামারলার অটেল পিরিত আছে, কিন্তুক তোমরা তোমারলার পিরিত থাকি হামারলাক দূরত থুইচেন।

১৩ মোর ছাওয়া হিসাবে মুই তোমারলাক কবার ধরচুং, হামরা যেই নাকান করি তোমারলার বাদে হামারলার অন্তর খুলি থুইচি তোমরাও একে নাকান করি তোমারলার অন্তর হামারলার বাদে খুলি দেও।

১৪ যায় যায় প্রভু যীশুর শিষ্য নোয়ায়, এই অসমান যোঙালির সোদে তোমরালা যুক্ত না হন, কেনেনা ন্যায় আর অন্যায়ের মইন্ধোত কোন যোগাযোগ থাকির পারে না। আলোর নগত আন্ধারের কোন যোগাযোগ থাকির পারে না।

১৫ খ্রীষ্টের নগত অসুর মানে শয়তানের মিল কোটে? ভগবানের মানষি হিসাবে শিষ্যের যে অধিকার, তাতে যায় শিষ্য নাই হয় উয়ার কি সম্পর্ক?

১৬ ভগবান থাকির ঘরত প্রতিমার থান কোটে? হামরায় তো জীবন্ত ভগবানের মন্দির। পবিত্র শাস্ত্রত ভগবান কইচে, “মুই মোর মানষিলার মইন্ধোত বসবাস করিম, উমারলার নগত চলাফিরা করিম। মুই উমারলার ভগবান হইম, আর উমরা মোর নিজের মানষি হবে।”

১৭ প্রভু আরো কইচে, “এই বাদে যায় শিষ্য নাই হয় উমারলার মইন্ধো থাকি বাইর হয় আসিয়া যুদা হন। কোন ছুয়া জিনিস না নারেন, তাইলেই মুই তোমারলাক মানিয়া নিম।

১৮ এইলা ছাড়াও সর্বশক্তিমান প্রভু কয়, “মুই তোমারলার বাপ হইম আর তোমরা মোর বেটাবেটি হবেন।”

৭ মোর পরানের সখালা, হামারলার বাদে ভগবান যেইলা প্রতিজ্ঞা করিচে এই বাদে তোমরালা আইসো, হামারলার দেহা

আর অন্তরের সউগ অশুদ্ধি থাকি নিজেরলাক শুদ্ধি করি, আর ভগবানের পতি ভক্তিপূর্ণ ভয়ে পবিত্রতার ঘাটাত আগে যাই।

২ তোমারলার অন্তরত হামারলার বাদে জাগা কর। হামরা তো কাঙোরো পতি অন্যায় করি নাই। কাঙোরো ক্ষতি করি নাই, কাঙোকো ঠকাইও নাই।

৩ এই কতলা মুই তোমারলাক দোষী করির বাদে না কং। মুই তো আগতে কইচুং, তোমরালা মোরটে এত আপন যে হামরা মরিমো তো এক সাথে মরিমু আর বত্তিমু তো এক সাথে বত্তিমু।

৪ তোমারলার উপরাত মোর খুব ভরসা আছে আর তোমারলার বাদে মুই গর্ব করির ধরচুং, হামারলার সউগ নাকানের দুঃখ-কষ্টের মইদ্বোত মুই শান্তিতে ভরপুর হয়। আনন্দে উথুলি পরির ধরচুং।

৫ ম্যাসিডোনিয়াত পৌছিয়া হামরা জিরিবার পাই নাই সউগ পাক থাকি কষ্ট পাইচুং, চাইরো পাকে আছিলেক গন্ডগোল আর অন্তরত আছিলেক ভয়।

৬ কিন্তুক ভগবান, যায় দুঃখী মানষিলাক সান্তনা দেয়, উয়ায় শ্রী তীত আইসার মইদ্বো দিয়া হামারলাক সান্তনা দিচে।

৭ খালি তীতের আইসায় না হয়, তীত নিজে তোমারলার মইদ্বো দিয়া সান্তনা পাইচে বুলিয়া মুইও সান্তনা পাইচুং। উয়ায় সেলো কইলেক, মোক কত দেখির চান, তোমরালা এলা শোক করিয়া বুঝির পাইচেন যে তোমরা মোর সোদে ভাল ব্যবহার করেন নাই

এই বাদে মুই খুশি। আর মোর উপরত আস্তা থুইচেন এই বাদে মুই খুব আনন্দ পাইচুং।

৮ যদিও মুই মোর চিঠি খানের মইদ্বো দিয়া তোমারলাক দুঃখ দিচিলুং, তাঞো মুই খুব দুঃখ নাই পাং, কেনেনা সেই চিঠির মইদ্বো দিয়া তোমরালা চেতনা পাইচেন, এই বাদে মুই খুব খুশি।

৯ তোমরা দুঃখ পাইচেন বুলিয়া মুই খুশি নাই হং, বরং তোমরালা দুঃখ পায়া পাপের ঘাটা থাকি মন ঘুরাইচেন বুলিয়া খুশি হইচুং। ভগবানের ইচ্ছা মতন তোমরালা এই দুঃখ পাইচেন এই বাদে হামারলার মইদ্বো দিয়া তোমারলার কোন ক্ষতি নাই হয়।

১০ ভগবান যে দুঃখ দেয় তারে বাদে পাপের ঘাটা থাকি ভাল ঘাটাত মন ঘোরে, আর ইয়ার ফলে পাপ থাকি মুক্তি পাওয়া যায়। ইয়াতে দুঃখ করির আর কোনয় না রয়, কিন্তুক দুনিয়ার দেওয়া দুঃখ মরণ ডেকে আনে।

১১ চিন্তা ভাবনা করি দেখ, ভগবানের দেওয়া দুঃখের ফলেই তোমারলার অন্তরত এইলা দেখা গেইচে, তোমারলার নির্দোষ প্রমাণ করির বাদে কত আগ্রহ দেখাইচেন। তোমরালা পাপক কত ঘিন করির ধরছিলেন, মনত কত ভয় জাগছিলেক, হামারলাক দেখির বাদে কত ইচ্ছা হইছিলেক, কত চিন্তা-ভাবনা করির ধরছিলেন, তোমারলার মনত কত দরদ দেখা গেইচে, অন্যায়ক শাস্তি দিবার বাদে তোমারলার কত ইচ্ছা হইছিলেক, সউগ কিছুতেই তোমরালা প্রমাণ করিচেন, তোমরালা নির্দোষ।

১২ মুই তোমারলারটে চিঠি নেখিচুং, কিন্তুক যায় অন্যায় করিচে আর যার উপরাত অন্যায় করা হইচে উমার বাদে নাই নেখং। কিন্তুক এই বাদে নেখিচুং, ভগবানের আগত তোমরালা দেখিয়া বুঝির পান যে তোমরা সচাংএ হামারলাক পিরিত করেন।

১৩ হামরা সান্তনা পাইচি আর তীতের খুশি দেখি হামরাও খুব খুশি হইচি আর তীতও তোমারলারটে থাকি যথেষ্ট শান্তি পাইচে।

১৪ মুই খুশি হইচুং, তীত যাওয়ার আগতে মুই যেইলা কইছিলুং সেইলা সচাং বুলি প্রমাণিত হইচে, ইয়াতে মোক নইজ্জাত পড়ির নাই নাগে। তোমারলারটে কওয়া হামারলার কতা যেই নাকান সচাং আছিলেক, একে নাকান তীতেরটে তোমারলাক নিয়া হামারলার গর্ব সচাং বুলিয়া প্রমাণ হইচে।

১৫ তোমরা সগায় উয়াক কি নাকান মানিচেন, কি নাকানের সন্মানের নগত ভয় করিচেন, এইলা ফম করিয়া তোমারলার পতি উয়ার পিরিত আরো বাড়ি গেইচে।

১৬ এই বাদে মুই খুব খুশি, কেনেনা মুই সউগ ব্যাপারে তোমারলার উপরাত ভরসা করির পাং।

৮ ভাই-বইনিলা, ম্যাসিডোনিয়ার খ্রীষ্ট সমিতিলা ভগবানেরটে থাকি যে দয়া পাইচে, এই বিষয়ে হামরা তোমারলাক জানেবার ধরচি।

২ ম্যেলা দুঃখ-কষ্ট ভোগ করির মইন্ধো দিয়া যদিও উমারলাক খুব যাচাই করা হবার ধরছিলেক, আর উমরা খুব গরীব আছিলেক, তাএগা উমারলার মনত এত আনন্দ আছিলেক যে, উমরালা খোলা মনে দান করির ধরছিলেক।

৩ মুই উমারলার হয়্যা এই সাক্ষ্য দিবার ধরচুং যে, উমরা নিজের ইচ্ছায় সাধ্যমত, এমন কি সাধ্যেরও বেশী দান করছিলেক।

৪ উমরা আকুল হয়্যা হামারটে আবদার করিলেক, যেই ভগবানের মানষিলা অভাবের মইন্ধোত আছে, যিরুশালেম এর ভগবানের মানষিলার অভাব দূর করির বাদে উমরা যাতে এই কামত যোগ দিবার সুযোগ পায়।

৫ হামরা যেইটা আশা করচি উয়ার চায়া বেশী দান করিচে, পইলা উমরা নিজের জীবন প্রভুরটে সঁপে দিচে তার পাছত হামারলাক দিচে। ভগবান যেই নাকান চাইছিলেক উমরা ঐ নাকানে করে।

৬ এই দেখিয়া তীতক বিশেষ করিয়া আবদার করচি, দান করিবার কাম উয়ায় উমারলার মইন্ধোত আরম্ভ করিচে, সেইটা যাতে তোমরালা শেষ করেন আর তীত সেই ব্যাপারে তোমারলাক উৎসাহ দিবো।

৭ তোমরা সউগ বিষয়ে যেমন উথুলি পরির ধরচেন, মানে বিশ্বাসোত, ভগবানের বিষয়ে কবার ক্ষমতা, জ্ঞান, আগ্রহ আর



হামারলার পতি পিরিত, ঠিক একে নাকান দান করার গুণটাও  
যাতে তোমারলার উথুলি পড়ে।

৮ এই কতালা মুই আদেশ হিসাবে নাই কং, কিন্তু অইন্যের  
আগ্রহের উপমা দিয়া তোমারলার পিরিত সঠিক কিনা, সেইটা  
যাচাই করি দেখির চাং তোমারলার পিরিত কত খাটি।

৯ তোমরা হামার প্রভু যীশু খ্রীষ্টের দয়ার দানের কতা জানেন,  
উয়ায় ধনী হয়্যাও তোমারলার বাদে গরীব হইলেক, যাতে তোমরা  
উয়ার গরীব হওয়ার মইন্ধো দিয়া ধনী হবার পারেন।

১০ তোমারলার পক্ষে যেইটা ভাল সেই সমন্ধে মুই মোর মতামত  
জানবার ধরচুং। যাওয়া বছর এই চান্দা তোমরায় পইলা তুলির  
শুরু করছিলেন। আর ঐ কামের মইন্ধোত তোমারলার খুব আগ্রহ  
দেখা গেইছিলেক,

১১ এলায় সেই কাম শেষ কর। তোমরা যেই আগ্রহ নিয়া কাম  
করা আরম্ভ করছিলেন, তোমরা একে নাকানের আগ্রহ নিয়া  
তোমারলার সাধ্য মতন, সেই অনুসারে শেষ কর।

১২ যদি কারো দান দিবার ইচ্ছা থাকে তাইলে উয়ার যা আছে  
সেই হিসাবে দান করিলে ভগবান উয়ার দান সন্তুষ্ট হয়্যা নেয়।  
উয়ার যা নাই উয়ার বেশী যাতে না হয়।

১৩ মুই না চাং অইন্য মানষিলা সুখে রয় আর তোমরালা কষ্টত  
রন। মুই চাং যাতে তোমরালা সগারে অবস্থা সমান রয়।

১৪ বর্তমানে তোমারলার বেশী আছে উয়ার দিয়া উমারলার অভাব মিটিবে যেলা উমারলার বেশী হবে সেলা উমরালা তোমারলার অভাব মিটাবে। এই নাকান করি সগারে অবস্থা সমান হবে।

১৫ পবিত্র শাস্ত্রত নেখা আছে, “যায় যায় মেলা কুড়াইলেক উমারলার বেশী নাই হয়, আর যায় যায় অল্প কুড়াইলেক তাণ্ডো উমারলারও অভাব নাই হয়।”

১৬ তোমারলার বাদে মোর অন্তরত যে আগ্রহ আছে, ঠিক একে নাকান আগ্রহ ভগবান তীতের অন্তরত দিচে, এই বাদে মুই ভগবানক ধন্যবাদ দেয়ং।

১৭ তীত হামারলার আবদার মানি নিচে, উয়ার চায়াও বড় কতা হইলেক যে, উয়ায় নিজের ইচ্ছায় খুব উৎসাহ নিয়া তোমারলারটে যাবার ধরচে।

১৮ তীতের সোদে হামরা আর এক ভাইয়োক পেয়েঠেবার ধরচি। যীশু খ্রীষ্টের ভাল খবর প্রচারের কামত সউগ সমিতির মানষিলা এই ভাইয়ের গুণগান করে।

১৯ উয়ায় ভগবানের আশুর্বাদ পাবার আর হামারলার সহকর্মী হিসাবে সমিতিলা উয়াক বাছাই করিচে, যাতে প্রভুর মহিমা হামারলার কামের মইন্ধো দিয়া দেখা যায়।

২০ এই মহৎ দান বিলি করির ব্যপারে কাণ্ডো যেন হামারলার বিরুদ্ধে কোন কবার না পারে এই বাদে এই ভাইয়োক পেয়েঠেবার

ধরচি।

২১ হামরা খালি প্রভুর আগত না হয়, কিন্তুক মানষির আগতও সৎ ভাবে চলিবার ধ্যান দেই।

২২ তাছাড়াও উমারলার নগত হামরা হামার আর এক ভাইয়োক প্যেঠের ধরচি, উয়ার যে উৎসাহ সেইটা উয়ায় মেলাবার মেলা ব্যাপারে হামারলারটে প্রমাণ করিচে। এলা তোমারলার উপরাত খুব বিশ্বাস হইচে, এই বাদে উয়ায় ভরসা করির পাইচে।

২৩ তীতের সমন্ধে এলা যেইটা মোর কবার আছে সেইটা হইলেক এই, উয়ায় মোর সঙ্গী আর উয়ায় মোর নগত তোমারলার বাদে কাম করে। আর অইন্য ভাইলার সমন্ধে মোর যেইটা কবার আছে, সেইটা হইলেক এই সমিতিলা উমারলাক বাছাই করি নিয়া প্যেঠেবার ধরচে। এই ভাইলার মইন্দো দিয়া প্রভু যীশুর মহিমা হউক।

২৪ এই বাদে কবার ধরচুং তোমারলার পিরিত প্রমাণ কর। তোমারলার উপরাত হামারলার গর্বের কারন, এই দুই বিষয়ে প্রমাণ দেখাই যাতে সউগ সমিতিলা দেখির পারে।

৯ যিরুশালেমের গুরু ভাই-বইনিলার বাদে দান দিবার যে কাম চলছে, সেই সমন্ধে তোমারলারটে নেখিবার কোন দরকার নাই,

২ কেনেনা তোমারলার উৎসাহ সমন্ধে মোর জানা আছে। মুই তোমারলাক নিয়া ম্যাসিডোনিয়ার মানষিলারটে এই কয়া গর্ব

করং যে, যাওয়া বছর থাকি গ্রীসের মানষিলা, মানে তোমরালা দান দিবার বাদে সাজি আছেন। তোমারলার এই আগ্রহ ম্যাসিডোনিয়ার মানষিলাকও উৎসাহ দিচে।

৩ মুই তীত আর এক ভাইয়োক পেয়েঠেবার ধরচুং, তোমারলাক নিয়া হামারলার যে গর্ব সেইটা যাতে সচাং প্রমাণ হয়, মুই যেই নাকান উমাক কইচুং সেই নাকান তোমরা সাজি রন।

৪ না হইলে ম্যাসিডোনিয়ার গুরু ভাই-বইনিলা যদি মোর নগত যায়া দেখে যে, তোমরা সাজিয়া রওয়া নাই, তাইলে তোমারলার পতি যে বিশ্বাস, সেইটা তোমার আর হামার সগারে নইজ্জার ব্যাপার হবে।

৫ এই বাদে ভাইলাক আবদার করি কইলুং, তোমারলার ওটেকোনা আগত যাওয়া দরকার। আর দান হিসাবে যেই টাকা দিবেন কইছিলেন, সেই দান জোগার করি সাজি থাকির পারেন। সেই দান যাতে সইচ্ছায় হয়, জোর করি আদায় করা চান্দার টাকা না হয়।

৬ ফম থোন, যায় অল্প বিচন ফ্যেলায় উয়ায় অল্পয় ফসল কাটিবে, আর যায় বেশী বিচন ফ্যেলায় উয়ায় বেশী ফসল কাটিবে।

৭ সগায় নিজ নিজ অন্তরত যেই নাকানের ঠিক করি থুইচে, সেই নাকানে যাতে দান দেয়। কাণ্ডো যাতে অইন্যর চাপে, অনিচ্ছায়

দান না করে। কেনেনা যায় খুশি মনে দান করে, ভগবান উয়াক পিরিত করে।

৮ তোমারলাক সউগ কিছু দিয়া আশুর্বাদ করির ক্ষমতা ভগবানের আছে, যাতে তোমারলার সউগ কিছুই সউগ সমায় রয়। আর ইয়াতে তোমরালা সউগ নাকানের ভাল কামের বাদে, বেশী করি খোলা মনে দান করির পারেন।

৯ পবিত্র শাস্ত্রত নেখা আছে, “যায় সইচ্ছায় গরীবলাক দান করির ধরচে, উয়ার এই সৎকাম, সউগ সমায় সগায় ফম করিবে।”

১০ ভগবান চাষীর বাদে বিচন আর আহারের যোগান দেয়, উয়ায় তোমারলাক বিচন ছিটির বাদে বিচন যোগাবে, আরো বেশী বেশী করি দিবে। তোমারলার ভাল কামের ফল আরো মেয়ো গুণ হবে।

১১ ভগবান তোমারলাক সউগ পাক থাকি আশুর্বাদ করিবে, যাতে তোমরা খোলা মনে দান করির পারেন। আর হামারলার মইন্ধো দিয়া তোমারলার এই দান যেয়ো গরীব মানষিলা পাবে, সেয়ো উমরা ভগবানক ধন্যবাদ দিবে।

১২ তোমারলার সেবা কামের মইন্ধো দিয়া ভগবানের মানষিলা য়েইলা দরকার, সেইলা পূরণ করির ধরচেন। খালি এইটায় না হয়, মেয়ো মানষি আনন্দে ভগবানক ধন্যবাদ দিবে।

১৩ তোমরা খ্রীষ্টের বিষয় ভাল খবর বিশ্বাস করিয়া উয়ার বাধ্য হইচেন। আর তোমরালা খোলা মনে সগাকে দান করির ধরচেন। তোমরালা যে বিশ্বস্ত, তোমারলার এই দান করা সেইটা প্রমাণ করিবে। আর এই দেখিয়া উমরালা ভগবানের গুণগান করিবে।

১৪ ভগবানেরটে থাকি তোমরালা যে বিশেষ দয়া পাইচেন, তারে বাদে উমরা মনপরাণ দিয়া প্রার্থনা করিবে।

১৫ যেই দানের কতা ভাষায় কয়া শেষ করা না যায়, ভগবানের সেই দানের বাদে ধন্যবাদ হউক।

১০ রাজা যীশুর নম্র আর দয়ালু অন্তরের কতা ফম খুইয়া মুই পৌল নিজেই তোমারলাক মিনতি করির ধরচুং। মুই জানং তোমারলার এই নাকানের ধারণা, যেলা মুই তোমারলার ওটে থাকং সেলা নম্র থাকং, যেলা দূরত থাকং সেলা মোর চিঠিলা খুব কড়া ভাষাত নেখা মনে হয়।

২ কিছু মানষি মনে করে হামরা জাগতিকের নাকান করি চলির ধরচি। যীশুর গুণের কতা ফম করিয়া কবার ধরচুং, মুই যেলা আসিম, সেলা যাতে মোক জোড় করির না নাগে।

৩ যদিও হামরা অক্ল-মসং এর মানষি, তাণো হামরা যে নড়াই করির নাগচি, সেইটা অক্ল-মসং এর যুদ্ধ না হয়।

৪ সাধারন মানষি যেই অস্ত্র দিয়া নড়াই করে, হামরা সেই অস্ত্র দিয়া নড়াই না করি, কিন্তুক ভগবানের শক্তিতে হামারলার অস্ত্র

শত্রুর শত্রু ঘাটি ধ্বংস করে।

৫ হামরা মানষির মিছাং যুক্তি নষ্ট করি, আর ভগবানক জানির ঘাটাত বাধা হিসাবে যে সউগ চিন্তা অহংকার মাথা তুলি খাড়া হয়, সেইলাক ধ্বংস করি। আর মনের সউগ চিন্তা ভাবনাক বশ করিয়া বাছাই করা রাজাটাক শ্রদ্ধা করি।

৬ যেয়ো সগায় পুরাপুরি বাছাই করা রাজাটার বাধ্য হবে সেয়োও কাণ্ডো যদি অবাধ্য থাকে তাইলে উমারলাক হামরা শাস্তি দিবার পামু।

৭ তোমরালার নজরত যেইটা পড়চে সেইটায় দেখির ধরচেন। কাণ্ডো যদি নিজক খ্রীষ্টের কয়া বিশ্বাস করে, তাইলে উয়াক একবার চিন্তা করা দরকার, যেই নাকান উয়ায় খ্রীষ্টের সেই নাকান হামরাও খ্রীষ্টের।

৮ প্রভু হামারলাক যে অধিকার দিচে সেই অধিকারের উদ্দেশ্য হইলেক তোমারলাক গড়েয়া তোলা তোমারলার ক্ষতি করা না হয়। যদিও এই অধিকার নিয়া মুই গর্ব করং তাণ্ডো মুই ইয়ার বাদে নজ্জা না খাইম।

৯ মুই চিঠিলার মইন্ধো দিয়া তোমারলাক ভয় দেখের ধরচুং তোমরা এইটা মনে না করেন।

১০ কোন কোন মানষি কবার ধরচে, “পৌলের এই চিঠিলা মনত দাগ কাটে আর শক্তিশালীও, কিন্তুক উয়ায় বগলত থাকিলে দেখা যায় উয়ায় দুর্বল আর উয়ার কতালা মনের মতন না হয়।”

১১ এই নাকানের মানষিলা বুঝুক যে, হামরা যেহা উমারলার নগত না থাকি সেহা হামার চিঠির মইদ্বো দিয়া যেইলা করির কইচি, যেহা তোমারলার সামনাত যামু সেহাও একে নাকানের করির কমু।

১২ তোমারলার মইদ্বোত কাণ্ডো কাণ্ডো নিজের গুণগান করি থাকে। হামরালা নিজক উমার দলত ফ্যেলের আর উমার নগত তুলনা করির সাহস না করি। কি ভোদাই উমরালা! কেনেনা উমরালা যেইটা ভাল মনে করে সেইটার নগত নিজেরলাক তুলনা করে আর ঐটা দিয়া নিজেরলার বিচার করে।

১৩ কিন্তু যতকোনা গর্ব করা দরকার উয়ার বেশী গর্ব না করি। ভগবান যে হামারলাক কামের সীমা ঠিক করি দিচে উয়ার মইদ্বোত থাকিয়া গর্ব করিমু, আর সেই সীমনার মইদ্বোত তোমরাও আছেন।

১৪ যদি হামরা তোমারলার ওটেকোনা না গেইলোং হয়, তাইলে হামারলার গর্ব করা সীমার বায়রাত হইলেক হয়। কিন্তুক হামরা খ্রীষ্টের ভাল খবর পইলা প্রচার করিতে করিতে তোমারলার ওটেকোনা গেচি, এই বাদে তোমারলার কতা কয়া হামরা যেহা গর্ব করি, সেহা সীমার বায়রাত কোন কিছুই না কই।

১৫ তাছাড়া অইন্য মানষিলার কাম নিয়াও হামরা গর্ব না করি, যদি করিলুং হয় তাইলে সেইটা হইলেক হয় সীমার বায়রা। হামরা



এই আশা করি তোমারলার বিশ্বাস বাড়ি গেইলে হামরা তোমরালার মইন্ধোত আরো ম্যেলা কাম করির পামু।

১৬ ইয়াতে তোমারলার ওটে থাকি আরো দূরের জাগালাত যায়া ভাল খবর প্রচারের কাম করির পামু। ইয়ার ফলে কাণ্ডো কবার পাবে না যে, অইন্য মানষিলা যেটেকোনা কাম করির ধরচে উমারলার ওটেকার কামের বাদে হামরা গর্ব করির ধরচি।

১৭ কিন্তু শাস্ত্রের কতা মত, “যায় গর্ব করে উয়ায় প্রভুক নিয়ায় গর্ব করুক।”

১৮ কারন নিজের গুণগান নিজে করির বাদে কাণ্ডো ভাল, এইটা প্রমাণ হয় না। কিন্তুক প্রভু যাক ভাল মনে করে, উয়ায়ে ভাল।

১৯ তোমরা মোর বোকমি দেখির পায়া খানেক সহ্য কর। অবশ্য তোমরা সহ্য করির ধরচেন।

২ ভগবানের দেওয়া অন্তর জ্বালায় তোমারলার বাদে মোর জ্বালা হবার ধরচে, কেনেনা মুই তোমারলাক এক বরের নগত বিয়ার সমন্ধ পাকা করিচুং, যাতে সতী কইনা হিসাবে উয়ারটে তোমারলাক দিবার পারং।

৩ কিন্তুক মোর ভয় নাগির ধরচে, দুষ্ট সাপ ছল চাতুরী করিয়া হবাক যেমন করি ভুলাইচে, সেই নাকান করি খ্রীষ্টের পতি খাটি অন্তরের ভক্তি থাকি কাণ্ডো তোমারলাকও ভুলিয়া নিয়া যাবে।

৪ যেই যীশুর কতা হামরা প্রচার করির ধরটি কাণ্ডো য়েলা উয়াক ছাড়া অইন্য কোন যীশুর কতা তোমারলারটে প্রচার করে, আর যেই পবিত্র আত্মা হামরা পাইটি উয়াক ছাড়া আলদা অইন্য আত্মা তোমরা পান, আর যেই ভাল খবর তোমরা মানি নিচেন উয়ার থাকি অইন্য নাকানের ভাল খবর তোমরা পান। আর যেইটায় শোনেন সেইটায় তোমরালা মানি নেন!

৫ মোর মনে তো হয় না মুই ঐ “বিশেষ” খবরিয়ালার চায়া কোন পাকে পাছত পড়ি আছং।

৬ যদিও মুই ভাল কতা বুঝিয়া কবার না পারং তাণ্ডো মোর ভাল জ্ঞান আছে, আর সেইলা সউগ নাকান করি সউগ কিছুতে তোমারলাক দেখাইচুং।

৭ তোমারলাক বড় করির যায়া মুই বিনা পাইসায় ভগবানের দেওয়া ভাল খবর তোমারলারটে প্রচার করি নিজক নত করিচুং, ইয়াতে কি মুই পাপ করিচুং?

৮ তোমারলাক সেবা করির বাদে মুই অইন্য সমিতিলারটে থাকি সাহায্য নিচুং।

৯ তোমারলারটে থাকির সমায় য়েলা মোর অভাব হইচে সেলাও মুই কাণ্ডোরোটে কোন চাং নাই, কেনেনা যেই ভাইলা ম্যাসিডোনিয়া থাকি আসছিলো উমরায় মোর অভাব পূরণ করিচিলেক। মুই কোন দিন তোমারলারটে একটাকা চাং নাই আর চাইম না।

১০ মোর মইদ্বোত যে খ্রীষ্টের সততা আছে, সেই অনুসারে মুই কবার ধরচুং, গ্রীস দেশের কোন জাগাত মোর গর্ব করা বন্ধ করির পাবার না হয়।

১১ কেনে মুই এই নাকানের কতা কবার ধরচুং? তোমারলাক পিরিত না করং বুলিয়া কি? ভগবান জানে যে, মুই তোমারলাক পিরিত করং।

১২ কিন্তুক মুই এই বাদে এই নাকান করিম, যায় যায় অহংকার করে উমার অহংকার কর শেষ করিম, যে উমরা কয় ভগবানের কাম ঐ নাকান করে যেই নাকান হামরা করি। যায় যায় উমার গর্বের বিষয় নিয়া নিজেরলাক হামারলার সমান কয়া দেখের চায়, উমরা যাতে এই সুযোগ না পায়। এই বাদে মুই যেইটা করির ধরচুং সেইটা করিতে থাকিম।

১৩ ভগবান ঐ মানষিলাক কোনো দিনও পেঠায় নাই যেই মানষিলা ঠগবাজ যায় তোমারলাক ঠকাইচে, উমরালা খ্রীষ্টের খবরিয়ার ছদ্মবেশ ধারন করে। তোমরা উয়াক আসলে ঐ নাকানের খবরিয়া কামের মানষিলা তো ভন্ড।

১৪ ইয়াতে অচানক হবার কিছুই নাই, কেনেনা শয়তানও আলোর স্বর্গদূতের ছদ্মবেশ ধারন করে।

১৫ তাহলে যায় যায় শয়তানের সেবা করে উমরা যদি ছদ্মবেশে ন্যায়ের রূপ ধারন করে, ইয়াতে অচানক হবার কিছুই নাই, শেষ দিনত উমরা উমার কাম অনুসারে ফল পাবেই।

১৬ মুই আর একবার কবার ধরচুং কাণ্ডো যাতে মোক ভোদাই মনে না করে। কিন্তুক তোমরালা যদি মোক ভোদাই মনে করেন তাইলে সেইটায় মানি নেন। যাতে মুই খানিক গর্ব করির পারং।

১৭ মুই এলা যেইটা কবার ধরচুং সেইটা প্রভুর আদেশ মত না হয়, কিন্তুক নিজের সমন্ধে গর্ব করির যায়া ভোদাইর মতই কবার ধরচুং।

১৮ মানষি যেহেতু জাগতিক বিষয় নিয়া গর্ব করে, তাইলে মুইও করিম।

১৯ তোমরালা তো নিজেরলাক জ্ঞানী মনে করেন কিন্তুক ভোদাই মানষিলার কতা শুনিয়া তোমরা ধৈর্য ধরি সহ্য করেন।

২০ খালি এইটায় না হয়, তোমারলাক চাকর বানায়, তোমারলাক একে বারে বিনাশ করে, তোমারলাক ফান্দোত ফ্যেলের ধরচে। তোমারলার মালিক হয় খাড়া হয় আর তোমারলার গালত চড় মারে, তোমরালা সেইলাও সহ্য করেন।

২১ মুই পৌল তামশা করি কইলুং, হামরা তো এই নাকান করি নাই, তার মানে কি এইটা; হামরা দুর্বল আছিলং আর শরম খাইচি! কিন্তুক গর্ব করির যদি কাণ্ডোরো সাহস থাকে তাইলে মুই সাহসী হইম আর গর্ব করিম, এই কতা মুই ভোদাইর নাকান কবার ধরচুং।

২২ যায় যায় গর্ব করে উমরা তো ইব্রীয় জাতি, মুইও তো। উমরা তো ইজ্রায়েলের মানষি, মুইও তো। উমরা তো অব্রাহামের গুপ্তির

মানষি, মুইও তো।

২৩ উমরা কি খ্রীষ্টের সেবাকারী? মুই উমার চায়া বেশী খাটা খাটনি করিচুং, আর উমার চায়া বেশী জেল খাটিচুং, উমার চায়া বেশী মাইরও খাইচোং, মেয়ো বার মরণের হাতত পড়চুং। এই নাকানের গর্ব করা মাথা খারাপ মানষির মত শুনাইলেও,

২৪ যিহুদীলার হাতত মুই পাঁচবার উনচল্লিশটা করি চাবুকের মাইর খাইচোং। খ্রীষ্টের সেবা করির যায়া

২৫ তিন বার মোক নাটি দিয়া ডাঙায়, একবার মোক শিল দিয়া ঢেলায়, আর তিন বার ছড়কার ঝড়িত জাহাজ ডুবি যায়া কষ্ট পাং। এক দিন একরাতি মুই সাগরের জলত পড়ি ছিলুং।

২৬ মুই মেয়ো দেশ ঘুরি বেড়াইচুং। বন্যা, ডাকাইত, নিজের জাতির মানষি আর অযিহুদীলার বাদে মুই বিপদত পড়চুং। এইলা ছাড়াও গঞ্জত, নিধুয়া পাথারত, সাগরত, আর ভন্ড গুরু ভাইলারটে বিপদত পড়িচুং।

২৭ খ্রীষ্টের প্রচার করির যায়া কষ্টের মইন্ধোত কঠিন পরিশ্রম করিচুং। মেয়ো রাতি জাগিয়া আছিলুং ভোগ আর টিস্সাত কষ্ট পাইচুং। না খায়া আছিলুং, জারের দিনত কাপড় চোপড়ের অভাবেও কষ্ট পাইচুং।

২৮ বায়রার এই ব্যাপারলা ছাড়াও সউগ সমিতিলার বাদে মাথাত সউগ দিনেই চিন্তা আছিলেক।

২৯ কাণ্ডো দুৰ্বল হইলে মুই কি উয়ার দুৰ্বলতার সহভাগী না হং?  
কাণ্ডোরো বাদে কাণ্ডো পাপে পড়িলে মুই কি রাগে জ্বলি না উঠং?

৩০ যদি মোক গৰ্ব করির নাগে তাইলে মুই মোর দুৰ্বলতার বাদে  
গৰ্ব করিম।

৩১ হামারলার প্রভু যীশু খ্রীষ্টের ভগবান আর স্বর্গের বাপ, যায়  
চিরকাল গুণগান পাবার যোগ্য, উয়ায় জানে মুই মিছাং কতা না  
কং।

৩২ মুই যেয়ো দামেস্কত আছিলুং সেয়ো রাজা আরিতার  
অধীনের রাজ্যপাল মোক বন্দী করির বাদে গঞ্জের চাইরো পাকে  
পাহাড়া দিছিলেক।

৩৩ কিন্তুক মোর সখালা দেওয়ালের একখান ফাকা দিয়া একটা  
ডেলিত করি মোক নামেয়া দিছিলেক, আর এই নাকান করি মুই  
রাজ্যপালের হাত থাকি পালেয়া গেইছিলুং।

১২ মোক আরো গৰ্ব করির নাগিবে, যদিও ইয়াতে কোন লাভ  
নাই তাণ্ডো প্রভু যেইলা দর্শন মোক দেখে দিচে আর যেইলা মোক  
নিকলি দিচে সেইলা বিষয়ে এলা মুই কইম।

২ যীশু খ্রীষ্টের এক জন শিষ্যক মুই চেনং। চৌদ্দ বছর আগত  
উয়াক তৃতীয় স্বর্গত তুলি নেওয়া হইছিলেক। সেয়ো উয়ায়  
সশরীরে বা অশরীরে আছিলেক কি না সেইটা মুই জানং না,  
ভগবানে জানে।

৩-৪ মুই জানং সেই মানষিটাক স্বর্গের শান্তির দেশত তুলি নেওয়া হইছিলেক। উয়ায় এমন অচানক কতা শুনছিলেক, যেইলা নিয়া মানষির কতা কওয়া ঠিক না হয়। সেলো উয়ায় সশরীরে বা অশরীরে আছিলেক কি না মুই জানং না, ভগবানে জানে।

৫ এমন মানষিটার সমন্ধে মুই গর্ব করিম, মুই নিজের সমন্ধে গর্ব না করিম, খালি মোর দুর্বল বিষয়লা নিয়া গর্ব করিম।

৬ মুই নিজের সমন্ধে গুণগান করিলেও বোকামি না করিম, কেনেনা মুই সচাং কতাটায় কইম। তাণ্ডো মুই গর্ব না করিম, কেনেনা কাণ্ডোয় মোক যেমন দেখে আর মোর মুখত যেমন কতা শুনে, মানষি মোক তার থাকিও বেশী বড় বুলি মনে করে।

৭ মেলো অচানক দর্শন মোক দেখানো হইচে বুলিয়া যাতে মুই অহংকারী না হং, এই উদ্দেশ্যে মোক নাঞ্চনা দিবার বাদে মোর দেহাত একটা কষ্ট দায়ক সমস্যা দেওয়া হইলেক। শয়তানের এক দূত মোক আঘাত করে যাতে মুই বেশী অহংকারী না হং।

৮ এই ব্যাপারে মুই তিন বার প্রভুক অনুরোধ করচিলুং, যাতে উয়ার থাকি মুই মুক্তি পাং।

৯ কিন্তুক উয়ায় মোক কইলেক, “মোর দয়ায় তোর বাদে যথেষ্ট। কেনেনা দুর্বলতার মইন্দো দিয়া মোর শক্তি দেখা যায়।” এই বাদে মোর দুর্বলতার সমন্ধে মুই খুশি হয় গর্ব করিম, যাতে খ্রীষ্টের শক্তি মোর উপরত রয়।

১০ খ্রীষ্টের বাদে মুই, দুর্বলতায়, অপমানে, যন্তনায়, অইত্যাচারে, দুঃখ ভোগ করিলেও মুই সন্তুষ্ট, কেনেনা যেলা মুই দুর্বল, সেলায় মুই শক্তিশালী।

১১ মুই ভোদাই, মুই নিজেই কবার ধরচুং, কিন্তুক তোমরায় মোক জোড় করি ভোদাই বানাইচেন। কেনেনা তোমারলার উচিত আছিলেক মোর গুণগান করা। যদিও মুই কিছুই না হং, তাঙো তোমারলার ঐ “বিশেষ খবরিয়ালার” চায়া কোন মতেই ছোট না হং।

১২ যেলা মুই তোমারলার নগত আছিলুং মুই ধৈর্য ধরিয়া, তোমারলার মইদ্ধোত নানা নাকানের মহং আর অচানক চিনের কাম করিয়া, মুই নিজক এক জন খবরিয়া কয়া প্রমাণ করিচুং।

১৩ অইন্য সমিতিলা থাকি তোমরালা কোন পাকে ছোট না হন। খালি একটা বিষয়ে তোমরা ছোট আর সেইটা হইলেক এই যে, মুই তোমারলারটে বোঝা নাই হং, মুই তোমারলারটে খাবার চাং নাই। এই ভুলের বাদে মোক মাপ করি দেন!

১৪ মুই এলা তৃতীয় বার তোমারলার ওটে যাবার বাদে তৈরি হয়। আছং। মুই তোমারলার বোঝা না হইম কেনেনা মুই তোমারলারটে থাকি কোন কিছু না চাং, মুই খালি তোমারলাক চাং। বেটা-বেটিলা যে উমার বাপ-মাও এর বাদে টাকা-পাইসা জমাবে সেইটা না হয়, কিন্তুক বেটা-বেটির বাদে টাকা-পাইসা জমা করা বাপ-মাও এর উচিত।



১৫ মুই খুব খুশি হয় তোমারলার বাদে মোর সউগ কিছুই খরচ করিম আর নিজকো সাঁপে দিম। যদি মুই তোমারলাক বেশী পিরিত করং, তাইলে কি তোমরালা মোক কম পিরিত করিবেন।

১৬ যাই হউক, মুই তোমারলার বোঝা নাই হং, কিন্তু কাণ্ডো কবে মুই চালাক এই বাদে ছলেবলে তোমারলাক ভুলাইচুং।

১৭ মুই যাক যাক তোমারলার ওটেকোনা পেঠাইচুং উমারলার কাণ্ডোরো মইন্ধো দিয়া তোমারলাক কি ঠকাইচোং?

১৮ মুই তীতক তোমারলার ওটেকোনা যাবার অনুরোধ করিচুং আর উয়ার নগত অইন্য এক ভাইয়ক পেঠাইছিলুং। তীত কি তোমারলাক ঠকাইচে? না কোন দিন ঠকাই নাই। মুই আর তীত কি একে নাকানের মনোভাব নিয়া একে নাকান কাম নাই করি?

১৯ তোমারলার কি মনে হয় এই চিঠির মইন্ধো দিয়া হামরা তোমারলারটে নিজের পক্ষ হয় কতা কইচি? খ্রীষ্টের শিষ্য হয় হামরা ভগবানের আগত এইলা কতা কবার ধরচি। পরানের সখার ঘর, তোমারলাক আত্মিক করি গড়ে তুলির বাদে হামরা এইলা কতা কইচি।

২০ মুই যেলা আসিম সেলা তোমরা মোক যেই নাকান দেখির আশা করেন হয় তো সেই নাকান দেখির পাবেন না, এইটায় মোক ভয় নাগির ধরচে। কেনেনা মুই তোমারলাক যেই নাকান দেখির আশা করং ঐ নাকান দেখির পাইম না, আর হবার পায় সেলা তোমারলার মইন্ধোত ঝগড়া, হিংসা, মেজাজ গরম করা,

দলাদলি, অইনের গেলানি করা, নিন্দা করা, অহংকার আর গোলমাল নাগিয়া যায়।

২১ মোক হাতাস নাগির ধরচে মুই যেয়ো আরো তোমারলার ওটেকোনা যাইম সেয়ো মোর ভগবান তোমারলার আগত মোক নইজ্জা দিবে, আর আগত যায় যায় পাপ করিচে উমার অশুদ্ধি ব্যভিচার, আরো ভন্ডামি থাকি মন ফিরান নাই। ইমার সগারে বাদে মোক মেয়ো দুঃখ উবি বেরের নাইগবে।

১৩ মুই তিন বারের বার তোমারলার ওটেকোনা যাবার ধরচুং। শাস্ত্রত নেখা আছে, “দুই তিন জন সাক্ষীর কতায় এইলা বিষয় সচাং কয়া প্রমাণ হবে।”

২ দ্বিতীয় বার মুই যেয়ো তোমারলার ওটেকোনা গেইছিলুং, সেয়ো আগত যায় পাপ করিচিলেক উমারলাক আরো অইন্য সগাকে মুই সাবধান করি দিছিলুং। এলা মুই তোমারলার ওটেকোনা না যায়া আরেকবার সাবধান করি দিবার ধরচুং। মুই যেয়ো আসিম সেয়ো কাঙোকে রেহাই না দিম।

৩ কেনেনা বাছাই করা রাজাটা মোর মইন্ধো দিয়া কতা কইচে, ইয়ার প্রমাণ তোমরালা চাবার ধরচেন। উয়ায় তোমারলার বিরুদ্ধে ব্যবস্থা নিবার বাদে দুর্বল না হয়, এই ব্যাপারে উয়ায় তোমারলার থাকিও শক্তিবান।

৪ দুর্বল দেহা নিয়া উয়াক ক্রুশত দেওয়া হইছিলেক, কিন্তুক ভগবানের শক্তিতে উয়ায় বভায় আছে। আর এই নাকান করি হামরাও দুর্বল, কিন্তুক তোমারলার বাদে ভগবানের শক্তিতে উয়ার নগত হামরা বভায় থাকিমু।

৫ নিজেরলাক যাচাই করি দেখ, তোমরালা বিশ্বাসে থির আছেন কি না! এইটা প্রমাণ করির বাদে নিজেরলাকে যাচাই কর! তোমরালা কি নিজেরলার সমন্ধে জানেন না যে, যীশু খ্রীষ্ট তোমারলার মইন্ধোত আছে। অবশ্য তোমরালা যদি ভেজাল না হন।

৬ কিন্তুক আশা করং, আর তোমরা জানেন যে, হামরালা খাটি।

৭ হামরা ভগবানেরটে প্রার্থনা করির ধরটি তোমরালা সউগ নাকানে বেয়া কাম থাকি দূরত সরি রও। হামরা নিজক খাটি প্রমাণ করির বাদে এইটা না করি। মানষি তোমারলাক ভাল মনে না করিলেও তোমরা সউগ সমায় ভাল কাম করিতে থাক। কেনেনা মুই যেয়ো আসিম সেয়ো যাতে তোমারলাক শাস্তি দিবার না নাগে।

৮ সইত্যের বিরুদ্ধে হামার কোন করিবার ক্ষমতা নাই, খালি সইত্যের পক্ষ হয়া করির পারি।

৯ যেয়ো হামরা দুর্বল আর তোমরা বলবান হন সেয়ো হামরা আনন্দ করি। আরো হামরা প্রার্থনা করি যে, তোমারলার খ্রীষ্টীয় জীবন যাতে দিনে দিনে আরো বাড়ে।

১০ কেনেনা মুই তোমারলার ওটে না থাকির সমায় মুই তোমারলারটে নেখিবার ধরচুং, য়েলা মুই তোমার ওটেকোনা যাইম স্যেলা যাতে তোমারলাক শাস্তি দিবার বা গালি দিবার না নাগে। এই ক্ষমতা তোমারলার ক্ষতি করির বাদে না হয়, তোমারলাক আত্মিক জীবন গড়ের বাদে প্রভু মোক এই ক্ষমতা দিচে।

১১ ভাই-বইনিলা, এইবার বিদায়। তোমরা আনন্দ কর, পাকাপোক্ত হন, ভরসা খোন, একমনা হন, শান্তিতে থাক, তাইলে পিরিত আর শান্তির ভগবান তোমারলার নগত রবে।

১২ পিরিতের মনোভাব নিয়া তোমরা একে অইন্যের মঙ্গল কামনা কর।

১৩ ভগবানের সউগ মানষিলা তোমারলার মঙ্গল চাবার ধরচে।

১৪ হামার প্রভু যীশু খ্রীষ্টের দয়া, ভগবানের পিরিত আর পবিত্র আত্মার যোগাযোগের সমন্ধ তোমারলার সগারে অন্তরত থাকুক॥

# গালাতীয়

১ মুই শ্রী পৌল এক জন খবরিয়া। এই খবরিয়ার পদ মুই কোন মানষিরটে থাকি বা কোন মানষির মইদ্বো দিয়া পাং নাই, মুই এইটা পাইচুং যীশু খ্রীষ্টের মইদ্বো দিয়া আর হামার স্বর্গের বাপ ভগবান যায় বাছাই করা রাজাটাক মরণ থাকি বত্তে তুলিচে, উয়ার মইদ্বো দিয়ায় মোক খবরিয়া হিসাবে বাছাই করা হইচে।

২ মুই পৌল গালাতীয় সমিতিলারটে এই চিঠি নেখিলুং আর মোর অইন্য ভাই-বইনিলা মোর সোদে আছে।

৩ হামার স্বর্গের বাপ ভগবান আর যীশু খ্রীষ্ট তোমারলাক দয়া আর শান্তি দান করুক।

৪ হামারলার ভগবান আর বাপের ইচ্ছামত খ্রীষ্ট হামারলার পাপের বাদে জীবন দিছিলেক, যাতে এলাকার এই বেয়া দুনিয়ার হাত থাকি হামারলাক রক্ষা করির পারে।

৫ চিরকাল ভগবানের গুণগান হউক। আমেন।

৬ মোর অচানক মনে হবার ধরচে যে, বাছাই করা রাজাটার দয়াতে যায় উয়ার মানষি হবার বাদে তোমারলাক ডেকাইচে, তোমরা পচপচে উয়াক ছাড়ি দিয়া অইন্য নাকানের ভাল খবরের ওদি ঝুকি পড়িচেন।

৭ আসলে ঐটা কোন ভাল খবর না হয়। তাণ্ডো কিছু মানষি তোমারলাক ভুল ঘাটা দিয়া নিয়া যাবার ধরচে, উমরা বাছাই করা রাজাটার বিষয়ে ভাল খবর বদলে দিবার চাবার ধরচে।

৮ কিন্তুক যেই ভাল খবর হামরা তোমারলারটে প্রচার করচি, উয়ার থাকি যদি কোন দোসরা ভাল খবর তোমারলারটে প্রচার করা হয়, সেইটা হামরা নিজেই করি বা কোন স্বর্গ হইতে আইসা কোন স্বর্গদূত করে, তাইলে উয়ার উপরাত শাও পড়ুক।

৯ মুই যেমন আগতও কইচুং তেমন এলাও কইম, যেই ভাল খবর তোমরা বিশ্বাস করিচেন উয়ার থাকি দোসরা কোন ভাল খবর যদি কাণ্ডো প্রচার করে তাইলে উয়ার উপরাত শাও পড়ুক।

১০ মুই কার সাব্বাস পাবার চেষ্টা করির নাগাইচুং, মানষির না ভগবানের? না কি খালি মানষিক সন্তুষ্ট করির চেষ্টা করির ধরচুং। এলাও যদি মুই মানষিক সন্তুষ্ট করির চেষ্টা করির ধরচুং, তাইলে তো মুই বাছাই করা রাজাটার চাকর হলুং না হয়।

১১ হে মোর ভাই-বইনিলা, মুই তোমারলাক জানের ধরচুং মুই যেইলা ভাল খবর তোমারলারটে প্রচার করচুং সেইলা কোন মানষির বানা কতা না হয়।

১২ মোর প্রচার করা কতা কোন মানষিরটে থাকি মুই পাং নাই আর সেইটা কাণ্ডো মোক শিখায় নাই। কিন্তুক বাছাই করা রাজাটা নিজেই মোরটে প্রকাশ করিচে, কি কবার নাগবে।

১৩ তোমরা তো শুনিচেন মুই আগত কেংকরি যিহুদী ধর্ম পালন করি জীবন যাপন করির ধরচিলুং। কি নিষ্ঠুর হয় মুই ভগবানের সমিতিলাক অইত্যাচার করিয়া নাশ করির চেষ্টা করির ধরচিলুং।

১৪ মোর বয়সের মেয়ো যিহুদী থাকিয়াও, মেয়ো মানষির চায়া মুই একলায় সেই ধর্ম আলোচনাত আগেয়া যাবার ধরচিলুং। এইলা ছাড়াও বাপ ঠাকুরদারটে থাকি যে নিয়ম চলি আসির ধরছিলেক সেই বিষয়েও মুই খুব উৎসাহী আছিলুং।

১৫ কিন্তুক জনের সমায় থাকি ভগবান মোক বাছাই করি নেয়, আর উয়ার দয়াতে খবরিয়া হবার বাদে উয়ায় মোক ডেকায়।

১৬ মুই যাতে অযিহুদীলারটে বাছাই করা রাজাটার বিষয় প্রচার করং, এই বাদে ভগবান যেয়ো উয়ার দয়া দেখেয়া ইচ্ছামত উয়ার বেটাক মোরটে নিকলি দিলেক, সেয়ো মুই কোন মানষিরটে পরামর্শ নেং নাই।

১৭ আর মোর আগত যায় যায় খবরিয়া হইছিলেক, উমার সোদে দেখা করির মুই যিরুশালেম যাং নাই। কিন্তু মুই আরব দেশ চলি গেইছিলুং পাছত আরো দামেস্ক গঞ্জত ফিরি আসছিলুং।

১৮ ইয়ার তিন বছর পাছত মুই পইলা বার শ্রী পিতরের সোদে দেখা করির বাদে যিরুশালেম গেইছিলুং। আর ওটেকোনা মুই উয়ার সোদে পনেরো দিন আছিলুং।

১৯ কিন্তুক প্রভুর ভাই যাকব ছাড়া দোসরা কোন খবরিয়ালার সোদে মোর দেখা হয় নাই।

২০ ভগবান জানে, মুই যেইলা তোমারটে নেখিচুং সেইলা মিছাং না হয়।

২১ তার পাছত মুই সিরিয়া আর কিলিকিয়ার নানা জাগাত গেইছিলুং।

২২ যিহুদীয়ার বাছাই করা রাজাটার সমিতির মানষিলা মোক চেনে না।

২৩ উমরা খালি এইটা কতা শুনছিলেক, “যেই মানষিটা হামারলার উপরাত অইত্যাচার করিছিলেক সেই মানষিটা এলা বাছাই করা রাজাটার শিষ্য হয়। ভাল খবর প্রচার করির ধরচে।”

২৪ আর উমরা মোর বাদে ভগবানের গুণগান করির নাগিলেক।

২ ইয়ার চৌদো বছর পাছত মুই বার্ণবার সোদে আরেক বার যিরুশালেম গেলুং, আর তীতকও সাথত নিলুং।

২ ভগবানের ইচ্ছা প্রকাশের পাছত মুই ওটেকোনা গেলুং। ওটেকার মানিগুনী দেওয়ানী মানষিলাৰটে একটা গোপন সভা করিয়া কইলুং। অযিহুদীলারটে যায়া মুই ভাল খবর প্রচার করং। মুই চাইছিলুং যে উমরা যাতে বুঝির পায় মুই কি কাম করির ধরচুং। মুই ভয় খাবার ধরচিলুং যে, মুই ভবিষ্যতের বাদে ফাকতে খাটির ধরচুং।



৩ এমন কি তীত মোর সোদে আছিলেক উয়ায় অঘিহুদী হওয়া সত্বেও দেওয়ানীলা তীতক সুনত করির জোর করে নাই।

৪ কয়জন ভন্ড ভাই গোপনে সোন্দে ফ্যেলাইচে বুলিয়া কতাটা উঠিচে, যীশু খ্রীষ্টের শিষ্য বুলিয়া হামারলার যে স্বাধীনতা আছে, সেই স্বাধীনতার দোষ ধরিবার বাদেই ইমরানা গোপনে চোরের নাকান করি সোন্দাইচে, যাতে হামারলাক চাকর বানে খুবার পায়।

৫ কিন্তুক ভাল খবরের সচাং কতাটা যাতে তোমারলার বাদে রক্ষা করির পাই, এই বাদে এক পলকের জন্যেও হামরা উমারলার কতা মানি নেই নাই।

৬ সমিতির মানিগুনী মানষিলা ভাল খবরের বিষয়ে নয়া কোনো কিছুই মোক জানায় নাই, আসলে উমরানা যায় হউক না কেনে, তাতে মোর কোনো যায় আইসে না, কেনেনা ভগবান চেহারা দেখি কাঙোরো বিচার করে না,

৭ যাই হউক, যিহুদীলারটে ভাল খবর প্রচার করিবার ভার যেই নাকান পিতরের উপরা দেওয়া হইচে, সেই নাকান অঘিহুদীলারটে ভাল খবর প্রচার করির ভার ভগবান মোর উপরাত দিচে।

৮ উমরানা এইটা দেখির পাইলেক, কেনেনা যিহুদীলারটে পিতরের খবরিয়া কামের ক্ষমতা যায় দিছিলেক সেই ভগবান অঘিহুদীলারটে খবরিয়া হিসাবে মোক প্যেঠাইচে।

৯ ওই মানিগুনী দেওয়ানী মানষিলা, মানে যাকব, পিতর আর যোহন এইলা দেখিয়া বুঝির পাইছিলেক যে, মুই ভগবানেরটে

থাকি বিশেষ দয়া পাইচুং। উমার আর হামারলার মইন্ধোত যে যোগাযোগ সমন্ধ আছে, সেইটা দেখে বাদে উমরানা হামার আর বার্ণবার সোদে ডাইন হাত মিলাইলেক। উমরা রাজি হইলেক যে, অযিহুদীলারটে যামো আর উমরা যিহুদীলারটে যাবে।

১০ উমারলার একনায় অনুরোধ আছিলেক যে, হামরানা যাতে গরীবলার কতা ফম করি; অবশ্য মোরও সেই নাকান আগ্রহ আছিলেক।

১১ যেলা পিতর সিরিয়া দেশের আন্তিয়খিয়াত আসিলেক, সেলা মুই উয়াক মুখতে আপত্তি জানালুং, কেনো উয়ায় অন্যায় করিছিলেক।

১২ আন্তিয়খিয়াত আইসার পাছত পইলা উয়ায় অযিহুদীলার নগত খাওয়া-দাওয়া করিছিলেক। কিন্তুক কতলা যিহুদী মানষিক যেলা যাকব পেঠেয়া দিলেক যায় যায় কইছিলেক সুনত না করিলে যীশুর শিষ্য হওয়া যায় না, সেলা উমারলার ভয়ে পিতর অযিহুদীলার সঙ্গ ছাড়িয়া নিজক যুদা করিলেক।

১৩ ইয়ার পাছত আন্তিয়খিয়ার অইন্য যিহুদীলাও পিতরের সোদে ভন্ডামি করির নাগিলেক। এমন কি, বার্ণবাও উমার ভন্ডামির বাদে ভুল ঘাটাত যাবার ধরছিলেক।

১৪ কিন্তুক যেলা মুই দেখিলুং যে, উমরা সচাং ভাল খবরের সোদে উমারলার কামের কোনো মিল নাই, সেলা মুই সগারে আগত পিতরক কইলুং, “তুই যিহুদী হয়াও যিহুদীর নাকান চলিস

না, তোর চালচলন অযিহুদীর মত। তাইলে কেনে অযিহুদীলাক যিহুদীর নাকান চলির বাধ্য করির ধরচিস?

১৫ হামরা জন্ম থাকি যিহুদী, পাপী অযিহুদী হয় জন্মাই নাই।

১৬ হামরা এই কতা জানি যে বিধান পালন করিয়া ভগবান মানষিক নির্দোষ কয়া মানি না নেয়, কিন্তুক যীশু খ্রীষ্টের উপরাত বিশ্বাসেই মানি নেয়। এই বাদে হামরা যীশু খ্রীষ্টের উপরাত বিশ্বাস করচি। বিধান পালনের বাদে না হয়, খ্রীষ্টের উপরাত বিশ্বাসেই হামরলাক নির্দোষ কয়া মানি নিবে। কেনেনা বিধান পালন করিয়া কাণ্ডোকে নির্দোষ বুলিয়া মানি নেওয়া হয় না।

১৭ “খ্রীষ্টের মইন্ধো দিয়া নির্দোষ কয়া মানি নিবার চেষ্টা করির যায়া দেখা যায়, অযিহুদীলার নাকান হামরাও পাপী, তাইলে ইয়ার মানে কি এই যে, খ্রীষ্ট পাপের সেবা করে? নিশ্চয় না হয়।

১৮ কেনেনা মুই যেইটা ভাঙি ফেলাইচুং সেইটা যদি মুই আরো গড়াং তাইলে প্রমাণ করলুং যে মোর পইলাটা ভুল আছিলেক।

১৯ বিধানের দাবি দাওয়ারটে বিধানের বাদে মোর মরণ হইচে যাতে মুই ভগবানের বাদে বত্তি রবার পারং।

২০ মোক খ্রীষ্টের সোদে ক্রুশত টাঙা হইচে। এই বাদে মুই আর বত্তি নাই, খ্রীষ্ট মোর মইন্ধোত বত্তি আছে। এলা মোর এই দেহা নিয়া যে জীবন কাটের ধরচুং সেইটা ভগবানের বেটার উপরাত বিশ্বাস করিয়া জীবন কাটের ধরচুং। উয়ায় মোক পিরিত করিয়া মোর বাদে জীবন সাঁপে দিচে।

২১ ভগবানের এই দয়াক মুই বাতিল করিম না, কেনেনা মানষি যদি বিধান দিয়া নির্দোষ কয়া ভগবানের মন মত হবার পায়, তাইলে যীশু খ্রীষ্ট মিছাং মরিচে।”

৩ হায়রে অবুঝ গালাতীয়র ঘর! কায় তোমারলাক যাদু করিচে? ঝকঝকা করি শিক্ষা দেওয়া হইচে যে, যীশু খ্রীষ্টক ক্রুশত দেওয়া হইছিলেক।

২ মুই তোমারলারটে জানির চাং, তোমরালা বিধান মানি চলিয়া কি পবিত্র আত্মাক পাইছিলেন? না প্রভু যীশুর ভাল খবর শুনি বিশ্বাস করিচেন?

৩ তোমরালা কি এত অবুঝ? পবিত্র আত্মার মধ্য দিয়া নয়া জীবন শুরু করিয়া কি এলা নিজের চেষ্টাত জয় লাভ করির চাবার ধরচেন?

৪ তোমরালা কি ফাকতে এত দুঃখ ভোগ করিচেন? মুই আশা করং যে তোমারলার দুঃখ ভোগ বেকার নাই হয়।

৫ কেনে ভগবান তোমারলাক পবিত্র আত্মা দিচে আর তোমারলার মইন্ধোত এত অচানক কাম করিচে তা ভাবি দেখ। তোমরালা বিধান মানি চলিচেন বুলিয়া কি উয়ায় এইলা করিচে, নাকি ভগবানের ভাল খবর শুনিয়া বিশ্বাস করিচেন বুলিয়া করিচে?

৬ অব্রাহামের কতা ভাবি দেখ, পবিত্র শাস্ত্রত নেখা আছে, “অব্রাহাম ভগবানের কতা বিশ্বাস করিচে আর ভগবান সেই বাদে উয়াক নির্দোষ বুলি মানি নিচে।”

৭ এই বাদে তোমরালা এই কতা জানি রাখো, যায় যায় ভগবানক বিশ্বাস করে উমরালায় অব্রাহামের গুষ্টির মানষি।

৮ পবিত্র শাস্ত্রত আগতে নেখা হইছিলেক, বিশ্বাসের বাদেই ভগবান অযিহুদীলাক নির্দোষ বুলি মানি নিবে, অব্রাহামক এই ভাল খবর আগতে জানা হইচে যে, “তোর মইন্ধো দিয়ায় সউগ জাতির মানষি আশুর্বাদ পাবে।”

৯ তাইলে দেখা যায়, ভগবানক বিশ্বাস করি অব্রাহাম যেই নাকান আশুর্বাদ পাইছিলেক, ঠিক সেই নাকান করি তার পাছত যায় যায় ভগবানক বিশ্বাস করিচে উমরালাও একে নাকান আশুর্বাদ পাবার ধরচে।

১০ পবিত্র শাস্ত্রত নেখা আছে, “সেই মানষিটা শাও পাওয়া, যায় বিধির বিধানের সউগ কতা মানি চলে না,” তাইলে দেখা যায়, বিধান মানি চলির উপরা যায় যায় নির্ভর করে উমারলার সগারে উপরাত এই শাও আসিবে।

১১ তাছাড়া এইটাও ঝকঝকা দেখা যাবার ধরচে যে, বিধান মানি চলির বাদে ভগবান কাঙোকো নির্দোষ বুলিয়া মানি নেয় না, কেনেনা পবিত্র শাস্ত্রের কতা মত, “যাক নির্দোষ বুলি মানি নেওয়া হয় উয়ায় বিশ্বাসের মইন্ধো দিয়ায় জীবন পাবে।”

১২ বিশ্বাসের সোদে বিধির বিধানের কোনো সমন্ধ নাই। বিধির বিধানত কয়, “যেই মানষি বিধান মতে চলে উয়ায় উয়ার মইন্ধো দিয়ায় জীবন পাবে।”

১৩ বিধান না মানিবার বাদে যে শাও হামারলার উপরাত আছিলেক, খ্রীষ্ট সেই শাও নিজের উপরা নিয়া হামারলাক মুক্তি দিচে। পবিত্র শাস্ত্রত এই কতাও নেখা আছে, “যাক গহত টাঙা হয় উয়ায় শাও পাওয়া।”

১৪ ভগবান অব্রাহামক যে আশুর্বাদ করচিলেক সেই আশুর্বাদ যীশুর মইন্ধো দিয়া যাতে অযিহুদীলাও পায়, আর যাতে হামরা বিশ্বাসের মইন্ধো দিয়া প্রতিজ্ঞা করা পবিত্র আত্মাক পাই, সেই বাদে খ্রীষ্ট সেই শাও নিজের উপরা নিছিলেক।

১৫ ভাই বইনিলা, মুই একটা সাধারন চুক্তি দিয়া ব্যাপারটা বুঝি দিবার ধরচুং। একবার যেলা মানষির মইন্ধোত কোন চুক্তি পাকা করি ফেলা হয়, সেলা সেই চুক্তি কাণ্ডো বাতিল করির পায় না আর উয়ার নগত কোন কিছু যোগ করির পায় না।

১৬ অব্রাহাম আর উয়ার গুষ্টিরটে ভগবান প্রতিজ্ঞা করিচিলেক, পবিত্র শাস্ত্রত কয় নাই, “গুষ্টিলারটে” মানে মেলা কিন্তুক “গুষ্টিরটে” আরো কইচে, “গুষ্টিরটে” মানে একটা মানষি, ইয়ায় হইলেক খ্রীষ্ট।

১৭ মোর কতার মানে হইলেক, ভগবান অব্রাহামের সমায়ত একটা প্রতিজ্ঞা করিচিলেক, তারও চারশো ত্রিশ বছর পাছত এই

বিধান দেওয়া হইছিলেক, কিন্তুক ইয়াতে আগের সেই চুক্তি বাতিল নাই হয়, এই বাদে উয়ার প্রতিজ্ঞা টিকি রইলেক।

১৮ কিন্তু ভগবান দয়া করি একটা প্রতিজ্ঞার মইদ্বো দিয়া অব্রাহামক আশুর্বাদ করিচে। ভগবানের আশুর্বাদ পাওয়া যদি বিধান পালনের উপরাত নির্ভর করে, তাইলে আর সেইটার উপরাত প্রতিজ্ঞা নির্ভর করিলেক না।

১৯ তাইলে কেনে বিধান দেওয়া হইচে? কেনেনা মানষি পাপ করে। বিধান থাকিবে যতক্ষণ পর্যন্ত অব্রাহামের গুটিরটে ভগবানের প্রতিজ্ঞা আসিচে। স্বর্গদূতলার মইদ্বো দিয়া এক ঘটকক মানে মোশিক দিয়া এই বিধান চালু করা হইছিলেক।

২০ কিন্তুক খালি একলায় থাকিলে ঘটকের দরকার নাই, আর ভগবান তো একলায়।

২১ তাইলে বিধান কি ভগবানের প্রতিজ্ঞার বিরুদ্ধে? নিশ্চয় না হয়। ভগবান যদি এই নাকান বিধান দিলেক হয়, যেইলা জীবন দিবার পায় তাইলে সেইলা পালনের মইদ্বো দিয়া ভগবান মানষিক মানি নিলেক হয়।

২২ কিন্তুক পবিত্র শাস্ত্র সউগ মানষিক পাপের বাদে দোষী বুলিয়া থির করিচে, যাতে যীশুর উপরাত যায় যায় বিশ্বাস করে উমরা উমার বিশ্বাসের বাদে প্রতিজ্ঞার উপরাত আশুর্বাদ পায়।

২৩ বিশ্বাস আসির আগোত বিধির বিধান হামারলাক পাহারা দিয়া থুইছিলেক। আর যত দিন এই বিশ্বাস দেখা দিলেক না,

ততদিন পর্যন্ত হামারলাক বন্দী করি থুইছিলেক।

২৪ তাইলে দেখা যাবার ধরচে খ্রীষ্টেরটে পৌছি দিবার বাদে এই বিধির বিধান হামারলার চালনাকারি। যাতে বিশ্বাসের মইদ্বো দিয়া হামারলাক নির্দোষ বুলি মানি নেওয়া হয়।

২৫ কিন্তুক এলা বিশ্বাস আসিচে বুলিয়া এই বাদে হামরা আর বিধির বিধান চালনার অধীন না হই।

২৬ যীশু খ্রীষ্টের উপরাত বিশ্বাসের মইদ্বো দিয়া তোমরালা সগায় ভগবানের বেটা হইচেন,

২৭ কেনেনা তোমরা যায় যায় খ্রীষ্টের মইদ্বো দিয়া দীক্ষা নিচেন, তোমরা কাপড়ের নাকান করি খ্রীষ্টক দিয়া নিজক ঢাকি থুইচেন।

২৮ যিহুদী আর অযিহুদীর মইদ্বোত চাকর আর স্বাধীন মানষির মইদ্বোত, বেটাছাওয়া আর বেটিছাওয়ার মইদ্বোত কোন ফারাক নাই, কেনেনা যীশু খ্রীষ্টের নগত একটে হয় তোমরা সগায় এক হইচেন।

২৯ যেলা তোমরালা খ্রীষ্টের হইচেন সেলা অব্রাহামের গুটির হইচেন। আর ভগবান যেইলা দিবার প্রতিজ্ঞা অব্রাহামেরটে করিছিলেক তোমরালাও সেইলা পাবার অধিকার পাইচেন।

৪ বাপের সউগ কিছুর উপরাত ছাওয়ার অধিকার থাকিলেও যত দিন সেই ছাওয়াটা নাবালক থাকে, ততদিন পর্যন্ত উয়ার সোদে চাকরের মইদ্বোত কোন ফারাক থাকে না।



২ যেহেতু উয়ার বাপ ঠিক করে যে, ছাওয়াটা যত দিন সাবালোক না হয়, ততদিন পর্যন্ত উয়ার বাপের ভাড়া দেওয়া মানষিলার অধীনত থাকির নাগিবে।

৩ একে নাকান করি হামরাও যেহেতু ছোট আছিলোং সেহেতু দুনিয়ার নানান রীতিনীতির চাকর আছিলোং।

৪ কিন্তুক ঠিক সমায়ে ভগবান উয়ার বেটাক পেঠে দিলেক। সেই বেটাটা বেটিছাওয়ার গর্ভত জন্ম নিলেক আর উয়ায় বিধির বিধান মানিয়া জীবন কাটাইলেক,

৫ যাতে বিধির বিধানের বশ মানি থাকা মানষিলাক উয়ায় স্বাধীন করির পায়। আর ভগবানের ছাওয়া হিসাবে হামারলাক মানি নিবার পায়।

৬ তোমরা সগায় ভগবানের ছাওয়া, এই বাদে ভগবান উয়ার বেটার আত্মাক তোমারলার অন্তরত পেঠাইচে। এই আত্মা ভগবানক আব্বা, মানে বাপ বুলি ডেকায়।

৭ এই বাদে তোমরা আগের নাকান আর চাকর না হন, ভগবানের ছাওয়া। এলা তোমরালা ভগবানের ছাওয়া, এই বাদে ভগবান যেইলা দিবে কয়া প্রতিজ্ঞা করিচে সেইলা তোমারলাক দিবে।

৮ আগোত যেহেতু তোমরালা ভগবানক জানেন নাই সেহেতু তোমরা যেইলা দেবতার সেবা করিচেন সেইলা আসলে ভগবান না হয়।

৯ কিন্তুক তোমরা এলা সচাং করি ভগবানক জানির পাইচেন, এই কতা কওয়া ভাল যে, ভগবানে তোমারলাক জানিবার দিচে। তাইলে কেনে তোমরা আরো দুনিয়ার সেই নানা নাকান দুর্বল আর ফলহীন রীতিনীতির ওদিয়া ফিরিচেন? তোমরা কি আরো ঐলার চাকর হবার ধরচেন?

১০ তোমরা বিশেষ বিশেষ দিন, মাস, ঋতু আর বছর পালন করির ধরচেন।

১১ তোমারলার বাদে মোর ভয় হবার ধরচে যে, তোমারলার মইন্ধোত হয় তো মুই বেকার খাটনি করির ধরচুং।

১২ ভাই বইনিলা, তোমারলাক মুই অনুরোধ করির ধরচুং, তোমরালা মোর নাকান হন, কেনেনা মুইও তোমারলার নাকান হইচুং। তোমরা মোর উপরা কোনো অন্যায় করেন নাই।

১৩ তোমরা জানেন যে, মোর দেহা অসুস্থ আছিলেক বুলিয়া মুই পইলাবার তোমারলারটে ভাল খবর প্রচার করির সুযোগ পাইছিলুং।

১৪ যদিও মোর অসুস্থতা তোমারলাক কষ্ট দিছিলেক তাণ্ডো তোমরালা মোক তুচ্ছ বা ঘিন খান নাই, তোমরা বরং ভগবানের দূতক আর খ্রীষ্ট যীশুক যেই নাকান করি মানিচেন, সেই নাকান করি তোমরা মোকও মানি নিচেন।

১৫ কিন্তু এলা তোমারলার সেই আনন্দ কোটে গেইলেক? মুই তোমারলার বাদে এই সাক্ষ্য দিবার পাং যে, যদি সম্ভব হইলেক

হয়, সেলো তোমরা তোমারলার চখু তুলি নিয়া মোক দিলেন হয়।

১৬ এলা সচাং কতা কবার যায় কি মুই তোমারলার শত্রু হইচুং?

১৭ অইন্য মানষিলা তোমারলার বাদে আগ্রহ দেখাইচে, কিন্তুক সেইটা কোনো ভাল উদ্দেশ্যের বাদে না হয়। উমরা তোমারলাক মোরটে থাকি আলদা করির চায়, যাতে তোমরালা উমরালার বাদে আগ্রহী হন।

১৮ এইটা সচাং যে, ভাল উদ্দেশ্যের বাদে আগ্রহ থাকা দরকার। যেলা মুই তোমারলার ওটেকোনা হাজির থাকং, খালি সেলোয় না হয়, কিন্তু সউগ সমায় আগ্রহ থাকা ভাল।

১৯ হে মোর ছাওয়ার ঘর, যত দিন না তোমরা খ্রীষ্টের নাকান হন, ততদিন পর্যন্ত মুই আরো তোমারলাক নিয়া ছাওয়া জন্ম দেওয়া বিষ ওঠার নাকান কষ্ট ভোগ করির ধরচুং।

২০ এলা তোমারলারটে যাবার মোর খুব ইচ্ছা হবার ধরচে, মুই মোর কতা বদলে নরম করি কবার পারং, আসলে মুই বুঝির পাবার ধরচুং না যে, তোমারলাক নিয়া কি করিম!

২১ তোমরা যায় যায় বিধানের বশে থাকির চাবার ধরচেন, তোমরা মোক কন দেখি, বিধানত যেটা কয়, সেইটা কি তোমরা শুনির না পান?

২২ শাস্ত্রত নেখা আছে, অব্রাহামের দুইটা বেটা আছিলেক, উমারলার একজনের মাও আছিলেক এক জন চাকরানী হাগার,

আর আরেক জনের মাও আছিলেক অব্রাহামের আসল বিয়ার  
ভার্জা সারা।

২৩ অব্রাহামের চাকরানী ভার্যারটে যে বেটা জন্ম নেয়, উয়ার  
জন্ম স্বাভাবিক হয়। কিন্তুক আসল ভার্জার গর্ভত যে বেটা জন্ম  
হইছিলেক, সেই ছাওয়াটা ভগবানের প্রতিজ্ঞা মতন জন্ম  
হইছিলেক।

২৪ গল্পের উদ্দেশ্যে মুই এই কতালা কবার ধরচুং। এই দুই জন  
বেটিছাওয়া দুইটা চুক্তিক বুঝায়। একটা সিনাই পাহাড় থাকি  
আসচে আর উয়ার বশে থাকা মানষিলাক চাকর হবার ঘাটাত  
নিয়া যাবার ধরচে। এইটায় হইলেক সেই চাকরানী হাগার।

২৫ হাগার হইলেক আরব দেশের সিনাই পাহাড়ের মত। উয়ায়  
এলা যিহুদীলার গঞ্জ যিরুশালেমের নাকান, কেনেনা যিরুশালেম  
উয়ার বেটা বেটিলাক নিয়া চাকরানী হইচে।

২৬ কিন্তুক যে দ্বিতীয় ভার্জা এলা স্বর্গের যিরুশালেমের নাকান,  
উয়ায় হামারলার মাও, উয়ায় চাকরানী না হয়।

২৭ শাস্ত্রত নেখা আছে, “হে আটকুড়ি বেটিছাওয়া, যার কোন  
দিন ছাওয়া নাই হয়, তুই আনন্দে গান করেক। যার কোনো দিনও  
ছাওয়া হওয়া বিষ ওঠা না জানে, তায় আনন্দে চিকরুক।  
কেনেনা যার সোয়ামি আছে উয়ার চায়া যার সোয়ামি ছাড়িয়া  
চলি গেইচে উয়ারে মেলা ছাওয়া হবে।”

২৮ ভাই বইনিলা, তোমরাও ইসহাকের নাকান ভগবানের প্রতিজ্ঞার ছাওয়া।

২৯ কিন্তুক সেই সমায় যার স্বাভাবিক ভাবে জন্ম হইছিলেক, উয়ায় অইত্যাচার করির ধরছিলেক উমার উপরাত যার পবিত্র আত্মার মইদ্বো দিয়া জন্ম হইছিলেক। আর এলাও সেইটা হবার ধরচে।

৩০ কিন্তু পবিত্র শাস্ত্র কি কয়? পবিত্র শাস্ত্র কয় যে, “চাকরানী আর উয়ার বেটাক যাতে বাইর করি দেওয়া হয়, কেনেনা চাকরানীর বেটা কোন মতেই বৈধ ভার্জার বেটার নগত কোনো সম্পত্তির ভাগ পাবার পায় না।”

৩১ ভাই বইনিলা, তাইলে এই বাদে হামরা চাকরানীর ছাওয়া না হই, বরং হামরা বৈধ ভার্জার ছাওয়া।

৫ খ্রীষ্ট হামারলাক স্বাধীন করিচে, যাতে হামরা স্বাধীন থাকির পাই। এই বাদে তোমরা শক্ত হয়্যা খাড়া হন, যাতে তোমারলাক আর কাণ্ডো যাতে বিধানের চাকর বানের না পায়।

২ মুই পৌল তোমারলাক কবার ধরচুং, ভাল করি শোন, যদি তোমরালা সুনত করেন তাও তোমারলারটে খ্রীষ্টের কোন দাম নাই।

৩ যে কোনো মানষিক সুনত করা হয় উয়ায় পুরাপুরি মোশির বিধান পালন করির বাধ্য।

৪ তোমরা যায় যায় বিধান পালন করিয়া ধার্মিক হবার চান, তোমরা তো খ্রীষ্টের থাকি যুদা হয় ভগবানের দয়া থাকি বঞ্চিত হইচেন।

৫ কিন্তুক হামারলাক যে নির্দোষ বুলিয়া মানি নেওয়া হবে, সেই বিশ্বাসে মুক্তির বাদে পবিত্র আত্মার মইদ্বো দিয়া হামরা বাচ্ছে আছি;

৬ কেনেনা যায় যায় যীশু খ্রীষ্টের, উমারলারটে সুনত করা বা না করার কোন দাম নাই, কিন্তুক যেই বিশ্বাস পিরিতের মইদ্বো দিয়া কাম করে সেই বিশ্বাসে হইলেক আসল জিনিস।

৭ তোমরা তো বেশ ভাল করি চলির ধরছিলেন; তাইলে সইতের ঘাটাত চলির কায় তোমারলাক বাধা দিলেক?

৮ যে কতাটা তোমরা মানি নিচেন, যায় তোমারলাক ডেকাইচে সেই ভগবানেরটে থাকি এই বাধা আইসে নাই।

৯ সাবধান হন! অল্প খানিক সোডা একটা গোটায় ময়দার দালাক ফাঁপে তোলে।

১০ তোমারলার সমন্ধে প্রভুর উপরত মোর এই বিশ্বাস আছে যে, তোমরা আর অইন্য কোন মতামত মানি না নিবেন। কিন্তুক যায় তোমারলার মইদ্বোত অস্থিরতা সিদ্ধজন করিচে, উয়ায় যে কাণ্ডোয় হউক না কেনে, উয়ার পাওনা শাস্তি উয়াক ভোগ করির নাগবে।

১১ ও মোর ভাই বইনিলা, যদি মুই এলাও প্রচার করং যে, মানষিলার মোশির বিধান মতে সুনত করা দরকার তাইলে কেনে

মোক এলাও অইত্যাচার করা হবার ধরচে? এই সুনত সমন্ধে যদি মুই এলাও কং, তাইলে ক্রুশের উপরাত খ্রীষ্টের মরণের কতা কবার মনত কোন বাধা রইলেক না হয়।

১২ যায় যায় তোমারলার মইদ্বোত অস্থিরতা সিদ্ধজন করির ধরচে, মুই চাং উমরা যাতে নিজেই নপুংসক হয়।

১৩ ভাই বইনিলা, স্বাধীন হবার বাদেই তো ভগবান তোমারলাক ডেকাইচে। কিন্তুক তোমারলার পাপ স্বভাবের ইচ্ছা পূরণ করির বাদে এই স্বাধীনতা ব্যবহার করেন না। ইয়ার চায়া বরং পিরিতের মনোভাব নিয়া একে অপরের সেবা কর,

১৪ কেনেনা সউগ বিধির বিধানক একটে করি এইটায় কওয়া হইচে, “তোমার পাড়া-পড়শিক নিজের নাকান পিরিত কর।”

১৫ কিন্তুক তোমরা যদি একে অপরের সোদে ঝগড়া-ঝাটি আর হিংসা-হিংসি করেন, তাইলে সাবধান! এই নাকান করিলে তো তোমরা একে অপরক নাশ করি ফেলোবেন।

১৬ মুই যেইটা কবার ধরচুং সেইটা এই যে, তোমরা পবিত্র আত্মার অধীনত চলাফিরা কর। সেইটা করিলে তোমারলার পাপ-স্বভাবের ইচ্ছা জাগির না হয়।

১৭ পাপ-স্বভাব যেইটা চায় সেইটা পবিত্র আত্মার বিরুদ্ধে আর পবিত্র আত্মা যেইটা চায় সেইটা পাপ স্বভাবের বিরুদ্ধে। পাপ স্বভাব আর পবিত্র আত্মা একে অইন্যের বিরুদ্ধে এই বাদে তোমরা যেইটা করির চান সেইটা করেন না।

১৮ তোমরা যদি পবিত্র আত্মার অধীনে চলেন তাইলে তোমরা  
নিয়মের অধীন না হন।

১৯ পাপ-স্বভাবের কাম ঝকঝকা করি দেখা যায়। সেইলা  
হইলেক ব্যভিচার, অশুদ্ধি, লম্পটতা,

২০ প্রতিমা-পূজা, যাদুবিদ্যা, শত্রুতা, দন-ঝগড়া, লোভ, রাগ,  
স্বার্থপরতা, অমিল, দলাদলি,

২১ হিংসা, মাতলামি, হৈ-হল্লা করি মদ খাওয়া এই নাকানের  
আরো মেয়ো কিছু। মুই যেমন ইয়ার আগত তোমারলাক সাবধান  
করি দিচুং, এলা আরেক বার করির ধরচুং, যায় যায় এই  
নাকানের কাম করে, উমরালা ভগবানের রাজ্যত সোন্দের  
অধিকার পাবে না।

২২ কিন্তু পবিত্র আত্মার ফল হইলেক পিরিত, আনন্দ, শান্তি,  
সহ্যগুণ, দয়ার স্বভাব, ভাল স্বভাব, বিশ্বস্ততা,

২৩ নম্র স্বভাব আর নিজক দমন করা। এইলার বিরুদ্ধে কোনো  
নিয়ম নাই।

২৪ যায় যায় যীশু খ্রীষ্টের, উমরা উমারলার সউগ কামনা  
বাসনার পাপ স্বভাব ক্রুশত দিয়া শেষ করি ফেলাইচে। মানে  
পুরান নালসা ছাড়ি দিচে।

২৫ যদি হামরা পবিত্র আত্মার মইন্ধো দিয়া জীবন পায়া থাকি,  
তাইলে আইসো, হামরা পবিত্র আত্মার মইন্ধো দিয়ায় চলা ফিরা  
করি।



২৬ হামরা যাতে বেকার অহংকার না করি আর একে অপরক বিরক্তি আর হিংসা না করি।

৬ ভাই বইনিলা, তোমারলার মইন্ধোত যদি কাণ্ডো কোনো পাপের ফান্দোত পড়ে, তাইলে তোমারলার মইন্ধে যায় যায় পবিত্র আত্মার অধীনে চলা ফিরা করির ধরচেন তোমরা উয়াক তুলি আনো, কিন্তুক খুব নম্র মনোভাব নিয়া করো আর নিজের বিষয়ে সাবধান থাকেন যাতে তোমরা পাপত না পরেন।

২ তোমরা একে অপরের ভার উবান। এই নাকান করি তোমরা খ্রীষ্টের বিধান পালন কর।

৩ কোন মানষি যদি নিজক মুই কি হলুং বুলি মনে করে তাইলে উয়ায় নিজক ঠকায়।

৪ সগায় নিজক যাচাই করি দেখুক। তাইলে অইন্যের নগত নিজের তুলনা না করিয়া উয়ার নিজের কামের বাদে গুণগান করির পাবে।

৫ কারন সগারে উচিত নিজের দায়িত্ব নিজে পালন করা।

৬ যাক ভগবানের বাইক্য শিক্ষা দেওয়া হয় উয়ায় যাতে উয়ার মাষ্টারক উয়ার সউগ ভাল জিনিসের ভাগ দেয়।

৭ তোমরালা ভুল করেন না, ভগবানের সোদে তামশা করা চলে না; কেনেনা যায় যেই নাকান বিচন ফেয়লাবে উয়ায় ঐ নাকান

ফসল কাটিবে।

৮ পাপ-স্বভাবক খুশি করির বাদে বিচন ফেলাইলে উয়ারটে থাকি ধ্বংসের ফসল আসিবে। কিন্তুক পবিত্র আত্মাক খুশি করির বাদে বিচন ফেলাইলে উয়ার থাকি অমৃত জীবনের ফসল আসিবে।

৯ হামরা যাতে সৎকাম করিতে করিতে হাপসি না যাই, কেনেনা সেই হাল ছাড়ি না দিয়া করিতে থাকিলে হামরা ঠিক সমায় উয়ার ফসল পামু।

১০ সুযোগ পাইলে হামারলার সগারে বাদে উপকার করা উচিত, বিশেষ করি গুরু ভাই-বইনিলার পরিবারের বাদে।

১১ দেখ, কত বড় বড় অক্ষরে মুই নিজের হাতে তোমারলারটে নেখির ধরচুং!

১২ যায় যায় বায়রাত নিজক ভাল দেখের চায় উমরালায় তোমারলাক সুন্নত করির বাধ্য করির ধরচে। খ্রীষ্টের ক্রুশের মরণের বাদে যাতে উমারলার উপরাত অইত্যাচার না আইসে এই বাদে উমরা এই নাকান করির ধরচে।

১৩ যার যার সুন্নত করা হয় উমরাও তো বিধান পালন করে না। তাণ্ডা উমরা তোমারলার সুন্নত করির চায়, উদ্দেশ্য হইলেক তোমারলার দেহাত চিন দিয়া বশ করির পারিলে এই কামের বাদে উমরা গর্ব করিবে।

১৪ কিন্তুক মুই কং খালি হামার প্রভু যীশুর ক্রুশ ছাড়া যাতে আর  
অইন্য কিছু বাদে মুই গর্ব না করং। এই ক্রুশের মইন্দো দিয়ায়  
দুনিয়া মোরটে মরি গেইচে আর মুইও দুনিয়ারটে মরি গেইচোং।

১৫ সুনত করা বা না করার কোন দাম নাই, খ্রীষ্টের মইন্দো দিয়া  
নয়া করি সিঙ্গন হওয়াটায় হইলেক বড় কতা।

১৬ ভগবানের মানষিলা যায় যায় এই নিয়মে চলে, উমরা  
ভগবানের বাছাই করা জাতি, ভগবান উমারলাক শান্তি আর দয়া-  
মায়া দান করুক।

১৭ চিঠি নেখা শেষ করির আগত মোর মিনতি, কাঙো যাতে  
মোক কষ্ট না দেয়। কেনেনা যীশুর আউলি যাওয়া ঘাউয়ার চিন  
মুই মোর দেহাত উবি নিয়া বেড়ের ধরচুং।

১৮ ভাই-বইনিলা, হামারলার প্রভু যীশু খ্রীষ্টের দয়া তোমারলার  
অন্তরত থাকুক। আমেন॥

# ইফিষীয়

১ মুই পৌল, ভগবানের ইচ্ছায় যীশু খ্রীষ্টের এক জন খবরিয়া।  
ইফিষ গঞ্জত যায় যায় ভগবানের মানষি আর প্রভু যীশুর শিষ্য  
উমারলারটে মুই এই চিঠি নেখির ধরচুং।

২ হামারলার স্বর্গের বাপ আর প্রভু যীশু খ্রীষ্ট তোমারলাক দয়া  
আর শান্তি দান করুক।

৩ হামারলার প্রভু যীশু খ্রীষ্টের বাপ আর ভগবানের গুণগান  
হউক। হামরা খ্রীষ্টের সোদে একটে হইচি বুলিয়া ভগবান স্বর্গের  
সউগ আত্মিক আশুর্বাদ হামাক দান করিচে,

৪ হামরা যাতে ভগবানের চখুত পবিত্র আর নিখুঁত হবার পাই, এই  
বাদে ভগবান দুনিয়া সিড্জনের আগত খ্রীষ্টের মইন্ধো দিয়া  
হামারলাক বাছাই করি নিচে।

৫ উয়ার পিরিতির মইন্ধো দিয়া উয়ায় খুশি হয় নিজেই ইচ্ছা  
মতন আগতে ঠিক করি থুইচে যে, যীশু খ্রীষ্টের মইন্ধো দিয়া উয়ার  
ছাওয়ার নাকান করি উয়ায় হামারলাক মানি নিবে।

৬ উয়ায় এইটা করিলেক যাতে উয়ার আদরের বেটার মইন্ধো  
দিয়া খোলা মনে যে মহিমার দয়া হামারলাক দান করিচে, সেই  
দানের গুণগান করির পায়।

৭ ভগবানের অসীম দয়ার বাদে খ্রীষ্টের সোদে একটে হয় উয়ার অক্ল দিয়া হামরা মুক্তি লাভ করচি, মানে পাপের ক্ষমা পাইচি।

৮ এই দয়া ভগবান উয়ার মহা জ্ঞান আর বুদ্ধির নগত দুই হাতে হামারলাক দান করিচে।

৯ ঠিক যেই নাকান উয়ায় চাইছিলেক আর খ্রীষ্টের মইদ্বো দিয়া আগতে থির করি থুইছিলেক, সেই অনুসারে উয়ায় উয়ার আসল গোপন তথ্য হামারলাক জানাইছিলেক।

১০ উয়ায় থির করি থুইছিলেক যে, ঠিক সমায় আসিলে সেই উদ্দেশ্যের কাম করির বাদে উয়ায় স্বর্গের আর দুনিয়ার সউগ কিছু একটে করিয়া খ্রীষ্টের শাসনের অধীনত আনিবে।

১১ ভগবান উয়ার নিজের ইচ্ছা মতন সউগ কাম করে। উয়ার উদ্দেশ্য অনুসারে উয়ায় আগতে যেইলা ঠিক করি থুইচে, সেই নাকান খ্রীষ্টের মইদ্বো দিয়া উয়ার নিজের মানষি হবার বাদে উয়ায় হামারলাক বাছাই করি নিচে।

১২ হামরা যায় যায় আগতে খ্রীষ্টের উপরাত আশা করচি, এই বাদেই উয়ায় হামারলাক বেছি নিচে যাতে হামারলার মইদ্বো দিয়া ভগবানের গুণগান হয়।

১৩ আর তোমরাও সইত্যের বাইক্য, মানে পাপ থাকি মুক্তি পাবার ভাল খবর শুনিয়া খ্রীষ্টের উপরাত বিশ্বাস করিচেন। খ্রীষ্টের নগত যুক্ত হইচেন বুলিয়া ভগবান উয়ার প্রতিজ্ঞা করা পবিত্র আত্মা দিয়া তোমারলাক সীলমোহর দিয়া থুইচে।

১৪ যেইলা মানষিক ভগবান উয়ার নিজের সম্পত্তি মনে করিচে, ভগবান উমারলাক পইলা অংশ আশুবাদ হিসাবে পবিত্র আত্মা দান করিচে। এই পবিত্র আত্মা হইলেক জামিনদার, এই বাদে হামরা ভগবানের আশুবাদ পামো। যতক্ষণ পর্যন্ত হামারলাক পুরাপুরি মুক্তি করা না হয়। আর এইলা দিয়ায় ভগবানের মহিমার গুণগান হবে।

১৫ ইয়ার কারন হইলেক, তোমারলার প্রভু যীশুর উপরা যে বিশ্বাস আর সউগ পবিত্র মানষির প্রতি তোমারলার যে পিরিতি আছে, এই কতা শুনিয়া মুই তোমারলার বাদে ধন্যবাদ দিবার ভোলং নাই।

১৬ মুই সেলো থাকি তোমারলার বাদে প্রার্থনা করির সমায় ফম করং।

১৭ মুই প্রার্থনা করং যাতে হামার প্রভু যীশু খ্রীষ্টের ভগবান মানে স্বর্গের মহিমার বাপ তোমারলাক আত্মিক জ্ঞান আর বুঝিবার ক্ষমতা দান করে। যাতে তোমরালা উয়াক আরো ভাল করি জানির পান।

১৮ মুই আরো প্রার্থনা করং, যাতে তোমারলার অন্তর চখু খুলি যায়। আন্ধার দূর করিয়া ভগবানের জ্ঞানে আলোময় হয়, তোমরা জানেন যে উয়ায় কি আশায় তোমারলাক ডেকাইচে। আর সেই মহিমার ধন ভগবান উয়ার পবিত্র মানষিলাক দিবার বাদে থির করি থুইচে।

১৯ হামরা যায় যায় প্রভুক বিশ্বাস করি, হামার মইন্ধোত যে মহাশক্তি কাম করির ধরচে সেইটা যাতে বুঝির পাই।

২০ সেই মহাশক্তি দিয়া পরমপ্রভু যীশু খ্রীষ্টক মরণ থাকি বভে তুলিচে, আর স্বর্গত উয়ার ডাইন পাকে বসাইচে।

২১ যার হাতত শাসন, ক্ষমতা, আর শক্তি, অধিকার আছে, উমারলাক খ্রীষ্টের অধীনত আনিচে। আর যাক যেই নামেই দেওয়া হউক না কেনে, সেইটা এই যুগের হউক আর আইসা যুগের হউক, সউগ নামের উপরাত খ্রীষ্টের নাম।

২২ ভগবান উয়াক সউগ কিছুর অধিকার দিচে, আর উয়াকে সমিতির মাথা হিসাবে মানা হইচে উয়ায়ে সউগ কিছু।

২৩ এই সমিতি আসলে খ্রীষ্টের দেহ। উয়ায় সউগ পাক থাকি সউগ কিছুই পূরণ করে, সেই খ্রীষ্টের পূরণ করা হইলেক এই সমিতি।

২ তোমরালা নিজ নিজ অবাধ্যের আর পাপের ফলে মরি গেইছিলেন।

২ দুনিয়ার চিন্তা ধারা অনুসারে তোমরালাও এক সমায় অবাধ্য হয়্যা পাপের মইন্ধোত চলাফিরা করির ধরছিলেন। যে আত্মা দুনিয়ার ক্ষমতালীলার রাজা, সেই অসুরের আত্মা ভগবানের অবাধ্য মানষিলার মইন্ধোত কাম করির ধরচে। আর তোমরালাও সেই বেয়া আত্মার পাছে পাছে চলির ধরচেন।

৩ হামরা সগায় হামার পাপ-স্বভাবের ইচ্ছা পূরণ করির বাদে ঐ মানষিলার মইন্ধোত জীবন কাটের ধরছিলং, এই পাপ স্বভাব আর মনের ইচ্ছার বাদে ভগবান হামারলাক গোসার যোগ্য আছিলোং।

৪ কিন্তু ভগবান দয়ার ভান্ডার উয়ায় হামারলাক খুব পিরিত করে,

৫ যেলা পাপের বাদে হামরা আত্মিক দিক দিয়া মরি গেইছিলোং সেলা যীশু খ্রীষ্টের নগত উয়ায় হামারলাক নয়া করি জীবন দিলেক। ভগবানের দয়ায় তোমরালা পাপ থাকি মুক্তি পাইচেন।

৬ ভগবান হামাক খ্রীষ্টের নগত মরণ থাকি বত্তে তুলিয়া খ্রীষ্টের সোদে স্বর্গত বসাইচে।

৭ উয়ায় এইটা কাম করিচে যাতে উয়ায় তুলনাহীন অশেষ দয়া আইসা যুগে যুগে দেখের পায়। ভগবান খ্রীষ্ট যীশুর মইন্ধো দিয়া হামারলার উপরাত যে দয়া করিচে তাতে উয়ার এই দয়া প্রকাশ পাইচে।

৮ ভগবানের দয়ায় বিশ্বাসের মইন্ধো দিয়া তোমরা পাপ থাকি মুক্তি পাইচেন। এইটা তোমারলার নিজের চেষ্টাতে হয় নাই, এইটা ভগবানেরে দান।

৯ এইটা কামের ফল হিসাবে দেওয়া হয় নাই, যাতে কাণ্ডো গর্ব করির না পায়।

১০ হামরা ভগবানের হাতে গড়া। ভগবান খ্রীষ্ট যীশুর নগত একটে করিয়া হামারলাক নয়া করি সিদ্ধজন করিচে, যাতে হামরা



সং কাম করি। এই সং কাম উয়ায় আগতে ঠিক করি থুইচে, যাতে হামরা এইটা করি জীবন কাটাই।

১১ তোমরা অযিহুদী হয় জন্ম নিচেন। যিহুদী মানষিলার দেহাত চিন দেওয়া হইচে, উমার পুরুষাংগের চামড়া কাটা হইচে খালি মানষির হাত দিয়া, কিন্তু উমরা তোমারলাক চিন না দেওয়া মানষি কয়া তুচ্ছ করে।

১২ ফম করো, আগোত তোমরা খ্রীষ্টের থাকি দূরত আছিলেন; জাতি হিসাবে ইজ্রায়েলীলার যে অধিকার তোমারলাক দেওয়া হয়, সেই অধিকারের বায়রাত আছিলেন; ভগবান ইজ্রায়েল জাতির বাদে যে কয়টা চুক্তির প্রতিজ্ঞা করিচিলেক, উয়ার নগত তোমারলার কোন সমন্ধ আছিলেক না; তোমারলার কোন আশা আছিলেক না; আর এই দুনিয়াত তোমরা ভগবান ছাড়ায় আছিলেন।

১৩ এক কালে তোমরা দূরত আছিলেন, কিন্তুক খ্রীষ্টের নগত একটে করিয়া তোমারলাক এলা উয়ার অক্ল দিয়া উয়ার বগলত আনা হইচে।

১৪ উয়ায় হামারলার শান্তি। যিহুদী আর অযিহুদী জাতিক উয়ায় এক করিচে। এই দুই জাতির মইন্ধোত যে শত্রুয়ামির দেওয়াল আছিলেক সেইটা ভাঙিয়া চুরমার করিচে।

১৫ উয়ায় উয়ার ক্রুশত দেওয়া দেহার মইন্ধো দিয়া মোশির বিধানের সউগ আদেশ আর নিয়ম বাতিল করিচে। উয়ায় এইটা

করিচে যাতে ঐ দুই জাতি দিয়া নিজেই একটা নয়া মানষি সিদ্ধজন করির পারে। আর যাতে উমার মইদ্বোত শান্তি রয়।

১৬ এইটাও উয়ার উদ্দেশ্য আছিলেক যে, উয়ার ক্রুশত মরণের মইদ্বো দিয়া সেই দুইটাক উয়ায় এক দেহাত ভগবানের নগত আরো মিলন করিলেক, কেনেনা এই দুইটার মইদ্বো যে শত্রু ভাব আছিলেক সেইটাক উয়ায় উয়ার ক্রুশের মরণের মইদ্বো দিয়া নাশ করিলেক।

১৭ তোমরা যায় যায় দূরত আছিলেন আর উমরা যায় যায় উয়ার বগলত আছিলেক, সগারেটে আসিয়া উয়ায় শান্তির ভাল খবর প্রচার করিলেক।

১৮ উয়ার মইদ্বো দিয়া একে পবিত্র আত্মা দিয়া স্বর্গের বাপেরটে যাবার অধিকার হামারলার সগারে আছে।

১৯ এই বাদে তোমরালা আর অচেনা না হন, বৈদেশীয়াও না হন; কিন্তুক ভগবানের মানষিলার নগত তোমরাও উয়ার শাসনের আর উয়ার পরিবারের মানষি হইচেন।

২০ যীশুর খবরিয়ালা আর ভগবানের ভাববাদীলা হইলেক ভিটি, আর সেই ভিটির প্রধান শিল হইলেক খ্রীষ্ট যীশু। উয়ারে উপরাত তোমারলাক গাথি তোলা হবার ধরচে।

২১ খ্রীষ্টের নগত যুক্ত থাকিবার বাদে দালানের সউগ অংশ একটে হয়া প্রভুতে আরো বাড়ি উঠিবার বাদে একটা পবিত্র মন্দির গড়ে তোলা হইচে।

২২ তোমরা উয়ারে নগত একটে হইচেন আর এই বাদে তোমারলাকও একে নগত গাথি তোলা হবার ধরচে। যাতে পবিত্র আত্মার মইন্ধো দিয়া তোমরালার দেহা ভগবানের থাকিবার ঘর হয়।

৩ মুই পৌল এই বিষয়লা ভাবিয়া ভগবানেরটে প্রার্থনা করির ধরচুং। তোমরা যায় যায় অযিহুদী তোমারলার বাদে মুই জেলত যীশু খ্রীষ্টের প্রচারের বাদে বন্দী হইচুং।

২ তোমরালা নিশ্চয় শুনিচেন যে, ভগবান দয়ার মূল কতা তোমারলাক শোনেবার ভার মোর উপরাত দিচে।

৩ উয়ার গোপন তথ্য উয়ায় বিশেষ করি মোক জানাইচে, আর মুই সেইলা অল্প কতাত তোমারলারটে নেখিলুং।

৪ তোমরালা সেইলা পড়িলে বুঝির পাবেন যে, খ্রীষ্টের বিষয়ে গোপন তথ্য মোর বুঝির ক্ষমতা আছে।

৫ সেই গোপন তথ্য পবিত্র আত্মার মইন্ধো দিয়া এলা যেই নাকান করি উয়ার পবিত্র খবরিয়ালা আর ভাববাদীলারটে নিকিলি দেওয়া হইচে, আগের কালের মানষিলারটে সেই নাকান করি নিকিলি দেওয়া নাই হয়।

৬ সেই গোপন তথ্য হইলেক ভাল খবরের মইন্ধো দিয়া অযিহুদীলা খ্রীষ্টের নগত একটে হয়। যিহুদীলার নগত একে নাকান

সুযোগ সুবিধার অধিকারী পাবে। একটা দেহার অংশ হবে, আর একটায় প্রতিজ্ঞার আশুর্বাদের ভাগী হবে।

৭ ভগবান উয়ার মহাশক্তি দিয়া মোক যে দয়া করিচে সেই দয়ার দান হিসাবে উয়ায় মোক ভাল খবর প্রচার করির কাম দিচে।

৮ ভগবানের মানষিলার মইন্ধোত মোর চায়া নগন্য আর কাণ্ডো নাই, কিন্তুক ভগবান মোক যে দয়া করিচে যাতে মুই অযিহুদীলারটে খ্রীষ্টের যে অটেল ধন আছে, সেইটায় ভাল খবরের মইন্ধো দিয়া উমারলাক জানাং।

৯ এইলা ছাড়া উয়ার গোপন তথ্য কেংকরি কামত নাগা হবে, সেইটা প্রকাশ করিবার ভারও উয়ায় মোর উপরাত দিচে। সউগ কিছুর সিদ্ধজনকর্তা ভগবান এতকাল ধরি উয়ার সেই উদ্দেশ্য গোপন করি থুইচে।

১০ উয়ায় এইটা করিচিলেক ভগবানের বুদ্ধি যাতে সউগ পাকে খ্রীষ্টের সমিতিলা মইন্ধো দিয়া স্বর্গের সউগ শাসন আর অধিকারিলারটে প্রকাশ পায়।

১১ এইটায় আছিলেক উয়ার চিরকালের ইচ্ছা, আর এই ইচ্ছা উয়ায় হামার প্রভু যীশু খ্রীষ্টের মইন্ধো দিয়া পূরণ করিচে।

১২ খ্রীষ্টের নগত একটে হয়া উয়ার উপরাত বিশ্বাসের মইন্ধো দিয়া হামরা ভগবানের আগত সাহস আর আত্মবিশ্বাস নিয়া উয়ারটে আসির পাই।

১৩ এই বাদে মুই অনুরোধ করির ধরচুং, তোমারলার বাদে দুঃখ-  
কষ্ট ভোগ করির ধরচুং বুলিয়া তোমরা মনের সাহস না হারান।  
ক্যেনেনা সেইলা তোমারলার মহিমা হবার ধরচে।

১৪-১৫ যায় স্বর্গ আর দুনিয়ার সউগ প্রাণীর জীবন দাতা, এই  
বাপেরটে মুই হাংকুড়া পাড়ং।

১৬ মুই প্রার্থনা করং ভগবান তোমারলাক যাতে অশেষ মহিমা  
দিয়া উয়ায় এমন শক্তি দেয়, যাতে পবিত্র আত্মার মইন্ধো দিয়া  
তোমারলার অন্তর শক্তিশালী হয়।

১৭ আর বিশ্বাসের মইন্ধো দিয়া খ্রীষ্ট তোমারলার অন্তরত থান  
নেয়, আরো প্রার্থনা করং, খ্রীষ্টের পিরিতত তোমরা গছের শিপার  
নাকান জড়ে ধরিয়া রন,

১৮ আর ভগবানের সউগ মানষিলার সোদে তোমরাও যাতে  
বুঝির পান যে, খ্রীষ্টের পিরিতের কোন কুল-কিনারা নাই, আর  
কোন দিয়া কোন সীমনা নাই।

১৯ খ্রীষ্টের পিরিত বুদ্ধি দিয়া জানা যায় না, তাঙো মুই প্রার্থনা  
করং, যাতে তোমরালা এই পিরিত বুঝির পান। আর ভগবানের  
সউগ গুণাগুণ তোমারলার জীবনত ভরপুর হয়।

২০ হামারলার অন্তরত ভগবানের যে শক্তি কাম করে সেই শক্তি  
অনুসারে উয়ায় হামারলার চাওয়া আরো চিন্তার থাকিও অনেক  
বেশী কাম করে।

২১ যীশু খ্রীষ্টের বাদে সমিতির মইদ্বো দিয়া বংশের পর বংশ ধরি  
চিরকাল ভগবানের গুণগান হউক। আমেন।

৪ এই বাদে মুই পৌল, প্রভুর বাদে বন্দী অবস্থায় তোমারলারটে  
অনুরোধ করির ধরচুং, ভগবান তোমারলাক যেই বাদে ড্যেকাইচে,  
উয়ার যোগ্য হয়। চল।

২ তোমারলার স্বভাব যাতে পুরাপুরি নত-নম্র আর সরল হয়।  
ধৈর্য ধরিয়া পিরিতের মনভাব নিয়া একে অপরক সহ্য কর।  
পিরিতি মনভাব নিয়া ক্ষমা কর,

৩ যে শান্তি তোমারলাক একে নগত একটে করিচে, সেই শান্তির  
মইদ্বো দিয়া পবিত্র আত্মার একতা রক্ষা করির মনে পরানে চেষ্টা  
কর।

৪ এক দেহা আর এক পবিত্র আত্মা আছে, এই বাদে ভগবান  
তোমারলাক ড্যেকাইচে বুলিয়া তোমারলার একটায় আশা আছে।

৫ প্রভু এক জন, বিশ্বাস একটায়, দীক্ষা একে নাকান,

৬ ভগবান আর স্বর্গের বাপও খালি এক জন আছে, উয়ায়  
সগারে উপরাত; উয়ায়ে সগারে মইদ্বো দিয়া আর সগারে অন্তরত  
আছে।

৭ কিন্তু খ্রীষ্ট যেই নাকান ঠিক করি থুইচে সেই মাপ মত হামরা  
সগায় বিশেষ দয়া পাইচি।

৮ পবিত্র শাস্ত্রত নেখা আছে, যেহেতু উয়ায় স্বর্গত উঠিলেক, সেহেতু উয়ায় বন্দীলাক ধরিয়া নিয়া গেইলেক, আর মানষিলাক মেহেতু দান দিলেক।

৯ “উয়ায় উঠিলেক,” এই কতা থাকি এইটায় বুঝা যায় না যে, দুনিয়ার যায় নিচাত নামিচে।

১০ যায় নামিছিলেক উয়ায় দ্যাওয়ার থাকিও উপরাত উঠিচে, যাতে বিশ্বব্রহ্মাণ্ডের সউগ পূরণ হয়।

১১ উয়ায় কয়জন মানষিক খবরিয়া বানায়, কয়জনক ভাববাদী বানায়, কয়জন মানষিক ভাল খবর প্রচার করাইয়া আর কয়জন মানষিক সমিতির রাখোয়াল আরো কয়জনক মাষ্টার হিসাবে খাড়া করিলেক।

১২ উয়ায় ইমারলাক কাম করিবার পেঠাইচে, যাতে ভগবানের সউগ মানষিলা ভগবানের সেবা করির পায়, তার বাদে সাজিয়া থাকো। এই নাকান করি খ্রীষ্টের দেহা গড়েয়া তোলা হয়।

১৩ ইয়ার উদ্দেশ্য হইলেক, হামরা সগায় ভগবানের বেটার উপরাত বিশ্বাসে আর জ্ঞানে একতা থাকিয়া পুরাপুরি বড় হই আর খ্রীষ্টের মইন্দোত যে নাকান গুণ আছে সেই নাকান সউগ গুণ অর্জন করিয়া ভরপুর হই।

১৪ সেহেতু হামরা ছাওয়ার নাকান রমু না। ভুল শিক্ষা আর মানষিলাক শয়তানি বুদ্ধি খাটেয়া অইন্য মানষিলাক ভুল ঘাটাত

নিয়া যাবার ছলনার মইদ্বোত হামরা বাতাসত ঢুলা চেউয়ের নাকান এপাক ওপাক ঢুলিতে থাকিমু না।

১৫ হামরা বরং পিরিতির মনোভাব নিয়া খ্রীষ্টের বিষয়ে সচাং কতা কমু। আর সউগ কিছুতে বাড়িয়া প্রভুর নাকান হমো।

১৬ উয়ায় মাথা, দেহার সউগ অঙ্গ একটা আর একটার নগত জোড়া নাগা থাকে। দেহার পতিটা অঙ্গ যার যার নিজের কাম করে, সেয়া গোটায় দেহটাক মাথার চালনায় বাড়িয়া যায়া আর পিরিতির মইদ্বো দিয়া নিজক গড়ে তুলো।

১৭ এই বাদে মুই কবার ধরচুং, আর প্রভুর হয় মুই তোমারলাক সাবধান করি দিবার ধরচুং, অকামের চিন্তার মইদ্বো দিয়া বিশ্বাস না করা মানষিলা যেই নাকান করি জীবন যাপন করে, তোমরালা সেই নাকান করি জীবন যাপন করেন না।

১৮ উমার মন আন্ধারত পড়ি আছে। উমারলার বর্বরা স্বভাবের ফলে ভগবান সমন্ধে কোনো কিছুই জানির পায় না, আর এই বাদে উমারলার জীবন ভগবানের বগল থাকি মেয়া দূরত চলি গেইচে।

১৯ উমারলার মনত নইজ্জা শরম কোনো কিছুই নাই। উমারলার জীবন বিশৃঙ্খল এই বাদে সউগ নাকানের বেয়া কাম করির কোন দ্বিধা করে না। আর উমার মনের চাহিদা মিটে না।

২০ কিন্তুক তোমরা তো খ্রীষ্টের বিষয়ে এই নাকানের শিক্ষা পান নাই।



২১ তোমরা উয়ার বিষয়ে শুনিচেন, আর যীশুর ঘাটাত যে সচাং আছে, সেই নাকান করি শিক্ষা পাইছিলেন।

২২ তোমারলাক পুরান স্বভাবক ছাড়িবার শিক্ষা দেওয়া হইচে, তোমরালা সেই শিক্ষাও পাইছিলেন। কেনেনা পুরান স্বভাবত আছিলেক ছলচাতুরি আর কামনায়-বাসনায় ভরা, যেইটা তোমারলাক ধবংস করির ধরছিলেক।

২৩ এই বাদে ভগবানক তোমারলার মন নয়া করি গড়েবার দেও,  
২৪ আর ভগবানের দেওয়া নয়া স্বভাব, নয়া কাপড়ের নাকান পেন্দো। সেই নয়া স্বভাবক ভগবানের নাকান হবার বাদে সিড্জন করা হইচে। যেইটা নির্দোষ আর পবিত্র।

২৫ এই বাদে তোমরালা মিছাং কতা কওয়া ছাড়ি দেও আর একে অইন্যক সচাং কতা কন। কেনেনা হামরা এক দেহার অংশ।

২৬ যদি গোসা হন, তাইলে সেই গোসা নিয়া পাপ না করেন;  
বেলা ডুবিবার আগত তোমরা গোসাটা ছাড়ি দেন,

২৭ আর শয়তানক কোন সুযোগ দেন না।

২৮ যায় চোর করে উয়ায় আর চুরি না করুক, বরং সচাং মন নিয়া কাম করুক, যাতে গরীব মানষিলাক দান করির বাদে উয়ারটে কিছু থাকে।

২৯ তোমারলার মুখ দিয়া কোন বাজে কতা বাইর না হউক, বরং দরকার মত অইন্যক গড়ে তুলির বাদে যেইটা ভাল ঐ নাকান কতা কওয়া উচিত, যাতে যায় যায় শোনে তাতে উমারলার উপকার হয়।

৩০ তোমরা ভগবানের পবিত্র আত্মাক দুঃখ না দেন, যাক দিয়া ভগবান মুক্তি পাবার দিন পর্যন্ত তোমারলাক সীলমোহর নাগে দিচে।

৩১ সউগ সমায় বিরক্তির ভাব, মেজাজ, গোসা, চিকিরিয়া ঝগড়া করা, নিন্দাচর্চা আর সউগ নাকানের হিংসা থাকি তোমরালা দূরত রন।

৩২ তোমরা একে অইন্যের পতি দয়ালু হন, অইন্যের দুঃখত দুঃখী হন, আর ভগবান যেই নাকান খ্রীষ্টের মইন্ধো দিয়া তোমারলাক ক্ষমা করিচে তোমরাও সেই নাকান একে অইন্যক ক্ষমা কর।

৫ ভগবানের আদরের ছাওয়া হিসাবে তোমরা ভগবানের নাকান করি চল।

২ খ্রীষ্ট যে নাকান হামারলাক পিরিতি করিচে আর ভগবানের উদ্দেশ্যে হামারলার বাদে নিজক বেদীত সঁপে দিলেক আর মলমলা সুগন্ধযুক্ত হইলেক, ঠিক একে নাকান করি তোমরাও উয়ার ঘাটা দিয়া চল।

৩ কোন নাকানের ব্যভিচার, অশুদ্ধি লোভের কতা অন্দি যাতে তোমারলার মইদ্ধোত শোনা না যায়, কেনেনা এইলা কতা ভগবানের মানষিলাক মানায় না।

৪ কোন বেহায়া-বেইজ্জতির কতাবার্তা, বোকামির কতাবার্তা আর জঘন্য ইয়ারকির কতাবার্তা যাতে তোমারলার মইদ্ধোত না হয়, কেনেনা এইলা তোমারলাক মানায় না। তার থাকি বরং তোমরা ভগবানক ধন্যবাদ দেও।

৫ তোমরা এইটা ভাল করি জানেন, যায় যায় ব্যভিচারী, অশুদ্ধি আর লোভী, মানে যাক এক নাকানের প্রতিমা পূজাকারী কওয়া হয়, উমারলার ভগবানের আর খ্রীষ্টের শাসন ব্যবস্থাত কোন অধিকার নাই।

৬ ফালতু কতা কয়া যাতে তোমারলাক কাণ্ডো ছলনা না করে কেনেনা যায় অবাধ্য হয় ঐলা কাম করে, ভগবানের দেওয়া শাস্তি উমারলার উপরাত নামি আইসে।

৭ এই বাদে এই নাকানের মানষিলা নগত মেলামেশা করেন না,

৮ কেনেনা তোমরা আগত আন্ধারত থাকিলেও এলা প্রভুর নগত যুক্ত হয় আলোত আসচেন। এই বাদে তোমারলারও সেই নাকান আলোত চলা উচিত।

৯ কেনেনা যেইটা ভাল, নির্দোষ আর সইত্য সেইটায় হইলেক আলোর ফল।

১০ ইয়াতে তোমরা যাচাই করি দেখির পাবেন কোন কোন কামত  
প্রভু খুশি হয়।

১১ আন্ধারের ফলহীন কামের নগত তোমারলার কোন  
যোগাযোগ না থাকুক; বরং তোমরালা ঐলার দোষ দেখেয়া দেও,

১২ কেনেনা মানষির গোপনে করা এইলা কামের কতা কওয়াও  
নইজ্জার বিষয়।

১৩ আলোর মইদ্রো দিয়া কোন কামের দোষ দেখেয়া দিলে  
সেইলা প্রকাশ হয়।

১৪ কেনেনা আলো সউগ কিছু প্রকাশ করে। এই মানষির শ্লোক  
আছে, “হে নিন যাওয়া মানষিলা, তোমরা জাগনা হন, মরণ থাকি  
বত্তি ওঠো; ইয়াতে তোমারলার উপরাত খীষ্ট আলো দিবে।”

১৫ তোমরা কি নাকান করি চলির ধরচেন সেই বিষয়ে ভাল করি  
ভাবিয়া দেখ। বুদ্ধিহীন মানষির মত না চলিয়া বুদ্ধিমান মানষির  
নাকান চল।

১৬ তোমারলার হাতত যে সৎ কাম করির সুযোগ আছে সেইটা  
পুরাপুরি কামত নাগান, কেনেনা এই কাল বেয়া।

১৭ এই বাদে কং, তোমরা বুদ্ধিহারা না হন, বরং প্রভুর ইচ্ছা কি  
সেইটা বুঝি নেও।

১৮ মাতাল না হন, মাতাল হইলে আত্মিক জীবন নষ্ট হয়। যাবে  
উয়ার চায়া বরং পুরাপুরি ভাবে পবিত্র আত্মার অধীনে থাক,

১৯ আর গীতসংহিতার গান, গুণগান, আত্মিক গানের মইন্ধো  
দিয়া তোমরালা একে অপরের নগত কতা কন; অন্তরত প্রভুর গান  
গুণ গুণ করিতে থাক।

২০ সউগ সমায় সউগ কিছুর বাদে হামারলার প্রভু যীশু খ্রীষ্টের  
নামে স্বর্গের বাপ ভগবানক ধন্যবাদ দেও।

২১ খ্রীষ্টের পতি ভক্তির বাদে তোমরা একে অপরের অধীনে চল।

২২ তোমরা যায় যায় ভার্জা, প্রভুর পতি সন্মান হিসাবে সোয়ামির  
অধীনে থাক,

২৩ কেনেনা খ্রীষ্ট যেই নাকান সমিতির মাথা, সোয়ামিও সেই  
নাকান ভার্জার মাথা। এইলা ছাড়াও খ্রীষ্ট হইলেক দেহার  
মুক্তিদাতা।

২৪ সমিতি যে নাকান খ্রীষ্টের অধীনে আছে একে নাকান  
ভার্জাকো সউগ বিষয়ে সোয়ামির অধীনে থাকা উচিত।

২৫ তোমরা যায় যায় সোয়ামি, খ্রীষ্ট যেই নাকান সমিতিক পিরিত  
করিচিলেক আর সেই বাদে নিজক সঁপে দিছিলেক ঠিক একে  
নাকান করি তোমরালা সগায় ভার্জাক পিরিত কর।

২৬-২৭ খ্রীষ্টের উদ্দেশ্য হইলেক সমিতিক পবিত্র করির বাদে  
উয়ার ভাল খবরের বাইকেয়র মইন্ধো দিয়া জলত ধুইয়া ঝকঝকা  
করিলেক। ঐ সমিতির মইন্ধোত কোন কলংকের দাগ, খুত বা ঐ  
নাকান কোন কিছু থাকিবে না। কিন্তুক পবিত্র আর নিখুঁত হবে।

২৮ সোয়ামি যেই নাকান নিজের দেহাক পিরিত করে একে নাকান করি নিজের ভার্জাকো উয়ার পিরিত করা উচিত। যায় নিজের ভার্জাক পিরিত করে উয়ায় নিজকে পিরিত করে।

২৯ কাণ্ডো তো কোন দিন নিজের দেহাক ঘিন না করে, বরং উয়ার ভরন-পোষন দেয় আর যতন করে। ঠিক একে নাকান খ্রীষ্টও উয়ার সমিতির যতন করে,

৩০ ক্যেনেনা হামরা উয়ার দেহার এক অংশ।

৩১ পবিত্র শাস্ত্রত নেখা আছে, “এই বাদেই মানষি মাও-বাপক ছাড়িয়া উয়ার ভার্জার নগত এক হয় থাকিবে আর উমরা দুইজনে এক দেহা হবে।”

৩২ এইটা একটা গভীর গোপন তথ্য, কিন্তু আসলে খ্রীষ্ট আর উয়ার সমিতির কতা মুই কবার ধরচোং।

৩৩ যাই হউক। তোমরা সগায় নিজের ভার্জাক নিজের নাকান পিরিত করো, আর ভার্যারো উচিত উয়ায় যাতে নিজের সোয়ামিক সন্মান করে।

৬ ছাওয়ালা, ভগবান যেই নাকান চায় তোমরা সেই নাকান করি মাও-বাপের বাধ্য হয় চল, এইটায় উচিত।

২ পবিত্র শাস্ত্রত পইলা যে আদেশের সাথে প্রতিজ্ঞা আছে সেইটা হইলেক, “তোমরা মাও-বাপক সন্মান কর

৩ যাতে তোমার মঙ্গল হয় আর তোমরা মেলা দিন এই দুনিয়াত বাঁচি থাকির পারেন।”

৪ তোমরা যায় যায় ছাওয়া ছোটর বাপ হইচেন, তোমরা তোমার ছাওয়া ছোটলাক বিরক্ত করি না তুলেন, বরং উমারলাক প্রভুর শাসন আর চেতনার শিক্ষা দিয়া মানষি করি তোল।

৫ তোমরা যায় যায় চাকর, তোমরা যেই নাকান খ্রীষ্টের বাধ্য, একে নাকান শ্রদ্ধা, ভয়, আর খাটি অন্তরে তোমরালা এই দুনিয়ার মালিকের বাধ্য হন।

৬ মানষিক খুশি করির মনোভাব নিয়া তোমারলার মালিকের চোখুর সামনাত খালি বাধ্য না হন; ইয়ার চায়া বরং খ্রীষ্টের চাকর হিসাবে ভগবানের ইচ্ছা মনে পরানে পালন করিয়া মালিকের বাধ্য হন।

৭ চাকর হিসাবে তোমরা সউগ মন পরান দিয়া এমন করি কাম কর যে, তোমরা খালি মানষির কাম না করেন ভগবানের সেবা করির ধরচেন।

৮ কেনেনা তোমরা জানেন যে, সগায় উয়ার সউগ ভাল কামের বাদে প্রভুরটে থাকি পুরস্কার পাবে, ইয়াতে উয়ায় চাকর হউক আর স্বাধীন হউক।

৯ তোমরা যায় যায় মালিক, তোমরাও চাকরলার পতি একে নাকান ব্যবহার কর। উমারলাক ভয় দেখা ছাড়ি দেও, কেনেনা

তোমরা তো জানেন যে, উমার আর তোমারলার একে ভগবান  
আর উয়ায় স্বর্গত আছে; উয়ার নজরত সগায় সমান।

১০ চিঠি নেখা শেষ করির আগত একে কতা আরেক বার  
কইলুং, প্রভুতে বলবান হন আর উয়ার শক্তিতে শক্তিবান হন।

১১ যুদ্ধের বাদে প্রভুর দেওয়া সউগ সাজ-পোশাক পিন্দি নেও,  
যাতে তোমরা শয়তানের সউগ চালাকির বিরুদ্ধে শক্ত হয়া খাড়া  
রবার পারেন।

১২ হামারলার এই যুদ্ধ কোন মানষির বিরুদ্ধে না হয় এইটা  
হইলেক আন্ধারের শাসন ব্যবস্থা আর ক্ষমতার অধিকারিলার  
বিরুদ্ধে, আন্ধারের দুনিয়ার শক্তিশালী আত্মালার বিরুদ্ধে, আর  
দ্যাওয়ার সউগ বেয়া আত্মালার বিরুদ্ধে।

১৩ এই বাদে তোমরালা যুদ্ধের বাদে ভগবানের দেওয়া সউগ  
সাজ-পোশাক পিন্দি নেও, যাতে বেয়া সমায় আসিলে তোমরালা  
রুখি দাড়ের পারেন। আর সউগ কিছুর শেষত তোমরা থির হয়া  
খাড়া রবার পান।

১৪ এই বাদে সইত্য দিয়া কমড় বান্দ, বুক বাঁচের বাদে সৎ জীবন  
দিয়া বুক ঢাক,

১৫ আর শান্তির ভাল খবর প্রচারের বাদে জুতা পিন্দিয়া সাজিয়া  
থাক।

১৬ এইলা ছাড়াও বিশ্বাসের ঢালও তুলি নেও; সেই ঢাল দিয়া  
তোমরা শয়তানের সউগ অগুনবান নিভি দিবার পাবেন।



১৭ মাথা বাঁচের বাদে ভগবানের দেওয়া মুক্তি মাথাত দিয়া পবিত্র আত্মার তরোয়াল, তার মানে ভগবানের বাইক্য মানি নেও।

১৮ পবিত্র আত্মার মইদ্বো দিয়া চালনা হয় সউগ সমায় প্রার্থনা কর। সজাগ থাকিয়া ভগবানের মানষিলার বাদে সউগ সমায় প্রার্থনা করিতে থাক।

১৯ মোর বাদেও প্রার্থনা কর যাতে মুই যেলা কতা কইম সেলা ভগবান মোক এমন ভাষা যোগেয়া দেয় যাতে মুই সাহসের নগত ভগবানের দেওয়া ভাল খবরের সমন্ধে গোপন তথ্য প্রচার করির পাং।

২০ এই বাদে ভগবান মোক ভাল খবর প্রচার করির রাজদূত হিসাবে বাছাই করিচে বুলিয়া মুই জেলত আছং। প্রার্থনা করেন যাতে সাহসের সাথে মুই এই কাম করির পাং যেই নাকান করি করা দরকার।

২১ মুই ক্যেমন আছং আরো ক্যেমন করি মুই দিন কাটের ধরচুং সেইটা জানির পাবেন মোর আদরের ভাই তুখিকেরটে, উয়ায় প্রভুর কামত এক জন বিশ্বস্ত সেবাকারী।

২২ উয়াক মুই তোমারলারটে পেঠালুং যাতে তোমরালা হামার সউগ খবর জানির পারেন আর এইটা জানিয়া তোমারলার উৎসাহ বাড়িয়া যায়।

২৩ স্বর্গের বাপ আর প্রভু যীশু খ্রীষ্টের শান্তি, আর বিশ্বাসের পিরিত, ভাই-বইনিলারটে থাকুক।

২৪ হামারলার প্রভু যীশু খ্রীষ্টক যায় যায় খাটি অন্তর দিয়া পিরিত  
করে, প্রভুর দয়া উমারলার সগারে নগত থাকুক॥

# ফিলিপীয়

১ তীমথিয় আর মুই পৌল হামরা যীশু খ্রীষ্টের চাকর। খ্রীষ্টের নগত যুক্ত হয়া ভগবানের যেইলা মানষি ফিলিপী গঞ্জত আছে, হামরা উমারলারটে আর উমারলার দেওয়ানী আর পরিচালকলারটে নেখির ধরচি।

২ হামারলার স্বর্গের বাপ ভগবান আর প্রভু যীশু খ্রীষ্ট তোমারলাক দয়া আর শান্তি দান করুক।

৩ মুই যত বার তোমারলার কতা ফম করং ততবারই মোর ভগবানক মুই ধন্যবাদ দেং।

৪ তোমারলার বাদে প্রার্থনা করির সমায় মুই সউগ সমায় আনন্দের নগত প্রার্থনা করং।

৫ কেনেনা যীশু খ্রীষ্টের বিষয়ে ভাল খবর প্রচারের কামত পইলা দিন থাকি তোমরা মোক সাহায্য করি আসির ধরচেন।

৬ মোর এইটা বিশ্বাস আছে, তোমারলার অন্তরত যায় ভাল কাম আরম্ভ করিচে উয়ায় যীশু খ্রীষ্ট আসিবার দিন পর্যন্ত সেইটা চালেয়া নিয়া শেষ করিবে।

৭ তোমরা মোর পরানের পরান, তোমারলার সগারে সমন্ধে মোর মনের ভাব এই নাকানের। মুই জেলত রং বা ভাল খবর প্রচার

করির ভগবানের সচাংটা প্রমাণ করং, ইয়াতে তোমরা সগায় মোর সোদে দয়ার অংশিদার।

৮ খ্রীষ্ট যীশুর পিরিতে মুই তোমারলাক সগাকে পিরিত করং। ভগবান এইটার সাক্ষী।

৯ মুই প্রার্থনা করং তোমারলার পিরিত যাতে জ্ঞান আর বিচারবুদ্ধি একসোদে মিল হয় দিনে দিনে বাড়ি যায়।

১০-১১ তাইলে তোমরা সউগ চায়া ভাল যেইটা সেইটা বুঝিয়া বাছাই করি নিবার পাবেন। ইয়াতে তোমরালা যীশু খ্রীষ্টের মইন্ধো দিয়া খাটি জীবনের ফল দিয়া ভরপুর হয় প্রভু যীশু আইসার দিন পর্যন্ত খাটি আর নিখুঁত থাকির পাবেন, আর ইয়াতে ভগবানের মহিমা আর গুণগান হবে।

১২ ভাই-বইনিলা মুই চাং যাতে তোমরালা জানির পারেন যে, মোর উপরত যেইলা ঘটির ধরচে এই বাদে ভাল খবরের প্রচারের কাম আরো আগেয়া গেইচে।

১৩ আর ইয়াতে রাজবাড়ির সৈন্যলো আরো অইন্য সগায় জানির পাইচে যে খ্রীষ্টের বাদে মুই বন্দী হয় আছং।

১৪ আর মুই বন্দী থাকির ফলে ভাই-বইনিলা বেশী করি প্রভুর উপরাত নির্ভর করির শিখিচে। এই বাদে ভয় না করিয়া ভগবানের বাইক্য প্রচার করির ধরচে।

১৫ উমারলার মইন্ধোত কাণ্ডো কাণ্ডো হিংসা আরো দলাদলি মনোভাব নিয়া খ্রীষ্টের বিষয় প্রচার করে, আরো অইন্য মানষিলা

সেইটা ভালো উদ্দেশ্য নিয়া সেইটা করে।

১৬ এই মানষিলার মনত খ্রীষ্টের পিরিত আছে, এই বাদেই উমরা খ্রীষ্টের বিষয় প্রচার করে। কেনেনা ইমরা জানে যে খ্রীষ্টের বাদে ভাল খবর প্রচার করির বাদে মোক নেওয়া হইচে।

১৭ কিন্তুক পইলা দলের মানষিলা নিজেরলার স্বার্থের বাদে খ্রীষ্টের বিষয় প্রচার করিতে থাকে, কোন ভাল উদ্দেশ্য নিয়া উমরা করে না। উমরা মনে করে ইয়াতে হামার বন্দী অবস্থায় কষ্ট দিবার পাবে।

১৮ কিন্তু আসল উদ্দেশ্য হইলেক যে, ইয়াতে যেই নাকান করি হউক খ্রীষ্টের বিষয় প্রচার হবার ধরচে, সেইটা ভন্ডামির উদ্দেশ্যে হউক আর ভাল উদ্দেশ্যে হউক। যাই হউক এইটায় হইলেক মোর আনন্দের বিষয়। মোর এই আনন্দ থাকিবেই।

১৯ কেনেনা মুই ভাল করি জানং যে এই দুর্দশা থাকি মোর মুক্তি হবে, তোমার প্রার্থনা আর যীশু খ্রীষ্টের আত্মা দ্বারায় এই মুক্তি হবে।

২০ আর মোর থির বিশ্বাস আছে যে মুই কোন কিছুতে নজ্জা পাইম না, কিন্তুক মুই সাহস করি বত্তি থাকং বা মরি যাং এলা আর সউগ সমায় মোর দেহা দিয়া খ্রীষ্টের গুণকিত্তন হবে।

২১ কেনেনা মোর বত্তি থাকা হইলেক খ্রীষ্টের বাদে আর মরণ হইলেক লাভ।

২২ কিন্তুক এই দেহা নিয়া যদি মোক বত্তি থাকির নাগে তাইলে মুই প্রভুর বাদে এই কাম করির সুযোগ পাইম। কিন্তুক মুই কি বাছাই করি নিম বত্তি থাকির না মরির, সেইটা মুই জানং না।

২৩ মুই দোটানা হয়্যা আছং। মুই মরি যায়া খ্রীষ্টের নগত থাকির চাং কেনেনা সেইটায় হবে মোর পক্ষে সউগ চায়া ভাল।

২৪ তাণ্ডো তোমারলার বাদে বত্তি থাকা মুই দরকার মনে করং।

২৫ আর মুই নিশ্চয় জানং মুই বত্তি রইম যাতে মুই তোমারলার নগত একসোদে থাকিয়া তোমারলাক সাহায্য করির পারং আর তোমরা বিশ্বাসে মজবুত হন আরো উৎসাহ বাড়ে।

২৬ ফলে তোমারলার মইন্ধোত মোর আরো আইসার দরুন তোমরা যীশু খ্রীষ্টের মইন্ধো দিয়া মোক নিয়া আনন্দে উতলা হন।

২৭ সউগ চায়া বড় কতা হইলেক তোমরা এমন করি জীবন কাটান যেইটা খ্রীষ্টের বিষয় ভাল খবরের উপযুক্ত। তাইলে মুই নিজে আসিয়া তোমারলাক দেখিয়া বা দূর থাকি তোমারলার কতা শুনিয়া মুই জানিম যে, তোমরালা মনে পরানে থির হয়্যা খাড়া হয়্যা আছেন। আর যেই বিশ্বাস ভাল খবরের মইন্ধো দিয়া আইসে উয়ার বাদে একসোদে পরিশ্রম করির ধরচেন।

২৮ যায় যায় তোমারলার বিরুদ্ধে আছে উমারলাক তোমরালা ভয় না করেন, ইয়াতে প্রমাণ হবে যে উমরালা নাশ হবার ধরচে। আর তোমরালা মুক্তি পাবার বাদে যাবার ধরচেন, আর সেই মুক্তি আইসে ভগবান থাকি।

২৯ তোমারলাক বর দেওয়া হইচে তোমরা খালি খ্রীষ্টের উপরত বিশ্বাস করেন তারে বাদে না হয়, যাতে উয়ার বাদে কষ্ট ভোগও করির পান।

৩০ তোমরা আগত মোক যেই নাকান করি কষ্ট করির দেখিচেন আর এলাও ঐলা সমন্ধে যেইলা শুনির ধরচেন, তোমরালাও একে নাকান কষ্টের মইদ্বোত জড়েয়া পরিচেন।

১ তোমারলার মইদ্বোত তো খ্রীষ্টের উৎসাহ আছে, খ্রীষ্টের পিরিতের ফলে যেলা তোমরা সান্তনা পান, পবিত্র আত্মা আর তোমারলার মইদ্বোত যোগাযোগের সমন্ধ আছে, তোমারলার অন্তরত করুণা আর দয়ামায়া আছে।

২ যেহেতু তোমারলার সগারে মন এক, তাইলে তোমরালা একে অপরক পিরিত কর মনে পরানে এক হন। তাইলে মুই আনন্দিত হইম।

৩ নিজের লাভের আশায় বা অহংকার করিয়া কোন কিছু না করেন। তোমরা বরং নম্র হয়। অইন্যক বড় বুলিয়া জাগা দেও।

৪ খালি নিজক নিয়া ব্যস্ত না থাকেন অইন্যের বাদেও চিন্তা কর।

৫ যীশু খ্রীষ্টের যেই নাকানের মনভাব আছিলেক সেই নাকান মনভাব তোমারলার হউক।

৬ যদিও উয়ায় ভগবান আছিলেক, তবু উয়ায় নিজক ভগবান মনে করিলেক না,

৭ কিন্তুক মহান জাগা থাকি নিজেই নামিলেক, চাকরের মত হইলেক, মানষির রূপ নিয়া জন্ম নিলেক।

৮ এইলা ছাড়াও চেহারার দিক থাকি নিজক নম্র করিয়া মরণ পর্যন্ত এমন কি ক্রুশত মরণ পর্যন্ত বাধ্য থাকিলেক।

৯ এই বাদে পরমপ্রভু উয়াক উচাত উঠাইলেক আর এমন একটা নাম দিলেক যেইটা সউগ নামের চায়া মহান,

১০ যাতে যীশুর নামে স্বর্গ, মত্য, পাতালত এই ত্রিভুবনত বসবাস কারিলা সগায় প্রভু যীশুর আগত হাংকুড়া পারে।

১১ আর সগারে জিবা স্বীকার করে যে যীশু খ্রীষ্টই প্রভু। এই নাকান করি যাতে স্বর্গের বাপ ভগবানের গুণগান হয়।

১২ হে মোর আদরের ভাই-বইনিলা, তোমরালা তো সউগ সমায় বাধ্য হয়্যা আছেন। খালি মুই যেয়ো থাকিম সেয়ো না হয়, কিন্তুক মুই যেয়ো না থাকিম সেলাও যাতে তোমরা আরো বেশী বাধ্য হন। আর তোমরা ভক্তি আরো ভয়ের নগত কামের মইদ্বো দিয়া দেখাও যে তোমরা পাপ থাকি মুক্তি পাইচেন।

১৩ কেনেনা ভগবান তোমারলার অন্তরত এমন করি কাম করির ধরচে যে, যার ফল হইলেক উয়ায় যেইটা কামত সন্তুষ্ট হয় সেই নাকানের কাম করির ইচ্ছা আর ক্ষমতা তোমারলারও হয়।



১৪ তোমরালা আপত্তি আর তর্ক না করিয়া সউগে কর,

১৫-১৬ যাতে তোমরালা নির্দোষ আর খাটি হবার পারেন, এই কালের বিবেকহীন আর খারাপ স্বভাবের মানষিলার মইদ্বোত ভগবানের কলঙ্ক না হওয়া ছাওয়া হবার পারেন। এই মানষিলার আগত তোমরালা তো জীবন দানকারী বাইক্য তুলি ধরিয়া এই দুনিয়ার ভলভলা তারার নাকান হয়্যা আছেন। তাইলে খ্রীষ্ট যেদিন আরো ফিরি আসিবে সেই দিন মুই এই নিয়া গর্ব করির পারিম যে, মোর চেষ্টা আর পরিশ্রম বেকার নাই হয়।

১৭ যদিও মোর মরণ হয় আর মোর অন্ত্র ভগবানক গতে দেওয়া হয় এই নাকান করি তোমারলার বিশ্বাসের সেবা ভগবানের বাদে সঁপে দিবার নাগবে। তাইলে মুই তোমারলার সাথে খুশি আর আনন্দিত হইম।

১৮ আর তোমারলারও ঠিক একে নাকান করি মোর সোদে আনন্দ করা উচিত।

১৯ মুই আশা করং প্রভু যীশুর ইচ্ছা হইলে মুই তীমথিয়ক পচপচে তোমারলারটে পেঠাইম। যাতে তোমারলার খবর পায়া মোর পরান জুড়াইম।

২০ মোর সোদে এমন আর কাণ্ডো নাই যে তীমথিয়র মতন করি তোমারলার বিষয়ে চিন্তা করে।

২১ অইন্য সগায় যীশু খ্রীষ্টের ব্যপারে ব্যস্ত না থাকিয়া নিজেরলার ব্যাপার নিয়া ব্যস্ত থাকে।

২২ কিন্তুক তোমরা এইটা জানেন যে তীমথিয় উয়ার যোগ্যতা প্রমান করি দেখাইচে, কেনেনা বেটা যেই নাকান করি বাপের নগত কাম করে, সেই নাকান করি উয়ায় মোর নগত যীশু খ্রীষ্টের বিষয় ভাল খবর প্রচারের বিষয়ে পরিশ্রম করিচে।

২৩ এই বাদে মোর অবস্থা কি হয় সেইটা জানির পাইলে মুই উয়াক তোমারলার ওটে প্যেঠেয়া দিম।

২৪ মুই প্রভুর উপরত এই বিশ্বাস থোং যে মুইও খুব পচপচে তোমারলাক দেখির যাইম।

২৫ মুই ইপাফ্রদীতক তোমারলার ওটেকেনা প্যেঠেবার দরকার মনে করলুং। উয়ায় হামার শিষ্য গুরুভাই। হামরা একে নগত কাম করি আরো খ্রীষ্টের বাদে যুদ্ধ করি। সেবাকারী হিসাবে মোর প্রয়োজন মিটিবার বাদে উয়াক তোমরা মোর এটেকেনা প্যেঠেয়া দিচেন।

২৬ উয়ায় তোমারলাক সগাকে দেখির হাউস করির ধরচে, এই বাদে মুই উয়াক তোমারলার ওটেকেনা প্যেঠেয়া দিবার ধরচুং। আর তোমরা উয়ার অসুখের কতা শুনিচেন কয়া ইপাফ্রদীত ব্যাকুল হয় পড়িচে।

২৭ আর সচাং করি উয়ার এমন অসুখ হইচে যে, উয়ায় মরির যাবার নাকান হইচে কিন্তুক ভগবান উয়ার উপরত দয়া করিচে, খালি উয়াকে দয়া করিচে এই নাকান না হয় মোকও দয়া করিচে যাতে মুই দুঃখের উপরত দুঃখ না পাং।

২৮ এই বাদে মুই খুব যতন করিয়া তোমারলারটে পেয়েবার ধরচুং যাতে তোমরা উয়াক দেখিয়া ফির আরো আনন্দ করির পারেন। আর মোর ভাবনা কমে।

২৯ তোমরা প্রভুর মানষি হিসাবে পুরাপুরি আনন্দে উয়াক মানি নেও এই নাকানের মানষিলাক তোমরা সন্মান কর।

৩০ কেনেনা খ্রীষ্টের কামের বাদে উয়ায় মরণপন নড়াই করিচে। তোমরা না থাকাতে মোর বাদে যেইটা করির পারেন নাই সেইটা করির উয়ায় জীবন দিবারও রাজি আছিলেক।

৩ শেষত এই কতা কইম যে, হে মোর ভাই বইনিলা, তোমরা প্রভুর নগত যুক্ত আছেন এই বাদে আনন্দ কর। তোমারলারটে একে নাকান কতা বার বার নেখিবার মোর কোন কষ্ট না হয়। আর তোমারলাক এইলা নিয়া সতর্ক করা ভাল।

২ একটা দল আছে, উমরা কয় যে মুক্তির বাদে সুনত করা দরকার। এই কুকুরের নাকান বেয়া মানষিলা থাকি সাবধান!

৩ হামরায় ভগবানের আসল মানষি, হামরা আত্মার সাহায্যে উয়ার আরাধনা করি আর যীশু খ্রীষ্টক নিয়া গর্ব করি, হামরা মানষিক দেখা আচার অনুষ্ঠানের উপরত নির্ভর করি না।

৪ মুই অবশ্য করির পারলুং হয়। যদি কাণ্ডো মনে করে এই আচার অনুষ্ঠানের উপরত নির্ভর করির কারন আছে, তাইলে মোর উয়ার চায়া আরো বেশী কারন আছে।

৫ আট দিনের দিন মোশির বিধান মতে মোক সুন্নত করা হইছিলেক, ইস্রায়েল জাতির মইদ্বোত বিন্যামীনের গুপ্তিত মোর জন্ম; মুই এক জন খাটি ইব্রীয় জাতির; মোশির নিয়ম পালন করং বুলি মুই এক জন ফরীশী।

৬ মোর ধর্মের ব্যপারে আগ্রহ আছিলেক যে, খ্রীষ্টের সমিতির মানষিলার উপরা মুই অইত্যাচার করিলুং; মোশির বিধান পালনের ব্যপারে কাণ্ডো মোর নিন্দা করির পায় নাই।

৭ কিন্তুক তাতে মোর যে লাভ হইছিলেক, সেইলা মুই খ্রীষ্টের বাদে সেই লাভক ক্ষতি বুলি মনে করং।

৮ আসলে যার জইন্যে মুই এইলা ক্ষতি বুলিয়া মানি নিবার ধরচুং মোর সেই প্রভু যীশু খ্রীষ্টক জানিবার মইদ্বো দিয়া তুলনাহীন আশুর্বাদ আছে, উয়ার সোদে আর সউগ কিছুকে মুই ক্ষতি বুলিয়া মনে করং।

৯ খ্রীষ্টক যাতে মুই লাভ করির পারং আরো খ্রীষ্টের নগত যাতে মুই নাগি থাকির পারং, মোর নিজের নির্দোষ হওয়া যেইটা বিধান থাকি পাওয়া সেইটা যাতে মোর না হয়। কিন্তুক খ্রীষ্টক বিশ্বাস করিয়া মোক নির্দোষ বুলি মানি নেওয়া হইচে, এই নির্দোষ হওয়া ভগবানেরটে থাকি আইসে বিশ্বাসের ফলে।

১০ মুই খ্রীষ্টক জানির চাং আর যেই শক্তি দিয়া উয়াক ফির বত্তে তোলা হইচে সেই শক্তিক জানির চাং। মুই উয়ার দুঃখ-কষ্টের

ভাগী হবার চাং। আসল কতা হইলেক, যেই মনোভাব নিয়া উয়ায় মরছিলেক, মুইও সেই নাকানের মনোভাব পাবার চাং।

১১ এই বাদে যেইটায় হউক না কেনে, মুই মরণ থাকি ফির বত্তি উঠিম।

১২ মুই যেইটা করির ধরচুং সেইটা মুই এলায় যে মুই পায়া গেইচোং বা খাটি হইচুং তা কিন্তুক না হয়। কিন্তুক যেই বাদে খ্রীষ্ট যীশু মোক বেছি নিচে সেইটায় করির বাদে মুই দৌড়ির ধরচুং।

১৩ ভাই-বইনিলা মুই যেইটা ধরির পাইচুং সেইটা মুই মনে না করং। তাঞা একটা কাম মুই করিচুং যাওয়া দিনের সউগ কিছু ফম হারেয়া আগ পাকে বুকিয়া সউগ শক্তি দিয়া মুই শেষে সীমনার পাকে দৌড়ির ধরচুং।

১৪ যাতে খ্রীষ্ট যীশুর মইন্ধো দিয়া ভগবানের স্বর্গমুখী ডেকে মইন্ধো দিয়া যে পুরস্কার আছে সেইটা যাতে পাং।

১৫ এই বাদে হামরা যায় যায় পুরাপুরি বড় হয় আগে যাবার ধরচি হামারলারও ঐ একে নাকান মনোভাব হওয়া উচিত। আর যদি কোন বিষয়ে তোমারলার অইন্য নাকানের মনোভাব থাকে সেইটাও তোমারলাক ভগবান দেখেয়া দিবে।

১৬ কাঙোর মনভাব যত দূর হামরা আগেয়া যাবার ধরচি, সেই অনুসারে ভগবান হামারলাক আগতে বানাইচে।

১৭ ভাই-বইনিলা, তোমরা আর অইন্য শিষ্যলা সগায় মিলি মোক দেখিয়া চল আর মোর যেই নাকানের আদর্শ, আর অইন্য

মানষিলা যায় যায় মোর নাকান চলে, উমারলাক দেখিয়া শেখ।

১৮ মুই তোমারলাক বারে বারে কইচুং আর এলা চখুর জল  
ফ্যেলেয়া কবার ধরচুং যে, এই নাকান মেয়ো মানষি আছে উমরা  
খীষ্টক ক্রুশত তুলি দেওয়া শত্রু।

১৯ উমারলার শেষ পরিণাম হইলেক ধবংস আর পেট হইলেক  
উমারলার ভগবান। যেইটা নজ্জার বিষয় সেইটা নিয়া উমরালা  
গর্ব করে আর দুনিয়ার বিষয় নিয়া উমারলার মন পড়িয়া আছে।

২০ কিন্তুক হামারলার তো আসল থাকির জাগা হইলেক স্বর্গ।  
ওটে থাকি হামারলার মুক্তিদাতা প্রভু যীশু আসিবার বাদে আগ্রহ  
সহকারে বাড়ে আছি।

২১ উয়ায় হামারলার নশ্বর দেহাক বদলেয়া জাকজমকের দেহার  
মত করিবে। যে শক্তির মইদ্বো দিয়া উয়ায় সউগ কিছুক নিজের  
অধীনত আনে সেই শক্তির মইদ্বো দিয়া উয়ায় এই কাম করিবে।

৪ হে মোর ভাই-বইনিলা, মুই তোমারলাক পিরিত করং আর  
তোমারলাক দেখির চাং। তোমরায় মোর আনন্দ মোর জয়ের  
মালা। তোমরালা প্রভুর নগত যুক্ত হয়া স্থির থাক।

২ শ্রীমতি উবদিয়া আর শ্রীমতি সুন্তখী, মুই তোমারলাক বিশেষ  
করি মিনতি করির ধরচুং প্রভুর নগত যুক্ত হইচেন এই বাদে  
তোমারলার মন এক হউক।

৩ আর মোর আসল সাথী, মুই তোক মিনতি করির ধরচুং তুই  
এই বেটিছাওয়ালাক সাহায্য করেক। ক্যেনেনা ইমরা খ্রীষ্টের ভাল  
খবর প্রচার করির মোর সোদে আর শ্রী ক্লীমেন্ট আরো মোর  
অইন্য অইন্য সহসাথীলার নগত কষ্ট করিচিলেক। ইমারলার নাম  
ভগবানের জীবন্ত বইয়ত নেখা আছে।

৪ তোমরা সউগ সমায় প্রভুত আনন্দ কর, আরেকবার কইম,  
আনন্দ কর।

৫ তোমারলার নরম স্বভাব সগায় দেখির পাউক। ফম থোন, প্রভু  
খুব পচপচে আসির ধরচে।

৬ কোন বিষয় নিয়া উতলা হন না, বরং তোমারলার সউগ কিছু  
চাওয়ার বিষয় ধন্যবাদের সোদে প্রার্থনার মইদ্রো দিয়া ভগবানক  
জানাও।

৭ ইয়াতে প্রভুর দেওয়া যেই শান্তির কতা মানষি চিন্তা করিয়াও  
জানির পারে না, খ্রীষ্ট যীশুর মইদ্রো দিয়া সেই শান্তি তোমারলার  
অন্তর আর মনক বাঁচাবে।

৮ শেষত কং, হে মোর ভাই-বইনিলা, যেইটা সচাং যেইটা  
উপযুক্ত, যেইটা সৎ, যেইটা খাটি, যেইটা সুন্দর, যেইটা সন্মানের  
আসল কতা হইলেক, যেইটা ভাল, যেইটা সুনামের সেই পাকে মন  
দেও।

৯ তোমরা মোরটে থাকি যেইটা শিখিচেন আরো ভালো করি  
মানিয়া নিচেন, মোর মুখ থাকি শুনিচেন, দেখিচেন সেইলা নিয়া

নিজক বস্তু থোন। ইয়াতে শান্তিদাতা ভগবান তোমারলার সোদে  
রবে।

১০ মুই প্রভুত খুব আনন্দ হইলুং কেনেনা মেয়ো দিন পাছত  
তোমরা আরো মোক সাহায্য করির ধরচেন। কিন্তুক সউগ সমায়  
মোক তোমরালা সাহায্য করির চাইছিলেন কিন্তুক সেইটা  
তোমরালা করির সুযোগ পান নাই।

১১ মোর কোন অভাবের বাদে মুই এই কতা কবার ধরচুং তা  
কিন্তুক না হয়। কেনেনা যেই অবস্থাত আছং সেইটাতে সন্তুষ্ট  
থাকির শিখিচুং।

১২ যেয়ো মোর অভাব দেখা দেয় আর যেয়ো মোর মেয়ো থাকে,  
ভরা পেট হউক আর খালি পেটে হউক, মেয়ো রবার সমায়  
হউক, আর অভাবের মইন্ধোত হউক, সউগ অবস্থাত কেমন করি  
সন্তুষ্ট থাকা যায় সেইটা মুই শিখিচুং।

১৩ যায় মোক শক্তি দান করে উয়ার মইন্ধো দিয়া মুই সউগ  
কিছুই করির পাং।

১৪ তাঙো তোমরালা মোর কষ্টের ভাগী হয় ভালে করিচেন।

১৫ ফিলিপীয় খ্রীষ্ট সমিতির মানষিলা তোমরা তো নিজেই জানেন  
যে, তোমারলাক পইলা ভাল খবর শোনের পাছত যেয়ো মুই  
ম্যাসিডোনিয়া ছাড়িয়া চলি যাং, সেয়ো তোমরালা ছাড়া কোন খ্রীষ্ট  
সমিতি মোর সোদে টাকা-পাইসা দেওয়া নেওয়া ব্যাপারে যুক্ত হয়  
নাই।



১৬ এইটা বাস্তব যে যেহেতু মুই খিষলনীকীত আছিলুং সেহেতু তোমরালা কয়েক বার মোক সাহায্য পেয়েয়া মোর অভাব পূরণ করছিলেন।

১৭ মুই এলা দান পাবার চেষ্টা করং নাই কিন্তুক মুই চাং ভগবান তোমারলাক আশুর্বাদ করুক।

১৮ মোর যা দরকার তার চায়াও বেশী মোর আছে। শ্রী ইপাহ্রদীর হাত দিয়া যেইলা উপহার মোর বাদে পেঠাইচেন সেইলা পায়া মোর যথেষ্ট হইচে। এই উপহারলা সুগন্ধের নাকান আরো ভগবান মানি নিবার যোগ্য বলিদান, ইয়াতে ভগবান খুশি হয়।

১৯ হামার ভগবান উয়ার অফুরন্ত ধন প্রভু যীশুর মইন্দো দিয়া তোমারলার অভাব পূরণ করে।

২০ যুগ যুগ ধরি চিরকাল হামারলার স্বর্গের বাপ ভগবানের গুণগান হউক। আমেন।

২১ খ্রীষ্ট যীশুর নগত ভগবানের সউগ মানষিক মোর মঙ্গল কামনা জানান। মোর নগত যেই ভাইলা আছে উমরা তোমারলাক মঙ্গল কামনা জানের ধরচে।

২২ ভগবানের মানষি যেইলা এটেকোনা আছে বিশেষ করি রোমের মহারাজার বাড়ির মানষিলা তোমারলাক মঙ্গল কামনা জানের ধরচে।

২৩ প্রভু যীশু খ্রীষ্টের দয়া তোমারলার দয়া অন্তরত থাকুক॥

## কলসীয়

১ মুই পৌল, ভগবানের ইচ্ছায় রাজা যীশুর এক জন খবরিয়া হইচুং। কলসাই গঞ্জত খ্রীষ্টের নগত একটে হয়। যায় যায় ভগবানের মানষি আর বিশ্বস্ত গুরু ভাই-বইনিলারটে, মুই পৌল আর হামারলার ভাই তীমথিয় এই চিঠি নেখিলং। হামারলার স্বর্গের বাপ ভগবান তোমারলাক দয়া আর শান্তি দান করুক।

৩ যেলায় হামরা প্রার্থনা করি সেলায় হামারলার প্রভু যীশু খ্রীষ্টের বাপ ভগবানের ধন্যবাদ দিয়া থাকি।

৪ কেনেনা যীশু খ্রীষ্টের উপরাত তোমারলার যে বিশ্বাস আছে, সউগ ভগবানের মানষিলার পতি পিরিত তোমারলার আছে এই সংবাদটা হামরা শুনিচি।

৫ স্বর্গত তোমারলার বাদে যেইলা জমা করা আছে, সেইলা পাবার আশায় তোমারলার এই বিশ্বাস আর পিরিত জন্মিচে। যে ভাল খবর, মানে সইত্যের বাইক্য তোমারলারটে পৌছিচে, উয়ার মইন্ধোত তোমরালা এই আশার বাণী শুনিচেন।

৬ এই ভাল খবর সারা দুনিয়াত ছড়াছড়ি হয়। পরাতে ফল পাবার ধরচে, আর দিনে দিনে আগে যাবার ধরচে। যেই দিন থাকি তোমরা এই ভাল খবর শুনিলেন আর ভগবানের দয়ার কতা সচাং করি জানিচেন, সেই দিন থাকি তোমারলারও মইন্ধোত একে নাকান কাম করির ধরচে।

৭ এই ভাল খবরের কতা তোমরা হামার সহকর্মী শ্রী ইপাফ্রাতে থাকি শুনিচেন। উয়ায় তোমারলার পক্ষ থাকি খ্রীষ্টের এক জন বিশ্বস্ত চাকর।

৮ পবিত্র আত্মা তোমারলাক যে পিরিতের মনোভাব দান করিচে তার সমন্ধে ইপাফ্রা হামাক জানাইচে।

৯ এই বাদে তোমারলার সমন্ধে শুনিবার পর থাকি হামরা তোমারলার বাদে প্রার্থনা করির ধরচি। আত্মিক জ্ঞান আর বুদ্ধি দিয়া যাতে তোমরা ভগবানের ইচ্ছা পুরাপুরি বুঝির পান এইটায় হামরা ভগবানেরটে চাই।

১০ যাতে তোমরা সৎ কাম করিয়া ফলবান হন আর ভগবানক আরো ভাল করি জানির পান। এই নাকান করি সউগ কিছুতে প্রভুক সম্ভুষ্ট করিয়া উয়ার যোগ্য হবার পান।

১১-১২ এইটা সম্ভব, কেনেনা ভগবান উয়ার মহাশক্তি অনুসারে সউগ শক্তি দিয়া তোমারলাক শক্তিবান করিচে যাতে তোমরা সউগ সমায় আনন্দের নগত ধৈর্য ধরি সউগ সহ্য করি ভগবানক ধন্যবাদ দেন। আলোর শাসনত ভগবানের মানষিলা যেই অধিকার লাভ করিবে উয়ার ভাগী হবার বাদে তোমারলাক ঠিক করি তুলিচে।

১৩ কেনেনা উয়ায় আন্ধারের শাসন থাকি হামারলাক মুক্ত করি উয়ার পরানের বেটা যীশুর শাসনত নিয়া আসচে।

১৪ এই বেটার নগত যুক্ত হয় হামরা মুক্ত হইচি, মানে হামরা পাপের ক্ষমা পাইচি।

১৫ এই বেটা হইলেক, না দেখা ভগবানের মূর্তি। সউগ কিছু সিদ্ধনের আগত উয়ায়ে আছিলেক আর সউগ সিদ্ধনের উপরত উয়ায় প্রধান,

১৬ কেনেনা দ্যাওয়া আর দুনিয়াত যেইলা দেখা যায় আর যেইলা দেখা যায় না, সউগ কিছুই উয়ার দিয়ায় সিদ্ধন হইচে। সিংহাসন, অধিকার, ক্ষমতা যত আছে উমারলাক সগাকে উয়াক দিয়া উয়ারে বাদে সিদ্ধন করা হইচে।

১৭ সউগ কিছুর সিদ্ধনের আগত উয়ায় আছিলেক আর উয়ার মইদ্বো দিয়া সউগ কিছু টিকি আছে।

১৮ এইলা ছাড়াও উয়ার দেহার, মানে সমিতির উয়ায় মাথা। উয়ায়ে পইলা আর উয়ায়ে মরণ থাকি পইলা বত্তি উঠিচে, যাতে সউগ কিছুতে প্রধান হবার পায়।

১৯ ভগবান চাইচে যে, উয়ার সউগ গুণাগুণ পুরাপুরি যীশুর মইদ্বোত থাকে।

২০ খ্রীষ্টের মইদ্বো দিয়া অমিল দূর করিয়া উয়ার নিজের নগত সউগ কিছুর মিলন উয়ায় চাইচে। খ্রীষ্ট ক্রুশের উপরাত উয়ার অক্ল সঁপে দিয়া শান্তি আনিচে বুলিয়া এই মিলন হবার পাইচে, এইলা ছাড়াও স্বর্গত আর দুনিয়াত সউগ কিছুর মিলন করিচে।

২১ এক সমায় তোমরা ভগবানেরটে থাকি দূরত ছিলেন আর উয়ার বিরুদ্ধে তোমারলার মনের শত্রুয়ামি আছিলেক। তোমারলার বেয়া কামের বাবদ সেইটা দেখা গেইচে।

২২ কিন্তুক খ্রীষ্টের মরণের ফলে উয়ার অন্ত্র মসংএর দেহা দিয়া ভগবান নিজের নগত এলা তোমারলার মিলন করিচে, যাতে উয়ায় তোমারলাক পবিত্র, নিষ্কলঙ্ক, আর নির্দোষী অবস্থায় উয়ারটে আনির পায়।

২৩ অবশ্য এই বাদে খ্রীষ্টের বিষয়ে ভাল খবর থাকি তোমরা যে নিশ্চিত ভরসা পাইচেন, এইটা থাকি দূরত সারি না যায়া তোমারলাক বিশ্বাসে থির থাকির নাগবে। সেই ভাল খবর গোটায় দুনিয়াত প্রচার করা হইচে আর তোমরালা সেইলা শুনিচেন। মুই পৌল এই ভাল খবরের খবরিয়া হইচুং।

২৪ মুই তোমারলার বাদে যে কষ্ট ভোগ করচুং, সেই বাদে মুই আনন্দ পাচুং। খ্রীষ্টের দেহা, মানে সমিতির বাদে খ্রীষ্টের যে দুঃখ ভোগ এলাও বাকি আছে সেইটা মুই মোর দেহা দিয়া পূরণ করির ধরচুং।

২৫ আর ভগবান উয়ার বাইক্য তোমারলারটে পুরাপুরি প্রচার করিবার ভার মোর উপরা দিচে বুলিয়া মুই এক জন সমিতির সেবাকারী হচুং।

২৬ ভগবানের বাইক্যের মইদ্বোত যে আগিলা কালের মানষিলারটে যুগ যুগ ধরি গোপন সইত্য আছিলেক, এলা উয়ার

মানষিলারটে সেইলা প্রকাশ করা হইচে।

২৭ কেনেনা ভগবান চাইলেক, অযিহুদীলার মইন্ধোত উয়ার এই গোপন সইত্যের মহাগৌরব যে কি, তা যেন উয়ার সউগ মানষিলা জানির পায়। সেই সত্য হইলেক যে, খ্রীষ্ট নিজে তোমারলার অন্তরত আছে এই বাদে তোমরা গৌরব পাবার আশা পাইচেন।

২৮ হামরা সেই খ্রীষ্টের বিষয়ে প্রচার করির ধরচি। মানে ভগবানের দেওয়া সীমাহীন জ্ঞান দিয়া সগাকে শিক্ষা দেই আর সাবধান করি, যাতে সগাকে হামরা খ্রীষ্টের মইন্ধো দিয়া খাটি করি তুলির পাই।

২৯ এই উদ্দেশ্যে ভগবানের যে মহাশক্তি হামার মইন্ধোত কাম করির ধরচে, সেই শক্তি অনুসারে মরণ বত্তন পরিশ্রম করির ধরচুং।

২ মুই তোমারলাক জানেবার চাং, তোমারলার বাদে আর লায়দিকেয়া গঞ্জের খ্রীষ্ট সমিতির মানষিলার জইন্যে, যায় যায় মোক দেখে নাই উমারলার বাদে মুই পরান দিয়া খাটা খাটনি করির ধরচুং।

২ মুই চাং যাতে উমরা অন্তরত উৎসাহ পায় আর পিরিতে একমন হয়। আর খ্রীষ্টের বিষয় বুঝিবার ফলে জ্ঞানের নিশ্চয়তা পাওয়া যায় আর সউগ ধনে ধনী হয়। যাতে ভগবানের আসল গোপন তত্ত্ব বুঝির পায়, মানে খ্রীষ্টক জানির পায়।

৩ খ্রীষ্টের মইন্ধোত সউগ জ্ঞান আর বুদ্ধি নুকি থোয়া আছে।

৪ মুই এই কতা কবার ধরচুং যাতে তোমারলাক কাণ্ডো মন ভুলিয়া, যুক্তি তর্ক দিয়া তোমারলাক ভুল ঘাটাত নিয়া না যায়।

৫ মুই সশরিলে তোমারলার ওটেকোনা না থাকিলেও আত্মায় তোমারলার ওটে আছং। আর তোমারলার ভাল চালচলন আর খ্রীষ্টের উপরত থির বিশ্বাস দেখিয়া আনন্দ পাবার ধরচুং।

৬ তোমরা যেই নাকান করি যীশু খ্রীষ্টক প্রভু বুলি মানি নিচেন, ঠিক একে নাকান করি উয়ার সাথত একটে হয় জীবন কাটান।

৭ খ্রীষ্টের মইন্ধোত গছের শিপার নাকান আকড়ে ধরি নিজক বড় কর। তোমরা যেই শিক্ষা পায় বিশ্বাস করিচেন উয়াতে থির থাকো আর ভগবানক সউগ সমায় ধন্যবাদ দেও।

৮ তোমরা সাবধান হন, যাতে মানষি ছলনা ওয়ালা ফাকুয়া দর্শনের শিক্ষা দিয়া বন্দী বানেয়া তোমারলাক নিয়া না যায়। খ্রীষ্টের নগত সেই শিক্ষার কোন সমন্ধ নাই, মানষির বানা নিয়ম দুনিয়ার নিয়ম নীতির উপরাত সেইটা নির্ভর করে।

৯ কেনোনা ভগবানের সউগ গুণাবলি খ্রীষ্টত দৈহিকরূপে ভরপুর।

১০ আর খ্রীষ্টের নগত একটে হয় তোমরালাও ভরপুর হইচেন। উয়ায়ে ত্রিভুবনের সউগ শাসনকর্তালার আর ক্ষমতার অধিকারিলার মাথা।

১১ তোমরালা খ্রীষ্টের নগত একটে হইচেন বুলিয়া তোমারলার দেহাত চিন দেওয়া হইচে, এই চিন কোন মানষির হাত দিয়া দেওয়া নাই হয়, খ্রীষ্ট নিজেই সেই চিন দিচে। মানে দেহার উপরাত পাপ স্বভাবের যেই পাপ শক্তি আছিলেক সেই শক্তি থাকি তোমারলাক মুক্ত করা হইচে।

১২ দীক্ষা নিয়া তোমরালাক খ্রীষ্টের নগত সমাধি দেওয়া হইচে। খালি এইটায় না হয়, যায় খ্রীষ্টক মরণ থাকি ফির বত্তে তুলিচে সেই ভগবানের শক্তির উপরাত বিশ্বাস করি তোমারলাক খ্রীষ্টের নগত বত্তে তোলা হইচে।

১৩ তোমরালা তো পাপ করা আর পাপ স্বভাব না ছাড়ির বাদে মরা ছিলেন, কিন্তুক এলা ভগবান তোমারলাক খ্রীষ্টের সোদে বত্তে তুলিচে, উয়ায় তোমারলার সউগ পাপ ক্ষমা করিচে।

১৪ আর হামারলার বিরুদ্ধে যে হাতে নেখা দোষীনামা আছিলেক, উয়ার সউগ দাবি দাওয়া সুদ্ধা বাতিল করিচে। সেই দোষীনামা উয়ায় ক্রুশ খুটিত খিল দিয়া নটকে খুইয়া বাতিল করি দিচে।

১৫ উয়ায় ত্রিভুবনের সউগ শাসনকর্তালার আর ক্ষমতার অধিকারিলার ক্ষমতা হীন করি দিচে। এই নাকান করি উয়ায় নিজের ক্রুশের মইদ্বো দিয়া সগারে উপরাত জয় করিয়া উমারলার যে পরাজয় সেইটা ঝকঝকা করি দেখে দিচে।

১৬ এই বাদে খাওয়া দাওয়া আর কোন পার্বন অমাবস্যা-পূর্ণিমা, জিরানের দিনলা, এইলা নিয়া তোমারলার দোষ দিবার অধিকার



কাঙোরো নাই।

১৭ যেইটা আসির কতা আছিলেক সেইলা খালি একটা ছায়া, কিন্তুক আসলটা হইলেক খ্রীষ্ট।

১৮ ধর্মীয় নিয়ম নীতি দিয়া নিজের দেহাক কষ্ট দেওয়া আর স্বর্গদূতক আরাধনা করা যায় যায় দরকারি মনে করে, উমরা যাতে তোমারলার স্বর্গীয় ঘাটার বাধা না জন্মায়। এই নাকানের মানষি যেইলা দেখিচে কয়া আজলি হয় উমরা বড় বড় কতা কয়া বিনা কারনে অহংকারে ফুলিয়া ওঠে। কেনেনা উমারলার মন পাপ স্বভাবের অধীন।

১৯ উমরা শক্ত করি মাথাক মানে যীশু খ্রীষ্টক ধরি রয় না, উয়ায় তো গোটায় দেহার আসল মাথা, যেই মাথার চালনায় গোটা দেহা, হাড়ি, রগ, মসংএর নগত একটে থির হয়। আত্মিক জীবন বড় হয়।

২০ খ্রীষ্টের নগত মরিয়া তোমরা যেলা দুনিয়ার নানা নিয়ম হাতে দূরত সারি আসচেন, তাইলে এলাও দুনিয়ার মানষিলার মতন করি তোমরা কেনে দুনিয়ার নিয়মত চলির ধরচেন?

২১ এই নাকানের নিয়ম আছে, ধরেন না, চাখেনও না, নারেনও না।

২২ ঐ বস্তুলা ব্যবহার করি নষ্ট হয়, কেনেনা এই নিয়মলা মানষির দেওয়া আদেশ আর শিক্ষা।

২৩ এই নিয়মলা মনে হয় জ্ঞানে ভর্তি, কেনেনা কেমন করি আরাধনা করির নাগে, কেমন করি নিজক নত করির নাগে, কেমন করি নিজের দেহাক কষ্ট দেওয়া যায় এই নিয়মলা মানষিক জানায়। কিন্তুক পাপ স্বভাবক বশ করির ব্যপারে এইলার কোন দাম নাই।

৩ খ্রীষ্ট ভগবানের ডাইন পাকে স্বর্গত বসি আছে, আর তোমরা খ্রীষ্টের নগত মরণ থাকি ফির বত্তি উঠিচেন, এই বাদে স্বর্গীয় বিষয়লা খোজ কর।

২ স্বর্গীয় বিষয় নিয়া ভাবনা কর, দুনিয়ার বিষয় নিয়া না ভাবেন।

৩ কেনেনা তোমরা মরি গেইচেন আর তোমারলার জীবন খ্রীষ্টের নগত ভগবানেরটে নুকি থোয়া হইচে।

৪ হামার জীবন হইলেক খ্রীষ্ট, যেলা খ্রীষ্টক দেখা যাবে সেলা তোমরাও উয়ার নগত মহিমার ভাগী হবেন।

৫ এই বাদে তোমারলার পাপ স্বভাবের মইন্ধোত যেইলা আছে সেইলা নষ্ট করি ফেলান। উয়াতে আছে সউগ নাকানের ব্যভিচার, অশুচিতা, কুবাসনা, বেয়া ইচ্ছা, আর লোভ যাক এক নাকানের প্রতিমা পূজা করা কওয়া হয়।

৬ এই সউগ কারনে অবাধ্য ছাওয়ালার উপরত ভগবানের শাস্তি নামি আইসে।

৭ আগত যেলা তোমরা এইলা নিয়া জীবন ধারন করির  
ধরছিলেন সেলা তোমরা এই সউগ নিয়া চলির ধরছিলেন।

৮ কিন্তুক এলা রাগ, মেজাজ দেখা, হিংসা, গাইলাগাইলি, বেয়া  
কতাবার্তা তোমরালা ছাড়ি দেও।

৯ এক জন আরেক জনেরটে মিছাং কতা না কন, কেনেনা  
পুরান স্বভাবক আর উয়ার কামলা কাপড়ের নাকান করি ছাড়ি  
দিচেন, নয়া স্বভাবক পিন্দিচেন।

১০ আর নয়া হইতে হইতে আপন সিদ্ধজনকর্তার নাকান হইচেন।

১১ এই জাগাত যিহুদী আর অযিহুদীর মইদ্বোত দেহাত চিন  
দেওয়া আর না দেওয়া মানষির মইদ্বোত, অশিক্ষিত, নিচা জাতি,  
চাকর বা স্বাধীন মানষির মইদ্বোত কোন ফারাক নাই, ওটেকোনা  
যীশু খ্রীষ্টই হইলেক মূল। আর উয়ায় সগারে মইদ্বোত আছে।

১২ এই বাদে ভগবান যাক বাছাই করি নিয়া নিজের বাদে যুদা  
করি থুইচে, উয়ায় সেই মনের মানষি হিসাবে তোমরা অন্তরের  
মায়া মমতা, দয়া, নত-নম্র, নরম স্বভাব আর ধৈর্য দিয়া  
নিজেরলাক সাজান।

১৩ একে অইন্যক সহ্য কর, আর কাণোরো বিরুদ্ধে তোমারলার  
কোন দোষ দিবার কারন থাকে তাইলে উয়াক ক্ষমা কর। প্রভু যেই  
নাকান তোমারলাক ক্ষমা করিচে একে নাকান করি তোমারলারও  
একে অইন্যক ক্ষমা করা উচিত।

১৪ এই সউগের উপরাত পিরিত দিয়া নিজেরলাক সাজান।  
পিরিতে সউগ মানষিক একটে করে।

১৫ খ্রীষ্ট যে শান্তি দেয় সেই শান্তি তোমারলার অন্তরত থাকিয়া  
তোমারলাক চালনা করুক। শান্তিতে থাকির বাদে তোমারলাক  
এক দেহা হিসাবে ডেকা হইচে। তোমরা উয়ার প্রতি কৃতজ্ঞতা  
জানান।

১৬ খ্রীষ্টের বাইক্য তোমারলার অন্তরত ভরপুর হয়। বসবাস  
করুক। ভগবানের দেওয়া জ্ঞানে একে অইন্যক শিক্ষা আর  
পরামর্শ দেও আর অন্তরত কৃতজ্ঞতার নগত ভগবানের উদ্দেশ্যে  
গীতসংহিতার গান আর আত্মিক গুণগানের গান কর।

১৭ তোমরালা যেইলায় কন আর করেন না কেনে প্রভু যীশুর  
নামে করেন আর উয়ার মইন্ধো দিয়া স্বর্গের বাপ ভগবানক  
ধন্যবাদ দেও।

১৮ বিয়াও করা বেটিছাওয়া তোমরা সগায় সোয়ামির অধীনতা  
মানি নেও, যেই নাকান প্রভুর মানষি হিসাবে এইটায় ঠিক।

১৯ বিয়াও করা বেটাছাওয়ালা তোমরা সগায় তোমার মাইয়াক  
পিরিত কর আর উয়ার সোদে নিষ্ঠুর ব্যবহার না করেন।

২০ বেটা-বেটিলা, তোমরা সউগ বিষয়ে মাও বাপের বাদ্ধ  
থাকেন, কেনেনা ইয়াতে প্রভু খুশি হয়।

২১ তোমরা যায় বাপ, তোমরালা বেটা-বেটিলার মন তিতা না  
করেন, যাতে উমরা উৎসাহ না হারায়।

২২ তোমরা যায় চাকর, তোমরা সউগ বিষয়ে তোমারলার এই দুনিয়ার মালিকের বাদ্ধ থাকেন। যেলা উমরা তোমারলাক দেখে সেলায় যে খালি উমারলাক খুশি করির বাদে বাদ্ধ হবেন তা কিন্তুক না হয়। তোমরা খাটি অন্তরে প্রভুর উপরাত ভক্তি থুইয়া উমারলার বাদ্ধ হন।

২৩ তোমরালা যেইটায় কাম করেন না কেনে মনে পরানে কর। মানষির বাদে না হয় প্রভুর বাদে করির ধরচেন।

২৪ কেনেনা তোমরালা জানেন, প্রভু উয়ার মানষিলার বাদে যেইটা থুইচে সেইটা তোমরা পুরস্কার হিসাবে উয়ারটে থাকি পাবেন। তোমরালা প্রভু যীশু খ্রীষ্টের সেবা করির ধরচেন।

২৫ যায় অন্যায় করে উয়ায় উয়ার ফল পাবে। প্রভুর চখুত সগায় সমান উয়ায় মুখ চিনিয়া মুগের ডাইল দেয় না।

৪ মালিকলা, স্বর্গত তোমারলার এক জন মালিক আছে। এইটা জানিয়া তোমরা তোমারলার চাকরলার সোদে সৎ আর ন্যায় ব্যবহার কর।

২ তোমরা কৃতজ্ঞ ও সতর্ক হয়া নিজেরলাক প্রার্থনাত ব্যস্ত রাখো।

৩ আর হামারলারও বাদে প্রার্থনা কর যাতে খ্রীষ্টের বিষয় গোপন সচাংএর কতা প্রচার করির ভগবান হামারলাক সুযোগ করি দেয়। সেই গোপন সচাংটার বাদে তো মোক বন্দী করা হইচে।

৪ যেই নাকান ঝকঝকা করি হামার বিষয় বুঝিয়া কওয়া উচিত, প্রার্থনা কর যাতে মুই সেই নাকান করি বুঝিয়া কবার পাং।

৫ যায় যায় ভগবানের মানষি না হয় উমারলার সোদে বুদ্ধি ব্যবহার করি চল আর খ্রীষ্টের বিষয় কবার প্রতিটা সুযোগ কামত নাগান।

৬ তোমারলার কতাবার্তা মধুর মত হউক, নোনতা স্বাদ যুক্ত খাবারের নাকান হউক। কাক ক্যেমন করি উত্তর দিবার নাগিবে সেইটা তোমরা বুঝির পারেন।

৭ প্রভুতে আদরের ভাই, বিশ্বস্ত সেবাকারী আর প্রভুর কামত হামারলার সহকর্মী শ্রী তুখিক, মোর সউগ খবরা খবর তোমারলাক জানাবে।

৮ তোমরা যাতে হামার সমন্ধে জানির পান আর উয়ায় যাতে তোমারলাক উৎসাহ দিবার পায় এই বাদে মুই শ্রী তুখিক তোমারলারটে পেঠালুং।

৯ শ্রী তুখিকের সোদে মুই মোর বিশ্বস্ত পরানের ভাই ওনীষিমক পেঠালুং। উয়ায় তোমারলার এক জন। উমরা এটেকার সউগ কিছুই তোমারলাক জানাবে।

১০ মোর সোদে বন্দী ভাই আরিষ্টার্থ আর শ্রী বার্ণবার কাকাতো ভাই মার্কও তোমারলাক মঙ্গল কামনা জানেবার ধরচে। মার্কের বিষয় তোমরা জানির পাইচেন যে উয়ায় যদি তোমারলার

ওটেকোনা যায় তাইলে আদর করিয়া সাগাইয়ের নাকান সন্মান জানান।

১১ যাক যুষ্ট কয়া ডেকা হয় সেই যীশুও তোমারলাক মঙ্গল কামনা জানের ধরচে। যিহুদীলার মইন্ধে খালি এই তিন জন শিষ্য ভগবানের শাসন ব্যবস্থার প্রচারের বাদে মোর সোদে কাম করির ধরচে। উমরা মোক মেলা উৎসাহ দিচে।

১২ শ্রী ইপাহ্রাও তোমারলাক মঙ্গল কামনা জানেবার ধরচে। উয়ায় তোমারলার নিজের মানষিলার মইন্ধে এক জন আর উয়ায় যীশু খ্রীষ্টের চাকর। উয়ায় সউগ সমায় তোমারলার হয় প্রার্থনাত নড়াই করির ধরচে, যাতে তোমরা ভগবানের ইচ্ছা জানিয়া শক্ত হয় খাড়া হয় রন।

১৩ ইপাহ্রার সমন্ধে মুই কবার পাং তোমারলার বাদে আর যায় যায় লায়দিকেয়া গঞ্জত আর হিয়রাপলি গঞ্জত আছে উমারলার বাদে খুব খাটাখাটনি করিচে।

১৪ আদরের ডাক্তার লুক আর শ্রী দীমা তোমারলাক মঙ্গল কামনা জানের ধরচে।

১৫ লায়দিকেয়ার শিষ্য ভাই-বইনিলার আর শ্রীমতি নুম্ফা আর উয়ার বাড়িত যেই মানষিলা সমিতিত জড়ো হয় উমারলাক মঙ্গল কামনা জানান।

১৬ তোমারলার এই চিঠি পড়া শেষ হওয়ার পাছত লায়দিকেয়ার সমিতিক এই চিঠিখান পড়ির দেন। আর

লায়দিকেয়ার সমিতিৰ যেই চিঠিখন পড়িৰ দেওয়া হবে সেইখনও তোমরালা পৱেন।

১৭ শ্ৰী আৰ্থিপ্লক এই কতা কন, “প্ৰভুৰ সেৱাৰ বাবে তোক যেইটা কাম দেওয়া হইচে সেই কাম শেষ কৰিৰ বাবে বিশেষ কৰি মন দে।”

১৮ মুই পৌল নিজের হাত দিয়া এই মঙ্গল কামনাৰ কতা নেখিৰ ধৰচুং। ফম কৰ, মুই জেলত বন্দী আছং। ভগবান তোমাৱলাক দয়া কৰক॥



## ১ থিষলনীকীয়

১ স্বর্গের বাপ ভগবান আর প্রভু যীশু নগত একটে হয়। থিষলনীকী গঞ্জত খ্রীষ্টীয় সমিতিরটে, শিলাস, তীমথিয় আর মুই পৌল এই চিঠি নেখির ধরচি। হামার স্বর্গের বাপ আর প্রভু যীশু খ্রীষ্টের দয়া আর শান্তি তোমারলার উপরা আসুক।

২ হামরা প্রার্থনা করির সমায় তোমারলার সগারে কতা ফম করিয়া ভগবানক ধন্যবাদ দেই।

৩ তোমরা বিশ্বাস আর পিরিতি নিয়া যে খাটনি করিচেন, হামারলার প্রভু যীশু খ্রীষ্টের উপরা যে আশা নিয়া উৎসাহের নগত ধৈর্য ধরি আছেন, সউগ সমায় স্বর্গের বাপ ভগবানের আগত প্রার্থনাত ফম করি।

৪ ভাই বইনিলা ভগবান তোমারলাক বাছাই করি নিচে বুলিয়া তোমরা ভগবানের আপন মানষি। হামরা ঐ কতা জানি

৫ কেনেনা হামারলার ভাল খবর প্রচার খালি শোনার মইন্ধো দিয়া তোমারলারটে আইসে নাই, কিন্তু সেইটা ঐশ্বরিক শক্তিতে, পবিত্র আত্মার বলে আর হামারলার মনের ভরপুর বিশ্বাসের ফলে আসিচে। তোমারলার ওটে থাকির সমায় তোমারলার মঙ্গলের বাদে হামরা কি নাকান করি চালচলন করচি সেইটা তোমরা জানেন।

৬ তোমরালা নানা নাকান অইত্যাচার সহ্য করিয়াও, পবিত্র আত্মার দেওয়া আনন্দে ভাল খবর মানি নিয়াও তোমরালা হামারলাক আর প্রভুক ফম করি চলির ধরচেন।

৭ এই নাকান করি তোমরালা ম্যাসিডোনিয়া আর গ্রীস দেশের সউগ শিষ্যলারটে একটা আদর্শ হইচেন।

৮ খালি ম্যাসিডোনিয়া আর গ্রীস দেশত তোমারলারটে থাকি প্রভুর বাইক্য ছড়ি পরিচে এমন না হয়, কিন্তু প্রভুর উপরা তোমারলার বিশ্বাসের কতাও সউগ জাগাতে পৌছিচে। এই ব্যাপারে হামারলার কোন কিছুই কবার নাই।

৯ কেনেনা সউগ জাগার মানষি হামারলাক জানেবার ধরচে, কেংকরি তোমরালা হামাক সাগাইয়ের নাকান বরণ করিচেন। আর কেংকরি দেব-দেবীর পূজা ছাড়ি দিয়া জীবন্ত অন্তরসত্তা ভগবানের সেবাত মন দিচেন।

১০ আর ভগবানের বেটা যীশু স্বর্গ থাকি ফিরি আইসার বাদে তোমরালা কেংকরি বাছে আছেন সেইটাও উমরা কবার ধরচে। পরম প্রভু উয়াক মরণ থাকি ফির বন্তে তুলিচে, ভগবানের যে শাস্তি নামি আসির ধরচে, ঐ শাস্তি থাকি উয়ায় হামারলাক রক্ষা করিবে।

১২ হে মোর আদরের ভাই-বইনির ঘর, তোমরালায় জানেন যে, তোমারলারটে যাওয়া হামারলার অকামের হয় নাই।

২ তোমরালা এই কতাও জানেন যে, তোমারলার ওটে যাবার আগত ফিলিপী গঞ্জত হামরালা দুঃখ ভোগ করছিলং আর অপমানও হইছিলং। কিন্তুক এইলা বাধা থাকাতেও হামরালা ভগবানেরটে থাকি সাহস পায়া উয়ার ভাল খবরের কতা তোমারলাক জানাচি।

৩ হামারলার এই উপদেশ ভুল শিক্ষা দেওয়া না হয়, বেয়া উদ্দেশ্যের না হয়, আর ছলনারও কোন কতা কবার ধরচি না।

৪ বরং হামারলাক যোগ্য মনে করি এই ভাল খবর প্রচারের ভার দিচে। হামরা যেলা প্রচার করি মানষিক সন্তুষ্ট করির বাদে না হয়, যায় হামার অন্তর যাচাই করে সেই ভগবানক সন্তুষ্ট করির বাদে।

৫ তোমরালা ভাল করি জানেন হামরালা কোন দিনও খোষা-মোদ করি কোন কতা কই নাই, আর লোভ ঢাকি খুইয়াও ছলনা করি কোনো কতা কই নাই, ভগবানে এইলার সাক্ষী।

৬ মানষিলারটে থাকি বা তোমারলারটে আর অইন্য কাণ্ডেরটে থাকি হামরা নাম কামের চেষ্টা করি নাই।

৭ খ্রীষ্টের খবরিয়া হিসাবে হামারলার অধিকার অবশ্য হামরালা তোমারলার উপরত খাটের পাইলং হয়; কিন্তুক তার বদলে মাও যেই নাকান ছাওয়াক আদর যতন করে, একে নাকান তোমারলার নগত থাকির সমায় হামরালাও নরম ব্যবহার করচি।

৮ তোমারলার উপরা খুব মায়া-মমতা থাকাতে তোমারলাক খালি যে ভগবানের ভাল খবরের ভাগীদার করির চাই, এই নাকান না

হয়, হামরালা নিজের জীবনও তোমারলার বাদে সঁপে দিবার রাজি আছিলং। কেনেনা তোমরালা হামারলারটে খুব আদরের।

৯ আদরের ভাই বইনিলা তোমারলার মনে আছে যে হামরা কত কঠুর খাটা-খাটনি করচি, আর কষ্টের কতা নিশ্চয় তোমারলার ফম আছে। তোমারলারটে ভগবানের ভাল খবরের কতা প্রচার করির সমায় হামরা দিন রাতি রুজি রোজগারের বাদে খাটা-খাটনি করচি, যাতে টাকা-পাইসার বাদে হামরালা তোমারলার কারোটে বোঝা না হই।

১০ তোমরালা যায় যায় শিষ্য হইচেন তোমারলার মইদ্বোত হামারলার জীবন কত পবিত্র, সৎ আর নিখুঁতিয়ার নাকান আছিলেক, সেইলার সাক্ষী তোমরালাও আছেন আর ভগবানও আছে।

১১-১২ তোমরালা জানেন, বাপ যেই নাকান উয়ার নিজের ছাওয়ালাক উৎসাহ, সান্তনা দেয় আর মিনতি করে, হামরাও তোমারলার সাথে একে নাকান ব্যবহার করচি। যাতে ভগবানের মানষি হিসাবে ভাল করি চলেন। ভগবান উয়ার শাসন ব্যবস্থাত মহিমার ভাগীদার হবার বাদে তোমারলাক ডেকাইচে।

১৩ আর এই বাদে সউগ সমায় হামরা ভগবানক ধন্যবাদ দেই, কেনেনা ভগবানের বাইক্য হামারলারটে থাকি শুনিয়া তোমরা বিশ্বাস করিচেন। সেইটা মানষির বাইক্য হিসাবে না হয় কিন্তুক ভগবানের বাইক্য হিসাবে বিশ্বাস করিচেন। আর সচাং করি এইটা

হইলেক ভগবানের বাইক্য। তোমরালা যায় যায় বিশ্বাস করিচেন,  
তোমারলার অন্তরত এই বাইক্য কাম করির ধরচে।

১৪ মোর আদরের ভাই বইনিলা যিহুদীয়া প্রদেশত যেই সউগ খ্রীষ্ট  
সমিতিলা একটে হইচে, তোমারলার অবস্থা উমারলারে নাকান।  
যিহুদী মানষিলার হাতত উমরা যে দুঃখ-কষ্ট ভোগ করিচে,  
তোমরাও নিজের দেশের মানষিলার হাতত একে নাকান দুঃখ  
ভোগ করিচেন।

১৫ সেই যিহুদীলায় প্রভু যীশুক আর ভাববাদীলাক মারি  
ফেলাইচে। ইমরালা হামারলাকও অইত্যাচার করিচে, এইলার  
বাদে ভগবান উমার উপরত খুশি নাই, ইমরা তো সউগ মানষির  
বিরুদ্ধে।

১৬ উমরা চায় না হামরালা মুক্তির ঘাটার সমন্ধে অযিহুদীলাক  
কই। উমরা হামার প্রচারের এই নাকান বিরোধীতা করিয়া পাপের  
উপর পাপ করির ধরচে, এই বাদে উমারলার উপরত ভগবানের  
ভয়ংকর গোসা নামি আসিচে।

১৭ ভাই বইনিলা অল্প কয় দিন হইলেক হামরালা দেহার দিক  
হাতে যুদা হইচি কিন্তুক মনের দিক থাকি হই নাই। এই বাদে খুব  
চেষ্টা করির ধরছিলোং যাতে তোমারলার সাথে হামারলার দেখা  
হয়।

১৮ তারে বাদে হামরালা, বিশেষ করি মুই পৌল বারে বারে  
তোমারটে আসির চেষ্টা করিচোং, কিন্তুক শয়তান হামারলাক বাধা

দিচে।

১৯ হামারলার প্রভু যীশু যেলা আসিবে, সেলা উয়ার সামনাত হামারলার আশা, আনন্দ আর গর্বের মটুক কায় হবে? তোমরালায় কি?

২০ সচাংয়ে তোমরালায় হামারলার গর্বের, আর আনন্দের।

৩ যেলা তোমারলাক দেখির না পায়া আর ধৈর্য ধরির পারিলং না, সেলা হামার ভাই তীমথিয়ক তোমারলারটে পেঠাইলং আর হামরা এথেন্স গঞ্জত একলায় রয়া গেলুং। তীমথিয় হামার সোদে খ্রীষ্টের বিষয় ভাল খবর প্রচার করিয়া ভগবানের কাম করে। হামরালা উয়াক পেঠাইচি যাতে উয়ায় তোমারলাক থির রাখে আর বিশ্বাসের সমন্ধে উৎসাহ দিবার পারে,

৩ যাতে এইলা দুঃখ-কষ্টের মইন্ধো দিয়াও তোমরা কাণ্ডো পাছে না যান। তোমরালায় জানেন যে, এই দুঃখ-কষ্ট হামারলার বাদে ঠিক করায় আছে।

৪ দুঃখ-কষ্ট যে হামারলার উপরাত আসিবে সেই কতা তোমারলার নগত থাকির সমায় হামরালা বার বার কইচি। তোমরালা জানেন যে, হামরা যেমন কইচি তেমনে হইচে।

৫ এই বাদে মুই আর সহ্য করির না পায়া বিশ্বাসের দিক দিয়া তোমরালা কি অবস্থাত আছেন, এইটা জানির বাদে তীমথিয়ক পেঠাইলুং। মোর ভয় হইছিলেক যে, শয়তান হয় তো

তোমারলাক ফান্দত ফেলোইচে আর হামারলার সউগ পরিশ্রম বিফলে গেইচে।

৬ কিন্তুক এলা তীমথিয় তোমারলার ওটে থাকি ফিরি আসিয়া তোমারলার পিরিত আর বিশ্বাস সমন্ধে ভালে খবর দিচে। উয়ায় কইচে পিরিতের মনভাব নিয়া তোমরালা সউগ সমায় হামারলার কতা ফম করেন, আর হামরালা যেমন তোমারলাক দেখির চাইছি তেমন তোমরালাও হামারলাক দেখির চাইছেন।

৭ এই বাদে ভাই-বইনিলা, তীমথিয়র মুখত তোমারলার বিশ্বাসের কতা শুনিয়া হামারলার সউগ দুঃখ-কষ্টের মইন্ধেও সান্তনা পাইচি।

৮ প্রভু যীশুর উপরত তোমারলার বিশ্বাস থির থাকিলেই হামার জীবন ধন্য।

৯ তোমারলার বাদে হামার খুব আনন্দ, আর হামরা ভগবানক অসীম ধন্যবাদ জানেবার ধরচি।

১০ হামরা তোমারলার বাদে দিনে রাতি খুব প্রার্থনা করির ধরচি, যাতে তোমারলার ওটেকোনা যাবার পারি আর তোমারলার বিশ্বাসের সউগ অভাব পূরণ করির পারি।

১১ হামরা প্রার্থনা করির ধরচি হামারলার স্বর্গের বাপ ভগবান নিজে আরো হামার প্রভু যীশু যাতে তোমারলারটে যাবার ঘাটা ঠিক করি দেয়।

১২ হামরালা প্রার্থনা করির ধরচি যাতে প্রভু তোমারলার একে অপরের প্রতি পিরিত বাড়েয়া দিয়া উথুলি পরে।

১৩ তাইলে উয়ায় তোমারলার অন্তর ঠিক করিবে, যেহেতু হামার প্রভু যীশু উয়ার নিজের মানষিলাক নিয়া ফিরি আসিবে, সেহেতু হামার স্বর্গের বাপের সামনাত পবিত্র আর খাটি হন।

৪ হে মোর আদরের ভাই-বইনিলা, তোমারলারটে মোর আরো কিছু কবার আছে। কেমন করি ভগবানক সন্তুষ্ট করি জীবন যাপন করির নাগিবে, এই বিষয়ে তোমরা হামারলারটে শিক্ষা পাইচেন, আর সচাংএ তোমরা ঐ নাকানে চলির ধরচেন। তাঙো প্রভু যীশুর হয় হামরা আবদার করির ধরচি যাতে তোমরা আরো বেশী করি ঐ নাকান করি চলেন।

২ প্রভু যীশুরটে অধিকার পয়া হামরা তোমারলাক কি কি আদেশ দিচি সেইলা তো তোমারলার জানা আছে।

৩ ভগবান চায় যে, তোমরা পবিত্র হন আর সউগ নাকানের যৌন পাপ থাকি দূরত থাকেন।

৪ তোমরালা সগায় নিজের দেহাক পবিত্র করি সন্মানের সাথে বশে খুবার শেখ।

৫ বিধর্মীলা তো কামনার বশে চলে আর ভগবানক জানে না, উমারলার মত তোমরালা চলেন না।

৬ বিশেষ করি ব্যভিচার করিয়া কাঙো যাতে নিজের গুরু ভাইয়ের ক্ষতি না করে, হামরা আগতে তোমারলাক কইচি আর সাবধান করি দিচি, এইলা অন্যায়ের বাদে প্রভুই বদলা নিবে।



৭ কেনেনা ভগবান অশুদ্ধি হয় চলিবার বাদে হামারলাক ডেকায় নাই, পবিত্র হয় চলির বাদে ডেকাইচে।

৮ এই বাদে যায় এই শিক্ষা মানে না, উয়ায় মানষিক মানে না খালি সেইটায় না হয়, কিন্তুক যেই ভগবান পবিত্র আত্মা দান করিচে উয়াকও মানে না।

৯ ভাইয়ের পতি ভাইয়ের পিরিতের কতা তোমারলাক আর নেখিবার দরকার নাই, কেনেনা একে অপরক পিরিতি করির শিক্ষা তোমরা ভগবানেরটে থাকি পাইচেন।

১০ আর সচাং করি তোমরালা ম্যাসিডোনিয়া প্রদেশের সউগ ভাই-বইনিলাক ভালবাসেন, কিন্তুক ভাই বইনিলা বিশেষ করি যে তোমারলারটে মোর আবদার এই পিরিতি যাতে আরো গভীর হয়।

১১ হামরা তোমারলাক যে নাকান আদেশ দিচি, সেই নাকান শান্ত জীবন কাটেয়া নিজের কামত ব্যস্ত থাকো, আর মন দিয়া রুজি রোজগারের বাদে নিজের হাতে কাম কর।

১২ এই দেখিয়া খ্রীষ্ট সমিতির বায়রার মানষিলা তোমারলাক সন্মান করিবে, আর কাণ্ডের উপরাত তোমারলাক নির্ভর করির নাগিবে না।

১৩ আদরের ভাই-বইনিলা, হামরা চাই না যায় যায় মরি গেইচে উমারলার সমন্ধে তোমারলার অজানা থাকুক; যার যার মনত আশা নাই, উমারলার নাকান তোমরালা দুঃখে ভাঙি না পরেন।

১৪ হামরা বিশ্বাস করি যীশু মরিয়া ফির বত্তি উঠিচে, হামরা এইটাও বিশ্বাস করি, যায় যায় যীশুর শিষ্য হয় মরিচে, ভগবান উমারলাকও যীশুর সোদে নিয়া যাবে।

১৫ হামরা যেইলা কবার ধরচি সেইলা প্রভুর বাইক্য হিসাবে জানির পায়া কবার ধরচি। হামরা যায় যায় প্রভুর ফিরি আইসার সমায় বত্তি থাকিমু, হামরালা কোন মতে সেই মরা মানষিলাৰ আগত যামু না।

১৬ কেনেনা যেলা প্রধান দুতের ড্যেক আর ভগবানের তুরীর বাজনায় জাকজমকের নগত প্রভু নিজেই স্বর্গ থাকি নামি আসিবে। শিষ্য হয় যায় যায় মরিচে সেলা উমরায় আগত বত্তি উঠিবে।

১৭ তার পাছত হামরা যায় যায় বত্তি রমু, হামারলাক স্বর্গত প্রভুর সোদে মিল হবার বাদে উমারলার নগত মেঘের মইন্ধোত তুলি নেওয়া হবে; এই নাকান করি হামরালা সগায় চিরকাল প্রভুর নগত থাকিমু।

১৮ এই বাদে তোমরালা এই কতা কয়া এক জন অইন্য জনাক সান্তনা দেও।

৫ ভাই বইনিলা কোন সমায় বা কেমন করি ঘটিবে সেই সমন্ধে তোমারলারটে নেখিবার দরকার নাই।

২ তোমরালা নিজেই ভাল করি জানেন যে, রাতি বেলা চোর যে নাকান করি আইসে, প্রভুর ফিরি আইসার দিন ঐ নাকান করি চোখুর পলকে আসিবে।

৩ মানষিলা যেই সমায় কবে হামরা শান্তিতে আছি ভয়ের কোন কারন নাই, সেলো গাওভারী বেটিছাওয়ার নিমিষের মইদ্বোত প্রসব বিশ উঠিবার মতন করি ঐ মানষিলাস সর্বনাশ হবে। উমরা কোন মতে বাঁচির পাবে না।

৪ কিন্তু ভাই বইনিলা তোমরা তো আন্ধারত নাই, এই বাদে ঐ দিনটা চোরের নাকান তোমারলার উপরত নামি আসির পারে না।

৫ তোমরা তো সগায় আলোর আর দিনের মানষি। হামরা রাতির আর আন্ধারের মানষি না হই।

৬ এই বাদে হামরা অইন্য মানষিলাস মত যাতে না নিন্দাই। হামরা চেতনে রমো আর নিজক দমনে থুমু।

৭ যায় যায় নিন যায় উমরা রাতিত নিন্দায় আর যায় মাতাল হয় উমরা রাতিত মাতাল হয়।

৮ হামরা কিন্তুক দিনের মানষি, এই বাদে বিশ্বাস আর পিরিত দিয়া বুক ঢাকিয়া, মাথা বাঁচের বাদে মুক্তির ভরসা মটুকের নাকান মাথাত পিন্দি। এই নাকান করি হামরা নিজক দমনে থুই।

৯ শান্তি পাবার বাদে না হয়, হামারলার প্রভু যীশুর মইদ্বো দিয়া মুক্তি পাবার বাদে ভগবান হামারলাক ঠিক করি থুইচে।

১০ বাছাই করা রাজাটা হামার বাদে মরিচে, হামরা বাঁচি বা মরি, যাতে হামরা উয়ার নগত বত্তায় থাকির পারি।

১১ এই বাদে তোমরা এলা যেমন করির ধরচেন এই নাকান করি একে অইন্যক উৎসাহ দেও আর গড়ে তুলিতে থাক।

১২ ভাই বইনিলা হামরা তোমাক অনুরোধ করির ধরচি, যায় যায় তোমারলার মইন্ধে খাটনি করে, প্রভুর হয়্যা তোমাক পরিচালনা করে আর উপদেশ দেয়, শিক্ষা দেয়, উমাক সন্মান করো।

১৩ উমারলার কামের বাদে উমাক সন্মান করো, সউগ অন্তর দিয়া পিরিত করো। আর একে অপরের মইন্ধে শান্তি বজায় রাখ।

১৪ ভাই বইনিলা হামরা তোমাক উপদেশ দিবার ধরচি, যায় আলসিয়া উমারলাক সাবধান করি দেন, যার সাহস নাই উমারলাক সাহস দেও, যায় কাহিল উমারলাক সাহায্য কর, আর সগাকে ধৈর্য ধরিয়া সহ্য কর।

১৫ দেখেন অন্যায়ের বদলে কাণ্ডো যাতে অন্যায় না করে। তোমরা সউগ সমায় গুরু ভাই বইনিলার, এমন কি সগারে ভাল করির চেষ্টা কর।

১৬ সউগ সমায় আনন্দে থাকেন,

১৭ সউগ সমায় প্রার্থনা করেন।

১৮ সউগ বিষয়ে ভগবানক ধন্যবাদ দেও, কেনেনা খ্রীষ্ট যীশুর শিষ্যলার বাদে এইটায় ভগবানের ইচ্ছা।

- ১৯ পবিত্র আত্মাক দম বন্ধ করি থোন না।
- ২০ ভাববাদীর কতা তুচ্ছ করেন না,
- ২১ কিন্তুক সউগ কিছুই যাচাই করি দেখ, যেইলা ভাল সেইলা ধরি রন।
- ২২ সউগ নাকানের বেয়া কাম থাকি দূরত রন।
- ২৩ শান্তিদাতা ভগবান তোমারলাক পুরাপুরি শুদ্ধি করুক। আর হামার প্রভু যীশুর আইসার সমায় পর্যন্ত তোমারলার দেহা, আত্মা আর মন কলঙ্ক মুক্ত থুক।
- ২৪ যায় তোমারলাক ডেকাইচে, উয়ার দেওয়া কতা মতন ঐলা উয়ায় করিবে। কেনেনা উয়ায় বিশ্বস্ত।
- ২৫ ভাই বইনিলা, হামার বাদে প্রার্থনা করো।
- ২৬ পিরিতের মনভাব নিয়া সগারে মঙ্গল কামনা করেন।
- ২৭ মুই প্রভুর নামে তোমাক এই আদেশ দিবার ধরচুং, যাতে এই চিঠিখান সউগ ভাই-বইনিলাক পড়েয়া শোনা হয়।
- ২৮ হামার প্রভু যীশুর দয়া তোমারলার সাথত থাকুক॥

## ২ খিষলনীকীয়

১ হামারলার স্বর্গের বাপ ভগবান আর প্রভু যীশু খ্রীষ্টের নগত একটে হয়। খিষলনীকীয় সমিতির উদ্দেশ্যে শিলাস, তীমথিয় আর মুই পৌল এই চিঠি নেখিলুং।

২ স্বর্গের বাপ আর প্রভু যীশু খ্রীষ্ট তোমারলাক দয়া করুক আর শান্তি দেউক।

৩ ভাই-বইনিলা, হামরা তোমারলার বাদে সউগ সমায় ভগবানক ধন্যবাদ দেওয়া উচিত আর এইটা হামার কর্তব্য। তোমারলার বিশ্বাস বাড়ির ধরচে আর একে অইন্যের প্রতি পিরিত উথলি পরির ধরচে।

৪ এই বাদে খ্রীষ্ট সমিতিলাকটে তোমারলাক নিয়া হামরা গর্ববোধ করির ধরচি কারন সউগ নাকানের অইত্যাচার আর দুঃখ-কষ্ট তোমরা সহ্য করির ধরচেন, আর ধৈর্য ধরি বিশ্বাসে টিকি আছেন।

৫ এইলা তো ভগবানের ন্যায় বিচারের প্রমাণ। আর ইয়ার উদ্দেশ্য হইলেক, যাতে তোমরা ভগবানের শাসনত যোগ্য বুলিয়া গন্য হন। যার জইন্যে তোমরা দুঃখ ভোগ করির ধরচেন।

৬ কেনেনা ভগবান ন্যায়্য বিচারক, তোমারলাক যায় যায় কষ্ট দেয়, ভগবান উমারলাকও কষ্ট দিবে।

৭ আর তোমরা যায় যায় কষ্ট পাবার ধরচেন, উয়ায় হামারলার নগত তোমারলাকও কষ্ট থাকি রেহাই দিবে। যেহেলা প্রভু যীশু শক্তিশালী স্বর্গদূতলাক সোদে জ্বলা অগুন নিয়া স্বর্গ থাকি নিকলি আসিবে,

৮ যায় যায় ভগবানক জানে না আর যায় যায় প্রভু যীশুর ভাল খবরের কতা মানি চলে না, উমারলাক উয়ায় শাস্তি দিবে।

৯ প্রভু যেহেলা আসিবে সেহেলা উমারলাক এমন শাস্তি দেওয়া হবে যে, চিরকালের মত নরকত রবে আর প্রভুর শক্তি, মহিমা দেখির পাবে না।

১০ সেই দিন উয়ার নিজের মানষিলারটে থাকি মহিমা প্রকাশ পাবে, আর যায় যায় বিশ্বাস করিচে, উমারলার সগারেটে থাকি গুণগান পাবে। তোমরাও সেই শিষ্যলার মইদ্বোত আছেন, কেনেনা যীশুর সমন্ধে হামার সাক্ষ্য তোমরা বিশ্বাস করিচেন।

১১ এই বাদে হামরা তোমারলার বাদে সউগ সমায় প্রার্থনা করির ধরচি, যাতে হামারলার ভগবান তোমারলাক উয়ার ডেকেয় যোগ্য বুলিয়া মনে করে। আর উয়ার শক্তি দিয়া তোমারলার ভাল কাম করির সউগ ইচ্ছা পূরণ করে। আর বিশ্বাসে তোমরা যে কাম করির ধরচেন, সেইটা যাতে পূরণ হয়।

১২ তাইলে হামারলার ভগবান আর প্রভু যীশু খ্রীষ্টের দয়ার দরুন হামারলার প্রভু যীশুর গুণকিত্তন তোমারলার মইদ্বো দিয়া প্রকাশ পাবে, আর তোমরালাও সন্মান পাবেন।

২ ভাই-বইনিলা, প্রভু যীশু ফিরি আসিবে আর হামারলাক একসোদে মিল করিয়া উয়ার নিজেরটে নিয়া যাবে। এই বিষয়ে হামরালাও তোমারলাক মিনতি করি কিছু কবার চাই।

২ কাণ্ডো কাণ্ডো কবার ধরচে প্রভুর ফিরি আইসার দিন আসচে। উমরা দাবি করির পারে হয়ত আধ্যাত্মিক দর্শন বা খবর পাইচি, হয়ত হামরার একখান চিঠি দেখাবে, তোমরা উমার কতা বিশ্বাস করেন না। তোমরা সহজে অস্থির না হন, ভয়ও না খান।

৩ ইমরা যাতে তোমারলাক কোনো মতে ভুল ঘাটাত নিয়া না যায়। আসল কতা হইলেক, ঐ দিন আসিবার আগত ভগবানের বিরুদ্ধে দারুন গন্ডগোল দেখা দিবে, আর সেই নীতিহীনতার বেটাছাওয়া যার ধবংস হবার কতা আছে উয়ায় নিকলিবে।

৪ ভগবান বুলিয়া যেইলা আছে সেইলার বিরুদ্ধে আরো আরাধনা করির মতো সউগ কিছুর বিরুদ্ধে খাড়া হয় উয়ায় নিজক বড় মনে করিবে, এমন কি দশংগতি মন্দিরত বসিয়া নিজক ভগবান কয়া দাবি করিবে।

৫ তোমরা কি ফম হারে ফেলাইচেন? মুই যেয়ো তোমারলার ওটেকোনা আছিলুং, সেয়ো এইলা কতা তোমারলাক কবার ধরচিলুং।

৬ তোমরা আরো জানেন, সেই নীতিহীনতার বেটাছাওয়া যাতে ঠিক সমায়ের আগত প্রকাশ হবার না পারে সেই বাদে উয়াক বাধা



দিবার ধরচে।

৭ তোমরা এইটাও জানেন, নীতিহীনতার বেটাছাওয়াটা গোপনে কাম এলাও করির ধরচে। কিন্তুক যায় উয়াক বাধা দিয়া খুইচে উয়ায় সারি না যাওয়া পর্যন্ত বাধা দিতেই থাকিবে।

৮ ইয়ার পাছত এই নীতিহীনতার বেটাছাওয়া নিকলিবে। কিন্তুক প্রভু যীশু উয়ার মুখের বাতাস আর আইসার মহিমার তেজ দিয়া উয়াক নাশ করিবে।

৯ সেই নীতিহীনতার বেটাছাওয়া যেলা আসিবে সেলা উয়ার নগত থাকিবে শয়তানের শক্তি। সেই মায়া শক্তিত দেখা যাবে নানা নাকানের মিছাং চিন আর অচানক কাম।

১০ আর ধবংসের ঘাটাত আগেয়া যাওয়া মানষিলাক ঠকেবার সউগ নাকানের বেয়া ছলনা দেখাবে। উমরা ধবংস হবে, কেনেনা পাপ থাকি মুক্তি পাবার বাদে সইত্যক পিরিত করে নাই আর মানি নিবার পায় নাই।

১১ এই বাদে ভগবান উমারলারটে এমন কঠুর ঠকবাজী মন ভাব পেঠাবে যেইটা দিয়া উমারলাক ভুল ঘাটাত নিয়া যাবে আর উমরালা মিছাং যেইটা সেইটাক বিশ্বাস করিবে।

১২ সচাং যেইটা, সেইটাক বিশ্বাস না করিয়া অন্যায় কামত আনন্দ পাইচে বুলিয়া উমারলাক সগাকে বিচারত দোষী সাব্যস্ত করা হবে।

১৩ মোর আদরের ভাই-বইনিলা আর প্রভুর মনের মানষিলা,  
তোমারলার বাদে সউগ সমায় ভগবানক হামারলার ধন্যবাদ  
দেওয়া উচিত। ভগবান আদিকাল থাকি পবিত্র আত্মা দিয়া আর  
সচাং বিশ্বাসের মুক্তির বাদে তোমারলাক বাছাই করি থুইচে।

১৪ তারে বাদে হামরা যে ভাল খবর প্রচার করির ধরটি উয়ার  
মইন্ধো দিয়া মুক্তি পাবার বাদে তোমারলাক ডেকাইচে, যাতে  
তোমরালা প্রভু যীশু খ্রীষ্টের মহিমার ভাগী হন।

১৫ এই বাদে ভাই-বইনিলা প্রভুতে থির থাক, আর চিঠির মইন্ধো  
দিয়া, আরো কতার মইন্ধো দিয়া যে শিক্ষা তোমরালা হামারটে  
থাকি পাইচেন সেইটা ধরি রন।

১৬ হামারলার প্রভু যীশু খ্রীষ্ট নিজেই আর হামারলার স্বর্গের বাপ  
যায় হামাক পিরিত করিচে আর চিরকালের সান্তনা আর আশা  
দেয়,

১৭ উয়ায় তোমারলাক উৎসাহ দেউক আর পতিটা ভাল কামত  
আরো কতাত তোমারলাক সাহায্য করুক।

৩ মোর শেষ কতা, ভাই-বইনিলা, হামারলার বাদে প্রার্থনা করো,  
যেই নাকান প্রভুর বাইক্য তোমারলার মইন্ধোত কাম করিচে, সেই  
নাকান সউগ জাগাতে পচপচে ছড়াছড়ি আর সন্মানিত হউক।

২ প্রার্থনা কর হামরা যাতে বিবেকহীন আর দুষ্ট মানষিলার হাত  
থাকি বাঁচির পাই। সউগ মানষিলা যে যীশুর শিষ্য তা কিন্তুক না

হয়।

৩ কিন্তুক প্রভু বিশ্বাসযোগ্য, উয়ায় তোমারলাক থির খুবে আর শয়তানের হাত থাকি বাঁচাবে।

৪ তোমারলার সমন্ধে হামারলার গভীর বিশ্বাস আছে যে, হামরা তোমারলাক যে আদেশ দিচি সেইলা তোমরালা পালন করির ধরচেন আর করিবেন।

৫ প্রভু তোমারলার অন্তরক ভগবানের পিরিতত আর খ্রীষ্টের ধৈর্যের ঘাটাত চালাউক।

৬ হে মোর ভাই-বইনিলা, হামারলার প্রভু যীশু খ্রীষ্টের নামে হামরা তোমারলাক এই আদেশ দিবার ধরচি, যদি কোন ভাই আলসিয়ামি করে আর হামারলারটে থাকি যেই শিক্ষা পাইচেন সেইটা পালন না করে, তাইলে তোমরালা উয়ার নগত মেলামেশা না করেন।

৭ ক্যেমন করি হামারলার মত হয় চলা দরকার সেইটা তোমরালা নিজেই জানেন। তোমারলার ওটেকোনা য়েলো হামরা আছিলং সেলো তো আলসিয়ামি করি নাই,

৮ আর বিনা পাইসায় কাঙোরো খাবার খাই নাই। হামরা দিন রাতি খাটনি আর কষ্ট করচি যাতে হামরা কাঙোরো বোঝা হয় না পড়ি।

৯ তোমারলারটে থাকি যে সাহায্য নিবার অধিকার নাই সেইটা কিন্তুক না হয়, কিন্তু তোমরা যাতে হামারলার নাকান হয় চলেন,

হামরা কাম করিয়া আদর্শ তোমারলাক দেখেয়া দিচি।

১০ তোমারলার ওটে থাকির সমায় হামরা তোমারলাক আদেশ দিয়া কইচি যে, যদি কাণ্ডো কাম করির না চায় তাইলে উয়ায় যাতে খাবার না খায়।

১১ কিন্তুক হামরা শুনির পাবার ধরচি তোমারলার মইদ্বোত কাণ্ডো কাণ্ডো আলসিয়া হয় পড়িচে আর কাম করা বন্ধ করি দিচে। উমরা অইনের ব্যাপার নিয়া ব্যস্ত থাকির ধরচে।

১২ এই নাকান মানষিলাক হামরালা প্রভু যীশু খ্রীষ্টের নামে আদেশ আর উপদেশ দিবার ধরচি, যাতে উমরা থির হয় কামাই করি নিজের খাবার নিজে জোগার করে।

১৩ হে মোর ভাই-বইনিলা, ভাল কাম করির উৎসাহ হারে না ফেলান।

১৪ কাণ্ডো যদি হামারলার নেখা এই চিঠির উপদেশ মানির না চায়, তাইলে উয়াক চিনিয়া থোন আর উয়ার সোদে না রয়া দূরত রন যাতে উয়ায় নইজ্জা খায়।

১৫ আর উয়াক শত্রু মনে না করিয়া কিন্তুক উয়াক ভাই মনে করিয়া সাবধান করি দেও।

১৬ শান্তিদাতা প্রভু যীশু সউগ সমায় সউগ পরিস্থিতিত তোমারলাক শান্তি দান করুক। প্রভু তোমারলার সগারে নগত থাকুক।

১৭ এই মঙ্গলের কতা মুই পৌল নিজের হাতে নেখিলুং। মোর  
সউগ চিঠির এইটায় প্রমাণ, মুই এই নাকান করি নেখং।

১৮ হামার প্রভু যীশু খ্রীষ্টের দয়া তোমারলার সগারে নগত  
থাকুক॥

## ১ তীমথিয়

১ হামারলার মুক্তিদাতা ভগবান আর হামারলার আশার উৎস যীশু খ্রীষ্টের আদেশ মতন মুই যীশুর এক জন খবরিয়া হইচোং। মুই পৌল এই চিঠিখান নেখির ধরচুং,

২ তীমথিয় তুই মোর সচাং শিষ্য বেটা, মুই তোক এই চিঠি নেখিলুং। হামারলার স্বর্গের বাপ ভগবান আর হামারলার প্রভু যীশু খ্রীষ্ট তোক দয়া, মায়া আর শান্তি দেউক।

৩ ম্যাসিডোনিয়াত যাবার সমায় মুই যেমন তোক অনুরোধ করিচুং তেমন এলাও কবার ধরচুং। তুই ইফিষ গঞ্জত থাক, আর এটেকোনা যায় যায় ভুল শিক্ষা দিবার ধরচে উমরা যাতে সেইলা বন্ধ করে।

৪ উমাক হুকুম দেক, উমরা যাতে পৌরাণিক মন গড়া গল্প আর অকাজুয়া বংশের হাইলচাত মন না দেয়। ঐলা খালি তর্কা-তর্কি নাগে দেয়, কিন্তুক ভগবানের ঘাটা বিশ্বাসে জানা যায়।

৫ মোর এই আদেশের উদ্দেশ্য হইলেক অইন্যের প্রতি পিরিত জাগে তোলা। এই পিরিত খাটি অন্তর, পরিস্কার বিবেক আর সচাং বিশ্বাস থাকি আইসে।

৬ কাণ্ডো কাণ্ডো এইলা শিক্ষা থাকি দূরত সরি যায় বাজে শিক্ষাত মন দিচে।

৭ উমরা বিধির বিধানের মাষ্টার হবার চায়, কিন্তুকি বিষয়ের উপরত জোর দিয়া কবার ধরচে নিজেও বোঝে না।

৮ কিন্তুকি বিধির বিধান ভাল, যদি সেইটা সঠিক করি কামত নাগা যায়।

৯ হামরা জানি এই বিধির বিধান সাধু মানষির বাদে না হয়। উমারে বাদে যায় যায় আইন মানে না, যায় যায় অবাধ্য, ভগবান বিরোধী, পাপী, অশুচি, অধার্মিক, যায় মাও-বাপক খুন করে, নরঘাতক,

১০ ব্যভিচারী, সমকামী, যায় মানষির ব্যবসা করে, যায় মিছাং সাক্ষ্য দেয়। যায় যায় সচাং শিক্ষার বিরুদ্ধে এই নাকান কাম করে, বিধান উমারে বাদে দেওয়া হইচে।

১১ যেই ভাল খবর প্রচারের দায়িত্ব মহিমাময় ভগবান মোক দিচে, সেই মহান ভাল খবর হইলেক সচাং শিক্ষা।

১২ যায় মোক শক্তি দিচে, সেই প্রভু যীশুক মুই ধন্যবাদ দেং। কেনেনা উয়ায় মোক বিশ্বাস করিয়া সেবা করির বাছাই করিচে।

১৩ যদিও আগত মুই যীশু খ্রীষ্টের নামের নিন্দা করির ধরচিলুং, উয়ার শিষ্যলোক অইত্যাচার করিচিলুং, উমার প্রতি মুই বেয়া ব্যবহার করির ধরচিলুং, তাণ্ডা ভগবান মোক দয়া করিয়া ক্ষমা করিলেক। কেনেনা মুই এইলা যেলা করিচুং সেলা যীশুর শিষ্য হং নাই, আর কি করির ধরচুং মুই নিজেই জানং নাই।

১৪ হামার ভগবান হামাক মেলা দয়া করিচে, উয়ায় প্রভু যীশুর সোদে একটে হবার বাদে মোর মনত বিশ্বাস আর পিরিতি ভরপুর করিচে।

১৫ এই কতা সচাং আর পুরাপুরি মানি নিবার যোগ্য, যীশু খ্রীষ্ট পাপী মানষিলাক উদ্ধার করির বাদে এই দুনিয়াত আসিচে। এই পাপীলার মইদ্বোত মুই সউগ চায়া বড়।

১৬ আর এই বাদে ভগবান মোক মায়া করিচে, মুই এক জন বড় পাপী হওয়া সত্বেও মোর মইদ্বো দিয়া যীশু খ্রীষ্ট যাতে উয়ার অশেষ ধৈর্য দেখের পায়। এইলা দেখিয়া যীশুর উপরা বিশ্বাসের ফলে যায় যায় অমৃত জীবন পাবে, উমরা যাতে মোর আদর্শ দেখি শিখির পায়।

১৭ যায় চিরকালের রাজা যার কোন ক্ষয় নাই, যাক দেখা যায় না উয়ায় এক মাত্র ভগবান, উয়ার চিরকাল সন্মান আর মহিমা হউক। আমেন।

১৮ আদরের ছাওয়া তীমথিয়, তোর সমন্ধে যে ভাববাণীলা কওয়া হইচে, ঐলার সাথত মিল থুইয়া মুই এই কতা কবার ধরচুং। ঐ কতালা মনত ফম থুইয়া মরণ-বত্তন নড়াই করি যা,

১৯ একে সাথে বিশ্বাস আর বিবেক বাকবাকা করি রক্ষা করেক। কেনেনা কোন কোন মানষি সৎ বিবেক ছাড়ি দিয়া উমার বিশ্বাস নষ্ট করি ফেলাইচে।



২০ এই মানষিলার মইন্ধে হইলেক হুমিনায় আর আলেখ্যান্দার।  
উমারলাক মুই শয়তানের হাতত ছাড়ি দিচুং, যাতে উমরা শিখির  
পারে ভগবানের নিন্দা করা যায় না।

২ পইলা মুই কবার ধরচুং, সউগ মানষির বাদে ভগবানেরটে  
মিনতি, প্রার্থনা, অনুরোধ কর, আর ধন্যবাদ দেও।

২ এই নাকান করি রাজার বাদেও আর যায় যায় উচা পদত বসি  
আছে, উমারলার বাদে প্রার্থনা করির নাগিবে। যাতে ভগবানের  
প্রতি ভক্তি ভরে হামরা থির হয় শান্তিতে জীবন যাপন করি।

৩ হামার মুক্তিদাতা ভগবানের নজরত এইটা ভাল আর তাতে  
উয়ায় খুশি হয়।

৪ উয়ার ইচ্ছা যাতে সউগ মানষিলা মুক্তি পায়, আর যীশু সমন্ধে  
সচাংটা জানির পায়।

৫ কেনেনা এক মাত্র ভগবান আছে, ভগবান আর মানষিলার  
মইন্ধোত এক মাত্র ঘটক, উয়ায়ও এক জন মানষি যার মইন্ধো  
দিয়া মানষিলা ভগবানেরটে পৌছির পায়, উয়ার নাম যীশু খ্রীষ্ট।

৬ উয়ায় সউগ মানষিলাক পাপের ঘাটা থাকি মুক্তি দিবার বাদে  
নিজের জীবন সাঁপে দিছিলেক। সঠিক সমায়ত এই বিষয়ে প্রকাশ  
করা হইচে।

৭ অযিহুদীলারটে এই সাক্ষ্য দিবার বাদে মোক এক জন প্রচারক আর খবরিয়া হিসাবে নিযুক্ত করা হইচে। বিশ্বাসে আর আদর্শে মুই অযিহুদীলারটে এক জন মাষ্টার। মুই সচাং কবার ধরচুং মিছাং না হয়।

৮ মুই চাং যাতে সউগ জাগাত বেটাছাওয়ালা রাগ আর তর্ক না করিয়া খাটি অন্তর নিয়া হাত তুলিয়া প্রার্থনা করুক।

৯ একে নাকান করি বেটিছাওয়ালাও বুদ্ধিমতী আর নইজ্জাবতী হয়। সঠিক কাপড়-চোপড় পিন্দুক, আর উমরা যাতে নানা নাকানের ঢুলের বেনী বান্দিয়া, সোনা আর মুক্তার গয়না পিন্দিয়া আর দামী কাপড়-চোপড় দিয়া নিজক না সাজায়।

১০ ইয়ার বদলে উমরা যাতে ভাল ভাল কামের মইদ্বো দিয়া নিজক সাজায়। যেই বেটিছাওয়ালা নিজক ভগবান ভক্ত কয় উমারলার বাদে এইটায় হবে সঠিক কাম।

১১ আর বেটিছাওয়ালা নিরব হয়। পুরাপুরি ভাবে বাধ্য থাকিয়া শিক্ষালাভ করুক।

১২ বেটাছাওয়ালার উপরাত কোন উপদেশ দিবার আর দেওয়ানী গিরি করির অধিকার মুই কোনো বেটিছাওয়াক দেং না।

১৩ কেনেনা পইলা শ্রী আদমক সিজ্জন করা হইচে, তার পাছত শ্রীমতি হবাক।

১৪ তাছাড়া আদম শয়তানের ছলনাত ভুলে নাই, কিন্তুক বেটিছাওয়া ভুলিচে আর ভগবানের আদেশ অমান্য করিচে।

১৫ তাণ্ডা উয়ায় ছাওয়া প্রসব করার মইন্ধো দিয়া মুক্তি পাবে; কিন্তুক বেটিছাওয়ালাক সঠিক ভাবে, বিশ্বাসে, পিরিতে আর পবিত্রতাত চলির নাগিবে।

৩ এই কতা সচাং যে, কাণ্ডা যদি খ্রীষ্ট সমিতির দেওয়ানী হবার চায় তাইলে উয়ায় একটা খুব ভাল কাম করির চায়।

২ এই বাদে দেওয়ানী এই নাকান হবার নাগিবে, যাতে উয়ার কাণ্ডা কোন দোষ দিবার না পায়। উয়ার মাত্র এক জন ভার্জা থাকিবে। উয়ায় নিজক দমনে থুবে আর উয়ার বিচারবুদ্ধি ভাল থাকিবে। উয়ায় যাতে ভদ্র হয় আর সাগাই সোদর সেবা করির যাতে ভাল পায়। অইন্যক শিক্ষা দান করির ক্ষমতা যাতে উয়ার থাকে।

৩ উয়ায় যাতে মাতাল আর বদমেজাজী না হয়, বরং উয়ার স্বভাব যাতে নম্র হয়, উয়ায় কেচলিয়া আর টাকার লোভী যাতে না হয়।

৪ উয়ায় যাতে সঠিক করি নিজের বাড়ির সউগ কিছু পরিচালনা করে আর উয়ার বেটা বেটি যাতে বাধ্য আর ভদ্র হয়।

৫ কিন্তু কাণ্ডা যদি নিজের ঘর সংসার দেখাশুনা করির না জানে, তাইলে উয়ায় কেংকরি ভগবানের খ্রীষ্ট সমিতিক দেখাশুনা করিবে?

৬ সমিতির কোন দেওয়ানী যাতে নয়া শিষ্য না হয়, যদি হয় অহংকারে ফুলি উঠিবে আর শয়তানক দেওয়া শাস্তির যোগ্য হইবে।

৭ বায়রার মানষিরটে উয়ার সুনাম থাকা দরকার, যাতে উয়ায় দুর্নামের ভাগী না হয় আর শয়তানের ফান্দত না পড়ে।

৮ একে নাকান সেবকলাও সন্মান পাবার যোগ্য আর এক কতার মানষি হবে। উমরা মাতাল হবে না, লোভীও হবে না।

৯ উমরা শুদ্ধ মনে খ্রীষ্টিয় ধর্ম বিশ্বাসের গোপন সত্য আকড়ে ধরি থাকে।

১০ উমরলাক আগত যাচাই করি দেখির নাগিবে। যদি নির্দোষ বুলি গন্য হয়, তাইলে সেবক হবার পারে।

১১ এই নাকান করি সেবিকালাকো গুণবতী হবার নাগিবে। উমরা যাতে অইন্যের গেলানি করি না বেড়ায়। সউগ বিষয়ে যাতে বিশ্বাস করা যায়।

১২ সেবকলার এক জন করি ভার্জা থাকিবে, উমরা ছাওয়া ছোটক ভাল করি লালন পালন করি সংসার চালাবে।

১৩ কেনেনা যে সেবক ভাল করি সমিতির কাম করে, উয়ায় সুনাম পাবে। খ্রীষ্ট যীশুর উপরাত বিশ্বাসের বাদে উয়ার সাহস বাড়ি যাবে।

১৪ মুই পচ করি তোর ওটে যাইম, এই আশা করি চিঠিখান নেখিলুং।

১৫ যদি মোর কোন কারনে দেড়ি হয়, সেইটা তুই চিঠি পড়িয়া জানির পাবু ভগবানের পরিবারের মানষিলার কেমন আচার-ব্যবহার হওয়া উচিত। এই পরিবার হইলেক জীবন্ত ভগবানের সমিতি, সেই সমিতি মজবুত ভিটা আর খুটির নাকান ভগবানের সহিত্যক ধরি থোয়।

১৬ হামার খ্রীষ্ট ধর্মের মহান সহিত্যক কাণ্ডো অস্বীকার করির পায় না। সেই সহিত্য এই নাকান, খ্রীষ্ট মানষি হয় দেখা দিলেক, আত্মাতে উয়ার ধার্মিক স্বভাব প্রমাণ হইলেক, স্বর্গের দূতলা উয়ার দেখা পাইলেক। উয়াক সউগ জাতিরটে প্রচার করা হইলেক, দুনিয়ার মানষিলা উয়াক বিশ্বাস করিলেক, উয়াক মহিমার সাথত তুলি নেওয়া হইলেক।

৪ পবিত্র আত্মা পরিস্কার করি কয়া দিচে, ভবিষ্যতে মেয়ো মানষি খ্রীষ্টের বিশ্বাস থাকি দূরত সারি যাবে। আরো ছলনা কারি আত্মার আর অপদেবতার শিক্ষাত মন দিবে।

২ যার অন্তর পাষান হয় গেইচে, এই নাকান মিথ্যাবাদী মানষিলার ভন্ডামি শিক্ষার বাদে এই নাকান হবে।

৩ ইমরা বিয়াও করিবার বাদা করে, আর কয় কোন কোন খাবার খাওয়া যাবে না। এইলা খাবারও ভগবান সিদ্ধন করিচে। হামরা

বিশ্বাসীলা যায় যায় ভগবানের সইত্যক জানচি, হামারলা ভগবানক ধন্যবাদ দিয়া খাবার পারি।

৪ ভগবানের সিদ্ধন সউগ জিনিসে ভাল, ধন্যবাদ দিয়া খাইলে হয় আর কোন খাবারক বেয়া কয়া বাদ দেওয়া ঠিক না হয়।

৫ কেনেনা ভগবানের বাইক্য আর প্রার্থনার মইন্ধো দিয়া এইলা শুদ্ধি হয়।

৬ তীমথিয় তুই এইলা কতা ভাই-বইনিলাক ফম করি দেক, তাণ্ডো তুই যে বিশ্বাসে ভাল শিক্ষা মানিয়া জ্ঞানী হচিস সেইটা প্রমাণ পাবে, আর তুই খ্রীষ্ট যীশুর ভাল সেবাকারী হবু।

৭ ভক্তিহীন ফাকুয়া গল্প শুনে ন না, ঐলা তো বুড়া-বুড়ির বানা কতার নাকান।

৮ যোগ আসন করিলে, দেহা সবল থাকে। ইয়ার থাকিয়াও বেশী লাভ হয় ভগবানের প্রতি ভক্তিত মন দিলে, ইহজীবন, পরজীবন দুইটারে লাভ হয়।

৯ মুই যে কতা কবার ধরচুং সেইটা সচাং আর মানি নিবার যোগ্য।

১০ এই বাদে হামরা আপ্রাণ খাটা-খাটনি করির ধরচি, আগ্রহ নিয়া খাটিয়া কাম করির ধরচি। কেনেনা জ্যান্ত ভগবানের উপরাত হামরা আশা করি। উয়ায় সউগ মানষির মুক্তিদাতা, বিশেষ করি শিষ্যলার।

১১ তুই এইলা সউগ বিষয়ে আদেশ করিয়া শিক্ষা দে।

১২ তুই গাবুর এই বাদে কাণ্ডো যাতে তোক তুচ্ছ না করে। কিন্তু তোর কতায়, আচার-ব্যবহার, পিরিতে, বিশ্বাসে, পবিত্রতায়, শিষ্যলার আগত আদর্শ হঃ।

১৩ মুই না আইসা পর্যন্ত তুই পবিত্র শাস্ত্র পড়ে শুনাও, উৎসাহ করা আর শিক্ষা দিবার বাদে নিজক ব্যস্ত রাখেক।

১৪ সমিতির দেওয়ানীলা যেলা তোর উপরাত হাত দিয়া প্রার্থনা করিচিলেক আর ভাববাণী কইচিলেক, সেলা যে বিশেষ আধ্যাত্মিক দান তোক দেওয়া হইচে, সেই দান তুই অবহেলা করিস না।

১৫ এইলা সমন্ধে মনযোগি হঃ, ঐলা কামের বাদে নিজক সঁপে দেক। যাতে সগায় দেখির পায় যে, তুই আগে যাবার ধরচিস।

১৬ তোর নিজের সমন্ধে আর তোর শিক্ষার সমন্ধে সাবধান রইস। এইলা করিতে থাক, কেনেনা তাতে তুই নিজক আর যায় যায় তোর কতা শুনে উমারলাকও মুক্তি দিবার পাবু।

৫ বয়স্ক মানষিলার দোষ দেখেবার যায়া কঠুর মন নিয়া কতা না কইস, উমারলাক বাপের নাকান আর গাবুর চেংড়ালাক তোর ভাইয়ের নাকান মনে করি কতা কইস।

২ বয়স্ক ভার্জালার সোদে মাওয়ের নাকান আর গাবুর চেংড়িলার সোদে বইনির নাকান ব্যবহার করিয়া পবিত্রতা বজায় থুইয়া ভুল দেখেয়া দে।

৩ যে বিধুয়ালার কাণ্ডেয় নাই, উমারলার যতন করিয়া দেখাশুনা করেক।

৪ কিন্তু কোন বিধুয়ার যদি ছাওয়া-ছোট বা নাতি-নাতনি থাকে, তাইলে উমরা আগত নিজের পরিবারের দায়িত্ব পালন করার মইন্দো দিয়া ভগবানের পতি ভক্তি করুক। এই নাকান করিলে বাপ-মার দেনা শোধ করির পাবে, আর ইয়াতে ভগবান সন্তুষ্ট হবে।

৫ যে বিধুয়ার কাণ্ডেয় নাই, উয়ায় ভগবানের উপরা ভরসা করি জীবন যাপন করে। উয়ায় ভগবানেরটে সাহায্য পাওয়ার আশায় দিন রাতি প্রার্থনা করিতে থাকে।

৬ কিন্তুক যেই বিধুয়া বিলাসিতা করি দিন কাটায়, উয়ায় তো বত্তাতে মরার নাকান।

৭ এইলা আদেশ তুই গুরুভাইলাক ফর্ম করে দে, যাতে কাণ্ডে উমার দোষ দিবার না পায়।

৮ কোন মানষি যদি সাগাই-সোদরক, বিশেষ করি পরিবারের মানষিলার ভরন-পোষন না দেয়, তাইলে উয়ায় উয়ার বিশ্বাসক অস্বীকার করে, উয়ায় অবিশ্বাসীর থাকিও অধম।

৯ কাণ্ডেকো সমিতির বিধুয়ার হাইলচাত নাম নেখেবার আগত, দেখির নাগিবে উয়ার বয়স যাতে ষাইট বছরের কম না হয়। আর যার এক জন সোয়ামি আছিলেক।



১০ এইলা ছাড়া যার নানা নাকান সৎ কামের সুনাম শোনা যায়, তার মানে যদি ছাওয়া-ছোট লালন-পালন করে, যদি সাগাই-সোদরের সেবা-যতন করে, আর ভগবানের মানষিলাক ঠেং ধুইয়া দিয়া থাকে, যায় দুঃখ-কষ্টত আছে উমাক সাহায্য করে, আর নানা নাকান সৎ কামত যোগ-দান দিয়া থাকে।

১১ কিন্তুক গাবুর বিধুয়ালার নাম বিধুয়ার হালচাত নেখেন না, কেনেনা যেলা উমারলার দেহার কামনা-বাসনা জাগিবে সেলা খ্রীষ্টের পতি ভক্তি উঠি যাবে আর বিয়াও করির চাবে।

১২ ইয়াতে উমরা উমার পইলা খ্রীষ্টের সতী সেবিকা হবার প্রতিজ্ঞা ভঙ্গ করিয়া নিজের শাস্তি নিজেই ডেকে আনে।

১৩ এইলা ছাড়া বাড়ি বাড়ি ঘুরি বেড়েয়া উমরা কাম-কাজে কুড়িয়া হওয়া শেখে। খালি কুড়িয়া হয় না, উমরা বেয়া কতা কয়া পরের গেলানি করির শিখে, যেইলা কতা কওয়া উচিত না হয়, ঐ নাকানের কতা কওয়া শেখে।

১৪ এই বাদে মোর ইচ্ছা, গাবুর বিধুয়ালার বিয়াও করুক আর ছাওয়া-ছোটর মাও হউক। নিজের সংসারের দেখাশুনা করুক, হামার বিরোধীলাক নিন্দা করির কোন সুযোগ না দেউক।

১৫ কেনেনা কয়েক জন বিধুয়া ধর্মের ঘাটা ছাড়ি দিয়া শয়তানের ঘাটাত যাবার ধরচে।

১৬ যদি কোন শিষ্যের ঘরত বিধুয়ালার থাকে, উমার দেখ-ভাল করিবার দায়িত্বের ভার সতিতির উপরাত না দিয়া নিজেই দেখ-

ভাল করুক। যে বিধুয়ার কাণ্ডো নাই, খালি উয়াক সমিতি থাকি  
দেখ-ভাল করির ভার নিবার পায়।

১৭ সমিতিত যে দেওয়ানী ভাল করি শাসন করে, ভগবানের  
বাইক্যের প্রচার আর শিক্ষা দিবার বাদে খাটনি করে, উমরা  
দুইগুণ সন্মানের যোগ্য।

১৮ ক্যেনেনা সনাতন পবিত্র শাস্ত্রত নেখা আছে, “যে বলদ দিয়া  
ফসল মাড়া-মাড়ে উয়ার মুখত গোমা দেন না।” আর, “কাজুয়া  
মানষি বেতন পাবার যোগ্য।”

১৯ সমিতির কোনো দেওয়ানীর উপরা অভিযোগ সহজে মানি  
নেন না, আগত দুই, তিন জন সাক্ষীর সাক্ষ্য খাড়া করির নাগিবে।

২০ যে দেওয়ানী পাপ করি রয়, সমিতির সউগ মানষিলার  
আগত উয়ার দোষ দেখে দেও। যাতে অইন্য মানষিলা ভয় খায়।

২১ মুই ভগবানের, খ্রীষ্ট যীশুর আর বাছাই করা স্বর্গদূতলার  
আগত তোক এই আদেশ দিবার ধরচুং, কাঙরো সচাং ঘটনা না  
জানিয়া আর কাঙরো মুখ দেখিয়া বিচার করিবু না।

২২ সমিতির কামের বাদে তারাতারি কারো উপরাত হাত থুইয়া  
কোন পদত নিযুক্ত করেন না। অইন্যের পাপের ভাগী হন না।  
নিজক খাটি থোন।

২৩ তীমথিয়, তোর সউগ সমায় পেটের অসুখ হয়, হজমের বাদে  
অল্প খানিক করি আংগুরের শরবত খাইস, খালি জল না খাইস।

২৪ কোন কোন মানষির পাপ সহজে দেখা যায়, আর উমার পাপের ফল আগত পাবে। আর কোন কোন মানষির পাপ পাছত দেখা যায়, উমার বিচার দেড়িত হবে।

২৫ একে নাকান করি কাঙরো সৎ কাম সহজে দেখা যায়, আর এইলা এলা ঝকঝকা করি দেখা না গেইলেও এইলাক সারা জীবন নুকি থোয়াও যায় না।

৬ চাকরলা সগায় নিজের মালিকলাক সন্মান করুক, যাতে কাঙো ভগবানের নাম আর উয়ার শিক্ষার নিন্দা করির না পায়।

২ যে চাকরের মালিকও যীশুর শিষ্য, শিষ্য বুলিয়া উয়াক ছোট মনে না করুক। বরং উয়াক আরো যতন করি সেবা করুক, কেনেনা চাকরের সেবায় যে মালিক উপকার পাবার ধরচে উয়ায় তো ঐ চাকরের আদরের গুরুভাই। এইলা বিষয় শিক্ষা দেও আর অনুরোধ কর।

৩ সেইটা উপদেশ হামারলার যীশু খ্রীষ্টের খাটি শিক্ষা, আর সেই শিক্ষা মানষির জীবনত ভক্তি আনে। কাঙো যদি অইন্য নাকানের শিক্ষা দেয়,

৪ ঐ মানষির শিক্ষা হইলেক ভুল, উয়ায় কিছুই বোঝে না, ঝগড়া আর তর্কাতর্কি করা উয়ার একটা রোগ হয় গেইচে। এই নিচমনা মানষিলার সউগ সমায় গন্ডগোল দেখা যায়। যেমন হিংসা, ঝগড়া, গেলানি আর কু-নজরে দেখা,

৫ এই মানষিলার মনত ভগবানের ভক্তি নাই। ইমরা খালি জাগতিক লাভের আশায় ভগবানের ভক্তির ভাব দেখায়।

৬ কিন্তুক মানষি ভগবানক সচাং ভক্তি ভরে সন্তুষ্ট মনে সেবা করিলে মহাধন লাভের উপায় পায়।

৭ কেনেনা হামরা এই দুনিয়াত কোন কিছুই ধরি আসি নাই, আর এটে থাকি কোন কিছুই নিয়া যাবার পামু না।

৮ কাপড়-চোপড় আর খাবার-দাবার পাইলে তাতে হামরা সন্তুষ্ট থাকিমু।

৯ কিন্তু যায় যায় ধনী হবার বাসনা করে, উমরা শয়তানের পরীক্ষাত আর ফান্দোত পড়িবে। উমার নানা নাকানের মূখামির কাম আর মনত ক্ষতি করির যে বাসনা জাগে, এইলা উমারলাক ধ্বংসের আর সর্বনাশের ঘাটাত ঠেলি দেয়।

১০ কেনেনা সউগ মন্দের গোড়া হইলেক ধন-দৌলতের মায়া। আর ধন-দৌলতের নালসাত পরিয়া কত মানষি সনাতন খ্রীষ্টিয় ধর্মের বিশ্বাস থাকি সারি গেইচে। এই নাকান করি নিজেই নিজের দুঃখ ডেকে আনিচে।

১১ কিন্তু তুই তো ভগবানের মানষি, এইলা থাকি দূরত সারি থাকেক। সৎ জীবন, ভক্তি, বিশ্বাস, পিরিত, ধৈর্য, নরম স্বভাব, এইলা গুণের অধিকারী হঃ।

১২ খ্রীষ্টের উপর বিশ্বাস রক্ষা করির বাদে মরণপন যুদ্ধ চালে যা। যে অমৃত জীবনের বাদে তোক ডেকা হইচে সেই অমৃত জীবনের

কতা তুই মনত গাঁথি থুইয়া জীবন যাপন করেক, কেনেনা তুই  
ম্যেলা মানষির আগত তোর বিশ্বাসের কিরা কাটিচিস।

১৩ খ্রীষ্ট যীশু যায় শাসনকর্তা পীলাতের সামনাত সচাং কতার  
বিষয় সাক্ষ্য দিছিলেক, উয়ার আগত, আর সগারে জীবন দাতা  
ভগবানের আগত, তোক মুই কবার ধরচুং,

১৪ প্রভু যীশু ফিরি না আইসা পর্যন্ত তুই নিজে নিষ্কলঙ্ক থাকিয়া  
আর মনত আনন্দ নিয়া এই আদেশ পালন করি যা।

১৫ পরম ধন্য ভগবান, যায় এক মাত্র শাসনকর্তা, রাজালার  
মহারাজা, প্রভুলার প্রভু, উয়ায় ঠিক সমায় যীশু খ্রীষ্টক প্রকাশ  
করিবে।

১৬ খালি উয়ার হাতত অমৃত জীবনের অধিকার আছে। উয়ায়  
এমন ভইভইয়া আলোত বসবাস করে, যেটেকোনা মানষি যাবার  
পায় না। কোন মানষি কোন দিন উয়াক দেখে নাই, দেখিরো পায়  
না। সন্মান আর ক্ষমতা চিরকাল উয়ারে। আমেন।

১৭ উমরালাক আদেশ দেও যায় যায় এই যুগের ধনবান, উমরা  
যাতে অহংকারী না হয় আর ক্ষণিকের ধনের উপর নির্ভর না  
করিয়া ভগবানের উপরা যাতে নির্ভর করে। ভগবান তো  
হামারলাক সুখ ভোগের বাদে সউগ কিছুই খোলা হাতে যোগান  
দেয়।

১৮ ধনীলাক আদেশ দেও, উমরা যাতে অইন্যের উপকার করে,  
সং কামত ব্যস্ত থাকে, দাতা হয়, ধন-দৌলত ভাগ করিয়া

অইন্যক দান করে।

১৯ ইয়াতে উমরা আইসা কালের বাদে ধন জমা করিয়া নিজের বাদে শক্ত ভিটা বানাবে। যাতে সত্যিকারের জীবন শক্ত করি ধরি রবার পায়।

২০ তীমথিয়, তোর উপরাত যে দায়িত্ব দেওয়া হইচে, ভাল করি সামলাইস। মিছা জ্ঞানের ভক্তিহীন বাজে কতা আর যুক্তিহীন শিক্ষা থাকি দূরত থাকিস।

২১ কোন কোন মানষি এই নাকান ভুল জ্ঞানের দাবি করিয়া খ্রীষ্টীয় ধর্ম বিশ্বাস থাকি দূরত সারি গেইচে। ভগবান তোমারলাক দয়া করুক॥

## ২ তীমথিয়

১ মুই পৌল! ভগবানের ইচ্ছায় মুই খ্রীষ্ট যীশুর এক জন খবরিয়া, ভগবান মোক বাছাই করি পেঠাইচে অইন্য মানষিলাক অমৃত জীবনের বাইক্য শোনের বাদে। মোর আদরের ছাওয়া তীমথিয়েরটে এই চিঠিখান নেখির ধরচুং।

২ স্বর্গের বাপ ভগবান আর হামার প্রভু যীশু খ্রীষ্ট তোক দয়া, মায়া আর শান্তি দেউক।

৩ হামার বাপ-ঠাকুরদা যে নাকান করি ভগবানের সেবা করি আসচে, মুইও তেমন শুদ্ধ মন নিয়া ভগবানের সেবা করং; আর তোমার বাদে দিন রাতি প্রার্থনাত ফম করিয়া মুই সউগ সমায় ভগবানক ধন্যবাদ দেং।

৪ ও তীমথিয়, তোর চখুর জল ফেলা ফম করিয়া দিন রাতি তোক দেখির মোর খুব ইচ্ছা। তোক দেখিলে মোর মন আনন্দে ভরি উঠিবে।

৫ তোর অন্তরত আসল বিশ্বাস আছে সেই কতা মুই ফম করির ধরচুং। এই নাকান বিশ্বাস তোর দিদিমা শ্রীমতি লোয়ীর আর তোর মাও শ্রীমতি উনীকীর অন্তরত আছিলেক। মুই জানং! একে নাকান বিশ্বাস তোর অন্তরতও আছে।

৬ এই বাদে মুই তোক ফম করে দিবার ধরচুং, মোর হাত তোর মাথাত খুইয়া আশুর্বাদে মইন্ধো দিয়া ভগবান তোক আত্মিক বরদান দিচে, সেইটা জাগে তোলেক।

৭ কেনেনা ভগবান হামাক কাপুরুষের আত্মা দেয় নাই, কিন্তু শক্তির, পিরিতির আর সুবুদ্ধির আত্মা দিচে।

৮ মুই প্রভু যীশুর বাদে জেলত বন্দী, মোক নিয়া শরম না খাইস। আর হামার প্রভু যীশুর কতা মানষিক কবারও শরম না খাইস। কিন্তু ভগবানের শক্তি দিয়া ভাল খবরের বাদে মোর সোদে কষ্ট ভোগ করির রাজি হও।

৯ ভগবান হামারলাক পাপ থাকি মুক্তি দিচে আর পবিত্র জীবন যাপনের বাদে ডেকাইচে। হামার কামের বাদে এইটা হয় নাই, এইটা হইলেক, উয়ার উদ্দেশ্য পূরণের আর দয়ার বাদে। দুনিয়া সিজনের আগতে, বাছাই করা রাজা যীশুর মইন্ধো দিয়া ভগবানের দয়া হামাক দান করিচে।

১০ আর এলা হামার মুক্তিদাতা প্রভু যীশু এই দুনিয়াত আইসার মইন্ধো দিয়া সেই দয়া প্রকাশ পাইলেক। উয়ায় মরণক জয় করিচে, আর ভাল খবরের মইন্ধো দিয়া অমৃত জীবনের ঘাটা দেখাইচে।

১১ আর এই ভাল খবর প্রচার করিবার বাদে মোক খবরিয়া আর মাষ্টার হিসাবে নিযুক্ত করা হইচে।



১২ এই বাদে মুই এইলা কষ্ট ভোগ করিবার ধরচুং। তাণ্ডো মুই শরম খাং নাই। কেনেনা মুই যাক বিশ্বাস করিচুং, মুই উয়াক চেনং আর উয়ার উপরাত নির্ভর করিচুং। আর মুই এইটাও জানং যে, বিশ্বাস করিয়া মোক যেইলা দায়িত্ব দেওয়া হইচে, যীশু ফিরি না আইসা পর্যন্ত সেইলা রক্ষনাবেক্ষন করিবার ক্ষমতা উয়ার আছে।

১৩ তুই মোরটে থাকি যেইলা শুনিচিস, সেই সচাং শিক্ষার আদর্শ নিয়া যীশু খ্রীষ্টের দেওয়া পিরিত আর বিশ্বাসে চলেক।

১৪ তোক যে ভাল খবরের দায়িত্ব দেওয়া হইচে সেইটা পবিত্র আত্মার শক্তি দিয়া রক্ষা করেক। এই পবিত্র আত্মা তোর অন্তরত আছে।

১৫ তুই জানিস, এশিয়া প্রদেশের সগায় মোক ছাড়ি চলি গেইচে, উমারলার মইন্ধে শ্রী ফুগিল্ল আর শ্রী হমগিনিও আছে।

১৬ কিন্তুক শ্রী অনীষিফের পরিবারক ভগবান দয়া করুক, কেনেনা অনীষিফ মেলা বার মোর সোদে দেখা করিয়া মোক উৎসাহ দিচে। মুই জেলত বন্দী আছং, তাণ্ডো উয়ায় শরম খায় নাই।

১৭ যেলা উয়ায় রোমত হাজির হইলেক, সেলা ভাল করিয়া তন্ন তন্ন করি খুজিয়া মোর সোদে দেখা করিচিলেক।

১৮ আর ইফিষ গঞ্জত উয়ায় কেমন করি সাহায্য করিচে, তা তোর ভালেই জানা আছে। ভগবান উয়াক এই বর দেউক, বাছাই

করা রাজা যীশু ফিরি আইসার দিন যাতে উয়ায় দয়া পায়।

২ তীমথিয় তুই মোর ছাওয়ার নাকান, বাছাই করা রাজা যীশুর দয়াত তুই বলবান হয়। ওঠেক।

২ মেলো সাক্ষীর আগত মোর মুখ দিয়া যে শিক্ষার কতা তুই শুনিচিস, সেইলা শিক্ষা এমন বিশ্বস্ত মানষিলাক শেখাও, যায় অইন্য মানষিলাক শিক্ষা দিবার পারে।

৩ তুই বাছাই করা রাজা যীশুর উপযুক্ত সেনার মত হামার নগত কষ্ট স্বীকার করেক।

৪ ফম থোন, যুদ্ধ করির যায়া কাণ্ডো নিজক সংসারত জড়ায় না, যেই সেনাপতি উয়াক সেনা হিসাবে ঢুকাইচে, উয়ায় যাতে উয়াক সম্ভষ্ট করির পায়।

৫ একে নাকান কোন মানষি যদি খেলাত অংশ নিয়া নিয়ম মানি না খেলায়, তাইলে উয়ায় জয়ের মালা পায় না।

৬ যে চাষা খাটনি করে, উয়ারে পইলা ফসলের ভাগ পাওয়া উচিত।

৭ মুই যেইলা কলুং, সেইলা তুই ভাবি দেখেক, কেনেনা এইলা বিষয় বুঝিবার বাদে ভগবানে তোক বুদ্ধি দিবে।

৮ যীশু খ্রীষ্টক ফম কর। মোর ভাল খবরের প্রচার হইলেক, উয়ায় রাজা দায়ূদের বংশত জন্ম নিচে আর মরালার মইন্দো হাতে

ফির বত্তি উঠিচে।

৯ আর এই ভাল খবরের বাদেই মুই কষ্ট ভোগ করির ধরচুং, এমন কি, এক জন দোষী মানষির নাকান মোক শিকল বন্দীও করি থোয়া হইচে। কিন্তুক ভগবানের বাইক্যক তো শিকল দিয়া বান্দি থোয়া হয় নাই।

১০ এই বাদে ভগবান যাক যাক বাছাই করি থুইচে, উমার বাদে মুই সউগ কিছু সহ্য করিচুং। যাতে উমরাও বাছাই করা রাজা যীশুর মইন্ধো দিয়া মুক্তি পায় আর চিরকালের মহিমা পায়।

১১ এই কতা সচাং যে, হামরা যদি যীশুর সোদে মরি যাই, তাইলে উয়ার সোদে বত্তিও উঠিমু।

১২ হামরা যদি ধৈর্য ধরি সহ্য করি, তাইলে উয়ার সোদে রাজত্ব করিমু। হামরা উয়াক অস্বীকার করিলে, উয়ায়ও হামাক অস্বীকার করিবে।

১৩ হামরা যদি বিশ্বস্ত না হই তাণ্ডো উয়ায় বিশ্বস্ত, উয়ায় নিজক অস্বীকার করির পায় না।

১৪ এইলা কতা মানষিলাক ফম করি দেও। ভগবানের আগত উমারলাক সাবধান করি দেও যাতে বাজে কতা নিয়া তর্কাতর্কি না করে। ইয়াতে কোন লাভ হয় না, বরং যায় শোনে উমারে সর্বনাশ হয়।

১৫ নিজের কামের সমন্ধে শরম না খান, তুই নিজক এমন এক জন কর্মীষ্ট মানষি হিসাবে দেখাও, যাতে ঠিক মত ভগবানের

বাইক্য শিক্ষা দিবার পাইস আর ভগবান যাতে সম্ভষ্ট হয়।

১৬ ভক্তিহীন জাগতিক কতাবার্তা কওয়া থাকি যুদা হয়৷ রঃ, ঐ নাকানের কতাবার্তা মানষিলাক আস্তে আস্তে ভগবানেরটে থাকি দূরত সারে নিয়া যায়।

১৭ যায় এই নাকানের কতা-বার্তা কয়, উমার শিক্ষা বসন্ত রোগের নাকান ছড়িয়া যাবে।

১৮ শ্রী হুমিনায় আর শ্রী ফিলীত এই নাকানের মানষি আছিলেক, উমরা আসল শিক্ষা থাকি দূরত সারি গেইচে। উমরা কয় যে, শিষ্যলোর মরণ থাকি ফির বত্তি উঠা আগতে হয় গেইচে। ইমরা কাণ্ডো কাণ্ডো বিশ্বাসক নষ্ট করি দিচে।

১৯ তাণ্ডো ভগবানের বানা শক্ত ভিটি খাড়া হয় আছে, আর উয়ার উপরাত সীলমোহরের নাকান করি এই কতালা নেখা আছে, “ভগবান জানে, কায় কায় উয়ার” আর, “যে কাণ্ডো যীশুক প্রভু বুলি ড্যেকায় উয়ায় সউগ বেয়া থাকি দূরত থাউক।”

২০ ধনীর বাড়িত খালি কি সোনা, রূপার ভাড়া-খোড়া থাকে? কিন্তু খুটার আর মাটিরও থাকে। এইলার মইদে কতলা ভাড়া বিশেষ কামত আর কতলাক বেয়া কামত ব্যবহার করা হয়।

২১ যদি কাণ্ডো নিজক এই মন্দ বিষয় থাকি শুদ্ধ থোয়, তাইলে উয়ায় হবে খাটি সোনার ভাড়ার নাকান। এই বাদে উয়ায় আদর পাবে, কেনেনা উয়ায় এক জন পবিত্র মানষি। উয়ায় প্রভুর

কামের বাদে উপযুক্ত। সউগ নাকান ভাল কাম করিবার বাদে সাজি থাকিবে।

২২ গাবুর বয়সের বেয়া কামনা-বাসনা থাকি পালান, আর যায় যায় খাটি অন্তরে ভগবানক ডেকায়, উমার সোদে সৎ জীবন, বিশ্বাস, পিরিত আর শান্তির বাদে চেষ্টা কর।

২৩ বেয়া, মূর্খের নাকান তর্কাতর্কিত যোগ দেন না, কেনেনা তুই তো জানিস, এইলা শেষে অন্দি কেচাল-ঝগড়া নাগে দেয়।

২৪ যায় ভগবানের সেবক, তার ঝগড়া করা উচিত না হয়, বরং উয়াক সগারে পতি দয়ালু হওয়া খাবে। উয়ার অইন্য জনক শিক্ষা দিবার ক্ষমতা আর সহ্যগুণ থাকির নাগিবে।

২৫ এই সেবকের বিরুদ্ধে যায় খাড়া হয়, উয়াক নত-নম্র হয়। শিক্ষা দিবার নাগিবে। সেই শিক্ষা যাতে উয়ায় এই আশায় দেয় যে, ভগবান উমাক পাপ থাকি মন ফিরিবার সুযোগ দিবে যাতে ভগবানের সচাং জ্ঞান উমরালা ভাল করি জানির পারে।

২৬ ইয়ার ফলে উমরা শয়তানের ফান থাকি পালে আসিবে কেনেনা শয়তান উয়ার ইচ্ছা পালন করির বাদে উমারলাক ধরছিলেক।

৩ তীমথিয়, তুই এই কতা ফম থো, শেষে কালত ভয়ঙ্কর সমায় আসির ধরচে।

২ নিজক বেশী ভাল পাবে, টাকা-পাইসা ভাল পাবে, নিজক বড় মনে করি অহংকার করা, অভিমানী, ধর্ম নিন্দুক, মাও বাপের অবাধ্য, নিমক হারাম, ভক্তিহীন,

৩ উমার মইদ্বোত প্রেম-পিরিতি থাকিবে না, আর উমরানা ঝগড়া করি আপোস করির চাবে না। উমরা অইন্যের নিন্দা করবে, ইন্দ্রিয় দমন করিবে না, নিষ্ঠুর হবে, আর যেইলা ভাল সেইলাকে ঘিন করিবে।

৪ উমরা বিশ্বাস ঘাতক, বিবেকহীন আর মনের অহংকারে ফুলি উঠিবে। উমরা ভগবানক ভাল না বাসিয়া জাগতিক সুখে মত্ত হবে।

৫ উমরা মাকালের ফলের নাকান হবে, বায়রাত দেখিলে মনে হবে কত যে ভগবানক ভক্তি করে, কিন্তু আসলে উমরা ভগবানের ভক্তির শক্তিক অস্বীকার করে। এই নাকান মানষিলারটে থাকি দূরত সারি রইস।

৬ এই মানষিলার মইদ্বোত কাণ্ডো কাণ্ডো ছলনা করি ঘরত সোন্দেয়া সাদা-সিদা বেটিছাওয়ালাক বেয়া ঘাটাত নিয়া যায়। উমরা নানা নাকান কামনা-বাসনাত জীবন যাপন করে, এই বেটিছাওয়ালার ভিতরাত পাপ দানা বান্দে।

৭ উমরা সউগ সমায় শিক্ষার কতা শোনে, কিন্তু কোন দিনও ভগবানের সচাং শিক্ষাটাক গভীরভাবে বুঝির পায় না।

৮ যেই নাকান যান্নি আর যামব্রি মোশির বিরুদ্ধে খাড়া হইচে, ঠিক একে নাকান করি এই মানষিলাও সচাং শিক্ষার বিরুদ্ধে খাড়া হবে। ইমারলার মন জঘন্য। খ্রীষ্ট ধর্মের বিশ্বাসের কোন প্রমাণ ইমারলার মইদ্বোত পাওয়া যায় নাই।

৯ কিন্তু উমরা কাজ-কামাইয়ে আগেয়া যাবার পাবে না। সগায় উমার মুখামি দেখিয়া ঝকঝকা করিয়া জানির পাবে। একে নাকান অবস্থা যান্নি আর যামব্রিরও আছিলেক।

১০ কিন্তু তুই তো মোর সমন্ধে এইলা জানিস, শিক্ষা, চালচলন, উদ্দেশ্য, বিশ্বাস, সহ্যগুণ, পিরিত আর ধৈর্য ভাল করি দেখির ধরচিস।

১১ এইলা ছাড়াও তুই তো জানিস, আন্তিয়খিয়া গঞ্জত, ইকনিয়া গঞ্জত আর লুস্ত্রা গঞ্জত মোর জীবনত কি কি তান্না ঘটিচে, আর কত না কষ্ট সহ্য করিচুং। কিন্তু ভগবান সেইলা থাকি মোক রক্ষা করিচে।

১২ যত মানষি যীশু খ্রীষ্টক ধারন করিচে, ভগবানের প্রতি ভক্তি ভরে জীবন কাটায়, উমার উপরাত তাড়না আসিবেই।

১৩ কিন্তু দুষ্ট মানষিলা আর ঠকবাজলা দিনে দিনে বেয়া ঘাটাত বেশি করি যাবে। উমরা অইন্যক ঠকাবে, নিজেও ঠকিবে।

১৪ কিন্তুক তুই যেইলা শিখছিস, সেইলা নিশ্চিন্তে বিশ্বাস করিয়া থির থাকেক। কেনেনা তুই জানিস সেইলা কারটে শিখছিস।

১৫ ছাওয়া কাল থাকি তীমথিয় তুই সনাতন শাস্ত্রর শিক্ষা পাইচিস। এই পবিত্র শাস্ত্রয় তোক বাছাই করা রাজা যীশুর উপরাত বিশ্বাসের মইন্ধো দিয়া পাপের ঘাটা থাকি মুক্তি পাবার জ্ঞান দিবার পায়।

১৬ পবিত্র শাস্ত্রের প্রতিটা কতা ভগবানেরটে থাকি আসচে, এইলা শিক্ষা, চেতনা দান, সংশোধন, সৎ জীবন গড়ি উঠিবার বাদে দরকারি।

১৭ যাতে ভগবানের মানষি হিসাবে পাকাপোক্ত হয় যে কোন ভাল কামের বাদে সাজিয়া থাকির পায়।

৪ মরা আর বত্তা মানষিলার বিচার যীশু করিবে। আর উয়ায় শাসন করিবার বাদে আরো একবার ফিরি আসিবে, এই বাদে পরম প্রভু আর বাছাই করা রাজা যীশুর আগত মুই তোক খুইয়া, এই আদেশ দিবার ধরচুং।

২ তুই সমায়ে আর অসমায়ে ভগবানের বাইক্য প্রচার করেক, সউগ সমায় প্রচারের বাদে সাজি থাকেন। আর খুব ধৈর্যের নগত শিক্ষা দিয়া মানষিলার দোষ দেখেয়া দেক। সৎ কামের বাদে উৎসাহ দেক।

৩ এমন সমায় আসির ধরচে, সেই সমায় মানষি ভাল শিক্ষা সহ্য করির পাবে না। কিন্তু উমরা কান চুলকানি কতা শুনিয়া নিজ নিজ ইচ্ছা মতন গুরু ভজিবে।



৪ আর উমরা ভগবানের বাইক্য শুনির না চায়া গল্পের ওদি মন দিবে।

৫ কিন্তু তোমরা সউগ সমায় নিজক দমন কর, ধৈর্য ধরি সউগ কষ্ট সহ্য কর, আর যীশুর ভাল খবর প্রচার করিতে থাক। ভগবান যে কামের দায়িত্ব দিচে, সেইটা ভাল করি পালন কর।

৬ এলা মোর জীবন নৈবদ্যের নাকান করি ভগবানেরটে গতে দেওয়া হইচে, আর মোর মরণের সমায় বগলত আসিচে।

৭ বাছাই করা রাজাটার বাদে মুই জিউ ছাড়ি দিয়া নড়াই করিচুং, মোর বাদে ঠিক করি থোয়া ঘাটার শেষ সীমনা পর্যন্ত দৌড়াইচুং। আর জীবনত যীশুর প্রতি বিশ্বাস ধরি রাখিচুং।

৮ মোর সৎ জীবনের বাদে জয়ের মটুক তুলি থোয়া আছে, ন্যায়বান পরম প্রভু বিচারের দিনত মোক ঐ মটুক দিবে। খালি মোকে দিবে এই নাকান না হয়, যায় যায় উয়ার ফিরি আইসার বাদে আকুল হয় বাচে আছে, উমারলাক সগাকে দিবে।

৯ তুই চেষ্টা করি এলায় পচ-পচে মোর এইটে চলি আইসেক।

১০ কেনেনা শ্রী দীমা বর্তমান কালটাক পিরিত করিয়া, এলা মোক ছাড়ি খিষলনীকীত চলি গেইচে। শ্রী ক্রীস্কেন্ত গালাতীয়াত আর শ্রী তীত দালমাতীয়াত গেইচে।

১১ খালি লুক মোর নগত আছে। তুই যেলা আসিবু সেলা মার্কক ধরি আসিস, উয়ার মোর প্রচারের কামত সাহায্য করা খুব দরকার।

১২ শ্রী তুখিক মুই ইফিষ গঞ্জত পেঠাচুং।

১৩ ত্রোয়া বন্দরত শ্রী কার্পোসেরটে যেই শালের গিলাপখান থুইয়া আসচুং, তুই আইসার সমায় গিলাপখান আর বইলা আনিস, আর ফম করি চামড়ার উপরাত নেখা বইলা ধরি আসিস, ঐলা মোর দরকার।

১৪ যে আলেক্রান্দার কাসারী আছিলেক, উয়ায় মোর খুব ক্ষতি করিচে। যার যেমন কর্ম, তায় তেমন ফল পাবে, আর প্রভু উয়াকও ঐ নাকান ফল দিবে।

১৫ তুইও উয়ার বিষয় সাবধান থাকিস। কেনেনা উয়ায় হামার কতার বিরোধীতা করির ধরচে।

১৬ পইলা বার যেলা মোক বিচারকের আগত খাড়া করিলেক, সেলা সগায় মোক ছাড়িয়া চলি গেইচে, কাণ্ডো মোর বগলত সাহায্য করির আগে আইসে নাই। মুই প্রার্থনা করং, ভগবান যাতে উমার দোষ না ধরে।

১৭ ভগবান মোর নগত আছিলেক, আর উয়ার শক্তির গুণে মুই প্রচার শেষ করির পালুং। এই বাদে অযিহুদী মানষিলা সগায় মোর প্রচার শুনির পাইচে। এই নাকান করি মুই সিংহের মুখত পড়িয়াও বভিলুং।

১৮ যদি কাণ্ডো মোর ক্ষতি করির চায়, ভগবান মোক রক্ষা করিবে। উয়ার স্বর্গের শাসনত মোক নিরাপদে নিয়া যাবে। চিরদিন উয়ার মহিমা হউক। আমেন!

১৯ শ্রীমতি প্রিঞ্চিল্লাক, শ্রী আকিলাক আর অনীষিফের পরিবারক  
মোর মঙ্গল কামনা জানান।

২০ শ্রী ইরাস্ত করিন্ত গঞ্জত রয়া গেইচে, আর শ্রী ত্রফিমের অসুখ  
হওয়াতে মুই উয়াক মিলাতোত থুইয়া আসচুং।

২১ তুই জারের দিন আইসার আগতে আইসার চেষ্টা করেক। শ্রী  
উবুল, শ্রী পুদেস্ত, শ্রী লীন, শ্রীমতি ক্লৌদিয়া আর এটেকার সউগ  
ভাই-বইনিলা তোমার মঙ্গল কামনা করির ধরচে।

২২ প্রভুর আত্মা তোমারলার অন্তরত বাস করুক, আর উয়ার  
আশুবাদ চিরদিন তোমার নগত থাকুক॥

# তীত

১ মুই পৌল, আদরের তীত তোরটে নেখা মোর এই চিঠি, যীশু খ্রীষ্টের উপরাত বিশ্বাস করিয়া তুই মোর বেটা হইচিস। স্বর্গের বাপ ভগবান আর হামার মুক্তিদাতা যীশু খ্রীষ্টের দয়া আর শান্তি তোর উপরা আসুক। মুই এক জন ভগবানের চাকর যীশু খ্রীষ্টের খবরিয়া। মোর উদ্দেশ্য হইলেক ভগবান যেইলা মানষিক বাছাই করিচে, সেইলা মানষিক যাতে খ্রীষ্ট বিশ্বাসের ঘাটাত আগে যায়। ভগবানের পতি সচাং জ্ঞান-ভক্তিতে অমৃত জীবনের আশার আলো দিয়া সেই বিশ্বাস লাভ হয়। দুনিয়া সিদ্ধজনের আগত ভগবান এই কিরা কাটিচে, ভগবান তো মিছাং কতা কয় না। হামারলার মুক্তিদাতা ভগবানের আদেশ মত মুই যা প্রচার করং উয়ার মইন্দো দিয়া ভগবান উয়ার বাইক্য ঠিক সমায়ে প্রকাশ করিচে।

৫ মুই তোক ক্রীত দ্বীপত খুইয়া আসচুং, যেইলা কাম এলাও হয় নাই, সেইলা শেষে করির বাদে। মোর আদেশ মতন প্রতিটা গঞ্জের সমিতির দেওয়ানীলাক নিযুক্ত করিস।

৬ সমিতির দেওয়ানী এই নাকান হওয়া উচিত, যাতে কাণ্ডোয় উয়াক দোষ দিবার না পায়। উয়ার এক জন মাত্র বউ থাকিবে আর অধ্যক্ষটা বিশ্বস্ত হবে, উয়ার ছাওয়া ছোটলা ভগবানক ভয় খাবে আর নিজের খুশি মত যাতে না চলে, আর বদমাইস না হয়।

৭ অধ্যক্ষলা বর-বরা, বদ-মেজাজী, মাতাল, অহংকারী হবে না, মানষিকও ঠকেয়া ধনী হবার চেষ্টা করিবে না, এমন হবার নাগিবে কাণ্ডোয় যাতে নিন্দা করির না পায়। কারন ইমরা হইলেক ভগবানের পরিচালক।

৮ উয়াক সাগাই সোদোরক সেবা করির নাগিবে, ভাল জিনিসলাক ভাল পাবার নাগিবে, জ্ঞানী, ন্যায়বান, আর ভগবানের বাধ্য থাকিবে, নিজক দমন করিবে।

৯ যেই বিশ্বাসের শিক্ষা উয়াক দেওয়া হবার ধরচে, সেই শিক্ষাত শক্তিবান হয়। থির থাকিবে। যাতে করি মানষিলাক শিক্ষা দিবার পারে, যায় যায় ভুল শিক্ষা দেয় উমার ভুল ধরে দিয়া শুধরে দিবার পারে।

১০ কেনেনা মেয়ো মানষি আছে অবাধ্য স্বভাবের, উমরা নানা নাকান বেয়া কতা কয়া বেড়ায়, মানষির মইন্ধোত ভুল বুঝাবুঝি সিদ্ধজন করে। বিশেষ করি মুই উমারলার কতা কবার ধরচুং, যায় যায় কয় অযিহুদী খ্রীষ্টান মানষিলাক দেহাত চিন দেওয়া দরকার।

১১ এই মানষিলাক মুখ বন্ধ করি দেওয়া দরকার। উমরা কুপথে টাকা কামের আশায় ভুল শিক্ষা দেয়, যেইটা দেওয়া ঠিক না হয়, আর এই নাকান করি কতলা পরিবারক নষ্ট করি ফেলাইচে।

১২ ক্রীত বাসীলার উমারে এক জন সাধু কইচে, “ক্রীত দ্বীপের মানষিলা সউগ সমায় মিছাং কতা কয়, উমরা হইলেক বনুয়া পশুর নাকান আলসিয়া আর পেটুক।”

১৩ এই কতটা সচাং। এই বাদে তুই ঐ মানষিলাক কড়া হয় কঃ তোমরা ভুল করির ধরচেন। তুই ভুল দেখেয়া দে যাতে বিশ্বাসে থির হয় ঐষ্টক ধরি রয়,

১৪ আর যিহুদীলার বানা গল্প শুনিয়া, যায় ভগবানের ঘাটা হাতে সারি গেইচে যাতে উমার কতাত কান না দেয়।

১৫ যার অন্তর খাটি উমার বাদে সউগ কিছুই পবিত্র, যার অন্তর খাটি না হয়, অবিশ্বাসী উমার বাদে সউগ কিছুই ছুয়া, কেনেনা উমার অন্তরের বিবেক বুদ্ধিও ছুয়া।

১৬ উমরা মুখতে খালি ভগবানক ভাল পায়, কিন্তুক কামে কাজে দেখায়, উমরা ভগবানক মানে না, উমরা অবাধ্য, ঘিনের নাকান যোগ্য, আর কোন ভাল কামের উপযুক্ত না হয়।

২ তুই এই নাকান করি শিক্ষা দিবু, যাতে উমারলার চাল-চলনের নগত সচাং শিক্ষার মিল রয়।

২ বুড়ালাক কন যাতে সউগ বিষয়ে উমরা নিজে দমনে রবার পায়। উমরা যাতে সন্মান পাবার উপযুক্ত হয়। ভাল বিচারবুদ্ধি, সচাং বিশ্বাস, অইন্যের পতি পিরিত আর ধৈর্যগুণ থাকে।

৩ একে নাকান করি বুড়িলাকো শিক্ষা দেউক, উমার চাল-চলনোত যাতে ভগবানের পতি ভক্তি থাকে, মানষির গেলানি করি যাতে না বেড়ায়, মদ খায়া যাতে মাতলামি না করে, উমরা ভাল শিক্ষা দিবে।

৪ তাইলে বুড়িলা গাবুর চেংড়িলাক শিক্ষা দিবে, উমরা সোয়ামি, ছাওয়া-ছোটলাক ভালবাসিবে,

৫ উমরা নিজে দমনে রবে, মন দিয়া বাড়ির কাম করিবে, উমরা দয়ালু হবে, সোয়ামির অধীনে থাকিয়া সতী রবে, যাতে ভগবানের বাইক্যের নিন্দা না হয়।

৬ একে নাকান করি গাবুর চেংড়ালাকো উপদেশ দেও, উমরা সউগ কিছুতে নিজে দমনে রবে।

৭ তুই উমারটে সউগ নাকানের ভাল কামের আদর্শবান হও। তোর শিক্ষার মইন্ধোত সৎ ভাব, আর গম্ভীরতা থাকিবে।

৮ কাণ্ডো যাতে তোর কতাত দোষ ধরির না পারে, এই নাকান সচাং শিক্ষা দে। সেয়া হামার বিষয়ে মন্দ কতা কবার কোন কিছুই না থাকিবার বাদে তোর শত্রুলা নইজ্জা খাবে।

৯ চাকরলাক শিক্ষা দেও, উমরা যাতে সউগ সমায় মালিকের আদেশ মানি চলে। উমাক খুশি করির চেষ্টা করে, মালিকের কতার উপরত কতা না কয়,

১০ আর কোন কিছু চুরি না করে, বরং বিশ্বাস যোগ্যতা প্রমাণ করি দেখায়। এই নাকান সউগ ব্যাপারে করিলে হামার মুক্তিদাতা ভগবানের শিক্ষা আকর্ষিত হবে।

১১ ভগবানের যে দয়া প্রকাশ হইচে, সেইটা দিয়া সউগ মানষির উদ্ধার পাওয়া যায়।

১২ এই দয়া হামারলাক শিক্ষা দেয় হামরা যাতে নাস্তিক জীবন যাপন না করি, জগতের কামনা বাসনা দূরত থুইয়া এই দুনিয়াত নিজে দমনে রয়া, ভগবানক ভক্তি ভরে সৎ জীবন যাপন করি।

১৩ যাতে হামার আশা পূরণ হয় এই বাদে হামরা বাচ্ছে আছি। মহান ভগবান মুক্তিদাতা রাজা যীশুর মহিমাত ফিরি আসিবে, আর এইটা হামার আশা।

১৪ রাজা যীশু, পাপের বিরুদ্ধে ভগবানের পরিকল্পনা মতন ন্যায় বিচারের বাদে মরিচে, যাতে সউগ নাকানের অধর্ম থাকি হামারলাক উদ্ধার করির পারে, আর ঐলা মানষির মন শুদ্ধি করিবে, উমরালা উয়ারে হবে। উমরা সউগ সমায় অইন্য মানষির উপকার করিবে।

১৫ এই বাদে পুরা অধিকার নিয়া মানষিলাক শিক্ষা দেক, উপদেশ দেক, আর দোষ দেখে দেক। কাণ্ডো তোক তুচ্ছ মনে না করুক।

৩ নিজের মানষিলাক মনে করি দেও, উমরা যাতে দেশের সরকারের আদেশ পালন করে। যে কোন মানষির উপকার করির বাদে সউগ সমায় সাজি থাকো।

২ উমরা যাতে মানষির গেলানি, ঝগড়াঝাটি করি না বেড়ায় কিন্তুক শান্ত স্বভাবের হয় আর সউগ মানষির নগত নষ্ট ব্যবহার করে।



৩ হামরাও আগত বোকা আর অবাধ্য আছিলং। অইন্য মানষির মইন্ধো দিয়া ভুল ঘাটাত যাবার ধরছিলং। নানা নাকান জগতের লোভ-নালসা, কামনা-বাসনাত বন্দী থাকিয়া, হিংসায় মানষির ক্ষতি করিবার চিন্তায় জীবন কাটের ধরছিলোং, হামরা নিজে বেয়া হয়োও অইন্য মানষির নিন্দা করির ধরছিলোং।

৪ হামার মুক্তিদাতা ভগবানের দয়া আর পিরিত য়েলো প্রকাশ হইলেক,

৫ ঐ সমায় হামারলাক উদ্ধার করিলেক হামারলার ভাল কামের বাদে উদ্ধার নাই হয় কিন্তুক উয়ার দয়ার বাদে হইচে। আর হামারলাক পবিত্র আত্মা দিয়া নয়া করি বানেয়া মন পরিস্কার করিলেক এই নাকান করি হামাক রক্ষা করিলেক।

৬ হামার মুক্তিদাতা যীশু খ্রীষ্টের মইন্ধো দিয়া হামারলাক পবিত্র আত্মা দান করিলেক।

৭ যাতে উয়ার দয়াত নির্দোষ হয়ো অমৃত জীবন নিশ্চয় পামো।

৮ আর এই কতাটা সচাং। মুই চাং, তুই এইলার উপরত জোর দে, যাতে ভগবানক যায় যায় বিশ্বাস করিচে, উমরা সউগ সমায় ভাল কামে ব্যস্ত থাকে। মানষির বাদে এইলা শিক্ষা হইলেক ভাল আর উপকারী।

৯ ফম থুইস, মূর্খের নাকান তর্কা-তর্কি, দন-ঝগড়া, যিহুদী আত্মিক রীতি-নীতি, ক্যচাল আর আইন-কানুন নিয়া কতা কাটা-

কাটি এইলা থাকি তুই দূরত সারি রং। কেনেনা এইলা থাকি কোন লাভ হয় না বরং ক্ষতি হয়।

১০ যে মানষিটা ভুল শিক্ষা দিয়া দলাদলি সিদ্ধজন করে, উয়াক এক দুই বার সাবধান করি দেও। ইয়াতে যদি কাম না হয় তাইলে উয়ার নগত মেলামেশা বন্ধ করি দেও।

১১ এই নাকানের মানষি পাপের জীবন যাপন করে, উয়ার নিজের ব্যবহারে নিজে প্রমাণ করে যে উয়ায় ভুল ঘাটাত যাবার ধরচে।

১২ মুই আর্ন্তিমা আর তুখিকক ক্রীত দ্বীপত তোর ওটে পেঠাইম, আর তুই পচপচে নিকাপলিত মোর নগত দেখা করির আপরান চেষ্টা করিস। কেনেনা জারের দিনলা মুই ওটেকোনা থাকিম।

১৩ আইনের মানষি সীনা আর উয়ার নগত আপল্লোক যতন করি পেঠাও যাতে উমারলার কোন অভাব না হয়।

১৪ হামার মানষিলাক শিখান যেনে অইন্য মানষিলাক উপকার করির বাদে ব্যস্ত থাকে, আর অইন্য মানষিলাক যাতে অভাব মিটিবার পারে। এই নাকান করিলে উমার জীবন বিফল হবে না।

১৫ হামার সঙ্গী-সাথীলা সগায় তোক মঙ্গল কামনা জানাইচে। দয়া করি এই মঙ্গল কামনা সউগ গুরু ভাই বইনিলাক জানে দেও। তোমার সগারে উপরত ভগবানের দয়া থাকুক॥

# ফিলিমন

১ মুই পৌল। এই চিঠি নেখিবার ধরচুং মুই এলা জেলত বন্দী আছং আর গুরু ভাই তীমথিয় মোর সোদে আছে। হামরা এই চিঠি নেখিলং আদরের সহকর্মী ফিলীমনেরটে,

২ আর হামার বইনি আপ্লিয়ারটে, সহযোদ্ধা আর্থিপ্পেরটে আর উমার বাড়ির সমিতির সভাত যায় যায় একটে জোটো হয় উমারটেও।

৩ হামারলার স্বর্গের বাপ আর প্রভু যীশু খ্রীষ্ট তোমারলাক দয়া আর শান্তি দান করুক।

৪-৫ মুই তোমার কতা শুনিবার ধরচুং, কেনেনা প্রভু যীশুর উপরা তোমার বিশ্বাস আর ভগবানের সউগ মানষির পতি তোমার পিরিত। আর এই বাদে মুই যেলা প্রার্থনা করং, সেলা তোমার কতা ফম করিয়া ভগবানক ধন্যবাদ দেং।

৬ মুই প্রার্থনা করির ধরচুং যাতে তোমারলার বিশ্বাসের সোদে সহভাগিতা করা আরো বাড়ি যায়। যাতে খ্রীষ্ট যীশুতে সউগ ভাল বিষয়ে জ্ঞান আরো মজবুত হয়।

৭ ভাই তোর পিরিত দেখিয়া মুই খুব আনন্দ আর উৎসাহ পাইচুং, কেনেনা তুই ভগবানের মানষিলার মনত নতুন উৎসাহ জাগেয়া তুলিচিস।

৮ যদিও মুই প্রভু যীশু খ্রীষ্টের মইদ্রো দিয়া তোক তোর কর্তব্যের সমন্ধে খুব সাহসের সাথে আদেশ দিবার পালুং হয়।

৯ কিন্তুক পিরিতের বাদে, তার বদলে মুই তোক অনুরোধ করিবার ধরচুং। এক জন বুড়া মানষি হয়। খ্রীষ্ট যীশুর বাদে বন্দী আছং

১০ মুই পৌল তোরটে মোর ছাওয়া ওনীষিমের বাদে অনুরোধ করির ধরচুং। জেলখানাত মুই যেলা বন্দী আছিলুং, সেলা উয়ায় শিষ্য হিসাবে মোর ছাওয়ার নাকান আছিলেক।

১১ এমন একটা সমায় আছিল যেলা তোরটে উয়ায় গুরুত্বহীন আছিলেক, কিন্তুক এলা উয়ায় তোরটে আর মোরটে দুইজনেরটে খুব গুরুত্বের।

১২ উয়াক মুই তোরটে আরো পেয়েবার ধরচুং, মুই উয়ার সাথে মোর নিজের মনটাও পেয়েবার ধরচুং।

১৩ মুই তো উয়াক মোরেটে রাখির চাইচোং, জেলত বন্দী থাকার সমায় যেনে ভগবানের ভাল খবর প্রচারের বাদে উয়ায় তোর হয়। মোর সেবা করিবার পায়।

১৪ তোর অনুমতি ছাড়া মুই কিছুই করির চাং নাই, মুই চাং তুই যেনে বাধ্য হয়। না করিস, কিন্তুক তোর নিজের মনের ইচ্ছাতে মোর এই উপকার করিস।

১৫ কেনেনা হবার পায় এই বাদেই ওনীষিম অল্প সমায়ের বাদে আলদা হইচে যাতে তুই এলা থাকি চিরকালের বাদে উয়াক ফিরি

পাবু।

১৬ এলা উয়ায় তোর চাকরের নাকান না হয়। কিন্তুক চাকরের থাকিও বড়, আদরের ভাইয়ের নাকান করি উয়াক ফিরি পাবু। উয়ায় তো মোরটে খুব আদরের, কিন্তুক তোরটে ভগবানের গুরু ভাই আর এক জন মানষি হিসাবে আরো বেশী আদরের হবে।

১৭ তুই যদি মোক তোর সাথী বুলি মানিস তাইলে ওনীষিমক মানি নিস। তোমরালা মোক যেই নাকান করি বরণ করেন, ওই নাকান করি উয়াকও বরণ করি নেন।

১৮ ওনীষিম যদি তোমার কোনো ক্ষতি করে বা কিছু ধারে নেয় তাইলে ঐ ধার মোরে ধার মনে করেন।

১৯ মুই পৌল নিজের হাতে এইটা নেখিলুং, মুইয়ে শোধ করিম। তুই তো তোর নিজের জীবনের বাদে মোরটে ঋণী আছিস, এইটা তুই ভুলি না যাইস।

২০ ভাইরে মোক এইলা বিষয়ে তুই প্রভু যীশু খ্রীষ্টের বাদে উপকার করিয়া মোক মোর মনের খুশি করির জইন্যে নয়া করি উৎসাহ জাগেয়া তোলেক।

২১ মুই জানং তুই মোর কতা মানিবু আর এই বিশ্বাসে মুই তোরটে এই চিঠি নেখিলুং। আর তাছাড়াও মুই এইটাও জানং যে, মুই যেইলা কতা কলুং তুই তার থাকিয়াও বেশী করিবু।

২২ মোর থাকার বাদে আর একটা ঘরও ঠিক করি থুইস; কেনেনা মুই আশা করং ভগবান তোমারলার প্রার্থনার উত্তর দিয়া

পচকরি মোক তোমারলারটে ফিরি দিবে।

২৩ শ্রী ইপাহ্ফা রাজা যীশুর নাম প্রচারের বাদে মোর নগত জেলত বন্দী আছে, উয়ায়ও তোক মঙ্গল কামনা জানেবার ধরচে।

২৪ শ্রী মার্ক, শ্রী আরিষ্টাখ, শ্রী দীমা, লুক আর মোর সহকর্মী ইমরা মোর সোদে কাম করে। ইমরা সগায় মঙ্গল কামনা জানেবার ধরচে।

২৫ মুই প্রার্থনা করং প্রভু যীশু খ্রীষ্টের দয়া তোমারলার অন্তরত থাকুক॥

# ইব্রীয়

১ ভগবান মেলা দিন আগত, নানা নাকান করি উয়ার ভাববাদীলার মইন্ধো দিয়া হামারলার বাপ-ঠাকুরদাদালার সোদে কতা কইচিলেক।

২ কিন্তুক এই দিনলার শেষত ভগবান উয়ার বেটার মইন্ধো দিয়া হামারলার সোদে কতা কইলেক। ভগবান উয়ার বেটাক সউগ কিছুর অধিকার দিবার বাদে নিযুক্ত করিচে। বেটার মইন্ধো দিয়া উয়ায় সউগ কিছু সিড্জন করিচে।

৩ ভগবানের সউগ মহিমার গুণ এই বেটারটে আছে; আর এই বেটা ভগবানের ঢক। উয়ার শক্তিশালী বাইক্যের মইন্ধো দিয়া সউগ কিছু চালনা করে। মানষির পাপ দূর করির পাছত এই বেটা স্বর্গের মহান পরম প্রভুর ডাইন পাকে বসিলেক।

৪ উয়ায় স্বর্গদূতলার থাকিও মহান আর উয়ার বাপেরটে যে নাম পাইচে, সেইটাও স্বর্গদূতের চায়াও মহান।

৫ ভগবান এইলা কতা বেটাক কইচে কিন্তুক স্বর্গদূতলাক কয় নাই, “তুইয়ে মোর বেটা, আজি মুই তোর জন্ম দাতা বাপ হলুং।” আরো কইচে, “মুই হইম উয়ার বাপ, উয়ায় হবে মোর বেটা।”

৬ ভগবান উয়ার পইলা বেটাক এই দুনিয়াত পেয়েবার সমায় উয়ার বাদে কইচে, ভগবানের সউগ স্বর্গদূতলা উয়াক ভক্তি

দেউক।

৭ কিন্তুক স্বর্গদূতলার বিষয়ে ভগবান কইচে, উয়ায় নিজের দূতলাক বাতাসের নাকান করিচে, আর চাকরলাক বানাইচে অগুনের ফুলকির নাকান।

৮ আর বেটাক কইচে, “হে ভগবান, তোর সিংহাসন হবে চিরকালের বাদে, তোর শাসন হবে ন্যায়ের শাসন।

৯ তুই ন্যায়ক ভাল পাইস আর অইন্যায়ক ঘিন খাইস। এই কারনেই ভগবান, তোর ভগবান, তোক বাছাই করিচে, তোর সাথীলার চায়াও অনেক বেশী আনন্দ, তেলের নাকান করি তোর উপরাত ঢালি দিচে।”

১০ ভগবান আরো কইচে, “হে প্রভু, তুই মেলা দিন আগতে দুনিয়ার ভিটি গাথি খুচিস। স্বর্গও তোর হাত দিয়া সিদ্ধন করিচিস।

১১ এইটা ধবংস হয়্যা যাবে, কাপড়ের নাকান সেইলা পুরান হয়্যা যাবে কিন্তুক তুই চিরকাল থাকিবু।

১২ সেইলাক তুই কাপড়ের মতন ভাজ করি তাও তাও করি থুবু। আর সেইলাক কাপড়ের মতন বদল করা হবে। কিন্তুক তুই একে নাকান থাকিবু আর তোর জীবনের আয়ু কোন দিন শেষ হবার না হয়।”

১৩ ভগবান কোনোদিন কোনো স্বর্গদূতক এই কতা কয় নাই কিন্তুক বেটাক কইচে, “যতক্ষণ না মুই তোর শত্রুলাক তোর



ঠেংএর তলোত থোং ততক্ষণ তুই মোর ডাইন পাকে বসিস।”

১৪ ফম থোন স্বর্গদূতলা খালি ভগবানের সেবাকারী আত্মা। যেই মানষিলা মুক্তি পাবে উমারলার সেবা করির বাদেই তো উমারলাক পেঠা হইচে।

২ এই বাদে হামরা যেইটা শুনচি সেইটা পালন করির বাদে হামারলার আরো মনোযোগ দেওয়া উচিত। যাতে হামরা উয়ার বগল থাকি দূরত সারি না যাই।

২ যেইলা বাইক্য স্বর্গদূতলাক দিয়া কওয়া হইচে, সেই নিয়মলার কোন বদল হয় নাই। যে কাণ্ডো ভগবানের আদেশ অমান্য করিচে আর উয়ার কতা শুনির চায় নাই, উয়ায় শাস্তি পাইচে।

৩ মুক্তি পাবার কতা পইলা প্রভু যীশুই কইচে, আর যায় যায় উয়ারটে থাকি এই বাণী শুনিচে, উমরায় হামারটে মুক্তির কতালা জানাইচে। সেইটা যদি হামরা অবহেলা করি তাইলে কেমন করি রেহাই পামু?

৪ ভগবানও সাক্ষ্য দিচে। মেলা অচানক চিনের কাম দিয়া নিজের ইচ্ছা মতন মানষিক দেওয়া পবিত্র আত্মার দেওয়া বরদানের মইন্ধো দিয়া সাক্ষ্য দিচে।

৫ ভবিষ্যতে যে দুনিয়ার কতা হামরা কই, ভগবান সেইটা উয়ার স্বর্গদূতলার অধীনত থোয় নাই।

৬ পবিত্র শাস্ত্রত একজন এক জাগাত নেখিয়া গেইচে, “মানষি এমন কি যে, তুই উমারলাক নিয়া চিন্তা করিস? মানষির ছাওয়ালায় কি যে, তুই উমারলার ভিত্তি খেয়াল করিস?

৭ তুই মানষিক স্বর্গদূতের চায়া অল্প খানিক নিচা করচিস। আর তুই মানষিলাক রাজমটুক হিসাবে দান করিলু মহিমা আর সন্মান।

৮ আর তুই মানষিলাক ঠেংএর তলাত খুচিস সউগ কিছু।” যেলা ভগবান সউগ কিছুই মানষিক দিলেক, সেলা উয়ায় কোন কিছুই উয়ারটে বাকি থুইলেক না। এলা সউগ কিছুই যে মানষিরটে আছে দেখির পাবার ধরচে তা কিন্তুক না হয়।

৯ কিন্তুক যীশুক তো হামরা দেখির পাবার ধরচি। উয়াক স্বর্গদূতের থাকি অল্প খানিক সমায় ছোট করা হইছিলেক, যাতে মানষির লাভের বাদে উয়ায় নিজেই মরির পায়, আর এইটা হইচে ভগবানের দয়ার মইন্ধো দিয়া। যীশু কষ্ট ভোগ করিয়া মরিচে বুলিয়া জয়ের মালা হিসাবে মহিমা আর সন্মান উয়াকে দান করা হইচে।

১০ সউগ কিছুই ভগবানের বাদে আর সউগ কিছুই উয়ারটে থাকি হইচে। এই বাদে উয়ার মেলা ছাওয়ালাক উয়ার মহিমার ভাগী করির উদ্দেশ্যে ভগবান কামটা করিলেক। যীশু উমারলার বাদে মুক্তির ঘাটা বানাইচে আর দুঃখ-কষ্ট ভোগের মইন্ধো দিয়াও উয়ায় নিখুঁত আছিলেক। এই বাদে উয়ায় নেতা হইছিলেক।

১১ যীশু যায় পবিত্র করে আর শিষ্যলো যায় যায় পবিত্র হয় সগায়  
এক বাপেরটে হাতে সিঙ্গন হইচে। এই বাদে যীশু উমারলাক  
ভাই-বইনি কইতে শরম না খায়।

১২ পবিত্র শাস্ত্রত তো উয়ায় ভগবানক কইচে, মুই মোর ভাই  
বইনিলারটে তোর নাম প্রচার করিম আর সমাজত তোর গুণগান  
গাইম।

১৩ আরো কইচে, “মুই ভগবানের উপরাত নির্ভর করিম। দেখ,  
এই যে মুই আর ঐ ছাওয়ালা, যাক যাক ভগবান মোক দিচে।”

১৪ সেই ছাওয়ালা হইলেক অক্ল মসংএর মানষি। এই বাদে যীশু  
নিজেই অক্ল মসংএর মানষি হইলেক, যীশু নিজের মরণের  
মইন্দো দিয়া শয়তানক ধ্বংস করিলেক, যার হাতত মারি ফেলার  
ক্ষমতা আছিলেক।

১৫ আর যায় যায় আজীবন মরণক ভয় খায় উমারলাক মুক্তি  
করিলেক, যেই নাকান একটা চাকর মুক্তি পায়।

১৬ যীশু স্বর্গদূতলাক সাহায্য করির আইসে নাই, বরং  
অব্রাহামের গুষ্টির মানষিলাক সাহায্য করির বাদে আসিচে।

১৭ যীশুক সউগ বিষয় থাকি উয়ার নিজের ভাই-বইনিলার  
নাকান হওয়া উচিত। যাতে উয়ায় এক জন দয়ালু আর বিশ্বস্ত  
মহাবামন হিসাবে ভগবানের সেবা করির পায়। ইয়ার উদ্দেশ্য  
হইলেক, উয়ায় নিজের মরণের দ্বারা মানষির পাপ দূর করিয়া  
ভগবানক সন্তুষ্ট করে।

১৮ উয়ায় নিজেই যাচাই হয় কষ্ট ভোগ করিচে, এইবাবে যায় যায় যাচাই হবার ধরচে উমারলাক সাহায্য করির পায়।

৩ হে মোর পবিত্র ভাই-বইনিলা, তোমরা যায় যায় স্বর্গের অধিকারী হবার বাদে উয়ার ড্যেকত সাড়া দিচেন, তোমরা যীশুর বিষয়ে মনযোগি হন। উয়ায় হামারলার খবরিয়া আর মহাবামন,

২ আর যায় উয়াক নিযুক্ত করিচে সেই ভগবানেরটে উয়ায় বিশ্বস্ত আছিলেক। মোশিও ভগবানের ঘরের মানষিলার দেখাশুনার কামত শ্রী মোশিও বিশ্বস্ত আছিলেক, তেমন যীশুক যায় নিযুক্ত করিচে সেই ভগবানেরটে উয়ায়ও বিশ্বস্ত আছিলেক।

৩ যেয়ো কাণ্ডো ঘর বানায়, সেয়ো ঘরটার চায়া ঘর বানাইয়া বেশী সন্মান পায়। সেই বাদে ভগবান মোশির চায়া যীশুক আরো বেশী সন্মান দিচে।

৪ পতিটা ঘর কাণ্ডো না কাণ্ডো গড়ায়, কিন্তুক যায় সউগ কিছুই গড়াইচে, উয়ায় ভগবান।

৫ সচাংএ, মোশি ভগবানের ঘরের সেবাকারী হিসাবে বিশ্বস্ত আছিলেক, যাতে ভবিষ্যতে যেইলা কওয়া হবে সেইলা সমন্ধে উয়ায় সাক্ষী দেয়।

৬ কিন্তুক খ্রীষ্ট সেই ঘরের দায়িত্ব পাওয়া বেটা হিসাবে বিশ্বস্ত আছিলেক। হামারলার নিশ্চিত আশার ফলে মনত যে সাহস আর

আনন্দ আইসে, উয়াতে যদি শেষ পর্যন্ত থির থাকি, তাইলে দেখা যাবে যে, হামরায় ভগবানের ঘর।

৭ এই বাদে পবিত্র আত্মা কইচে, “আজি তোমরা যদি উয়ার ড্যেক শোনে,

৮ তাইলে তোমারলার চৌদ্দ গুষ্টির মতন অন্তর পাষান না করেন, যেই নাকান ইভ্রায়েলীলা বিরোধীতা করিচিলেক। উমরা নিধুয়া পাথারের মইন্ধোত বিরোধী হয় মোক যাচাই করিচিলেক।

৯ ওটেকোনা চল্লিশ বছর ধরি ঐ সমায়ের মানষিলা মোর অচানক কাম দেখির ছিলেক, তাণ্ডো উমরা মোক যাচাই করিয়া বিরক্ত করিচিলেক,

১০ এইবাদে মুই উমার উপরাত খুব বিরক্ত হয় কইছিলুং, ‘এই মানষিলা সউগ সমায় বেয়া চিন্তা করে, মোর ঘাটা বুঝির পায় না।’

১১ এই বাদে মুই গোসা হয় কইছিলুং, মোর দেওয়া জিরানের জাগাত উমরা সোন্দের পাবে না।”

১২ ও ভাই-বইনিলা সাবধান! তোমারলার মইন্ধোত কাণ্ডোরো অন্তর যাতে বেয়া আর অবিশ্বাসী না হয়। এই নাকান অন্তর জীবন্ত ভগবানেরটে থাকি দূরত সারিয়া যায়।

১৩ ইয়ার চায়া বরং যত দিন মানষি “আজি” এই কতাটা কওয়া যায়, ততদিন তোমরা একে অপরক উৎসাহ দেও, যাতে

তোমারলার কাণ্ডোরো মন পাপের ছলনাত পড়ি পাষান হয় না যায়।

১৪ পইলা হামারলার যে বিশ্বাস আছিলেক যদি শেষ পর্যন্ত হামরা সেই বিশ্বাসে থির থাকি, তইলে এইটা প্রমান যে, হামরা সগায় খ্রীষ্টের ভাগীদার হইচি।

১৫ শাস্ত্রত এই কতা কওয়া হইচে, “আজি তোমরা যদি উয়ার ড্যেক শোনেন, তইলে তোমারলার চৌদ গুটির মতন তোমরালা অন্তর পাষান না করেন, যেই নাকান ইজ্রায়েলীলা বিরোধীতা করিচিলেক।”

১৬ কন দেখি, কায় কায় ভগবানের ড্যেক শুনিয়াও উয়ার বিরুদ্ধে বিরোধীতা করিচিলেক? উমরা কি মোশির মইদ্রো দিয়া মিশর দেশ থাকি নিকলি আনা মানষি না হয়?

১৭ আর ভগবান চল্লিশ বছর ধরি কার উপরাত বিরক্ত আছিলেক? উমরা কি সেই মানষিলা না হয়, যায় যায় পাপ করিচিলেক আর যার মরাদেহা নিধুয়া পাথারত পড়ি আছিলেক?

১৮ আর ভগবান কারটে কিরা কাটি কইচে যে, “উমরা মোর দেওয়া জিরানের জাগাত যাবার পাবে না,” উমরায় কি ঐ মানষিলা, যায় যায় অবাধ্য হয় বিরোধীতা করিচে?

১৯ ইয়াতে দেখা যায় যে, অবিশ্বাসের বাদেই উমরা ভগবানের দেওয়া জিরানের জাগাত যাবার পায় নাই।

৪ ভগবানের দেওয়া জিরানের জাগাত সোন্দের বাদে যে কিরা দেওয়া আছিলেক, সেই কিরা হামারলার বাদে। এই বাদে হামাক সাবধান হবার নাইগবে, যাতে কাণ্ডোক আশুর্বাদের অযোগ্য কয়া ধরা না হয়।

২ ইজ্রায়েলীলারটে যে ভাল খবর প্রচার করা হইছিলেক, তেমন হামারলারটেও করা হইছিলেক। কিন্তু ঐ ভাল খবরত ইজ্রায়েলীলার কোন লাভ হয় নাই, কেনেনা উমরালা শুনিয়াও বিশ্বাস করে নাই।

৩ কিন্তুক হামরা যায় যায় বিশ্বাস করচি হামরা উয়ার কিরা দেওয়া জিরানের জাগাত সোন্দের ধরচি। অবিশ্বাসীলাক ভগবান কইচে, “মুই গোসা হয় কিরা দিয়া কইছিলুং, মোর দেওয়া জিরানের জাগাত উমরা সোন্দের পাবে না।” দুনিয়া সিড্জনের সাথে সাথে ভগবানের এই জিরানের জাগা তৈয়ারী করা আছিলেক।

৪ পবিত্র শাস্ত্রত এক জাগাত জিরানের সাত দিনের দিন সমন্ধে এই নাকান কওয়া হইচে, “ভগবান সাত দিনের দিন কোন কাম করে নাই।”

৫ কিন্তুক ভগবান উমরলাক বিষয়ে কইছিলেক, “মোর দেওয়া জিরানের জাগাত উমরা সোন্দের পাবে না।”

৬ ইয়াতে বুঝা যায় যে, ইজ্রায়েলীলারটে আগোত যে ভাল খবর প্রচার করা হইচে উমার অবাধ্যতার বাদে উমরা ভগবানের দেওয়া

জিরানের জাগাত সোন্দের পায় নাই। কিন্তু এলা এই কতা ঠিক, কাণ্ডো কাণ্ডো উয়ার দেওয়া জিরানের জাগাত সোন্দের পাবে।

৭ এই বাদে ভগবান যেই নাকান আগোত ইজ্রায়েলীলারটে কইচিলেক, একে নাকান করি মেয়ো দিন পাছত রাজা দায়ূদ এই জিরানের দিনক আজি কইচে, উয়ায় কইলেক, “আজি তোমরা যদি উয়ার ড্যেক শোনেন, তাইলে তোমারলার অন্তর পাষান না করেন।”

৮ ভগবানের ভাববাদী যিহোশূয় যদি ইজ্রায়েলীলাক জিরানের জাগাত নিয়া গেইলেক হয়, তাইলে ভগবানক আর একটা দিনের কতা কওয়া খাইলেক না হয়।

৯ কিন্তুক দেখা যায় ভগবানের মানষিলার বাদে জিরানের সুযোগ এলাও আছে।

১০ কেনেনা ভগবান যেই নাকান উয়ার সিড্জনের কাম শেষ করিয়া জিরান নিছিলেক, ঠিক একে নাকান করি যায় ভগবানের দেওয়া জিরানের জাগাত সোন্দায়, উয়ায়ও উয়ার কামের বাদে জিরান পায়।

১১ এই বাদে আইসো হামরা সেই জিরানের দিনটা পালন করির প্রাণপনে চেষ্টা করি। কাণ্ডো যাতে অবাধ্য ইজ্রায়েলীলার নাকান করি উয়ার দেওয়া জিরানের দিন থাকি বাদ না যাই।

১২ ভগবানের বাইক্য জীবন্ত আর ক্ষমতাশালী, এই বাইক্য সউগ নাকানের দুই পাকে ধারওয়ালা ছোরার থাকিও ধার বেশী। এই



বাইক্য মানষির অন্তর-আত্মা আর হাড়ির ভিতরাত সোন্দায় আর মানষির সউগ মনের ইচ্ছা আর চিন্তা ভাবনা যাচাই করি দেখে।

১৩ সিদ্ধনের কোন কিছুই ভগবানেরটে নুকি থোয়া থাকে না। উয়ায় সউগ কিছুই ঝকঝকা করি দেখির পায়। উয়ার নজরত সউগ কিছুই খোলা আর নিকলি থোয়া আছে। আর উয়ারটেই হামাক সউগ কামের হিসাব দিবার নাগবে।

১৪ আইসো, হামারলার এক মহাবামন আছে যায় স্বর্গত ভগবানের সোদে আছে। উয়ায় ভগবানের বেটা যীশু। এই বাদে হামরা বিশ্বাসে থির থাকি।

১৫ হামারলার মহাবামন যীশু হামারলার কাহিল হওয়ার কতা জানে আর মায়া করে। হামারলার নাকান যীশুকও এই দুনিয়াত সউগ নাকানের যাচাই করা হইচে, কিন্তুক উয়ায় পাপ নাই করে।

১৬ এই বাদে হামরালা সাহস করি ভগবানের দয়ার সিংহাসনের সামনাত আগে যাই, যাতে দরকারের সমায় হামরা উয়ার দয়া আর মায়া পাই।

৫ পতিটা মহাবামনক মানষির মইন্ধো থাকি বাছাই করি নেওয়া হয় ভগবানের সেবা করির, যাতে উয়ায় মানষির পাপের বাদে পশু আর দোসরা উপহারও সঁপে দেয়।

২ যায় যায় না জানিয়া পাপ করে আর উল্টা ঘাটাত চলে, উমারলার নগত উয়ায় নরম ব্যবহার করির পায়। কেনেনা উয়ার

নিজের মইদ্বোতও দুর্বলতা আছে।

৩ উয়ায় যেই নাকান দোসরা মানষির পাপের বাদে পশু সঁপে দেয়, সেই নাকান নিজের পাপের বাদেও উয়াক পশু সঁপে দিবার নাগিবে।

৪ মহাবামন হবার সন্মান কাণ্ডো নিজের ইচ্ছায় নিবার পায় না, কিন্তুক ভগবান যাক ডেকায় উয়ায়ে খালি এই সন্মান পায়। যেই নাকান মহাবামন হবার বাদে ভগবান শ্রী হারনক ডেকাইচে।

৫ কতাটা যীশু খ্রীষ্টের বেলাতো খাটে। খ্রীষ্ট নিজের ইচ্ছায় মহাবামন হবার বাদে নিজক বড় করে নাই। ভগবান এই কয়া উয়াক এই সন্মান দান করিচে, “তুইয়ে মোর বেটা, আজি মুই তোর জন্ম দাতা বাপ হলুং।”

৬ একে নাকান করি পবিত্র শাস্ত্রের আর এক জাগাত ভগবান কইচে, “তুই চিরকালের বাদে মল্লীষেদকের নাকান বামন।”

৭ যীশু এই দুনিয়াত থাকিবার সমায় ভগবানেরটে জোরে চিকরিয়া কান্দিয়া কাউলা-কাউলি করিচিলেক। যেই ভগবানের মরণ থাকি বত্তের ক্ষমতা আছে উয়ায় উয়ার প্রার্থনা শুনিচে কেনেনা উয়ার প্রার্থনাত ভক্তি আর বাধ্যকতা আছিলেক।

৮ কিন্তুক ভগবানের বেটা হওয়া সত্বেও দুঃখ ভোগের মইদ্বো দিয়া ভগবানের বাধ্য হওয়া শিখিছিলেক।

৯ এই নাকান করি যীশু খাটি মহাবামনের অধিকার পাইলেক আর সেলো যায় যায় উয়ার বাধ্য উমার সগারে বাদে চিরকালের

মুক্তির ঘাটা হইলেক।

১০ আর ভগবান উয়াক শ্রী মল্লীষেদকের রীতি অনুসারে মহাবামন অভিষেক করিচে।

১১ এই বিষয়ে আরো মেয়ো কতা হামার কবার আছে, কিন্তুক তোমারলারটে এই বিষয় বুঝিয়া কওয়া কঠিন। কেনেনা আত্মিক বিষয়লা তোমরা সহজে বুঝির পান না।

১২ এতদিনে তোমারলার মাষ্টার হওয়া দরকার আছিলেক, কিন্তুক উয়ার বদলে ভগবানের বাইকে্যের পুরান কতালা আর একবার তোমারলাক শিখিবার বাদে মাষ্টারের দরকার হইলেক। শক্ত খাবারের বদলে ছোট ছাওয়ালার নাকান আরো তোমারলাক দুধ খাওয়া দরকার হয়। পরিচে।

১৩ যায় দুধ খায়া বত্তি রয় উয়ায় তো এলাও কাচুয়া ছাওয়া, আর সৎ জীবন সমন্ধে যে শিক্ষা আছে উয়াতে উয়ায় কাচা।

১৪ প্রাপ্ত বয়স্ক মানষিলারে শক্ত খাওয়া খাবার দরকার। প্রাপ্ত বয়স্ক মানষিলা মানে, যায় যায় ভগবানের বাইকে্যের কঠিন শিক্ষালা বুঝির পায়, উমরলা মেয়ো দিন অভ্যাসের ফলে ভাল-মন্দ বিচার করির শিখিচে।

৬ আইসো হামরা খ্রীষ্টের বিষয়ে পইলা যে শিক্ষা পাইচি সেইলা খুইয়া হামরা আগে যায়া খাটি হবার চেষ্টা করি, আর একবার

হামরা ফির ভিটি না বানাই। এই শিক্ষালা হইলেক বেয়া কাম  
থাকি পস্তার সমন্ধে, ভগবানের উপরাত বিশ্বাস করা সমন্ধে,

২ দীক্ষালা সমন্ধে, হাত-থোয়া সমন্ধে, মরালা ফির বত্তি উঠার  
আর চিরকালের শান্তির শিক্ষা সমন্ধে।

৩ ভগবানের ইচ্ছা হইলে হামরা আরো বেশী করি শিখিমু।

৪ কেনেনা যদি কাণ্ডো একবার আলো দেখে, উমরা স্বর্গীয়  
দানের স্বাদ পায় আর পবিত্র আত্মার ভাগীদার হয়,

৫ যদি ভগবানের ভাল বাইকেরে স্বাদ পায় আর যে যুগ আসির  
ধরচে উয়ার শক্তির বিষয়ে জানির পায়।

৬ কিন্তুক পাছত ঐ মানষিলা যদি খ্রীষ্টেরটে থাকি ঘুরি চলি যায়,  
তাইলে উমারলাক নয়া করি মন বদলেয়া আনা সম্ভব না হয়।  
উমরা নিজেই ভগবানের বেটাক আরো দ্রুশত দেয় আর সগারে  
সামনা উয়াক অসন্মান করে।

৭ যেই মাটি বার বার দ্যাওয়ার জল চুষি নেয় আর শাক-সবজি  
হয়, সেই মাটি চাষার বাদে ব্যবহার যোগ্য আর সেই মাটি  
ভগবানের আশুর্বাদ পাবে। কিছু মানষিও এই নাকান।

৮ কিন্তুক যেই মাটিত কাটা ঝোপ আর খুরিয়াকাটা জন্মায় সেই  
মাটি কোন কামের না হয়। উয়াত ভগবানের শাও দিবার ভয়  
থাকে, শেষত অগুনত ছোবা যায়া ছারখার হবে।

৯ ও পরানের সখালা, যদিও হামরা এই বিষয় কতা কবার ধরটি  
তাণ্ডো হামরা জানি যে, তোমরালা ঐ ভাল মাটির নাকান।

তোমারলার মুক্তির ফল দেখা দিবার ধরচে।

১০ কেনেনা ভগবান অন্যায় বিচার করে না। এই বাদে তোমারলার কাম আর উয়ার মানষিলাক সেবা যতন করিয়া উয়াক যে পিরিত করির ধরচেন, সেইটা উয়ায় ফম পাসুরি যায় না।

১১ হামরা চাই, তোমরা সগায় শেষে পর্যন্ত এই নাকানের আগ্রহ দেখান যাতে তোমরা পুরাপুরি নিশ্চিত হবার পারেন যে তোমারলার আশা পূরণ হবে।

১২ হামরা চাই না তোমরা এই কামলা নিয়া আলসিয়া হন। তার বদলে তোমরালা উমারলার নাকান হন, যায় যায় বিশ্বাস আর ধৈর্য নিয়া চলে, যত দিন না ভগবানের সউগ কিরা দেওয়া আশুর্বাদে অধিকারী হন।

১৩ ভগবান যেলা অব্রাহামেরটে কিরা কাটিচিলেক সেলা কোন মহান মানষির নামে শপথ করির না পায়া উয়ায় নিজের নামে শপথ করিলেক,

১৪ “মুই নিশ্চয় তোক আশুর্বাদ করিম আর তোর বংশ বাড়াইম।”

১৫ অব্রাহাম যেলা ধৈর্য ধরিয়া থির থাকিলেক সেলা ভগবান যেইটা দিবার চাইচে সেইটা উয়ায় পাইলেক।

১৬ নিজের চায়া যায় মহান উয়ার নামে মানষি শপথ করে। তাতে সেই শপথ এই নিশ্চয়তা দেয় যে, যেইটা কওয়া হইচে

সেইটা সচাং। আর ইয়াতে সউগ গোলমাল থামি যায়।

১৭ এই নাকান করি যেয়ো ভগবান যেইটা দিবার কিরা কাটিচে, উয়ায় সেয়ো নিজের নাম ব্যবহার করিচে যাতে ঐ প্রতিজ্ঞার অধিকারী মানষিলা জানিবে যে, সেইটা বদল হবার না হয়।

১৮ কিরাকাটা আর শপথ করা কোন দিন বদল হয় না। ভগবান কোন দিন মিছাং কতা কয় না, উয়ায় এই কিরা আর শপথ করিচে যাতে হামারলার আগত যে আশা আছে সেইটা আকড়ে ধরির বাদে উৎসাহ পাই।

১৯ এই আশা হামারলার জীবনত একটা জাহাজের নোংগরের মত নিশ্চিত আর থির। আর সেইটা মহাপবিত্র জাগার পর্দার পাছপাকে, মানে ভগবানের সামনাত যায়।

২০ যীশুই হামারলার হয়। হামারলার আগত সেই জাগাখানত গেইচে। উয়ায় চিরকালের বাদে শ্রী মল্লীষেদকের রীতি অনুসারে হামার মহাবামন হইচে।

৭ এই মল্লীষেদক আছিলেক শালম গঞ্জের রাজা আর পরমপ্রভুর বামন। অব্রাহাম যেয়ো রাজালাক হারে দিয়া বাড়ি ফিরি আসির ধরছিলেক সেয়ো উয়ার নগত মল্লীষেদকের দেখা হয়। এই মল্লীষেদক অব্রাহামক আশুর্বাদ করিছিলেক।

২ সেয়ো অব্রাহাম সউগ জিনিসের দশ ভাগের এক ভাগ উয়াক দিছিলেক। মল্লীষেদক কতাটার মানে হইলেক ন্যায়ের রাজা।

বামন ছাড়াও মল্লীষেদকের আরো একটা পদ আছিলেক, উয়ায় আছিলেক শালমের রাজা, আর এইটার মানে হইলেক শান্তির রাজা।

৩ মল্লীষেদকের মাও-বাপ আর উয়ার গুষ্টির কোন তালিকা নাই। উয়ার জীবনের শুরু নাই, শেষ নাই, ভগবানের বেটার নাকান উয়ায় আছিলেক চিরকালের বামন।

৪ ভাবিয়া দেখ, মল্লীষেদক কত মহান আছিলেক! হামার চৌদ গুষ্টির মহাপুরুষ অব্রাহামও যুদ্ধত জিতিয়া ভাল ভাল জিনিস লুটিয়া দশ ভাগের এক ভাগ উয়াক দান করিছিলেক।

৫ শ্রী লেবি অব্রাহামের বংশের আছিলেক, আর অইন্য মেলা বংশও আছিলেক। আর সেই লেবির গুষ্টি বামন আছিলেক। লেবি আর উয়ার গুষ্টি অব্রাহামের বংশধর। শ্রী মোশির বিধান মতে অইন্য গুষ্টিলা লেবির গুষ্টিক দশ ভাগের এক ভাগ করি দিবার ধরছিলেক।

৬ কিন্তুক মল্লীষেদক লেবির গুষ্টি না হয়ও, অব্রাহাম মল্লীষেদকক দশ ভাগের এক ভাগ দিবার ধরছিলেক। যদিও পরমপ্রভু অব্রাহামেরটে কিরা কাটিছিলেক, তাণ্ডো মল্লীষেদক অব্রাহামক আশুবাদ করিছিলেক।

৭ এই বিষয়ে কোন সন্দেহ নাই যে, আশুবাদ যায় পায় উয়ার চায়া আশুবাদ যায় করে উয়ায় মহান।

৮ মল্লীষেদকের নাকান লেবির বংশও দশ ভাগের এক ভাগ পাইচে। মল্লীষেদক উমার চায়া আরো মহান, কেনেনা লেবির বংশ মরণশীল আছিলেক কিন্তুক মল্লীষেদক অমর কয়া সাক্ষ্য দেওয়া হবার ধরচে।

৯ এই নাকান আরো কইলে হয় যে, শ্রী লেবিও অব্রাহামের মইদ্রো দিয়া দশ ভাগের এক ভাগ মল্লীষেদকক দিছিলেক।

১০ কেনেনা মল্লীষেদকের নগত য়েলা অব্রাহামের দেখা হইছিলেক সেলা লেবি অব্রাহামের নারিত আছিলেক।

১১ যায় যায় বামনের কাম করে সেই লেবীয় গুষ্টির মানষিলার কামের উপরত ভিত্তি করি পরমপ্রভু ইজ্রায়েলীলাক উয়ার আইন কানুন দিছিলেক। লেবীয় গুষ্টির বামনলার কামের মইদ্রো দিয়া যদি পুরাপুরি শুদ্ধি হওয়া গেইলেক হয় তাইলে পইলা লেবীয় বামন হারনের বদলে মল্লীষেদকের নিয়ম মতন অইন্য আরেক জন বামন আসিবার কি দরকার আছিলেক?

১২ য়েলা বামনের পদ বদল করা হয় সেলা আইন কানুন বদলেবার দরকার হয়।

১৩ যার বিষয়ে মুই এইলা কতা কবার ধরচুং সেই যীশু লেবীয় গুষ্টি থাকি আইসে নাই, উয়ায় অইন্য গুষ্টির। সেই গুষ্টির কাণ্ডো কোন দিন বামন হিসাবে বেদীর উপরত পশু সঁপে দেয় নাই।

১৪ এইটা একে বারে ঝকঝকা যে, যিহুদার গুষ্টি থাকি হামারলার প্রভু আসছিলেক। এই গুষ্টি থাকি কোন মানষি যে বামন হবে সেই



কতা মোশি কোন দিনও কয় নাই।

১৫ তাইলে এলা মন্কীষেদকের মতন আরেক জন বামন আসচে, এই বাদে হামরা ঝকঝকা করি জানি মোশির নিয়ম বদল হবার দরকার আছিলেক।

১৬ যীশু বামন হবার বিষয়ে গুষ্টি সমন্ধে কোন নিয়মের উপরত নির্ভর করে না, সেইটা অক্ষয় জীবনের শক্তির উপরত নির্ভর করে।

১৭ পবিত্র শাস্ত্রত নেখা আছে উয়ার সমন্ধে, “তুই চিরকালের বাদে মন্কীষেদকের রীতি অনুসারে বামন।”

১৮ আগত বামনের রীতি দুর্বল আর অকামের আছিলেক, এই বাদে সেইটা বাতিল করা হইচে।

১৯ কেনেনা মোশির বিধান কোন কিছুকেই পরিপূর্ণ করির পারে নাই, এলা উয়ার জাগাত উয়ার চায়া একটা ভাল আশা দেওয়া হইচে। সেই আশার মইদ্বো দিয়া হামরা পরমপ্রভুরটে যাবার পারি।

২০ যীশুর বামনের পদ পরমপ্রভু শপথ করিয়া ঠিক করিছিলেক। লেবীয় গুষ্টির মানষিলার বামন হবার সমায় পরমপ্রভু কোন শপথ করে নাই।

২১ কিন্তুক পরমপ্রভু যীশুক মহাবামন করিবার সমায় শপথ করিছিলেক। পবিত্র শাস্ত্রত নেখা আছে, “প্রভু শপথ করিচে, ‘তুই

চিরকালের বাদে বামন।’ এই বিষয়ে উয়ায় আর মন বদলাবে না।”

২২ ইয়ার থাকি হামরা বুঝির পারি যে, যীশু আরো একটা চুক্তির জামিনদার হইচে।

২৩ লেবীয় গুষ্টির মইদ্বোত মেয়ো মানষি বামন হইছিলেক, কেনেনা মরণ কাণ্ডোকে চিরকাল বামনের কাম চালের দেয় নাই।

২৪ কিন্তুক যীশু চিরকাল বত্তায় আছে আর উয়ার বামনের পদ কোন দিন বদল হবার না হয়।

২৫ এই বাদে যায় উয়ার মইদ্বো দিয়া ভগবানেরটে আইসে উয়ায় উমাক মুক্তি দিবার পারে চিরকালের বাদে। কারন উমার পক্ষে হয় মিনতি করির জইনে উয়ায় সউগ সমায় বত্তায় আছে।

২৬ এই নাকান নির্দোষ আরো খাটি মহাবামনের হামারলার দরকার আছিলেক। উয়ায় পাপী মানষির থাকি যুদা। আর ভগবান উয়াক দ্যাওয়ার থাকিও উপরত তুলিচে।

২৭ অইন্য অইন্য মহাবামনলা যেমন নিজের পাপ আর অইন্যের পাপের বাদে পশু সঁপে দিবার ধরছিলেক। কিন্তুক এই বামনের এইটা করির দরকার নাই, কেনেনা উয়ায় চিরকালের মত একবারেই নিজের জীবন সঁপে দিয়া সেই কামটা শেষ করে।

২৮ যদিও মানষির মইদ্বোত দুর্বলতা আছে তাণ্ডো আইন কানুন মতে মানষিলাকেই মহাবামনের পদত নিযুক্ত করা হয়, কিন্তুক আইন কানুন দিবার পাছত যে শপথ করা হইছিলেক, সেই শপথ

চিরকালের বাদে নিখুঁত ভগবানের বেটাক মহাবামনের পদত নিযুক্ত করিচে।

৮ হামরা যেইটা কবার ধরটি সেইটার আসল কতা হইলেক, হামারলার এক জন মহাবামন আছে, যায় স্বর্গের মহান পরমপ্রভুর সিংহাসনের ডাইন পাকে বসি আছে।

২ উয়ায় মহাপবিত্র জাগাত মানে, আসল তাম্বুত ভগবানের সেবা করিচে। সেই উপাসনা তাম্বুটা মানষির হাতের গড়া না হয়, প্রভু নিজেই বানাইচে।

৩ প্রত্যেক মহাবামন পশু সঁপে দিবার বাদে আরো অইন্য অইন্য জিনিস সঁপে দিবার বাদে নিযুক্ত হয়, এই বাদে এই মহাবামনেরও কোন কিছু সঁপে দেওয়া দরকার।

৪ কিন্তুক উয়ায় যদি এলা এই দুনিয়াত থাকিলেক হয় তাইলে বামন হবার পারিলেক না হয়। কেনেনা এটেকোনা বিধান মতে সঁপে দিবার বাদে বামন আছেই।

৫ বামনলা যেইলা কাম করে সেইলা হইলেক স্বর্গের জিনিসের নমুনা আর ছায়া। শ্রী মোশি যেলা পবিত্র তাম্বু বানের যাবার ধরছিলেক সেলা ভগবান সাবধান করি কইছিলেক, “সিনাই পাহাড়ের উপরা থাকি যেই নাকান নমুনা তোক দেখা হইছিলেক ঠিক একে নাকান সউগ কিছু বানাও।”

৬ কিন্তুক এলা যীশুক যে বামনের কামের বাদে নিযুক্ত করা হইচে সেইটা বামনলার কামের চায়া মহৎ। একে নাকান যীশু যে ভগবানেরটে থাকি নয়া চুক্তি করিচে, সেইটা পুরান চুক্তির চায়া ম্যেলা গুণ মহৎ। এই চুক্তি আরো ভাল কিরার উপরা নির্ভর করে।

৭ কেনেনা পুরান চুক্তি যদি নিখুঁত হইলেক হয়, তাইলে উয়ার জাগাত নয়া চুক্তি করির না নাগিলেক হয়।

৮ কিন্তুক ভগবান উয়ার মানষিলার দোষ দেখেবার বাদে পবিত্র শাস্ত্রত কইচে, “মুই প্রভু কবার ধরচুং যে, সমায় আসির ধরচে, যেলা মুই ইজ্রায়েল আর যিহুদীয়ার মানষিলার বাদে একটা নয়া চুক্তি করিম।

৯ মিশর দেশ থাকি উমারলার চৌদ্দগুষ্টিক মুই হাত ধরি আনিবার সমায় উমারলার বাদে যে চুক্তি করিচিলুং, এই নয়া চুক্তি সেই চুক্তির নাকান হবার না হয়। উমরা মোর চুক্তি মতন চলে নাই, এই বাদে মুই উমারলার ভিতি নজর দেং নাই, এই হইলেক মোর কতা।

১০ কিন্তুক পাছত মুই ইজ্রায়েলীলার বাদে এক নয়া চুক্তি চালু করিম, মোর বিধান মুই উমারলার মনত রাখিম, আর উমারলার অন্তরত নেখিয়া থুইম। মুই উমারলার ভগবান হইম, উমরা হবে মোর মানষি।

১১ কাণ্ডেয় নিজের পাড়া-পড়শিক আর নিজের ভাই-বইনিক ‘প্রভুক চিনিবার শেখো’, এই কয়া আর কোন দিন শিক্ষা দেওয়ার দরকার নাই। কেনেনা সগায় মোক চিনিবে, তুচ্ছ আর মহান সগায় মোক জানিবে।

১২ মুই উমারলার অন্যায় ক্ষমা করিম, আর উমারলার পাপ কোন দিন ফম করিম না।”

১৩ ভগবান এই বিধানক নয়া করি ঘোষণা করিয়া আগের বিধানক পুরান কয়া বাতিল করিলেক। যেইটা পুরান আর মেলা দিন কয়া নষ্ট হয় যাবার ধরচে সেইটা খুব তাড়াতাড়ি নিশ্চিন্দ হয় যাবে।

১ ভগবানের সেবা আরো প্রার্থনার জইন্যে পইলা চুক্তির নানান নিয়ম দেওয়া হইছিলেক। আরো এই দুনিয়াত একটা পবিত্র জাগার কতাও আছিলেক।

২ সেই মতন একটা তাম্বু বানা হইছিলেক। সেই তাম্বুর পইলা ভাগেত আছিলেক বাতি খুবার ঠগা, টেবিল আরো পরমপ্রভুক সঁপে দিবার বাদে বিশেষ রুটি। এই পইলা অংশের নাম আছিলেক পবিত্র জাগা।

৩ পর্দার পাছপাকে আর একখান জাগা আছিলেক, যেই জাগাখানক মহাপবিত্র জাগা কওয়া হয়।

৪ এই জাগাত ধূপ জ্বলের বাদে সোনার বেদী আর চুক্তির সিন্দুক আছিলেক। সিন্দুকটার চাইরো পাকে সোনা দিয়া মোড়া। আর উয়ার মইন্ধোত আছিলেক সোনার ঘটিত থোয়া মান্না, হারনের যেই নাটিত ফুল ফুটছিলেক সেই নাটিটা, আরো আছিলেক দুইটা চ্যেপটা শিল, যার উপরত চুক্তির শর্ত নেখা আছিলেক।

৫ সেই সিন্দুকের উপরাত দুইটা মহিমাময় সোনার স্বর্গদূতের নাকান আছিলেক, উমার ডানালা সিন্দুকের উপরাত ম্যেলে দেওয়া আছিলেক। উমরা দয়ার মটুকের উপরত ডানা দিয়া পাপ ঢাকা দিবার ধরছিলেক। এই সউগের খুটিনাটি বিষয়ে কতা কওয়া এলা দরকার নাই।

৬ যেয়ো এইলা জিনিস আগের নিয়ম মতন বানা হয়্যা গেইলেক, সেয়ো বামনলা পতিদিনে তাম্বুর পইলা অংশটাত সোন্দেরা পরমপ্রভুর সেবা করির ধরছিলেক।

৭ কিন্তুক দ্বিতীয়া অংশটাত মানে মহাপবিত্র জাগাত খালি মহাবামন সোন্দের ধরছিলেক, বছরে একবারেই খালি উয়ায় সঁপে দেওয়া পশুর অত্ত নিয়া ওটেকোনা সোন্দের ধরছিলেক। উয়ার নিজের পাপের বাদে আর মানষিলা না জানিয়া যেইলা পাপ করির ধরছিলেক, সেইলার বাদে উয়ায় এই অত্ত সঁপে দিবার ধরছিলেক।

৮ ইয়াতে পবিত্র আত্মা দেখে দিবার ধরচে যে, যত দিন এই তাম্বুটা থাকিবে ততদিন এই মহাপবিত্র জাগাত সোন্দেরার ঘাটা

খোলা থাকির না হয়।

৯ বর্তমান কালে তাম্বুটা একটা চিন যেইটা হামাক কয়া দিবার ধরচে যে, পশু বলি দেওয়া আর অইন্য অইন্য দান, বিবেকক শুদ্ধি করির পারে না।

১০ সেইলা খালি দেহার বিষয়, মানে খাওয়া দাওয়া আর নানা নাকান দীক্ষালা সমন্ধে ধর্মের নিয়ম মতন শুদ্ধি হবার বিষয়। সেইলা সউগ কিছু সংশোধনের সমায় অন্দি পালন করা হয়।

১১ কিন্তুক খ্রীষ্ট আসিচে ভবিষ্যতের সউগ মংগলের বিষয়ে মহাবামন হয়। আরো মহৎ আরো ভাল তাম্বুর পরমপ্রভুর সেবা করির। এই তাম্বু মানষির হাতের বানা না হয়, মানে এই দুনিয়ার কোন জিনিস না হয়।

১২ কোনো পশুর অন্ত্ৰ নিয়া খ্রীষ্ট সেই মহাপবিত্র জাগাত সোন্দায় নাই। উয়ায় নিজের অন্ত্ৰ নিয়া একবারেই ওটেকোনা সোন্দাইচে। এই নাকান করি উয়ায় চিরকালের বাদে মুক্তির উপায় করিলেক।

১৩ আগত যায় যায় অশুদ্ধি হবার ধরছিলেক উমারলার উপরত পশুর অন্ত্ৰ বা পশুর ছোবা ছাই ছিটার নিয়ম আছিলেক, ইয়াতে উমারলার বায়রার দেহাখান খালি শুদ্ধি হইছিলেক।

১৪ কিন্তুক যীশু পবিত্র আত্মার মইন্ধো দিয়া পরমপ্রভুরটে নিজক নিখুঁতিয়ার নাকান করি সঁপে দিলেক, উয়ার অন্ত্ৰ হামারলার

বিবেকক মরণের কাম থাকি আরো কত না বেশী করি শুদ্ধি করিবে, যাতে হামরা জীবন্ত পরমপ্রভুর সেবা করির পারি!

১৫ এই বাদে খ্রীষ্ট একটা নয়া চুক্তি করিয়া ঘটকের কাম করিলেক। পরমপ্রভু যাক যাক ড্যেকেয়া চিরকালের অধিকার দিবার কিরা কাটিচে, উমরা যাতে সেইটা পায় এই অধিকার পাওয়া মানষিলার পক্ষে এইটা সম্ভব হইচে, কেনেনা পইলা চুক্তির সমায় মানষি যেইলা পাপ করিচে সেইলা পাপের হাত থাকি মুক্ত করির বাদে দাম হিসাবে খ্রীষ্ট নিজের পরান দিচে।

১৬ চুক্তির দানপত্র কামত নাগের বাদে যায় দানপত্র করিচে, উয়ায় যে মরিচে সেইটা প্রমাণ করা দরকার।

১৭ কেনেনা মানষি মরার পাছত দানপত্র কামত নাগা যায়, যায় দানপত্র করিচে উয়ায় বত্তি থাকিতে সেই দানপত্র কামত নাগা যায় না।

১৮ ঠিক একে নাকান করি পইলা চুক্তিটাও অত্ত্র ছাড়া কামত নাগা হয় নাই।

১৯ পতিটা মানষিরটে বিধানের পতিটা আদেশ ঘোষনা করার পাছত মহাপুরুষ মোশিও অত্ত্র ব্যবহার করিচে। উয়ায় পশুর অত্ত্রের নগত জল মিশিয়া নাল রং এর ভেড়ার লোম আর সুগন্ধওয়ালা লতা দিয়া বিধানের বই এর উপরত আরো মানষিলার উপরত ছিটিয়া দিলেক।



২০ এইলা করির সমায় উয়ায় কইচিলেক, “এই সেই চুক্তির অক্ত, যেই চুক্তি অনুসারে কাম করির পরমপ্রভু তোমারলাক নিশ্চয়তা দিচে।”

২১ তাম্বু আর সেবা কামত ব্যবহার করিবার সউগ জিনিসের উপরত মোশি একে নাকান করি অক্ত ছিটাইচে।

২২ মোশির বিধান মতে পেরায় পতিটা জিনিস অক্ত দিয়া শুদ্ধি করা হয় আর অক্তপাত না হইলে পাপের ক্ষমা হয় না।

২৩ যেইলা স্বর্গের জিনিসের নকল মাত্র সেইলা পশু সঁপে দিয়া শুদ্ধি করির দরকার আছিলেক। কিন্তুক যেইলা আসলেই স্বর্গের জিনিস সেইলা শুদ্ধি করিবার বাদে আরো যজ্ঞ করিয়া মহান করি সঁপে দিবার দরকার।

২৪ তাম্বুর ওই পইলা পবিত্র জাগাটা মানষির হাতে বানা। খ্রীষ্ট ওটে সোন্দায় নাই, হাতের বানা পবিত্র জাগাটা সচাং পবিত্র জাগাটার খালি একটা নমুনা। বরং উয়ায় স্বর্গত সোন্দাইচে যাতে উয়ায় হামারলার হয় পরমপ্রভুরটে থাকে।

২৫ সউগ মহাবামন পশুর অক্ত নিয়া যেই নাকান পতি বছর মহাপবিত্র জাগাত সোন্দায় কিন্তুক খ্রীষ্ট বার বার নিজক সঁপে দিবার বাদে স্বর্গত সোন্দায় নাই, খালি একবার সোন্দাইচে।

২৬ সেইটায় যদি করির নাগে তাইলে দুনিয়া সিজ্ঞনের সমায় থাকি শুরু করিয়া মেলাবার কষ্ট ভোগ করি মরির নাগিলেক হয়।

কিন্তুক এলায় সউগ যুগের শেষত উয়ায় একবারেই নিকলিচে, যাতে নিজক সঁপে দিয়া উয়ায় পাপ দূর করির পারে।

২৭ পরমপ্রভু ঠিক করি খুইচে যে, পতিটা মানষি একবারে মরিবে, তার পাছত উয়ার বিচার হবে।

২৮ ঠিক একে নাকান করি মেলা মানষির পাপের বোঝা উবিবার বাদে খ্রীষ্টক একবারে সঁপে দেওয়া হইচে। উয়ায় দ্বিতীয় বার আসিবে, কিন্তুক সেলা পাপের বাদে মরির আসিবে না বরং যায় যায় উয়ার বাদে আত্মহ নিয়া বাচ্ছে আছে, উমারলাক মুক্তি করির আসিবে।

১০ মোশির বিধানের মইন্ধোত যেইলা আছে সেইলা ভবিষ্যতের সউগ মংগলের বিষয়ের অনেকটা ছায়ার মতন, উয়াত সত্যিকারের মহান বিষয়লা নাই। এই বাদে ভগবানের যায় যায় আরাধনা করির আইসে উমরা বছরের পর বছর একে নাকান করি পশু সঁপে দেয় কিন্তুক সেই বিধান মানষিক শুদ্ধি করির পারে না।

২ আরাধনাকারীলা যদি একেবারে শুদ্ধি হবার পারিলেক হয় তাইলে পাপের বাদে আর নিজক দোষী মনে না করিলেক হয়। বিধান যদি উমারলাক পুরাপুরি শুদ্ধি করির পারিলেক হয় তাইলে পশু সঁপে দেওয়া বন্ধ হয়। গেইলেক হয়।

৩ কিন্তুক এই পশু সঁপে দেওয়া পতি বছরই নিজেরলার পাপের কতা ফম করেয়া দেয়।

৪ কেনেনা পশুর অক্ক কোন দিনও পাপ দূর করির পারে না।

৫ এই বাদে যীশু খ্রীষ্ট এই দুনিয়াত আসিবার সমায় পরমপ্রভুক কইচিলেক, “পশু আর অইন্য কোন যজ্ঞ তুই চাইস না, কিন্তুক তুই মোর বাদে একটা দেহা বানাইচিস সঁপে দিবার বাদে।

৬ তুই তো হোম যজ্ঞ আর পাপের জইন্যে পশু সঁপে দিলে খুশি না হইস।

৭ তার পাছত মুই কইচুং, ‘এই যে, মুই আসচুং, শাস্ত্রত মোর আইসার বিষয় নেখা আছে, হে পরমপ্রভু, তোর ইচ্ছা মুই পালন করির আসচুং।’”

৮ উপরের কতালা পইলাতে খ্রীষ্ট কইচিলেক, “পশু বলি আর অইন্য কিছু সঁপে দেওয়া, হোম আর পাপের জইন্যে বলি দিলে তুই খুশি না হইস।” যদিও এই যজ্ঞলা নিয়ম কানুন আদেশ মতয় করা হইছিলেক তাণ্ডো উয়ায় এই কতা কইচে।

৯ তার পাছত যীশু কইচে, “দেখেক মুই তোর ইচ্ছা পালন করির আসচুং।” উয়ায় দ্বিতীয়া চুক্তিটা চালু করিবার জইন্যে আগের চুক্তিটা বাতিল করিচে।

১০ পরমপ্রভুর ইচ্ছা মতন যীশু খ্রীষ্টের দেহা একবারেই সঁপে দিয়া, উয়ার উদ্দেশ্যে হামারলাক পবিত্র করা হইচে।

১১ পতিটা বামন পতিদিন খাড়া থাকিয়া ভগবানের সেবা করে আর বার বার একে নাকান করি সঁপে দেয়, কিন্তুক এই নাকান সঁপে দিয়া পাপ থাকি মুক্তি পাওয়া যায় না।

১২ যীশু কিন্তুক চিরকালের বাদে একবারে নিজক মানষির পাপের বাদে সঁপে দিয়া পরমপ্রভুর ডাইন পাকে বসিলেক।

১৩ আর সেলো থাকি যত দিন না শত্রুলাক উয়ার ঠেংএর তলত থোয়া হয় ততদিন পর্যন্ত উয়ায় বাচ্ছে আছে।

১৪ কেনেনা প্রভুর উদ্দেশ্যে যাক যাক আলদা করা হইচে ঐ একটা বলিদান দিয়া উয়ায় চিরকালের বাদে উমারলাক পবিত্র করিচে।

১৫ পবিত্র আত্মা এই বিষয়ে হামারলাক সাক্ষ্য দিবার ধরচে। উয়ায় পইলাতে কইচে,

১৬ “প্রভু কইলেক, পাছত উমার বাদে একটা চুক্তি চালু করিম, সেইটা হইলেক মোর নিয়ম কানুন মুই উমারলার অন্তরত থুইম, আর সেইটা উমার মনত নেখি থুইম।”

১৭ ইয়ার পাছত উয়ায় কইচে, “মুই উমারলার পাপ আর অন্যায় কোন দিনও ফম করিম না।”

১৮ প্রভু যেহেতু পাপ আর অন্যায় ক্ষমা করে সেহেতু পাপের জইন্যে আর পশু সঁপে দিবার দরকার নাই।

১৯ ও ভাই বইনিলা, যীশুর অন্তের গুণে মহাপবিত্র জাগাত  
সোন্দের সাহস হামারলার আছে।

২০ খ্রীষ্ট হামারলার বাদে উয়ার দেহার মইন্ধো দিয়া একটা নয়া  
আর জীবন্ত ঘাটা খুলি দিচে, যেইটা হামরা পর্দার মইন্ধো দিয়া  
ভগবানের ওটেকোনা যাবার পারি।

২১ এইলা ছাড়াও হামারলার বাদে এক জন বিশেষ মহাবামন  
আছে, যার উপরত ভগবানের পরিবারের মানষিলার ভার দেওয়া  
হইচে।

২২ বিশ্বাসের মইন্ধো দিয়া হামার যে নিশ্চয়তা আইসে, আইস  
হামরা ভগবানের ওটেকোনা যাই, কেনেনা দোষী বিবেকের হাত  
থাকি হামারলাক পুরাপুরি খাটি অন্তরে অন্ত্র ছিটিয়া শুদ্ধি করা  
হইচে, আরো পরিস্কার জল দিয়া হামারলার দেহাক ধোয়া হইচে।

২৩ বিশ্বাসী হিসাবে হামার অন্তরত যে ভরসা আছে কয়া স্বীকার  
করি, আইস হামরা সেই ভরসাক শত্রু করি ধরি, কেনেনা যায়  
কিরা কাটিচে উয়ায় বিশ্বস্ত।

২৪ আরো আইসো হামরা একে অপরক উৎসাহ দেই, যাতে  
হামরা পিরিত করির আর ভাল কাম করির পারি।

২৫ কোন কোন মানষির যেমন বদ অভ্যাস আছে উমার নাকান  
করি যাতে হামরা সভা সমিতি যাওয়া বন্ধ না করি। খ্রীষ্ট আইসার  
দিন যত ঘনি আসির নাগচে ততই যাতে হামরা একে অপরক  
উৎসাহ দেই।

২৬ ভগবানের তত্ত্বজ্ঞান জানিবার পরেও যদি আমরা জানি শুনি ইচ্ছা করি পাপ করিতেই থাকি, তাইলে এই পাপের বাদে সঁপে দিবার আর কোন যজ্ঞ রবে না।

২৭ খালি রবে বিচারের বাদে যে ভয়ংকর ভয় সেইটার বাদে বাচ্ছে থাকা, তার পাছত ভগবানের শত্রুলাক দাউ দাউ করি জ্বলা অগুনের গোসার নাকান করি ছাই করিবে।

২৮ কাণ্ডো শ্রী মোশির নিয়ম না মানিলে দুই বা তিন জন সাক্ষীর সাক্ষ্য দিবার ফলে উয়াক কোন মায়া না করিয়া মারি ফেলা হইচে।

২৯ তাইলে ভাবিয়া দেখ, যায় যায় ভগবানের বেটাক ঘিন খায়, উমরা নিশ্চয় আরো বেশী শাস্তির যোগ্য হবে। কেনেনা উমরা উয়ার অন্ধে শুদ্ধি হইচে তবু ভগবানের সেই চুক্তির অঙ্কক অপবিত্র মনে করে আর যেই পবিত্র আত্মা দয়া করে সেই পবিত্র আত্মাক অপমান করির ধরচে।

৩০ এই কতা যায় কইচে উয়াক আমরা জানি, “অন্যায়ের শাস্তি দিবার অধিকার খালি মোরেই আছে, মুইয়ে উমার প্রতিফল দিম।” উয়ায় আর এক জাগাত কইচে, “প্রভুই নিজের মানষিলার প্রতি ন্যায়বিচার করিবে।”

৩১ আর জ্যান্ত ভগবানের হাতত পড়া খুব ভয়ানক ব্যাপার।

৩২ তোমরালা আগিলা দিনের কতা ফম করি দেখ, সেয়া আলো পায়া দুঃখ ভোগের দারুন কষ্টের মইদ্বোত তোমরালা থির

আছিলেন।

৩৩ কোনো কোনো দিন সগারে সামনাত তোমরালা অপমান আর অইত্যাচার সহ্য করি ঠাট্টার মানষি হয়্যা দুঃখ ভোগ করছিলেন। আর যার উপরা ঐ নাকান ব্যবহার করা হইছিলেক তোমরালা উমারলার সোদেও দুঃখ ভোগ করছিলেন।

৩৪ কেনেনা যে মানষিলা জেলত গেইচে তোমরালা উমার দুঃখে দুঃখী হইছিলেন। তোমারলার জিনিসপত্র লুটপাট হয়্যা যাওয়াতেও তোমরালা সেটা আনন্দে মানিয়া নিচেন, কেনেনা তোমরালা জানেন যে, আরো ভাল আর নিজের স্থায়ী ধন তোমারলার বাদে অপেক্ষা করি আছে।

৩৫ এই বাদে তোমরা সাহস হারান না, কেনেনা ইয়ার প্রতিফল খুব মহৎ।

৩৬ তাণ্ডা তোমারলার ধৈর্যের দরকার আছে, যেনে ভগবানের ইচ্ছা পালন করিয়া ফলবান হন।

৩৭ পবিত্র শাস্ত্রত নেখা আছে, “আর খুব কম সমায় বাকি আছে যায় আসির ধরচে, উয়ায় আসিবেই, দেড়ি করিবে না।

৩৮ আর যে মানষিটাক মুই নির্দোষ বুলিয়া মানি নিচুং, উয়ায় বিশ্বাসের মইন্ধো দিয়া বাঁচিবে। কিন্তুক কাণ্ডা যদি ফিরিয়া যায় তাইলে মুই উয়ার উপরা সন্তুষ্ট হইম না।”

৩৯ হামরা এই নাকান মানষি না হই যে, বিশ্বাস থাকি সরি যায়্যা নাশ হয়্যা যামো। কিন্তুক যায় যায় বিশ্বাস করিয়া মুক্তি পাইচে

হামরা ঐ নাকানের মানষি।

১১ বিশ্বাস কি? হামরা যেইটা পাবার আশা করির ধরটি সেইটা যে হামরা পামোয় এই নিশ্চয়তায় হইলেক বিশ্বাস। আর সেই বিশ্বাস দিয়ায় হামরা নিশ্চিত করি বুঝির পারি যে হামরা যেইটা দেখির পাই না, সেইটা আসলে আছে।

২ বিশ্বাস করির বাদে মেলো দিন আগত হামার গুষ্টির মানষিলা ভগবানের সাব্বাস পাইচে।

৩ বিশ্বাসের মইদ্বো দিয়া হামরা বুঝির পারি যে ভগবানের মুখের কতাত এই দুনিয়া সিড্জন হইচে। হামরা যেইটা দেখির পাই সেইটা কোন দেখা জিনিস থাকি গড়া হয় নাই।

৪ বিশ্বাস করিয়া শ্রী হেবেল ভগবানের উদ্দেশ্যে উয়ার ভাই কয়িনের চায়া সউগ থাকি ভাল যজ্ঞ করিলেক, আর উয়ার বিশ্বাসের বাদেই ভগবান সেইটা মানি নিলেক, উয়ার বিষয় এই সাক্ষ্য দিচে যে উয়ায় ন্যায়বান। আর উয়ায় মরিচে কিন্তুক বিশ্বাসের মইদ্বো দিয়া এলাও কতা কবার ধরচে।

৫ বিশ্বাসের কারনে শ্রী হনোক মরে নাই, উয়াক স্বর্গত তুলি নেওয়া হইচে। ভগবান হনোকক নিয়া গেইচে বুলিয়া খুজিয়া পাওয়া যায় নাই। হনোকক নিয়া যাবার আগত ভগবান এই সাক্ষ্য দিচে যে হনোক উয়াক সন্তুষ্ট করিচে।



৬ কিন্তুক বিনা বিশ্বাসে ভগবানের মনের মানষি হওয়া কাণ্ডোরো সাধ্য না হয়। বিশ্বাস ছাড়া ভগবানক সন্তুষ্ট করা অসম্ভব। কেনেনা ভগবানেরটে যায় যায় যাবার চায়, উয়াক বিশ্বাস করির নাগিবে যে, ভগবান আছে। আরো বিশ্বাস করির নাগিবে যে, যায় যায় ভগবানক খোজে উয়ায় উমারলাক পুরস্কার দিবে।

৭ বিশ্বাসে শ্রী নোহ যেইলা দেখির নাই পায় সেই বিষয়ে ভগবান নোহক সাবধান করি দিচে। নোহ ভগবান ভক্ত আছিলেক বুলিয়া ভগবানের কতা বিশ্বাস করিয়া একখান বড় নাও গড়াইচে। যাতে উয়ার পরিবার রক্ষা পায়। এই বাদে বিশ্বাসের দ্বারায় নোহ দুনিয়াক দোষী কয়া প্রমান করিচে। আর ভগবানেরটে নিজের বিশ্বাসে ন্যায়বান গন্য হইলেক।

৮ ভগবান যেলা অব্রাহামক ডেকাইলেক সেলা বিশ্বাসের বাদেই উয়ায় ভগবানের কতাত বাধ্য হইচে। আর সম্পত্তি হিসাবে যেই জাগাখান পাবার কতা আছিলেক সেই জাগাত উয়ায় গেইচে। যদিও উয়ায় বুঝির পায় নাই উয়ায় কোটে যাবার ধরচে তাণ্ডো উয়ায় যাবার ধরছিলেক।

৯ ভগবান যেই দেশ অব্রাহামক দিবার কিরা কাটিচে উয়ায় বিশ্বাসে বৈদেশীয়া হিসাবে ওটেকোনা রবার ধরছিলেক। উয়ার সোদে যায় যায় একেই কিরার আশুর্বাদের অংশিদার আছিলেক সেই ইসহাক আর যাকবের নাকান করি উয়ায়ও তাম্বুতে তাম্বুতে রবার ধরছিলেক।

১০ কেনেনা যেই গঞ্জ চিরকাল স্থায়ী রবে উয়ায় সেই গঞ্জের বাদে বাড়ে রবার ধরছিলেক। ঐ গঞ্জের ভিটি স্থাপন করাইয়া আর গড়াইয়ার কাম ভগবানেই করিচে।

১১ যদিও শ্রীমতি সারার ছাওয়া হবার বয়স পার হয় গেইচে, তাণ্ডো বিশ্বাসের বাদে উয়ায় গৰ্ভত ছাওয়া ধারন করির শক্তি পাইছিলেক। কেনেনা উয়ায় বিশ্বাস করিছিলেক যায় কিরা কাটিচে উয়ায় বিশ্বাসযোগ্য।

১২ এই বাদে খুব বয়স হওয়ার সত্ত্বেও কাহিল দেহা নিয়া অব্রাহাম দ্যাওয়ার তারার নাকান আর সাগরের বালার মত মেলা ছাওয়ার বাপ হইছিলেক।

১৩ এই মানষিলা বিশ্বাসের মইদ্বোত জীবন কাটেয়া মরি গেইচে। ভগবান উমারলাক যেইলা দিবার কিরা কাটিচে সেইলা বাস্তবে উমরা পায় নাই, কিন্তুক দূর থাকি সেইলা দেখিয়া খুশি হইছিলেক। এই দুনিয়াত উমরা যে বৈদেশীয়া আর যাযাবরের মত রবার ধরছিলেক।,

১৪ ইয়াতে বুঝা যায় উমরা নিজের একটা দেশের খোজ করির ধরচে।

১৫ যেই দেশ থাকি উমরা বাইর হয় আসচে, যদি সেই দেশের কতা চিন্তা করিলেক হয়, তাইলে উমরা ঐ দেশত ফিরি যাবার সুযোগ পাইলেক হয়।

১৬ কিন্তুক উমরা আরো একটা ভাল দেশের মানে স্বর্গীয় জাগার খোজ করির ধরছিলেন। এই বাদে ভগবান নিজক উমারলার ভগবান কবার নইজ্জা না খায়। আসলে উয়ায় উমারলার বাদে একটা গঞ্জ গড়াইচে।

১৭ অব্রাহামক যাচাই করির সমায় বিশ্বাসের বাদেই ভগবানের কতা মানিয়া, উয়ার একনায় মাত্র বেটা ইসহাকক যজ্ঞ বেদীত সঁপে দিবার ধরছিলেন।

১৮ অব্রাহাম এই কাম করিবার রাজি আছিলেন কেনো ভগবানের উপরত উয়ার বিশ্বাস আছিলেন, যদিও ভগবান অব্রাহামক আগতে কয়া খুইচে যে, “ইসহাকের গুষ্ঠিক তোর গুষ্ঠি কয়া ধরা হবে।”

১৯ অব্রাহাম ইসহাকক সঁপে দিবার রাজি হইচে, কেনো উয়ায় বিশ্বাস করছিলেন যে, ভগবান মরা মানষিক বত্তের পারে। আর ভগবান অব্রাহামক উয়ার বেটাক বলি দিবার মানা করি দিলেক, ইয়ার ফলে অব্রাহাম উয়ার বেটাক উদাহরনের নাকান মরণের হাত থাকি ফিরি পাইলেক।

২০ বিশ্বাসের কারনে শ্রী ইসহাক ভবিষ্যতের বাদে উয়ার বেটালক যাকব আর এষৌক আশুর্বাদ করিচে।

২১ বিশ্বাসের কারনে যাকব মরি যাবার সমায় যোষেফের দুই বেটাক আশুর্বাদ করিছিলেন আর নাটির উপরত ভর দিয়া ভগবানের উপাসনা করিচে।

২২ বিশ্বাসের কারনে যোষেফ মরি যাবার সমায় মিশর দেশ থাকি ইজ্রায়েলীলাক চলি যাবার কইচে। উয়ার মরাদেহা কি করির নাগিবে সেইটাও কইচে।

২৩ বিশ্বাসের কারনে মোশির জন্মের পাছত উয়ার বাপ-মাও তিন মাস উয়াক নুকিয়া থুইচে, কেনেনা উমরা দেখছিলেক বেটাটা সুন্দর আর উমরা মহারাজার হুকুমের ভয় খাইলেক না।

২৪ বিশ্বাসের কারনে মোশি যেলা গাবুর হইলেক সেলা নিজক মহারাজা ফরৌণের বেটির বেটা বুলিয়া পরিচয় দিবার চাইলেক না।

২৫ মোশি পাপের সুখভোগ করির চাইলেক না কেনেনা সেই সুখভোগ আছিলেক ক্ষণিকের। উয়ায় ভগবানের মানষিলার নগত অইত্যাচার ভোগ করির জীবন বাছাই করি নিলেক।

২৬ উয়ায় মিশরের ধন-সম্পত্তির চায়া খ্রীষ্টের বাদে বদনাম সহ্য করা ভাল মনে করিলেক, কেনেনা উয়ার নজর আছিলেক পুরস্কারের পাকে।

২৭ ভগবানের উপরত বিশ্বাসের বাদেই উয়ায় মহারাজার রাগের উপর ভয় না করিয়া মিশর দেশ ছাড়িলেক। কেনেনা যাক দেখা না যায় উয়াক যেনে দেখির পাবার ধরচে, এই নাকান করি ধৈর্য ধরি রইলেক।

২৮ উয়ায় বিশ্বাস করিয়ায় মুক্তি পার্বন আর অত্র ছিটার নিয়ম পালন করিলেক। যাতে ধবংসকারী স্বর্গদূত ইজ্রায়েলীলার পইলা

ছাওয়ালাক মারি না ফ্যেলায়।

২৯ বিশ্বাস করিয়ায় ইজ্রায়েলীলা শুকান মাটির উপরা দিয়া হাটি  
যাবার নাকান করি নাল সাগর পার হইছিলেক। কিন্তুক  
মিশরীয়লা সেই নাকান করির যায়া জলত ডুবি মরি গেইলেক।

৩০ বিশ্বাস করিয়ায় ইজ্রায়েলীলা যিরীহো গঞ্জের দেওয়ালের  
চাইরো পাকে সাত দিন ঘুরির পাছত দেওয়াললা পড়ি গেইচে।

৩১ রাহব বেশ্যা যিরীহো গঞ্জত বসবাসকারী ভগবানের অবাধ্য  
মানষিলার সোদে নাশ নাই হয়। কেনেনা বিশ্বাসে উয়ায়  
গুপ্তচরলাক সখার নাকান মানি নিচে।

৩২ ইয়ার চায়া বেশী আর মুই কি কইম? গিদিয়োন, বারাক,  
শিম্শোন, যিপ্তহ, দায়ূদ, শমূয়েল আর সউগ ভাববাদীলার বিষয়ে  
কতা কবার সমায় মোর নাই।

৩৩ বিশ্বাসেই উমরা রাজ্য জয় করিছিলেক, ন্যায় বিচার  
করিছিলেক, নানা নাকানের কিরাকাটার ফল পাইলেক, সিংহের  
মুখ বন্ধ করিলেক,

৩৪ অগুনের দারুন তেজ কমে দিছিলেক, ছোরার গুতা থাকি  
বাঁচি গেইচে, কাহিল হয়্যাও বলবান হইছিলেক, যুদ্ধত শক্তি  
দেখাইছিলেক আর বৈদেশীয়া সেনালাক খ্যেদেয়া দিছিলেক।

৩৫ বেটিছাওয়ালা উমার নিজের নিজের মরা মানষিলাক আরো  
বত্তায় ফিরি পাইলেক, অইন্য মানষিলা নিজের ইচ্ছায় জেল থাকি

খালাস না হয়। অইত্যাচার ভোগ করিলেক, যাতে উমরা মরণ  
থাকি ফির বত্তি উঠি আরো ভাল জীবন পায়।

৩৬ আরো অইন্য মানষিলা তামশা, টিটকারি আর দারুন  
মারপিট এমন কি হাতত শিকল পিন্দিলাক, আরো জেল  
খাটিলেক।

৩৭ মানষিলা উমরলাক শিল দিয়া ঢেলাইলেক, কাণ্ডো কাণ্ডোক  
করাত দিয়া দুই টুকরা করা হইলেক, কাণ্ডো কাণ্ডোক ছোরা দিয়া  
মারি ফেলা হইলেক। উমরলার উপরত অইত্যাচার আরো বেয়া  
ব্যবহার করা হইলেক। কাণ্ডো কাণ্ডো অভাবত পরিয়া ভেড়া আর  
ছাগলের চামড়া পিন্দিয়া ঘুরি বেড়ের নাগিলেক।

৩৮ উমরা নিধুয়া পাথারে নিধুয়া পাথারে, পাহাড়ে পাহাড়ে, গুহায়  
গুহায়, আর মাটির খালত নুকিয়া পালে বেড়ের নাগিলেক। এই  
দুনিয়া উমরলার যোগ্য আছিলেক না।

৩৯ বিশ্বাসের বাদে উমরা সগার গুণগান পাইলেক, কিন্তুক  
ভগবান যেইটা দিবার কিরা কাটিচে সেইটা উমরা পায় নাই।

৪০ কেনেনা ভগবান হামারলার বাদে আরো ভালো জিনিস ঠিক  
করি থুইচে, যাতে হামারলাক বাদ দিয়া উমরালা খাটি হবার না  
পারে।

১২ তাইলে হামরা দেখি, ভগবানের পতি বিশ্বস্ততার সাক্ষী  
হিসাবে মেলা আগের কালের মানষি হামারলার চাইরো পাকে

ভিড় করি আছে। এই বাদে আইস, হামরা সউগ নাকানের বাধা আর যেইলা পাপ সহজে হামারলাক জড়ে ধরে, সেইলাক দূরত সারে থুইয়া সামনার প্রতিযোগিতার দৌড়ত ধৈর্য ধরি দৌড়াই।

২ আর আইস, হামরা বিশ্বাসের আদিকর্তা আর সিদ্ধিকর্তা যীশুর উপরা দৃষ্টি রাখি। উয়ার সামনা যে আনন্দ থোয়া হইচে সেই বাদে উয়ায় অপমানক তুচ্ছ মনে করিয়া ক্রুশের মরণ সহ্য করিলেক আর এলা ভগবানের সিংহাসনের ডাইন পাকে বসিয়া আছে।

৩ যীশু পাপীলার এত বড় শত্রুয়ামি সহ্য করিলেক, তোমরা উয়ার বিষয় চিন্তা কর, যাতে তোমারলার মন দুর্বল আর নিরাশ হয় না পরে।

৪ পাপের বিরুদ্ধে নড়াই করিতে করিতে এলাও তো তোমারলার অন্ত্রপাত হয় নাই।

৫ তোমরালা ভগবানের দেওয়া আশ্বাস ফম হারেয়া ফেলাইচেন না কি? উয়ায় ছাওয়ার মত তোমারলার সোদে কতা কইচে, “মোর ছাওয়ালা, প্রভুর শাসন তুচ্ছ না করেন, আর উয়ায় যেলা ধমক দেয়, সেলা নিরাশা না হন।

৬ কেনেনা প্রভু যাক পিরিত করে, উয়াকে শাসন করে। ছাওয়া হিসাবে যাক মানি নেয়, উমারলাক সগাকে শাস্তিও দেয়।”

৭ তোমরা এই কষ্টলা শাসন হিসাবে ভোগ করির ধরচেন। ভগবান তোমারলার পতি বাপের নাকান ব্যবহার করির ধরচে। এমন ছাওয়া কাণ্ডো আছে কি, যে বাপ বেটাক শাসন করে না?

৮ সউগ ছাওয়াকে শাসন করা হয়। তোমারলাক যদি শাসন করা না হয় তাইলে তো তোমরা জারুয়া ছাওয়া, উয়ার আসল ছাওয়া না হন।

৯ হামরা দেখিচি, এই দুনিয়ার বাপ-মাও হামারলাক শাসন করিচিলেক আর উমারলাক হামরা সন্মান করছিলং। তাইলে যায় হামারলার আত্মিক বাপ উয়ার অধীনত থাকা কি হামার উচিত না হয়, যাতে হামরা অমৃত জীবন পাই?

১০ হামার দুনিয়ার বাপ-মাওলা ভাল মনে করিয়া হামারলাক শাসন করে, আর সেইটা অল্প দিনের বাদে; কিন্তুক মংগলের বাদে ভগবান হামারলাক শাসন করে যাতে হামরা উয়ার পবিত্রতার ভাগীদার হই।

১১ যেই সময় কাণ্ডোকে শাসন করা হয়, সেলো উয়াক ভাল নাগে না, কিন্তুক শেখার পাছত যেলো অভ্যাসে পরিনত হয়, সেলো উয়ার ফল হবে ন্যায় আর শান্তির জীবন।

১২ এই বাদে তোমারলার দুর্বল হাত আর কমজোর হাটুয়া শক্তিশালী কর;

১৩ আর তোমারলার চলির ঘাটা সোজা কর, যাতে খোড়া মানষির অবস্থা আরো বেয়া না হয়, বরং উয়ায় সুস্থ হয়।

১৪ সউগ মানষির সোদে শান্তিতে থাকির চেষ্টা কর, পবিত্র হবার হাউস কর। পবিত্র না হইলে কাণ্ডো প্রভুক দেখির পাবে না।



১৫ দেখ, যাতে কাণ্ডো ভগবানের আশুর্বাদ থাকি বাদ না পরে।  
দেখেন তোমারলার মইন্ধো থাকি কাণ্ডো যাতে বিষওয়ালা তিতা  
গছের শিপার নাকান করি গাজে না ওঠে। তোমারলার মইন্ধোত  
এমন মানষি থাকিলে গোটায় দলটাক নষ্ট করিবে।

১৬ কাণ্ডো যাতে ব্যভিচারী আর নীতিহীন না হয়, যেই নাকান  
এষৌ এক বেলার খাবারের বাদে বড় বেটার অধিকার বেচে দিচে।

১৭ তোমরা জানেন পাছত উয়ায় বাপের আশুর্বাদ কান্দি কান্দি  
ফিরি পাবার চেষ্টা করিয়াও পায় নাই। উয়ার বাপ আশুর্বাদ দিবার  
রাজি নাই হয়। কেনেনা উয়ায় ভুলের ঘাটা থাকি মন ফিরিবার  
সুযোগ পায় নাই।

১৮ ফম থোন, মোশি ভগবানক দেখির সমায় সিনাই পাহাড় এই  
নাকান আছিলেক জ্বলন্ত অগুন, ঘুটঘুটা আন্ধার আর হুড়কা।

১৯ আরো শোনা গেইলেক শিংগার আওয়াজ আর এই নাকান  
কতার আওয়াজ যেইলা শুনিয়া উমরা মিনতি করি কবার  
ধরছিলেক, যাতে উমারটে এই নাকান কতা আর কওয়া না হয়।

২০ উমারলাক কওয়া হইলেক, “কোন পশুও যদি সেই পাহাড়ত  
যায় তাইলে উয়াক শিল দিয়া মারি ফ্যেলা হবে,” এই হুকুম উমরা  
সহ্য করির পায় নাই।

২১ আর যেইলা দেখছিলেক, সেইলা এত ভয়ঙ্কর আছিলেক যে,  
এমনকি মোশিও কইলেক, “মুই ভয়ে কাপির ধরচিলুং।” তোমরা  
তো এই নাকান পাহাড়ত আইসেন নাই।

২২ কিন্তুক তোমরালা তো সিয়োন পাহাড় আর বত্তা ভগবানের গঞ্জত আসচেন। এই গঞ্জ হইলেক স্বর্গের যিরুশালেম। সেটেকোনা হাজার হাজার স্বর্গদূতলার আনন্দ উৎসবের এটে আসচেন,

২৩ আর বাপের অধিকার পাওয়া ছাওয়া হিসাবে যার যার নাম স্বর্গত নেখা আছে, উমারলার দিয়া গড়া সমিতিরটে আসচেন। যায় সউগ মানষির বিচারক তোমরালা ঐ ভগবানেরটে আসচেন। যায় সউগ মানষিলাক খাটি করিচে সেই দোষ মুক্ত আত্মালারটে তোমরা আসচেন।

২৪ যায় নয়া চুক্তির ঘটক ঐ যীশুরটে আসচেন আরো হেবেলের অক্তের চায়া যে অক্ত আরো মহৎ কতা কয়, তোমরা সেই ছিটা অক্তেরটে আসচেন।

২৫ সাবধান! যায় কতা কইচে উয়ার কতা অমান্য না করেন। মোশি ভগবানের সাবধান বাণী এই দুনিয়াত জানেবার পাছত মানষিলা উয়ার কতা অমান্য করিচে, উমরা রেহাই নাই পায়। সেলো যায় স্বর্গ থাকি সাবধান করিচে উয়ার কতা অমান্য করিলে হামরা কিছুতেই রেহাই পামু না।

২৬ ঐ সমায় ভগবানের মুখের কতায় এই দুনিয়াটা কাপির ধরছিলেক। কিন্তুক উয়ায় এলা এই কিরা কাটিচে, “মুই খালি আর একবার দুনিয়াটাক কাপাইম তা কিন্তুক না হয়, দ্যাওয়াকো কাপাইম।”

২৭ “আরো একবার,” এই কথা থাকি বুঝা যাবার ধরচে, যে জিনিসলাক কাপা যায়, মানে যেইটা সিদ্ধন করা হইচে সেইটা বাদ দেওয়া হইবে, আর যেই জিনিসলা কাপা যায় না সেইলা স্থির থাকে।

২৮ এই বাদে যেই রাজ্যক কাপা না যায় হামরা সেই রাজ্য পাবার ধরচি। তাইলে আইসো হামরা ভগবানেরটে কৃতজ্ঞ। ভগবান যেই নাকান করি খুশি হয় সেই নাকান করি হামরা ভক্তি আর ভয়ের সোদে উয়ার সেবা করির পারি।

২৯ হামার ভগবান ধ্বংসকারী অগুনের নাকান।

১৩ তোমরা একে অপরক ভাইয়ের মত পিরিত করো।

২ সাগাই সোদোরক আদর যতন করির ভুলি না যান। কাণ্ডো কাণ্ডো না জানিয়া এই নাকান করি স্বর্গদূতলারও আদর যতন করিচে।

৩ যায় যায় জেলত আছে উমারলাক ফম করিয়া তোমরাও নিজক বন্দী মনে কর। আর যার যার উপরাত অইত্যাচার হবার ধরচে উমারলার কষ্ট নিজের কষ্ট মনে কর।

৪ সগায় বিয়ার বিষয়টাক সন্মানের চোখে দেখ। সোয়ামি আর মাইয়ার মইন্ধোত বিয়ার সমন্ধ পবিত্র থোয়া উচিত। কেনেনা যেই নাকানের ব্যভিচার হউক না কেনে, যায় যায় দোষী ভগবান উমারলাক শাস্তি দিবে।

৫ টাকা-পাইসার লোভ থাকি নিজেরলাক দূরত থোন, ভগবান কইচে, “মুই তোক কোন দিন ছাড়ি না যাইম, ত্যাগ না করিম।”

৬ এই বাদে হামরা সাহস করি কবার পারি, প্রভু মোর সাহায্যকারী, মুই ভয় না খাইম, মানষি মোর কি করির পারে?

৭ যায় যায় তোমারলারটে ভগবানের বাইক্য কইচে, তোমরালা ঐ দেওয়ানীলার কতা মনত থোন। উমারলার জীবনের শেষ ফলের কতা ভালো করি চিন্তা কর আর উমারলার নাকান করি তোমরাও বিশ্বাস কর।

৮ যীশু খ্রীষ্ট কালি যেমন আছিলেক, আজিও তেমনি আছে আর চিরকাল তেমনি থাকিবে।

৯ নানা নাকানের নয়া নয়া শিক্ষা যাতে তোমারলাক ভুল ঘাটাত নিয়া না যায়। অন্তরক ভগবানের আশুর্বাদে বলবান করি তুলো, বিশেষ বিশেষ খাওয়ার নিয়ম কানুনের উপরত যাতে না থাকে। যায় যায় সেই খাবারের উপরত নির্ভর করিচে উমার কোন লাভ হয় নাই।

১০ হামারলার এই নাকান একটা বেদী আছে, যেই বেদীর উপরাত সপে দেওয়া কোন কিছু উপাসনা তাম্বুর বামনলার খাবার অধিকার নাই।

১১ পাপের বাদে সঁপে দেওয়া পশুর অক্ল নিয়া ইজ্রায়েলীলার মহাবামন মহাপবিত্র জাগাত যায়। কিন্তুক সেই পশুলার দেহা

ইজ্রয়েলীলার থাকিবার এলাকার বায়রাত নিয়া যায় ছোবা দেওয়া হয়।

১২ একে নাকান করি যীশুও যিরুশালেম গঞ্জের বায়রাত কষ্ট ভোগ করি মরিচে, যাতে উয়ার নিজের অকৃত দিয়া মানষিলাক পাপ থাকি শুদ্ধি করির পারে।

১৩ এই বাদে আইসো, হামরালায় উয়ার অসন্মান নিয়া গঞ্জের বায়রাত উয়ারটে যাই।

১৪ কেনেনা এটেকোনা হামারলার কোন চিরকালের স্থায়ী গঞ্জ নাই, কিন্তুক যেই গঞ্জটা এক দিন আসিবে হামরা সেই গঞ্জটায় খুজির ধরচি।

১৫ এই বাদে খ্রীষ্টের মইদ্বো দিয়া হামরা সউগ সমায় ভগবানের উদ্দেশ্যে প্রার্থনা করি। মানে ভগবানের মানষিলা যায় যায় নিজক স্বীকার করে উমরা উমার মুখ দিয়া ভগবানের গুণগান করুক।

১৬ সৎ কাম করির আর অপরক সাহায্য করির ভুলি না যান, কেনেনা ভগবান এই নাকানের যজ্ঞত খুশি হয়।

১৭ তোমারলার দেওয়ানীলার কতা মানিয়া চল আর উমারলার বাধ্য হয় চল। কেনেনা যায় যায় ভগবানেরটে হিসাব দিবে ঐ নাকান মানষি হিসাবেই তো উমরা দেখাশুনা করে। উমারলার বাধ্য হন যাতে উমরালা উমার কাম আনন্দের সোদে করির পারে দুঃখের সোদে না হয়। যদি দুঃখের সোদে করির নাগে তাইলে তোমারলার কোন লাভ হবার না হয়।

১৮ হামারলার বাদে প্রার্থনা কর, সউগ বিষয়ে হামরা সৎ হয়। চলির চাই। হামরা জানি হামার বিবেক পরিস্কার।

১৯ কিন্তুক মুই তোমারলাক বিশেষ করি প্রার্থনা করির অনুরোধ করির ধরচুং। যাতে মুই পচপচে তোমারলার সোদে একটে দেখা করির পাং।

২০ শান্তিদাতা ভগবান মরণ থাকি বন্তে তুলিচে যীশুক, উয়ায় হামারলার প্রভু আর মহান রাখোয়াল আর হামরা উয়ার ভেড়ার পাল। উয়ার অক্ল দিয়া ভগবান হামারলার সোদে চিরকালের চুক্তি চালু করিচে।

২১ সউগ নাকানের ভাল চালচলন দিয়া ভগবান উয়ার ইচ্ছাত চলির তোমারলাক পুরাপুরি গড়ে তুলুক। উয়ার চখুত যেইটা ভাল যীশু খ্রীষ্টের মইদ্রো দিয়া হামারলার অন্তরত উয়ায় সেইটায় করুক। চিরকাল ভগবানের মহিমা হউক। আমেন।

২২ ও ভাই বইনিলা, তোমারলারটে মোর বিশেষ অনুরোধ এই যে, মোর উপদেশের কতা তোমরা মানিয়া নেও। মুই তো তোমারলারটে বেশী কিছু নেখং নাই।

২৩ মুই তোমারলাক জানের চাং যে, হামারলার ভাই তীমথিয় জেল থাকি ছাড়া পাইচে। উয়ায় যদি পচপচে আইসে তাইলে মুই উয়াক সাথত নিয়া তোমারলাক দেখির যাইম।

২৪ তোমারলার সউগ দেওয়ানীলাক আর ভগবানের মানষিলাক মঙ্গল কামনা জানান। ইতালী দেশের মানষিলা তোমারলাক মঙ্গল

কামনা জানের ধরচে।

২৫ তোমারলার সগারে উপরত ভগবানের দয়া থাকুক॥

## যাকব

১ মুই যাকব, ভগবান আর প্রভু যীশুর এক জন চাকর। দুনিয়াত নানান দেশত ছড়াছড়ি হয়। থাকা বারোটা গোষ্ঠীর যিহুদী জাতির শিষ্যলোক পিরিত জানাং।

২ হে মোর ভাই বইনিলা, তোমরা যেহেলা নানা নাকান পরীক্ষাত পরেন, সেহেলা আনন্দের বিষয় মানি নেন।

৩ কারন তোমরা জানেন তোমার বিশ্বস্ততার পরীক্ষা করিয়া তোমারলার ধৈর্যগুণ বাড়েয়া দেয়।

৪ এই বাদে সেই ধৈর্য গুণক ভাল করি তোমারলার জীবনত কাম করির দেও। যাতে তোমরা পাকা আর নিখুঁত হবার পান, তাতে তোমারলার জীবনত কোনো নাকান অভাব থাকিবে না।

৫ তোমারলার মইন্ধে যদি কাণোরো জ্ঞানের অভাব থাকে, তাইলে উয়ায় যেনে ভগবানেরটে চায়, আর ভগবান উয়াক দিবে, কেনেনা ভগবান বিরক্ত হয় না, সগাকে মেহেলা দান করে।

৬ কিন্তু কোনো সন্দেহ না করি বিশ্বাস সহকারে চাবার নাগিবে, কেনেনা যায় সন্দেহ করে, তায় বাতাসোত দুলি ওঠা সাগরের ঢেউয়ের নাকান; বাতাসে উয়াক ঠেলি নিয়া যায়।

৭ এই নাকানের মানষি যেন আশা না করে যে, উয়ায় প্রভুরটে থাকি কিছু পাবে।



৮ উয়ায় দোমনা মানষি আর উয়ার সউগ কামতে অস্থির।

৯ যে গুরুভাই গরীব, ভগবান উয়াক আত্মিক দিক দিয়া উচা করিচে বুলিয়া উয়ায় নিজক ধন্য মনে করুক।

১০ কেনেনা যায় ধনী, ভগবান উয়াক নত-নম্র করিচে বুলিয়া উয়ায়ও নিজক ধন্য মনে করুক, কেনেনা ধনীলা ফুলের নাকান করি ঝরি পড়িবে।

১১ বেলা উঠার পাছত রৌদের ঝালাত ঘাস শুকি যায়, ফুললাও ঝরি পড়ে আর উয়ার ঢকও নষ্ট হয়। একে নাকান করি ধনী মানষিও উয়ার জীবনের ব্যস্ততার মধ্য দিয়ায় শেষ হয়।

১২ পরীক্ষার সময় যায় ধৈর্য ধরে তায় আশুর্বাদ পাওয়া, কেনেনা উয়ায় যোগ্য প্রমাণ হইলে জয়ের মালা হিসাবে জীবন পাবে। ভগবানোক যায় যায় ভালবাসে উমাক এই জীবন দিবার প্রতিজ্ঞা করিচে।

১৩ কারো অন্তর পাপের পাকে টানের বোধ করিলে কাণ্ডো যাতে না কয় ভগবান উয়াক পাপের পাকে টানির ধরচে। কোন বেয়া কামনা ভগবানক পাপের পাকে টানির পারে না। আর ভগবান কাণ্ডোক পাপের পাকে টানে না।

১৪ কিন্তু মানষিক নিজের অন্তরের কামনা-বাসনা পাপত টানি নিয়া যায় আর ফান্দোত পরে।

১৫ তার পাছত কামনা-বাসনত ভরপুর হয়। পাপের জন্ম হয়। আর পাপে ভক্তি হবার পাছত মরণ আইসে।

১৬ মোর আদরের ভাই বইনিলা, তোমরা নিজক ঠকান না।

১৭ জীবনের সউগ ভাল আর নিখুঁত দান স্বর্গ হাতে নামি আইসে  
আর সেইটা আইসে ভগবানেরটে থাকি, উয়ায় স্বর্গের আলো  
সিদ্ধন করিচে, উয়ায় ছায়ার নাকান বদলি যায় না।

১৮ উয়ার নিজের ইচ্ছায় সচাং কতার মইন্ধো দিয়া উয়ায়  
হামারলাক উয়ার ছাওয়া বানাইচে, যেন উয়ার বানা জিনিসের  
মইন্ধোত হামরালা এক পইলা ফলের নাকান উয়ার চখুত শ্রেষ্ঠ।

১৯ মোর আদরের ভাই বইনিলা, মোর এই কতাটা শোন,  
তোমরালা সগায় শুনিবার বাদে আগ্রহ হন, কিন্তু তোমরালা  
পচপচ করি কতা না কন আর চট করি রাগ না হন।

২০ কেনেনা ভগবান হামারলারটে থাকি যে পবিত্র জীবন আশা  
করে, সেইটা রাগের মইন্ধো দিয়া আইসে না।

২১ এই বাদে তোমারলার জীবন থাকি সউগ নাকানের অপবিত্র  
আর বেয়া জিনিস তোমারলার চাইরো পাকে আছে, সেইলাক দূর  
কর; আর ভগবানের বাইক্যের বিচন তোমারলার অন্তরত গাড়া  
হইচে, সেইটা নত-নম্র হয়া মানি নেও। পাপ থাকি মুক্তি দিবার  
ক্ষমতা এই বাইক্যের আছে।

২২ খালি ভগবানের বাইক্য শুনিলেই হবে না, ঠিক নাকান কাম  
করি দেখের নাগিবে। যদি তোমরালা খালি ভগবানের বাইক্য  
শুনেন আর সেই মতন কাম না করেন, তাইলে তোমরালা নিজেই  
নিজক ঠকের ধরচেন।

২৩-২৪ যায় খালি সেই বাইক্য শোনে আর সেই নাকান কাম না করে, উয়ায় এমন মানষির নাকান, যায় আয়নাত নিজের মুখ দেখি চলি যায় আর সেলোয় সেলোয় ভুলি যায়।

২৫ কিন্তু সেই মানষি আসল সুখী যায় বিধির বিধান মানে, যেইলা মানষিরটে মুক্তি নিয়া আইসে সেইলাত ভাল করি মন দেয় আর শোনে সেইলা ভুলিও না যায়, এইলা বাধ্যতায় উয়াক সুখী করি তোলে।

২৬ কাণ্ডো যদি নিজক ধার্মিক মনে করে আর নিজের জিবাক না সামলায় তাইলে উয়ায় নিজক ঠকায়। উয়ার সউগ ধর্ম-কর্ম বেকার।

২৭ বিধুয়া আর অনাথলার দুঃখ-কষ্টর সমায় উমারলার দেখাশুনা করা আর দুনিয়ার সউগ নাকানের নোংরামি থাকি নিজক দূরত থোয়ায় হইলেক হামার স্বর্গের বাপ ভগবানের চোখুত খাটি আর সচাং ধর্ম।

২ মোর আদরের ভাই-বইনিলা, তোমরালা হামারলার মহিমাময় প্রভু যীশু খ্রীষ্টের উপরা বিশ্বাস করেন, এই বাদে তোমরালা সগাকে সমান নজরে দেখ।

২ মনে কর, এক জন মানষি ভাল কাপড়-চোপড়, সোনার আংটি পিন্দি সমিতির সভাত আসিলেক; আর এক জন গরীব মানষিও মইলা কাপড়-চোপড় পিন্দি আসিলেক।

৩ সেলো তোমরা যদি ওই ভাল কাপড়-চোপড় পেন্দা মানষিটাক বেশী সন্মান দেখেয়া কন, “তোমরা এই ভাল জাগাত বইসো,” আর ওই গরীব মানষিটাক কন, “তোমরা ওটেকোনা খাড়া হয়়া রন” বা “এটে মোর ঠেংএর বগলোত আসি বইসো,”

৪ তাইলে তোমরা কি নিজের মইদ্বোত ছোট-বড় ভেদাভেদ তৈয়ারি করির ধরচেন না? আর বেয়া উদ্দেশ্য নিয়া বিচার করির নাগচেন না?

৫ মোর আদরের ভাই আর বইনিলা, শোনো। এই দুনিয়াত যায় যায় গরীব, বিশ্বাসোত বলবান হবার বাদে ভগবান কি উমারলাক বাছাই করি নেয় নাই? যায় যায় ভগবানক ভালবাসে উমারলাক উয়ায় যে শাসন ব্যবস্থা দিবার কতা দিচে সেই শাসন ব্যবস্থার অধিকারী হবার বাদে এই গরীব মানষিলাক কি উয়ায় বাছাই করি নেয় নাই?

৬ অথচ সেই গরীব মানষিটাক তোমরা অপমান করিচেন। কিন্তু ধনী মানষিলা কি তোমারলাক কষ্ট দেয় না আর আদালতত টানি নিয়া যায় না?

৭ যার নামের গুণে তোমারলাক ডেকো হয়, ধনী মানষিলা কি সেই মানিগুনী যীশুর নামে নিন্দা করে না?

৮ শাস্ত্রত নেখা আছে, “তোমার পাড়া-পড়শিক নিজের নাকান করি পিরিত কর।” তোমরালা যদি সচাং এ খ্রীষ্টের শাসন ব্যবস্থার বিধান মানি চলেন তাইলে ভাল করির ধরচেন।

৯ কিন্তু তোমরালা যদি সগাকে সমান চোখে না দেখেন তাইলে তোমরালা পাপ করির ধরচেন। বিধির বিধান সেয়া তোমারলাক বিধান ভঙ্গকারী কয়া দোষী করে।

১০ যেই মানষি সউগ বিধান পালন করিয়াও একটা বিষয়ে পাপ করে, তায়ও সউগ বিধান অমান্য করিচে কওয়া যায়।

১১ ভগবান কইচে, “ব্যভিচার করেন না,” ফির উয়ায় এ কইচে, “খুন করেন না।” তাইলে যদি তোমরালা ব্যভিচার না করি খুন করেন তাইলে কি আইন ভঙ্গকারী হইলেন না?

১২ যেই নিয়ম মানষিক স্বাধীনতা দান করে, সেই আইন দিয়া যার যার বিচার করা হবে বুলিয়া, সঠিক কতা কন আর সঠিক জীবন যাপন কর;

১৩ কেনেনা যায় দয়া করে নাই, বিচারের সমায় উয়াও দয়া পাবে না। কিন্তু যার দয়া আছে, উয়ায় বিচারের সমায় নির্ভয়ে খাড়া হয় রবে।

১৪ মোর আদরের ভাই আর বইনিলা, যদি কাণ্ডায় কয় যে উয়ার বিশ্বাস আছে কিন্তু কামের মইন্ধো দিয়া তা না দেখায় তাইলে কি লাভ? সেই বিশ্বাস কি উয়াক পাপ থাকি উদ্ধার করির পায়?

১৫ ধরি নেও, তোমারলার কোন ভাই বা বইনির ঘরত খাবারও নাই আর পিন্দিবার কাপড়ও নাই।

১৬ এই অবস্থাত যদি তোমারলার যে কাণ্ডো উমারলাক কয়, “তোমার মংগল হউক, দুধভাত খা, জামা কাপড় পিন্দি ভাল

থাক,” অথচ উয়ার অভাব মিটিবার কোনো উপায় না করেন  
তাইলে ইয়াতে উয়ার কি কোনো উপকার হবে?

১৭ ঠিক একে নাকান করি, যায় কাম বিনা বিশ্বাস করে, সেই  
বিশ্বাস হইলেক মরা।

১৮ কিন্তু কাণ্ডেয় হয় তো কবে, “তোর বিশ্বাস আছে, আর মোর  
কাম আছে।” মুই কইম, কাম বিনা তোর বিশ্বাস মোক দেখান।  
সেয়ো মুই কামের মইন্ধো দিয়া মোর বিশ্বাস তোক দেখাইম।

১৯ তুই এক ভগবানের বিশ্বাস করিস কি না? খুব ভাল! এমন কি  
অপদেবতালাও এই নাকান বিশ্বাস করে আর ভয়ে কাঁপে।

২০ হায় রে ভোদাই! কাম বিনা বিশ্বাস যে, কোনো কামের না হয়,  
তুই কি চাইস যে মুই সেইটা প্রমাণ করং?

২১ ধর, অব্রাহাম হামার চৌদ্দ গুষ্টির বাপ আছিলেক। সেয়ো  
উয়ার বেটা ইসহাকক বেদীর উপরা গতে দিছিলেক, সেয়ো কি  
সেই কামের বাদে উয়াক নির্দোষ কয়া মানি নেওয়া হয় নাই?

২২ তোমরা তো দেখির পাবার ধরচেন যে, উয়ার বিশ্বাস কামের  
মইন্ধো দিয়া পূরণ করচিলেক, আর উয়ার কাম উয়ার বিশ্বাসক  
ভরপুর করিচিলেক।

২৩ এই নাকান করি সনাতন পবিত্র শাস্ত্রের কতা পূরণ  
হইছিলেক, “অব্রাহাম পরম ভগবানের কতা বিশ্বাস করিলেক,  
সেই বাদে পরম ভগবান উয়াক নির্দোষ বুলি মানি নিছিলেক।”  
এই বাদে উয়াক পরম ভগবানের বন্ধু কওয়া হয়।

২৪ তাইলে তোমরালা দেখির পাবার ধরচেন, খালি বিশ্বাসের বাদে যে পরম ভগবান মানষিক নির্দোষ বুলি মানি নেয় সেইটা না হয়, কিন্তু বিশ্বাস আর কাম এই দুইটা জিনিসের বাদে পরম ভগবান মানষিক নির্দোষ বুলি মানি নেয়।

২৫ আর বেশ্যা রাহবক কেংকরি মানি নেওয়া হইছিলেক? উয়ায় যিহুদী গুপ্তচরলাক নুকি থুইয়া তার পাছত অইন্য ঘাটা দিয়া উমারলাক পেয়ে দিছিলেক, আর এই কামের বাদে উয়াক নির্দোষ বুলি মানি নিছিলেক।

২৬ যেমন জিউ ছাড়া দেহা মরা, ঠিক একে নাকান কাম ছাড়া বিশ্বাসও মরা।

৩ মোর ভাই-বইনিলা, তোমারলার মইন্ধোত সগায় সমিতির মাষ্টার হবার চান না, কেনেনা তোমরালা তো জানেন, হামরা সমিতির মাষ্টার এই বুলিয়া অইনের চায়া হামার কড়া বিচার হবে।

২ হামরা সগায় তো নানা নাকান অন্যায় করি। যদি কাণ্ডো নিজের মুখ সামলে অন্যায় না করে, তাইলে উয়ায় পুরাপুরি নির্দোষ, উয়ায় নিজের পুরা দেহাক সামলের পায়।

৩ ধর, ঘোড়াক বশ মানের বাদে উয়ার মুখত লাগাম নাগাই, আর সেলো উয়াক খুশি মতন যেতি নিয়া যাবার চাই, অতি নিয়া যাবার পাই।

৪ আর জাহাজের কতা চিন্তা কর, জাহাজ যদিও বড়, বাতাসের জোরে ঠেলি নিয়া যাবার নাগে। তাঞো ছোট একটা হাইল ধরিয়া নাবিক যেই পাকে খুশি সেই পাকে নিয়া যায়।

৫ একে নাকান জিবাও দেহার একটা ছোট অঙ্গ হইলেও, অনেক বড় বড় কতা কয়, আর খানিক অগুন কেংকরি করি বড় জঙলক ছুবি ফেলায়।

৬ তেমন জিবাও ঠিক অগুনের নাকান, হামার দেহার প্রতিটা অঙ্গর থাকি জিবা অধর্মের দুনিয়া, নরকের অগুন জ্বলিয়া উঠি গোটায় দেহাটাক নাশ করে, জীবনের চলার ঘাটাত অগুন ধরে দেয়।

৭ মানষি সউগ নাকান পশু-পখি, বুকে হাটা প্রাণী আর সাগরের প্রাণীলাক দমন করে।

৮ কিন্তু কোন মানষি উয়ার জিবাক দমন করির পায় নাই। ঐটা অস্থির, বেয়া আর ভয়ানক বিষে ভরা।

৯ এই জিবা দিয়া হামরা প্রভু পিতার গুণগান করি, আর এই জিবা দিয়া ভগবানের সরূপ সিদ্ধজন করা মানষিক অভিশাপ দেই।

১০ হামার একে মুখ দিয়া গুণগান আর অভিশাপ বাইর হয়। মোর আদরের ভাই বইনিলা এই নাকান হওয়া উচিত না হয়।

১১ একই বরনার জল দিয়া তিতা আর মিষ্টি জল বাইর হয়। আইসে কি?



১২ মোর ভাই বইনিলা, ডুমুর গছত কি জলপই ফলে? আর আংগুর গছত কি ডুমুর ফলে? তেমন নোনা জলক মিষ্টি জল বানের পান না।

১৩ তোমারলার মইন্ধোত জ্ঞানী আর বুদ্ধিমান কায়? উয়ায় সৎ জীবন যাপন করি নত-নম্র হয়। ভাল কাম করি অহংকার না করিয়া জ্ঞান প্রকাশ করুক।

১৪ কিন্তু তোমারলার অন্তর যদি হিংসায় তিতা হয়। যায়, স্বার্থপরতা থাকে, তাইলে জ্ঞান নিয়া গর্ব করেন না। সচাংটাক মিছাং বানান না।

১৫ এই নাকানের জ্ঞান ভগবান থাকি লাভ করা যায় না, এইটা দুনিয়ার জ্ঞান, জাগতিক, শয়তানের নগত ইয়ার সমন্ধ।

১৬ কেনেনা যেটেকোনা হিংসা আর স্বার্থপরতা থাকে ওটেকোনা গন্দগোল আর সউগ নাকানের অন্যায় থাকে।

১৭ কিন্তু যে জ্ঞান স্বর্গ থাকি আইসে সেইটা খাটি, পাছত শান্তিতে ভরপুর, ইয়াতে থাকে ধৈর্যগুণ, নত-নম্র; দয়া-মায়া আর ভাল কামের বাদে ভরপুর হয়, আর সেইটা হবে ভেদাভেদ হীন।

১৮ যায় যায় শান্তির খোজ করে উমরাল। শান্তিতে বিচন ফেলায়, আর সেইটার ফল হইলেক সৎ জীবন।

৪ তোমারলার মইন্ধোত ঝগড়া, মারামারি কোটে থাকি আইসে, তোমরা কি জানেন? যেইলা কামনা-বাসনা তোমারলার দেহার মইন্ধোত যুদ্ধ করে এইলা থাকি আইসে।

২ তোমরা কামনা করেন কিন্তু পান না, তোমরা খুন করেন আর লোভ করেন, তোমরা ঝগড়া মারামারি করেন কিন্তু যা চান পান না। কেনেনা তোমরালা ভগবানেরটে চান না।

৩ তোমরালা চাইলেও পান না, কেনেনা তোমরা বেয়া উদ্দেশ্যে চায়া থাকেন। যাতে তোমারলার কামনা-বাসনা পূরণ হয়।

৪ হে অবিশ্বস্ত মানষিলা! তোমরা কি জানেন না, দুনিয়ার বন্ধু হওয়া মানে ভগবানের শত্রু হওয়া? যে কাণ্ডো দুনিয়ার বন্ধু হবার চায়, উয়ায় নিজক ভগবানের শত্রু করি তুলে।

৫ তোমরা কি মনে করেন যে, শাস্ত্রের কতা ফলিবে না? যে পবিত্র আত্মাক ভগবান হামারলার অন্তরত দিচে, উয়ায় ভক্তি পাবার বাদে খুব আগ্রহ নিয়া বাঢ়ে আছে?

৬ কিন্তু ভগবানের দয়া আরো বেশী। এই বাদে শাস্ত্রত নেখা আছে, “ভগবান অহংকারীলার বিরুদ্ধে খাড়া হবে, কিন্তু নত-নম্রলাক দয়া করে।”

৭ এই বাদে ভগবানের অধীনে থাক। শয়তানের বিরুদ্ধে খাড়া হন, তাইলে তোমারটে থাকি উয়ায় পালেয়া যাবে।

৮ ভগবানের বগলত আইসো তাইলে ভগবানও তোমার বগলত আসিবে। পাপীর ঘর, তোমারলার জীবন থাকি পাপ দূর কর। দোমনা মানষিলা, তোমারলার অন্তর খাটি কর।

৯ দুঃখে ভাঙি পড়িয়া কান্দো, তোমরালা হাসির বদলে কান্দো, আনন্দের বদলে শোক কর।

১০ প্রভুর আগত নিজক নত কর, তাইলে উয়ায় তোমাক উচাত তুলি ধরিবে।

১১ ভাই-বইনিলা, তোমরা একে অপরের গেলানি করা বন্ধ কর। যে কাণ্ডো ভাইয়ের বিরুদ্ধে কতা কয়, আর ভাইয়ের দোষ চান্দে বেড়ায়, উয়ায় আইন-কানুনের বিরুদ্ধে কতা কয়, আইন-কানুনের দোষ চান্দে বেড়ায়। যদি আইন-কানুনের দোষ চান্দে বেড়ান তাইলে তুই তো পালনকারি হল না, তুই হল বিচারক।

১২ এক মাত্র এক জনেই আছে, যায় হামাক আইন-কানুন দিয়া বিচার করিয়া মুক্তির ঘাটা দেখের পায়, ধ্বংসও করির পায়। এই বাদে পাড়াপড়শির বিচার করির অধিকার তোর নাই।

১৩ তোমারলার মইন্ধোত কাণ্ডো কাণ্ডো কয়, “আজি বা কালি হামরা অইন্য গঞ্জত যায়া এক বছর কাটামু আর ওটে ব্যবসা করি লাভ করিমু।”

১৪ কিন্তু কালি কি হবে সেইটা তোমরালা জানেন না। তোমারলার জীবন তো কুয়াশার নাকান, যা অল্প সময় থাকে, তার পাছত মিলি যায়।

১৫ এই বাদে তোমারলার কওয়া দরকার, “প্রভুর ইচ্ছা হইলে, হামরালা বত্তি থাকিমু আর এটা ওটা করিমু।”

১৬ কিন্তু এলা তোমরালা নিজের নিজের বিষয়ে অহংকারী আর গর্বে ভরপুর হইচেন। গর্ব বেয়া জিনিস।

১৭ ফম থোন! যায় ভাল কাম জানিয়াও, আজিলি হয়্যা করে না, উয়ায় পাপ করে।

৫ হে ধনী মানষির ঘর, তোমরালা শোন। তোমারলার জীবনত যে ভয়ংকর দুর্দশা আসির ধরচে, তার বাদে তোমরালা কান্দো, হয় হয় কর।

২ তোমারলার ধন পচি যাবে, ঐলার কোন দাম থাকিবে না। তোমারলার পোশাক পোকায় কাটিবে,

৩ তোমারলার সোনা, রূপাত জং ধরিবে। এই জং এ প্রমাণ করিবে যে, তোমরালা অন্যায় করিচেন। অগুন যে নাকান করি মসং খায় ঐ নাকান করি তোমারলার দেহার মসং খায়া ফেলাবে। এই জমা করা ধন শেষে কালে তোমারলার বিরুদ্ধে সাক্ষী দিবে।

৪ তোমারলার খেতের ফসল যে কামলালা কাটিচে, তোমরালা উমারলাক মজুরি দেন নাই। আর দেখা! এই শোষনের বিরুদ্ধে চিকরিয়া তোমারলার দোষ দিবার ধরচে, আর সউগ ক্ষমতার অধিকারী প্রভুর কানত ঐ কামলালার চেকরন পৌঁচিচে।

৫ এই দুনিয়াত তোমরালা খুব আরামে দিন কাটেয়া মনের সখ মিটাইচেন। বলির বাদে নিজক পশুর নাকান করি খালি মোটা বানাইচেন।

৬ তোমরালা নির্দোষীলাক দোষী করি মারি ফ্যেলাইচেন। আর উমরালা তাঞা তোমারলাক বাধা দেয় নাই।

৭ এই বাদে হে ভাই-বইনিলা, যতক্ষণ না প্রভু আইসে ততক্ষণ পর্যন্ত ধৈর্য ধরি সউগ সহ্য কর। এক জন চাষি উয়ার খ্যেতের দামী ফসলের বাদে কেংকরি ধৈর্য ধরি বাচ্ছে রয়, যত দিন পর্যন্ত পইলা শেষ বর্ষন না হয় ততদিন পর্যন্ত ধৈর্য ধরি বাচ্ছে রয়।

৮ তোমারলারও অংকরিয়া ধৈর্য ধরা দরকার, অন্তর থির রাখো, প্রভু এলায় আসির ধরচে।

৯ ভাই-বইনিলা তোমরা এক জন অইন্য জনক দোষ দেন না। তোমরা যদি দোষ ধরা বন্ধ না করেন, তাইলে ভগবান তোমারলার দোষ ধরিবে। দেখ, বিচারকর্তা দুয়ারের বগলত খাড়া হয়্যা আছে।

১০ ভাই-বইনিলা যেই ভাববাদীলা ভগবানের হয়্যা কতা কইচে, দুঃখ-কষ্টের সমায় কেংকরি ধৈর্য ধরছিলেক চিন্তা করি দেখ।

১১ যায় যায় ধৈর্য ধরি সহ্য করে, হামরা উমাক কই আশুর্বাদ পাওয়া। তোমরা ইয়োবের ধৈর্যের কতা শুনিচেন, প্রভুর কামের শেষ ফল যে ভাল তাঙো দেখিচেন। প্রভুর দয়া-মায়ার শেষ নাই।

১২ হে মোর ভাই-বইনিলা, বিশেষ করি তোমারলাক একটা কতা কং, তোমরালা স্বর্গ, দুনিয়ার, আর অইন্য কোন জিনিসের নামে কোন কিরা কাটেন না। তার চায়া তোমারলার যেইটা “হে” সেইটা “হে” হউক আর যেইটা “না” সেইটা “না” হউক, যাতে তোমারলাক বিচারত পড়ির না নাগে।

১৩ তোমারলার মইন্ধোত কাণ্ডো কি দুঃখ ভোগ করির ধরচে? উয়ায় প্রার্থনা করুক। কাণ্ডো কি সুখী? উয়ায় ভগবানের গুণ কীত্তন করুক।

১৪ কাণ্ডো কি অসুখত ভুগির ধরচে? উয়ায় খ্রীষ্ট সমিতির প্রধান দেওয়ানীলাক ড্যেকাউক। উমরা প্রভুর নামে উয়ার মাখাত ত্যেল দিয়া উয়ার বাদে প্রার্থনা করুক।

১৫ বিশ্বাস করি প্রার্থনা করিলে, অসুকিয়া মানষিটা সুস্থ হবে। প্রভুই উয়াক সুস্থ করি তুলিবে। উয়ায় যদি পাপ করি থাকে প্রভু উয়াক ক্ষমা করিবে।

১৬ এই বাদে তোমরা একে অপরেরটে পাপ স্বীকার কর, আর একে অপরের বাদে প্রার্থনা কর। যাতে তোমরা সুস্থ হবার পান। যায় নির্দোষ উয়ার প্রার্থনার শক্তি আছে আর কামও হয়।

১৭ এলিয় হামার নাকান এক জন সাধারন মানষি আছিলেক। উয়ায় আকুল হয় প্রার্থনা করিলেক যাতে ঝরি না হয়। আর সাড়ে তিন বছর দেশত ঝরি হয় নাই।

১৮ তার পাছত উয়ায় ফির আরো প্রার্থনা করিলেক, সেলা  
দ্যাওয়া থাকি ঝরি পড়িলেক আর মাটিত ফসল ফলিলেক।

১৯ মোর ভাই-বইনিলা, তোমারলার মইন্ধো থাকি কাণ্ডোয় যদি  
সচাং ঘাটা থাকি দূরত সারি যায় আর তোমরা কাণ্ডোয় যদি  
উয়াক ফিরিয়া আনেন,

২০ এই কতাটা ফম থোন, যদি কাণ্ডোয় এক জন পাপী মানষিক  
ভুল ঘাটা থাকি ফিরি আনে, তাইলে উয়ায় উয়াক মরণ থাকি  
রক্ষা করে আর মেলা পাপ ক্ষমা হবে॥

## ১ পিতর

১ মুই পিতর, প্রভু যীশু খ্রীষ্টের বাছাই করা খবরিয়া। পন্ত, গালাতীয়া, কাপ্পাদকিয়া, এশিয়া আর বিথুনিয়া প্রদেশত ছড়ি ছিটি বৈদেশিয়ার নাকান যায় যায় বসবাস করির ধরচে, মুই উমারলার বাদে এই চিঠি নেথির ধরচুং।

২ স্বর্গের বাপ ভগবানের পরিকল্পনা মতন তোমারলাক বাছাই করি নিচে, আর পবিত্র আত্মা তোমারলাক পবিত্র করিচে। যার ফলে তোমরালা যীশু খ্রীষ্টের বাধ্য হইচেন আর উয়ার অন্ধে ধুইয়া শুদ্ধি হইচেন। ভগবানের দয়া আর শান্তি তোমারলার ঘরত মেলা করি থাকুক।

৩ প্রভু যীশু খ্রীষ্টের স্বর্গের বাপ ভগবানের গুণগান হউক। কেনেনা উয়ায় যীশু খ্রীষ্টক মরণ থাকি বত্তে তুলিয়া হামারলাক মেলা মায়া করিয়া নয়া জন্ম দান করিচে, তার বাদে হামরা ভরপুর জীবনের আশা পাইচি।

৪ এই বাদে ভবিষ্যতে হামরা এমন একটা ধন পাবার আশা পাইচি, সেই ধন কোনো দিনও ফুরাবে না, সেটে বেয়া ভাব কিছুই রবে না আর চিরকাল নয়া থাকিবে। এই ধন তোমারলার বাদে স্বর্গত জমা করা আছে।

৫ যত দিন তোমরালা মুক্তি না পান ভগবানের শক্তিত বিশ্বাসের মইন্ধো দিয়া তোমারলাক নিরাপদে ভাল করি থোয়া হইচে। সেই



শেষ কাল প্রকাশ হবার বাদে এই মুক্তি জোগার করি থোয়া হইচে।

৬ এলা হয় তো কিছু দিনের বাদে পরীক্ষার মইদ্বো দিয়া তোমরালা দুঃখ পাবার ধরচেন, তাও মুক্তি পাবার বাদে তোমারলার মন আনন্দে ভরি উঠচে।

৭ এইলা দুঃখ কেনে আইসে জানেন? যাতে তোমারলার বিশ্বাস খাটি প্রমাণ হয়। আর যীশু খ্রীষ্ট ফিরি আইসার সমায়ে তোমরালা যাতে গুণগান, গৌরব আর মান-সন্মান পান। তোমরা তো জানেন যে, সোনা ক্ষয় হয় গেইলেও উয়াক অগুনত ছুবিয়া খাটি করি নেওয়া হয়, কিন্তু এইটা মনে থোন, সোনার চায়াও তোমারলার বিশ্বাসের দাম মেলা গুণ বেশী।

৮ যদিও তোমরালা যীশু খ্রীষ্টক দেখেন নাই, তাণ্ডো উয়াক পিরিত করির ধরচেন। এলাও যদিও তোমরালা উয়াক দেখির পান নাই, তাও উয়াক বিশ্বাস করেন, আর যে আনন্দ তোমারলার মনত আসিচে সেইটা ভাষায় প্রকাশ করা যায় না। আর যে আনন্দ স্বর্গীয় মহিমায় ভরপুর, সেই আনন্দে তোমরালা আত্মহারা হবার ধরচেন;

৯ কেনেনা তোমারলার মুক্তির বাদে বিশ্বাসের শেষ ফল তোমরালা পাবার যাবার ধরচেন।

১০ যে মুক্তি তোমরালা লাভ করির কতা, ভাববাদীলা সেই কতা তো অনেক দিন আগতে কয়া গেইচে। উমরালা মুক্তির সমন্ধে

জানির বাদে যতন করিয়া খোজ খবর করির ধরছিলেন।

১১ যেলা উমারলার অন্তরত যীশু খ্রীষ্টের আত্মা আগতে সাক্ষ্য দিয়া কয়া গেইচে, খ্রীষ্টক দুঃখ-কষ্ট ভোগ করির নাগিবে, তার পাছত উয়ায় মহিমা লাভ করিবে। ভগবানের খবরিয়ালা জানির চাইচে, খ্রীষ্টের সেই আত্মা কোন সমায় আর ক্যেমন অবস্থার কতা উমারলাক জানাইছিলেক।

১২ কিন্তুক ভগবান উমারলাক জানাইচে, ইয়াতে বোঝা যায় নিজের সেবা না করিয়া উমরা তোমারলার সেবা করিছিলেক। স্বর্গ থাকি পেঠা পবিত্র আত্মার চালনাত যায় যায় তোমারলারটে খ্রীষ্টের ভাল খবর প্রচার করিচে, উমরালা সউগ কতা তোমারলাক জানাইচে। এমন কি, সেই কতালা স্বর্গদূতলাও জানির বাদে আগ্রহ আছিলেক।

১৩ এই বাদে তোমারলার মন চেতন কর আর নিজের মন দমন রাখেন। যেলা যীশু খ্রীষ্ট আসিবে সেলা তোমরালা দয়া পাবেন। আর সেই দয়া পাবার বাদে মনত সউগ আশা নিয়া বাচ্ছে রন।

১৪ ভগবানের বাধ্য ছাওয়া হিসাবে তোমরা তোমারলার আগের বেয়া মনোভাব নিয়া জীবন কাটান না, সেলা তো তোমরা ভগবানক চেনেন নাই।

১৫ বরং তার চায়া যায় তোমারলাক ডেকাইচে উয়ায় যেই নাকান পবিত্র, তোমরালাও চালচলনে ঠিক উয়ার নাকান পবিত্র হন।

১৬ আর ভগবান পবিত্র শাস্ত্রত কইচে, “তোমারলাক পবিত্র হবার নাগিবে, কেনেনা মুই পবিত্র।”

১৭ ভগবান কারো মুখের ভিতি চায়া দেখে না, কেনেনা উয়ায় সউগ মানষির কাম অনুযায়ী বিচার করে। এই বাদে তোমরালা উয়াক যদি বাবা কয়া ড্যেকান, তাইলে এই দুনিয়াত যত দিন বৈদেশী হয়্যা আছেন, ততদিন উয়ার ভয়ে ভক্তি ভরে তোমরালা জীবন কাটান।

১৮ তোমরালা জানেন, জীবনের ঘাটাত চলির বাদে বাপ-ঠাকুরদাদারটে পাওয়া ফলহীন আদর্শ থাকি তোমরালা মুক্তি পাইচেন। আর সেই মুক্তি সোনা, রূপার নাকান খয় হয়্যা যাওয়া কোন জিনিস থাকি পান নাই।

১৯ কিন্তুক তোমরালা মুক্তি পাইচেন, নির্দোষ আর নিখুঁতিয়া ভেড়ার বাচ্চার নাকান যীশু খ্রীষ্টের দামী অক্ল দিয়া।

২০ সেইটা ঠিক করা হইচে দুনিয়া সিজ্জনের আগত, কিন্তুক এই শেষ কালত যীশু খ্রীষ্ট তোমারলার বাদে এই দুনিয়াত আসিলেক।

২১ ভগবান উয়াক মরণ থাকি বত্তে তুলিয়া ভগবানের মহিমা দান করিচে। খ্রীষ্টের মইদ্বো দিয়া তোমরালা ভগবানক বিশ্বাস করিচেন। সেই বাদে তোমারলার বিশ্বাস আর আশা ভগবানের উপরত আছে।

২২ এলা তোমরালা সচাং শিক্ষালাক মানি নিয়া তোমারলার অন্তরের ছুয়া জিনিসলা ধুইয়া ফেলাইচেন, আর সেই বাদে

তোমরালা ভন্ডামি না করিয়া ভাইয়ের মতন অন্তর দিয়া পিরিত কর। এই বাদে তোমরালা গুরুভাইলার একে অপরের আপন হইচেন।

২৩ ধ্বংস হওয়া বিচি থাকি তোমরালা নয়া জন্ম না হয়, যে বিচি কোন দিন ধ্বংস হয় না সেই বিচি থাকি তোমরালা জন্ম হইচে। আর সেই বিচি হইলেক, ভগবানের চিরকালের জীবন্ত বাইক্য।

২৪ এই বাদে পবিত্র শাস্ত্রত নেখা আছে, সউগ মানষি ঘাসের নাকান, আর ঘাসের ফুলের নাকান উমারলার গৌরব; এক দিন ঘাস শুকি যায়, সেয়া ফুলও ঝরি পড়ে;

২৫ কিন্তুক ভগবানের বাইক্য চিরকালে বত্তি রয়। আর এই বাইক্যই ভাল খবর, যা তোমরালাটে প্রচার করা হইচে।

২ অইন্যের ক্ষতি করির সউগ নাকানের ইচ্ছা, সউগ নাকানের ছলনা, ভন্ডামি, হিংসা, সউগ নাকানের গেলানির কতা-বার্তা তোমরালা অন্তর থাকি দূর করি দেও।

২ এই মাত্র জন্মা ছাওয়ার নাকান হন, তোমরালা আধ্যাত্মিক উন্নতির বাদে খাটি দুধ মনে পরানে চাও। সেই দুধ খায়া তোমরালা বাড়ি উঠিবেন আর মুক্তিও পাবেন।

৩ আর তোমরালা ইয়াতে প্রভুর সেই দয়ার গুণের স্বাদ পাইচেন।

৪-৫ এমন একটা বত্তা শিল আছে যাক ভগবান বাছাই করিচে, আর উয়ার চখুত এইটা খুব দামী, কিন্তু মানষিলা উয়াক মানি নেয় নাই। আর এই বত্তা শিলটায় হইলেক যীশু; তোমরালা যায় যায় এই বত্তা শিলটার বগলত আসিচেন, তোমারলাক দিয়া বত্তা শিলের মত ভগবানের আত্মিক মন্দির বানা হবার ধরচে। সেই বাদে তোমারলাক বামন হিসাবে ভগবানের বাদে যুদা করা হইচে, যাতে তোমরালা আত্মিক বলিদান সঁপে দিবার পান, সেই বলিদান যীশু খ্রীষ্টের মইন্ধো দিয়া ভগবান মানি নেয়।

৬ শাস্ত্রত এই কতা নেখা আছে, দেখ, মুই একটা দামী শিল বাছাই করি নিচুং; আর সেইটা সিয়োনের এক কোণাত ভিটির শিল হিসাবে থাপন করিচুং। যায় উয়াক বিশ্বাস করিবে, উয়ায় কোনো মতে শরম খাবে না।

৭ তোমরালা বিশ্বাস করিচেন বুলিয়া সেই শিল তোমারলারটে দামী, কিন্তুক যায় যায় বিশ্বাস করে নাই, উমারলারটে এই শিলটার কোন দাম নাই। যেই নাকান শাস্ত্রত নেখা আছে: রাজ মিদ্দ্রিলা যে শিলটাক বাতিল করিচে, সেইটাই সউগ চাইতে দরকারি শিল হইলেক।

৮ এইটাও নেখা আছে: এইটা এমন একটা শিল যে, মানষি সেইটাত উষ্টা খাবে, আর এই শিলটা হবে মানষির উষ্টা খাবার কারন। মানষি ভগবানের বাইকেয়ের অবাধ্য হয় বুলিয়া উষ্টা খায়, আর সেইটা হইলেক ভগবানের পরিকল্পনা।

৯ তোমারলাক দিয়া বানা হইচে বামনের এক রাজ্য, কেনেনা তোমরালা ভগবানের বাছাই করা গুপ্তি। ভগবান তোমারলাক মনের মত যুদা করা জাতি বানাইচে, আর তারে বাদে উয়ার আপনজন হইচেন। যায় তোমারলাক আন্ধার ঘাটা থাকি অচানক আলোর এদি ডেকে আনিচে, এই বাদে তোমরালা উয়ারে গুণগান করো।

১০ এলা তোমরালা ভগবানের মানষি হইচেন, কিন্তু এক সমায় তো আছিলেন না। এক সমায় ভগবানের দয়া পান নাই, কিন্তু এলা দয়া পাইচেন।

১১ ও মনের মত সখার ঘর, মুই তোমারলাক অনুরোধ করির ধরচুং যে, এই দুনিয়াত তোমরালা বিদেশী বুলিয়া অল্প দিনের বাদে আসিচেন। পাপ-স্বভাবের কামনা-বাসনা থাকি তোমরালা দূরত রন। এইলা তোমার আত্মার বিরুদ্ধে যুদ্ধ করে।

১২ ভগবানক যায় যায় জানে না উমারলার মইদ্ধোত তোমরা সৎ হয় চল, যাতে অন্যায়কারি কয়া তোমারলার নিন্দা করিলেও তোমারলার ভাল কামলা দেখা। আর বিচারের দিনে উমরা ভগবানের প্রশংসা করিবে।

১৩ তোমরালা প্রভুর প্রতি বাধ্য হয় মানষির নিয়োগ করা শাসনকর্তালার বাধ্য হয় থাকেন, রাজা প্রধান বুলিয়া উয়ার অধীনে থাকেন।

১৪ অন্যায়কারীলাক শাস্তি দিবার আর যায় ভাল কাম করে উমার গুণগান করির বাদে রাজা যে শাসনকর্তালাক পেঠায় উমারো অধীনে থাক।

১৫ ভগবানের ইচ্ছা এই যে, তোমরালা ভাল কাম করিয়া ভোদাই মানষিলা উমারলার নিবুদ্ধিয়ার নাকান কতা বন্ধ করি দেও।

১৬ স্বাধীন মানষি হিসাবে জীবন কাটান, দুষ্টামি চাপা দিবার বাদে সেই স্বাধীনতা ব্যবহার করেন না। তার বদলে ভগবানের সেবক হিসাবে জীবন কাটান।

১৭ সউগ মানষিক মান দিয়া চল, তোমরালা গুরু ভাইলাক পিরিত কর, আর ভগবানক ভয় খাও, রাজাকো মান দিয়া চল।

১৮ চাকরলাক কং, তোমরালা মালিকোক সন্মান দিয়া উয়ার নিয়ম মানি চল। যায় ভাল আর দয়ালু খালি উয়াক মানি চলিলে হবে না, যেই মালিক কঠুর উয়াকও সন্মান দিবার নাগিবে।

১৯ যদি কাণ্ডো অন্যায়্য ভাবে কষ্ট ভোগ করে আর ভগবানক ফম খুইয়া সেইলা সহ্য করে, তাইলে ভগবানের চখুত সেইটা গুণগানের যোগ্য।

২০ আর কোন বেয়া কাম করিয়া যদি ডাং খান, সেইলা সহ্যও করেন, তাইলে কি তোমরালা কোন দিন গুণগান পাবেন? কিন্তু যদি তোমরালা ভাল কাম করিয়াও দুঃখ-কষ্ট ভোগ করি সহ্য করেন, সেলো ভগবানের চখুত সাব্বাসির বিষয়।

২১ এই বাদে ভগবান তোমারলাক ডেকাইচে, কেনেনা খ্রীষ্ট তোমারলারটে এক নমুনা খুইয়া গেইচে, উয়ায় তোমারলার বাদে দুঃখ-ভোগ করিচে। যাতে তোমরালা ঐ আদর্শ মনত নিয়া উয়ার মত চলির পান,

২২ “যার মুখত কোন ছল চাতুরী কতা আছিলেক না, আর যায় কোন দিনও পাপ করে নাই।”

২৩ যেলা মানষি খ্রীষ্ট যীশুক অপমান করিচে, সেলা উয়ায় কাণ্ডোকে কোন দিন অপমান করে নাই। আর দুঃখ ভোগের সমায় কাণ্ডোরো বিরুদ্ধে প্রতিশোধ নিবার বাদে ভয়ও দেখায় নাই। কিন্তুক যায় ন্যায় বিচার করে উয়ার হাতত নিজক সঁপে দিচে।

২৪ আর যীশু ক্রুশত নিজের দেহা সঁপে দিয়া হামারলার সউগ পাপের বোঝা উবাইলেক, যাতে করি হামরা পাপের ঘাটা থাকি ফিরি আসিয়া নির্দোষ জীবন যাপন করি। উয়ার দেহার আঘাত তোমারলাক সুস্থ করিচে।

২৫ তোমরা ভুল ঘাটাত যাওয়া ভেড়ার নাকান, কিন্তুক তোমরা এলা তোমারলার মনের রাখোয়াল আর দেওয়ানীরটে ফিরি আসচেন।

৩ সেই নাকান করি তোমরালা যায় যায় ভার্জা, নিজের নিজের সোয়ামির অধীনে চল, উমারলার মইন্ধে কাণ্ডো কাণ্ডো ভগবানের বাইক্যত বিশ্বাস না করিলেও তোমারলার চালচলন যাতে



উমারলাক খ্রীষ্টের ভিত্তি টানে। ইয়াতে তোমারলাক একটা কতাও কবার নাগবে না। কেনেনা উমরалаয় তোমারলার পবিত্র জীবন আর ভগবানের পতি ভক্তি দেখির পাবে।

৩ নানা নাকানের দামী জিনিস দিয়া সাজিয়া ঢুলির বেনীর খোপা, গয়নাগাটি আর ভাল ভাল কাপড়-চোপড় পিন্দিয়া বায়রার সাজ পোশাক দিয়া নিজক সাজেবার বাদে ব্যস্ত না হন,

৪ বরং তোমরালা যদি নিজক নষ্ট না হওয়া নরম আর শান্ত স্বভাব দিয়া তোমারলার অন্তরক সাজান, ভগবানের চখুত সেইটায় দামী হবে।

৫ আগের কালত ভগবান ভক্ত ভার্জালা ভগবানের উপরা ভরসা থুইয়া নিজেই সুন্দরী সাজিচে। উমরালা নিজ নিজ সোয়ামির অধীনত থাকিয়া এই নাকান করি নিজক সাজাই ছিলেক।

৬ যেমন শ্রীমতি সারা অব্রাহামের অধীন থাকিয়া উয়াক প্রভু বুলি ডেকাইচে। তোমরালা যদি ভীতু না হয় যেইটা ঠিক সেইটায় করেন, তাইলে প্রমাণ হবে যে, তোমরালা সারার যোগ্য ছাওয়া।

৭ ঠিক একে নাকান সোয়ামীলাও, তোমরালা বুদ্ধি বিচার করি ভার্জার নগত সংসার করো। উমরালা তোমার জীবনের সঙ্গী, আর উমরালাও তোমারলার নগত ভগবানের দয়ার দান হিসাবে জীবন পাবে। ভার্য়ালা তোমারলার তুলনায় দুর্বল পাত্র, এইবাদে উমারলাক সন্মান দিয়া চল যাতে তোমারলার প্রার্থনাত বাধা না পায়।

৮ তোমারলাক কবার ধরচুং, সগায় একমনা হন। তোমরালা একে অপরের দুঃখে দুঃখী হন, ভাই-বইনিলার সোদে পিরিতির ভাব দেখেয়া দয়ালু আর নম্র হন।

৯ যায় তোমারলাক গালি পারে উয়াক তোমরালা ফিরিয়া গালি পারেন না, আর যায় তোমারলার পতি অন্যায় করে, তোমরালা উয়ার অন্যায়ের বদলে পতিশোধ নেন না। বরং প্রার্থনা করি উমার বাদে আশুবাদ চাও, কেনেনা ভগবান তোমারলাক আশুবাদ দিবার বাদে ডেকাইচে।

১০ শাস্ত্রত নেখা আছে, যায় সুখী জীবন কাটের চায়, আর ভাল দিন দেখিবার আশা করে, বেয়া কতা থাকি উয়ায় জিবাক দূরত থুক, আর ঠোটক ছল-চাতুরী কতা থাকি সামলাউক।

১১ উয়ায় বেয়া কাম থাকি দূরত থাকুক, আর ভাল কাম করুক; শান্তির চেষ্টা করুক, উয়ার পাছ না ছাড়ুক।

১২ কেনেনা যায় যায় সঠিক ঘাটা দিয়া চলে, প্রভুর নজর উমার ভিতি আছে, উমারলার প্রার্থনা শুনির বাদে উয়ার কান খোলায় আছে; কিন্তুক যায় যায় বেয়া কাম করে, প্রভু উমার বিরুদ্ধে খাড়া হয়।

১৩ যদি তোমরালা ভাল কাম করির বাদে আকুল হন তাইলে কায় তোমার ক্ষতি করিবে?

১৪ ভগবানের ইচ্ছামত চলির যায়া যদি তোমরালা কষ্টভোগও করেন, তাইলে তোমরালা ভগবানের আশুবাদ পাবেন। যায় যায়

তোমারলাক দুঃখ-কষ্ট দেয়, তোমরা উমারলার ভয়ে ভীতু না হন,  
আর অস্থিরও না হন,

১৫ বরং খ্রীষ্ট যীশুক প্রভু হিসাবে অন্তরত জাগা দেও। যদি  
কাণ্ডেয় তোমারলার আশা-ভরসা নিয়া প্রশ্ন করে, তাইলে উয়াক  
জবাব দিবার বাদে সউগ সমায় সাজিয়া রন, কিন্তু এই জবাব  
নত-নম্র হয় শ্রদ্ধা করি দেন।

১৬ তোমারলার বিবেক ঝকঝকা থোন, যাতে খ্রীষ্টের মানষি  
বুলিয়া তোমারলার ভাল চাল-চলনের যায় যায় নিন্দা করে, উমরা  
যেনে নিন্দা করিচে বুলিয়া শরম খায়।

১৭ বেয়া কাম করিয়া কষ্ট পাওয়ার চায়া বরং ভগবানের ইচ্ছায়  
ভাল কাম করি কষ্ট পাওয়া শত গুণে ভাল।

১৮ হামারলার সউগ পাপের বাদে খ্রীষ্ট একবারেই মরছিলেক।  
এই নির্দোষী মানষিটা দোষী মানষিলাক ভগবানেরটে নিয়া যাবার  
হামার পাপের বাদে নিজের জীবন ক্রুশত সঁপে দিলেক। উয়াক  
শরীলের দিক দিয়া মারি ফেলা হইচে, কিন্তুক আত্মায় উয়াক  
জীবন দেওয়া হইচে।

১৯ আর উয়ায় আত্মাতে যায়া বন্দী আত্মালারটে প্রচার  
করিছিলেক।

২০ মেলা দিন আগের কতা, যেলা ভগবান নোহের জাহাজ  
গড়ের সমায়ে ধৈর্য ধরি বাছে আছিলেক, সেলা যায় অবাধ্য

হইছিলেক এই আত্মালা উমারেই। সেই জাহাজত মাত্র অল্প কয়জন, মাত্র আটজন বানা থাকি রক্ষা পাইচে।

২১ আর সেই জল দীক্ষা দেওয়ার নাকান যা এলা তোমারলাক দেয়। জলের দীক্ষা যে তোমারলার মইলা দূর করে তা কিন্তুক না হয়; এইটা হইলেক ভগবানেরটে সৎ বিবেক রক্ষা করির একটা নমুনা। যীশু খ্রীষ্টের মরণ থাকি ফির বত্তি উঠার মইদ্বো দিয়া তোমারলাক মুক্ত করা হয়।

২২ প্রভু যীশু স্বর্গ গেইচে আর ভগবানের ডাইন পাকে আছে, স্বর্গদূতলা, ক্ষমতাবানলা আর অধিকারিলা উয়ার অধীনত আছে।

৪ এই বাদে কবার ধরচুং যে, যীশু খ্রীষ্ট মরার সমায় যেলা দুঃখ-কষ্ট ভোগ করিলেক, সেলা তোমরালাও একে নাকান করি একে মন নিয়া মনটাক গড়ান। কেনেনা যায় দেহাত দুঃখ-কষ্ট ভোগ করে, তাতে জানা যায় উয়ায় পাপের ঘাটা ছাড়ি দিচে।

২ এই বাদে এই দুনিয়াত শেষে জীবনটা উয়ায় দুনিয়ার লোভ নালসার তৃপ্তি করি কাটায় না, ভগবানের ইচ্ছা পালন করি কাটায়।

৩ যায় যায় ভগবানক জানে না উমারলার নাকান তোমরালাও আগত যথেষ্ট বেয়া কাম করি, বিশৃঙ্খল জীবন, বেয়া কামনা-বাসনার মইদ্বোত থাকি, মদ খায়া মাতলামি, রং তামশা করি আর প্রতিমা পূজা করি জীবন কাটাইচেন।

৪ এলা সেই মানষিলা দেখিয়া অচানক হয়, তোমরালা উমারলার বিশৃঙ্খল জীবন মানি নিয়া উমারলার সোদে একটে হন নাই। এই বাদে উমরালা তোমারলার বিরুদ্ধে নিন্দা করিয়া কতা কয়।

৫ কিন্তুক যায় বত্তা আর মরা মানষিলার বিচার করির বাদে সাজি আছে, উয়াকে উমার হিসাব দিবার নাগিবে।

৬ আর মরা মানষিলারটেও তো যীশুর ভাল খবর প্রচার করা হইচে, যেন উমরালাও দেহা ধারি মানষির নাকান বিচার করা হইলেও, আত্মায় উমরালা যাতে ভগবানের সাথে বত্তি থাকির পায়।

৭ এলা সউগলার শেষ কাল বগলত আসিচে। সেই বাদে তোমারলার মন থির কর আর নিজক দমনে রাখ যাতে প্রার্থনা করির পান।

৮ আর সউগ চাইতে ভাল কতা হইলেক, তোমরালা একে অপরক মন দিয়া পিরিত কর, কেনেনা মেয়ো পাপ থাকিলেও পিরিত সেই পাপ ঢাকি থোয়।

৯ কোনো নাকান বিরক্ত বোধ না করিয়া তোমরালা একে অপরক সাগাই হিসাবে গ্রহন কর।

১০ আর পতিটা মানষি নানা নাকানের বরদান পায় শিষ্য হয়। কাম করির ধরচে। আর সেইলা একে অপরের সেবা করির বাদে ব্যবহার কর।

১১ যদি কাণ্ডো প্রচার করির বরদান পায়, ভগবান নিজের মুখে  
যে কতা কইচে, উয়ায় সেই নাকান করি প্রচার করুক। কাণ্ডোয়  
যদি সেবা করির বরদান পায়, উয়ায় ভগবানের দেওয়া বরদান  
দিয়ায় সেবা করুক। যেনে যীশু খ্রীষ্টের মইন্ধো দিয়া সউগ কিছুতে  
ভগবানের গৌরব হয়। সউগ মহিমা আর শক্তি চিরকাল উয়ারে।  
আমেন।

১২ ও মনের মত সখার ঘর, তোমারলাক এলা অগুনের মইন্ধোত  
যাচাই করা হবার ধরচে, ইয়াতে অচানক হন না যে, তোমারলার  
উপরত আজব কিছু হবার ধরচে।

১৩ তোমরালা যে খ্রীষ্টের দুঃখ-কষ্টের ভাগীদার হবার ধরচেন, এই  
বাদে আনন্দ কর, যেলা উয়ায় আপন মহিমায় প্রকাশিত হবে,  
সেলা তোমরাও আনন্দে ভরপুর হও।

১৪ খ্রীষ্টের বাদে যদি তোমরালা অপমানিত হন তাইলে তোমরালা  
আশুর্বাদ পাইচেন, কেনেনা ভগবানের মহিমার আত্মা  
তোমারলার উপরত আছে।

১৫ তোমারলার মইন্ধে কাণ্ডো খুনী, চোর, অন্যায়কারি হয় বা  
এমন কি অইন্যের কামত নাক গলেয়া দুঃখ-কষ্ট ভোগ না করুক।

১৬ কিন্তুক যীশু খ্রীষ্টের শিষ্য হয় কাণ্ডো যদি দুঃখ-কষ্ট ভোগ  
করে, ইয়াতে উয়ায় শরম না খাউক, বরং তোমরা যীশু খ্রীষ্টের  
মানষি বুলিয়া ভগবানের গুণগান কর।

১৭ ফর্ম খোন, বিচার শুরু হবার সমায় আসিচে, আর সেইটা শুরু হবে ভগবানের পরিবারের মানষিলার থাকি। আর সেই বিচার যদি হামারলার থাকি শুরু করা হয়, তাইলে যায় যায় ভগবানের দেওয়া ভাল খবর মানি নেয় নাই, উমারলার দশা কি নাকান হবে?

১৮ শাস্ত্রত নেখা আছে, সঠিক ঘাটা দিয়া চলা মানষিলার মুক্তি পাওয়া যদি এত কঠিন হয়, তাইলে যায় যায় ভক্তিহীন আর পাপী, উমারলার দশা কি নাকান হবে?

১৯ এইবাদে যায় যায় ভগবানের ইচ্ছায় দুঃখ-কষ্ট ভোগ করে, উমরালা সৎ আচরন করিতে করিতে নিজের নিজের পরান সিঙ্গন কর্তার হাতত সঁপে দেউক।

৫ খ্রীষ্টের যে গৌরব প্রকাশ হবে, মুই উয়ার ভাগীদার, আর খ্রীষ্টের দুঃখ-কষ্ট ভোগের বাদে মুই সাক্ষী। সেই বাদে তোমারলার মাঝত যায় যায় সমিতির দেওয়ানী, মুই উমারলাক এক জন দেওয়ানী হিসাবে উপদেশ দিবার ধরচুং,

২ তোমারলার মাঝত ভগবানের যে ভেড়ার দল আছে, তোমরালা উয়ার দেখাশুনা কর। দেখাশুনা করা মানে, উমারলাক যে জোর করি দেখাশুনা করির কওয়া হবার ধরচে সেইটা না হয়, বরং নিজের ইচ্ছাতেই কর, ভগবান তোমারলারটে সেইটায় চায়। লাভের আশায় এই কাম করেন না, কিন্তুক আগ্রহ নিয়া কর।

৩ তোমারলার নিচা পদত যায় যায় কাম করে, উমারলার মালিক না সাজেন, বরং এমন হন যাতে তোমারলাক দেখিয়া উমরালা শিখির পায়।

৪ আর যেলা প্রধান রাখোয়াল দেখা দিবে, সেলা তোমরালা জয়ের মালা হিসাবে মহিমার ভাগীদার হবেন। আর সেটা কোনো দিনও শেষ হবে না।

৫ একে নাকান করি গাবুর চেংড়ালা, তোমরালাও দেওয়ানীলার অধীনে থাক। তোমরা সগায় নত-নম্র হয়। একে অপরের সেবা কর, কেনেনা শাস্ত্রের কতা মতন, “ভগবান অহংকারীলার বিরুদ্ধে খাড়া হয়, কিন্তুক নত-নম্র মানষিলাক দয়া করে।”

৬ সেই বাদে ভগবানের ক্ষমতার আগত নিজক নত কর, যাতে সঠিক সমায়ে উয়ায় তোমারলার মাথা উচা করে।

৭ তোমারলার সউগ চিন্তা-ভাবনার ভার ভগবানের উপরাত দেও, কেনেনা উয়ায় তোমারলার বাদে চিন্তা করে।

৮ সউগ সমায় সাবধান থাকো আর নিজক দমনে রাখ। কেনেনা তোমারলার শত্রু শয়তান সিংহের নাকান করি কাক যে খায়া ফেলাবে, তারে বাদে উয়ায় চান্দে বেড়ের ধরচে।

৯ শয়তানের বিরুদ্ধে খাড়া হবার চাইলে বিশ্বাসে থির থাকির নাগিবে। কেনেনা তোমরা জানেন যে, গোটায় দুনিয়াত তোমারলার গুরু ভাইলা একে নাকান দুঃখ-কষ্ট ভোগ করির ধরচে।



১০ যায় সউগ নাকান দয়া করার ভগবান, উয়ায় তোমারলাক চিরদিনের গৌরবের ভাগীদার হবার বাদে ডেকাইচে। ক্যেনো তোমরালা খ্রীষ্টের নগত যুক্ত হইচেন। তোমরালা অল্প কয় দিন দুঃখ-কষ্ট ভোগ করিবার পাছত ভগবান নিজেই তোমারলাক পাকাপোক্ত করিবে, থির খুবে, সবল বানাইবে আর শক্ত ভিটির উপরা তোমারলাক খাড়া করাইবে।

১১ উয়ার ক্ষমতা চিরকালে থাকুক। আমেন।

১২ মুই যাক গুরু ভাই মনে করং, উয়ার নাম শিলাস, আর উয়াক দিয়া মুই এই চিঠি খানত অল্প কতা তোমারলারটে নেখিলুং, যেনে মুই তোমারলাক উৎসাহ দিবার পাং আর ভগবানের সচাং দয়ার সাক্ষ্য তোমারলাক দিবার পাং। এই বাদে তোমরালা ভগবানের এই দয়ার মইন্ধো দিয়া থির থাকি বসবাস কর।

১৩ তোমারলার সাথে ভগবান যাক যাক বাছাই করি নিচে, বাবিলের এটেকার সমিতির মানষিলাও তোমারলাক পিরিতি জানাইচে, আর মোর বেটা মার্কও তোমারলাক মঙ্গল কামনা করিয়া পিরিতি জানাইচে।

১৪ পিরিতির মনভাব নিয়া তোমরালা একে অপরক মঙ্গল কামনা জানান। তোমরালা যায় যায় খ্রীষ্টের নগত যুক্ত হইচেন, তোমারলার উপরা শান্তি নামি আসুক॥

## ২ পিতর

১ মুই শিমন পিতর, যীশু খ্রীষ্টের এক জন চাকর আর বাছাই করা খবরিয়া। হামারলার ভগবান আর মুক্তিদাতা যীশু খ্রীষ্ট ন্যায়বান, সেই বাদে তোমরালাও হামারলার নাকান দামী বিশ্বাস পাইচেন। এই বাদে মুই তোমারলারটে এই চিঠিখান নেখির ধরচুং।

২ ভগবান আর প্রভু যীশুক ভাল করি জানির ফলে তোমারলার উপরা বেশী করি দয়া আর শান্তি নামি আসুক।

৩ যীশু উয়ার নিজের মহিমা আর ভাল গুণের মইন্ধো দিয়া হামারলাক ডেকাইচে। হামার যীশু খ্রীষ্টের জ্ঞান দিয়া, উয়ার আধ্যাত্মিক ক্ষমতা দিয়া সউগ জিনিস হামারলার যেইলা দরকার সেইলা দান করিচে। যাতে ভগবানের ইচ্ছাতে জীবন যাপন করির পারি।

৪ সেইলা দিয়া হামারটে মূল্যবান মহান প্রতিজ্ঞা করি হামারলাক দিচে, ইয়ার উদ্দেশ্য হইলেক, মানষির বেয়া চিন্তা ভাবনার কারনে দুনিয়াত যেই বেয়া জিনিস জমা হইচে, সেইলার থাকি যাতে বিরি আসির পান, ভগবানের স্বভাবের ভাগীদার হন।

৫ এই বাদে খুব আগ্রহী হয় তোমারলার বিশ্বাস বাড়েয়া ভাল স্বভাব, ভাল স্বভাবের সোদে জ্ঞান বাড়ান,

৬ জ্ঞান বাড়েয়া নিজক দমন কর আর নিজক দমনে থুইয়া ধৈর্য ধর। ধৈর্য বাড়েয়া ভগবানক ভক্তি কর।

৭ অন্তরত ভক্তি বাড়েয়া ভাই-বইনিলাক অন্তরঙ্গ বাড়াও আর অন্তরঙ্গ বাড়েয়া পিরিতি কর।

৮ যদি তোমারলার অন্তরত এই সউগ গুণ থাকে আর সেইলা যদি উথুলি পরে, তাইলে প্রভু যীশু খ্রীষ্টক জানিবার কাম তোমারলার বিফল আর অকামের হবে না।

৯ আর যে মানষিলার অন্তরত এই গুণলা নাই উয়ায় বেশী দূর দেখির পাবে না। কেনেনা উয়ায় চখু থাকিতেও কানা। উয়ায় ভুলি গেইচে যে, উয়াক আগত পাপ থাকি ক্ষমা করা হইচে।

১০ এই বাদে ভাই বইনিলা, ভগবান যে তোমারলাক ডেকেইচে আর বাছাই করি নিচে সেইলা নিশ্চিত করি তুলি ধরিবার আরো বেশী করি মনযোগ দেও। এইলা ভাল করি মনযোগ দিলে কোনো দিনও উষ্টা খাবেন না।

১১ সেয়া হামারলার প্রভু আর মুক্তিদাতা যীশু খ্রীষ্টের চিরকালের শাসনত সোন্দের অধিকার তোমারলাক দেওয়া হবে।

১২ এই বাদে মুই সউগ সমায় এই বিষয় তোমারলাক ফম করি দিবার ধরচুং। সচাং তোমরালা তো এইলা জানেন আর যেই সইত্য তোমারলাক দেওয়া হইচে সেইটাত মজবুত থাকেন।

১৩ কিন্তুক মুই মনে করং যে, যত দিন মুই মাটির দেহা নিয়া থাকিম ততদিন মোর উচিত এই বিষয়লাত তোমারলাক জাগেয়া

তোলা।

১৪ কেনেনা মুই আর বেশী দিন এই দেহা নিয়া থাকিম না, সেইটা প্রভু যীশু মোক ভাল করি জানে দিচে।

১৫ মোর মরণের পাছত যাতে তোমরালা এইলা বিষয় মনত ধরি খুবার পান, মুই এই বাদে মরণ বত্তন চেষ্টা করিম।

১৬ হামারলার প্রভু যীশুর শক্তি আর উয়ায় ফির আসিবার সমন্ধে তোমারলাক যেইলা জানে যাবার ধরচি, সেইলা হামরা কোনো নাকান ফাকুয়া গল্প কই নাই। হামরালা উয়ার মহিমা নিজের চখু দিয়া দেখচি।

১৭ “ইয়ায় মোর মনের বাছাই করা বেটা, ইয়ার উপরা মুই সম্ভষ্ট,” স্বর্গের এই বাণীর মইদ্বো দিয়া জানা যায় যে, উয়ায় স্বর্গের বাপ ভগবানেরটে থাকি মান সন্মান গৌরব লাভ করিচে।

১৮ যেলা হামরালা উয়ার সোদে সেই পবিত্র পাহাড়ত আছিলং, সেলা স্বর্গ থাকি এই বাণীলা নিজের কানে শুনছিলং।

১৯ ভগবানের খবরিয়ালা যেইলা কতা কইচে, হামরা সেইলা বিষয়ে নিশ্চিত, ঐলা বিষয়ত তোমারলার মনযোগ দেওয়া দরকার। উমরা যেইলা কইচে, সেইলা হইলেক আন্ধার জাগাত ভইভইয়া আলোর নাকান, খ্রীষ্ট তোমারলার অন্তরত ভোরের তারার নাকান আলো দেয়। যতক্ষণ পর্যন্ত আন্ধার ততক্ষণ পর্যন্ত আলো দেয়।

২০ তাইলে এই গুরুত্বপূর্ণ কতাটা ফম থোন যে, শাস্ত্রের মইদ্বোত ভগবানের কোনো কতা ভগবানের খবরিয়ালার নিজের মন গড়া বিষয় না হয়।

২১ কেনেনা কোন ভাববাদী নিজের ইচ্ছামত কোনো ভাববাণী কয় নাই, কিন্তুক পবিত্র আত্মার চালনায় ভগবানের দেওয়া কতালা কইচে।

২ কিন্তুক ইস্রায়েলীলার মইদ্বোত যেমন ভন্ড ভাববাদী আছিলেক, তেমন তোমারলার মইদ্বোত ভন্ড গুরুও থাকিবে। উমরলা গোপনে এমন ভুল শিক্ষা নিয়া আসিবে যেইলা মানষির জীবন ধ্বংস করিবে, এমন কি উমারলাক যেই প্রভু অক্ল দিয়া কিনি মুক্ত করিচে তাকো অস্বীকার করিবে। এই নাকান করি উমরলা খুব তারাতারি নিজের উপরা ধ্বংস ডেকে আনিবে।

২ ম্যেলা মানষি ভন্ড গুরুলার লম্পটতা দেখা দেখি উমারলার ঘাটাত চলিবে। উমারলার বাদে মানষিলা সচাং ঘাটার নিন্দা করিবে।

৩ লোভ নালসার বশত পরি ছল চাতুরির কতা কয়া উমরলা নিজের নিজের বাদে তোমারলাক কামত নাগাবে। উমারলার শাস্তি উমারলার উপরা ম্যেলা দিন ধরি বুলির ধরচে। উমারলার ধ্বংস যে আসিচে, সেইটা চুপ করি বসি নাই।

৪ ঠিক সেই নাকান করি যেলা স্বর্গদূতলা পাপ করিচিলেক সেলা ভগবান উমারলাকও ক্ষমা করে নাই, বরং নরকের আন্ধারত বিচারের বাদে থুইয়া দিচে।

৫ আর উয়ায় পুরান দুনিয়াক দয়া করে নাই, যায় যায় ভগবানক ভক্তি করা বন্ধ করি দিচে, উমারলার উপরা জলের বানা আনছিলেক। কিন্তুক নোহ আর দোসরা সাত জনক ভগবান রক্ষা করিচে। এই নোহ প্রচার করিচিলেক যে, ভগবানের ইচ্ছা মতন চল।

৬ সদোম আর ঘমোরা গঞ্জের মানষিলাক ভগবান অগুন নাগেয়া ছোবা দিয়া ধ্বংস করি শাস্তি দিছিলেক। যায় যায় ভগবানক ভক্তি ভরে পিরিত করে নাই উমারলার অবস্থা সদোম আর ঘমোরার মত, সেইটা তোমারলার বাদে নমুনা।

৭ কিন্তুক ঐ গঞ্জ থাকি শ্রী লোটক ভগবান উদ্ধার করিচে। উয়ায় ভগবান ভক্ত আছিলেক, সেই গঞ্জের মানষিলা আইন-কানুন না মানিয়া লম্পটকারীর জীবন যাপন করিয়া লোটক যাতনা দিছিলেক।

৮ আর ঐ ভগবান ভক্ত মানষিটা দিনের পর দিন উমারলার সোদে থাকিয়া উমারলার কাম দেখছিলেক আর উমারলার কতাও শুনছিলেক। উমারলার আইন-কানুনের বিরুদ্ধে কাম দেখিয়া লোট অন্তরত খুব দুঃখ-কষ্ট পাইছিলেক।

৯-১০ এই নাকান ঘটনালা থাকি দেখা যায় যে, যায় যায় প্রভুক ভক্তি ভরে পিরিত করে, উমারলাক উয়ায় পরীক্ষাত পরিলেও রক্ষা করে। আর যায় যায় দুষ্ট আর বিশেষ করি যায় যায় পাপ স্বভাবের মন্দ ইচ্ছায় চলে, আর মহিমাময় অধিকারিলার আদেশ তুচ্ছ মনে করে, ভগবান উমারলাক শাস্তি দিবার বাদে বিচারের দিন পর্যন্ত ঠিক করি থুইচে। আর এই নাকান ভন্ড গুরুলা খুব সাহসী হয়। উমরালা নিজের ইচ্ছামত চলে আর স্বর্গের স্বর্গদূতলাক অপমান করিতেও ভয় খায় না।

১১ স্বর্গদূতলা শক্তি আর ক্ষমতাত বড় হয়। ঐ ভন্ড গুরুলার বিরুদ্ধে প্রভুরটে কোনো নালিশ করে না, উমারলার সমক্ষে নিন্দা করে না।

১২ কিন্তুক এই ভন্ড গুরুলা চিন্তা ভাবনা হীন পশুর নাকান, উমারলার জন্ম হইচে ফান্দত পরির আর নাশ হবার বাদে। উমরা না বুঝিয়া নিন্দা করে। আর জঙলের পশুলার নাকান করি উমরালাও এক দিন নাশ হয়। যাবে।

১৩ উমারলার বেয়া কামের পাওনা শাস্তি পাবে। এই ভন্ড গুরুলা দিনের বেলা খাবারের ঘরত বসিয়া মদ খায়া মাতলামি করির আনন্দ পায়। যেলা উমরালা তোমারলার সোদে খাবার বইসে, সেলা হৈ-হল্লা করি মদ খাইতে খাইতে উমার কামনায় উমরা খাওয়া-দাওয়ার মইদ্বো দিয়া নইজ্জা আর অসন্মান আনে।

১৪ উমরলার চখু কামনা-বাসনায় আর ব্যভিচারে ভরা। উমরলা কোনো দিনও পাপ কাম করা বন্ধ করে নাই, দুর্বলমনা মানষিলাক লোভ দেখেয়া পাপের ফান্দত ফেলেয়া। এই মানষিলাক অন্তর লোভ নালসায় পাকা। এই বাদে উমরলার উপরা শাও নামি আসিবে।

১৫ এই ভন্ড গুরুলা শ্রী বিয়োরের বেটা বিলিয়মের মত ভাল ঘাটা ছাড়িয়া বেয়া ঘাটাত গেইচে। উয়ায় বেয়া কামের বেতন পছন্দ করে।

১৬ কিন্তুক বিলিয়ম উয়ার মন্দ কামের বাদে একটা বোবা গাধার ধমক খাইছিলেক। গাধা পশু হয়। কেংকরি কতা কইলেক! এই গাধা মানষির নাকান করি কতা কয়া উয়ার পাগলামি বন্ধ করি দিলেক।

১৭ এই ভন্ড গুরুলা শুকি যাওয়া ঝরনার নাকান, হরকাত উড়িয়া বেড়া উড়ানি মেঘের নাকান। উমরলার বাদে ঘোর আন্ধারের জাগা বানা আছে।

১৮ ইমরলা ফাউকসালি বড় বড় কতা কয়া বেড়ায় আর মানষির মনত পাপ ভাব কামনা বাসনার ইচ্ছা জাগেয়া তোলে। উমরলা এই নাকান মানষিলাক ভুল ঘাটা দিয়া নিয়া যায় আর পাপের ফান্দোত ফেলেয়া এইলা থাকি এলা বিরি আসিয়া আরো ঐলাতে যাবার ধরচে।



১৯ আর এই ভন্ড গুরুলা স্বাধীনতা দিবার বাদে মানষিলারটে প্রতিজ্ঞা করিয়া এদিয়া উমরা নিজেই জঘন্য কামত বন্দী। কেনেনা কাণ্ডো যদি কোনো কিছুরটে হার মানে, তাইলে উয়াক উমারলার বন্দী হিসাবে থাকির নাগিবে।

২০ যায় যায় প্রভু আর মুক্তিদাতা যীশু খ্রীষ্টক অন্তরত জ্ঞান লাভ করি দুনিয়া ধ্বংসের হাত থাকি বিরিয়া আসি আরো যদি উমরলা আগিলা পাপের জীবনত ফিরি পতন হয়, তাইলে উমারলার আগের দশার থাকি শেষ দশা আরো বেয়া হবে।

২১ যে পবিত্র শিক্ষা উমরলা লাভ করিছিলেক, যদি উমরলা সেই পবিত্র শিক্ষা থাকিয়া দূরত সারি যায় তাইলে উমারলার সেই সচাং ঘাটা না জানায় ভাল আছিলেক।

২২ ফম থোন, একটা খনার বচন আছে, এইটা ভন্ড গুরুলার বাদে খাটে, “কুকুর নিজের বমি ফিরিয়া খায়, শুরোরক হাজার বার গাও ধোয়াইলেও কাঁদোত গড়াগড়ি দেয়।”

৩ আদরের সখালা, তোমারটে এইখান মোর দ্বিতীয় চিঠি। মোর এই দুইখান চিঠিত তোমারলাক ফম করি দিয়া তোমারলার খাটি অন্তরত সচাং চিন্তা ভাবনা জাগেয়া তুলির চাং।

২ আগিলা দিনলাত পবিত্র ভাববাদীলা যে কতলা কয়া গেইছিলেক, সেইলা আদেশ হামার প্রভু আর মুক্তিদাতার পেঠা

খবরিয়ালার মইন্ধো দিয়া কওয়া হইচে। সেইলা তোমারলাক ফম করি দিবার চেষ্টা করির ধরচুং।

৩ পইলাতে তোমারলার বুঝির নাগিবে, শেষকালে এইলা কতা মানষিলা শুনিয়া তোমারলারটে আসিয়া ঠাট্টা করিবে। উমরালা নিজের খেয়াল খুশি মত কামনা বাসনার হাবিলাস করিবে।

৪ সেয়া উমরালা কয়া বেড়াবে, “উয়ায় যে আসিবার বাদে প্রতিজ্ঞা করিচিলেক, সেইটা কদিন? দুনিয়া সিদ্ধনের সমায় থাকি যেই নাকান চলির ছিলেক, সেই নাকান হামারলার বাপ ঠাকুরদার মরণের পাছত থাকি সৌগে তো একে নাকান চলির ধরচে।”

৫ এই মানষিলা ইচ্ছা করি ভুলি যায়, মেলা দিন আগত ভগবান উয়ার বাইক্য দিয়া দ্যাওয়া সিদ্ধন করিচিলেক, জল দিয়া আর জলের মইন্ধো থাকিয়া এই দুনিয়া সিদ্ধন হইছিলেক।

৬ সেই সমায় বানার জলে দুনিয়া ধবংস হইছিলেক।

৭ আর ভগবানের একেই বাইক্য দিয়া এলাকার দুনিয়া আর দ্যাওয়া ছোবা দিবার বাদে থোয়া হইচে। ভগবানক ভক্তি করে না এই মানষিলার বিচার আর ধবংসের দিন পর্যন্ত রক্ষা করা হবে।

৮ কিন্তুক আদরের সখালা, এই কতা ভুলি যান না, প্রভুরটে এক দিন এক হাজার বছরের সমান আর এক হাজার বছর এক দিনের সমান।

৯ কাণ্ডো কাণ্ডো মনে করে যে, প্রভু উয়ার প্রতিজ্ঞা পূরণ করির দেরি করির ধরচে। কিন্তুক সেইটা ভাবা ঠিক না হয়। কেনেনা উয়ায় চায় না যে, কাণ্ডো ধবংস হয়্যা যাউক। উয়ায় চায় যায় পাপ করিচে উয়ায় মন ফিরাউক।

১০ কিন্তুক প্রভু এক দিন চোরের নাকান করি আসিবে। সেদিন দ্যাওয়া হু হু শব্দ করি বিনাশ হয়্যা যাবে। চান, বেলা, তারা এইলা ছাড়াও এই দুনিয়া আর দুনিয়ার মইদ্বোত যা কিছু আছে সউগে অগুনত ছোবা যাবে।

১১ এই নাকান করি যেলা সৌগে ধবংস হয়্যা যাবে, সেলা চিন্তা কর, কি নাকানের মানষি হওয়া দরকার। এই বাদে তোমারলার পবিত্র হয়্যা জীবন যাপন করা আর ভগবানের সেবার কাম করা উচিত।

১২ আর আকুল হয়্যা ভগবানের সেই দিনের বাদে বাছে থাকা উচিত, যেদিন দ্যাওয়ার সউগ কিছু অগুন দিয়া ছোবা যায়্যা ধবংস হবে, চান, বেলা, তারা সৌগে অগুনে গলি যাবে।

১৩ কিন্তুক ভগবান হামারলার বাদে এক নয়া দ্যাওয়া আর একটা নয়া দুনিয়া সিজ্জন করিবে বুলিয়া কতা দিছিলেক। এই কতা পূরণ হবার বাদে হামরা বাছে আছি, আর ওটেকোনা সগায় সৎ জীবন যাপন করে।

১৪ আদরের সখালা, তোমরালা এলা এইলা ঘটনা ঘটিবার বাদে বাছে আছেন, ঐ দিন তোমরালা নিখুঁতিয়া আর খাটি হয়্যা আর

ভগবানের সোদে শান্তিতে থাকির পাবেন।

১৫ ফম থোন, মানষিক পাপ থাকি মুক্তির সুযোগ দিবার বাদে হামারলার প্রভু ধৈর্য ধরি আছে। হামার আদরের ভাই পৌল ভগবানের জ্ঞানে তোমারলাক এই বিষয়ে নেখিচে।

১৬ উয়ার সউগ চিঠিলাত উয়ায় এই বিষয়লা সমন্ধে নেখে। এই চিঠিলার কিছু কিছু জিনিস আছে, যেইলা বোঝা কঠিন। সেই বাদে যায় যায় শিষ্য হয়। ভাল শিখির পায় নাই, যার যার মন অস্থির, উমরালা দোসরা দোসরা শাস্ত্রের নাকান এই জিনিসলার মানে ঘুরিয়া কয়া নিজে নিজের ধ্বংস ডেকে আনে।

১৭ আদরের সখালা, তোমরালা এইলা কতা আগত জানির পাইচেন বুলিয়া সাবধান হন। যাতে পাজি মানষিলা তোমারলাক ভুল ঘাটাত নিয়া যাবার না পায়। নিজের অন্তরত বিশ্বাস নিয়া দূরত সারি না রন।

১৮ বরং তোমরালা হামারলার প্রভু মুক্তিদাতা যীশুর দয়াত, আর উয়ার জ্ঞানে অবশ্যই বড় হন। এলা থাকি চিরকাল উয়ারে গৌরব হউক। আমেন॥

## ১ যোহন

১ পইলা থাকি যায় ছিলেক, যার মুখের কতা হামরা শুনি আসছি, যাক নিজের চোখে দেখিচি, যাক ভাল করি মনযোগ দিয়া নজর দিচি, যাক নিজের হাত দিয়া নারচি, এইটে কোনা হামরালা সেই জীবন্ত বাইকেয়ের বিষয়ে নেখির ধরচি।

২ আর সেই জীবন প্রকাশ হইলেক। হামরা উয়াক দেখিয়া উয়ার বিষয়ে সাক্ষ্য দিবার ধরচি। যায় স্বর্গের বাপেরটে আছিলেক আর হামারলারটে প্রকাশ হইলেক, সেই অমৃত জীবনের খবর তোমারলাক জানের ধরচি।

৩ হামরা যেইটা দেখিচি আর শুনিচি, উয়ার সমন্ধে তোমারলাক জানের ধরচি। যাতে তোমার আর হামার মইদ্বোত একটা যোগাযোগ সমন্ধ গড়ি ওটে, হামরালা সেইলায় জানের ধরচি। হামারলার এই যোগাযোগ সমন্ধটা হইলেক স্বর্গের বাপ আর উয়ার বেটা যীশু খ্রীষ্টের মইদ্বোত।

৪ হামারলার আনন্দ যাতে ভরপুর হয় ওটে এই বাদে তোমারলাক নেখির ধরচি।

৫ এই কতা হামরা প্রভু যীশুরটে শুনিয়া তোমারলাক জানের ধরচি যে, ভগবান হইলেক আলো উয়ার মইদ্বোত কোন আন্ধার নাই।

৬ যদি হামরালা কই ভগবান আর হামারলার মইদ্বোত যোগাযোগের সমন্ধ আছে, কিন্তুক এদিয়া হামরালা আন্ধার ঘাটা দিয়া যাবার ধরচি, তাইলে হামরালা মিছাং কতা কবার ধরচি, সচাং ঘাটা দিয়া চলি না।

৭ কিন্তুক ভগবান যেই নাকান আলোত আছে সেই নাকান হামরালা যদি আলোত চলি, তাইলে জানির পামু হামারলার মইদ্বোত যোগাযোগ সমন্ধ আছে আর ভগবানের বেটা যীশুর অন্ত্র দিয়া হামারলার সউগ পাপ ধুইয়া শুদ্ধি করে।

৮ যদি কই হামারলার মইদ্বোত কোনো পাপ নাই, তাইলে হামরালা নিজক ফাকি দিবার ধরচি। ইয়াতে এটায় বুঝা যায় যে, হামারলার অন্তরত ভগবানের সচাং শিক্ষা নাই।

৯ যদি হামরা হামারলার পাপ স্বীকার করি তাইলে উয়ায় সেলোয় হামারলার পাপ ক্ষমা করে, আর সউগ অন্যায় থাকি শুদ্ধি করে, কেনেনা উয়ায় বিশ্বস্ত আর ন্যায় বিচারক।

১০ কিন্তুক হামরা যদি কই, পাপ নাই করি তাইলে হামরা ভগবানক মিথ্যাবাদী বানাই, আর উয়ার বাইক্য হামারলার অন্তরত নাই।

১১ মোর আদরের ছাওয়ালা, তোমরালা যাতে পাপ না করেন, এই বাদে মুই তোমারলারটে এইলা কতা নেথির ধরচুং। কিন্তুক যদি কাণ্ডো পাপ করি, তাইলে স্বর্গের বাপেরটে হামারলার পক্ষ হয়।

কতা কবার বাদে এক জনে আছে; উয়ায় যীশু খ্রীষ্ট, যায় ন্যায়বান।

২ যীশু হামারলার পাপের প্রায়শ্চিত্ত করিলেক। আর উয়ায় নিজেই সেই প্রায়শ্চিত্ত, খালি হামারলার পাপ না হয়, কিন্তুক গোটায় দুনিয়ার পাপ দূর করির বাদে উয়ায় নিজের জীবন সঁপে দিচে।

৩ হামরা যদি উয়ার আদেশ পালন করি চলি, তাইলে হামরা সচাং করি বুঝিচি যে, উয়াক হামরালা চিনি।

৪ যায় কয়, “মুই উয়াক চেনং,” আর উয়ার আদেশ পালন না করে, উয়ায় মিথ্যাবাদী; উয়ার অন্তরত সচাং শিক্ষা নাই।

৫-৬ কিন্তুক যায় উয়ার বাইক্য পালন করে উয়ার অন্তরত সচাং ভগবানের পিরিত পুরাপুরি আছে। যদি কাণ্ডো কয় যে, উয়ায় ভগবানের নগত আছে তা হইলে উয়ারও উচিত যীশু যেংকরি চলছিলেক অংকরি চলা। এইলা থাকি হামরা জানির পাই যে, হামরা উয়ার সোদে আছি।

৭ আদরের ছাওয়ালা, মুই তোমারলারটে কোনো নয়া আদেশের কতা নেখং নাই, বরং পইলা থাকি যে আদেশ আছিলেক সেই পুরান আদেশের কতালা মুই নেখির ধরচুং। তোমরা যেই কতালা আগত শুনিচেন, সেইলায় হইলেক পুরান আদেশ।

৮ যে আদেশের কতা এলা মুই তোমারলারটে নেখির ধরচুং, সেইলা পুরান হইলেও নয়া। এই আদেশ যে সচাং সেইটা যীশু

খ্রীষ্টের মইদ্বোত আর তোমারলার জীবনত দেখা গেইচে, কেনেনা আন্ধার ঘুচি যাবার ধরচে আর সেই আসল আলো এলা জ্বলির ধরচে।

৯ যেই মানষি কয় উয়ায় আলোত আছে, কিন্তুক নিজের ভাই বইনিক ঘিন খায় উয়ায় এলাও আন্ধারত পরি আছে।

১০ যায় উয়ার নিজের ভাই বইনিক পিরিতি করে উয়ায় আলোত থাকে, আর উয়ায় কোনো দিনও উঠা খাবে না।

১১ কিন্তুক যায় উয়ার নিজের ভাই বইনিক ঘিন খায় উয়ায় এলাও আন্ধারত পরি আছে আর আন্ধারের ঘাটা দিয়া চলা ফিরা করির ধরচে। উয়ায় জানে না উয়ায় কোটে যাবার ধরচে, কেনেনা আন্ধার উয়াক কানা করি দিচে।

১২ হে মোর আদরের ছাওয়ালা, মুই তোমারলারটে নেখির ধরচুং, যীশু খ্রীষ্টের মইদ্বো দিয়া তোমারলার পাপ ক্ষমা করা হইচে।

১৩ যায় যায় এলা বাপ হইচেন, মুই তোমারলারটে নেখির ধরচুং, যায় পইলা থাকি উয়াক তোমরা চেনেন। গাবুর চেংড়ালা মুই তোমারলারটে নেখির ধরচুং, তোমরালা শয়তানক হারেয়া জয় লাভ করিচেন।

১৪ ছাওয়ালা, মুই তোমারলাক নেখির ধরচুং, তোমরালা স্বর্গের বাপ ভগবান চেনেন। যায় যায় এলা বাপ হইচেন, মুই তোমারলাক নেখির ধরচুং, যায় পইলা থাকি আছে উয়াক তোমরালা চেনেন।



গাবুর চেংড়ালা, মুই তোমারলাক নেখির ধরচুং, তোমরা শক্তিবান, ভগবানের বাইক্য তোমারলার অন্তরত আছে, আর তোমরা শয়তানক হারে দিয়া জয় লাভ করিচেন।

১৫ তোমরালা এই দুনিয়া আর দুনিয়ার কোনো কিছুক পিরিত না করেন। যদি কাণ্ডো দুনিয়াক পিরিত করে তাইলে উয়ায় স্বর্গের বাপক পিরিত করে না।

১৬ কেনেনা দুনিয়ার মইন্ধোত যেইলায় আছে সেইলা হইলেক, দেহার কামনা, চখুর লোভ আর সংসারি বিষয়ে অহংকার, এইলা কোনোটাও স্বর্গের বাপেরটে থাকি আইসে না, এইলা দুনিয়া থাকি আইসে।

১৭ এই দুনিয়া উয়ার কামনা-বাসনাত ভাসি যাবার ধরচে, কিন্তুক যায় ভগবানের ইচ্ছা পালন করে তায় চিরকাল বত্তি রবে।

১৮ আদরের ছাওয়ালা, এইটা শেষ কাল। তোমরালা শূনির ধরচেন যে, এক জন খ্রীষ্ট বিরোধী আসির ধরচে, একে নাকান এলায় খ্রীষ্টের মেলা শত্রু ইয়ার মইন্ধে আসিচে। এই বাদে হামরালা বুঝির পাবার ধরচি যে, এইটায় শেষ কাল।

১৯ যীশু খ্রীষ্টের এই শত্রুলা হামারলার মইন্ধো থাকি বাইর হয়। গেইচে। উমরালা কিন্তুক হামার মানষি আছিলেক না। যদি উমরালা হামার মানষি হইলেক হয়, তাইলে উমরা হামার নগত রইলেক হয়, কিন্তু উমরালা বাইর হয়। গেইচে বুলিয়া বুঝা যাবার ধরচে, উমরা কাণ্ডো হামার না হয়।

২০ কিন্তুক তোমারলাক তো পবিত্রজন বরণ করিচে, তার মানে পবিত্র আত্মাক পাইচেন আর তোমরালা সগায় সচাং শিক্ষাটাক জানির পাইচেন।

২১ মুই এইটা কয়া তোমারলাক নেখং নাই যে, তোমরালা সচাং শিক্ষাটা জানেন না। কিন্তুক তোমরা সচাংটা জানেন আর এইটাও জানেন যে, সচাং থাকি মিছাং আইসে না। আর এই বাদে তোমারলারটে নেখিলুং।

২২ যায় কয়, যীশু বাছাই করা রাজা না হয়, উয়ায় মিথ্যাবাদী ছাড়া আর কি? যায় স্বর্গের বাপ আর বেটাক অস্বীকার করে উয়ায় তো খ্রীষ্টের বিরোধী

২৩ যায় যায় বেটাক অস্বীকার করে উয়ার সোদে বাপের কোন সমন্ধ নাই, কিন্তুক যায় বেটাক স্বীকার করে উয়ার সোদে বাপেরও সমন্ধ আছে।

২৪ পইলা থাকি তোমরালা যেইলা শুনি আসচেন সেইলা যাতে তোমারলার অন্তরত রয়। পইলা থাকি তোমরালা যেইলা শুনির ধরচেন সেইলা যদি তোমার অন্তরত থাকে তাইলেই তোমরালা বেটা আর বাপের সোদে একটে থাকিবেন।

২৫ আর এইটায় হইলেক অমৃত জীবন, যেইটা খ্রীষ্ট হামারলাক দিবার প্রতিজ্ঞা করিচে।

২৬ যায় যায় তোমারলাক বেয়া ঘাটা দিয়া নিয়া যাবার চেষ্টা করির ধরচে, মুই উমারলার সমন্ধে তোমারলাক এইলা কতা

নেখিলুং।

২৭ কিন্তুক তোমরালা তো খ্রীষ্টেরটে থাকি বিশেষ বরদান পাইচেন, মানে পবিত্র আত্মাক পাইচেন। উয়ায় তোমারলার অন্তরত থাকে। সউগ বিষয় তোমারলাক পবিত্র আত্মা শিক্ষা দিবার ধরচে। এই বাদে তোমারলার দোসরা কাঙোর শিক্ষার দরকার নাই। উয়ায় এক মাত্র সচাং, উয়ারটে খানিকো মিছাং নাই। এই বাদে পবিত্র আত্মা যেংকরি তোমারলাক খ্রীষ্টের সোদে থাকির শিক্ষা দেয়, অংকরি খ্রীষ্টের সোদে থাকো।

২৮ আদরের ছাওয়ালা, মুই এই বাদে কবার ধরচুং, তোমরালা খ্রীষ্টের মইন্ধোত রন যাতে যেয়ো উয়ায় ফিরি আসিবে সেয়ো যাতে হামার মনত সাহস থাকে আর শরম খাবার না নাগে।

২৯ যদি তোমরালা জানিলেন হয় যে, উয়ায় ন্যায়বান তাইলে এইটাও জানি রাখো যে, যায় যায় ভাল কাম করির বাদে নিজক ব্যস্ত রাখে, ভগবান থাকি উমারলার জন্ম হইচে।

৩ খানিক ভাবি দেখো, স্বর্গের বাপ হামারলাক কত পিরিতি করে! উয়ায় হামারলাক উয়ার ছাওয়া বুলি ডেকায়, আসলে হামরালা উয়ারে ছাওয়া। এই বাদে দুনিয়া হামারলাক চেনে না, কেনেনা এই দুনিয়া প্রভুক মানি নেয় নাই।

২ আদরের ছাওয়ালা, এলা হামরালা ভগবানের ছাওয়া, কিন্তুক আরো কি হমু সেইলা এলাও জানিনা। খালি হামরালা জানি,

যেহা খ্রীষ্ট আসিবে সেহা হামরা উয়ারে নাকান হমু, কেনেনা উয়ায় আসলে যেই নাকান আছে ঐ নাকানে উয়াক দেখির পামু।

৩ যায় যায় খ্রীষ্টের উপরা এই আশা করে উয়ায় নিজক খাটি করিতে থাকে, যেমন যীশু খাটি।

৪ যায় যায় পাপ করে উমরালা ভগবানের বিধির বিধান পালন না করে। ফম থোন, ভগবানের নিয়ম না মানায় পাপ।

৫ তোমরালা জানেন, হামারলাক পাপ থাকি মুক্তি করির বাদে খ্রীষ্ট এই দুনিয়াত আসিচে। উয়ার অন্তরত কোন পাপ নাই।

৬ যায় যায় খ্রীষ্টের মইন্ধোত থাকে, উমরা পাপ করে না। আর যায় যায় পাপত পড়ি আছে উমরালা যীশুক দেখির পায় নাই আর চিনির পায় নাই।

৭ আদরের ছাওয়ালা, কাঙো যাতে তোমারলাক বেয়া ঘাটা দিয়া নিয়া না যায়। তোমার ভাল কাম থাকি বুঝা যায় তোমরা ন্যায়বান যেই নাকান যীশু ন্যায়বান তোমরাও ন্যায়বান।

৮ যায় পাপ করিতে থাকে উয়ায় শয়তানের, কেনেনা শয়তান পইলা থাকি পাপ করি আসচে। শয়তানের কামক ধ্বংস করির বাদে ভগবানের বেটা যীশু আসিচে।

৯ ভগবান থাকি যার জন্ম হইচে, উয়ায় পাপত পরি থাকে না। কেনেনা ভগবানের স্বভাব উয়ার মইন্ধোত আছে। ভগবানেরটে থাকি জন্ম হইচে বুলিয়া উয়ায় পাপী জীবন কাটের পায় না।

১০ যায় যায় ভাল কামত ব্যস্ত থাকে না আর উয়ার গুরু ভাই বইনিলাক পিরিতি করে না, উমরা ভগবানের ছাওয়া না হয়। এইটা থাকি জানা যায় যে, কায় ভগবানের ছাওয়া আর কায় শয়তানের ছাওয়া।

১১ পইলা থাকি যে কতা শুনি আসচেন, সেইটা হইলেক হামারলার একে অপরক পিরিতি করা দরকার।

১২ সেই বাদে মুই কবার ধরচুং হামরা যাতে কয়িনের নাকান না হই। কয়িন শয়তানের মানষি আছিলেক, এই বাদে উয়ায় নিজের ভাই হেবেলক খুন করিচে। কিসের বাদে উয়ায় ভাইয়োক খুন করিচে? কেনেনা উয়ায় বেয়া কাম করি বেড়াইচে, আর উয়ার ভাই ভাল কাম করিচিলেক।

১৩ ভাই বইনিলা, দুনিয়ার মানষিলা যদি তোমারলাক ঘিন খায়, তার বাদে অচানক না হন।

১৪ হামরালা গুরু ভাই বইনিলাক পিরিত করি বুলিয়া বুঝির পাবার ধরচি, হামরালা মরণ পার হয়। জীবনত আসছি। যায় যায় পিরিত না করে, উমরালা এলাও মরণের ঘাটাত পরি আছে।

১৫ যায় নিজের ভাই বইনিলাক ঘিন খায় উয়ায় এক জন খুনী। কোনো খুনীর ভিতরত অমৃত জীবন থাকে না, সেইটা তোমরালা সগায় জানেন।

১৬ খ্রীষ্ট হামারলার বাদে নিজে পরান দিছিলেক, এই বাদে পিরিতি কি সেইটা হামরালা জানির পাইচি। তাইলে গুরু ভাই

বইনির বাদে নিজের পরান দেওয়া হামারলারও উচিত।

১৭ যার এই দুনিয়াত বত্তি থাকির নাকান সয়-সম্পত্তি আছে, উয়ায় উয়ার ভাই বইনির অভাব দেখিয়াও যদি চখু মুঞ্জিয়া রয়, তাইলে কেংকরি উয়ার অন্তরত ভগবানের পিরিতি থাকির পায়?

১৮ ছাওয়ালা, হামরালা খালি মুখতে পিরিতের কতা না কয়া, কামের মইন্ধো দিয়া সচাং পিরিত দেখাই।

১৯-২০ সেলো হামরালা জানির পামু যে, হামরালা সচাংয়ের নগত আছি। এইলা ছাড়া কোনো ব্যাপারে যদি হামারলার অন্তর হামারলাক দোষী করে, তাইলে ভগবানের আগত হামারলার অন্তরক হামরা সান্তনা দিবার পামু। আর ভগবান তো হামারলার অন্তরের চায়াও মহান, উয়ায় সউগ কিছুই জানে।

২১ আদরের ছাওয়ালা, হামারলার অন্তর যদি হামারলাক দোষী না করে, তাইলে হামরালা ভগবানের আগত থাকিবার সাহস পামু।

২২ সেলো ভগবানেরটে যা কিছু চামু ঐলা সউগ কিছু পামু, কেনেনা উয়ায় যেইলা আদেশ দিচে, সেইলা হামরালা পালন করচি, আর উয়ায় যেইলা কামের বাদে সন্তুষ্ট হয় হামরা সেইলায় করি।

২৩ এই আদেশ হইলেক, হামরালা যাতে উয়ার বেটা প্রভু যীশু খ্রীষ্টক বিশ্বাস করি। আর একে অপরক পিরিতি করি, যেই নাকান উয়ায় আদেশ দিচে।

২৪ যায় যায় ভগবানের আদেশ পালন করে উমরা উয়ার মইদ্বোত থাকে আর উয়াও উমার অন্তরত থাকে। ভগবান যে হামার অন্তরত আছে কেংকরি জানির পামু? যে পবিত্র আত্মা হামারলাক দান করিচে, সেই পবিত্র আত্মার মইদ্বো দিয়া হামরা জানির পাই যে, উয়ায় হামার অন্তরত আছে।

৪ মোর আদরের ছাওয়ালা, তোমরালা সউগ আত্মালাক বিশ্বাস না করেন, তোমরা বরং যাচাই করি দেখ যে, উমরা ভগবান থাকি আসচে কিনা। কেনেনা এই দুনিয়াত মেলা ভন্ড ভাববাদী বিরাইচে।

২ ভগবানের আত্মাক তোমরা কেমন করি চিনির পাবেন? যেই আত্মা স্বীকার করে যীশু খ্রীষ্ট মানষি হয় আসচে, সেই আত্মাটায় ভগবান থাকি আসচে।

৩ কিন্তুক যেই আত্মা যীশুক অস্বীকার করে সেই আত্মা ভগবান থাকি আইসে নাই, অস্বীকার করা আত্মা খ্রীষ্টের বিরোধী এই আত্মা যে আসচে সেইটা তোমরা শুনিচেন আর আসলে সেই আত্মা এলাও এই দুনিয়াত আছে।

৪ মোর আদরের ছাওয়ালা তোমরা ভগবানের মানষি, এই বাদে তোমরালা ভণ্ডলাক হাড়েয়া জিতি আসচেন। কেনেনা তোমারলার অন্তরত যে আত্মা আছে উয়ায় এই দুনিয়ার আত্মার চায়াও মহান।

৫ সেই ভণ্ডা এই দুনিয়ার; সেই বাদে উমরা এই দুনিয়ার কতা কয়, আর দুনিয়া উমার কতা শোনে।

৬ কিন্তুক হামরা ভগবানের মানষি, ভগবানক যায় চেনে উয়ায় হামারলার কতা শোনে, কিন্তুক যায় ভগবানের না হয়, উয়ায় হামারলার কতা শোনে না। ইয়াতে হামরা সচাং আত্মা আর ছলনার আত্মা চিনির পারি।

৭ মোর আদরের ছাওয়ালা, আইস, হামরা একে অপরক পিরিতি করি, কেনেনা পিরিতি ভগবানেরটে থাকি আইসে। যায় যায় পিরিত করে, ভগবান থাকি উমারলার জন্ম হইচে আর উমরালা ভগবানক চেনে।

৮ যায় যায় পিরিত করে না, উমরা ভগবানক চেনে না, কেনেনা ভগবান নিজেই পিরিতি।

৯ ভগবান হামারলার প্রতি উয়ার পিরিতি এই নাকান করি দেখাইচে যে, উয়ায় উয়ার একনায় মাত্র বেটাক এই দুনিয়াত পেঠাইলেক, যাতে উয়ার মইন্ধো দিয়া হামরা অমৃত জীবন লাভ করি।

১০ হামরা যে ভগবানক পিরিত করচি খালি সেইটা না হয়, উয়ায় হামাক পিরিত করিয়া উয়ার বেটাক পেঠেয়া দিচে। যাতে বেটা উয়ার নিজের জীবন হামারলার পাপের প্রায়শ্চিত্তের বলির বাদে সঁপে দিয়া হামারলার পাপ দূর করিয়া ভগবানক সন্তুষ্ট করে। এইটায় হইলেক পিরিতি।



১১ আদরের ছাওয়ালা, ভগবান যেহেতু হামারলাক পিরিত করিচে, সেহেতু হামারলারও একে অপরক পিরিত করা উচিত।

১২ কাণ্ডো কোন দিন ভগবানক দেখে নাই। যদি হামরা একে অপরক পিরিত করি, তাইলে বুঝা যাবে যে, ভগবান হামারলার অন্তরত আছে। আর উয়ার পিরিত হামারলার অন্তরত পুরাপুরি কামের ফল ধরচে।

১৩ উয়ার আত্মা হামারলাক দান করিচে, ইয়াতে হামরা জানির পাবার ধরচি যে, হামরা উয়ার মইন্ধোত আছি আর উয়ায় হামার অন্তরত আছে।

১৪ হামরা দেখিচি আর সাক্ষী দিবার ধরচি যে, স্বর্গের বাপ উয়ার বেটাক দুনিয়ার মুক্তিদাতা হিসাবে পেঠাইচে।

১৫ যে কাণ্ডো স্বীকার করে যীশু ভগবানের বেটা, ভগবান উয়ার মইন্ধোত আছে আর উয়াও ভগবানের মইন্ধোত আছে।

১৬ হামরা জানি ভগবান হামাক পিরিত করে আর উয়ার পিরিতির উপরাত হামারলার ভরসা আছে। ভগবান নিজেই পিরিত। পিরিতির মইন্ধোত যায় থাকে উয়ায় ভগবানের মইন্ধোত থাকে আর ভগবান উয়ার মইন্ধোত থাকে।

১৭ এই নাকান করি হামারলার অন্তরত পিরিত পুরাপুরি কামের ফল ধরচে। এই বাদে বিচারের দিনত হামরা সাহস পামু, কেনেনা যীশু এই দুনিয়াত আছিলেক আর হামরাও এই দুনিয়াত একে নাকান আছি।

১৮ এই পিরিতির মইদ্বোত কোনো ভয় নাই, খাটি পিরিত ভয় দূর করি দেয়। কেনেনা ভয়ের নগত শাস্তির চিন্তা জড়ে থাকে। যায় ভয় খায় উয়ার মইদ্বোত পিরিতি পুরাপুরি ফল ধরে নাই।

১৯ উয়ায় হামারলাক পইলা পিরিত করিচে বুলিয়া হামরা পিরিতি করির ধরচি।

২০ যায় কয় যে উয়ায় ভগবানক পিরিত করে, কিন্তুক এদিয়া উয়ার গুরু ভাই বইনিলাক ঘিন খায়, উয়ায় মিথ্যাবাদী; কেনেনা যায় চখুত দেখা ভাই বইনিলাক পিরিত করে না, উয়ায় দেখা না যাওয়া ভগবানক কেংকরি পিরিত করির পায়?

২১ হামরা উয়ারটে থাকি এই আদেশ পাইচি, যায় ভগবানক পিরিত করে, উয়ায় গুরু ভাই বইনিলাক পিরিত করুক।

৫ যায় যায় বিশ্বাস করে যীশুই বাছাই করা রাজা, উমরালায় হইলেক ভগবানের ছাওয়া। যে কাণ্ডো বাপক পিরিত করে, উয়ায় ছাওয়ালাকও পিরিত করে।

২ একে নাকান যেয়ো হামরা ভগবানক পিরিত করি আর উয়ার আদেশ পালন করি, সেয়ো জানির পাই যে, ভগবানের ছাওয়ালাকও হামরা পিরিত করি।

৩ ভগবানের আদেশ পালন করায় হইলেক ভগবানক পিরিত করা। উয়ার আদেশ মানা কোনো কঠিন কাম না হয়।

৪ কেনেনা ভগবানের প্রতিটা ছাওয়া এই দুনিয়ার উপরাত জয় লাভ করে। আর দুনিয়ার উপরাত যেইটা জয় লাভ করিচে, সেইটা হইলেক হামার বিশ্বাস।

৫ যায় যায় বিশ্বাস করে, যীশু ভগবানের বেটা, উমরানাথ খালি এই দুনিয়ার উপরাত জয় লাভ করে।

৬ ইয়ায় যীশু খ্রীষ্ট, যায় জল আর অক্তের মইদ্বো দিয়া আসিচে। খালি জলের মইদ্বো দিয়া না হয়, কিন্তুক জল আর অক্তের মইদ্বো দিয়া আসিচে। পবিত্র আত্মা এই সমন্ধে সাক্ষ্য দেয়, কেনেনা পবিত্র আত্মা নিজেই সচাং।

৭ যীশুর সমন্ধে তিন জন সাক্ষ্য দিবার ধরচে,

৮ পবিত্র আত্মা, জল, আর অক্ত এই তিন জনের সাক্ষ্য এক।

৯ অনেক সমায় হামরা মানষির সাক্ষ্য মানি নিবার পাই, কিন্তুক ভগবানের সাক্ষ্য তো অনেক মজবুত। আর উয়ায় উয়ার বেটার সমন্ধে সেই সাক্ষ্যই দিচে।

১০ ভগবানের বেটার উপরাত যায় বিশ্বাস করে, উয়ার অন্তরত সেই সাক্ষ্য আছে। যায় যায় ভগবানক বিশ্বাস না করে, উমরা ভগবানক মিথ্যাবাদী বানাইচে, কেনেনা ভগবান উয়ার বেটার সমন্ধে সাক্ষ্য দিচে, আর উমরা সেইটা বিশ্বাস করে নাই।

১১ সেই সাক্ষ্য এই যে, ভগবান হামারলাক অমৃত জীবন দিচে, আর সেই জীবনটা উয়ার বেটার মইদ্বোত আছে।

১২ ভগবানের বেটাক যায় পাইচে, উয়ায় জীবন পাইচে, কিন্তুক যায় ভগবানের বেটাক পায় নাই, উয়ায় জীবন পায় নাই।

১৩ যায় যায় তোমরালা ভগবানের বেটার উপরাত বিশ্বাস করেন, মুই তোমারলারটে এই সমন্ধে নেখিনুং, যাতে তোমরা জানির পান যে তোমরালা অমৃত জীবন পাইচেন।

১৪ ভগবানের উপরা হামার এই ভরসা আছে যে, হামরা যদি উয়ার ইচ্ছা মতন কোন কিছু চাই, তাইলে উয়ায় হামার কতা শোনে।

১৫ আর হামরা যদি সচাং করি জানি যে, উয়ায় হামার কতা শোনে তাইলে এইটা বুঝির নাগিবে, যেনে হামরা যেইটা চাবার ধরটি সেইটা পাইচি।

১৬ যদি কাণ্ডো উয়ার গুরু ভাই বইনিক এমন কোন পাপ করির দেখে, যেইটার পরিণাম আত্মিক মরণ। তাইলে উয়ায় উয়ার ভাই বইনির বাদে প্রার্থনা করিবে, আর ইয়াতে ভগবান উয়াক জীবন দিবে। মুই এইটে উমারলার কতা কবার ধরচুং, কিন্তুক এমন পাপ আছে যেইলা আত্মিক মরণের ঘাটাত নিয়া যায়, মুই সেইলার ব্যাপারে তোমারলাক প্রার্থনা করির কবার ধরচুং না।

১৭ সউগ নাকানের অন্যায় হইলেক পাপ, কিন্তুক সউগ পাপের পরিণাম আত্মিক মরণ না হয়।

১৮ হামরা জানি ভগবান থাকি যার জন্ম হইচে, উয়ায় পাপত পড়ি রয় না। ভগবান উয়াক রক্ষা করিবে। আর শয়তান উয়াক

নারিবারও পাবে না।

১৯ হামরা জানি যে, হামরা ভগবানের মানষি আর গোটায় দুনিয়া শয়তানের খপ্পরত পড়ি আছে।

২০ হামরা এইটাও জানি যে, ভগবানের বেটা আসিয়া হামারলাক বুঝির শক্তি দিচে, যাতে সচাং ভগবানক চিনির পাই। আর হামরা উয়ার সোদে যুক্ত। মানে উয়ার বেটা যীশু খ্রীষ্টের সোদে একটে আছি। উয়ায় সচাং ভগবান আর উয়ায় অমৃত জীবন।

২১ আদরের ছাওয়ালা, তোমরালা মূর্তি পূজা থাকি দূরত থাক॥

## ২ যোহন

১ ভগবান যাক বাছাই করিচে ঐ শ্রীমতি আর উয়ার ছাওয়ালারটে মুই দেওয়ানী এই চিঠি নেখিলুং। ভগবান সচাং বুলিয়া, তারে বাদে মুই তোমারলাক সগাকে পিরিতি করং। মুই যে খালি তোমারলাক পিরিতি করং সেইটা কিন্তুক না হয়, কিন্তুক যায় যায় ভগবানের সচাং শিক্ষা জানির পাইচে উমরা সগায় তোমারলাক পিরিত করে।

২ এই সচাং শিক্ষা হামারলার অন্তরত আছে আর এইটা চিরকাল ধরি হামারলার নগত থাকিবে।

৩ স্বর্গের বাপ ভগবানেরটে আর সেই বাপের বেটা যীশু খ্রীষ্টেরটে থাকি সচাং পিরিতির মইদ্বো দিয়া দয়া, করুণা, আর শান্তি হামারলার নগত থাকিবে।

৪ স্বর্গের বাপ যেই নাকান নিয়ম দিচে ঐ নিয়মের নাকান করি তোর কয়জন ছাওয়ালা সচাং ঘাটা দিয়া চলির ধরচে এই দেখিয়া মুই খুশি হলুং।

৫ হামরা যাতে একে অপরক পিরিত করি এইটায় হইলেক মোর মিনতি। মোর আদরের শ্রীমতি, মুই যেইটা নেখিচুং সেইটা কোন নয়া আদেশ না হয়। এই আদেশ হামরা পইলা থাকি পায়া আসছি।

৬ পিরিত হইলেক ভগবানের আদেশ মত চলা। তোমরা পইলা থাকি যে আদেশের কতা শুনি আসির ধরচেন, সেই মতই তোমরালা পিরিতির ঘাটাত চল।

৭ দুনিয়াত এমন মেলা মানষি বাইর হইচে উমরা ছল-চাতুরী করি বেয়ায়। যীশু খ্রীষ্ট যে মানষি হয় আসিচে সেইটা উমরালা স্বীকার করে না। এই নাকান মানষিলায় হইলেক ছলনাকারী আর খ্রীষ্টের বিরোধী

৮ তোমরা সাবধান থাকেন তোমরালা যাতে যীশুর ঘাটার চলার খাটনির ফল না হারান, সেইটা যাতে পুরস্কার হিসাবে লাভ করির পান।

৯ যায় যায় খ্রীষ্টের দেওয়া শিক্ষার সীমনা ছাড়িয়া যায় আর ঐ শিক্ষা মনত থির রাখে না, উমারলার অন্তরত ভগবান নাই। কিন্তুক যায় ঐ শিক্ষা মনত থির রাখে, উমার অন্তরত স্বর্গের বাপ আর উয়ার বেটা দুইজনে আছে।

১০ যদি কোন গুরু সমিতিত আসিয়া তোমারলাক ঐ শিক্ষা না দেয়, তাইলে উয়াক তোমরালা বাড়িত সোন্দের না দেন। আর মঙ্গল কামনাও না জানান।

১১ যায় উয়াক মঙ্গল কামনা জানায় উয়ার বেয়া কামেরও ভাগ নেয়।

১২ যদিও তোমারলারটে মোর মেলা কতা নেখিবার আছে, তাণ্ডো কাগজ আর কালি দিয়া সেইটা নেখির না চাং। ইয়ার চায়া

মুই তোমারলার ওটে কোনা যায়া মুখামুখি কতা কবার আশা  
করির ধরচুং। যাতে হামারলার আনন্দ পূরণ হয়।

১৩ ভগবানের বাছাই করা তোর বইনির ছাওয়ালাও তোক মঙ্গল  
কামনা জানের ধরচে॥



## ৩ যোহন

১ মোর পরানের সখা শ্রী গাইয় যাক মুই সচাং করি পিরিত করং, উয়ার বাদে সেই দেওয়ানী হয় মোর চিঠি।

২ আদরের সখা, মুই প্রার্থনা করং যাতে তুই সউগ কিছুতে ভাল করি চলির পাইস। যেই নাকান তুই আত্মাত ভাল করি চলির ধরচিস, তেমনি সেই নাকান করি তোর দেহাও যাতে ভাল করি চলির পায়।

৩ মুই খুব আনন্দ পালুং যেলা কয়েক জন শিষ্য ভাই তোর বিষয়ে এই সাক্ষ্য দিলেক যে, ভগবানের সচাং শিক্ষার প্রতি তুই বিশ্বস্ত আছিস আর ঐ অনুসারে চলির ধরচিস।

৪ মোর আদরের ছাওয়ালা যে সচাং ঘাটাত চলির ধরচে এই কতা শোনার পাছত ইয়ার থাকি বড় আনন্দ আর নাই।

৫ আদরের সখা, না চিনিয়াও শিষ্য ভাইলার বাদে তুই যা করিচিস সেইটা বিশ্বস্ত হয়ায় করিচিস।

৬ সমিতির সগারে আগত উমরা তোর পিরিতির কতা কইচে। ভগবান যাতে সন্তুষ্ট হয়, সেই নাকান করি তুই উমাক যতন করিয়া আরো যাবার ব্যবস্থা করি দিলে ভাল করিবু।

৭ উমার যাত্রা খ্রীষ্টের উদ্দেশ্যে আর যায় প্রভুর শিষ্য হয় নাই উমারটে উমরা কোন কিছুই নেয় নাই।

৮ এই বাদে এই নাকান মানষির সাহায্য করা হামার দরকার।  
যাতে ভগবানের সচাং শিক্ষার হামরাও উমার কামের ভাগী হই।

৯ মুই সমিতিরটে একটা চিঠি নেখিচিলুং, কিন্তুক শ্রী দিয়ত্রিফেস  
উমারলার নেতা হবার চায়, উয়ায় হামার কতা না মানে।

১০ এই বাদে উয়ায় কি করিচে মুই গেইলে সেইলা সগাকে  
জানাইম। উয়ায় মোর বিরুদ্ধে হিংসা করি মেয়ো মিছা কতা  
কইচে। ইয়াতে উয়ায় খুশি হয় নাই, খুশি না হয় শিষ্য ভাইলাক  
মানি নাই নেয়। আর যায় যায় উমারলাক মানি নিবার চাইচে  
উমারলাক উয়ায় বাধা দিবার ধরচে, আর সমিতি থাকি নিকিলি  
দিবার ধরচে।

১১ আদরের সখা, বেয়ার পাছত না যায়া বরং ভালের পাছত  
চল। যায় ভাল কাম করে উয়ায় ভগবানের মানষি আর যায় বেয়া  
কাম করে উয়ায় ভগবানক দেখে নাই।

১২ সগায় দিমিত্রিয়র গুণগান গাইচে আর সচাংএ নিজেই  
হইলেক উয়ার সাক্ষী। হামরাও উয়ার গুণগান করির ধরচি। তুই  
জানিস হামরা যেইটা কই সেইটা সচাং।

১৩ মোর মেয়ো কতা তোক নেখিবার আছে কিন্তুক কলমের  
কালি দিয়া সেইটা মুই নেখির না চাং।

১৪ আশা করং খুব তাড়াতাড়ি তোক দেখির পাইম আর সেয়ো  
মুখামুখি হয় কতা কবার পামু।

১৫ তোমারলার শান্তি হউক। তোর সখালা তোক মঙ্গল কামনা  
জানের ধরচে। ওটেকার সখালাক সগাকে আলদা আলদা করি  
হামরালার মঙ্গল কামনা জানাইস॥

# যুদাস

১ মুই শ্রী যুদাস, যীশু খ্রীষ্টের এক জন চাকর আর যাকবের ভাই। স্বর্গের বাপ ভগবান পিরিত করিয়া যাক যাক ডেকাইচে আর যীশু খ্রীষ্ট যাক যাক বত্তে থুইচে, মুই উমারলার বাদে এই চিঠিখান নেখির ধরচুং।

২ ভগবান তোমারলাক মেয়ো দয়া, শান্তি আর পিরিত দান করুক।

৩ মোর আদরের সখা-সখীলা, হামরালা সগায় পাপ থাকি মুক্তি পাইচি, মুই সেই মুক্তির ঘাটা সমন্ধে তোমারলারটে আগ্রহের সোদে নেখির চাইচোং। কিন্তুক তাও খ্রীষ্টিয় ধর্মের প্রতি বিশ্বাস থুইয়া ভগবান যেইটা উয়ার মানষিলাক চিরকালের বাদে দিচে, উয়ার হয় তোমরালা প্রাণপরানে যুদ্ধ করিবেন এই সমন্ধে নেখা আরো দরকার মনে করিলুং।

৪ এইলার দরকার আছে, কেনেনা যে মানষিলাক শান্তি সমন্ধে আগতে শাস্ত্রত নেখা হইছিলেক, উমরালা তোমারলার ভিতরাত চুপ করিয়া সোন্দাইচে। ভগবানের অচানক দয়া পায়্যা উমরা লম্পটতায় জীবন যাপন করির ধরচে, ভগবানের দয়াক উমরা বাহানা মনে করে আর হামারলার এক মাত্র প্রভুই মালিক, সেই যীশু খ্রীষ্টক উমরালা অস্বীকার করে।

৫ তোমরালা সউগ বিষয় ভাল করি জানেন, মুই তাও তোমারলার এই কতালা ফম করিয়া দিবার চাং যে, মিশর দেশ থাকি ইস্রায়েলীলাক উদ্ধার করি আনির পাছত যায় যায় বিশ্বাস করে নাই প্রভু উমারলাক ধবংস করিচিলেক।

৬ এইলা ছাড়া স্বর্গদূতলা যে নিজের অধিকার রক্ষা না করিয়া নিজের জাগা ছাড়ি চলি গেইছিলেক উমারলার কতা ফম কর। সেই মহাদিনের বিচারের বাদে ভগবান উমারলাক চিরকালের বাদে আন্ধারত বান্দি থুইচে।

৭ সদোম, ঘমোরা আর উমারলার বগলাবগলি সউগ গঞ্জের মানষিলাও ঠিক উমার নাকান ব্যভিচার, এমন কি, অস্বাভাবিক ব্যভিচার করিচিলেক। যায় যায় চিরকালের অগুনত পুড়িবার শাস্তি পাবে ইমরা উমারলারে নমুনা হয়া আছে।

৮ একে নাকান এই ভন্ড গুরুলা স্বপন দেখিয়া নিজের দেহাক অশুদ্ধি করিচে, কোন শাসন মানে নাই আর মহান স্বর্গীয় অধিকারিলার নিন্দা করিচে।

৯ কিন্তুক প্রধান স্বর্গদূত মীখায়েল যেলা মোশির দেহার বিষয় নিয়া শয়তানের সোদে তর্ক করিচিলেক, সেলা উয়ায় উয়ার বিরুদ্ধে কোন অপমানের কতা কয়া উয়াক দোষী করির সাহস করে নাই। উয়ায় কইলেক, প্রভু যাতে তোক বাধা দেয়।

১০ কিন্তুক এই ভন্ড গুরুলা যেইলা বোঝে না সেইলার সমন্ধে বেয়া কতা কয় আর বুদ্ধিহীন পশুলার নাকান নিজের থাকি যেইটা

বোঝে সেইলাতে ধবংস হয়।

১১ ধিক্কার ঐ মানষিলাক! কারন উমরা শ্রী কয়িনের ঘাটাত গেইচে! কয়িন তো উয়ার নিজের ভাইয়ক খুন করিচে। আর একে নাকান শ্রী বিলিয়ামের মত উমরা লাভের বাদে নিজেরলাক ভুলের হাতত ছাড়ি দিচে! আর শ্রী কোরহের নাকান বিদ্রোহ করিয়া ধবংস হয় গেইচে!

১২ এই মানষিলা যেলা দুঃসাহস নিয়া তোমারলার সমিতির ভোজত যোগ দেয়, সেলা তোমারলার এই ভোজের মইন্ধোত ইমরা মইলার নাকান হয়। এই মানষিলা খালি নিজের বিষয় নিয়ায় চিন্তা করে। ইমরা বাতাসত উরি বেরা জল না হওয়া মেঘের নাকান। ফল পাড়ির সমায় ফল নাই বুলিয়া শিপা সুদায় উকরি ফেলা গছের নাকান দুই পাকেই মরা।

১৩ ইমরা ঝড়ির মইন্ধোত সাগরের ঢেউয়ের নাকান, আর এই সাগরের ঢেউয়ের ফেনার নাকান ইমার নইজ্জার কামলা ভাসি ওটে। ইমরা ঘুরি বেরা তারার নাকান, চিরকালের বাদে ঘুটঘুটা আন্ধার ইমারলার বাদে জমা করি থোয়া হইচে।

১৪ আদমের বংশের সাত পুরুষ হনোক এই মানষিলার উদ্দেশ্যে আগতে ভবিষ্যত বাণী কইচে, “দেখ, প্রভু উয়ার হাজার হাজার পবিত্র দূতলাক নিয়া সগারে বিচার করির আসিবো।

১৫ আর ভক্তিহীন মানষিলা ভক্তিহীন হয় যেইলা বেয়া কাম করিচে আর সেই ভক্তিহীন পাপী মানষিলা প্রভুর বিরুদ্ধে যেইলা

কঠুর কতা কইচে, এই বাদে উয়ায় উমারলাক দোষী করির আসির ধরচে।”

১৬ এই নাকানের মানষিলা সউগ সমায় অসন্তুষ্ট থাকিয়া নিজের ভাগ্যের দোষ দেয়। আর অন্তরের বেয়া কামনা-বাসনা অনুসারে চলা ফিরা করে। উমরা নিজেরলাক নিয়া অহংকার করে আর লাভের বাদে মানষিক তোষামোদ করে।

১৭ কিন্তুক হে পরানের সখালা, যেইলা কতা হামারলার প্রভু যীশু খ্রীষ্টের খবরিয়ালা আগতে কইচে, সেইলা তোমরা ফম করি দেখ।

১৮ খবরিয়ালা তোমারলাক এই কতা কইচিলেক, ঠাট্টা করাইয়ালা শেষ সমায়ত আসিবে আর উমারলার ভক্তিহীন কামনা-বাসনা নিয়া চলিবে।

১৯ ইমরা তোমারলার মইদ্বোত দলাদলি সিজ্জন করে আর উমরা নিজের ইচ্ছা মতন চলে। উমার অন্তরত পবিত্র আত্মা নাই।

২০ ও মোর পরানের সখালা, তোমরালা পরম পবিত্র ঘাটাত থির থাকিয়া নিজেরলাক গড়ি তোল। আর পবিত্র আত্মার পরিচালনায় প্রার্থনা কর।

২১ হামারলার প্রভু যীশুর দয়া যাতে তোমারলাক অমৃত জীবনত নিয়া যায় উয়ারে বাদে বাচ্ছে রয়া ভগবানের পিরিতের মইদ্বোত থাক।

২২ তোমারলার মইদ্বোত যার যার দোমনা বিশ্বাস, উমারলাক দয়া কর।

২৩ অগুন থাকি তুলি আনিয়া উমারলাক রক্ষা কর। পাপ স্বভাবত যার যার জীবন মইলা হইচে উমারলার অশুদ্ধি কাপড়ও ঘিন কর আর নিজক সাবধান হয়। উমারলাক দয়া কর।

২৪ আর যায় তোমারলাক পড়ি যাওয়া থাকি রক্ষা করে আর নিজের মহিমায় নির্দোষ অবস্থায় আনন্দের সোদে তোমারলাক নিয়া আসির সক্ষম,

২৫ উয়ায় এক মাত্র ভগবান, হামারলার মুক্তিদাতা। হামারলার প্রভু যীশু খ্রীষ্টের মইন্দো দিয়া উয়ার গৌরব, মহিমা, শক্তি আর ক্ষমতা হউক যুগ থাকি যুগান্তর পর্যন্ত। আমেন॥



# প্রকাশিত

১ যীশু খ্রীষ্টের প্রকাশিত বাইক্য ভগবান উয়াক কইলেক, যেই ঘটনালা কিছু দিনের মইন্ধোত ঘটিবে, সেই বিষয়লা যাতে উয়ায় নিজের চাকরক জানায়। খ্রীষ্ট উয়ার দূত প্যেঠেয়া উয়ার চাকর যোহনক এইলা বিষয় জানাইলেক।

২ ভগবানের বাইক্য আর যীশু খ্রীষ্টের সাক্ষ্য সমন্ধে যোহন যেইলা দেখিচে সেইলা বিষয় এটেকোনা সাক্ষ্য দিচে।

৩ যায় এই ভাববাণী কতালা পড়ে, শোনে আর মনত গাথি থুইয়া পালন করে, উয়ায় আশুর্বাদ পায়। কারন সমায় আর বেশী নাই।

৪ মুই যোহন, এশিয়া প্রদেশের সাতটা খ্রীষ্ট সমিতিরটে নেথির ধরচুং। ভগবান যায় আছে, আছিলেক আর আসির ধরচে, উয়ায়, উয়ার সিংহাসনের আগত থাকা সাতটা আত্মা, আর যীশু খ্রীষ্ট সমিতিলাক দয়া আর শান্তি দান করুক।

৫ যীশুই বিশ্বস্ত সাক্ষী আর উয়ায় মরণ থাকি পইলা বত্তি উঠিচে। উয়ায় দুনিয়ার রাজালার শাসনকর্তা। উয়ায় হামারলাক পিরিত করে আর নিজের অক্ল দিয়া পাপ থাকি মুক্ত করিচে।

৬ উয়ায় হামারলাক নিয়া ভগবানের শাসন গড়ে তুলিচে। আর উয়ার স্বর্গের বাপ ভগবানের সেবা করির বাদে হামারলাক বামন

বানাইচে। চিরকাল ধরি যীশু খ্রীষ্টের গুণগান হউক, চিরকাল উয়ার ক্ষমতা থাকুক। আমেন।

৭ দেখ, উয়ায় মেঘত করি আসির ধরচে, সগায় উয়াক দেখিবে। আর যায় যায় উয়াক হানছিলেক, উমরাও উয়াক দেখিবে। দুনিয়ার সউগ জাতির মানষি উয়ার বাদে জোরে জোরে কান্দিবে। সেইটায় হউক, আমেন।

৮ প্রভু পরমেশ্বর কইচে, “মুই আলফা আর ওমিগা, যায় আছে, যায় আছিলেক, আর যায় আসির ধরচে, মুই সর্বশক্তিমান।”

৯ মুই তোমারলার ভাই যোহন, যীশুর নগত যুক্ত হয়। মুই তোমারলার সোদে একে নাকান দুঃখ-কষ্ট, ভগবানের শাসন, আর একে ধৈর্যের ভাগী। ভগবানের বাইক্য আর যীশুর সাক্ষ্য প্রচার করিচুং বুলিয়া মোক পাটম দ্বীপত নিয়া যায়। থোয়া হইচে।

১০ হাপ্তার পইলা প্রভুর দিনত মুই পবিত্র আত্মায় ভরপুর হলুং। এমন সময় মোর পাছপাকে শিংগার শব্দের নাকান এক জনার খুব জোড়ে গালার আওয়াজ শুনিলুং।

১১ উয়ায় মোক কইলেক, “তুই যেইলা দেখির ধরচিস, সেইলা একখান বইয়ত নেখি থো। আর সেইটা ইফিষ, স্মূর্ণা, পর্গাম, থুয়াতীয়া, সার্দী, ফিলাদিলফিয়া আর লায়দিকেয়া—এই সাতটা গঞ্জের সাতটা খ্রীষ্ট সমিতিরটে পেয়ে দে।”

১২ আর যায় এই বাণী দিবার ধরছিলেক, উয়াক দেখির বাদে ঘুরিলুং, ঘুরিয়া দেখিলুং সোনার সাতটা বাতি,

১৩ সেই বাতিলার মইন্ধোত বাছাই করা মানষিটার নাকান কাণ্ডো  
এক জন খাড়া হয়। উয়ার পেন্দোনত আছিলেক ঠেং  
পর্যন্ত লম্বা পাঞ্জাবি। উয়ার বুকত আছিলেক সোনালী এক পট্টা।

১৪ উয়ার মাথা আর উয়ার চুলি ভেড়ার লোমের নাকান আর  
বরফের মত সাদা আছিলেক। আর উয়ার চখু অগুনের শিখার  
মত আছিলেক।

১৫ উয়ার ঠেং আছিলেক অগুনত ছুবিয়া পরিস্কার করা  
পিতলের নাকান চকচকা, আর উয়ার গালার স্বর আছিলেক  
জোড়ে জোড়ে কল কল করা জলের স্রোতের নাকান।

১৬ উয়ার ডাইন হাতত সাতটা তারা ধরি থুইচে, আর মুখ থাকি  
একটা দোধারি ছোরা নিকলি আসির ধরছিলেক। উয়ার মুখখান  
বেলার নাকান ঝলমল করা।

১৭ উয়াক দেখা মাত্রই মুই মরার মত উয়ার ঠেংওত পড়ি  
গেলুং। সেলো উয়ার ডাইন হাত মোর উপরাত থুইয়া কইলেক,  
“ভয় না খাইস। মুইয়ে পইলা আর শেষ।

১৮ মুই মরি গেইছিলুং, আর দেখ, এলা মুই যুগ যুগ ধরি  
চিরকালে বত্তায় আছং; মোরটে মরণের আর যমের বাড়ির  
চাবিলা আছে।

১৯ তুই যেইলা দেখিলু, যেইলা এলা ঘটির ধরচে আর পরে  
যেইলা ঘটিবে, এইলা নেখি থো।

২০ যেই সাতটা সোনার বাতি আর মোর ডাইন হাতত যেই সাতটা তারা তুই দেখিলু উয়ার গোপন মানে হইলেক, সাতটা তারা হইলেক সাতটা খ্রীষ্ট সমিতির দূত, সাতটা বাতি হইলেক সাতটা খ্রীষ্ট সমিতি।”

২ প্রভু মোক কইচে, “ইফিষ গঞ্জের সমিতির দূতক এই কতা নেখ, যায় নিজের ডাইন হাতত সাতটা তারা ধরিয়া সোনার সাতটা বাতির ঠগার মইন্ধোত ঘুরি বেড়ায়, উয়ায় এই কতা কইচে:

২ “তোমারলার সউগ কাম, খাটনি আর ধৈর্যের কতা মুই জানং। এইটাও জানং যে, তোমরালা বেয়া মানষিলাক সহ্য করির পান না, আর যায় যায় খবরিয়া না হয়।ও নিজক খবরিয়া কয়া দাবি করে, তোমরালা উমারলাক যাচাই করি দেখিচেন আর উমরা যে মিথ্যাবাদী সেইটার প্রমাণও পাইচেন।

৩ তোমারলার ধৈর্য আছে আর তোমরালা মোর বাদে খুব কষ্ট করচেন, হাপসান নাই।

৪ “তাণ্ডো তোমারলার বিরুদ্ধে মোর কতা কবার আছে, মোর প্রতি তোমারলার যে পইলা পিরিত আছিলেক, তোমরালা সেইটা হারে ফেলিইচেন।

৫ ভাবিয়া দেখ, তোমরা উচা থাকি কত নিচাত পরিচেন। এই অবস্থা থাকি তোমরালা মন বদলেয়া, পইলা যেইলা কাম করিচেন সেইলাত ফিরি যান। এই অবস্থা থাকি তোমরালা যদি মন না

বদলান, তাইলে মুই তোমারলারটে আসিয়া তোমারলার বাতিটা ঐ জাগা থাকি সারে ফেলাইম।

৬ কিন্তুক একটা গুণ তোমারলার আছে, শ্রী নীকলায়ের শিষ্যলো যেইটা করে সেইটা তোমরালা ঘিন খান, আর মুইও ঘিন করং।

৭ “যার শুনির কান আছে, পবিত্র আত্মা সমিতিলাক কি কবার ধরচে, উয়ায় শুনুক। যায় জয়ী হবে উয়াক মুই ভগবানের শান্তির জাগার জীবন গছের ফল খাবার দিম।

৮ “স্মূর্ণা গঞ্জের সমিতির দূতেরটে এই কতা নেখ, যায় পইলা আর শেষে, যায় মরিচে আর বত্তি উঠিচে, উয়ায় এই কতা কবার ধরচে:

৯ “মুই জানং তোর কষ্ট আর অভাবের কতা, কিন্তুক তাণ্ডো তুই ধনী। যায় নিজেরলাক যিছুদী কয় অথচ উমরা যিছুদী না হয় বরং উমরা শয়তানের দলের মানষি, উমরা তোমারলার বিরুদ্ধে যেইটা কয় সেইটা মুইও জানং।

১০ তোমারলাক যেইলা কষ্ট ভোগ করির নাগিবে, সেইলাত একেবারে ভয় না খান। শোন, শয়তান তোমারলার মইন্ধোত কাণ্ডো কাণ্ডোকো যাচাই করির বাদে জেলত খুবে। আর দশ দিন ধরি তোমরা কষ্ট ভোগ করিবেন। তোমরালা মরণ পর্যন্ত বিশ্বস্ত থাকেন, তাইলে জয়ের মালা হিসাবে মুই তোমারলাক জীবন মটুক দিম।

১১ “যার শূনির কান আছে, পবিত্র আত্মা সমিতিলাক কি কবার ধরচে, উয়ায় শুনুক। যায় জয় করিবে, দ্বিতীয় মরণ কোন মতেই উয়ার ক্ষতি করির পারিবে না।

১২ “পর্গাম গঞ্জের সমিতির দুতেরটে এই কতা নেখ, যারটে দুই পাকেই খুব ধারওয়ালা তলোয়ার আছে উয়ায় এই কতা কইচে:

১৩ “মুই জানং তুই কোটে থাকিস, ওটেকোনা শয়তানের সিংহাসন আছে। তাণ্ডো তুই মোর প্রতি বিশ্বস্ত আছিস। মোর উপর থাকি তোর ভরসা হারে ফ্যেলাইস নাই। এমন কি শয়তান যেটেকোনা রয়, ওটেকোনা মোর বিশ্বস্ত সাক্ষী শ্রী আন্তিপাস তোমারলার মুখের আগত খুন হইচে, সেলোও তোমরালা মোর উপরাত ভরসা করছিলেন।

১৪ “তাণ্ডো তোর বিরুদ্ধে মোর কয়েকটা কতা আছে, তোর ওটেকোনা এমন মানষিলা থাকে যায় যায় বিলিয়ামের শিক্ষা মতন চলে, বালাক রাজাক বিলিয়াম শিক্ষা দিছিলেক, যাতে উয়ায় প্রতিমার আগত থোয়া খাবার খায়। আর ব্যভিচার করির মইন্ধো দিয়া ইজ্রায়েলীলাক পাপের ঘাটাত নিয়া যায়।

১৫ এইলা ছাড়াও শ্রী নীকলায়ের শিষ্যলার শিক্ষা মতন চলে এমন কয়েক জন মানষি তোমারলার ওটেকোনা আছে।

১৬ এই অবস্থায় পাপের ঘাটা থাকি মন ফিরান, না হইলে মুই খুব পচপচে তোমারলার ওটেকোনা আসিম, আর মোর মুখের ছোরা দিয়া উমারলার বিরুদ্ধে যুদ্ধ করিম।

১৭ “যার শূনির কান আছে, পবিত্র আত্মা সমিতিলাক কি কবার ধরচে, উয়ায় শুনুক। যায় জয় করে উয়াক মুই গোপন মান্না খাবার দিম। আর একটা সাদা শিল দিম। সেই শিলটার উপরাত এমন একটা নয়া নাম নেখা থাকিবে, সেইটা কাণ্ডো জানে না। যাক দেওয়া হবে, খালি উয়ায় জানিবে।

১৮ “থুয়াতীয়া গঞ্জের সমিতির দূতেরটে এই কতা নেখ, যায় ভগবানের বেটা উয়ার চখু অগুনের শিখার মত, ঠেং খুব চকচকা পিতলের মত উয়ায় এই কতা কইচে:

১৯ “মুই জানং তোমারলার কাম, তোমারলার পিরিত, তোমারলার বিশ্বাস, তোমারলার সেবা করা, আর তোমারলার ধৈর্যের কতা। আর তোমরালা আগত যেই নাকান কাম করিচেন এলা উয়ার চায়া বেশী কাম করির ধরচেন এই কতালাও মুই জানং।

২০ “তাণ্ডো তোমারলার বিরুদ্ধে মোর কতা কবার আছে, তোমরালা ঈষেবল নামে বেটিছাওয়ার অন্যায় সহ্য করিচেন। ঈষেবল নিজক ভগবানের ভাববাদী কয়। উয়ার শিক্ষার মইন্ধো দিয়া হামার চাকরলাক ভুলায়, যাতে উমরা ব্যভিচার করে। আর প্রতিমারটে সঁপে দেওয়া খাবার খায়।

২১ ব্যভিচার থাকি মন ফিরির বাদে মুই সমায় দিচিলুং, কিন্তুক উয়ায় মন ফিরির চায় না।

২২ এই বাদে মুই উয়াক কষ্টের বিছনাত ফ্যেলে থুইম, আর যায় যায় উয়ার সোদে ব্যভিচার করে উমরা যদি মন না ফিরায়ে উমারলাকও দারুন কষ্টের মইন্ধোত ফ্যেলাইম।

২৩ আর মুই মঙ্গা আনিয়া উয়ার ছাওয়ালাক মারি ফ্যেলাইম। ইয়াতে সউগ সমিতি জানির পাবে, মুইয়ে মানষির অন্তর আর মন চান্দেয়া দেখং। মুই কাম অনুসারে সগাকে ফল দিম।

২৪ “কিন্তুক থুয়াতীয়ার বাকি মানষিলা, তোমরা যায় যায় ঐ শিক্ষা মতন না চলেন আর শয়তানের ঐ নিগূঢ় শিক্ষা কওয়া হয়, সেইটা তোমরা জানেন না। তোমারলাক মুই কবার ধরচুং তোমারলাক মুই অইন্য কোন ভার দিম না।

২৫ তোমারলার খালি যেইটা আছে মুই না আইসা পর্যন্ত সেইটা শক্ত করি ধরি থোন।

২৬ “যায় যায় জয় করে আর শেষ পর্যন্ত মোর আদেশ পালন করে, বাপ যেই নাকান মোক সউগ জাতির উপরাত অধিকার দিচে, সেই নাকান অধিকার মুইও তোমারলাক দিম।

২৭ উয়ায় লোহার শুলি দিয়া জাতিলাক শাসন করিবে, আর মাটির পাত্রের মত চুরমার করিবে।

২৮ যায় জয়ী হবে উয়াক মুই ভোরের তারা দিম।

২৯ যার শুনির কান আছে, পবিত্র আত্মা সমিতিলাক কি কবার ধরচে, উয়ায় শুনুক।



৩ “সার্দী গঞ্জের সমিতির দূতক এই কতা নেখ, ভগবানের সাতটা আত্মা আর সাতটা তারা যায় ধরি আছে, উয়ায় কইচে: “মুই জানং তোমার কামের কতালা। তুই নাম মাত্র বত্তি আছিস, আসলে তুই মরা।

২ তুই জাগি ওঠেক, আর বাদ বাকি যেইলা আধামরা হয় আছে সেইলাক শক্তিশালী করি তোলেক। কেনেনা মোর ভগবানের নজরত তোর কোন কাম সঠিক না হয়।

৩ এই বাদে তুই যা পাইচিস আর যা শুনিচিস সেইটা ফম করিয়া পালন করেক। আর এই অবস্থা থাকি মন ফিরাও। যদি তুই জাগনা না হইস, তাইলে মুই চোরের নাকান আসিম, আর মুই কোন পলকে তোরটে আসিম তুই জানিরও পাবু না।

৪ “তাণ্ডো সার্দিত তোর এমন কয়েক জন মানষি আছে, যায় যায় উমার চালচলন কাপড় চোপড় অপবিত্র করে নাই, এই বাদে উমরা সাদা কাপড় পিন্দিয়া মোর সোদে যাওয়া আইসা করিবে। কেনেনা উমরা যোগ্য মানষি।

৫ যায় জয়ী হবে উয়ায় এই নাকান সাদা পোশাক পিন্দিবে। জীবন-বই থাকি উমার নাম কোন সমায় মুছি ফেলেইম না। বরং মোর বাপ আর উয়ার স্বর্গদূতলার আগত মুই উয়াক মানি নিম।

৬ যার শূনির কান আছে, পবিত্র আত্মা সমিতিলাক কি কবার ধরচে, উয়ায় শুনুক।

৭ “ফিলাদিলফিয়া সমিতির দূতক এই কতা নেখ, যায় পবিত্র আর সইত্য, যারটে দায়ূদের চাবি আছে, উয়ায় খুলিলে কাণ্ডো বন্ধ করির পায় না, আর বন্ধ করিলে কাণ্ডো খুলির না পায়, উয়ায় এই কতা কইচে:

৮ “মুই জানং তোর কামের কতা। দেখেক, মুই তোর আগ পাকে একখান খোলা দুয়ার খুলুং যেইখান বন্ধ করির সাইধ্য কারো নাই। মুই জানং তোমারলার শক্তি খুব কম, কিন্তুক তাণ্ডো তোমরালা মোর বাইক্য পালন করিচেন। আর মোক অস্বীকার করেন নাই।

৯ যায় যায় নিজক যিহুদী কয় কিন্তুক উমার আচার আচরন যিহুদীর মত না হয়, এই শয়তানের দলের সেই বেইমান মানষিলাক মুই তোমারলারটে নিয়া আসিম, আর তোর ঠেংওত ভক্তি দেওয়াইম। আর উমরা জানির পাবে যে, মুই তোক পিরিত করং।

১০ ধৈর্য ধরির যে আদেশ মুই তোক দিচিলুং সেইটা তুই পালন করিচিস। এই বাদে এই দুনিয়াত যে যাতনার সমায় আসির ধরচে সেই সমায় মুই তোমারলাক রক্ষা করিম। যায় যায় এই দুনিয়ার, উমারলাক যাচাই করির বাদে এই যাতনা আসিবে।

১১ “মুই তোরটে খুব পচপচে আসির ধরচুং। তোর যা আছে তা শক্ত করি ধরি থো। যাতে তোর জয়ের মটুক কাণ্ডো কাড়ি নিবার না পায়।

১২ যায় জয়ী হবে উয়াক মুই মোর ভগবানের মন্দিরের একটা  
থাম্বার নাকান বানাইম। উয়ায় আর কোন দিন বায়রাত যাবে না।  
মুই উয়ার উপরাত মোর ভগবানের নাম আর মোর ভগবানের  
গঞ্জের নামলা নেখিম। সেই গঞ্জ নয়া ঘিরশালেম। স্বর্গ থাকি  
মোর ভগবানেরটে থাকি এই গঞ্জ নামি আসিবে। যায় জয়ী হবে  
মুই উয়ার উপরাত মোর নয়া নামও নেখিম।

১৩ যার শুনির কান আছে, পবিত্র আত্মা সমিতিলাক কি কবার  
ধরচে, উয়ায় শুনুক।

১৪ “লায়দিকেয়া গঞ্জের সমিতির দূতক এই কতা নেখ, যায়  
আমেন, যায় বিশ্বস্ত আর সইত্য সাক্ষী, যায় ভগবানের সিড্জনের  
মূল, উয়ায় এই কতা কইচে: “মুই তোমারলার কামের কতা  
জানং।

১৫ তোমরালা ঠাণ্ডাও না, গরমও না; তোমরালা হয় ঠাণ্ডা, না  
হয় গরম হইলে, ভাল হইলেক হয়।

১৬ এই নাকান তোমরালা কুসুম কুসুম, না গরম না ঠাণ্ডা, এই  
বাদে মুই তোমারলাক মোর মুখ থাকি ছ্যেপের নাকান ওগলে  
ফ্যেলাইম।

১৭ তোমরালা কবার ধরচেন, ‘হামরালা ধনী, ধন জমা করচি,  
হামারলার কোনো অভাব নাই।’ কিন্তুক তোমরালা জানেন না যে  
তোমরালা দুঃখী, দয়ার পাত্র, গরীব, কানা আর উলংগ।

১৮ মুই তোমারলাক এই পরামর্শ দিবার ধরচুং, তোমরালা মোরটে থাকি অগুনত ছোবা দেওয়া খাটি সোনা কিনি নেও, যাতে ধনী হবার পারেন। মোরটে থাকি সাদা পোশাক কিনি পেন্দো, যাতে তোমারলার উলংগতার নজ্জা দেখা না যায়। মোরটে থাকি চখুত দিবার সুরমা কিনি নেও, যাতে তোমরালা দেখির পারেন।

১৯ “মুই যাক যাক পিরিত করং, উমারলারে দোষ দেখে দ্যেং আর শাসন করং। এই বাদে এই অবস্থা থাকি মন ফিরির চেষ্টা কর।

২০ দেখ, মুই দুয়ারত খাড়া হয়। খটখটের ধরচুং। যে কাণ্ডো মোর আওয়াজ শুনি দুয়ার খুলি দেয়, মুই উয়ারটে যাইম। আর উয়ার সোদে খাওয়া দাওয়া করিম, উয়ায়ও মোর সোদে খাওয়া দাওয়া করিবে।

২১ “যায় জয় করে, উয়াক মোর সোদে মোর সিংহাসনত বসির দিম। যেই নাকান মুই নিজক জয় করিচুং, মোর বাপের সোদে উয়ার সিংহাসনত বসিচুং।

২২ যার শুনির কান আছে, পবিত্র আত্মা সমিতিলাক কি কবার ধরচে, উয়ায় শুনুক।”

৪ ইয়ার পাছত মুই নজর দিলুং আর দেখির পালুং, স্বর্গের একখান দুয়ার খোলা আছে। পইলা যে গালার আওয়াজ শুনছিলুং ঐ শিংগার শব্দের নাকান যার আওয়াজ উয়ায় মোক

কইলেক, “তুই এটেকোনা উঠি আইসেক। এইলার পাছত যেইলা নিশ্চিত ঘটিবে, সেইলা তোক মুই দেখাইম।”

২ আর সেলোয় মুই পবিত্র আত্মাত ভরপুর হলুং আর স্বর্গত একখান সিংহাসন দেখির পালুং, সেই সিংহাসনের উপরত এক জন বসি আছে।

৩ যায় বসি আছে, উয়ায় দেখির হীরা আর সবুজ মণির নাকান; সিংহাসনের চাইরো পাকে একটা রংধনুক আছিলেক, সেইটা দেখতে একটা পান্নার নাকান।

৪ সেই সিংহাসনের চাইরো পাকে আরো চব্বিশটা সিংহাসন আছিলেক, আর সেই সিংহাসনলাত চব্বিশ জন নেতা বসি আছিলেক, উমারলার পোশাক আছিলেক সাদা আর মাথাত আছিলেক সোনার মটুক।

৫ সেই সিংহাসন থাকি বিদ্যুৎ, ভয়ংকর শব্দ আর মেঘের ডাক বাইর হবার ধরছিলেক। আর সেই সিংহাসনের আগত অগুনের সাতটা বাতি জ্বলির ধরছিলেক, সেই বাতিলা হইলেক ভগবানের সাতটা আত্মা।

৬ সেই সিংহাসনের আগত খ্রীষ্টল পাথরের নাকান একেবারে ঝকঝকা একটা সাগর আছিলেক। সেই সিংহাসনলার মইন্ধের সিংহাসনটার চাইরো পাকে চারটা বত্তা প্রাণী আছিলেক; উমারলার আগপাকে আর পাছপাকে চোখুতে ভরা।

৭ পইলা প্রাণীটার চেহারা সিংহের নাকান, দ্বিতীয়টা বাছুরের নাকান, তৃতীয়টার মুখ মানষির নাকান আর চতুর্থটা উড়ি বেড়া ভেলোয়া পখির নাকান।

৮ এই চারটা বত্তা প্রাণীর পতিটার ছয়টা করি ডানা আছিলেক, আর সউগ জাগাতে চখুই ভরা আছিলেক; আর উমরা দিন রাতি এই কতা কবার ধরচে, “সর্বশক্তিমান প্রভু পরমেশ্বর যায় চিরকাল আছিলেক, আছে আর আসির ধরচে, উয়ায় পবিত্র, পবিত্র, পবিত্র।”

৯ যায় সিংহাসনত বসি আছে, উয়ায় চিরকালে বত্তায় আছে। সেই প্রাণীলা য়েলায় উয়ার গুণকিত্তন, সন্মান আর জয়ের গর্ব প্রকাশ করে,

১০ সেয়ায় সেই চব্বিশ জন নেতা সিংহাসনের অধিকারী, মানে যায় চিরকাল ধরি বত্তায় আছে উয়াক উবুর হয় ভক্তি করে, এই নেতালা সেয়া সিংহাসনের আগত উমারলার মটুক খুলি থুইয়া কবে,

১১ “হে হামারলার ভগবান, হে হামারলার প্রভু, তুইয়ে যশ, সন্মান আর ক্ষমতা পাবার যোগ্য, কেনেনা তুইয়ে সউগ কিছু সিজ্জন করিচিস, আর তোর ইচ্ছাতে সেইলা সিজ্জন হইচে আর টিকি আছে।”

৫ যায় সেই সিংহাসনত বসি আছে, উয়ার ডাইন হাতত একখান মোড়ে থোয়া বই দেখির পালুং। বইয়ের ভিতরাত আর বায়রাত নেখা আছিলেক আর সাতটা সীলমোহর দিয়া বন্ধ করা আছিলেক।

২ পাছত মুই এক জন শক্তিশালী স্বর্গদূতক জোর গালায় এই কতা কবার শুনলুং, কায় এই সীলমোহরলা ভাঙি বইখান নিকলি আনির যোগ্য?

৩ কিন্তুক কি স্বর্গত, কি দুনিয়াত, কি পাতালত কাণ্ডো ঐ মোড়ে থোয়া বইখান খুলির পাইলেক না, আর বইখানের ভিতরিও কাণ্ডো দেখির পাইলেক না।

৪ স্যেলা মুই খুব কান্দির নাগিলুং, কেনেনা মোড়ে থোয়া বইখান খুলিয়া পড়িবার যোগ্য কাণ্ডোকে পাওয়া গেইলেক না।

৫ পাছত নেতালার মইন্ধো থাকি মোক এক জন কইলেক, “কান্দিস না। যিহুদা বংশের সিংহ, যায় দায়ুদের বংশধর, উয়ায় জয়ী হইচে। উয়ায় ঐ সাতটা সীলমোহর ভাঙিয়া বইখান নিকলি আনির পারে।”

৬ পাছত মুই দেখিলুং, ঐ সিংহাসনের আর চারটা প্রাণীর মইন্ধে আর নেতালার মইন্ধোত একটা ভেড়ার বাচ্চা খাড়া হয়। রবার দেখিলুং। সেই ভেড়ার বাচ্চাটাক মারি ফেলের দেখা যায়। ঐ ভেড়ার বাচ্চাটার সাতটা শিং আর সাতটা চখু আছিলেক।

ভগবানের যেই সাতটা আত্মাক দুনিয়ার সউগ জাগাত পেয়ে  
দেওয়া হয় এই চখুলা হইলেক ভগবানের সেই সাতটা আত্মা।

৭ পাছত ঐ ভেড়ার বাচ্চাটা আসিয়া, যায় সিংহাসনত বসি  
আছিলেক উয়ার ডাইন হাত থাকি বইখান নিলেক।

৮ বইখান নিবার পাছত সেই চারজন বত্তা প্রাণী আর চব্বিশ জন  
নেতা ভেড়ার বাচ্চাটার আগপাকে উবুর হইলেক। উমার সগারে  
হাতত একটা করি বীণা আর একটা ধূনা ভর্তি সোনার বাটি  
আছিলেক; সেই ধূনা হইলেক ভগবানের মানষিলার প্রার্থনা।

৯ আর উমরা একটা নয়া গান করিলেক, “তুইয়ে ঐ বইখান নিয়া  
উয়ার সীলমোহরলা খুলিবার যোগ্য; কেনেনা তোক মারি ফ্যেলা  
হইচে, তুইয়ে তোর অত্ত দিয়া প্রতিটা বংশক, ভাষা, দেশ আর  
জাতির মইদ্ধো থাকি ভগবানের বাদে মানষিলাক কিনিছিস;

১০ তুই উমারলাক নিয়া একটা রাইজ্য গড়ে তুলিচিস, আর  
হামারলাক ভগবানের সেবা করির বাদে বামন বানাইচিস, উমরা  
এই দুনিয়ার উপরাত শাসন করিবে।”

১১ পরে মুই চায়া দেখিলুং, আর ঐ সিংহাসনের, বত্তা প্রাণীলার  
আর নেতালার চাইরো পাকে মেয়ো স্বর্গদূতের গালার আওয়াজ  
শুনির পাইলুং; উমরা সংখায় হাজার হাজার, কোটি কোটি।

১২ উমরা জোরে জোরে চিকরিয়া কইলেক, “যেই ভেড়ার  
বাচ্চাটাক মারি ফ্যেলা হইচে, উয়ায়ে ক্ষমতাবান আর ধন, জ্ঞান,  
শক্তি, সন্মান, মহিমা আর আশুর্বাদ পাবার যোগ্য!”



১৩ তার পাছত স্বর্গত, দুনিয়াত, পাতালত আর সাগরত যত প্রাণী আছে, এমন কি সেইলার মইন্ধোত যা কিছুই আছে সগাকে মুই জোড়ে জোড়ে গান করির শুনিলুং, “যায় সিংহাসনত বসি আছে, উয়ার বাদে আর ভেড়ার বাচ্চাটার বাদে আশুর্বাদ, সন্মান, মহিমা, ক্ষমতা চিরকাল থাকুক।”

১৪ সেই চারটা প্রাণী কইলেক, “আমেন।” আর তার পাছত সেই নেতালা উবুর হয় ভক্তি দিলেক।

৬ তার পাছত মুই দেখিলুং, যেলা সেই ভেড়ার বাচ্চাটা ঐ সাতটা সীলমোহরের মইন্ধে পইলা সীলমোহরটা খোলাইলেক, আর মুই সেই চারজন প্রাণীর মইন্ধে এক জনক মেঘের গর্জনের মত আওয়াজ করির শুনিলুং, “আইসেক।”

২ মুই নজর দিলুং, আর দেখ, একটা সাদা ঘোড়া দেখিলুং, যায় ঐ ঘোড়াটার উপরাত বসি আছিলেক, উয়ার হাতত একখান ধনুক আছিলেক। উয়াক একটা জয়ের মটুক দেওয়া হইলেক, আর উয়ায় জয়ী বীরের মত বাইর হয় জয় করিতে করিতে চলির নাগিলেক।

৩ ভেড়ার বাচ্চাটা যেলা দ্বিতীয় সীলমোহরটা খোলাইলেক, সেলা দ্বিতীয় বত্তা প্রাণীটাক কবার শুনিলুং, “আইসেক।”

৪ পাছত অগুনের নাকান নাল অইন্য একটা ঘোড়া বাইর হয় আসিলেক, যায় ঐ ঘোড়ার উপরাত বসিয়া আছিলেক, উয়াক

দুনিয়া থাকি শান্তি তুলি নিবার ক্ষমতা দেওয়া হইলেক, যাতে মানষি একে অপরক মারি ফেলায়। উয়াক একখান বড় তলোয়ার দেওয়া হইলেক।

৫ ভেড়ার বাচ্চাটা যেলা তৃতীয় সীলমোহর খোলাইলেক, সেলা মুই তৃতীয় বত্তা প্রাণীটাক কবার শুনিলুং, “আইসেক।” ইয়ার পাছত মুই একটা কালা ঘোড়া দেখির পালুং, যায় ঐ ঘোড়ার উপরাত বসি আছিলেক, উয়ার হাতত একখান দাড়ি পাল্লা আছিলেক,

৬ আর মুই চারটা প্রাণীর মইন্দো থাকি কাণোকো কবার শুনিলুং, “এক জন কামলার এক দিনের কামাইওত খালি এক কেজি গম বা তিন কেজি যব পাওয়া যায়। কিন্তুক ত্যেল আর আংগুর রস তুই নষ্ট না করিস।”

৭ ভেড়ার বাচ্চাটা যেলা চতুর্থ সীলমোহরটা খোলাইলেক, সেলা মুই বত্তা প্রাণীটাক কবার শুনিলুং, “আইসেক।”

৮ আর মুই ফ্যেকসা রং এর একটা ঘোড়া দেখির পালুং। যায় ঐ ঘোড়ার উপরাত বসি আছিলেক, উয়ার নাম মরণ। আর যমের বাড়িটাও উয়ার সোদে যাবার নাগিলেক। দুনিয়ার চাইর ভাগের একভাগের উপরাত উমাক ক্ষমতা দেওয়া হইলেক, যাতে উমরা ছোরা, আকাল, মরণ আর বনুয়া জন্তু দিয়া মানষিলাক মারি ফেলায়।

৯ যেলা উয়ায় পঞ্চম সীলমোহর খোলাইলেক সেলা মুই বেদীর নিচাত এমন সউগ মানষির আত্মা দেখির পালুং, যাক যাক ভগবানের বাইক্য আর সাক্ষ্য দিবার বাদে মারি ফেলা হইচে।

১০ উমরা জোরে জোড়ে চিকিরিয়া কবার নাগিলেক, “হে পবিত্র আর সইত্যবান রাজা, যায় যায় এই দুনিয়ার, উমারলার বিচার করির আর হামারলার অক্তের শোধ নিবার তুই আর কত দেড়ি করিবু?”

১১ সেলা উমারলাক সগাকে সাদা পোশাক দেওয়া হইলেক, আর কওয়া হইলেক, উমার কামের ভাগিদারী আর ভাইলাক, যাক যাক উমার নাকান করি তারাতারি মারি ফেলা হবে, উমার সংখ্যা পূরণ না হওয়া পর্যন্ত উমরা যাতে আর অল্প কিছু কাল বাচে রয়।

১২ ইয়ার পাছত মুই দেখিলুং, উয়ায় যেলা ষষ্ঠ সীলমোহর খোলাইলেক, সেলা দারুন ভুইচাল হইলেক। বেলা একেবারে কালা হয় গেইলেক, আর গোটায় চানটা অক্তের নাকান নাল হয় উঠিলেক।

১৩ জোড়ে জোড়ে কাল বৈশাখীর ছরকা হইলে যেই নাকান গছ থাকি ফল অসমায়ে পড়ি যায়, ঠিক সেই নাকান দ্যাওয়া থাকি তারানা দুনিয়ার উপরাত খসি পড়িচে।

১৪ মোড়ে থোয়া বইয়ের নাকান দ্যাওয়াটা গোটো হয় গেইলেক। আর প্রতিটা পাহাড় আর দ্বীপ নিজের নিজের জাগা থাকি সারি

গেইলেক।

১৫ দুনিয়ার সউগ রাজা আর প্রধান মানষি, সেনাপতি, ধনী আর শক্তিশালী মানষি আরো সগারে চাকর আর স্বাধীন মানষিলা পাহাড়ের গুহাত শিলের আওডালত নুকাইলেক।

১৬ উমরা পাহাড় আর শিললাক কইলেক, “হামারলার উপরাত পড়েক, আর যায় এই সিংহাসনত বসি আছে, উয়ার মুখের আগ থাকি আর ভেড়ার বাচ্চার গোসা থাকি হামারলাক নুকি থো।

১৭ ক্যেনো উমারলার গোসার সেই মহাদিন আসিলেক, আর কায় উমার আগত খাড়া হয় রবার পায়?”

৭ ইয়ার পাছত মুই চাইর জন স্বর্গদূতক দুনিয়ার চাইর কোণাত খাড়া হয় রবার দেখিলুং, উমরা দুনিয়ার চাইর কোণার বাতাস আটকে থুইচে, যাতে দুনিয়া, সাগর আর গছের উপরাত বাতাস না বয়া যায়।

২ মুই আর এক জন স্বর্গদূতক পুবপাক থাকি উঠি আসির দেখিলুং, উয়ারটে বত্তা ভগবানের সীলমোহর আছিলেক; যে চাইর জন স্বর্গদূতক দুনিয়া আর সাগরের ক্ষতি করির ক্ষমতা দেওয়া হইচে, সেই চাইর জন স্বর্গদূতক উয়ায় খুব জোড়ে চিকরিয়া কইলেক,

৩ “হামারলার ভগবানের চাকরলার কপালত সীলমোহর না দেওয়া পর্যন্ত দুনিয়া, সাগর বা গছগচালির হানি না করিস।”

৪ আর মুই সেই সীলমোহর করা মানষিলার সংখ্যা শুনিলুং।  
ইজ্রায়েলীলার সউগ গুষ্টির মইদ্বো থাকি মোট এক লক্ষ চুয়াল্লিশ  
হাজার মানষিক সীলমোহর করা হইচে,

৫ যিহুদা গুষ্টির বারো হাজার; রুবেণ গুষ্টির বারো হাজার; গাদ  
গুষ্টির বারো হাজার;

৬ আশের গুষ্টির বারো হাজার; নপ্তালি গুষ্টির বারো হাজার;  
মনঃশি গুষ্টির বারো হাজার;

৭ শিমিয়োন গুষ্টির বারো হাজার; লেবি গুষ্টির বারো হাজার;  
ইষাখর গুষ্টির বারো হাজার;

৮ সবুলুন গুষ্টির বারো হাজার; যোষেফ গুষ্টির বারো হাজার;  
বিন্যামীন গুষ্টির বারো হাজার। সাদা পোশাক পেন্দা মানষির ভিড়

৯ ইয়ার পাছত মুই দেখিলুং, পতিটা জাতি, গুষ্টি, দেশ আর  
ভাষার মইদ্বো থাকি এত মানষির ভিড় যে, উমারলার সংখ্যা  
কাণ্ডো গণতি করির পাইলেক না। সাদা পোশাক পিন্দিয়া উমরা  
সেই সিংহাসন আর ভেড়ার বাচ্চার আগত সন্মান জানের বাদে,  
খেজুরের পাত হাতত নিয়া খাড়া হয় আছিলেক।

১০ উমরা জোড়ে চিকরিয়া কবার ধরচে, “যায় সিংহাসনত বসি  
আছে, সেই ভগবান আর ভেড়ার বাচ্চারটে হামারলার মুক্তির  
ঘাটা আছে।”

১১ আর স্বর্গদূতলা সগায় সেই সিংহাসনের, নেতালার আর  
চাইরটা বত্তা প্রাণীর চাইরো পাকে খাড়া হয় রইলেক; উমরা

সিংহাসনের আগত উবুরি হয়। ভগবানক ভক্তি দিয়া কইলেক,

১২ “আমেন। গুণগান, মহিমা, জ্ঞান, ধন্যবাদ, সন্মান, ক্ষমতা আর শক্তি চিরকাল ধরি হামারলার ভগবানের হউক। আমেন।”

১৩ সেলো নেতালার মইন্ধো থাকি এক জন মোক কইলেক, “সাদা পোশাক পেন্দা এই মানষিলা কায়? আর ইমরা কোটে থাকি আসিচে?”

১৪ মুই উয়াক কলুং, “সেইটা তো তোমরা ভাল করি জানেন।” উয়ায় মোক কইলেক, “সেই ভয়ংকর কষ্টের মইন্ধো দিয়া যায় যায় আসিচে, উমরা হইলেক ইমরায়। ভেড়ার বাচ্চার সাঁপে দেওয়া অস্ত্র দিয়া উমারলার জীবন ধুইয়া পবিত্র করিচে বুলিয়া ইমার পোশাক সাদা হইচে।

১৫ এই বাদে ইমরা ভগবানের সিংহাসনের আগত আছে আর স্বর্গের মন্দিরত দিন রাতি উয়ার সেবা করির ধরচে। যায় সিংহাসনের উপরাত বসি আছে, উয়ায় ইমারলাক রক্ষা করির বাদে উয়ার নিজের তাম্বু টাঙাবে।

১৬ ইমার আর ভোগ নাগিবে না, টিস্সাও নাগিবে না, বেলার তেজ আর ইমার দেহার ক্ষতি করিবে না।

১৭ কেনেনা সেই ভেড়ার বাচ্চা যায় সিংহাসনত আছে, উয়ায় ইমারলার রাখোয়াল হবে। বত্তা জলের জোয়ারেরটে উয়ায় ইমারলাক নিয়া যাবে, আর ভগবান ইমারলার চখুর জল মুছি দিবে।”

৮ আর ভেড়ার বাচ্চা যেহেলা সপ্তম সীলমোহর খুলিলেক, সেহেলা স্বর্গত পেরায় আধা ঘণ্টা ধরি কোন শব্দ শোনা গেইলেক না।

২ সেহেলা সেই সাত জন স্বর্গদূত ভগবানের সামনাত খাড়া হয়। রবার মুই দেখির পাইলুং। উমারলার হাতত সাতটা শিঙ্গা দেওয়া হইলেক।

৩ পাছত আরেক জন স্বর্গদূত আসিয়া বেদীর বগলত খাড়া হইলেক। উয়ার হাতত একটা সোনার ধূপবাতি আছিলেক। উয়াক মেহেলা ধূনা দেওয়া হইলেক। যাতে উয়ায় সিংহাসনের আগত সোনার ধূপবাতি বেদীর উপরত ভগবানের সউগ মানষিলার প্রার্থনার সোদে সেই ধূনা সঁপে দেয়।

৪ পবিত্র মানষিলার প্রার্থনার সোদে দূতের হাত থাকি ধূনার ধূপবাতির ধূমা ভগবানের সামনাত উঠির নাগিলেক।

৫ সেহেলা স্বর্গদূত বেদী থাকি অগুন নিয়া ধূনার ধূপবাতিটা ভরেয়া দুনিয়াত ফেলে দিলেক। ইয়াতে মেঘের গর্জন, দ্যাওয়ার ঝিলিক, বিজলী পরির শব্দ, আর ভুইচাল হইলেক।

৬ যে সাত জন স্বর্গদূতের হাতত সাতটা শিঙ্গা আছিলেক, উমরা শিঙ্গা বাজের সাজিয়া রইলেক।

৭ পইলা স্বর্গদূত উয়ার শিঙ্গা বাজেবার পাছত, অক্ল মাখা শিলা ঝড়ি আর অগুন দুনিয়াত ফেলা হইলেক, ইয়াতে তিন ভাগের

একভাগ ভুই, তিন ভাগের এক ভাগ গছপালা আর সউগ সবুজ ঘাস ছোবা গেইলেক।

৮ ইয়ার পাছত দ্বিতীয় স্বর্গদূত শিংগা বাজাইলেক, সেলো মস্তবড় জলন্ত পাহাড়ের নাকান একটা জিনিস সাগরত ফেলা হইলেক;

৯ আর সাগরের তিন ভাগের একভাগ জল অক্ল হয়া গেইলেক, আরো সাগরের মইন্ধোত তিন ভাগের একভাগ বত্তা প্রাণীলা মরিলেক, আর তিন ভাগের একভাগ জাহাজ ধবংস হইলেক।

১০ তার পাছত তৃতীয় স্বর্গদূত শিংগা বাজাইলেক, সেলো একটা বড় তারা বাতির নাকান জ্বলিতে জ্বলিতে দ্যাওয়া থাকি পড়িলেক, আর তিন ভাগের একভাগ নদী নালার আর জলের জোয়ারের উপরত পড়িলেক।

১১ ঐ তারাটার নাম আছিলেক সোমরাজ। তিন ভাগের একভাগ নদ-নদী আর জোয়ারের উপরত তারাটা পড়িলেক, ইয়াতে তিন ভাগের এক ভাগ জল তিতা হয়া গেইলেক, আর ঐ তিতা জল খায়া মেলা মানষি মরিলেক।

১২ ইয়ার পাছত চতুর্থ স্বর্গদূত শিংগা বাজাইলেক, ইয়াতে বেলার তিন ভাগের একভাগ আর চানের তিন ভাগের একভাগ আর তারালার তিন ভাগের এক ভাগ হানি হয়া গেইলেক, দিনের তিন ভাগের এক ভাগ কোন আলো দেখা গেইলেক না আর রাতির তিন ভাগের এক ভাগ একে নাকান হইলেক।



১৩ পাছত মুই নজর দিলুং, একটা ভেলোয়া পখি দ্যাওয়ার মইন্ধো দিয়া উড়ি যাবার ধরচে, আর সেই ভেলোয়াটাক জোড়ে জোড়ে কবার শুনিলুং, “যেহা অইন্য যেই তিন জন স্বর্গদূত শিংগা বাজের যাবার ধরচে, উমার শিংগার আওয়াজ হইলে সেহা যায় যায় এই দুনিয়ার উমারলার বিপদ, বিপদ, বিপদ হবো।”

১ ইয়ার পাছত পঞ্চম দূত শিংগা বাজাইলেক, আর মুই দেখিলুং একটা তারা দ্যাওয়া থাকি দুনিয়াত পড়িলেক; ঐ তারাটাক অতল খালের চাবি দেওয়া হইলেক।

২ তারাটা সেহা অতল খালটা খোলাইলেক, ইট ভাটা থাকি যেমন ধূমা বাইর হয়, ঠিক একে নাকান করি ঐ খালটা থাকি ধূমা বাইর হবার নাগিলেক। ঐ খালটার ধুমায় বেলা আর দ্যাওয়া আন্ধার হয় গেইলেক।

৩ আর ঐ ধুমার মইন্ধো থাকি মেহা বড় পংগপাল বাইর হয় দুনিয়াত আসিলেক। ঐ পংগপাললাক দুনিয়ার বিষ কাকড়ার নাকান ক্ষমতা দেওয়া হইলেক।

৪ উমারলাক কওয়া হইলেক, উমরা যাতে দুনিয়ার কোন ঘাস বা সবুজ কোন কিছু আর কোন গছের হানি না করে। যার কপালত ভগবানের সীলমোহর নাই, খালি সেই মানষিলারে হানি করে।

৫ এই মানষিলাক মারি ফ্যেলের ক্ষমতা উমারলাক দেওয়া হইলেক না, খালি পাচ মাস পর্যন্ত যন্তনা দিবার ক্ষমতা উমাক দেওয়া হইলেক। বিষ কাকড়া যেলা কোন মানষিক সেলে দেয় সেলা যেই নাকান যন্তনা হয় এই বড় পংগপাললার দেওয়া যন্তনা ঠিক একে নাকান।

৬ ঐ সমায় মানষিলা মরণ খুজিবে, কিন্তুক কোন মতে উদ্দিশ পাবে না। উমরা মরির চাবে কিন্তুক মরণ উমারটে থাকি পালাবে।

৭ ঐ বড় পংগপাললা দেখির যুদ্ধের বাদে সাজে থোয়া ঘোড়ার মত। উমার মাখাত সোনার মটুকের মত এক নাকানের জিনিস আছিলেক। আর উমার মুখের চেহারা আছিলেক মানষির নাকান।

৮ উমার ঢুলি আছিলেক বেটিছাওয়ার ঢুলির নাকান, আর উমার দাঁত সিংহর দাতের মত।

৯ উমারলার বুকত লোহার বুক পাটার পোশাকের নাকান পোশাক আছিলেক। মেলা ঘোড়া একসোদে যুদ্ধের রথ টানি নিয়া গেইলে যেই নাকান আওয়াজ হয় উমার ডানার আওয়াজ একে নাকান আছিলেক।

১০ উমারলার নেটু বিষ কাকড়ার সেলে দেওয়া নেটুর নাকান আছিলেক। পাচ মাস পর্যন্ত মানষিলা হানি করির ক্ষমতা উমার নেটুত আছিলেক।

১১ ঐ অতল খালের দূতেই আছিলেক পংগপাললার রাজা।  
ইব্রীয় ভাষায় এই দূতের নাম আবদোন আর গ্রীক ভাষাত  
আপল্লুয়ন, ইয়ার মানে ধ্বংসকারী।

১২ পইলা বিপদ শেষ হইল; ইয়ার পাছত আরো দুইটা বিপদ  
আসির ধরচে।

১৩ পাছত ষষ্ঠ স্বর্গদূত উয়ার শিংগা বাজাইলেক, ভগবানের  
সামনাত যে সোনার বেদী আছে সেই বেদীর চারটা শিং থাকি মুই  
এক জনাক কতা কবার শুনিলুং। যারটে শিংগা আছিলেক সেই  
ষষ্ঠ দূতক কইলেক,

১৪ “যেই চাইর জন দূত ইউফ্রেটিস মহানদীত বান্দা আছে  
উমারলাক খালাস করেক।”

১৫ সেই চাইর জন দূতক বছর, মাস, দিন আর ঘণ্টার বাদে  
সাজে থোয়া হইছিলেক। উমারলাক খালাস করা হইলেক, যাতে  
উমরা তিন ভাগের এক ভাগ মানষিক মারি ফেল্যায়।

১৬ পাছত মুই শূনির পালুং, ঘোড়াত চড়া সেনা আছিলেক বিশ  
কোটি।

১৭ দর্শনত যেইলা ঘোড়া আর ঐলার উপরাত যাক যাক মুই  
দেখিলুং, উমার চেহারা এই নাকানের আছিলেক, উমার বুক  
বাঁচের বাদে পোশাক আছিলেক অগুনের মত নাল, নীলুয়া আর  
গন্ধকের মত হলদিয়া রংএর। ঘোড়ালার মাথা আছিলেক সিংহর

মাথার নাকান আর ঐলার মুখ দিয়া অগুন, ধূমা, আর গন্ধক বাইর হবার ধরছিলেক।

১৮ অগুন, ধূমা, আর গন্ধক এই তিনটা আঘাতের মইন্ধো দিয়া তিন ভাগের একভাগ মানষিক মারি ফেলা হইলেক।

১৯ এই ঘোড়ালার মুখত আর নেটুত শক্তি আছিলেক, কেনেনা উমরলার নেটু ছিল সাপের নাকান। এই নেটুর মাথা দিয়ায় উমরলা মানষিলার হানি করির ধরছিলেক।

২০ কিন্তুক এইলা আঘাতের পাছত যেইলা মানষি বত্তি রইলেক উমরা নিজেরলার কুকর্ম থাকি মন ফিরাইলেক না, উমরলা অপদেবতার আর প্রতিমা পূজা করিতেই থাকিলেক। যদিও ঐলা সোনা, রূপা, পিতল, শিল আর খুটা দিয়া গড়া আর এইলা দেখির, শুনির, হাটির না পায়।

২১ এইলা ছাড়াও খুন, যাদুবিদ্যা, ব্যভিচার আরো চুরি করা থাকিয়াও উমরা মন ফিরাইলেক না।

১০ পাছত মুই আরেক জন শক্তিমান দূতক স্বর্গ থাকি নামি আসির দেখিলুং। উয়ার পোশাক আছিলেক মেঘ, আর উয়ার মাথার উপরত আছিলেক রংধনুক। উয়ার মুখ বেলার নাকান চকচকা, আর ঠেং আছিলেক অগুনের থামের নাকান।

২ উয়ার হাতত ছোট একখান বই মেলে থোয়া আছিলেক। উয়ায় ডাইন ঠেং সাগরত আর বাম ঠেং ডাঙাত থুইয়া,

৩ সিংহর নাকান জোড়ে চিকরিলেক। উয়ার চেকরনের সাথে সাথে সাতটা বিজলীর আওয়াজ হইলেক।

৪ যেলা সাতটা বিজলীর আওয়াজ শুনাইলেক সেলা মুই নেখির বাদে সাজি আছং। কিন্তুক স্বর্গ থাকি মোক এই কতা কওয়া হইলেক, “সাতটা বিজলী এই কতা কইলেক, এইলা না নেখিস, শিল করি গোপন থো।”

৫ যেই স্বর্গদূতক মুই সাগরত আর ডাঙাত খাড়া হয়়া রবার দেখিলুং, উয়ায় উয়ার ডাইন হাত স্বর্গের পাকে তুলিলেক।

৬ যায় চিরকাল ধরি বত্তায় আছে। আর দ্যাওয়া, দুনিয়া, সাগর আর ঐলার মইন্ধোত যেইলা আছে সউগ সিজ্জন করিচে, উয়ার নামে ওই স্বর্গদূত কিরা কাটিয়া কইলেক, “আর বেশী দেরি হবার না হয়।

৭ কিন্তুক সপ্তম স্বর্গদূত শিংগা বাজের দিন ভগবানের গোপন উদ্দেশ্য পূরণ হবে। ভগবান উয়ার নিজের চাকরলারটে, মানে ভাববাদীলারটে যেইলা জানাইছিলেক, এইটা ঠিক সেই নাকানে হবে।”

৮ মুই স্বর্গ থাকি যাক কতা কবার শুনছিলুং, উয়ায় আরো মোক কইলেক, “যেই স্বর্গদূত সাগর আর ডাঙাত খাড়া হয়়া আছে, উয়ারটে যায়া উয়ারটে থাকি খোলা বইখান নেক।”

৯ সেলা মুই সেই স্বর্গদূতেরটে যায়া ঐ ছোট মোড়ে থোয়া বইখান মোক দিবার কলুং, উয়ায় মোক কইলেক, “বইখান নিয়া

খায়া ফ্যেলাও। এইটা তোর মুখত মধুর নাকান মিষ্টি নাগিবে  
কিন্তুক তোর পেটক তিতা করি তুলিবে।”

১০ সেলা মুই স্বর্গদূতের হাত থাকি ঐ বইখান নিয়া খায়া  
ফ্যেলালুং; খাবার সমায় মোর মুখত মধুর নাকান মিষ্টি  
নাগিলেক। কিন্তুক খাবার পাছত মোর পেটত তিতার নাকান মনে  
হইলেক।

১১ তার পাছত মোক উমরা কইলেক, “তোক আরো মেলা দেশ,  
জাতি, ভাষা আর রাজার বিষয়ে ভাববাণী কবার নাগবে।”

১২ ইয়ার পাছত একটা মাপিবার নাটি মোক দেওয়া হইল, আর  
কইলেক, “ওঠেক! ভগবানের মন্দিরটা মাপেক আর বেদীটাও  
মাপেক আর যায় যায় ওটে ভগবানের গুণগান করে উমারলার  
সংখ্যা গণতি করেক।

২ কিন্তুক মন্দিরের বায়রা চত্বর খান বাদ দিস, মাপিস না,  
কেনেনা ঐখান অযিহুদী জাতিলাক দেওয়া হইচে। উমরা  
বিয়াল্লিশ মাস ধরি পবিত্র গঞ্জটা ঠেং দিয়া খচিবে।

৩ কিন্তুক মুই মোর দুই জন সাক্ষীক এমন কাম দিম, যার ফলে  
উমরা চটের কাপড় পিন্দিয়া এক হাজার দুইশ ষাইট দিন ধরি  
ভবিষ্যত বাণী কবে।”

৪ সেই দুই জন সাক্ষী হইলেক দুইটা জলপই গছ আর দুইটা  
নেম্পোর ঠগা, যায় যায় দুনিয়ার প্রভুর আগত খাড়া হয়্যা আছে।

৫ কাণ্ডো যদি উমার হানি করির চায় তাইলে উমার মুখ থাকি অগুন বাইর হয়। ঐ শত্রুলাক ছুবিবে; যে কাণ্ডো উমার হানি করির চায়, উমাক এই নাকান করি মরির নাগবে।

৬ এই মানষিলা যত দিন ভবিষ্যত বাণী করিবে, ততদিন দ্যাওয়া থাকি জল পরিবে না। দ্যাওয়া থাকি জল বন্ধ করির ক্ষমতা উমার থাকিবে। জলক অন্ধ করির যত বার ইচ্ছা ততবার যেমন করি হউক। দুনিয়াত সউগ নাকানের আঘাত করির ক্ষমতাও উমার থাকিবে।

৭ উমার সাক্ষ্য দেওয়া শেষ হইলে অতল খাল থাকি একটা জন্তু উঠি আসি উমারলার সোদে যুদ্ধ করিবে, আর উমারলাক হারে দিয়া মারি ফেলাবে।

৮ উমার প্রভুক যেই গঞ্জত ক্রুশত দেওয়া হইছিলেক সেই মহানগরের ঘাটাত উমারলার দেহা পড়ি রবে। সেই গঞ্জটার নাম আসলে সদোম আর মিশর না হয়, তাণ্ডো একে নাকান বুলিয়া সেই গঞ্জটাক সদোম আর মিশর কওয়া হয়।

৯ সেয়া সউগ দেশ, বংশ, ভাষা আর জাতির মইন্ধো থাকি মানষিলা সাড়ে তিন দিন ধরি ঐ মরা দেহালা দেখিবে। উমরা উমার দেহালাক সমাধিত দিবার দিবে না।

১০ সেই সাক্ষীলা মরি গেইচে এই বাদে যায় যায় এই দুনিয়ার উমরা খুশি হবে আর আনন্দ করিবে। মানষিলা একে অপরেরটে

উপহার পেঠাবে, কেনেনা এই দুই জন ভাববাদী দুনিয়ার মানষিলাক যাতনা দিলেক হয়।

১১ কিন্তুক সেই সাড়ে তিন দিন পাছত, ভগবানের দেওয়া জিউয়ের পরাণবায়ু উমার মইন্ধোত সোন্দাইলেক, ইয়াতে নিঃশ্বাস ফিরি পায়া উমরা ঠেংয়ত ভর দিয়া খাড়া হইলেক, সেলো যায় যায় উমারলাক দেখিলেক উমরা খুব ভয় খাইলেক।

১২ তার পাছত সেই দুই জন সাক্ষী স্বর্গ থাকি কওয়া এই কতা শুনিলেক, “এদিয়া উঠি আইসো!” সেলো উমরা একখান মেঘত করি স্বর্গত চলি গেইলেক, আর উমার শত্রুলা দেখিলেক।

১৩ সেই সমায় দারুন ভৈচাল হইলেক আর ঐ গঞ্জটার দশ ভাগের এক ভাগ ভাঙি পড়িলেক, ঐ ভৈচালত সাত হাজার মানষি মরিলেক, ইয়াতে বত্তি থাকা বাকি মানষিলা ভয়ে স্বর্গের ভগবানের মহিমা করির নাগিলেক।

১৪ এই নাকান করি দ্বিতীয় বিপদ পার হইলেক, আর দেখ খুব পচপচে তৃতীয় বিপদ আসির ধরচে।

১৫ তার পাছত সপ্তম স্বর্গদূত শিঙ্গা বাজাইলেক, সেলো স্বর্গত খুব জোড়ে এই নাকান বাণী হইলেক, “দুনিয়ার শাসন এলা হামারলার প্রভু আর বাছাই করা রাজার হইচে, উয়ায় চিরকাল ধরি শাসন করিবে।”

১৬ যেই চব্বিশ জন নেতা ভগবানের আগত উমারলার সিংহাসনত বসিছিলেক উমরা উবুরি হয় ভগবানক ভক্তি করিয়া



ভগবানের গুণকিত্তন করিয়া কবার নাগিলেক,

১৭ “হে প্রভু সর্বশক্তিমান ভগবান, তুই আছিস আর তুই আছিলু, হামরা তোর গুণগান করির ধরচি, কেনেনা তুই তোর মহাক্ষমতা নিয়া শাসন করির শুরু করিচিস।

১৮ সউগ জাতি গোসা হইচে আর তোর গোসা দেখের সমায়ও হইচে, মরা মানষিলার বিচার করির সমায় আসিচে। তোর চাকরলার মানে ভাববাদীলার, তোর পবিত্র মানষিলার আর ছোট বড় সগায় যায় যায় তোক ভক্তি করে উমারলাক পুরুষ্কার দিবার সমায় হইচে। এইলা ছাড়াও যায় যায় দুনিয়ার নাশ করিচে, উমারলাকো নাশ করির সমায় আসিচে।”

১৯ পাছত স্বর্গের মন্দিরের দুয়ার খোলা হইলেক, আর ওটে ভগবানের চুক্তির সিন্দুকটা দেখা গেইলেক, সেলো বিদ্যুৎ চমকাইলেক আর ভয়ংকর মেঘের আওয়াজ আর বিজলী পড়িলেক, ভৈচাল হইলেক আর ভয়ংকর শিলা ঝড়ি হইলেক।

২০ ইয়ার পাছত স্বর্গত একটা বড় চিন দেখা গেইলেক। এক জন বেটিছাওয়ার পেন্দা আছিলেক বেলা আর ঠেংএর তলাত আছিলেক চান। উয়ার মাখাত আছিলেক বারোটা তারা দিয়া গাথা একটা মটুক।

২ উয়ায় গাওভারী আছিলেক আর প্রসব বিষে চিকরির ধরছিলেক,

৩ ইয়ার পাছত স্বৰ্গত আর একটা চিন দেখা গেলেক, অগুনের নাকান নাল একটা বড় দানব। উয়ার সাতটা মাথা, দশটা শিং আর মাথালাত সাতটা মটুক আছিলেক।

৪ উয়ার নেটু দিয়া উয়ায় দ্যাওয়ার তিন ভাগের এক ভাগ তারা টানি আনিয়া দুনিয়াত ঢেলে ফেলে দিবার ধরছিলেক। যেই বেটিছাওয়াটার ছাওয়া হবার ধরছিলেক দানবটা উয়ার আগত খাড়া হয় আছিলেক, যাতে ছাওয়াটা জন্মা মাত্রই উয়ায় খায়া ফেলের পায়।

৫ বেটিছাওয়াটার একটা বেটা হইল; সেই বেটাটায় লোহার নাটি দিয়া সউগ জাতিক শাসন করিবে। সেই ছাওয়াটাক ভগবানেরটে আর উয়ার সিংহাসনেরটে আনা হইলেক।

৬ আর ঐ বেটিছাওয়াটা নিধুয়া পাথারত পালে গেলেক; ঐ নিধুয়া পাথারত ভগবান একখান জাগা ঠিক করি থুইচে যাতে এক হাজার দুইশো ষাইট দিন উয়ায় ওটেকোনা যতন পায়।

৭ তার পাছত স্বৰ্গত যুদ্ধ হইলেক; মীখায়েল আর উয়ার অধীনের দূতলা, ঐ দানব আর উয়ার দূতলাও যুদ্ধ করিলেক,

৮ কিন্তুক ঐ দানবটা জয়ী হবার পারিলেক না, স্বৰ্গত উমারলাক আর থাকির দেওয়া হইলেক না।

৯ সেলো ঐ বিরাট দানবটাক আর উয়ার সোদে উয়ার দূতলাক দুনিয়াত ফেলে দেওয়া হইলেক। এই দানবটা হইলেক সেই পুরান

সাপ যাক শয়তান কওয়া হয়। উয়ায় দুনিয়ার সউগ মানষিলাক ভুল ঘাটাত নিয়া যায়।

১০ সেলো মুই স্বর্গ থাকি জোড়ে একটা আওয়াজ শুনিলুং, “এলা মুক্তি, শক্তি আর হামারলার ভগবানের শাসন আর উয়ার বাছাই করা রাজার ক্ষমতা আসিচে, কেনেনা যেই শয়তান সউগ সমায় হামার ভাই বইনিলার দোষ দিবার ধরছিলেক উয়াক স্বর্গ থাকি ফ্যেলে দেওয়া হইছিলেক।

১১ ভেড়ার বাচ্চার অত্ত আর ভগবানের বাইক্যের সাক্ষ্য দিয়া উমরালা উয়াক হারে দিবার ধরছিলেক। উমরা ভগবানের বাইক্যের কারনে নিজক বেশী পিরিত করে নাই এই বাদে উমরা জীবন দিবার রাজি হইচে।

১২ এই বাদে হে স্বর্গ, আনন্দিত হন, তোমরালা যায় যায় ওটেকোনা রন, আনন্দিত হন। কিন্তুক দুনিয়া আর সাগর ধিক্কার দ্যেং তোমারলাক! কেনেনা শয়তান তোমারলার উপরত নামি আসিচে। উয়ায় জানে উয়ার দিন শেষ হবার ধরচে, এই বাদে শয়তান গোসা হয় ফুলি উঠিচে।”

১৩ পরে ঐ দানবটা যেলা বুঝির পারিলেক যে, উয়াক দুনিয়াত ফ্যেলে দেওয়া হইচে, সেলো যেই বেটিছাওয়াটার ছাওয়া হইছিলেক, দানবটা উয়ার পাছ ধরিলেক।

১৪ সেলো ঐ বেটিছাওয়াটাক বড় ভেলোয়া পখির দুইটা ডেনা দেওয়া হইলেক, যাতে উয়ায় নিধুয়া পাথারত উয়ার ঠিক করা

জাগাত উরি যাবার পারে। ওটেকোনা ঐ দানবের চখুর  
আওডালত এক মেয়াদ, দুই মেয়াদ আর আধা মেয়াদ উয়ার  
যতন নেওয়া হবে।

১৫ সেয়া ঐ দানবটা নিজের মুখ থাকি নদীর জলের স্রোতের  
নাকান বির করিলেক, যাতে বেটিছাওয়াটাক ভাসে নিয়া যাবার  
পারে।

১৬ আর ভুঁই ঐ বেটিছাওয়াটাক সাহায্য করিলেক, দানব নিজের  
মুখ থাকি যেই জলের স্রোত বাইর করির ধরছিলেক, ভুঁই ফাকা  
হয়া দানবের মুখ থাকি জললা টানি নিলেক।

১৭ আর সেই বেটিছাওয়াটার পতি দানবটা খুব গোসা হইলেক।  
এই বাদে বেটিছাওয়ার গুষ্টির বিরুদ্ধে নড়াই করির গেইলেক।  
উয়ার গুষ্টি হইলেক, যায় যায় ভগবানের আদেশ পালন করে আর  
যীশুর সাক্ষ্য কয়া থির রয়।

১৮ তার পাছত দানবটা সাগরের পাড়ত খাড়া হইলেক।

১৯ ইয়ার পাছত মুই দেখিলুং একটা জন্তু সাগরের মইন্ধো থাকি  
উঠি আসিল। ঐ জন্তুটার দশটা শিং আর সাতটা মাথা  
আছিলেক। ঐ শিংলার উপরাত দশটা মটুক আছিলেক আর  
মাথালার উপরাত ভগবানক অপমান করির বাদে নানা নাকানের  
নাম নেখা আছিলেক।

২ ঐ জন্তুটা দেখিবার আছিলেক চিতা বাঘের নাকান আর উয়ার ঠেংলা আছিলেক ভাল্লুকের ঠেংএর নাকান, মুখটা আছিলেক সিংহের মুখের নাকান। আর ঐ দানবটা উয়ার শক্তি, সিংহাসন আর অধিকার ঐ জন্তুটাক দিলেক।

৩ জন্তুটার একটা মাখাত এমন একটা আঘাত আছিলেক যার ফলে জন্তুটা মরার নাকান হইছিলেক, কিন্তুক সেই আঘাতটা ভাল হয় গেলছিলেক। ইয়াতে দুনিয়ার সউগ মানষিলা অচানক হয় জন্তুটার পাছে পাছে যাবার নাগিলেক।

৪ দানবটা ঐ জন্তুটাক অধিকার দিচে এই বাদে মানষিলা ঐ দানবটাক ভগবানের নাকান সন্মান দিয়া ভক্তি করিলেক, আর জন্তুটাকো একে নাকান সন্মান দিয়া ভক্তি করি কইলেক, “এই জন্তুটার নাকান ক্ষমতা ওয়ালা কায় আছে? আর কায় উয়ার সোদে যুদ্ধ করির পারে?”

৫ অহংকার করির আর অপমান করিবার বাদে জন্তুটাক কতা কবার অধিকার দেওয়া হইলেক। আর বিয়াল্লিশ মাস পর্যন্ত কাম করির ক্ষমতা উয়াক দেওয়া হইলেক।

৬ সেলো ঐ জন্তুটা ভগবানের বিরুদ্ধে নিন্দা করির নাগিলেক, উয়ার নামের, উয়ার তাম্বুর আর স্বর্গত যায় রয় উমারলারও বিরুদ্ধে খুব অহংকারী কতা কয়া অপমান করির নাগিলেক।

৭ ভগবানের মানষিলার বিরুদ্ধে যুদ্ধ করিয়া উমারলাক জয় করি নিবার ক্ষমতা দেওয়া হইলেক। আর প্রতিটা বংশ, দেশ, ভাষা

আর জাতির মানষিলার উপরাত উয়াক ক্ষমতা দেওয়া হইলেক।

৮ এই দুনিয়া শুরু থাকি যার যার নাম বলি হওয়া ভেড়ার বাচ্চার জীবন বইয়ত নেখা আছে উমরা ভক্তি করে নাই। কিন্তুক যার যার নাম জীবন বইয়ত নেখা নাই উমরা সগায় ঐ জন্তটাক ভক্তি করে।

৯ যার শূনির কান আছে, উয়ায় শুনুক!

১০ যার বন্দী হবার কতা আছে উয়ায় বন্দী হবে, যার ছোরা দিয়া খুন হবার কতা উয়ায় খুন হবে। এই বাদে ভগবানের মানষিলার ধৈর্য আর বিশ্বাস দরকার।

১১ ইয়ার পাছত মুই জমি থাকি আর একটা জন্তক উঠি আসির দেখিলুং। ভেড়ার নাকান উয়ার দুইটা শিং আছিলেক। কিন্তুক উয়ায় দানবের নাকান কতা কবার ধরছিলেক।

১২ এই জন্তটা পইলা জন্তটার হয়া উয়ার সউগ অধিকার ব্যবহার করির ধরছিলেক। দুনিয়া আর দুনিয়ার সউগ মানষিলাক বাধ্য করিলেক ঐ পইলা জন্তটাক ভক্তি করির। ঐ জন্তটাক আঘাত দেওয়া হইচে আর আঘাতটা ভাল হয়া গেইচে।

১৩ উয়ায় বড় বড় অচানক কাম করির নাগিলেক, এমন কি মানষিলার চখুর আগত দ্যাওয়া থাকি এই দুনিয়াত অগুন নামেয়া আনিলেক।

১৪ ঐ পইলা জন্তটার হয়া যেইলা অচানক কাম করির ক্ষমতা দেওয়া হইছিলেক সেইলা করিয়া মানষিলাক ভুল ঘাটাত নিয়া

যাবার ধরছিলেন। পইলা জন্তুটা ছোরার গুতা খায়াও বত্তিচে।  
দ্বিতীয় জন্তুটা মানষিলাক কইলেক, যাতে উয়ার একটা মূর্তি  
গড়ায়।

১৫ আর উয়াক এই নাকান ক্ষমতা দেওয়া হইলেক যে, ঐ মূর্তির  
মইন্ধোত নিঃশ্বাস দেয় যাতে মূর্তি কতা কয়। আর যায় যায় ঐ  
মূর্তিটাক ভগবানের সন্মান দিয়া ভক্তি দিবার না হয়, উমারলাক  
মারি ফ্যেলের পারে।

১৬ উয়ায় ছোট-বড়, ধনী-গরীব, স্বাধীন আর চাকর সগারে ডাইন  
হাতত না হইলে কপালত একটা চিন নিবার বাধ্য করিলেক।

১৭ আর যায় জন্তুটার চিন ধারন না করে, উমরা কোন কিছু  
কিনির বা বেচের অধিকার পাইলেক না। ঐ চিনটা হইলেক ঐ  
জন্তুটার নাম বা উয়ার নামের সংখ্যা।

১৮ এইলা বুঝির বুদ্ধির দরকার। যার বুদ্ধি আছে উয়ায় ঐ  
জন্তুটার সংখ্যা গুণিয়া দেখুক, কেনেনা ঐটা একটা মানষির  
নামের সংখ্যা। আর ঐ সংখ্যাটা হইলেক ছয় শো ছেষটি।

১৮ ইয়ার পাছত মুই এক নজর দেখিলুং, ঐ ভেড়ার বাচ্চাটা  
সিয়োন পাহাড়ের উপরা খাড়া হয়্যা আছে। উয়ার সোদে আছে  
এক লক্ষ চুয়াল্লিশ হাজার মানষি, উমারলার কপালত উয়ার নাম  
আর উয়ার বাপের নাম নেখা আছে।

২ পাছত মুই স্বৰ্গ থাকি বয়া যাওয়া জলের স্রোতের নাকান কল কল আর বিজলী পড়ির আওয়াজের নাকান একটা আওয়াজ শুনিলুং। যেই আওয়াজ মুই শুনিলুং সেইটা আছিলেক বীণা বাজাইয়ালার বীণার আওয়াজের নাকান।

৩ উমরা সিংহাসনের আগত আর ঐ চারজন বত্তা প্রাণী আর ঐ নেতালার আগত উমরা একটা নয়া গান করির ধরছিলেক। দুনিয়া থাকি কেনা এক লক্ষ চুয়াল্লিশ হাজার মানষি ছাড়া আর কাণ্ডো এই গান শিখির পাইলেক না।

৪ এই এক লক্ষ চুয়াল্লিশ হাজার মানষি বেটিছাওয়ালার সোদে ব্যভিচার করি নিজেরলাক অশুদ্ধি নাই করে, ইমরা খাটি। ভেড়ার বাচ্চা যেটেকোনা যায় উমরাও পাছে পাছে যায়। ইমরা ভগবানের আর ভেড়ার বাচ্চারটে পইলা ফল হিসাবে সঁপে দিবার বাদে মানষিলার মইন্ধো থাকি উমারলাক কিনি নেওয়া হইচে।

৫ আর উমরা কোন দিন মুখ দিয়া মিছাং কতা কয় নাই। উমারলার মইন্ধোত কোন দোষ পাওয়া যায় নাই।

৬ পাছত মুই এক জন স্বৰ্গদূতক দ্যাওয়ার মইন্ধোত উড়িবার দেখিলুং। দুনিয়াত বসবাসকারী পতি জাতি, বংশ, ভাষা, দেশের মানষিলারটে প্রচার করির বাদে উয়ারটে চিরকালের ভাল খবর আছিলেক।

৭ উয়ায় চিকরিয়া এই কতা কইছিলেক, “ভগবানক ভয় কর আর উয়ার গুণগান কর, কেনেনা উয়ার বিচার করির সমায় হইচে।



যায় দ্যাওয়া, ভুঁই, সাগর, আর জোয়ারের সিঙ্জন করিচে উয়ার আরাধনা কর।”

৮ ইয়ার পাছত দ্বিতীয় আরেক জন স্বর্গদূত উয়ার পাছে পাছে আসিয়া কইলেক, “সেই নাম করা বাবিল গঞ্জ নাশ হয় গেইচে! যে গঞ্জ সউগ জাতিক মাগীবাজি করাইচে, সেইটা নাশ হয় গেইচে আর সউগ জাতি শাস্তি পাইচে।”

৯ ইয়ার পাছত তৃতীয় আরেক জন দূত উমারলার পাছে পাছে আসিয়া জোড়ে কইলেক, “কাণ্ডো যদি ঐ জন্তুর আর উয়ার মূর্তির পূজা করে আর উয়ার চিন কপালত বা হাতত নেয়,

১০ তাইলে উয়াক ভগবানের গোসার মদ খাওয়া খাবে। এই মদের সোদে জল না মিশিয়া ভগবানের গোসার নোটাত ঢালি দেওয়া হইচে। পবিত্র স্বর্গদূতলার আর ভেড়ার বাচ্চার চখুর আগত অগুন আর গন্ধক দিয়া ঐ মানষিক যন্তনা দেওয়া হবে।

১১ যেই অগুন এই মানষিলাক যন্তনা দিবে সেই অগুনের ধূমা চিরকাল উঠিতে থাকিবে। যেই মানষিলা ঐ জন্তু আর উয়ার মূর্তির পূজা করিবে আর উয়ার নামের চিন নিবে উয়ায় রাতি দিনে জিরান পাবার না হয়।”

১২ যায় যায় ভগবানের আদেশ পালন করে আর যীশুর পতি বিশ্বস্ত রয় ভগবানের সেই মানষিলাক এই নাকান অবস্থার মইন্ধেও ধৈর্যের দরকার।

১৩ ইয়ার পাছত মুই স্বৰ্গ থাকি এক জনাক কবার শুনিলুং, “এই কতা নেখেক, এলা থাকি যায় যায় প্রভুর নগত যুক্ত থাকিয়া মরিবে উমরা আশুৰ্বাদ পাওয়া।” পবিত্র আত্মা এই কতা কইচে, “হঁ্যা, উমরা আশুৰ্বাদ পাওয়া। উমারলার পরিশ্রম থাকি উমরা জিরান পাবে, কেনেনা উমারলার কামের ফল উমারলার সোদে রবে।”

১৪ পাছত মুই একখান সাদা মেঘ দেখির পালুং। আর ঐ মেঘের উপরত বাছাই করা মানষির নাকান কাণ্ডো এক জন বসি আছিলেক। উয়ার মাথাত জয়ের সোনার মটুক আছিলেক আর হাতত আছিলেক ধার ওয়ালা কাচি।

১৫ পাছত আর এক জন দূত মন্দির থাকি বাইর হয়া আসিলেক আর যায় মেঘের উপরত বসি আছে উয়াক জোরে চিল্লিয়া কইলেক, “ফসল কাটির সমায় হইচে, দুনিয়ার ফসল পুরাপুরি পাকি গেইচে! তোমার কাচি নাগান, ফসল কাটো।”

১৬ সেয়া যায় মেঘের উপরত বসিয়া আছিলেক উয়ায় নিজের কাচি নাগাইলেক আর দুনিয়ার ফসল কাটা হইলেক।

১৭ পাছত স্বৰ্গের মন্দির থাকি আর এক জন দূত বাইর হয়া আসিলেক। উয়ারটেও একখান ধার ওয়ালা কাচি আছিলেক।

১৮ ইয়ার পাছত বেদী থাকি আর এক জন দূত বাইর হয়া আসিলেক। অগুনের উপরত উয়ার ক্ষমতা আছিলেক। যেই দূতটারটে ধার ওয়ালা কাচিখান আছিলেক উয়ায় কাচি ধরা

দূতটাক জোড়ে ড্যেকেয়া কইলেক, “তোর ধার ওয়ালা কাচি নাগাও আর দুনিয়ার আংগুর গছ থাকি আংগুরের থোকাল কাচি জড়ো করেক। কেনেনা আংগুর পাকি গেইচে।”

১৯ সেলো ঐ দূতটা দুনিয়াত উয়ার নিজের কাচি নাগাইলেক আর দুনিয়ার আংগুর কাচি জড়ো করিলেক। তার পাছত আংগুর রস করির বাদে একটা খালত খুইয়া দিলেক। এই আংগুর রস করির খালটায় হইলেক ভগবানের ভয়ংকর গোসার একটা চিন।

২০ গঞ্জের বায়রাত আংগুরের রস বানের খালত রস বানের সমায় আংগুর থাকি অত্ত বাইর হয় আসিলেক। আর এত অত্ত হইলেক যে ঘোড়ালার লাগাম পর্যন্ত উঠিলেক। ইয়াতে একশ আশি মাইল পর্যন্ত সউগ জাগা অত্তে ডুবি গেইলেক।

১৫ পাছত মুই স্বর্গত একটা মহান আর অচানক চিন দেখিলুং যে, সাত জন স্বর্গদূত সাতটা আঘাত নিয়া আসির ধরচে। ঐ আঘাতলা শেষ আঘাত আছিলেক, কেনেনা এইলা দিয়া ভগবানের গোসা শেষ হইলেক।

২ মুই অগুন দিয়া মিশা একটা কাইচের সাগরের নাকান দেখিলুং, ভগবানের দেওয়া বীণা হাতত নিয়া মানষিলা ঐ কাইচের সাগরের বগলত খাড়া হয় আছে। আর ঐ মানষিলা আছিলেক যায় যায় ঐ জন্তু, উয়ার মূর্তি আর উয়ার নামের সংখ্যার উপরত জয় লাভ করিচে তায় তায়।

৩ উমরা ভগবানের চাকর মোশির আর ঐ ভেড়ার বাচ্চার এই গান করিচে, “সর্বশক্তিমান প্রভু ভগবান, তোর নিলা খেলা কত মহান আর কত অচানক! হে সউগ জাতির রাজা, কত ন্যায় আর সইত্য তোর ঘাটা!

৪ হে প্রভু, এমন কায় আছে যে তোক ভয় না খায়? আর তোর নামের গুণগান কায় না করিবে? খালি তুইয়ে তো পবিত্র। সউগ জাতি তোরটে আসিবে, সগায় তোর সেবা করিবে, কেনেনা তোর ন্যায় বিচার প্রকাশ পাইচে।”

৫ আর ইয়ার পাছত মুই দেখিলুং, স্বর্গত মন্দিরটা মানে পবিত্র তাম্বুটা, খোলা হইলেক।

৬ সেলো ঐ সাতটা আঘাতের মালিক সপ্ত দূত মন্দির থাকি বাইর হয়। আসিলেক। উমার পরিষ্কার ঝকঝকা কাপড় পেন্দা আছিলেক আর বুকত বান্দা আছিলেক সোনার পট্টা।

৭ ঐ চারজন বত্তা প্রাণীর এক জন ঐ সাত জন স্বর্গদূতক সাতটা সোনার বাটি দিলেক। ভগবান, যায় যুগ যুগ ধরি চিরকাল বত্তি আছে ঐ বাটিলা উয়ার গোসাত ভরপুর আছিলেক।

৮ ইয়াতে ভগবানের মহিমা আর শক্তি থাকি যে ধূমা বাইর হবার ধরছিলেক ঐ ধূমায় মন্দিরটা ভর্তি হইলেক। ঐ সাত জন স্বর্গদূতের সাতটা আঘাত শেষ না হওয়া পর্যন্ত কাণ্ডায় ঐ মন্দিরত সোন্দের পারিলেক না।

১৬ তার পাছত মুই মন্দির থাকি একটা জোড়ে আওয়াজ শুনিলুং, ঐ সাত জন দূতক জোড়ে কইলেক, “তোমরালা যাও, ভগবানের গোসায় ভরা ঐ সাতটা বাটি দুনিয়াত উবুর করি ঢালি দেও।”

২ সেয়া পইলা দূত যায়া উয়ার নিজের বাটিটা ভুঁইয়ের উপরত উবুর করি ঢালি দিলেক, ইয়ার ফলে যার যার উপরত ঐ জন্তুর চিন আছিলেক আর যায় যায় জন্তুর মূর্তি পূজা করে উমার দেহাত খুব বিষ হওয়া ঘাউয়া হইলেক।

৩ দ্বিতীয় দূত উয়ার বাটিটা সাগরের উপরত ঢালিলেক, ইয়াতে সাগরের জল মরা মানষির অক্তের নাকান হইলেক, সউগ বত্তা প্রাণী আর সাগরের সউগ প্রাণী মরিলেক।

৪ ইয়ার পাছত তৃতীয় দূত নদ-নদী আর জোয়ারের উপরত উয়ার নিজের বাটিটা ঢালি দিলেক, ইয়াতে ঐলা অক্ত হয় গাইলেক।

৫ সেয়া মুই জলের দূতের এই কতা শুনিলুং, “হে পবিত্র, তুই আছিস, তুই আছিলু। তুই ন্যায়বান, কেনেনা তুই এইলা শাস্তি দিচিস;

৬ এই মানষিলা ভগবানের মানষিলাক আর ভাববাদীলাক খুন করিচে। এই বাদে উমারলাক তুই এই অক্ত খাবার দিচিস, আর এইটায় উমারলার বাদে উপযুক্ত হইচে।”

৭ পাছত মুই বেদী থাকি এক জনাক এই কতা কবার শুনিলুং, “হে সর্বশক্তিমান, প্রভু ভগবান, তোর সউগ বিচার সইত্য আর

ন্যায্য।”

৮ চতুর্থ দূত বেলার উপরত নিজের বাটিটা ঢালিলেক; ইয়াতে অগুন দিয়া মানষিলাক ছোবা দিবার ক্ষমতা বেলাক দেওয়া হইলেক।

৯ স্যোলা দারুন তাপে মানষিলাক দেহা ছোবা গেইলেক, আর উমরা সেই ভগবানের নামের নিন্দা করির নাগিলেক। উয়ার মহিমা করির বাদে মন ফিরাইলেক না, যদিও ভগবানের এই সউগ আঘাতের উপরা অধিকার আছে।

১০ পাছত পঞ্চম দূত ঐ পশুর সিংহাসনের উপরত উয়ার বাটি ঢালিলেক, ইয়াতে জন্তুটার শাসনত আন্ধার নামি আসিলেক, আর মানষিলা যন্তনাত নিজের নিজের জিবা কামড়ের নাগিলেক,

১১ এই যন্তনা আর ঘাউয়ার বাদে উমরা ভগবানের নিন্দা করির নাগিলেক, কিন্তুক উমরা উমার বেয়া কাম থাকি মন ফিরাইলেক না।

১২ পাছত ষষ্ঠ দূত ইউফ্রেটিস মহানদীত নিজের বাটিটা ঢালিলেক, ইয়াতে পূব দেশ যাবার বাদে নদীর জল শুকি গেইলেক। যাতে বেলা উঠার জাগা থাকি রাজালার আসিবার ঘাটা গড়া হয়।

১৩ স্যোলা মুই দেখিলুং, ঐ দানবের মুখ, জন্তুর মুখ আর ভন্ড ভাববাদীর মুখ থাকি ব্যাঙের নাকান তিনটা বেয়া আত্মা বাইর হইলেক।

১৪ ঐ অপদেবতালা অচানক অচানক কাম করচিলেক;  
সর্বশক্তিমান ভগবানের মহাদিনের যুদ্ধ করির বাদে উমরা গোটায়  
দুনিয়ার রাজালাক একটে করিলেক।

১৫ যীশু কবার ধরচে, “দেখ, চোর যেই নাকান করি আইসে মুই  
ওই নাকান করি আসিম; যায় জাগনা থাকে আর নিজের পোশাক  
পিন্দি রয়। সেই মানষিটায় আশুর্বাদ পাওয়া, উয়াক উলংগ হয়  
ঘুরি বেড়ের না নাগে আর মানষি উয়ার নইজ্জা দেখির পায় না।”

১৬ ইব্রীয় ভাষাত যেই জাগাখানক হরমাগিদোন কয়,  
অপদেবতালা ঐ রাজালাক ওটেকোনা একটে করিলেক।

১৭ পাছত সপ্তম দূত দ্যাওয়ার উপরত উয়ার নিজের বাটিটা  
ঢালিলেক, ইয়াতে মন্দিরের মইন্ধো থাকি আর সিংহাসন থাকি  
জোড়ে জোড়ে এই কতালা কইলেক, “যেইটা হবার সেইটা হয়  
গেইচে।”

১৮ স্যেলা বিজলী চমকের নাগিলেক, গুডুম-গুডুম শব্দ আর  
ম্যেঘের আওয়াজ হবার নাগিলেক। আর নিদারুন ভুইচাল  
হইলেক, দুনিয়াত মানষি সিজ্জনের পর থাকি এই নাকান ভুইচাল  
কোন দিনও নাই হয়।

১৯ ইয়াতে নাম করা গঞ্জটা তিন ভাগ হয় গেইলেক, আর নানা  
নাকান জাতির গঞ্জলা ভাঙি গেইলেক; স্যেলা নাম করা বাবিলের  
কতা ভগবানের ফম হইলেক। আর ভগবানের গোসা ভয়ংকর  
মদের বোতলত ভর্তি হয় বাবিলক খাবার দিলেক।

২০ আর পতিটা দ্বীপ পালে গেইলেক, পাহাড়লাকও আর দেখা গেইলেক না।

২১ আর দ্যাওয়া থাকি মানষির উপরত বড় বড় শিল পড়িরার নাগিলেক, উয়ার পতিটার ওজন আছিলেক আনুমানিক এক মণ; ইয়াতে মানষিলা শিলের আঘাত পায়া ভগবানের নিন্দা করির নাগিলেক; কেনেনা এই শিলের আঘাত ভয়ংকর আছিলেক।

২৭ যে সাত জন স্বর্গদূতের হাতত সাতটা বাটি আছিলেক, উমারলার মইন্ধো থাকি এক জন আসিয়া মোক কইলেক, “আইসেক, মেয়ো জলের উপরত যে গঞ্জটা মহাবেশ্যার নাকান বসি আছে, মুই উয়ার শাস্তি তোক দেখাং।

২ দুনিয়ার রাজালা উয়ার সোদে ব্যভিচার করচিলেক, আর যায় যায় এই দুনিয়ার, উমরা বেশ্যার রং রসে মাতাল হইচে।”

৩ ইয়ার পাছত ঐ স্বর্গদূত মোক নিধুয়া পাথারত নিয়া গেইলেক। সেয়ো মুই পবিত্র আত্মার চালনাত আছিলুং। ওটেকোনা মুই এক জন বেটিছাওয়াক নাল রংগের জন্তুর উপরাত বসির দেখিলুং; ভগবানক অপমান করির বাদে মেয়ো নাম জন্তুটার দেহাত নেখা আছিলেক। উয়ার সাতটা মাথা আর দশটা শিং আছিলেক।

৪ ঐ বেটিছাওয়াটা নাল আর বাইগুনিয়া রংগের কাপড় পিন্দি আছিলেক, আর উয়ার দেহাত সোনা, দামী দামী শিল আর মুক্তার গয়না আছিলেক, উয়ার হাতত একটা জল খাবার সোনার



বাটি আছিলেক, ঐ বাটিটা ব্যভিচারের ঘিনের জিনিস দিয়া ভর্তি আছিলেক।

৫ উয়ার কপালত এই নাম নেখা আছিলেক, একটা গোপন সইত্য, “নাম করা বাবিল, দুনিয়ার বেশ্যার আর সউগ নাকান ঘিনের জিনিসের মাও।”

৬ মুই আরো দেখিলুং, ঐ বেটিছাওয়াটা ভগবানের মানষিলার অত্ত আর যায় যায় যীশুর বিষয়ে সাক্ষ্য দিবার ধরচে উমারলার অত্ত খায়া মাতাল হয় আছে। উয়াক দেখিয়া মুই অচানক হলুং।

৭ সেলো সেই দূতটা মোক কইলেক, “তুই কেনে অচানক হলু? মুই ঐ বেটিছাওয়া আর যেই জন্তুটা উয়াক উবি নিয়া বেড়ের ধরচে, যার সাতটা মাথা আর দশটা শিং, ঐ জন্তুটার গোপন কতালা মুই তোক জানাইম।

৮ তুই যেই জন্তুটা আগত দেখিছিস, সেইটা আগত আছিলেক কিন্তুক এলা নাই। উয়ায় অতল খাল থাকি উঠি আসিয়া চিরকালের বাদে নাশ হবে। সেলো দুনিয়ার বসবাসকারী যার যার নাম দুনিয়া সিঞ্জনের সমায় থাকি জীবন বইয়ত নেখা হয় নাই, উমরা ঐ জন্তুটা দেখিয়া অচানক হবে। কেনেনা জন্তুটা আগত আছিলেক এলা নাই, ফির আরো দেখা যাবে।

৯ এলা যেইলা কওয়া হবে সেইলা বুঝির বাদে বুদ্ধির দরকার। সেই সাতটা মাথা হইলেক সাতটা পাহাড় যার উপরত বেটিছাওয়াটা বসি আছে; ঐ সাতটা মাথা সাত জন রাজাও;

১০ সেই রাজালার মইন্ধোত আগতে পাঁচজন শেষ হয়া গেইচে, এক জন এলাও আছে, আর এক জন এলাও আইসে নাই; ঐ রাজা আসির পাছত উয়াক কিছু কাল থাকির নাগিবে।

১১ আর যে জন্তুটা আগত আছিলেক, কিন্তুক এলা নাই, ঐ সাত জনের মইন্ধে উয়ায় এক জন হইলেও অষ্টম রাজা। উয়ায় চিরকালের বাদে নাশ হবে।

১২ “আর যে দশটা শিং তুই দেখিছিস, সেইলা হইলেক দশ জন আলদা রাজা; উমরা এলাও শাসন করা শুরু করে নাই, উমরা ঐ জন্তুটার সোদে অল্প সমায়ের বাদে রাজা হিসাবে শাসন করির ক্ষমতা পাবে।

১৩ উমরা সগায় একমনা, উমারলার ক্ষমতা আর উমার অধিকার সগায় ঐ জন্তুটাক দেয়।

১৪ উমরা ভেড়ার বাচ্চাটার বিরুদ্ধে যুদ্ধ করিবে, ভেড়ার বাচ্চাটা উমারলাক হারে দিবে, কেনেনা উয়ায় প্রভুলার প্রভু আর রাজালার রাজা। যাক যাক ডেকা হইচে আর বাছাই করি নেওয়া হইচে, যায় যায় বিশ্বস্ত উমরালায় উয়ার সাথত থাকিবে।”

১৫ পাছত স্বর্গদূত মোক কইলেক, “তুই যে জল দেখিছিস, যার উপরত ঐ বেশ্যা বসি আছে, ঐ জল হইলেক মেলা দেশ, মেলা মানষি, মেলা জাতি আর মেলা ভাষা।

১৬ তুই যে দশটা শিং দেখিছিস, সেইলা আর জন্তুটা ঐ বেশ্যাটাক ঘিন করিবে। উমরা উয়াক ফকির আর নেংটা করিবে

আর উয়ার মসং খাবে। ইয়ার পাছত উয়াক অগুন দিয়া ছোবা দিবে।

১৭ ইয়ার কারন হইলেক, ভগবান উমারলার অন্তরত এমন ইচ্ছা দিচে যাতে উয়ার বাইক্য সফল হয়। ইয়ার ফলে উমরা একমন হয়। ঐ জন্তুটারটে উমারলার সউগ ক্ষমতা দান করিবে। যাতে ভগবানের বাইক্য পূরণ না হওয়া পর্যন্ত, উয়ায় শাসন করির পারে।

১৮ আর যেই বেটিছাওয়াটাক তুই দেখিছিস, সেইটা হইলেক একটা নাম করা মহানগর, যায় দুনিয়ার সউগ রাজালার উপরত শাসন করির ধরচে।”

১৮ ইয়ার পাছত মুই আরেক দূতক স্বর্গ থাকি নামি আসির দেখিলুং। উয়ার দারুন অধিকার আছিলেক আর উয়ার মহিমায় দুনিয়া ঝলমল করির নাগিলেক।

২ উয়ায় খুব জোড়ে চিকরিয়া কইলেক, “সেই নাম করা বাবিল গঞ্জ নাশ হয়। গেইচে! ঐটা এলা ভূত পেত্তানির থাকির জাগা হবে, আর ভূত পেত্তানির আডা দিবার জাগা হবে, সউগ অশুদ্ধি আর জঘন্য পখিলার ভাসা হইচে।

৩ সউগ জাতিক উয়ায় মাগীবাজি করেয়া, উয়ার সোদে উমরাও শাস্তি পাইচে। দুনিয়ার রাজালা উয়ার সোদে ব্যভিচার করিচে,

আর উয়ার স্বেচাচারে ফলে দুনিয়ার ব্যবসায়ীলা লাভবান হইচে।”

৪ ইয়ার পাছত মুই স্বর্গ থাকি আর এক জনাক কবার শুনিলুং, “হে মোর মানষিলা, বাবিল থাকি বাইর হয় আইসো, যাতে তোমরালা উয়ার পাপের ভাগী না হন। আর উয়ার যেইলা দন্ড সেইলা যাতে তোমারলাক ভোগ করির না নাগে।

৫ কেনেনা উয়ার পাপ এত বেশী আছিলেক যে, দ্যাওয়া পর্যন্ত জমা করি থোয়া হইচে, আর উয়ার বেয়া কামের কতা ভগবান ফম করিচে।

৬ বাবিল যেই নাকান ব্যবহার করিচে তোমরাও উয়ার পতি ঐ নাকান ব্যবহার কর; উয়ার কামের ফল পুরাপুরি উয়াক দেও; উয়ায় যেই বাটিত অইন্য মানষিলা বাদে দুঃখের খাবার মিশির ধরছিলেক, ঐ বাটিত উয়াক দুইগুণ প্রতিফল দেও।

৭ উয়ায় নিজের বিষয় যত বেশী গর্ব আর রং তামশা করির ধরছিলেক, উয়াক তত যন্তনা আর শোক দেও। কেনেনা উয়ায় মনে মনে ভাবির ধরচে, “মুই রাণী হয় সিংহাসনত বসি আছং, মুই তো বিধুয়া না হং, কোন মতে শোক করিম না।’

৮ এই বাদে একে দিনে সউগ আঘাত উয়ার উপরত আসিবে, আর সেইলা হইলেক মরণ, শোক, আর মঙ্গা। অগুন দিয়া উয়াক ছুবি ফেলা হবে, কেনেনা যায় উয়ার বিচার করিবে, ঐ প্রভু পরমেশ্বর শক্তিমান।”

৯ দুনিয়ার যে সউগ রাজালা উয়ার সোদে ব্যভিচার আর রং তামশা করি জীবন যাপন করির ধরছিলেক, উমরা উয়াক ছোবা দিবার সমায় ধূমা দেখিয়া কান্দিবে আর কপাল চাপরাবে।

১০ উয়ার যাতনার ভয়ে উমরা দূরত খাড়া হয় কবে, “হায় রে নগর বাবিল, হায়! ঐ নাম করা গঞ্জ, ক্ষমতায় ভরা ঐ গঞ্জ! এক পলকে তোর বিচার হইলেক!”

১১ আর দুনিয়ার ব্যবসায়ীলাও উয়ার বাদে কান্দিবে, আর শোক করিবে, কেনেনা উমারলার বেচের আনা জিনিস আর কাণ্ডো কিনিবে না।

১২ উমারলার ঐলা জিনিসের মইন্ধোত আছে, সোনা, রূপা, দামী শিল আর মণিমুক্তা, মিহি মসীনার কাপড়, বাইগুনি রংএর কাপড়, রেশমি আর নাল কাপড়, চন্দন খুটার আর হাতীর দাতের বানা নানান জিনিস, খুব দামী খুটার বানা আর পিতল, লোহা আর মার্বেল শিল দিয়া বানা নানান জিনিস,

১৩ দালচিনি, এলাচ, ধূপ, আতর, আর গন্ধরস, আংগুর রস, জলপই এর তেল, ময়দা আর গম, গরু আর ভেড়া, ঘোড়া আর গাড়ি আর চাকর। আরো কেনা গোলাম।

১৪ ঐ ব্যবসায়ীলা কবে, “যে ফল তুই লাভ করির চাইছিস সেইটা তোরটে থাকি দূরত সারি গেইচে। তোর সৌন্দর্য আর সাজ পোশাক ধ্বংস হয় গেইচে, মানষি আর কোন দিনও ঐলা ফিরি পাবার না হয়।”

১৫ ঐ সউগ জিনিসের ব্যবসায়ীলা উমার ধনে ধনবান হইছিলেক, উমরা উয়ার যন্তনার ভয়ে দূরত খাড়া হয়। কান্দি কান্দি, শোক করিতে করিতে কবে,

১৬ “হায়, হায়! এই কি হাল মহানগরীর! মিহি মসীনার কাপড় আর বাইগুনীয়া আর নাল কাপড় পেন্দা আছিলেক, আর সোনা, দামী শিল আর মুক্তা অলংকার দিয়া সাজ গোজ করা আছিলেক ঐ নাম করা গঞ্জ!

১৭ এত অল্প সময়ের মইদ্বোত তোর সেই ধন সম্পদের ভান্ডার নষ্ট হইচে!” আর জাহাজের কান্দারী, জলের ঘাটার যাত্রীলা, নাবিকলা আর সাগরত যায় যায় ব্যবসা করে উমরা সগায় দূরত খাড়া হয়। রইলেক।

১৮ আর উয়ার ধূমা উপরত দেখিয়া উমরা চিকরিয়া কইলেক, “ঐ নাম করা গঞ্জটার নাকান কায় আছে?”

১৯ উমরা উমারলার মাথাত ধূলা মাখিয়া খুব জোরে চিকরিয়া কান্দি কান্দি, শোক করিতে করিতে কইলেক, “হায়! হায়! ঐ নাম করা গঞ্জ, হায়! সাগরত যার যার নাও আছে উমরা উয়ার ধনেই ধনবান হইচে, তোমারলার এই কি দুর্দশা, আজি অল্প সমায়ে পতন হয়। গেইল!”

২০ স্যোলা ঐ স্বর্গদূত কইলেক, “হে স্বর্গ, ঐ গঞ্জের পতনের আনন্দ কর! হে প্রভুর মানষিলা, খবরিয়ালা আর ভাববাদীলা,

আনন্দ কর! তোমারলার বিরুদ্ধে উয়ায় যেই নাকান করচিলেক, এই বাদে ভগবান উয়ার বিচার করি শাস্তি দিচে।”

২১ পাছত এক জন শক্তিমান স্বর্গদূত বড় জাতার নাকান একটা শিল সাগরত ফেলে দিয়া কইলেক, “এই নাকান করি ঐ নাম করা বাবিলক ফেলে দেওয়া হবে, উয়াক আর কোন দিনও পাওয়া যাবে না।

২২ হে বাবিল গঞ্জ, তোর মইন্ধোত যায় যায় বীণা বাজায়, গিদালনা, বাঁশী আর শিঙ্গা বাজাইয়ালা, উমারলার আওয়াজ আর কোন দিন তোর মইন্ধোত শোনা যাবার না হয়; আর কোন দিন তোর মইন্ধোত পাকা মিস্ত্রি পাওয়া যাবার না হয়; জাতার আওয়াজ আর কোন দিন শোনা যাবার না হয়;

২৩ বাতির আলো আর কোন দিন তোর মইন্ধোত জ্বলিবে না, বর কইনার গালার আওয়াজ আর কোন দিন শোনা যাবে না। তোর ব্যবসায়ীলা দুনিয়াত নাম করা আছিলেক, আর সউগ জাতিই তোর যাদুর মায়াত মজিলেক হয়।

২৪ ভাববাদীলাক, ভগবানের মানষিলাক আর যত মানষিক এই দুনিয়াত মারি ফেলা হইচে, উমারলার অক্স এই বাবিলত পাওয়া গেইলেক। এইবাদে তোর বিচার ঠিক করা আছে।”

১৯ এই ঘটনালা ঘটির পাছত স্বর্গত মুই মেয়ো মানষির চিল্লানি শুনিলুং। উমরা কবার ধরছিলেক, “হাল্লেলুয়া! পরমপ্রভুর

গুণগান কর, মুক্তি, মহিমা আর ক্ষমতা, সউগে হামারলার  
ভগবানের,

২ কেনেনা উয়ার বিচার সইত্য আর ন্যায্য। যেই গঞ্জ উয়ার  
মাগীবাজি দিয়া গোটায় দুনিয়াক অশুদ্ধি করিচে, ঐ গঞ্জক  
ভগবান শাস্তি দিচে আর উয়ার চাকরলার ন্যায় বিচার করিচে।”

৩ উমরা দ্বিতীয় বার কইলেক, “পরমপ্রভুর গুণগান কর!  
চিরকাল সেই বেশ্যার অগুনের ধূমা উঠিতে থাকিবে।”

৪ ভগবান, যায় সিংহাসনত বসিয়া আছে উয়াক ঐ চব্বিশ জন  
নেতা আর চাইর জন জীবন্ত প্রাণী উবুর হয় ভক্তি দিয়া কইলেক,  
“আমেন। হাল্লেলুয়া!”

৫ সেলো সিংহাসন থাকি এক জন কইলেক, “ভগবানের  
চাকরলা আর তোমরা যায় যায় ভক্তিপূর্ণ ভয় করেন, তোমরা  
ছোট বড় সগায় হামারলার ভগবানের গুণগান কর।”

৬ তার পাছত মুই মেলা মানষির ভিড়ের আওয়াজ জোড়ে  
জোড়ে বয়া যাওয়া সাগরের ঢেউয়ের গর্জন, খুব জোড়ে মেঘের  
আওয়াজের নাকান এক বাণী শুনিলুং, “পরমপ্রভুর গুণগান কর;  
হামারলার সর্বশক্তিমান প্রভু ভগবান শাসন করির শুরু করি  
দিচে।

৭ আইস, হামরা মনের খুশিতে খুব আনন্দ করি, আর উয়ার  
গুণগান করি, কেনেনা ভেড়ার বাচ্চাটার বিয়াও করির সমায়  
হইচে, আর উয়ার কইনা নিজেই সাজিয়া আছে।



৮ সাদা ধপধপা পরিস্কার মসীনার শাড়ী উয়াক দেওয়া হইচে।” সেই মসীনার শাড়ী হইলেক ভগবানের মানষিলার ভাল কাম।

৯ পাছত স্বর্গদূত মোক কইলেক, “তুই নেখেক, ভগবানের এইলা বাইক্য সউগে সইত্য, যায় যায় ভেড়ার বাচ্চার বিয়ার বউ ভাতের নিমন্তন পাইচে উমরায় আশুবাদ পাওয়া।”

১০ সেয়া মুই ভক্তি দিবার বাদে উয়ার ঠেংয়ত পড়িলুং। ইয়াতে উয়ায় মোক কইলেক, “দেখ, এই নাকান কাম না করিস, মুই তোর নাকান সহকর্মী। তোর গুরু ভাই-বইনিলা, যায় যায় যীশুর সাক্ষ্য কয়া থির রয় মুইও উমারলার মইন্ধে এক জন। খালি ভগবানকে ভক্তি কর। কেনেনা ভাববাদীলার আসল শিক্ষা হইলেক যীশুর সাক্ষ্য।”

১১ পরে মুই দেখিলুং স্বর্গের দুয়ার খোলা আছে আর ওটেকোনা একটা সাদা ঘোড়া আছে যায় উয়ার উপরাত বসিয়া আছে, উয়ার নাম হইলেক বিশ্বস্ত আর সচাং। উয়ায় অধার্মিকের বিরুদ্ধে ন্যায় যুদ্ধ আর বিচার করে।

১২ উয়ার চখু আছিলেক অগুনের ফুলকির নাকান, আর মাখাত আছিলেক মেলা মটুক। উয়ার একটা নাম নেখা আছে, যেইটা উয়ায় ছাড়া অইন্য কাণ্ডো জানে না।

১৩ উয়ার পেন্দা আছিলেক অত্তত ডুবা কাপড়। আর ভগবানের বাইক্য নামে উয়ায় পরিচিত।

১৪ স্বর্গের সেনালা ধপধপা মসীনার কাপড় পিন্দি আর সাদা ঘোড়াত চড়ি উয়ার পাছে পাছে যাবার ধরছিলেন।

১৫ উয়ায় যাতে সউগ জাতিক আঘাত করির পারে এই বাদে উয়ার মুখ দিয়া একখান ধার ওয়ালা ছোরা বাইর হয় আসির ধরছিলেন। উয়ায় সউগ জাতিক লোহার নাটি দিয়া মানে সর্ব ক্ষমতার অধিকার নিয়া শাসন করিবে। আর আংগুর রস করির খালত উয়ায় ঠেং দিয়া মথলেয়া আংগুর রস নিকলাবে, আর ঐ রস করিবার খালটা আছিলেন শক্তিমান ভগবানের ভয়ংকর গোসা।

১৬ উয়ার কাপড়ত আর চরুত এই নাম নেখা আছে, “রাজালার রাজা আর প্রভুলার প্রভু।”

১৭ পাছত এক জন দূতক বেলার মইন্ধোত খাড়া হয় রবার দেখিলুং, যেইলা পখি দ্যাওয়ার মইন্ধোত উড়ির ধরছিলেন, ঐলাক উয়ায় জোড়ে জোড়ে চিকরিয়া কবার ধরচে, “আইস, ভগবানের মহাভোজ খাবার বাদে একটে জড়ো হও।

১৮ যাতে রাজালার, সেনাপতিলার, বীর মানষিলার, ঘোড়া আর ঘোড়াত চড়া মানষিলার, স্বাধীন আর চাকরলার, ছোট, বড় সউগ মানষির মসং খাও।”

১৯ তার পাছত মুই দেখিলুং, যায় ঐ ঘোড়ার উপরত বসি আছিলেন, উয়ার আর উয়ার সেনালার বিরুদ্ধে যুদ্ধ করির বাদে

সেই জন্তুটা আর দুনিয়ার রাজালা আর উমারলার সেনালা জড়ো হইচে।

২০ ইয়াতে ঐ জন্তুটাক ধরা হইলেক আর যেই ভন্ড ভাববাদী উয়ার হয় অচানক কাম করে উয়াকও ধরা হইলেক। যায় যায় ঐ জন্তুটার চিন নিছিলেক আর উয়ার মূর্তির পূজা করির ধরছিলেক সেই ভন্ড ভাববাদী সেইলা অচানক কাম দিয়া উমারলাক ভুলিয়া খুইছিলেক। উমাক দুই জনকে জলন্ত গন্ধকের অগুনত জ্যোন্ত অবস্থায় ফেলে দেওয়া হইলেক।

২১ যায় ঐ সাদা ঘোড়াত চড়ি আছিলেক, উয়ার মুখ থাকি যে ছোরা বাইর হয় আসছিলেক ঐ খান দিয়া উমারলার অইন্য সঙ্গীলাক মারি ফেলা হইলেক; ফলে সউগ পখিলা তৃপ্তি করি উমারলার মসং খাইলেক।

২০ পাছত মুই স্বর্গ থাকি এক দূতক নামি আসির দেখিলুং, উয়ার হাতত অতল খালের চাবি আর বড় একখান শিকল আছিলেক।

২ ঐ আদিম সাপ যাক দিয়াবল আর শয়তান কয় ঐ দানবক উয়ায় এক হাজার বছরের জইন্যে শিকল দিয়া বন্দী করিয়া অতল খালত ফেলে দিলেক,

৩ আর অতল খালের মুখ বন্ধ করি সীল করি দিলেক; যাতে এক হাজার বছর পূরণ না হওয়া পর্যন্ত দুনিয়ার জাতিলাক ভুল

ঘাটাত নিয়া যাবার না পারে; তার পাছত অল্প দিনের বাদে উয়াক ছাড়ি দেওয়া হবে।

৪ ইয়ার পাছত মুই কয়টা সিংহাসন দেখিলুং, আর যায় যায় ঐলার উপরত বসি আছিলেক উমারলার হাতত বিচারের অধিকার দেওয়া হইছিলেক, ভগবানের বাইক্য আর যীশুর সাক্ষ্য কবার বাদে উমারলার মাথা কাটি ফেলা হইচে। আর যায় যায় সেই জন্তুর আর উয়ার মূর্তির পূজা নাই করে, আর কপালত আর হাতত উয়ার চিন নাই দেয়, মুই উমার আত্মলাক দেখির পাইলুং। উমরা বত্তি উঠিয়া এক হাজার বছর খ্রীষ্টের সোদে শাসন করিলেক।

৫ ঐ এক হাজার বছর পূরণ না হওয়া পর্যন্ত, বাকি মরালা ফির বত্তি উঠিলেক না। এইটায় হইলেক পইলা ফির বত্তি উঠা।

৬ পইলা ফির বত্তি উঠাত যায় অংশ নিবে, উয়ায় আশুর্বাদ পাওয়া আর পবিত্র; উমার উপরত দ্বিতীয় মরণের কোন ক্ষমতা নাই; কিন্তুক উমরা ভগবানের আর খ্রীষ্টের বামন হবে, আর সেই এক হাজার বছর উয়ার সোদে শাসন করিবে।

৭ এক হাজার বছর শেষ হয়া যাবার পাছত শয়তানক জেল থাকি ছাড়ি দেওয়া হবে।

৮ উয়ায় সেলো দুনিয়ার জাতিলাক, শ্রী গোগ, আর শ্রী মাগোগক ভুল ঘাটাত নিয়া যাবে আর যুদ্ধের বাদে উমারলাক একসোদে জড়ো করিবে। ঐ সেনালার সংখ্যা হবে সাগরের বালার নাকান।

৯ মুই দেখিলুং, দুনিয়ার নানা প্রান্ত থাকি আসিয়া ভগবানের মানষিলার ডেরা আর মনের মত গঞ্জটাক ঘেরাও করিলেক। সেয়া স্বর্গ থাকি অগুন নামি আসি সেনালাক ছুবি ফেলাইলেক।

১০ শয়তানক জ্বলা গন্ধকের হৃদত ফ্যেলে দেওয়া হইলেক, উয়ায় উমারলাক ভুল ঘাটাত নিয়া গেইচে। ওটেকোনা ঐ জন্তু আর ভন্ড ভাববাদীও আছে; উমরা ওটে চিরকাল ধরি দিন রাতি যন্তনা ভোগ করিবে।

১১ পরে মুই একটা বড় সাদা সিংহাসন আর যায় উয়ার উপরত বসি আছে, উয়াক দেখিলুং, উয়ার সামনা থাকি দ্যাওয়া আর দুনিয়া পালাইলেক; উমারলার নুকির বাদে আর কোন জাগা রইলেক না।

১২ তার পাছত মুই দেখিলুং, ছোট, বড় সউগ মরা মানষি ঐ সিংহাসনের আগত খাড়া হয়্যা আছে; ইয়ার পাছত কতলা বই খোলা হইলেক। আর তার পাছত আরেক খান বই খোলা হইলেক, ঐখান আছিলেক জীবন বই। মরা মানষিলার কাম সমন্ধে ঐ বইলাত যেই নাকান নেখা আছিলেক সেই অনুসারে বিচার হইলেক।

১৩ যেই মরা মানষিলা সাগরত আছিলেক উয়ায় ঐলাক ফিরি দিলেক আর যমের বাড়িত যেই মরা মানষিলা আছিলেক, যমের বাড়িও ঐলাক ফিরি দিলেক। আর সগাকে নিজের নিজের কাম অনুসারে বিচার করা হইলেক।

১৪ মরণক আর যমের বাড়িক অগুনের হৃদত ফ্যেলে দেওয়া হইলেক; এই অগুনের হৃদত ছোবা যাওয়ায় হইলেক দ্বিতীয় মরণ।

১৫ আর যার যার নাম জীবন বইয়ত পাওয়া গেইলেক না, উমারলাকও অগুনের হৃদত ফ্যেলে দেওয়া হইলেক।

২১ ইয়ার পাছত মুই একটা নয়া দ্যাওয়া আর একটা নয়া দুনিয়া দেখিলুং, পইলা দ্যাওয়া আর পইলা দুনিয়া মুছি গেইচে, কোন সাগরও আর নাই।

২ মুই দেখিলুং, পবিত্র গঞ্জ, নয়া যিরুশালেম, স্বর্গ থাকি আর ভগবানেরটে নামি আসির ধরচে। কইনাক যেই নাকান করি বরের বাদে সাজ গোজ করা হয়, এই গঞ্জটাকও ঠিক একে নাকান করি সাজা হইচে।

৩ পাছত মুই সিংহাসন থাকি এক জনাক জোড়ে কবার শুনিলুং, “দেখ! এলা মানষির মইন্ধোত ভগবানের থাকির জাগা হইচে; উয়ায় মানষির সোদে থাকিবে, আর উমরা উয়ার নিজের মানষি হবে। উয়ায় নিজেই উমারলার সোদে থাকিবে আর উমারলার ভগবান হবে।

৪ উয়ায় সগারে চখুর জল মুছি দিবে। মরণ আর হবার না হয়, দুঃখ, কান্দন আর যন্তনা রবে না। কেনেনা আগের সউগ ঘটনালা মুছি গেইচে।”

৫ আর যায় সিংহাসনত বসি আছিলেক, উয়ায় কইলেক, “দেখ, মুই সউগে নয়া করি সিড্জন করির বাদে এইলা করিচুং।” পাছত উয়ায় কইলেক, “নেখেক, এই কতালা বিশ্বাসযোগ্য আর সচাং।”

৬ উয়ায় মোক আরো কইলেক, “শেষ হইচে; মুই আলফা আর ওমিগা, শুরু আর শেষ। যার টিস্সা নাগচে, উয়াক মুই জীবন্ত জলের জোয়ার থাকি বিনা পাইসায় জল খাবার দিম।

৭ যায় জয়ী হবে, উয়ায় এই সউগলার অধিকারী হবে; আর মুই উয়ার ভগবান হইম, উয়ায় মোর বেটা হবে।

৮ কিন্তুক যায় যায় ভীতু, অবিশ্বাসী, ঘিনের তুল্য, খুনী, ব্যভিচারী, যাদুকর, প্রতিমা পূজাইয়ালা আর সউগ মিথ্যাবাদীলার জ্বলা অগুন আর গন্ধকের হৃদত থাকায় হবে উমারলার দ্বিতীয় মরণ।”

৯ আর যেই সাতটা দূতেরটে সাতটা শেষ আঘাতে ভরা সাতটা বাটি আছিলেক, উমারলার মইন্ধো থাকি এক জন দূত আসি মোক কইলেক, “আইসেক, মুই তোক সেই কইনাক, ভেড়ার বাচ্চার বউওক দেখাইম।”

১০ ইয়ার পাছত ঐ স্বর্গদূত মোক এক খুব উচা পাহাড়ত নিয়া গেইলেক, সেয়া মুই পবিত্র আত্মাত ভরপুর হইছিলুং, ভগবানের মহিমাত চকচকা যে পবিত্র গঞ্জ যিরুশালেম স্বর্গ থাকি নামি আসচে সেইটা উয়ায় মোক দেখাইলেক।

১১ ঐ গঞ্জটা হইলেক ভগবানের মহিমায় পরিপূর্ণ আর দামী মণি মুক্তার নাকান চকচকা কাইচের গিলাস, দামী হীরার নাকান।

১২ ঐ গঞ্জত একটা বিরাট উচা দেওয়াল আর বারো খান দুয়ার আছিলেক। ঐ দুয়ারলাত বারো জন স্বর্গদূত পাহাড়া দিবার ধরচে, ইজ্রায়েল জাতির বার বংশের নাম ঐ দুয়ারলাত নেখা আছিলেক।

১৩ দুয়ারলার পুবপাকে তিনখান দুয়ার, উত্তর পাকে তিনখান দুয়ার, দক্ষিণ পাকে তিনখান দুয়ার, আর পশ্চিম পাকে তিনখান দুয়ার আছিলেক।

১৪ ঐ গঞ্জের দেওয়ালত বারটা ভিত্তির শিল আছিলেক, আর সেইলার উপরাত ভেড়ার বাচ্চার বারজন খবরিয়ার বারটা নাম নেখা আছিলেক।

১৫ আর যায় মোর সোদে কতা কবার ধরছিলেক, উয়ার হাতত একটা মাপিবার সোনার নাটি আছিলেক। যাতে উয়ায় ঐ গঞ্জটা আর দুয়ারলা আর দেওয়াললাক মাপির পারে।

১৬ ঐ গঞ্জটা চাইর কোনা, লম্বায় আর চওড়ায় সমান। পরে ঐ নাটিটা দিয়া গঞ্জটা মাপিলেক সেইটা দেখা গেইলেক লম্বা চওড়ায় আর উচায় বার হাজার তীর মারার পরিমাণ হইলেক।

১৭ আর দেওয়ালটা মাপির পাছত চওড়ায় একশ চুয়াল্লিশ হাত হইলেক। মানষি যেই নাকান মাপে ঐ স্বর্গদূত একে নাকান করি মাপিচে।



১৮ হীরা দিয়া দেওয়াল খান গড়া হইছিলেক আর গঞ্জটা আছিলেক বাকবাকা কাইচের খাটি সোনা দিয়া গড়া।

১৯ গঞ্জের দেওয়ালের ভিত্তিলা সউগ নাকানের দামী শিল দিয়া সাজা আছিলেক। পইলা ভিত্তিটা হীরার, দ্বিতীয়টা নীলকান্তমণির, তৃতীয়টা তাম্রমণির, চতুর্থটা পান্নার,

২০ পঞ্চমটা সূর্যকান্তমণির, ষষ্ঠ সাদীয়ামণির, সপ্তম পোখররাজের, অষ্টম বৈদূর্যমণির, নবম পীতমণির, দশম উপলের, একাদশ ফিরোজামণির আর দ্বাদশ পদ্মরাগের।

২১ বারখান দুয়ারত আছিলেক বারটা মুক্তা, পতিটা দুয়ার এক একটা মুক্তা দিয়া গড়া আছিলেক। গঞ্জের ঘাটাটা বাকবাকা কাইচের নাকান খাটি সোনা দিয়া গড়া আছিলেক।

২২ মুই ঐ গঞ্জটাত কোন মন্দির দেখির পালুং না। কেনেনা সর্বশক্তিমান প্রভু ভগবান আর ভেড়ার বাচ্চাটা নিজেই আছিলেক ঐ গঞ্জের মন্দির।

২৩ ঐ গঞ্জটাত আলো দিবার বাদে বেলার বা চানের দরকার নাই। কেনেনা ভগবানের মহিমা ওটেকোনা আলো দেয়, আর ভেড়ার বাচ্চাটায় হইলেক ওটেকার বাতি।

২৪ আর সউগ জাতি উয়ার আলোতে যাওয়া আইসা করিবে, আর দুনিয়ার রাজালা উমার জাকজমক নিয়া ঐ গঞ্জত আসিবে।

২৫ দিনের বেলাত ওটেকার দুয়ারলা কোন দিন বন্ধ থাকিবে না আর ওটেকোনা রাতিও হবার না হয়।

২৬ সউগ জাতিক জাকজমকত আর সন্মানত ওটেকোনা আনা হবে।

২৭ অশুদ্ধি কোন কিছু জঘন্য কাম করে আর মিছাং কতা কয় এই নাকান কোন মানষি ওটেকোনা সোন্দের পাবার না হয়। যার যার নাম ভেড়ার বাচ্চার জীবন বইয়ত নেখা আছে, উমরায় খালি ওটে সোন্দের পাবে।

২২ তার পাছত ঐ স্বর্গদূত মোক “জীবন জলের নদী” দেখাইলেক। সেইটা কাইচের নাকান চকচকা, ঐটা ভগবানের আর ভেড়ার বাচ্চার সিংহাসন থাকি বাইর হয়। রাজপথের মইন্ধো দিয়া বয়া যাবার ধরছিলেক।

২ ঐ নদীর এপার ওপার দুই পারতে জীবন গছ আছে। ঐ গছত বারো নাকানের ফল ধরে। পতি মাসেই ফল ধরে আর উয়ার পাত দিয়া ঔষধ বানেয়া সউগ জাতি সুস্থ হয়।

৩ ওটে শাও আর রবে না। ভগবানের ভেড়ার বাচ্চার সিংহাসন ঐ গঞ্জত রবে আর উয়ার চাকরলা উয়ার সেবা করিবে।

৪ উমরা উয়ার মুখ দেখির পাবে আর উয়ার নাম উমারলার কপালত নেখা থাকিবে।

৫ ওটেকোনা রাতি আর হবার না হয় আর উমারলার বাতির আলো বা বেলার আলোর দরকার নাই। কেনেনা প্রভু ভগবান নিজেই উমার আলো হবে। উমরা চিরকাল শাসন করিবে।

৬ পাছত স্বৰ্গদূত মোক কইলেক, “এইলা কতা বিশ্বাসযোগ্য আৰ সচাং; প্রভু ভগবান নিজে ভাববাদীলার মইন্ধো দিয়া কতা কইচে। উয়ায় উয়ার দূতক পেয়েঠে দিচে। যেইলা অল্প কিছু কালের মইন্ধে নিশ্চিত কৰি ঘটবে, সেইলা উয়ার চাকরলারটে কবার বাদে ভগবান উয়ার দূতক পেয়াইচে।”

৭ যীশু কইচে, “দেখ, মুই খুব পচপচে আসির ধরচুং। যায় এই বইয়ের ভাববাদীর বাইক্যো পালন করে, উয়ায় আশুর্বাদ পাওয়া।”

৮ মুই যোহন এইলা সউগ দেখিলুং আৰ শুনিলুং। ওই স্বৰ্গদূত মোক এইলা দেখাইলেক, মুই উয়াক ভক্তি দিবার বাদে উয়ার ঠেংয়ত উবুর হলুং,

৯ কিন্তুক উয়ায় মোক কইলেক, এই থামেক, মুই তোমারলার আৰ তোমার গুরু ভাইলার মানে ভাববাদীলার আৰ যায় যায় এই শাস্ত্রের কতা পালন করে মুইও তোমারলার নাকান একটা চাকর। খালি ভগবানকে ভক্তি কর।

১০ তার পাছত উয়ায় মোক কইলেক, এই বইয়ের সউগ কতা মানে, ভগবানের বাইক্য গোপন না থুইস। কেনেনা সমায় একেবারে বগলত আসচে।

১১ যায় অন্যায়কারি উয়ায় ইয়ার পাছত অন্যায় করুক। যায় পাজি উয়ায় পাইজামী করিতে থাকুক, সৎ মানষি সৎ কাম

করিতে থাকুক; আর যায় পবিত্র উয়ায় এইলার পাছতও পবিত্র থাকুক।

১২ যীশু কইলেক, “দেখ, মুই পচপচে আসির ধরচুং, আর যার যেই নাকান কাম, উয়াক তেমন ফল দিম।

১৩ মুই আলফা আর ওমিগা, আরম্ভ আর শেষ।”

১৪ যায় যায় নিজের নিজের পোশাক ধুইয়া ফেলোয় আশুবাদ পাওয়া উমরায়, উমরা জীবন গছের ফল খাবার অধিকারী হয়। আর দুয়ার দিয়া গঞ্জত সোন্দের পাবে।

১৫ শুয়োরের নাকান জঘন্য মানষি, যাদুকর, ব্যভিচারী, খুনী, প্রতিমা পূজাকরাইয়া, আর যায় যায় মিছাং ভাল পায় আর মিছাং রটেয়া বেরায় উমরা সগায় বায়রাত পরি রবে।

১৬ মুই যীশু মোর নিজের দূতক পেঠালুং, যাতে উয়ায় তোমারলারটে সমিতির বাদে সাক্ষ্য দিবার পারে। মুই দায়ূদের মূল আর গুষ্টি, ভোরের ভলভলা তারা।

১৭ পবিত্র আত্মা আর কইনা কবার ধরচে, আইস! যায় শোনে উয়ায়ও কউক আইস! আর যার টিস্সা নাগচে উয়ায় আসুক, আর যায় জল খাবার চায় উয়ায় বিনা পাইসায় জীবন জল খায়া যাউক।

১৮ যেই মানষি এই বইয়ের লেখা ভাববানীর সউগ বাইক্য শোনে, মুই উয়ারটে এই সাক্ষ্য দিবার ধরচুং, কাণ্ডো যদি ইয়ার

সোদে কোন যোগ করে তাইলে ভগবানও এই বইয়ের সউগ ঘাত  
উয়ার জীবনত যোগ করিবে।

১৯ আর যদি এই বইয়ের ভাববানীর বাইক্য থাকি কাণ্ডো কোন  
কতা বাদ দেয় তাইলে ভগবানও এই বইয়ের জীবন গছ আর  
পবিত্র গঞ্জের অধিকার উয়ারটে থাকি বাদ দেওয়া হবে।

২০ যায় এই বিষয়ে সাক্ষ্য দেয়, উয়ায় কবার ধরচে, “সচাং মুই  
পচপচে আসির ধরচুং।” আমেন; প্রভু যীশু, আইস!

২১ প্রভু যীশুর আশুর্বাদ ভগবানের সউগ মানষিলার সাথে সাথে  
থাকুক। আমেন॥